


Νyεmε Jοrε Kadasi



The New Testament in Anufo (Chokosi)

Nyeme Jore Kadasi
The New Testament in Anufo (Chokosi)

copyright © 2009 Wycliffe Bible Translators, Inc.

Language: Anufo

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source files dated 1 May 2025
fe36d0e6-2a60-5e15-8d1c-8bf275389598

Contents

MATIO	1
MARAKO	57
LUKA	91
YOHANE	149
SAYOOWAM	190
ROMAFOM	245
1 KORINTOFOM	270
2 KORINTOFOM	294
GALATIYAFOM	310
EFESOFOM	319
FILIPYAFOM	327
KOLOSİYAFOM	333
1 TESALONIKAFOM	339
2 TESALONIKAFOM	344
1 TIMOTI	347
2 TIMOTI	354
TITOSI	359
FILEMON	362
HIBURUFOM	364
YAKOBO	383
1 PETORO	389
2 PETORO	396
1 YOHANE	401
2 YOHANE	407
3 YOHANE	408
JUDA	409
SAYIKEREWA	411

Labari kpa n bo MATIO akere i ni

Kabo ba kere Yesu nam dura barasu ni

¹ Ahin dura kereewam kere ti Yesu Kristo nam busu wo, fiteeri Abraham ko tu Feme Davidi fa ba juuri sangha bo bu wuuri yiri Yesu ni. I nam n busu yaa ni,

² Abraham wuuri Izaki, na Izaki awu Jakobu, na Jakobu awu Yuda ni i niemam,

³ na Yuda awu Faresa ni Zara bo bu ni yo la Tama ni, na Faresa awu Hesarom, na Hesarom awu Aram,

⁴ na Aram awu Aminadabu, na Aminadabu awu Naasoni, na Naasoni awu Salemo,

⁵ na Salemo awu Boosi bo i ni yo la Rahabu ni, na Boosi gusu awu Yobedi bo i ni yo la Ruti ni, na Yobedi gusu anya awu Yese

⁶ bo i gusu wuuri Feme Davidi ni.

To, na Feme Davidi awu Feme Solomon bo i ni yo la Yuriya yi ni,

⁷ na Feme Solomon gusu awu Feme Robowam, na Feme Robowam awu Feme Abiya, na Feme Abiya awu Feme Asafu,

⁸ na Feme Asafu awu Feme Yosafati, na Feme Yosafati awu Feme Yoram, na Feme Yoram awu Feme Yoziya,

⁹ na Feme Yoziya awu Feme Yowatam, na Feme Yowatam awu Feme Ahazi, na Feme Ahazi awu Feme Hezekiya,

¹⁰ na Feme Hezekiya awu Feme Manase, na Feme Manase awu Feme Amoni, na Feme Amoni awu Feme Yosiya,

¹¹ na Feme Yosiya awu Feme Yekoniya ni i niemam. Nyini sangha n ye bu miere Yisarelifom fiteeri bu asien su koori Babiloniya asien su n a.

¹² Bu faari bu koori Babiloniya n de n sin ni, na Feme Yekoniya awu Salatiyeli, na Salatiyeli awu Zorobabeli,

¹³ na Zorobabeli awu Abiyidu, na Abiyidu awu Eliyakimu, na Eliyakimu awu Azore,

¹⁴ na Azore awu Sadoki, na Sadoki awu Akim, na Akim awu Eliyudu,

¹⁵ na Eliyudu awu Eleyaza, na Eleyaza awu Matan, na Matan awu Jakobu nyinga bekun,

¹⁶ na nyini Jakobu n awu Yosefu, Mariya hun. Mariya wuuri Yesu bo bu fere i ka Kristo n a, Tiidefo n bo Nyeme ase ka i sunma i ni.

¹⁷ To, nyini kere ka fiteeri Abraham fa ba juuri Feme Davidi, bu tiiri nanam buru ni nna wo, na fiteeri Feme Davidi fa ba juuri sangha bo bu miere Yisarelifom koori Babiloniya asien n su ni, bu tiiri nanam buru ni nna wo, na fiteeri nyini sangha n fa ba juuri sangha bo bu wuuri Kristo Tiidefo ni, bu gusu tiiri nanam buru ni nna wo.

Kabo bu wuuri Yesu Kristo ni

¹⁸ Kabo bu wuuri Yesu Kristo n yaa. Bu yo faari i ni Mariya ceeri Yosefu wo, ama, kana bu ba ja i ko i hun n dika ni, na ba fa nu ka i bita nyinse bo i fite Nyeme Awiewie Casi n de yiko nu wo.

¹⁹ I hun Yosefu yo ti sono bo i yo sa bo i ko atin su Nyeme do o, nyini ti, wo koro ma ka i wura i yi n nyinse jama nu, na wo fa sunsunni ka i yaki i asiri nu.

²⁰ Saŋga bo i wo birisi su n sɔ ni, na Micera n dɛɛ mɛrɛkɛ aba i dɔ alɛlɛ nu, aba ase i ka, “Fɛmɛ Davidi anuma Yosefu, má a soro sɛrɛ ka a ja Mariya, na a fa i kɔ u dika, dama Nyɛmɛ Awiewie Casi ni maari i nyinse n a.

²¹ I wú baabiesɔ na a fere i ka Yesu, i bu la ka Tiidefɔ, dama yiri bá yi i minɛm fite bu satiem nu a.”

²² Tɔ, nyini n kɛrɛ yoori sɔ, adena i ma Nyɛmɛ nɔanie kanfɔ n nɔanie n bá yo yiiwa, kabo wɔ jɔjɔ ka,

²³ “Sunɔguru bo wɔ nya si má biesɔ bá nyinse,

na i wú baabiesɔ,

na bu fére i ka *Emanuweli*,”

i bu la ka, Nyɛmɛ wo ya dɔ.

²⁴ Saŋga bo Yosefu tengeeri ni, na wɔ yo kabo Micera n dɛɛ mɛrɛkɛ n seeri i ni, na wɔ fa Mariya aba i dika.

²⁵ Ama, i ni yiri asaŋga má bara ni biesɔ, haari Mariya ba wuuri baabiesɔ, na Yosefu atun i duma ka Yesu.

2

Kabo asarambaa kɔresiyifɔm baari Yesu busu nie ni

¹ Saŋga bo bu wuuri Yesu miɛ n bo bu fere i ka Betilehem na i wo Yudiya awɔrɛ n nu ni, nyini saŋga ni Herode ti nyini awɔrɛ n nu fɛmɛ a. Na asarambaa kɔresiyifɔm nbem afite wie afiiri, aba Yerusalem aba abisa ka,

² “Baa n bo ba wu i na i bá yo Yuda fɔm fɛmɛ n wo ni wɔ? Ya ŋu i asarambaa wie afiiri dɔ, ye ya ŋa ya bá na ya bá kutu i a.”

³ Fɛmɛ Herode tiiri sɔ ni, na jɔrɛ n amie i ni Yerusalem fɔm kɛrɛ.

⁴ Na wɔ fere Nyɛmɛ sayoowa dɔnguyofɔm nkpienkpienm, ni Nyɛmɛ nɔanie kerefɔm kɛrɛ atien bu nɔɔ, na wɔ bisa bu ka, “Ye bu wú Kristo Tiidefɔ n ni wɔ?”

⁵ Na ba bɔ i nu ka, “Betilehem bo i wo Yudiya asien n su ni, dama kabo Nyɛmɛ nɔanie kanfɔ n kɛrɛeri i lɛɛ. Micera n ŋa o,

⁶ ‘Wɔrɔ Betilehem bo a wo Yuda asien n su ni,
a ti má miɛ kaan.

Wɔrɔ ti Yuda asien n su miɛm anyunuyifɔm kun a,

dama ka fɛmɛ n bo m yí i na i bá yo m mine Yisarelifɔm tiifo ni,
i fite u dɔ ɔ.’ ”

⁷ Na Fɛmɛ Herode afere asarambaa kɔresiyifɔm n asiri nu na i si saŋga bo asarambaa n tiɛeri ni.

⁸ Na wɔ kere bu ka, “Am kɔ Betilehem, na am kɔ nienie nyunyumi, na nzen am ŋuuri baa ni, am kpie am nyi ba se m na m gusu kó kutu i.”

⁹ Fɛmɛ n jɔjɔri bu dɔ wieeri sɔ n na ba de atin, bu wo kɔ su sɔ ni, na ba ŋu asarambaa n bo bu ŋuuri i wie afiiri ni, ka i du bu mɔ haari na wɔ kɔ ajina awuru n bo baa n wo nu n tii su.

¹⁰ Bu ŋuuri asarambaa n sɔ ni, na bu ahore ajo agaya.

¹¹ Na ba kɔ awura awuru n nu, na ba ŋu baa n ni i ni Mariya na ba kutu i, na ba yo i anse. Na ba nya ateke bu kurukum, na ba yi aceerim ace i. Aceerim n la sika, ni tulaaleɛ nvanvanifo be, i ti samene wɔ, ni baka nyunvuin nvanvanifo.

¹² Nyini sin na ba fa atin be akpie bu nyi ako bu bɔsu, dama Nyɛmɛ ase bu alɛlɛ nu ka má bu kɔ Fɛmɛ Herode dɔ kun.

Kabo Yosefu faari Yesu ni i ni ŋmati kɔori Ijipiti ni

¹³ Asarambaa kɔresiyifɔm n kɔ wieeri ni, na Micera n dɛɛ mɛrɛkɛ aba Yosefu dɔ alɛlɛ nu, aba ase i ka, “Yasu fa baa n ni i ni na am ŋmati kɔ

Ijipiti asien su, má nyini Feme Herode wo baa ni eni su na i kun i. Am ko wo do haari ceen bo m ba kaaki ba ma am noo ka am yasu do.”

¹⁴ Na Yosefu ayasu afa baa n ni i ni anmati kongue n kere, na ba ko Ijipiti asien n su,

¹⁵ na ba wo do haari Feme Herode aba awu. Ahin yoori so ni, i ma kabo Micera n ma i noanie kanfom n yo jooori n yo yiiwa a. I na, “Ma fere m wa n afite Ijipiti asien n su.”

Kabo Feme Herode ma bu kuunri nbaabieso kan kanm ni

¹⁶ Sangha bo Feme Herode ba faari nu ka asarambaa koresiyifom n adadaka i ni, na wo fa yaa agaya, na wo ma i sojam noo ka bu ko Betlehem mie n nu, ni i aheme aheme n kere su na bu ko kun nbaabieso kan kanm kere bo ba wu bu kisa, ko ju afo nnyo, dama i sunsun ka sangha n bo asarambaa koresiyifom n na asarambaa n tieeri ni, wo ju ka afo nnyo.

¹⁷ Nyini kere ka, kabo Nyeme noanie kanfo Jeremiya yo jooori n ayo yiiwa. I na,

¹⁸ “Ya ti awie bo nga Rama mie kpiri nu,
sun ni ahoresaaki wo do,
bara Rakeli susun i nbaam busu.

Wo kete ka ma be kpata i, dama i nbaam wo ma bere kun.”

Kabo Yosefu faari Yesu ni i ni fiteeri Ijipiti baari Nazareti ni

¹⁹ Sangha bo Feme Herode ba wuuri ni, na Micera n dee mereke aba Yosefu do alele nu Ijipiti asien n su, aba ase i ka,

²⁰ “Yasu fa baa n ni i ni, na am kpie am nyi ko Yisareli asien su, dama minem bo bu kpiiri ka bu kun baa ni, ba wu.”

²¹ Na Yosefu ayasu afa baa n ni i ni, na ba kpie bu nyi ako Yisareli asien n su.

²² Ama, sangha bo i tiiri ka Akilawu adi i si Feme Herode femeya n Yudiya awore n nu ni, na sere ati i ni kabo i ko wo do. Na Nyeme mereke aba i do alele nu, aba akere i kabo i yo, na wo yasu ako Galili awore n nu ako awo mie be bo bu fere i ka Nazareti n su.

²³ Nyini n kere ka, kabo Nyeme ma i noanie kanfom n jooori n yo yiiwa a, fa ko Kristo Tiidefo n do. I na, “Bu fere i ka Nazaretifo o.”

3

Kabo Yohane Nyeme Nzue Biefo n kaanri Nyeme jore ni

¹ Nyini sangha n na Yohane Nyeme Nzue Biefo n ako Yudiya boro kpantain n nu, ko sukan Nyeme jore, i na,

² “Am kaaki am wo, dama sangha n adodo bo Nyeme Feme ba nie i minem su.”

³ Yiri Yohane n ye Nyeme noanie kanfo Esaya yo jooori i jore n a. I na, “Sono be subo ndoori boro kpantain n nu se ka,
‘Am sese Mibie n atin n su,
na am yo i atin n dongu.’ ”

⁴ Yohane wuraari sutura bo bu faari nyooma ndore wuuri i a. Na wo fa jina abo i wi nu. I diire yo la lalom ni wie wo.

⁵ Na mine afite Yerusalem mie kpiri n nu, ni Yudiya dee awore miem kere su, ni Yodan dee bue n kere aba i do,

⁶ na ba kan bu ngasi ni bu satie kere akere Nyeme, na Yohane abie bu Nyeme nzue Yodan kunma n nu.

⁷ Ama, sangha bo i ba nuuri ka Farasifom ni Sodusifom dongu suba i do ka i bie bu Nyeme nzue ni, na wo se bu ka, “Ambere burukoonufom bo am

ti ka woom ni, n̄ma seeri am ka am n̄mati fite nyini suicin kekereke n bo Nyeme sufa ba am dɔ n nu a?

⁸ Am yo sakpa bo i kere ka am akaaki am wo.

⁹ Na má am sunsun ka Abraham ti am na n dɛɛ ti, na am koro fite nyini suicin n nu. M suse am wɔ lɛɛ, ka, Nyeme koro ma ahin yabuɛm ni kaaki nbaam ma Abraham.

¹⁰ Nyeme asi i samba n nana ase baka kere bu na i kpiɛ i ji sin nu, yiri bo i suuwa ti má kpa ni.

¹¹ Mini sufa nzue biɛ am a, na am yo casi, bo i kere ka am akaaki am wo, ama, yiri bo i wo m sin suba n tara m fieo, m ti kaan ni bo m dodo i. Yiri fá Awiewiɛ Casi n ni sin yo am casi a, kabo sɔnɔ biɛ nzue na i yo casi ni.

¹² I bita i ngani kpaja fieeba bo i ba bobo ngani n gbangba n su, na i kpája yi ngani mbaa n fa gɔ i bondo nu, na i nyá yara kunkun n sin n bo i je na i nɔ má n nu.”

Kabo Yohane biɛri Yesu Nyeme nzue ni

¹³ Nyini san̄ga n na Yesu afite Galili awɔrɛ n nu, aba Yohane dɔ Yodan kunma n nu ka Yohane biɛ i Nyeme nzue.

¹⁴ Ama, na Yohane akete ka i biɛ má Yesu Nyeme nzue ni. I n̄a, “Má i ti ye ni ka wɔrɔ biɛ m Nyeme nzue a, ye nzu ti ye a n̄a mini biɛ u a?”

¹⁵ Ama, na Yesu abɔ i nu ka, “Ma ya yo sɔ adena ya yo deke kere bo Nyeme koro ni.” I seeri sɔ n na Yohane asoro su.

¹⁶ San̄ga bo Yohane biɛri Yesu Nyeme nzue n wieeri n na i fiteeri nzue n nu ni, kpen̄ga na an̄goro ateke, na wɔ n̄u ka Nyeme Awiewiɛ n ajura ka tiiwa dɛɛ su aba atana i n̄u.

¹⁷ Dɔ na wɔ ti akonvi be n̄ga an̄goro, i n̄a, “Ahin ti m wa a, m koro i agaya, m ahore ajo i n̄u.”

4

Kabo Sitana yoori Yesu na i niɛ ni

¹ Nyini sin na Nyeme Awiewiɛ Casi n afa Yesu akɔ boro kpantain n nu ka Sitana kɔ yo i na i niɛ, ka i yó yiri Sitana n dɛɛ koroowa nzen i yó má.

² Dɔ na Yesu acici i nɔɔ haari cɛɛn aburana, kɔngue ni wiesu bo i di má pui, na ahɔɛ aba ati i.

³ Na Sitana bo bu kaaki fere i ka N̄gɛɛsɔfɔ n aba ase i ka, “Nzen a ti Nyeme Wa, se ahin yabuɛm n na bu kaaki diire.”

⁴ Ama, na Yesu abɔ i nu ka, “Ba kere i Nyeme Jɔrɛ Kadasi n nu ka, ‘Má diire ngumi ma sɔnɔ ngɔɔ a, ama, i de nɔaniɛ kere bo i fite Nyeme dɔ n gusu.’ ”

⁵ Na Sitana n akaaki afa Yesu akɔ Yerusalem miɛ kpiri n nu, na wɔ kɔ afa i ajina Nyeme Sereebiri Awuru n tii su lenlen̄ge, na wɔ se i ka,

⁶ “Nzen a ti Nyeme Wa, ti tɔ asiɛnḡu na m niɛ. Dama ba kere i Nyeme Jɔrɛ Kadasi n nu ka,

‘Nyeme má i mɛrɛkem nɔɔ na bu niɛ u dika.’

Ba kaaki akere i ka,

‘Bu fá bu saa so u nu,

na má u jaa bo yabuɛ be.’ ”

⁷ Na Yesu ase i ka, “Ba kaaki akere i Nyeme Jɔrɛ Kadasi n nu bekun ka, ‘Má a yo Micera Nyeme n na a niɛ kabo i yiko ti barasu.’ ”

⁸ Nyini sin na Sitana n afa i akɔ buka be tii su lenlen̄ge, na wɔ kere i durunya n nu asiɛn kere, ni kabo bu ti na bu yo nyumi barasu.

⁹ Na wɔ se i ka, “Nzen a kutu suuri m, m fá nyinim n kere ma u.”

¹⁰ Na Yesu ase i ka, “Wɔrɔ Sitana, fa cinsi m bi bere. Dama ba kere i Nyeme Jɔre Kadasi n nu ka,
‘Kutu Micera u Nyeme ni,
na a su yiri ngumi.’ ”

¹¹ Na Sitana n ako ayaki i, na Nyeme merékem aba i do na ba ba asu i.

Kabo Yesu boori i juma bu Galili awɔre n nu ni

¹² Na sanɔa bo Yesu ba tiiri ka ba tara Yohane anyi i dansaraka ni, na wɔ fite bere ako Galili awɔre n nu.

¹³ I yasuuri Nazareti mie n nu ni, na wɔ ko awo Kapenam mie kpiri n bo i wo dodo Galili kunma kpiri ni, na i wo Zabulonfɔm ni Nafatalifɔm dee awɔre n nu ni.

¹⁴ I ko tanaari do ni, adena kabo Nyeme noanie kanfo Esaya yo jɔjɔri n yo yiiwa. I na,

¹⁵ “Zabulon ni Nafatalifɔm, am so am sui,
ambere bo am wo dodo kunma kpiri n bo i wo Yodan kunma n wie afiri dee bue ni,
ambere bo am wo Galili awɔre n ni, deke bo bu ti má Yudafɔm wo ni,
am so am sui.

¹⁶ Minem bo bu wo awosin nu ni,
ba nu wein bambaka ni.

Na bo bu wo awosin ni yiwee nu ni,
bere ye sin ni je ta wein ma bu a.”

¹⁷ Fite nyini sanɔa n na Yesu abo i bu sukan Nyeme jɔre, i na, “Am kaaki am wo, dama sanɔa n aju bo Nyeme Feme bá nie i minem su.”

Kabo Yesu fereeri jombaa tarafɔ nbem ka bu su i su ni

¹⁸ Na sanɔa bo Yesu sunati Galili kunma kpiri n noo su ni, na wɔ nu mine nnyɔ nbem, bu ti soɔo kun nbaam wɔ. Bere la Simon bo bu fere i ka Petoro ni, ni i niema Andere. Bu wo bu diendie sandi su kunma kpiri n nu, dama bu ti jombaa tarafɔm wɔ.

¹⁹ Na Yesu ase bu ka, “Am bra na am ba su m su na m má am tien minem noo ma m, kabo am tara jombaam ni.”

²⁰ I seeri so ni, na ba kaba ayaki bu diendiem ni, na ba su i su.

²¹ I nati koori i nyunu kaan, na wɔ nu mine nnyɔ nbem bekun, bu ni bu si, bu fere i ka Zebedi, bere la Yakobo ni i niema Yohane. Bu ni bu si n wo lee nu suyo bu diendiem dongu, na Yesu afere bu.

²² Do na ba kaba afite lee n nu ayaki bu si ni, na ba su i su.

Kabo Yesu kaanri Nyeme jɔre na i ma tukpakifɔm nyaari laifie ni

²³ Na Yesu abara aye Galili awɔre n kere nu, na i sukere minem bu tientienbunoo soom n nu, deke bo bu sere Nyeme na bu kere minem Nyeme jɔre nu ni, na i sukan labari kpa n fa ko Nyeme femeya n su, na wɔ ma minem bo bu la tukpaki barasu barasu n kere anya laifie.

²⁴ Na i duma ata abara aye Siriya awɔre n kere nu, na ba so minem bo bu la tukpaki barasu barasu kere, ni bo bu di yaari agaya bu nuniembaa nu, aba i do ka i ma bu nya laifie. Ajinim wo bu nbem nu, na nbem to ngbiti, na nbem gusu saam ni bu jaam awu, na wɔ ma bu kere anya laifie.

²⁵ Na jama beberebe afite Galili awɔre n nu, ni Mie Burum dee awɔre n nu, ni Yerusalem mie kpiri n nu, ni Yudiya dee awɔre n nu, ni Yodan kunma n sin do, na bu kere aba asu i su.

5

Kabo minem yo na bu nya terefie Nyeme do ni

¹ Yesu nuuri jama n ni, na wo fun ako atana buka be su. Na i susufom n aba i do.

² Na wo bo i bu ka i kere bu, i na,

³ “Bere bo bu ti yaarifom bu ahore su ni,
terefie wo bu do,
dama Nyeme femeya n ti bu dee wo.

⁴ Bere bo bu ahore asaaki ni,
terefie wo bu do,
dama Nyeme da bu ahore a.

⁵ Bere bo bu yo bu nu kaan ma Nyeme ni,
terefie wo bu do,
dama Nyeme ba fa durunya n ma bere wo.

⁶ Bere bo bu nyunu aboro ka bu yo sa bo i ko atin su
kabo sono la konviki fa ko diire ni nzue busu ni,
terefie wo bu do,
dama Nyeme ba ma bu akunnuyi a.

⁷ Bere bo bu si anunfo ni,
terefie wo bu do,
dama Nyeme ba si bu anunfo a.

⁸ Bere bo bu ahorembaa ti casi ni,
terefie wo bu do,
dama bere ba nu Nyeme a.

⁹ Bere bo bu kpata aluwa ni,
terefie wo bu do,
dama Nyeme ba fere bu ka i nbaam a.

¹⁰ Bere bo bu yo sa bo i ko atin su n dee ti
na minem kere bu wuwuruwa ni,
terefie wo bu do,
dama Nyeme femeya n ti bere dee a.”

¹¹ Na Yesu akaaki ase ka, “Amberε bo minem ba kpie am nzuko, na bu kere am wuwuruwa, na bu bu kore barasu kere so am, na i kere fite ka am ti m deem dee ti, terefie wo am do.

¹² Bu ba yo am so, am ma am ahore jo agaya, dama am nya nkato bambaka Nyeme do. I fite ka, kabo bu yo kereeri dawa dee Nyeme nonie kanfom n wuwuruwa n lee.”

Kabo Yesu na i susufom ti ka njin ni wein ni

¹³ Na Yesu ase ka, “Amberε, m susufom ni, am ti ka njin wo durunya n nu a. Ama, nzen njin fiefie nya ba saari wieeri, i koro yo ma i fiefie kun. Nyini sangga ni, wo ka ngbeen lee, nka bu fa butu wo, na minem tientien sangga i ni fa.

¹⁴ Amberε ti wein bo i ta ma durunya n nufom a. Mie kere bo i wo kpere su, sono kere nu i wo.

¹⁵ Sono be nya so ma fitana su na i fa ganga butu su, ama, i fa taka deke su angoro wo na i ta wein ma awuru n nufom kere.

¹⁶ Nyini ti, am ma am wein ta durunya n nu, na sono kere nu am sakpa yoowa, adena bu kansi am Si Nyeme bo i wo angoro ni.”

Kabo Yesu na ya su Nyeme nonie kpamaawa n su barasu ni

¹⁷ Na Yesu ase ka, “Fa ko Moyisi nonie kpamaawa n ni Nyeme nonie kanfom dee kereewa n su, ma am sunsun ka ma ba ka m ba ce bu se wo.

Ai, ma ba má ka m ba ce bu se wo, ama, ma ba ka m ma i kere bá yo yiiwa a.

¹⁸ Nahore ye m suse am n a, kabo angoro ni asiengu toko wo bere ni, bu yi má noanie n be haari kampiti so n mmoo fite má noanie kpamaawa n nu, haari na i deke n kere ba awieeri.

¹⁹ Nyini ti, sono kere bo i buuri Nyeme noanie maawa n kampiti so mmoo ngbeen, na i kereeri minem ka bere gusu yo so, bu fere i mi ka sono kaan Nyeme femeya n nu. Ama, sono kere bo i suuri Nyeme noanie kpamaawa n su na i kereeri minem ka bu gusu yo so, bu fere i mi ka sono bambaka Nyeme femeya n nu.

²⁰ Nyini ti, m suse am wo lee, ka, kana am bá wura Nyeme femeya n nu, má ka am yo sa bo i ko atin su Nyeme do n tara Farasifom, ni Nyeme noanie kerefom dee ni.”

Kabo Yesu kere fa koori yaafa su ni

²¹ Na Yesu akaaki ase ka, “Am ati ka bu seeri ya nam ka, ‘Má a kun sono,’ na ‘Nzen woro kere bo a kuunri sono, bu dí u jore.’

²² Ama, m suse am wo lee, ka, woro kere bo a faari yaa u benggu nu, wo yo daka ka bu di u jore. Sasu bekun, woro kere bo a seeri u benggu ka i ti sono ngbeen, wo yo daka ka bu fa u jina Yuda fom joredifo nkpienkpienm n nyunu na bu di u jore. Na nzen woro kere bo a seeri u benggu ka i ti sinnzin, Nyeme fá u wura ceema sin n nu.

²³ Nyini ti, nzen a fa u aceeri aba ka a ba sere Nyeme, na a tenge su ka u ni u benggu be la ngasi,

²⁴ yaki u aceeri n yoowa yoobiri n ka, na a ko na am ko yo am afien dongu, na a nya ba fa u aceeri n ma Nyeme.

²⁵ Nzen u ni be la jore, na nzen i koro ka i fa u ko jore diibiri, jokoti tara i mi n jaa, na má jore n ju jore diibiri n ni, má nyini, i mi ni fá u ko wura joredifo n saa nu, na yiri gusu fá u ma dansaraka niefu ni, na yiri gusu nya nyi u.

²⁶ Nahore ye m suse u n a, nzen a woori do na a to má kaari n kere awie má, a nya má atin fite má dansaraka n nu.”

Kabo Yesu kere fa koori ajaa ciire saaki su ni

²⁷ Na Yesu akaaki ase ka, “Am ati ka ba se ka, ‘Má a saaki ajaa ciire.’

²⁸ Ama, mini, m suse am wo lee, ka, woro kere bo a nie bara, na u konvi wuraari i, i ti ka a saaki ajaa ciire u ahore su wo lee.

²⁹ Nzen u nyumbaa n kun cin u wuraari satie nu, lokoti yi i tu. I ti ye ni ka a fun u nuniembaa n bue kun, ni bo a fa u nuniembaa n kere wura ceema sin nu.

³⁰ Nzen u saa fomboro cin u wuraari satie nu, kaba kpie i tu. I ti ye ni ka a fun u nuniembaa n bue kun, ni bo a fa u nuniembaa n kere wura ceema sin nu.”

Kabo Yesu kere fa koori bara ajaa yaki su ni

³¹ Na Yesu akaaki ase ka, “Sasu bekun, ba kaaki ase am ka, ‘Sono kere bo i yaki i yi ajaa, i ti ye ni ka i mi ma bara n ajaa yaki kadasi bo i kere ka i hun ayaki i ajaa.’

³² Ama, mini, m suse am wo lee, ka, sono kere bo i faari i yi jiiri, na wo yo má ka bara n ako somaya ye i fa i jiiri a, na nzen bara n ko jaari bieso fofore, i mi n ma bara n asaaki ajaa ciire lee. Na sono bo i faari bara n jaari, yiri gusu asaaki ajaa ciire lee.”

Kabo Yesu kere fa koori ndie taanwa su ni

³³ Na Yesu akaaki ase ka, “Am akaaki ati ka ba se ya nam ka, ‘Má a tan ndie na a kaaki wɔrɔ u nɔɔ, ama, ma u sui wo ndie bo a tan i ama Micera n su, na a yo i.’

³⁴ Ama, mini, m suse am wɔ lɛɛ, ka, má am tan ndie mmɔɔ fieo. Má am tan angoro, dama Nyeme femeya n woobiri lɛɛ.

³⁵ Má a tan asienngu gusu, dama i ti Nyeme jaa gbagbaa jinaabiri wɔ. Má a tan Yerusalem, dama i ti ya Micera Feme n dɛɛ miɛ kpiri wɔ.

³⁶ Má a kaaki se ka a tan u tiiawa, dama a koro yo má u tiinmie kun mmɔɔ fofoe, wara biri.

³⁷ Am ma am nɔanie kere yo tika. Nzen i ti ‘Eɛn,’ am se ka, ‘Eɛn.’ Nzen i ti ‘Ai’ gusu a, am se ka, ‘Ai.’ Sin nyini sin, nɔanie kere bo i buka su n fite Sitana dɔ ɔ.”

Kabo Yesu kereeri ka má ya fa minem satie tɔ bu kaari ni

³⁸ Na Yesu akaaki ase ka, “Am ati ka ba se ka, ‘Nzen sɔnɔ yi u nyumbaa, wɔrɔ gusu yi i mi dɛɛ, na nzen i bo tuuri u jee, wɔrɔ gusu tu i mi dɛɛ.’

³⁹ Ama, mini, m suse am wɔ lɛɛ, ka, nzen sɔnɔ yoori u satie, má a wɔrɔ satie ma i mi. Haari nzen be fiinri u nyɔɔnu, kaaki bue nyinga n gusu ma i na i fin buka su.

⁴⁰ Nzen be cici u lekisi ka i fa u kɔ jɔre diibiri, na i de u tanlɛɛ kaan n be i wo i bu ni, kaba yi i tii su dɛɛ bambaka n mmɔɔ buka i su.

⁴¹ Nzen fanɔfɔ be miɛri u ka a sɔ i sɔori kɔ ju ajaari natiwa akpii kun ma i, kaba fa i kɔ ju akpii nnyɔ.

⁴² Sɔnɔ bo i sereeri u deke be, má a kpie i, na sɔnɔ bo i ɲa a fie i deke be, má a kete.”

Kabo Yesu kereeri ka ya koro minem bo bu kpɔ ya ni

⁴³ Na Yesu akaaki ase ka, “Am ati ka ba se ka, ‘A koro sɔnɔ bo i koro u ni, na a kpɔ sɔnɔ bo i kpɔ u ni.’

⁴⁴ Ama, mini, m suse am wɔ lɛɛ, ka, am koro am kpɔfɔm, na am sere Nyeme ma bo bu kere am wuwuruwa ni,

⁴⁵ adena am yó am Si Nyeme bo i wo angoro ni nbaam. Dama yiri ma wie fite ma satieyofɔm, ni sakpayofɔm kere a, na i kaaki ma nzue tɔ ma bo bu yo sa bo i kɔ atin su i dɔ ni, ni bo bu yo má sa bo i kɔ atin su i dɔ n kere.

⁴⁶ Nzen am nya koroori minem bo bu koro am ɲgumi ni, nzu ɲkatɔ, ye am nya i a? Dama haari lampodefɔm bo bu sisi minem ni mmɔɔ yo sɔ ɔ.

⁴⁷ Na nzen am bisa am danfom ɲgumi ahin, am sunsun ka am ayo nzu sakpa ye be koro yo má i a? Bo bu su má Nyeme ni mmɔɔ koro yo sɔ, má sɔ?

⁴⁸ Tɔ, am ma am woowa n ti kpa bo i la má anjusu, kabo am Si Nyeme bo i wo angoro n dɛɛ woowa n ti kpa bo i la má anjusu ni.”

6

Kabo Yesu kereeri ya ka ya ce yaarifɔm aceeri barasu ni

¹ Na Yesu ase bu ka, “Am si am ɲu sa, na má am yi am nyemesu sayoowa fite fofoe nu, adena minem ɲu i na bu kansu am. Nzen am yoori sɔ, am nya má ɲkatɔ be, am Si Nyeme bo i wo angoro n dɔ.

² Nyini ti, nzen a ɲa a ce yaarifɔm aceeri, má a bo ndoori na sɔnɔ kere ti, kabo burukɔnufɔm yo i bu tientienbunɔɔ sɔɔ n nu, ni miɛ kunnu atinberem n su ni, dama bu yo sɔ ɔ, adena minem kansu bu. Nahɔre ye m suse am n a, bere ɲkatɔ awieeri lɛɛ, ye ba du mɔ anya i n a.

³ Ama, nzen a nja a ce yaarifom aceeri, má a ma be nju i fieo, na bu si sa bo a suyo i ni,

⁴ adena u aceeri n yo asiri nu. Do na u Si Nyeme bo i nju sa kere bo a yo i asiri nu ni, n tó u kaari.”

Kabo Yesu kereeri ya nyemesere atin barasu ni

⁵ Na Yesu akaaki ase ka, “Nzen sanja bo am ba susere Nyeme, má am yo kabo burukonufom yo ni, dama bere koro ka bu sujina bu tientienbunoo soom n nu, ni deke bo atingberem jaja nu ni, na bu sere Nyeme adena minem nju bu. Nahore ye m suse am n a, bu nkatoo awieeri lee, ye ba du mo anya i n a.

⁶ Ama, sanja bo a ba susere Nyeme, wura u soroo na a nyi u anoo, na a sere u Si Nyeme bo be nju má i ni, na u Si Nyeme bo i nju sa kere bo a yo i asiri nu ni, nyá to u kaari.

⁷ Na sanja bo am ba susere Nyeme, má am yo nanmie kabo bo bu su má Nyeme n yo ni, dama bu sunsun ka bu jooori beberebe n ye Nyeme de bu sere a.

⁸ Má ambere yo ka bere, dama am Si Nyeme si am sa koroowa kere n mmoo ka, ye am nya sere i a.

⁹ Nyini ti, kabo i ti ye ni ka am sere Nyeme yaa.

‘Ya Si, bo a wo angoro ni,
ma minem bu u duma casi ni.

¹⁰ Ma u femeya n bra.

Ma u koroowa yo asienngu fen, ka alecema nu.

¹¹ Ma ya nyuma dee ceen nu, ya noo nu diire.

¹² Fa ya ngasi fa ce ya,
kabo ya gusu afa ace bo bu do ya ngasi ni.

¹³ Má a ma deke be yo ya na ya wura satie nu,
ama, yi ya fite anyumbiri nu.

[Dama, u dee la femeya, ni fanja, ni jirima sanja kere. Ami.]’

¹⁴ Dama nzen am fa minem ngasi ce bu, am Si Nyeme bo i wo angoro n gusu fá am dee ce am.

¹⁵ Ama, nzen am afa má minem ngasi ace má bu, am Si Nyeme bo i wo angoro n gusu fá má am dee ce má am.”

Kabo Yesu kereeri ya ka ya cici ya noo ni

¹⁶ Na Yesu akaaki ase ka, “Sanja bo am sucici am noo, má am nie anunfo nie kabo burukonufom yo ni, bu yo má bu nju nyankandi, adena minem nju ka ba cici bu noo. Nahore ye m suse am n a, bu nkatoo awieeri lee, ye ba du mo anya i n a.

¹⁷ Ama, nzen a ba sucici u noo, yo u nju nyankandi,

¹⁸ adena má minem si nu ka a sucici u noo, má ka u Si Nyeme bo be nju má i ni, na yiri u Si Nyeme bo i nju sa kere bo a yo i asiri nu ni n tó u kaari.”

Kabo Yesu nja ya tien ajeke noo se Nyeme dika n nu ni

¹⁹ Na Yesu akaaki ase ka, “Má am tien ajeke noo se durunya n nu fen, bo watarawam muka i na i kpoo, na i to ngambulaari, na awiefom gusu bá wura wo i.

²⁰ Ama, am tien ajeke noo se Nyeme dika n nu, bo watarawam koro muka má i, na i koro to má ngambulaari, na awiefom gusu koro wura wo má i.

²¹ Dama deke bo u ajeke wo ni, u ahorembaa kere gusu wo do o.”

Kabo Yesu kereeri anyumbaa kpa jore ni

²² Na Yesu akaaki ase ka, “Ya nyumbaa ni ti ka fitana ma ya ηuniembaa n a. Nzen u nyumbaa nya ti kpa, u ηuniembaa n kere tá wein n wɔ lee.

²³ Ama, nzen u nyumbaa nya ti má kpa, u ηunie kere wo awosin nu wo lee. Nyini ti, nzen wein wo má u dɔ, nyini n la ka, a wo awosin bambaka bo i la má aɲusu nu lee.”

Kabo Yesu ηa ya daafi Nyeme ηu barasu ni

²⁴ Na Yesu akaaki ase ka, “Sɔnɔ kun koro sanɔa su má mibiem nnyɔ. Nzen i ηa i yó sɔ, i kpó kun wɔ, na i kóro nyinga ni, wara i bóro i nyi su kun n wɔ, na i bú nyinga ni ηgbɛen. Am koro sanɔa su má Nyeme ni ajeke.”

²⁵ Na Yesu akaaki ase ka, “Nyini ti, m suse am wɔ lee, ka, má am tana sukoko fa kɔ am ηgɔɔ su, kabo am dí, ni kabo am nú, na má am kaaki sukoko fa kɔ am ηunie su, kabo am nyá suturam bo am fá wura na am kára. Dama ηgɔɔ n tara diire, na aηuniembaa n gusu tara suturam, má sɔ?

²⁶ Am nie anumam, haari ni bo bu dɔ má ni, na bu kaaki kpie má ni, bu tambu gɔ má bondo nu gusu, se am Si Nyeme ma bu diire ye bu di a. Amberɛ la anyunuyi tara anumam, má sɔ?

²⁷ Am nu, ηma tana koko fa kɔ i koroowam su ye i mi koro buka i ηgɔɔ tintiin su haari kaan sɔ a?

²⁸ Ye nzu ti ye am ma suturam sa mie am a? Am nie kabo wuram bo pum barasu barasu a. Bu yo má juma be, bu tu má gise.

²⁹ Ama, m suse am wɔ lee, ka, haari Femɛ Solomon, ni i nenɔe n kere bo i yo la i ni, wɔ la má sutura bo i yo nyumi juuri nyini wura pum ni be.

³⁰ Nzen wuram bo bu wo bere nyuma, na ahunma a ηú ka ba kpie bu na bu yara bu, ye Nyeme nie bu dika, nzu ti ye i nie má amberɛ bo am tara wuram co n a? Amberɛ, am yarada n ti kaan sɔ.

³¹ Nyini ti, má am tana koko se ka, ‘Ye ya dí nzu wɔ?’ wara ‘Ya nú nzu wɔ?’ wara ‘Ya wúra nzu wɔ?’

³² Dama bo bu su má Nyeme ni, bere sunsun sɔ sanɔa kere a. Am Si Nyeme si ka am koro nyininim n kere.

³³ Nyini ti, am du mɔ kpini Nyeme femɛya n ni sa bo i kɔ atin su i dɔ n busu ka, na i nyá ba fa nyini dekem n kere buka am su.

³⁴ Nyini ti, má am koko fa kɔ ahunma su, ahunma mmɔɔ kpini i dɛɛ. Dama nyuma dɛɛ sunsunni mmɔɔ ase su.”

7

Kabo Yesu ηa má ya jɔjɔ be jɔɔɛ jaraki i ni

¹ Na Yesu ase bu ka, “Má am jɔjɔ be jɔɔɛ na am jaraki i, adena má Nyeme gusu jɔjɔ amberɛ jɔɔɛ jaraki am.

² Dama kabo am jɔjɔ am bengum jɔɔɛ jaraki bu ni, sɔ ye Nyeme gusu jɔjɔ am gusu jɔɔɛ jaraki am a. Gɔngɔ bo am fa susu ma minem ni, sɔ ye Nyeme gusu fá susu ma am a.

³ Nzu ti ye a nie ηu wura mbaa n bo i wo u niwa nyumbaa nu, ye a nie ηu má yeenzin n bo i wo u dɛɛ nyumbaa n nu a?

⁴ A yo se koro se u niwa ka, ‘Ma m yi wura mbaa n bo i wo u nyumbaa nu ni,’ ye sanɔa kere yeenzin n wo u dɛɛ nyumbaa n nu a?

⁵ Wɔɔɔ burukɔɔnufɔ ni, du mɔ yi yeenzin n bo i wo u nyumbaa nu ni ka, na a nyá ηu asi nyunyumi na a yi wura mbaa n bo i wo u niwa n dɛɛ nyumbaa nu ni.

⁶ Má am se ka am fa deke bo i ti casi fa ma caam, nzen am yoori sɔ, bu kpíe bu nyi fɔn tara am wɔ, na bu kán titi am nu. Sasu bekun, má am se ka am fa afere fofeem bo bu la gɔ agaya, fa tu afam. Má nyini, bu tíentien i su wura fa nu wɔ.”

Kabo Yesu ɲa Nyeme de ya nyemesere barasu ni

⁷ Na Yesu akaaki ase bu ka, “Am sere deke bo am koro i Nyeme dɔ, na i má am. Am niɛniɛ deke bo am koro i dɔ, na am ɲú i. Am bobo anɔ ni, na i téke i ma am.

⁸ Dama sɔnɔ kere bo i sere Nyeme deke be, i má i, na sɔnɔ kere bo i niɛniɛ deke be, i ɲú i, na sɔnɔ kere bo i bobo anɔ ni, i téke i ma i.

⁹ Amberɛ nu, ɲma ye i wa sere i diire, ye i mi kéte na i fá yabue ma i wa n a? Ai, be yo má sɔ.

¹⁰ Wara, amberɛ nu, ɲma ye i wa sere i jombaa ye i kéte na i fá woo ma i wa n a? Ai, be yo má sɔ.

¹¹ Tɔ, amberɛ, haari ni bo am ti satieyofɔm ni, am si aceeri kpam bo am fá ce am nbaam, nzu ti ye nzen am sereeri am Si Nyeme bo i wo angoro ni, i koro ma má am aceeri kpam a?

¹² Nyini ti, kabo am koro ka minem yó ma am ni, am yo i sɔ ma bu, dama Nyeme nɔaniɛ kpamaawa n jɔre n kere lee, na i nɔaniɛ kanfɔm dɛɛ buka su.”

Kabo Yesu jɔjɔ fa kɔɔri anɔ n bo i ti fii n jɔre ni

¹³ Na Yesu akaaki ase ka, “Am fa anɔ n bo i ti fii n na am wura. Dama atin n bo i fa minem kɔ saakiibiri ni, i anɔ n ti teterɛ wɔ, na i natiiri ti má kekere, nyini dɛɛ ti, minem dɔnggu fa yiri wɔ.

¹⁴ Ama, atin n bo i fa minem kɔ ɲgɔɔ woobiri ni, i anɔ n ti fii wɔ, na i atin gusu nati ti kekereke, nyini dɛɛ ti, minem bo bu ɲu nyini atin n na bu su i su ni, bu sunnu má.”

Kabo Yesu ɲa ya fa minem sayoowa fa si bu ni

¹⁵ Na Yesu akaaki ase ka, “Am si am ɲu sa ni kɔrefɔm bo bu yo bu ɲu ka bu ti Nyeme nɔaniɛ kanfɔm ni. Bu yo bu ɲu benle ka nbɔem wɔ, ama, bu ti ka bedim wɔ, na bu ti tie.

¹⁶ Bu sayoowa n nu, ye am koro fa si kabo bu ti barasu a. Am aɲu ka buwe asu koto? Wara, am aɲu ka bedikantonga asu ndɔrɔwa? Ai.

¹⁷ Ama, i ti sɔ ɔ lee, ka baka kpa kere su suuwa kpa a, na baka ɲgbɛɛn kere su suuwa ɲgbɛɛnɲgbɛɛn.

¹⁸ Baka kpa koro su má suuwa ɲgbɛɛn, na baka ɲgbɛɛn gusu koro su má suuwa kpa.

¹⁹ Baka kere bo i su má suuwa kpa, bu kpíe i wɔ, na bu fa ji sin nu.

²⁰ Nyini ti, bo bu yo bu ɲu ka bu ti Nyeme nɔaniɛ kanfɔm ni, bu sayoowa n nu, ye am koro fa si kabo bu ti barasu a.”

Kabo Yesu jɔjɔ fa kɔɔri jina cɛɛn n jɔre ni

²¹ Na Yesu akaaki ase ka, “Má sɔnɔ kere bo i bo fere m ka, ‘M Mibiɛ, m Mibiɛ,’ ni wura Nyeme femɛya n nu a, se má ka bo bu yo m Si Nyeme bo i wo angoro n dɛɛ koroowa ni.

²² Jina cɛɛn n ba juuri, minɛ dɔnggu bá se m ka, ‘Ya Mibiɛ, niɛ e. Ya yo faari u dɛɛ duma, na ya fa akan Nyeme jɔre, na ya fa u duma n afɔn ayi ajinim afite minem ɲu, na ya kaaki afa u duma n ayo alekutura sam dɔnggu.’

²³ Na m nya se bu ka, ‘Amberɛ satieyofɔm ni, am fa cinsi m bi berɛ. M si má am cɛɛn n be cɛɛn n be da.’ ”

Miɛnu fa kɔ ataari tafɔ nnyɔ nbem jɔrɛ

²⁴ Na Yesu akaaki ase ka, “Nyini ti, sɔnɔ kɛrɛ bo i tiiri m dɛɛ nɔaniɛm n na i deerɪ i na i fa yoori juma, i mi ti ka alecirafɔ be bo i taari i awuru na i seeri i jaa n yabuɛ su n wɔ.

²⁵ Na nzue aba atɔ, na wawa n kɛrɛ ayi asandi, na aɲuma akpisi awuru ni, ama, wɔ tɔ má, dama i jaa jina yabuɛ su n dɛɛ ti.

²⁶ Ama, sɔnɔ kɛrɛ bo i tiiri m dɛɛ nɔaniɛm n na wɔ de má i, afa ayo má juma, i mi ti ka sinnzin be bo i taari i awuru nmiɛ nu n wɔ.

²⁷ Na nzue aba atɔ, na wawa n kɛrɛ ayi asandi, na aɲuma akpisi awuru n na i kɛrɛ abereki atɔ liim. Nyini awuru n tɔɔwa n tiiri tiɛ haari.”

²⁸ Saɲga bo Yesu ba jɔjɔri sɔ wieeri n na jama n ayo alekutura fa kɔ i kereewa n su,

²⁹ dama i kereewa n awo i nɲgumi ni Yudaɲɔm dɛɛ Nyɛmɛ nɔaniɛ kereɲɔm ni. I kereewa n nu la yiko.

8

Kabo Yesu tuntuunri kokofɔ be ni

¹ Saɲga bo Yesu juraari buka n su ba juuri n na jama beberebe asu i su.

² Na kokofɔ be aba i dɔ, na wɔ ba akutu i nyunu asere i ka i buka i, i nɲa, “M Mibiɛ, nzen a koro ka a ma m nya laifiɛ, a koro ma m nya i.”

³ Na Yesu atɛnɲe i saa anana i nɲu, na wɔ se i ka, “M koro. Nya laifiɛ.” Na kokobi n akaba ayaki sɔnɔ n na wɔ nya laifiɛ.

⁴ Dɔ na Yesu ase i ka, “Má a se ka a se be ahin jɔrɛ ni, ama, kɔ na a kɔ fa u nɲu kere Nyɛmɛ sayoowa dɔnɲuyofɔ ni, na a kɔ yo yoowa n bo Moyisi yo kereeri dawafɔm ni, dama nyini kere minɛm ka a nya u nɲu a.”

Kabo soja kpiɛn be yoori Yesu yarada agaya ni

⁵ Saɲga bo Yesu kɔ wuraari Kapɛnam miɛ kpiri n nu ni, na Romaɲɔm soja kpiɛn be aba asere Yesu jande ka i buka i,

⁶ i nɲa, “M Mibiɛ, m gbɛfɛnɛ da awuru, i saa ni i jaa kɛrɛ awu, i sudi wahara agaya.”

⁷ Na Yesu ase i ka, “M bá na m ma i nya laifiɛ.”

⁸ Na soja kpiɛn n ase i ka, “M Mibiɛ, m ti kaan ni be a ba m dika. Ama, haari a ma nɔaniɛ n mmɔɔ, m gbɛfɛnɛ ni nyá laifiɛ.

⁹ Dama mini mmɔɔ ni m tii n wo sɔnɔ saa nu wɔ, na mini gusu nya la m dɛɛ sojam bo m niɛ bu su. Na bo m nya se i ka, ‘Kɔ fɛn,’ na i kɔ, na m se nyinga gusu ka, ‘Bra fɛn,’ na i ba. Na m se m akɔɔ n gusu ka, ‘Yo ahin,’ na i yo i.”

¹⁰ Saɲga bo Yesu tiiri sɔ ni, na wɔ yo alekutura, na wɔ se minɛm bo bu su i su n ka, “Nahɔrɛ ye m suse am n a, ma nya aɲu má sɔnɔ bo i la yarada agaya ka ahin sɔnɔ n nɲusu, haari fa saɲga ni Yisareliɲɔm mmɔɔ.

¹¹ M suse am wɔ lɛɛ, ka, minɛm beberebe fíte durunya n wiɛ afiri, ni wiɛ atɔri kɛrɛ, na bɛrɛ, ni Abraham, ni Izaki, ni Jakɔbu bá saɲga tana Nyɛmɛ fɛmɛya n nu, na bu dí na bu nú.

¹² Ama, na minɛm n bo má i ti ye ni ka bɛrɛ wo Nyɛmɛ fɛmɛya n nu ni, na Nyɛmɛ fa bu tu awosin nu. Dɔ na bu sún, na bu kán bu saa.”

¹³ Na Yesu anya ase soja kpiɛn n ka, “Kɔ awuru. Kabo a yo yarada ni, i yó sɔ ma u a.” Na soja kpiɛn n gbɛfɛnɛ n anya laifiɛ, nyini saɲga n bo Yesu fa jɔjɔri ni.

Kabo Yesu tuntuunri tukpakifɔm beberebe Petoro dika ni

¹⁴ Saŋga bo Yesu wuraari Petoro dika n na wɔ ɲu ka Petoro sibara da sɔrɔ, i la má i ɲu, yakɔkɔ abo i.

¹⁵ Na Yesu aso i saa nu, na yakɔkɔ n ayaki i, na bara n ayasu, na wɔ ko ayo diire ama i.

¹⁶ Nyini cɛɛn n naasɔ, na ba fa minɛm beberebe n bo ajinim wo bu ɲu ni, aba Yesu dɔ. Na wɔ ma ajinim nɔɔ na ba fite, na wɔ tuntun tukpakifɔm na bu kereɛ anya laifie.

¹⁷ I yoori sɔ, na nɔaniɛ n bo Nyɛmɛ nɔaniɛ kanfɔ Esaya yo jɔjɔori i n yo yiiwa wɔ, i ɲa, “Na wɔ de ya afite ya tɔrɛm, ni ya tukpaki kereɛ nu.”

Minɛm bo bu koro ka bu su Yesu su n jɔrɛ

¹⁸ Saŋga bo Yesu ɲuuri jama n sɔ ni, na wɔ se i susufɔm n ka bu kpiɛ ko kunma kpiri n buɛkun dɔ.

¹⁹ Na Nyɛmɛ nɔaniɛ kerefɔ kun aba Yesu dɔ, aba ase i ka, “Ya Kerefɔ, deke kere bo a kɔ, m sɔ u su wɔ.”

²⁰ Na Yesu ase i ka, “Njaakum la kunmam, na anumam gusu la tieɛrim, ama, mini Adamande Wa n yiri, m la má m tii daabiri.”

²¹ Na i susufɔm n kun be gusu ase i ka, “M Mibiɛ, ma m du mɔ ko yo m si sutura ka, na m nyá ba su u su.”

²² Ama, na Yesu ase i ka, “Wɔrɔ su m su, na a yaki bo ba wu ni, na bu se bu beɲgu.”

Kabo Yesu kereeri ka i la yiko tara aɲuma ni nzue ni

²³ Nyini sin na Yesu awura lee nu, na i susufɔm n asu i su.

²⁴ Bu wo ko su sɔ ni, na aɲuma bambaka be ayasu nzue n nu, na i subo nzue gɔ lee n nu. Má lee ni suyi ni nzue wɔ. Ama, nyini saŋga na Yesu wo daafiri su.

²⁵ Na i susufɔm n akɔ atɛnge i, na ba se i ka, “Ya Mibiɛ, de ya tii ji, má nyini, ya wu awie.”

²⁶ Na wɔ se bu ka, “Nzu ti ye am soro sere sɔ a? Ambere, am yarada n ti kaan sɔ ɔ.” Na wɔ yasu atien aɲuma n ni nzue n ɲu, na dika n kereɛ atara jum.

²⁷ Na ba yo alekutura, na ba se ka, “Nzu sɔnɔmbiri barasu la ahin, bo aɲuma ni nzue n mmɔɔ de i nɔaniɛ a?”

Kabo Yesu fɔn yiiri ajinim fiteeri minɛ nnyɔ nbem ɲu ni

²⁸ Saŋga bo Yesu kpiɛeri kunma kpiri n ko juuri awɔrɛ n bo bu fere i ka Gadara n ni, na i ni minɛ nnyɔ nbem ayɛ, bu fite fanjunmam nu wɔ, ajinim wo bu ɲu. Bu ti tie haari bo be koro nati sin má nyini awɔrɛ n nu.

²⁹ Bu ɲuuri Yesu sɔ ni, na ba tien afere i, bu ɲa, “Nyɛmɛ Wa, a koro nzu ya nu fen a? A ba ka a ba ma ya ɲu anyumboro wɔ ka, na saŋga n nya ju, nzen se?”

³⁰ Nyini saŋga afam beberebe wo di su, bu waari má ni bere,

³¹ na ajinim n asere Yesu ka, “Nzen a ɲa a fɔn ya fite minɛm n ɲu, ma ya ko fun afam n ɲu.”

³² Na Yesu ase bu ka, “Am ko.” Na ba fite ayaki minɛm ni, na ba ko afun afam n ɲu. Dika n nu bere, na bu kereɛ aɲmati acoondi akɔ ato kunma kpiri nzue n nu, na nzue n adi bu.

³³ Afa sasafɔm ni ɲuuri nyini n sɔ ni, na ba ɲmati akɔ miɛ n kunnu akɔ abo ndoori, fa ko sa n bo wɔ yo n su. Na ba kan sa kere bo i tuuri minɛm n bo ajinim woori bu ɲu ni.

³⁴ Na miɛ n nufɔm kereɛ pepere afite akɔ Yesu dɔ. Saŋga bo bu ko ɲuuri i sɔ ni, na ba sere i jande ka i fite bu awɔrɛ n nu.

9

Kabo Yesu tuntunri sɔnɔ bo i saam ni i jaam awu ni

¹ Na Yesu akaaki awura lee n nu, akpiɛ akɔ i bɔsu.

² Dɔ na minɛ nbem afa sɔnɔ be aba i dɔ, i saam ni i jaam awu. Bu sɔri i ni i dasu kɛrɛ baari a. Yesu ɲuuri kabo bu yoori i yarada n sɔ ni, na wɔ se sɔnɔ n bo i saam ni i jaam awu n ka, “M wa, ma u ahore si, dama ma fa u satie ace u.”

³ Dɔ na Yudafɔm Nyemɛ nɔaniɛ kerefɔm nbem asunsun bu ahore su ka, “Ahin sɔnɔ n sujɔɔ wura Nyemɛ ɲgasi nu.”

⁴ Yesu siiri bu sunsunni nu sɔ ni, na wɔ bisa bu ka, “Nzu ti ye am bita sunsunni tie am ahore su a?”

⁵ Bɔnɔ ti kekereke a, bo m se ka, ‘Ma fa u satie ace u,’ nzen, ‘Yasu fa u dasu n na a nati’ n a?”

⁶ Ama, m kɛrɛ am ka mini Adamande Wa n la yiko durunya n nu bo m fa minɛm satie ni bu ɲgasi ce bu.” Na wɔ se sɔnɔ n ka, “Yasu fa u dasu n na a kɔ awuru.”

⁷ Na sɔnɔ n ayasu, na wɔ kɔ awuru.

⁸ Saɲga bo jama n ɲuuri nyini n sɔ ni, na ba yo alekutura, na ba kansi Nyemɛ, kabo wɔ ma minɛm nyini yiko n ni.

Kabo Yesu fereeri Matio ka i ba su i su ni

⁹ Na Yesu ayasu dɔ akɔ. I wo kɔ su sɔ ni, na wɔ ɲu lampodefɔ be, bo bu fere i ka Matio, ka i tana i juma yoobiri. Na Yesu ase i ka, “Yasu bra na a ba su m su.” Na wɔ yasu asu i su.

¹⁰ Saɲga bo Yesu wo Matio dika, sudi diire ni, na satieyofɔm, ni lampodefɔm beberebe aba Yesu ni i susufɔm n dɔ, na ba saɲga adi diire.

¹¹ Farasifɔm ɲuuri nyini sɔ ni, na ba bisa Yesu susufɔm n ka, “Nzu ti ye am kerefɔ n ni lampodefɔm, ni satieyofɔm saɲga di diire a?”

¹² Na Yesu ati bu jɔɔɔwa n na wɔ bɔ bu nu ka, “Minɛm bo bu la laifie n koro má ayirifo, má ka bo bu la má laifie ni koro a.

¹³ Am kɔ na am kɔ fiiti Nyemɛ nɔaniɛ n nu na am ti i bu, kabo ba kɛrɛ i ka, ‘M koro aɲunfɔ si tara bo am yo yoowa ma m.’ Ma ba má ka m bá fere minɛm bo bu ɲa bu yo sa bo i kɔ atin su Nyemɛ dɔ n wɔ, ama, m baari ka m bá fere satieyofɔm wɔ.”

Kabo Yesu kereeri nɔɔ cici jɔrɛ ni

¹⁴ Na Yohane susufɔm n aba Yesu dɔ, aba abisa i ka, “Nzu ti ye yerɛ ni Farasifɔm cici ya nɔɔ, ye u dɛɛ susufɔm berɛ cici má?”

¹⁵ Na Yesu abɔ bu nu ka, “Am sunsun ka konyayafɔm koro wo ni ahoresaaki, saɲga bo konyafan n toko wo bu dɔ ni? Ama, saɲga suba bo bu bá yi konyafan n fite bu nu, nyini saɲga n ye bu nyá cici bu nɔɔ a.”

¹⁶ Na Yesu akaaki ase ka, “Be koro fa má sanvuin fɔfɔrɛ kpa tɔ má tani dawa kunma, nzen i yoori sɔ, sanvuin fɔfɔrɛ ni sɔn tani dawa n wɔ, na i téke i kunma buka su.

¹⁷ I kaaki ti sɔ ɔ bekun ka be koro fa má nzan nyiiwa faɲgafɔ gɔ má dundu dawa bebete nu, nzen i yoori sɔ, dundu ni tie wɔ, na i ká ɲgbɛɛn, na nzan n kɛrɛ sɔɲgi butu. Ama, i ti ye ni ka, bu fa nzan nyiiwa faɲgafɔ gɔ dundu fɔfɔrɛ biiwa nu wɔ, na bu fa taka bo pui yo má i.”

Bara tukpakifɔ be, ni baabara be yiwee jɔrɛ

¹⁸ Saɲga bo Yesu wo jɔɔ su sɔ ni, na Yudafɔm kpɛn be bo i nie bu tientienbunɔɔ sɔɔ n su n aba akutu i nyunu, ase i ka, “M wa baabara awu, jina n nu berɛ. Bra na a ba fa u saa nana i ɲu, na i nyá ɲgɔɔ.”

¹⁹ Na Yesu ayasu, na i ni yiri akɔ, na i susufɔm n asu su.

²⁰ Dɔ na bara be woori jama n nu, i bita abiɛeri i afo buru ni nnyɔ lɛɛ bo i kpu na i kpiɛ má. Na wɔ sakati awura jama n nu Yesu sin, afa i saa akan Yesu tanlɛɛ n jaa bu.

²¹ Dama i seeri i kunnu ka, “Haari m fa m saa kaanri i tanlɛɛ ni mmɔɔ, m nyá laifiɛ.”

²² Na Yesu akaaki anie aɲu i, na wɔ se i ka, “M wa, ma u ahore si. Yarada n bo a yo m ni, yiri ma a nya laifiɛ a.” Dika n nu bere, na bara n anya laifiɛ.

²³ Saɲga bo Yesu kɔ juuri kpiɛn n dika ni, na wɔ ɲu sɛɛ mbie kanfɔm, ni jamam ka bu wo naɲmie su.

²⁴ Na wɔ se bu ka, “Am fa sin fite, baabara n awu má, wɔ daafi wɔ.” Ama, na ba siri i.

²⁵ I fɔɔnri jama n kere fite wieeri ni, na wɔ nya awura sɔɔ n bo baabara n da nu n nu, na wɔ kɔ atara i saa, na wɔ yasu.

²⁶ Na nyini labari n abara aye dɔ dɛɛ awɔre n kere nu.

Kabo Yesu tuntunri anyinsin nnyɔ nbem na bu ɲuuri asi ni

²⁷ Na Yesu afite bere, i sukɔ n na anyinsin nnyɔ nbem asu i su, subo fere i, bu ɲa, “Feme Davidi anuma, si ya aɲunfo.”

²⁸ Na saɲga bo Yesu kɔ wuraari awuru n nu ni, na anyinsinm n aba i dɔ na wɔ bisa bu ka, “Am yo yarada ka m koro ma am nya laifiɛ?” Na ba bo i nu ka, “Eɛn, ya Mibie, ya yo yarada.”

²⁹ Dɔ na wɔ fa i saa akan bu nyumbaam, na wɔ se bu ka, “Kabo am ayo m yarada ni, i yó sɔ ma am.”

³⁰ Na bu nyumbaam n ateke, na ba ɲu asi. Na Yesu abɔɔɔ bu ni nahore su ka, má bu ma be si sa n bo wɔ yo i ni.

³¹ Ama, na ba kɔ abo ndoori abara aye dɔ dɛɛ awɔre n kere nu, fa kɔ sa n bo Yesu ayo i ni.

Kabo Yesu ma bobo be nyaari laifiɛ ni

³² Saɲga bo anyinsinm n fite kɔɔri n dɛɛ sin, na mine nbem afa sɔɔɔ be aba Yesu dɔ, ajini ayo i bobo wɔ.

³³ Yesu fɔn yiiri ajini n fiteeri sɔɔɔ n ɲu wieeri n na wɔ koro ajojo. Na jama n ayo alekutura, na ba se ka, “Ya nya ɲu má ahin sa n be ɲusu cɛɛn be, Yisareli asien n su.”

³⁴ Ama, na Farasifɔm n ase ka, “Ajininim kere dɛɛ feme ni ma i yiko ye i koro fɔn yi ajininim n a.”

Kabo Yesu siiri jama ni aɲunfo ni

³⁵ Na Yesu abara aye mie ɲgbingbirim, ni kan kanm n kere su, na i sukere minem, bu tientienbunɔɔ sɔɔm n nu, na i sukan labari kpa n fa kɔ Nyeme femeya n su, na wɔ tuntun mine bo tukpaki barasu barasu n kere bita bu ni, na ba nya laifiɛ.

³⁶ Saɲga bo Yesu ɲuuri jama n na wɔ si bu aɲunfo, dama ba di wahara, na bu la má bukafɔ. Bu ti ka nbɔɛm bo bu la má sasafɔ ɔ.

³⁷ Na wɔ se i susufɔm n ka, “Fiesu diire n sunnu, ama, bo bu kɔ i tambu n sunnu má.

³⁸ Nyini ti, am sere Mibie n bo i dɛɛ la fie n ka i sunma jumayofɔm na bu kɔ i tambu.”

10

Kabo Yesu yiiri mine buru ni nnyɔ ka bu yo i jaramasam ni

¹ Na Yesu afere i susufo buru ni nnyom ni, na wo ma bu yiko ka bu ko sufon yi ajinim fite minem nu, na bu ma tukpakifom barasu barasu kere nya laifie.

² I jaramasa buru ni nnyom n bo i yiiri bu n duma n la Simon, bo bu fere i ka Petoro ni, ni i niema Andere, ni Yakobo ni i niema Yohane bo bu si la Zebedi ni,

³ ni Filipu, ni Batolomeyo, ni Tomasi, ni Matio bo i ti lampodefom ni, ni Yakobo bo i si la Alafeyo ni, ni Tadayo,

⁴ ni Simon bo i tu ngonni fa ko i asien su ni, ni Yudasi Isikariyoti bo i ba toori Yesu ni.

⁵ Na Yesu asunma nyini mine buru ni nnyom n na wo ma bu ahin noanie ni, i na, "Ma am ko miem bo bu ti ma Yudafom miem n nu, wara am wura Samariyafom mie be nu.

⁶ Ama, am ko Yisarelifom bo bu ti ka nboem na ba mini n do.

⁷ Am ko na am ko kan Nyeme jore kere bu, na am se bu ka, sanja n adodo bo Nyeme Feme ba nie i minem su.

⁸ Na am ma tukpakifom nya laifie, na am tenge bo ba wu ni, na am ma kokofom nya laifie, na am fon yi ajinim fite minem nu. Kobo ma ma am ahin yiko n na ma de ma pui ni, am gusu yo so n na ma de pui.

⁹ Ma am se ka am bita nwaa be, haari nwaa kaan mmoo.

¹⁰ Ahin atin n bo am sukoo i ni, ma am se ka am bita kuruku, ma am fa tanlee be buka bo am wura i n su, ma am fa gbagbaa, ma am fa kpama, dama jumayofom kere ti ye ni ka bu ma i diire wo."

¹¹ Na wo se ka, "Mie kpiri, wara mie kan kan kere bo am ko wuraari nu, am nienie sono kpa, na am ko wo i do, haari am ba fite mie n nu.

¹² Awuru kere bo am ko suwura nu, am bisa bu dogu, na am se bu ka Nyeme yo bu kisi.

¹³ Nzen nyini awuru n nufom deeri am wofom, am ma nyini kisi n ka bu do, ama, nzen ba de ma am, am kaaki de nyini kisi n bu do.

¹⁴ Sasu bekun, nzen awuru, wara mie bo am ko wuraari nu, na ba de ma am wofom, wara ba soro ma am su ka bu ti am noanie ni, am fite yaki nyini awuru n wara mie ni, na am kponkpon yi am jaa tuturi kere.

¹⁵ Nahore ye m suse am n a, jina cen, Nyeme cin nyini mie n nufom sui tara Sodom ni Gomora miem n nu satieyofom ni."

Kabo Yesu na bu ba kere i jaramasam wuwuruwa barasu ni

¹⁶ Na Yesu akaaki ase bu ka, "Am ti fen. M susunma am wo lee kabo nboem ko sanja bedim nu barasu ni. Nyini ti, am fa ngonle na am tara am nu ka woom, na am yo am nu benle ka tiwam.

¹⁷ Am si am nu sa, dama mine ba fa am wura joredifom saa nu, na bu fin am ngbere bu tientienbunoo soom n nu.

¹⁸ Mini dee ti, bu cin am wura gominam ni nfemem saa nu. Nyini ma am atin na am di m daani kere bere a, ni bo bu ti ma Yudafom n kere.

¹⁹ Sanja bo bu ba faari am wuraari joredifom saa nu ni, ma am ma am ahore saaki fa ko kabo am ko joo barasu. Nyini sanja n ba juuri, Nyeme ma am noanie ye am joo a.

²⁰ Noanie ni fite ma am do, ama, i fite am Si Nyeme dee Awiewie n do, ye am joo a.

²¹ Gorom ni niemam ba to bu benggu ma bu kprofom na bu kun bu, na nbaasim to bu nbaam, na nbaam kete bu wufom nu, na bu ma minem kun bu wufom ni.

²² Mini dɛɛ ti, sɔnɔ kɛrɛ kpɔ am. Ama, wɔrɔ kɛrɛ bo a mindi deerɪ nyini n kɛrɛ kɔ juuri i awieeri su, Nyemɛ dɛ u tii ji.

²³ Saŋga bo bu bá sukere am wuwuruwa miɛ be su, am ŋmati kɔ miɛ nyinga su. Nahɔrɛ ye m suse am n a, am koro kan má Nyemɛ jɔrɛ bara ye má Yisareli miɛm kɛrɛ su ka, ye mini Adamande Wa ni kpíe m nyi ba.

²⁴ Sɔnsɔnfɔ tara má i kerefɔ, akɔɔ gusu tara má i mibiɛ.

²⁵ Nzen sɔnsɔnfɔ n ba juuri i kerefɔ n juubiri, i ti ye ni ka i nyunu yi i tii. Na nzen akɔɔ n ba juuri i mibiɛ n juubiri, i ti ye ni ka i nyunu yi i tii. Nzen bu nya fereeri awurufɔbiɛ n ka Belazɛbuli, bo bu kaaki fere i ka Sitana ni, nyini saŋga bu fére i dikafɔm berɛ kɛrɛ ka se wɔ lɛɛ?”

Kabo wɔ yo daka ka ya soro Nyemɛ ŋgumi ni

²⁶ Na wɔ kaaki ase bu ka, “Nyini ti, má am soro sɛrɛ ni minɛm. Dama deke be wo má berɛ bo i wo fiɛɛwa nu na bu bá ŋu má i, deke be gusu wo má berɛ bo i wo asiri nu na bu bá si má i.

²⁷ Deke kɛrɛ bo m jɔjɔ seeri am kɔŋguɛ, wɔ yo daka ka am jɔjɔ i wiesu wɔ. Na deke kɛrɛ bo m tuuri i asuturi am dɔ, wɔ yo daka ka am bo i ndoori na sɔnɔ kɛrɛ ti i.

²⁸ Má am soro minɛm bo bu koro kun aɲuniɛmbaa n na bu koro kun má awiɛwiɛ n ni. Ama, am soro Nyemɛ bo i koro saaki awiɛwiɛ n ni aɲuniɛmbaa n kɛrɛ, cɛɛma sin nu ni.

²⁹ Am si ka njɔrɛm nnu ŋwaa ti kaan sɔ ɔ, má sɔ? Ama, bu kun n kpein mmɔɔ tó má asiɛŋgu bo i ti má ya Si Nyemɛ koroyanu.

³⁰ Haari am tiɲmiɛ kɛrɛ mmɔɔ bo i wo am tii su ni, Nyemɛ si i kɛrɛ nɔ.

³¹ Nyini ti, má am soro sɛrɛ. Am la anyunuyi Nyemɛ dɔ tara njɔrɛm beberebe.”

³² Na Yesu akaaki ase bu ka, “Sɔnɔ kɛrɛ bo i kan kereeri minɛm ka i ti m susufɔ, mini gusu bá kan kere m Si Nyemɛ bo i wo aŋgoro n ka i mi ti m dɛɛ wɔ.

³³ Ama, sɔnɔ kɛrɛ bo i keteeri minɛm nyunu ka i ti má m susufɔ, mini gusu bá kete m Si Nyemɛ bo i wo aŋgoro n nyunu ka i mi ti má m dɛɛ.”

Kabo Yesu ŋa wɔ fa kpakpaakinu aba barasu ni

³⁴ Na Yesu akaaki ase ka, “Má am sunsun ka ma ba ka m fa tanalaifiɛ ba ma durunya n nufɔm wɔ. Ma ba má ka m fa tanalaifiɛ ba, ama, m faari luɛ baari a.

³⁵ M baari ka m ba kpura baa ni i si tii wɔ, na m kpura baabara ni i ni tii, na m kaaki kpura baa n ni, ni i wa yi tii,

³⁶ na sɔnɔ dikafɔm káaki i kpɔfɔm.

³⁷ Sɔnɔ kɛrɛ bo i koro i si, wara i ni tara mini, i ti má ye ni ka i mi wo m dɔ. Na sɔnɔ kɛrɛ bo i koro i wa baabiesɔ, wara baabara tara mini, i ti má ye ni ka i mi wo m dɔ.

³⁸ Na sɔnɔ kɛrɛ bo i sɔ má i yiwee baka jaanu n na i su m su, i ti má ye ni ka i mi wo m dɔ.

³⁹ Sɔnɔ kɛrɛ bo i ŋa i kpíni i ŋgɔɔ busu, i mi bá fun i, ama, na sɔnɔ kɛrɛ bo i tɔɔri i ŋgɔɔ mini dɛɛ ti, i mi nyá ŋgɔɔ.”

Kabo sɔnɔ kɛrɛ bo i deerɪ Yesu susufɔm wɔfɔ nyá i ŋkatɔ ni

⁴⁰ Na Yesu akaaki ase bu ka, “Sɔnɔ kɛrɛ bo i de am wɔfɔ, i mi de mini wɔ lɛɛ, na sɔnɔ kɛrɛ bo i de mini, i mi de yiri bo i sunmaari m wɔ lɛɛ.

⁴¹ Sɔnɔ kɛrɛ bo i de Nyemɛ nɔaniɛ kanfɔ ka i ti Nyemɛ nɔaniɛ kanfɔ n dɛɛ ti, i mi nyá ŋkatɔ kabo Nyemɛ nɔaniɛ kanfɔ nya i n wɔ, na sɔnɔ kɛrɛ bo i de sɔnɔ bo i yo sa bo i kɔ atin su Nyemɛ dɔ, na wɔ de i ka i yo sa bo

i kò atin su n dɛɛ ti, i mi nyá ñkato kabo sɔnɔ bo i yo sa bo i kò atin su n nya i n wɔ.

⁴² Nahore ye m suse am n a, sɔnɔ kere bo i saari nzue niniki kaan so mmɔɔ, maari m susufɔ n bo i ti bu kere kaan n kun, ka i mi ti m dɛɛ susufɔ n ti, i mi nyá i ñkato.”

11

¹ Saŋga bo Yesu jɔjɔri i susufɔm n dɔ wieeri ni, na wɔ jengbe Galili awore n nu mie miem su, sukere minem, na wɔ kan Nyeme jore.

Kabo Yohane Nyeme Nzue Biefo n sunmaari i susufɔm Yesu dɔ ni

² Nyini saŋga ni, ba nyi Yohane Nyeme Nzue Biefo n dansaraka soro. Na wɔ ti sam kere bo Kristo Tiidefo n suyo bu ni, na wɔ sunma i susufɔm ka bu kò bisa i ka,

³ “Woro ye bu yo seeri ka a bá n a, nzen ya ñminda sɔnɔ fofore be wɔ?”

⁴ Na Yesu abo bu nu ka, “Am kpie am nyi kò se Yohane fa kò sam bo am ati bu na am anu bu ni, ka

⁵ anyinsinm anu asi, wobukam akoro anati, kokofom anya laifie, asuturim ati asui, minem bo ba wu n atenge, na jaarifom gusu akoro ati labari kpa ni.

⁶ Terefie wo minem bo bu yo m yarada na bu la má sika be ni mini n dɔ.”

⁷ Saŋga bo Yohane susufɔm kaaki sukò ni, na Yesu ajɔjɔ jama n dɔ, fa kò Yohane ñusu jore, i ña, “Saŋga bo am fite kɔri Yohane dɔ, boro kpantain n nu ni, am kɔri ka am kò ñu nzu wɔ? Am kɔri ka am kò ñu sɔnɔ bo i ti ka barankpaati fofoe bo anuma n kankan i wɔ?

⁸ Nzen má nyini, nzu ti ye am kɔri a? Am ña am kò ñu sɔnɔ bo i wura sutura ngbingbiri wɔ? Ai, am si ka minem bo bu wura nyini suturam ni, bu wo nfemem dika a.

⁹ Nzen má nyini, nzu ti ye am kɔri a? Am kɔri ka am kò ñu Nyeme noanie kanfo o? Eɛn, m suse am wɔ lɛɛ, ka, am anu sɔnɔ bo i tara Nyeme noanie kanfo.

¹⁰ Dama Yohane ye bu yo kereeri i Nyeme Jore Kadasi n nu ka, ‘Nyeme ña o,

“M dú mɔ sunma m sunmafo n na i dú u mɔ,
yiri kó yo u atin n dongu se u a.” ’

¹¹ Nahore ye m suse am n a, Yohane Nyeme Nzue Biefo n la má abengu, bo i tara i durunya n nu. Ama, sɔnɔ kere bo i ti kaan, Nyeme femeya n nu n tara yiri Yohane.”

¹² Na Yesu akaaki ase ka, “Fite saŋga bo Yohane Nyeme Nzue Biefo n boori Nyeme jore kan n bu ni, fa ba ju ni kisa, ye Nyeme femeya n ñuuri kekereke a, na minem afa anyumboro ka bu wura nu de i.

¹³ Nyeme noanie kanfom kere, ni Moyisi du mɔ kereeri Nyeme Jore Kadasi n nu fa kò Nyeme femeya n su ka, ye Yohane nya baari a.

¹⁴ Nzen am yó bu noaniem yarada, Yohane la yiri n bo bu yo kereeri ka Eliya káaki ba n a.

¹⁵ Bo i koro ka i ti ahin jore n bu, i ti ye ni ka i so i sui na i ti.”

¹⁶ Na Yesu akaaki ase ka, “Ye m fá nzu fa sunsun kabo nyumafɔ ti a? Bu ti ka nbaatuma kan kanm bo bu tana goosu wɔ. Na bu sufere bu bengu,

¹⁷ bu ña, ‘Ya kan tere ama am, ama, am abo má kereba. Ya di sɛɛ jue ama am, ama, am asun má.’

¹⁸ Deke bo i ti na m se sɔ n la ka, Yohane ba juuri ni, i ciciiri i nɔɔ o, i di má diire, i nu má nzan yiri fieo, nyini ti, na ba se ka ajini wo i ñu a.

¹⁹ Ama, mini Adamande Wa n ba juuri, na m ni mine asanga adi, na ya sanga anu, na ba se ka, 'Am nie, ahin sono n yiri, i ti ayaakpirifo o, na i nu nzan nahore su. Wo tara lampodefom, ni satieyofom danfoya.' To, minem kere bo bu su Nyeme dee alecira n atin n su ni, bu sayoowam kere ka i ti nahore a."

Kabo Yesu na mie nbem n nufom ba nu anyumboro barasu ni

²⁰ Miem bo Yesu yoori alekutura sam beberebe nu ni, bu minem n akaaki ma bu wo, nyini ti, na Yesu akan bu ndie,

²¹ i na, "Amberere Korazinfom, am ba nu anyumboro. Amberere Besayidafom gusu, am ba nu anyumboro. Alekutura sam bo m yo maari am ni, ma nzen m yoori bu Tiro ni Sidon mie kpirim n nu, ma minem n akaaki bu wo dada kere na bu fa pirim botu, ni nzuin yo bu yoowa n bo i kere ka bu ahore asaaki, bu satie yoowa n dee ti ni.

²² Ama, m suse am wo lee, ka, jina ceen, Nyeme ba cin am sui tara Tiro ni Sidon dee satieyofom.

²³ Amberere Kapenamfom gusu, am sunsun ka Nyeme ba ye am su ko angoro wo? Ai, i ba yo am kaan wo, na i fa am coundi ko Yiweefom Woobiri nu. Alekutura sam bo m yo maari am ni, ma nzen m yoori bu Sodom mie kpiri n nu, ma kisa, mie n toko wo bere haari ni nyuma.

²⁴ Ama, m suse am wo lee, ka, jina ceen, Nyeme ba cin am sui tara Sodom dee satieyofom."

Kabo Yesu jajo fa koori kabo i woowa ti barasu ni

²⁵ Nyini sanga n na Yesu ase ka, "M Si Nyeme, woro ti angoro ni asienngu kere Mibie a. M da u asi ka a fa nyini dekem bo alecirafo ni sifo si ma i ni, ayi akere bo bu ti ka nbaatam ni.

²⁶ M Si, i ti nahore wo, kabo a koori ka i yo lee."

²⁷ Na wo kaaki ase bu ka, "M Si Nyeme afa deke kere awura m saa nu. Be si ma Nyeme Wa ni, ma ka i Si Nyeme si i a, na be gusu si ma i Si ni, ma ka Baa ni si i a, ni minem bo Baa n koro ka i yi i kere bu ni, bere si i a."

²⁸ Na wo kaaki ase ka, "Amberere kere bo am so soori nonoori n na am afie ni, am bra m do, na m ma am numiyi.

²⁹ Am de m soori ni, na am ma am wo ti kabo m dee n ti ni, dama m ti benle wo, na m yo m nu kaan. Mini do ye am nya numiyi a.

³⁰ Dama kereewa n bo m fa ma am n ti ma kekereke, na soori n gusu bo m fa so am n wo ma no."

12

Kabo Yesu jajo fa koori Numiyi ceen jore ni

¹ Nyini sanga n na Yesu ni i susufom ni sunati sin alembaa fie be nu, Yudafo Numiyi ceen ni. Na ahoe ati i susufom ni, na ba bubu be akpese.

² Sanga bo Farasifo ni nuuri nyini so ni, na ba se Yesu ka, "Nie fen. Kabo u susufom ni suyo ni, Nyeme noanie kpamaawa n kere ka ma be yo so, Numiyi ceen ni."

³ Na wo se bu ka, "Am nya kan ma Nyeme Jore Kadasi n nu, kabo Feme Davidi yo yoori sanga bo ahoe tiiri i ni i minem na ba si ma kabo bu yo ni, nzen se?"

⁴ Ahoe n ti, na wo ko awura Nyeme Sereebiri Awuru n nu, na wo di kpono n bo ba fa ama Nyeme ni, na wo ma i minem ni be. Ama, am si ka ya dee atin n su, Nyeme sayoowa dongyuyofom ngumi ti ye ni ka bu di nyini kpono n a.

⁵ Sasu bekun, am nya kan má Nyeme Jore Kadasi n nu, kabo Njumiyi ceen n kere ceen, na Nyeme sayoowa donyuyofom ni saaki Njumiyi ceen n ciire ni, na bu yo bu yoowam Nyeme Sereebiri Awuru n nu, na be se má bu pui, nzen se?

⁶ M suse am wo lee, ka, deke bo i tara Nyeme Sereebiri Awuru n wo fen.

⁷ Ba kere i Nyeme Jore Kadasi n nu ka, Nyeme na o, 'M koro anunfo si tara bo am yo oowa ma m.' Nzen má am si nyini noanie n bu, má am ma má bu di minem jore cin bu sui, bere bo bu la má ngasi be ni.

⁸ Dama mini Adamande Wa ni ti Njumiyi ceen n Mibie n a."

Kabo Yesu tuntuunri sono asaa fuin be Njumiyi ceen ni

⁹ Na Yesu ayasu do ako awura bu tientienbunoo soo n nu.

¹⁰ Sono asaa fuin be woori do. Na mine nbem akoro ka bu so Yesu nge na bu jaraki i ka na wo saaki Njumiyi ceen n ciire ni. Do na ba bisa i ka, "Atin wo nu ka ya koro ma sono nya laifie, Njumiyi ceen ni?"

¹¹ Na Yesu abo bu nu ka, "Am nu, nma ye i boe ti kun n kpein ye i toori kunma ngongo nu Njumiyi ceen n ye i mi wura yi má i a?"

¹² Adamande tara boe fieo. Nyini ti, ya dee atin n su, atin wo nu ka ya yo sakpa Njumiyi ceen ni."

¹³ Na wo nya ase sono n ka, "Tenge u saa ni." Na wo tenge i saa ni, na i saa n ayo fanga bekun ka nyinga ni.

¹⁴ Do na, Farasifom n afite ako asese bu nu su, kabo bu yo na bu kun Yesu.

Kabo amusuisufo n bo Nyeme ayi i n ti barasu ni

¹⁵ Sanga bo Yesu siiri nu so ni, na wo yasu bere. Na jama beberebe asu i su, na wo ma bu tukpakifom kere anya laifie.

¹⁶ Na wo bobo bu ka, má bu ma be si i sono nzuin nu.

¹⁷ I yoori so, adena kabo Nyeme noanie kanfo Esaya yo jooori n yo yii-wa a, i na,

¹⁸ "Nyeme na o,

'M amusuisufo bo ma yi i ka i yo m sa koroowa n yaa.

Yiri ye m koro i a, m ahore ajo i nu.

M má m Awiewie n ba wura i nu.

Na i ko kan kere durunya n nufom kere

kabo m nahore atin n ti barasu.

¹⁹ I ni be se má akuruwa, wara i tientien má.

I kaaki yo má nanmie atingberem su.

²⁰ I búbu má janja wura bo wo biri,

na i no má fitana bo i je má nyunyumi.

I wo bere so

haari na m nahore atin n ba kunma deke n kere.

²¹ Na durunya n nufom kere ba ti i duma ni,
na bu yo i tama.' "

Kabo Farasifom tuunri Yesu nzuin ka i ni Sitana dee ti kun ni

²² Nyini sin na ba fa sono be aba Yesu do, ajini ayo i anyinsin ni bobo wo. Na Yesu ama wo nya laifie, na wo koro ajojo, na wo nu asi.

²³ Na minem kere ayo alekutura, na ba bisa bu nu nu ka, "Feme Davidi anuma n lee, nzen se a?"

²⁴ Ama, Farasifom tiiri so n na ba se ka, "Belazebuli bo i ti ajinim kere dee feme ni, yiri ngumi ma ahin sono n yiko dee ti, ye i koro fon yi ajinim n a."

²⁵ Yesu siiri bu sunsunni n so n na wo se bu ka, “Femeya kere bo i nya kpakpaakiiri nu wieeri, nyini femeya ni ka ngbeen wo. Awuru, wara mie kere gusu bo i nya kpakpaakiiri nu wieeri, nyini awuru, wara mie ni sandi wo.

²⁶ Nyini ti, nzen ma Sitana bo i ti ajinim kere feme n nya fon i ajinim fite minem nu, ma nyini kere ka ba kpakpaaki nu lee. Ye i yo se ye i femeya ni koro jina a?

²⁷ To, ye nzen am na Belazebuli maari m yiko, ye m fa fon yi ajinim a, ye nma maari am dee minem ni yiko ye bu bita fon yi bu n a? Nyini ti, kabo am minem yoori ni, nyini kere ka am la ma nahore.

²⁸ Ama, Nyeme dee Awiewie ni ma m yiko ye m fa fon yi ajinim a. Nyini n kere ka Nyeme Feme wo am nu sunie i minem su lee.

²⁹ Bekun, i ba yo se ye be koro wura sono fangafu dika na i fin i nenge a, ma ka wo tara i fangafu acin i nyama ka? Nyini sin na i nya koro fin i nenge bo i wo awuru n nu.

³⁰ Sono kere bo i jina ma m sin, i mi ti m kofu o. Na sono kere gusu bo i buka ma m na ya tien minem noo, i mi sandi minem wo.

³¹ Nyini ti, m suse am wo lee, ka, Nyeme koro fa minem satie kere fa ce bu, haari fa ko sangga ni jore ngbeenngbeen kere bo bu jooori i fa ko Nyeme do, ama, sono kere bo i joo wuraari Awiewie Casi ni ngasi nu, Nyeme fa ma i mi ngasi ce ma i.

³² Sono kere bo i joo wuraari mini Adamande Wa ni ngasi nu, Nyeme fa i mi ngasi ce i. Ama, sono kere bo i joo wuraari Awiewie Casi ni ngasi nu, Nyeme fa ma i mi ngasi ce ma i, fite kisa haari fa ko fa ba.”

Kabo Yesu na ya fa minem woowa fa si kabo bu ti ni

³³ Na Yesu akaaki ase bu ka, “Baka kere bo i nya ti kpa, su suuwa kpa a, na baka kere gusu bo i nya ti ma kpa, su suuwa tietie wo. Dama baka kere suuwa, ye a fa si kabo i ti a.

³⁴ Amere burukonufom ka woom ni, kabo am ti satiyofom so ni, am yo se koro yo sakpa bekun a? Dama dekem n bo am sunsun bu am ahore su n ye am joo bu a.

³⁵ Sono kpa ni i deke kpa kere bo i bita i, fa sakpa ba a. Na sono tie gusu ni i deke tie bo i bita i, fa satie ba a.

³⁶ M suse am wo lee, ka, jina een, Nyeme di sono kere jore fa ko jore ngbeenngbeen kere bo i yo jooori i.

³⁷ Dama u noanie jooowa ma a fite nu a, na u noanie jooowa gusu ma bu di u jore cin u sui a.”

Kabo Yesu keteeri ka i yo ma alekutura sa bo bu koro i ni

³⁸ Na Nyeme noanie kerefom, ni Farasifom nbem ase Yesu ka, “Ya Kerefo, ya koro ka a yo alekutura sa be kere ya na ya nu i.”

³⁹ Na Yesu ase bu ka, “Amere nyumafu, satiyofom bo am su ma Nyeme ni, ye am koro ka m yo alekutura sa be na am nie a? Ai, m yo ma alekutura sa be na am nu i fieo, ma ka alekutura sa n bo Nyeme yo yoori i maari i noanie kanfo Jona ni ngumi.

⁴⁰ Dama kabo Jona yo woori jombaa bambaka be kunnu ko juuri lesan, kongue ni wiesu ni, so ye mini Adamande Wa ni ba wo asien n bu ko ju lesan, kongue ni wiesu a.

⁴¹ Jona yo kaanri Nyeme jore keteeri Ninewafom na ba kaaki bu wo. Jina een, bere ba yasu jina na bu jarki amere nyumafom, dama kisa, m suse am wo ka, mini tara Jona, ama, am akete ka am kaaki ma am wo.

⁴² Feme bara be yo fiteeri haari i bosu Seba wo, na i bá ti Feme Solomon dæ alecira jɔjɔwa nɔanie ni. Jina cɛn, yiri bá yasu jina na i jára ki ambere nyumafom nahore su, dama kisa, m suse am wo ka, mini tara Feme Solomon, ama, am ade má m nɔanie ni.”

Kabo ajini bá kaaki ba i woobiri dawa na i ti barasu ni

⁴³ Na Yesu akaaki ase bu ka, “Nzen ajini nya fite yakiiri sɔnɔ, i kɔ jengbe bara ye boro kpantain nu wo, deke bo nzue wo má, na i kɔ nienie woobiri bo i tana yi i nɔmi. Nzen wo nya má woobiri,

⁴⁴ nyini sanɔa, a ti ka i ŋa, ‘Ma m kpie m nyi kɔ m woobiri dawa ni.’ Na i kaaki kɔ, i kɔ ŋu ka ba kpara dika n nyunyumi, asese deke kere su, be wo má nu.

⁴⁵ Na i nyá kɔ fa ajinim nso, bo bu ti tie tara yiri ni i tii, na bu kere bá wura woobiri dawa n nu. Nyini sanɔa, a ŋu ka sɔnɔ n woowa ayo tie atara kabo i yo ti dawa ni. Sɔ ye i bá yo ma ahin nyumafom bo bu satieyo asunnu n a.”

Minem bo bu ti Yesu ni, ni i ninbaam nahore su n jɔre

⁴⁶ Yesu toko wo minem dɔ jɔjɔ su ni, na i ni, ni i niemam aba aka ajina dasin, na ba se ka bu koro ka bu jɔjɔ i dɔ ɔ.

⁴⁷ Na minem ni kun ase i ka, “Ti fen, u ni, ni u niemam jina dasin koro ka bu jɔjɔ u dɔ.”

⁴⁸ Sɔnɔ n seeri i sɔ wieeri ni, na Yesu ase i ka, “Ma m kere u bo bu ti m ni, ni m niemam.”

⁴⁹ Na wo fa i saa akere i susufom ni, na wo se ka, “Nie fen. M ni, ni m niemam n yaa.

⁵⁰ Dama sɔnɔ kere bo i yo m Si Nyeme bo i wo angoro n dæ sa koroowa, yiri ti m siwa, ni m niwa, ni m ni a.”

13

Miɛnu fa kɔ kabo dɔdɔrifɔ be sandiiri alembaa ni

¹ Nyini cɛn n na Yesu afite awuru n nu akɔ atana Galili kunma kpiri n nɔɔ su, ka i kan Nyeme jɔre kere jama ni.

² Na jama beberebe atien bu nɔɔ i dɔ. Bu sunnuuri beberebe sɔ n dæ ti, na wo wura lee nu atana, na bere aka ajina nzue n nɔɔ su.

³ Na wo bo miɛnum na wo kere bu dekem beberebe. I ŋa, “Dɔdɔrifɔ be fiteeri sɔ ɔ, ka i kɔ sandi alembaa.

⁴ Sanɔa bo i wo sandi su ni, na alembaa ni nbem atɔtɔ atin n nɔɔ, na anumam aba atambu bu ami.

⁵ Na nbem atɔtɔ tieka su, deke bo fa sunnu má ni, fa n sunnu má n dæ ti, wo cɛ má, na wo fi,

⁶ ama, wie ba fiteeri agaya ni, na ba waandi, dama bunlui n akpama abi má.

⁷ Na alembaa ni nbem atɔtɔ lolɔe nu, na lolɔe n anyi akata bu ŋu.

⁸ Ama, na alembaa ni nbem atɔtɔ asien kpa su, na wo nyi awura mbaa zɔi zɔi.”

⁹ Na Yesu ase bu ka, “Bo i koro ka i ti ahin jɔre n bu, i ti ye ni ka i so i sui na i ti.”

Deke bo i ti na Yesu boori bu miɛnu n ni

¹⁰ Nyini sin na i susufom n aba i dɔ, aba abisa i ka, “Nzu ti ye a nya ba ŋa a jɔjɔ minem dɔ, a bo bu miɛnu a?”

¹¹ Na Yesu abɔ bu nu ka, “Ambere ye Nyeme ma am asi i femeya n nu asiri jɔre kere a, ama, bere bo ba ka ni, i ma bu si má i.

¹² Dama sɔnɔ kere bo wɔ nya deke be Nyeme dɔ na i mi si i bita, Nyeme búka i su wɔ, na i nyá beberebe, ama, bo i si má i bita, haari ni nyini kaan n bo i la i ni, Nyeme dé i dɔ ɔ.

¹³ Deke bo i ti na m bo bu miɛnu n la ka, bu nie wɔ, ama, bu ɲu má pui. Bu so bu sui wɔ, ama, bu ti má deke n bo bu so bu sui ka bu ti i n bu.

¹⁴ Bu ti sɔ n dɛɛ ti, ye Nyeme nɔanie kanfɔ Esaya yo jɔjɔ niiri bu n a, i ɲa,

‘Nyeme ɲa ɔ,

Am só am sui ni nahɔre su,
ama, am tí má deke bo am so am sui
ka am ti i n bu.

Am káaki nie ni nahɔre su,
ama, am ɲú má pui.

¹⁵ Dama ahin minem tii ti kekereke,
ba tɔ bu sui na má bu ti,
ba kata bu nyumbaa na má bu ɲu.

Má nyini, bu nyumbaa ɲú i wɔ,
na bu sui tí,
na bu sí bu ahore su,
na bu káaki bu wo,
na m má bu nya laifie.’

¹⁶ Ama, amberɛ la terefie, dama am ɲu asi, na am kaaki ti asui.

¹⁷ Nahɔre ye m suse am n a, Nyeme nɔanie kanfɔm ni minem beberebe bo bu yo sa bo i kɔ atin su Nyeme dɔ n kere koroori ka bu ɲu deke bo am aɲu i ni, ama, ba ɲu má i, na ba koro ka bu ti deke bo am ati i ni, ama, ba ti má i.”

Kabo Yesu kereeri miɛnu n bu fa kɔ dɔdɔrifɔ n su ni

¹⁸ Na Yesu ase i susufɔm ni ka, “Am so am sui, na m se am miɛnu n bu, fa kɔ dɔdɔrifɔ n bo i sandiiri asembaa n su.

¹⁹ Nbem de Nyeme nɔanie n fa kɔ i femeya n su kabo asembaa n tɔtɔori atin nɔɔ n wɔ. Bu nya tiiri Nyeme nɔanie n na bu ti má i bu, i cɛ má, na Sitana bo i ti sɔnɔ tie ni, bá yi nɔanie n fite bu ahore su, a ɲu ka bu wara afi i sa.

²⁰ Nbem gusu de Nyeme nɔanie n kabo asembaa tɔtɔori tieka su n wɔ. Bu nya tiiri Nyeme nɔanie ni, a ɲu ka ba de i ndende ni ahorejɔ,

²¹ ama, i da má bu ahore su. Bu kaaki ti ka asembaa n bo bu bunlui akpama abi má n wɔ. I woori bu dɔ kaan sɔ, na nzen wahara, wara kekereke be ba tuuri bu, fa kɔ bu Nyeme su n su, a ɲu ka ba fa ati.

²² Nbem gusu de Nyeme nɔanie n kabo asembaa n tɔtɔori lolɔɛ nu n wɔ. Bu nya tiiri Nyeme nɔanie ni, a ɲu ka bu sunsunni kere wo deke bo bu yó na bu asiri káta su, na bu koro kabo bu yó na bu nyá ajeke kere, na bu ahore bi fa kɔ durunya n nu nengem su, na Nyeme nɔanie n koro da má bu ahore su na i yo juma. Bu ti ka asembaa n bo i wura má mbaa n wɔ.

²³ Ama, nbem de Nyeme nɔanie n kabo asembaa n tɔtɔori asien kpa su n wɔ. Bu nya tiiri Nyeme nɔanie ni, na bu de i, na bu fa yo juma, na i yo kperɛ beberebe.”

Miɛnu fa kɔ wura mbaa fiwa ni

²⁴ Na Yesu abo bu miɛnu be bekun. I ɲa, “Kabo Nyeme Feme bá nie i minem su yaa. Sɔnɔ be kɔ sandiiri nvoni i fiesu a.

²⁵ Cɛɛn n be kɔngue n sɔ ɔ, sanɲa bo sɔnɔ kere ada adaafi ni, na i kpɔfo be anya ayasu akɔ afa janmɔɲɲu nvoni asandi nvoni fie n nu.

²⁶ Saɗga bo nɔni n ba fi sukɔ nyinse ni, na jaɗmɔŋgu nɔni n gusu atu asaɗga nɔni kpa n nu.

²⁷ Na awurufɔbiɛ ni akɔɔm aba i dɔ, aba ase i ka, ‘Ya mibiɛ, m ɗa ya sandiiri nɔni kpa fie n nu e. Ye jaɗmɔŋgu nɔni n fiteeri ni, kɔ saɗgaari nu a?’

²⁸ Na wɔ bɔ bu nu ka, ‘M kpɔfɔ be kɔ yoori nyini a.’ Na i akɔɔm n abisa i ka, ‘Ye a koro ka ya kɔ tutu jaɗmɔŋgu nɔni n butu wɔ, nzen se a?’

²⁹ Na wɔ bɔ bu nu ka, ‘Am yaki i, dama nzen am ɗa am tutu jaɗmɔŋgu nɔni ni, am sɗɗa tutu i ni nɔni kpa n kere wɔ.

³⁰ Am ma bu kere saɗga nyi, haari nɔni n kpie bá ju. Nyini saɗga na m nya se nɔni kpiefɔm ni ka bu kpie i kere na bu cin wɔɔ jaɗmɔŋgu nɔni n tien i nɔɔ yara i ka. Nyini saɗga na bu nya tien nɔni kpa ba go m bondo nu.’ ”

Miɛnu fa kɔ alembaa kaan be jɔre su

³¹ Na Yesu abo bu miɛnu be bekun. I ɗa, “Kabo Nyeme femeya n ti yaa, i ti ka alembaa kaan kabo nyem mbaa ti n wɔ, bo sɔɔ be dɔɔri i fiesu ni.

³² Yiri ti alembaam kere kaan, ama, bu nya ba dɔɔri na i fiiri, i tara toro nyawam n kere bambaka, i koro nyi na i tetereki asambaam bo anumam koro yo bu tierim su.”

Miɛnu fa kɔ kpɔɔ ayiri n su

³³ Na Yesu akaaki abo bu miɛnu be bekun. I ɗa, “Kabo Nyeme femeya n ti yaa, i ti ka ayiri bo bu fa go kpɔɔ samene nu na i yasu ni, na bara be fa goɔri samene beberebe nu, na i kere yasuuri n wɔ.”

Deke bo i ti na Yesu boori nyini miɛnum ni

³⁴ Ahin n kere, Yesu boori jama n miɛnu wɔ. Nahɔre, i se má bu pui, má ka miɛnu ye i bo bu a.

³⁵ I yoori sɔ, adena nɔaniɛ n bo Nyeme nɔaniɛ kanfɔ n yo jɔjɔri n yo yiiwa a. I ɗa,

“Nyeme ɗa o,

‘M bó bu miɛnu wɔ,

na m má bu si deke n bo ba si má i,

fite haari durunya n bumboori ni.’ ”

Kabo Yesu kereeri wura mbaa fiiwa n miɛnu n bu ni

³⁶ Saɗga bo Yesu cin yakiiri jama n na i kɔ wuraari awuru n nu ni, na i susufɔm n aba i dɔ, aba ase i ka, “Ya koro ka a yi jaɗmɔŋgu nɔni n dɛe miɛnu n bu kere ya.”

³⁷ Na wɔ bɔ bu nu ka, “Sɔɔ n bo i sandiiri nɔni kpa n la mini Adamande Wa ni.

³⁸ Fie n la durunya ni, na nɔni n la minem bo bu fa Nyeme yo bu feme ni. Na jaɗmɔŋgu nɔni n la Sitana dɛe minem ni.

³⁹ Ye kpɔfɔ n bo i fa jaɗmɔŋgu nɔni n saɗga nɔni kpa n nu n la Sitana. Nɔni kpie saɗga n la durunya n awieeri, ye nɔni n kpiefɔm la Nyeme merɛkem ni.

⁴⁰ Kabo bu tientienri jaɗmɔŋgu nɔni n nɔɔ, na bu yaraari i ni, sɔ ye i bá yo durunya n awieeri a.

⁴¹ Mini Adamande Wa ni súnma Nyeme merɛkem, na bu bá tambu yi satieyofɔm kere, ni deke kere bo i wura minem konvi na bu yo satie.

⁴² Na Nyeme merɛkem ni fá bu tu cɛema sin nu, dɔ na bu sún, na bu kán bu saa.

⁴³ Na bo bu yo Nyeme sa koroowa n yiri nya yo wein ka wie, bu Si Nyeme femeya n nu. Bo i koro ka i ti ahin jore n bu, i ti ye ni ka i so i sui na i ti.”

Mienu fa ko ajেকে n bo bu fundu seeri n su ni

⁴⁴ Na Yesu akaaki abo bu mienu be bekun. I na, “Kabo Nyeme Feme nie i minem su yaa, i ti kabo sono be ko nuuri ajেকে be, bo ba fundu i ase fie be nu n wo. I nuuri i so n na wo kaaki akata su, na ahorejo aba i do agaya, na wo ko ato i nenje kere bo i la i ni, na wo kpie i nyi aba ato nyini asien ni.”

Mienu fa ko afere fofoe be bo i la anyunuyi agaya n su ni

⁴⁵ Na Yesu akaaki ase ka, “Bekun, kabo Nyeme Feme nie i minem su yaa, i ti kabo watafo be bo i nati nienie afere fofoem bo bu la anyunuyi agaya na i to n wo.

⁴⁶ Sanga bo i ba ko nuuri be bo i la anyunuyi na i la go agaya ni, na wo ko ato i nenje kere, na wo fa ato i.”

Mienu fa ko jombaa tarafom diendie su ni

⁴⁷ Na Yesu akaaki ase ka, “Bekun, kabo Nyeme Feme nie i minem su yaa, i ti ka diendie be bo bu fa sandiiri nzue nu, na bu taraari jombaa barasu barasu kere n wo.

⁴⁸ Sanga bo diendie n yiiri ni jombaam ni, na ba cin i afite kperu su, na ba tana ka bu yiiri jombaam ni. Bo bu nya nuuri ka bu ti kpakpam ni, na bu fa bere ji bu jombaa tara botom nu. Na bu nya fa bo bu ti ma kpm fikindi tu.

⁴⁹ I ba yo so o, durunya n awieeri, Nyeme ma i merkem ni nati ba yi satiefom n fite bo bu yo sa bo i ko atin su Nyeme do nu,

⁵⁰ na i fa satiefom ni tu cema sin nu. Do na bu sun, na bu kan bu saa.”

Mienu fa ko nenje fofore ni nenje dawa su ni

⁵¹ Na Yesu abisa bu ka, “Am ati ahin mienu n kere bu?” Na ba bo i nu ka, “Ya ti i bu.”

⁵² Na Yesu ase bu ka, “To, sono kere bo i kere Nyeme noanie ni, na i siiri kabo Nyeme Feme atin ti barasu, i mi ayo ka awurufobie bo i yi i nenje fofore ni i nenje dawa fite i nenje woobiri so n nu, na i fa ma minem wo.”

Kabo Yesu na Nyeme noanie kanfo la ma jirima i bosu ni

⁵³ Sanga bo Yesu boori nyini mienu kere ko wieeri ni, na wo yasu dika n nu do.

⁵⁴ Na wo kpie i nyi ako i bosu. Na wo kan Nyeme jore akere minem, bu tientienbunoo so n nu. Na bo bu tiiri i kereewa n kere ayo alekutura. Na ba bisa bu nu nu ka, “Nifansu ye ahin sono n nyaari nyini alecira n ni yiko koro yo nyini alekutura sam n a?

⁵⁵ Ma kampa n wa n le? Ma i ni la Mariya a? Ma Yakobo, ni Yosefu, ni Simon, ni Yudas n go n le?

⁵⁶ Am nie e. Ma i niema nbaram kere wo ya nu fen n a? Ye nifansu ye ahin sono n ko sonsoranri i si n kere a?”

⁵⁷ Na ba bu i ngen. Na Yesu ase bu ka, “Deke n kere bu ma Nyeme noanie kanfo jirima a, ma ka i bosufom, ni i gisannufom ngumi do.”

⁵⁸ I bosufom ayo ma i yarada n dee ti, wo yo ma alekutura sam beberebe do.

14

Kabo bu kuunri Yohane Nyeme Nzue Biefɔ n barasu ni

¹ Nyini sanɔa ni, na Feme Herode ati Yesu nɔa.

² Na wɔ se i nkpienkpienm bo bu wo i nyunu n ka, “Yohane Nyeme Nzue Biefɔ n lɛɛ, ye wɔ tenɔe i yiwee n nu a, nyini ti ye i la yiko koro yo nyini alekutura sam kɛɛ a.”

³ Feme Herode yo ma bu taraari Yohane nyiri i wɔ, dama yiri Feme Herode yo fiinri i ɔɔɔ Filipu yi Herodiya jaari wɔ.

⁴ Má pui ti, Yohane yo seeri Feme Herode ka, “Nyeme nɔanie kpamaawa n kere ka a la má atin ka a fa u ɔɔɔ yi ja i nɔɔɔ su.”

⁵ Má Feme Herode yo koroori ka i kun Yohane wɔ, ama, i soroori Yuda-fɔm jama n wɔ, dama ba se ka Yohane ti Nyeme nɔanie kanfɔ ɔ.

⁶ Na Feme Herode baawu cɛenkpiri di cɛen, na Herodiya wa sunɔguru agɔ agɔɛ feme ni i jama n kere nyunu, na feme n ahore ajɔ.

⁷ Nyini ti, na wɔ tan ndie ase sunɔguru n ka, “Deke kere bo a koro, se m, na m má u.”

⁸ Na sunɔguru n ni ase i ka i kɔ se ka i koro Yohane Nyeme Nzue Biefɔ n tiiawa a. Na wɔ kɔ ase feme n ka, “M koro ka na a fa Yohane Nyeme Nzue Biefɔ n tiiawa ma m perente nu kisa kisa.”

⁹ Feme n tiiri sɔ ni, na i ahore asaaki, ama, ndie n bo i taanri i jama n nyunu n dɛɛ ti, wɔ koro akaaki má i nɔɔ. Na wɔ ma nɔɔ ka bu yo sunɔguru n koroowa ma i.

¹⁰ Nyini ti, na wɔ ma bu akɔ akpie Yohane tii dansaraka sɔɔ n nu dɔ.

¹¹ Na ba fa i tiiawa n ada perente n nu, aba ama sunɔguru ni, na yiri gusu afa akɔ ama i ni.

¹² Na Yohane susufɔm n aba afa fuin n akɔ ase i, na ba kɔ ama Yesu labari.

Kabo Yesu maari nbiesɔm akpii nnu ni bu minem diire ni

¹³ Yesu tiiri Yohane n jɔɛ labari n sɔ ni, na wɔ fa lee akɔ deke bo mine n wo má, i ni i susufɔm nɔgumi. Minem tiiri sɔ ni, na ba fite mie miem su anati bu jaa su, asa i su.

¹⁴ Sanɔa bo Yesu kɔ fiteeri lee n nu ni, na wɔ nɔ jama beberebe, na wɔ si bu anunfɔ, na wɔ ma tukpakifɔm bo bu woori dɔ n anya laifie.

¹⁵ Nyini cɛen n naasɔ sanɔa, na i susufɔm n aba i dɔ, aba ase i ka, “Kisa wie atɔ, ya wo boro gusu wɔ lɛɛ. Ma minem n atin na bu kɔ mie kunnu, na bu kɔ nya diire be to di.”

¹⁶ Na Yesu ase bu ka, “I ti má deke bo bu kɔ pui, ambere mmɔɔ ni am tii nya deke be ma bu na bu di.”

¹⁷ Na ba se i ka, “Deke bo ya la i fen n kere ti kɔnɔ nnu wɔ, ni jombaa nnyɔ.”

¹⁸ Na wɔ se bu ka, “Am fa bu ba ma m fen.”

¹⁹ Na wɔ ma minem nɔɔ ka, bu tantana wura fiefiɛewa n su. Na wɔ fa kɔnɔ nnu ni, ni jombaa nnyɔ ni, na wɔ ye i tii su anɔgoro na wɔ da Nyeme asi. Na wɔ nya akpiekpie kɔnɔ n nu afa ama i susufɔm ni, na bere gusu afa ama minem ni.

²⁰ Na sɔnɔ kere adi, na bu kunnu ayi. Na i susufɔm n atambu kɔnɔ ni jombaa sinsin n bo bu diiri na i kaari ni, na ba nya kandie buru ni nnyɔ.

²¹ Minem bo bu diiri kɔnɔ n ni jombaa n kere kɔ yasuuri nbiesɔm akpii nnu wɔ, ba kan má nbaram ni nbaatumam awura má nu.

Kabo Yesu natiiri nzue su ni

²² Nyini sin na Yesu ama i susufom n awura lee n nu na bu du i mo kpie ko kunma kpiri n buekun, na yiri aka na i kaari jama ni.

²³ I kaariiri jama n wieeri ni, na wo fun ako kperere be su i ngumi ka i ko sere Nyeme. Haari wie ba toori kere, i toko wo do i ngumi.

²⁴ Nyini sangha na lee n yiri wo nzue n afien dede do, na nzue nyama sukpara i, dama anjuma sun bu ko bu sin wo.

²⁵ Na fa ko akonyuma ciciri su, na wo nati nzue n su suba bu do.

²⁶ Sangha bo bu nuuri ka i nati nzue n su ni, na sere ati bu agaya, bu na, "Njumi lee o." Na ba bo awie, sere n dee ti.

²⁷ Kpenga na Yesu ajojo bu do, na wo se bu ka, "Am ma am ahore si, mini a, ma am soro sere."

²⁸ Na Petoro ase i ka, "M Mibie, nzen i ti woro nahore su a, se m ka m nati nzue n su bra u do."

²⁹ Na Yesu ase i ka, "Bra." Na Petoro afite lee n nu sunati nzue n su suko Yesu do.

³⁰ Ama, sangha bo i nuuri ka anjuma ni sukpie agaya so ni, na sere akaaki ati i, kpenga i suwura nzue n bu. Na wo bo awie ase ka, "M Mibie, de m tii ji."

³¹ Kpenga na Yesu alaandi i saa aso i nu, na wo se i ka, "Woro, u yarada n ti kaan so. Nzu ti ye u sunsunni ti nnyo nnyo a?"

³² Na bu nnyo n kere awura lee n nu, na anjuma n atara.

³³ Na i susufom bo bu wo lee n nu n kere akansi i, bu na, "A ti Nyeme Wa a, nahore su."

Kabo Yesu ma tukpakifom beberebe nyaari laifie ni

³⁴ Na ba kpie nzue n aba aju awore n bo bu fere i ka Genesareti ni.

³⁵ Na dofom asi ka Yesu lee, na ba sunma ako ase awore n nufom kere, na ba fa tukpakifom kere aba Yesu do,

³⁶ na ba sere i jande ka i ma bu fa bu saa kan i tanlee n jaa bu. Na bo bu yoori so n kere anya laifie.

15

Yudafom nana sayoowa jore

¹ Na Farasifo nbem, ni Yudafom Nyeme noanie kerefom afite Yerusalem mie kpiri n nu aba Yesu do, aba abisa i ka,

² "Nzu ti ye u susufom n akete ya nam sayoowa n a? Dama bu nmisi ma bu saa ka, na bu nya di diire."

³ Na Yesu abo bu nu ka, "Nzu ti ye am akete Nyeme noanie maawa n ye am su am dee sayoowam su a?"

⁴ Dama Nyeme ama noo ka, 'Bu u si, ni u ni.' Ye wo kaaki ase ka, 'Sono kere bo i joro i si, ni i ni jore tie, wo yo daka ka bu kun i mi.'

⁵ Ama, ambere kere ka nzen sono be la deke be bo i ti ye ni ka i fa buka i si, ni i ni, i koro se bu ka, 'Deke bo ma m na m fa ma am ni, ma fa ayi saraka ama Nyeme.'

⁶ Am suse ka i mi koro kpie i si, ni i ni n nyini deke n lee. Nyini n kere ka am abu Nyeme dee noanie ni ngbeen lee, ye am su am dee sayoowam n su a.

⁷ Ambere burukonufom ni, nahore ye Nyeme noanie kanfo Esaya yo kaanri am jore n a. Wo kere i kadasi n nu ka, Nyeme na o,

⁸ 'Ahin minem ni, bu ma m jirima bu noo nu bere wo, ama, i wo ma bu ahore su.

⁹ Bu kansu m ngbeen wo, dama bu kere mine adamande dee kereewam wo,

na bu se ka nyini kereewa n fite Nyeme dɔ ɔ.' "

Kabo Yesu na diire diiwa koro yo má sɔnɔ fin ni

¹⁰ Na Yesu afere jama n aba i bi, na wɔ se bu ka, "Am so am sui na am ti jɔrɛ n bo m sujɔɔ i ma am n bu.

¹¹ Má diire bo i wura sɔnɔ nɔɔ nu n yo i fin a, ama, jɔjɔwa bo i fite sɔnɔ nɔɔ nu ni, yiri yo i fin a."

¹² Na i susufɔm n aba i dɔ, aba abisa i ka, "A si ka u jɔrɛ n bo a jɔjɔri i n asun má Farasifɔm n nu e?"

¹³⁻¹⁴ Na Yesu ase i susufɔm n ka, "Má am bɔ bu nu, bu ti ka anyinsinm wɔ. Anyinsin gusu nya bitaari i berɔgu anyinsin n kpama, bu kere kó to kunma nu wɔ. Baka kere bo m Si Nyeme bo i wo aɔgoro n ata má i, i cín tu i wɔ."

¹⁵ Na Petoro ase i ka, "Kere ya anyunderɛ n bu, bo a na sɔnɔ nɔɔnie jɔjɔwa yo i fin ni."

¹⁶ Na Yesu abisa bu ka, "Nka amberɛ gusu ati má jɔrɛ n bu lee?"

¹⁷ Deke bo i wura sɔnɔ nɔɔ nu, wura i kunnu wɔ, na i kɔ je yi i, má sɔ?

¹⁸ Ama, jɔjɔwa bo i fite sɔnɔ nɔɔ nu fite i ahore su wɔ, nyini yo i fin a.

¹⁹ Dama deke bo i wo sɔnɔ ahore su ma i sunsunni tie a. I koro ma i nati sukun minem, na i suyo sakaraya, na i susaaki ajaa ciire, na i suwɔ, na i nati sudi kɔrɛ daani, na i nati susaaki minem duma.

²⁰ Nyini dekem kere koro yo sɔnɔ fin a. Ama, nzen sɔnɔ di diire na wɔ nmisi má i saa, i yo má i fin."

Kabo bara bo i ti má Yudafo yoori Yesu yarada ni

²¹ Na Yesu afite berɛ akɔ awɔrɛ n bo i dodo Tiro ni Sidon mie kpirim ni.

²² Na bara be aba Yesu dɔ, i ti má Yudafo, i ti Kananafɔ ɔ, bo i fite nyini awɔrɛ n nu. Na wɔ bo afere Yesu, ase i ka, "M Mibiɛ, Feme Davidi anuma, si m aɔunfo. Ajinim wo m wa baabara nju, sukere i yaari agaya."

²³ Ama, Yesu abɔ má i nu. Na i susufɔm n aba i dɔ, aba asere i jande, ase i ka, "Fɔn bara n na i kɔ. Nie kabo i su ya su, yo nanmie barasu a."

²⁴ Na Yesu ase ka, "Nyeme asunma m Yisarelifɔm bo bu ti ka nbɔem na ba mini ni ngumi dɔ a."

²⁵ Na bara n aba akutu i nyunu, ase i ka, "M Mibiɛ, buka m."

²⁶ Na Yesu ase i ka, "I ti má ye ni ka, a fa nbaatumam diire na a fa ma caam."

²⁷ Na bara n ase i ka, "M Mibiɛ, a la nahɔrɛ, ama, haari ni nyini mmɔɔ, caam n tambu diire n bo bu fɔm di, na i tɔtɔ asiɛngu n na bu fa di."

²⁸ Na Yesu ase i ka, "A ti bara yaradayofɔ ɔ, nahɔrɛ su. Nyini ti, kabo a koro ni, i yó sɔ ma u a." Dika n nu berɛ, na i wa n anya laifie.

Kabo Yesu ma mine beberebe nyaari laifie barasu ni

²⁹ Na Yesu afite berɛ, asu Galili kunma kpiri n su, na wɔ kɔ afun atana buka be su.

³⁰ Na jama beberebe afa wɔbukam, ni anyinsinm, ni bo bu saam ni bu jaam awu ni, ni bobom, ni tukpakifɔm beberebe, ka i ma bu laifie, na wɔ ma bu anya laifie.

³¹ Na minem n ayo alekutura, ni kabo bu njuuri ka bobom sujɔɔ, na minem bo bu saam ni bu jaam awu n anya laifie, na wɔbukam sunati, na anyinsinm suɔu asi ni, na ba kansi Nyeme n bo berɛ Yisarelifɔm su i ni.

Kabo Yesu maari nbiɛsɔm akpii nna ni bu minem diire ni

³² Na Yesu afere i susufɔm ni, na wɔ se bu ka, "Ahin jama n la m aɔunfo, dama i nyuma lesan lee bo bu wo m dɔ na bu la má deke bo bu di. M koro

má ka m yaki bu na bu kò awuru ni ahòe, má nyini, bu nbem tó cin atin nu wò.”

³³ Na i susufòm n abisa i ka, “Ye nifansu ye ya nyá diire ma ahin jama beberebe n sò n na bu di na bu kunnu yi a?”

³⁴ Na Yesu abisa bu ka, “Am la kponò nye wò?” Na ba bò i nu ka, “Ya la kponò nso wò, ni jombaa kan kan nbem.”

³⁵ Na Yesu ama jama n nòò ka bu tana asienggu.

³⁶ Na wò fa kponò nso n ni jombaa ni, na wò da Nyeme asi, na wò kpiekpie i nu, na wò fa ama i susufòm ni, na bere gusu afa ama jama n ka bu di.

³⁷ Bu kere diiri, na bu kunnu ayi. Na i susufòm n atambu sinsin kaawa n kandie nso.

³⁸ Minem bo bu diiri diire ni, nbiesòm ngumi kò yasuuri akpii nna a, ba kan má nbaram ni nbaatumam awura má nu.

³⁹ Na Yesu anya kaari jama ni, na ba kò awuru, na wò nya awura lee nu, akò awòre n bo bu fere i ka Magadan n nu.

16

Kabo Yesu keteeri ka i yo má alekutura sa bo bu koro i ni

¹ Na Farasifòm, ni Sadiusifò nbem aba Yesu dò, na ba koro ka bu sò i nge. Nyini ti, na ba se i ka i yo alekutura sa be bo i kere ka i yiko n fite Nyeme dò o.

² Na Yesu ase bu ka, “Sanja bo wie nya ba sutò, na am ñu ka angoro n kere ayo kòkòre, a ti ka am ña, ‘Ahunma dika ni bó, dama i ti kòkòre wò.’

³ Nzen ngarama fuun, na am ñu ka angoro asanja kòkòre ni biri, a ti ka am ña, ‘Nyuma nzue tó.’ Am koro nie angoro n na am si sa bo i bá yo, ama, am koro si má sam bo bu suyo jina n nu n yiri bu.

⁴ Amberè nyumafò, satieyofòm bo am su má Nyeme ni, ye am koro ka m yó alekutura sa be na am nie? Ai, m yó ma alekutura sa be na am ñu i fieo, má ka alekutura sa n bo Nyeme yo yoori i maari Jona ngumi ni.” I seeri sò wieeri ni, na wò yaki bu, na wò kò.

Bòbòwa fa kò Farasifòm ni Sadiusifòm dèe kereewam n su

⁵ Sanja bo Yesu susufòm n kpie kò juuri kunma kpiri n bue kun dò ni, na bu wara afi diire sa, ba bita má kponò nu.

⁶ Na Yesu ase bu ka, “Am si am ñu sa ni Farasifòm ni Sadiusifòm dèe kponò ayiri n bo bu fa gò kponò nu na i yasu ni.”

⁷ Na ba se bu ñunju nu ka, “Ya bita má kponò aba má n dèe ti, ye i se sò n a.”

⁸ Na Yesu afa nu kabo i susufòm n sujòjò bu ñunju nu ni, na wò se bu ka, “Amberè bo am yarada n ti kaan sò ni, nzu ti ye am sujòjò am ñunju nu ka am bita má kponò a?”

⁹ Am nya ti má sa n bu, nzen se? Am tenge má su ka m yo faari kponò nnu kpiekpie maari mine akpii nnu? Ye bo i kaari ni, kandie nye ye am sasaari a?

¹⁰ Ye kponò nso n bo m yo fa kpiekpie maari mine akpii nna n di? Kandie nye ye am sasaari a?

¹¹ Ye nzu ti ye am si má ka m sujòjò má kponò jòre a? M ña am si am ñu sa ni Farasifòm ni Sadiusifòm dèe kponò ayiri n bo bu fa gò kponò nu na i yasu ni.”

¹² Na ba nya asi ka i suse má bu ka bu si bu ñu sa ni Farasifòm ni Sadiusifòm dèe kponò ayiri n wò, ama, i ña bu si bu ñu sa fa kò bu kereewa n dèe atin su wò.

Kabo Petoro kereeri ka Yesu ti barasu ni

¹³ Saŋga bo Yesu fa ba juuri Sizariya Filipiya dɛɛ miɛ kan kanm su ni, na wɔ bisa i susufɔm ka, “Minem fa mini Adamande Wa n bu ŋma a?”

¹⁴ Na ba bɔ i nu ka, “Nbem ŋa wɔrɔ la Yohane Nyemɛ Nzue Biɛfɔ n a, nbem ŋa wɔrɔ la Nyemɛ nɔanie kanfɔ Eliya, nbem ŋa wɔrɔ la Nyemɛ nɔanie kanfɔ Jeremiya, ye nbem gusu ŋa a ti dawa dɛɛ Nyemɛ nɔanie kanfɔ nyingam n kun wɔ.”

¹⁵ Na wɔ nya abisa bu bekun ka, “Ye ambɛrɛ fa m bu ŋma a?”

¹⁶ Na Simon Petoro abɔ i nu ka, “Wɔrɔ ti Kristo Tiidefɔ n a, Nyemɛ n bo i wo bɛrɛ saŋga kɛrɛ n dɛɛ Wa ni.”

¹⁷ Na Yesu ase i ka, “Simon Jona wa, terefie wo u dɔ. Dama má adamande yiiri ahin jɔrɛ n bu kereeri u ka a jɔjɔ a, ama, m Si Nyemɛ bo i wo aŋgoro ni yi kereeri u a.

¹⁸ Nyini ti, m suse u wɔ lɛɛ ka, wɔrɔ ti Petoro a, u duma bu la ka yabue ni. Nyini yabue n su ye m ma m jama minem kɛrɛ jina a, na yiwee mmɔɔ koro yo má bu pui.

¹⁹ M fá Nyemɛ femeya n anɔ kadombaam ma u, na deke kɛrɛ bo a ma minem atin ka bu yo i durunya n nu fɛn, i ti sɔ ɔ lɛɛ, Nyemɛ dɔ. Na deke kɛrɛ bo a ma má minem atin ka bu yo i durunya n nu fɛn, i kaaki ti sɔ ɔ lɛɛ, Nyemɛ dɔ.”

²⁰ Nyini sin, na Yesu abɔbɔ i susufɔm ni ka má bu ma be si ka yiri ti Kristo Tiidefɔ n a.

Kabo Yesu jɔjɔ fa kɔɔri i yiwee n su ni

²¹ Fite nyini saŋga n fa kɔ, na Yesu abo i bu sukere i susufɔm n ka, “Wɔ yo daka ka m kɔ Yerusalem na m kɔ di wahara dɔŋgu fite Yudafɔm nkpienkpienm, ni Nyemɛ sayoowa dɔŋguyofɔ nkpienkpienm, ni Nyemɛ nɔanie kerefɔm dɔ na bu kún m. Ama, na i lesan cɛɛn, na Nyemɛ má m tenge m yiwee n nu.”

²² Na Petoro afa i akɔ ahemɛ, na wɔ jaraki i ase i ka, “M Mibiɛ, má a se ka a se sɔ, Nyemɛ yo u kisi ni nyini sa ni. Nyini koro yo má cɛɛn be da.”

²³ Na Yesu ace anie Petoro na wɔ tien i ŋu ase i ka, “Sitana, fa cinsi m bi bɛrɛ. A sukanda m atin wɔ. A sunsun má kabo Nyemɛ sunsun ni. A sunsun kabo adamande sunsun n wɔ.”

²⁴ Na Yesu ase i susufɔm n ka, “Sɔnɔ kɛrɛ bo i koro ka i su m su, wɔ yo daka ka i mi wara fi i tienɔ sa koroowa sa, na i fa i yiwee baka jaanu n sɔ, na i su m su.

²⁵ Dama sɔnɔ kɛrɛ bo i koro ka i fa i ŋgɔɔ fie, i mi bá fun i. Ama, sɔnɔ kɛrɛ bo i tɔɔri i ŋgɔɔ mini ni m labari kpa n dɛɛ ti, i mi nyá ŋgɔɔ.

²⁶ Nzen sɔnɔ nyaari durunya n nu deke n kɛrɛ, na i fuunri i ŋgɔɔ, i kperɛ la bɔnɔ? Nzu deke ye sɔnɔ fá kaaki i ŋgɔɔ a?

²⁷ Dama mini Adamande Wa ni bá ba ni m Si Nyemɛ jirima woowa n nu, ni i merɛkem ni, na m nyá tɔ sɔnɔ kɛrɛ kaari, kabo i juma, wara i sayoowa ti barasu.

²⁸ Nahɔrɛ ye m suse am n a, am nbem wo fɛn bo am wu má, má ka am aba aŋu ka mini Adamande Wa ni suba ka m bá nie m femeya n su.”

17

Kabo Yesu ŋunie kaakiiri wo barasu ni

¹ Lesɛn cɛɛn sin na Yesu afa Petoro, ni Yakobo, ni yiri Yakobo niema Yohane, afun akɔ buka lenlenge be su, bu ni yiri ŋumi.

² Bu woori dɔ n na ba ɲu ka i ɲunie akaaki wo, na i nyunuawa aje ka wie, na i tanlɛɛ n akaaki fofoe papasi.

³ Dɔ na ba ɲu mine nnyɔ nbem atie bu ɲu, na bu ni Yesu subo anzama, bere la Moyisi ni Eliya, dawa dɛɛ Nyeme nɔanie kanfɔm ni.

⁴ Na Petoro ase Yesu ka, “M Mibiɛ, i ti kpa ka na ya wo fɛn. Nzen má a soro su, m bó nambue nsan fɛn, u dɛɛ kun, Moyisi kun, na Eliya gusu dɛɛ kun.”

⁵ Saɲga bo i jina wo jɔjɔri su n na yinyingɲu papasi akata bu ɲu, na ba ti akonvi be ɲga yinyingɲu n nu, na wo jɔjɔ bu dɔ, i ɲa, “M wa koroowa lee bo m ahore ajo i ɲu. Am de i nɔanie.”

⁶ I susufɔm n tiiri akonvi ni ɲga sɔ ni, na sere ati bu agaya, na ba butu asiɲgu.

⁷ Na Yesu aba afa i saa akan bu, na wo se ka, “Má am ma sere ti am, am yasu.”

⁸ Na ba ye bu tii su anie, ba ɲu má sɔnɔ be kun, má ka Yesu ɲgumi.

⁹ Na saɲga bo bu ba sujura buka n su ni, na Yesu abɔbɔ bu ka, “Má am be se ka i bo sa n bo am aɲu i n sufa kere sɔnɔ be, haari fa kɔ saɲga bo mini Adamande Wa ni bá wu na Nyeme bá ma m tenge m yiwee n nu ka.”

¹⁰ Dɔ na i susufɔm n abisa i ka, “Ye nzu ti ye Nyeme nɔanie kerefɔm n bita jɔjɔ ka wo yo daka ka Eliya dú mɔ ba ka, ye Kristo Tiidefɔ ni bá ba n a?”

¹¹ Na wo bɔ bu nu ka, “I ti nahɔre wo ka, Eliya dú mɔ ba na i bá sese deke n kere su.

¹² Ama, m suse am wo lee, ka, Eliya adu mɔ aba, na minem asi má i, na ba yo i kabo bu koro. Sɔ ye mini Adamande Wa n gusu bá di wahara minem saa nu a.”

¹³ Dɔ na i susufɔm n anya asi ka i jɔjɔ Yohane Nyeme Nzue Biefɔ n dɛɛ jɔre wo.

Kabo Yesu fɔn yiiri ajini fiteeri baa be ɲu ni

¹⁴ Saɲga bo Yesu ni i susufɔ nsanm ni kpieeri bu nyi ba juuri jama n bi ni, na sɔnɔ be aba akutu i nyunu,

¹⁵ ase i ka, “M Mibiɛ, si m wa baabiesɔ n aɲunfɔ. I tɔ ɲgbiti wo, bo i di wahara agaya. Saɲga kere bo i nya ba yasu i ɲu, i fa i wura sin nu wo, wara nzue nu.

¹⁶ Ma fa i aba u susufɔm n dɔ lee ka bu ma i nya laifie, ama, ba koro atuntun má i na i nya laifie.”

¹⁷ Na Yesu ase bu ka, “Amaa. Ambere satieyofɔm, am la má yarada fieo. Nyuma sa ye m wo am dɔ fɛn a? Ye m yó sawɔre ni ambere kɔ ju se wo? Am fa baa n ba ma m fɛn.”

¹⁸ Na Yesu atien ajini n ɲu, na wo fite ayaki baa ni. Dika n nu bere, na baa n anya laifie.

¹⁹ Nyini sin na Yesu susufɔm n aba i dɔ, bere ɲgumi, aba abisa i ka, “Nzu ti ye yere akoro afɔn má nyini ajini n a?”

²⁰ Na Yesu abɔ bu nu ka, “I fite ka am yarada n ti kaan sɔ n dɛɛ ti a. Nahɔre ye m suse am n a, nzen am yoori Nyeme yarada bo i kɔ juuri kabo nyem mbaa ti ni mmɔɔ, am koro se nyini buka n ka, ‘Fite fɛn kɔ dɔ,’ na i kɔ. Deke wo má bere bo i yó kekereke ma am. [

²¹ Ama, nyini ajini n ɲusu sɔ koro fite yaki má sɔnɔ ɲgbɛen sɔ, má ka nyemesere ni nɔɔ cici.]”

Kabo Yesu jɔjɔ fa kɔri i yiwee n su bekun ni

²² Saɲga bo i susufɔm ba tieɲri bu nɔɔ Galili awɔre n nu ni, na Yesu ase bu ka, “Bu bá tɔ mini Adamande Wa n ma mine nbem,

²³ na bu kún m, ama, bu kuunri m wieeri, i lesan cɛɛn, Nyemɛ má m tenge m yiwee n nu.” I jɔjɔri sɔ ni, na i susufɔm n ahore asaaki agaya.

Kabo Yesu tɔɔri Nyemɛ Sereebiri Awuru n nu lampo kaari ni

²⁴ Saŋga bo Yesu ni i susufɔm n ba juuri Kapenam miɛ kpiri n nu ni, na Nyemɛ Sereebiri Awuru n nu lampodefɔm n aba Petoro dɔ, aba abisa i ka, “Am kpien n tɔ Nyemɛ Sereebiri Awuru n nu lampo kaari, nzen i tɔ má?”

²⁵ Na Petoro abɔ i nu ka, “I tɔ wanla.” Saŋga bo Petoro kɔ juuri awuru n nu n na Yesu adu mɔ abisa i dɔ ka, “Simon, ye wɔɔ ɲa se wɔ? Nɲam tɔ lampo ɲwaa ma durunya n nu fɛn nɛmɛm a, mienbaam nzen wɔfɔm?”

²⁶ Na Petoro abɔ i nu ka, “Wɔfɔm.” Na Yesu ase i ka, “Nzen i nya tiiri sɔ de, mienbaam tɔ má lɛɛ.

²⁷ Ama, yerɛ koro má ka ya wura bu ɲgasi nu. Nyini ti, kɔ kunma kpiri n nu na a kɔ fa u kuwa n ji nu, jombaa kɛɛ bo a du mɔ taraari i, niɛ i nɔɔ nu, a ɲú ɲwaa bo i ju mini ni wɔɔ dɛɛ Nyemɛ Sereebiri Awuru n nu lampo ɲwaa tɔ. Fa i na a fa kɔ tɔ mini ni wɔɔ tii su kaari.”

18

Kabo Yesu kereeri sɔnɔ bo i tara bu kɛɛ ni

¹ Nyini saŋga ni, na Yesu susufɔm n aba i dɔ, aba abisa i ka, “Nɲma yo ya kɛɛ tii Nyemɛ fɛmɛya n nu a?”

² Dɔ na Yesu afere baa kaan be, aba ajina bu afien.

³ Na wɔ se ka, “Nahɔɛ ye m suse am n a, am wúra má Nyemɛ fɛmɛya n nu, má ka am kaaki am wo na am yo am ɲu ka baatuma kaan.

⁴ Nyini ti, sɔnɔ kɛɛ bo i yo i ɲu kaan ka ahin baa ni, yiri ti minem kere tii Nyemɛ fɛmɛya n nu a.

⁵ Sɔnɔ kɛɛ bo i deerɛ ahin baakan n ɲusu m dɛɛ ti, wɔ de mini wɔ lɛɛ.”

Kabo wɔ yo daka ka má sɔnɔ wura satie nu ni

⁶ Na Yesu akaaki ase ka, “Wɔɔ kɛɛ bo u sayoowa ma ahin nbaatuma kan kanm n be bo i yo m yarada n be wuraari satie nu ni, i ti má kpa. Nzen má bu faari ɲgani san yabuɛ bambaka ciciiri u kɔm na bu fa u kɔ tu tieku nu ka nzue di u, i ti ye tara bo a ma ahin nbaatuma kan kanm n be wura satie nu ni.

⁷ Durunya n nufɔm bá ɲu anyumboro, dama bu yo sam bo bu ma mine kaaki bu sin bo m dɛɛ atin n wɔ. Nyini sam ni yo wɔ, saŋga kɛɛ, ama, sɔnɔ kɛɛ bo i ma nyini sam yoori ni, yiri bá ɲu anyumboro.

⁸ Nzen u saa, wara u jaa cin u wura satie nu a, kaba kpie i fa tu na a asaasin, wara, ajaasin, na a nyá u ɲu kɔ Nyemɛ dɔ. I ti ye ni bo a la u saa nnyɔ ni u jaa nnyɔ n kɛɛ, na bu ba fa u tu cɛɛma sin n bo i nɔ má n nu.

⁹ Nzen u nyumbaa kun gusu cin u wura satie nu a, lokoti yi i tu na a ka anyunu kun, na a nyá u ɲu kɔ Nyemɛ dɔ. I ti ye ni bo a la u nyumbaa nnyɔ n kɛɛ na bu ba fa u tu cɛɛma sin nu ni.”

Miɛnu fa kɔ bɔɛ bo wɔ mini n su ni

¹⁰ Na Yesu ase ka, “Má am se ka am bu ahin nbaatuma kan kanm n be ɲgbɛɛn. M suse am wɔ lɛɛ, ka, bu dɛɛ mɛɛkɛm bo bu wo aŋgoro ni, wo m Si Nyemɛ nyunu saŋga kɛɛ a. [

¹¹ Dama, mini Adamande Wa n baari ka m ba nienie bo ba mini n wɔ, na m de bu tii ji.]

¹² Nzen sɔnɔ la nbɔɛm yaa, na bu nu kun miniiri, am sunsun ka i yo se wɔ? I yáki aburaŋgɔna ni ɲgɔna n wura diibiri kperɛ n su, na i kó nienie kun n bo wɔ mini ni, má sɔ?”

¹³ Nahore ye m suse am n a, nzen i nienie ko nyuri nyini kun ni, i ahore jo i ny tara aburango na ni ngona n bo ba mini ma ni.

¹⁴ I ti so o lee, am Si Nyeme bo i wo angoro n do, i koro ma ka ahin nbaatumam kun n kpein mmoo mini."

Kabo ya niwa yo ya satie na ya yo barasu ni

¹⁵ Na Yesu akaaki ase ka, "Nzen woro kere bo u niwa yoori u satie be, ko i do na u ni yiri mine nnyo ni ngumi, na a se i ka wo yo u satie. Nzen i tiiri i bu ka wo yo u satie, i toko ti u niwa lee.

¹⁶ Ama, nzen i keteeri, yo anie na a nya sono kun, wara mine nnyo buka u ny su, na am ko ny i, adena mine nnyo, wara mine nsan n bo ba ti jore n yo u daanifom.

¹⁷ Nzen i keteeri bere gusu, na a nya fa i sereya n ko Kristo jama n kere do. Nzen i nya keteeri Kristo jama ni, am fa i ka sono bo i su ma Nyeme, wara satieyofa bo wo kete ka i kaaki ma i wo lee."

¹⁸ Na Yesu akaaki ase ka, "Nahore ye m suse am n a, deke kere bo am ma minem atin ka bu yo i durunya n nu fen, i ti so o lee Nyeme do, na deke kere bo am ma ma minem atin ka bu yo i durunya n nu, i kaaki ti so o lee Nyeme do.

¹⁹ Nahore ye m suse am bekun n a, sanja kere bo am mine nnyo yoori am nookun, na am sereeri m Si Nyeme deke be, i yo i ma am.

²⁰ Dama deke kere bo mine nnyo, wara nsan tieenri bu noo m dee duma n nu, m wo bu do."

Mienu fa ko kaari bitafa nnyo nbem su ni

²¹ Nyini sin na Peto abasa Yesu do, abasa abisa i ka, "M Mibie, nzen m niwa nati yo m satie sanja kere, kpe nye ye m fa i satie ce i a? Kpe nso, nzen se?"

²² Na Yesu abo i nu ka, "Ai, m suse u wo lee ka, ma kpe nso co, ama, kpe aburasoso busu nso."

²³ Na Yesu akaaki ase ka, "Nyini ti, kabo Nyeme femeya n ti yaa. Feme be yo woori bere a, ceen n be na wo se ka i bu akunta ni i akoom bo bu wo i do yo juma ni, na i si nwaa bo bu bita i.

²⁴ Sanja bo i boori i bu na i bu akunta ni, na ba fa i akoo n kun be bo i bita i nwaa kaari bo i la ma noo, aba i do.

²⁵ Kabo nwaa n sunnu so na i koro to ma kaari n ni, na feme n ama noo ka bu to i ni i yi, ni i nbaam, ni i deke kere bo i la i, na bu fa to kaari ni.

²⁶ Na akoo n akutu i mibie n nyunu asienngu, asere i ka, 'Jande, si m anunfo, na m ko nienie nwaa n na m ba to kaari ni.'

²⁷ Na i mibie n asi i anunfo, na wo fa kaari n ace i, na wo yaki i aji.

²⁸ I fiteeri bere, na i ni i benngu akoo n kun be bo i gusu bita i kaari n aye, i dee n sunnu ma fieo. Na wo so i benngu n kom nu amie i, na wo se i ka, 'To m kaari n kisa kisa bere.'

²⁹ Na i benngu n akutu haari asienngu, asere i ka, 'Jande, si m anunfo, na m ko nienie u nwaa na m ba to u kaari.'

³⁰ Ama, na wo kete, na wo ko anyi i benngu n saraka, na wo se i ka ma ka wo to i kaari ni.

³¹ I benngu nyingam nyuri sa n bo wo yo i n so ni, na bu ahore asaaki agaya, na ba ko ase feme n sa n bo wo yo i n kere.

³² Do na feme n afere i, ase i ka, 'Woro satieyofa ngbeen ni, a sereeri m dee ti, ye m yakiiri u kaari n kere bo a bita i n fa ceeri u a.

³³ Ma wo yo daka ka woro mmoo siiri u benngu n anunfo na a fa ce i, kabo m nyuri u anunfo na m fa ceeri u ni.'

³⁴ Na yaa ati fεmε n agaya, na wɔ ma bu afa nyini akɔɔ n akɔ anyi i saraka, ka i kɔ di wahara dɔ, haari fa kɔ ju sanɔa bo i bá tɔ kaari n kere wie.”

³⁵ Na Yesu ase bu ka, “Nzen am afa má am benɔum satie ace má bu am ahore su, sɔ ye m Si Nyemε bo i wo anɔoro ni cín am sui a.”

19

Kabo Yesu kereeri minem fa kɔ ajaa ni ajaa yaki atin su ni

¹ Sanɔa bo Yesu jɔjɔori ahin jɔrem n kere wieeri ni, na wɔ yasu Galili awɔre n nu, akɔ Yudiya dεε awɔre n nu, na wɔ kɔ akpie Yodan kunma n buekun dɔ.

² Na jama beberebe asu i su, na wɔ ma tukpakifɔm bo bu wo jama n nu n anya laifie.

³ Na Farasifo nbem aba i dɔ, ka bu ba sɔ i nɔgeε fa kɔ i nɔanie jɔjɔowa n su, na ba bisa i ka, “Ya dεε atin n su, atin wo nu ka sɔnɔ koro fa i yi ji deke be dεε ti?”

⁴ Na Yesu abɔ bu nu ka, “Ye ba kere i Nyemε Jɔre Kadasi n nu sε wɔ? Ba kere ka, fite durunya n bumboori, sanɔa n bo Nyemε yiiri adamande ni, i yiiri biesɔ ni bara wɔ,

⁵ na wɔ se ka, ‘Nyini dεε ti, i ti ye ni ka biesɔ n kpaaki i gisan yaki i si ni i ni, na i ni i yi n sanɔa wo. Nyini sanɔa, bu mine nnyɔ n ayo deke kun lεε.’

⁶ Bu wo má bu nɔunɔgumi kun. Nyini ti, deke bo Nyemε anya asanɔa i awie, má sɔnɔ kpaaki i nu kun.”

⁷ Na ba bisa Yesu bekun ka, “Ye nzu ti ye Moyisi yo maari atin ka, nzen sɔnɔ koro ka i fa i yi ji, i ti ye ni ka i mi ma bara n ajaa yaki kadasi ka, na i nya fa i ji a?”

⁸ Na Yesu abɔ bu nu ka, “Am ahorembaa kekereke n dεε ti, ye Moyisi yo maari am nyini atin n a. Ama, fite durunya n bumboori, i yo ti má sɔ.

⁹ M suse am wɔ lεε, ka, sɔnɔ kere bo i faari i yi jiiri, na wɔ yo má ka bara n akɔ somaya ye i fa i jiiri, na i jaari bara fɔfɔre, i mi n asaaki ajaa ciire lεε.”

¹⁰ Na i susufɔm n ase i ka, “Nzen i nya tiiri sɔ yiri, fa kɔ biesɔ ni bara dɔ, i ti kpa ka má be ja ajaa.”

¹¹ Na wɔ se bu ka, “Má sɔnɔ kere koro su ahin nɔanie n su a, má ka bere bo Nyemε adu mɔ afa ama bu ni.

¹² Dama deke bo i ti na mine nbem ja má ajaa n la ka, bu biesɔ dika yo má juma n dεε ti, nbem gusu, ba sa bu wɔ, ye nbem gusu kete ajaa fa kɔ Nyemε femeya n jɔre dεε ti. Nyini ti, sɔnɔ kere bo i koro de ahin nɔanie ni, i mi de i.”

Kabo Yesu yoori nbaatumam kisi barasu ni

¹³ Na mine nbem afa nbaatumam aba Yesu dɔ, ka i fa i saa nana bu nɔ na i sere Nyemε ma bu. Ama, na i susufɔm n atien minem ni nɔ.

¹⁴ Na Yesu ase bu ka, “Am ma nbaatumam n bra m dɔ, má am fɔn bu. Dama bere nɔusu sɔ ye Nyemε femeya n ti bu dεε a.”

¹⁵ Na wɔ fa i saa anana bu nɔ na wɔ yo bu kisi, na wɔ nya afite bere akɔ.

Gbefene nenɔefɔ n ni i nyemesu jɔre

¹⁶ Cεen be, na gbefene be aba Yesu dɔ, aba abisa i ka, “Ya Kerefo, m yo nzu sakpa ye m bá nya nɔɔ n bo i la má awieeri n a?”

17 Na Yesu abo i nu ka, “Nzu ti ye a bisa m fa ko deke bo i ti sakpa su a? Sono kun n kpein wo bere bo i ti kpa. Nzen a koro ka a nya ngoo, su Nyeme noanie maawam n su.”

18 Na wo bisa Yesu ka, “Noanie maawa nbonom?” Na Yesu abo i nu ka, “Ma a kun sono. Ma a saaki ajaa ciire. Ma a wo. Ma a di kore daani.”

19 Bu u si ni u ni. Koro u bengi kabo a koro u nu ni.”

20 Na gbefene n ase i ka, “Ma su nyini noanie maawa n kere su, ye nzu kaari a?”

21 Na Yesu ase i ka, “Nzen a koro ka u woowa n ti kabo Nyeme koro ka i ti n wo, ko na a ko to u aja kere, na a fa nwaa n ma yaarifom, na a ba nya ajere Nyeme do, na a bra, ba su m su.”

22 Sanga bo gbefene n tiiri nyini so ni, na wo yasu ako ni ahoresaaki, dama i la nenje agaya n dee ti.

23 Na Yesu ase i susufom n ka, “Nahore ye m suse am n a, i yo kekereke ni bo nenjefo wura Nyeme femeya n nu.”

24 M suse am wo bekun lee ka, kabo nyoma sin misini bue nu ni, i ti ma kekereke tara ma kabo nenjefo yo na i wura Nyeme femeya n nu ni.”

25 Sanga bo Yesu susufom n tiiri nyini n so ni, na ba yo alekutura agaya, na ba bisa i ka, “Ye nzen i ti so, nma koro fite nu a?”

26 Na Yesu anie bu do, na wo se ka, “Ahin ti deke bo adamande koro yo ma i, ama, Nyeme do, i ti ma pui, dama Nyeme koro yo deke kere.”

27 Na Peto ase i ka, “To, ye yere ayaki deke kere susu u su e. Ye ya nya nzu wo?”

28 Na Yesu ase bu ka, “Nahore ye m suse am n a, sanga bo mini Adamande Wa n ba tanaari m jirima tanaabiri n durunya fofore n nu, m ma amberi bo am asu m su ni tana femeya bie buru ni nnyom n su, na am nie Yisarelifom ano buru ni nnyom n su.”

29 Na sono kere bo i yakiiri i awuru, wara i ninbaam, wara i si, ni i ni, wara i nbaam, wara i asienm, mini dee ti, i mi nya nyini n kere nusu yaa i ngoo su, na i kaaki nya ngoo bo i la ma awieeri.

30 Am mine dongu bo bu wo mo kisa ni ba ka sin, na bo bu ka sin kisa n ba du mo.”

20

Mienu fa ko fie fo be ni i npadifom su ni

1 Na Yesu akaaki ase ka, “Nyeme femeya n ti ka sono be bo i yasuri alecin ngarama fuun, ka i ko nienie npadifom na bu ko yo i fie juma n wo.”

2 Na i ni bere adi go, na wo soro su ka i to bu lekun jumayoowa nkatu, jete nwaa kun. Na wo fa bu ako fie n su.

3 Na fa ko kerefi ngona sanga, na wo kaaki ako anu ka mine nbem tana goosu, bu yo ma pui.

4 Na wo se bu ka, ‘Am ma ya ko m fie n su, na am ko yo m juma, na m to am kaari, kabo am jumayoowa ti barasu.’

5 Nyini ti, na ba ko. Na kerefi buru ni nnyo sanga, na wo kaaki ako goosu, ako anu ka mine nbem jina, na wo fa bu ako i fie n su. Na kerefi nsan sanga, na wo yo so bekun.

6 Na fa ko naaso kerefi nnu sanga, na wo ko anu ka mine nbem jina ngbeen, bu yo ma pui. Na wo bisa bu ka, ‘Nzu ti ye am ba jina fen ngarama kun kere ngbeen so, na am yo ma pui a?’

7 Na ba bo i nu ka, ‘Be afa ma ya ka ya yo i juma.’ Na wo se bu ka bere gusu ko na bu ko yo juma i fie n su.

⁸ Saŋga bo wie ba tɔɔri n na fiefo n fere i juma niesufo n na wo se i ka, 'Fere jumayofom n kere na a to bu kaari. Bo i bu to bo bu baari kasin n ka, na a nya ba to bo bu duuri mo baari ni.'

⁹ Na bo bu baari ka sin n kere aba, na wo to bu jete nwaa kun kun.

¹⁰ Saŋga bo i ba kpuraari bo bu duuri mo baari ni, bu sunsuunri ka bu dee nkato tara bo bu kaari sin baari n dee n wo. Ama, bu tɔɔri bu kere jete nwaa kun kun wo, kabo bu tɔɔri kasinfom ni.

¹¹ Bu deeru nwaa wieeri so ni, na ba nujuti fie n fo ni.

¹² Bu na, 'A to kasinfom bo ba yo ma juma kpa be ni nkato nyunyumi, na kabo a tɔɔri bu ni, a to yere gusu bo ya baari ngarama kun kere, na ya ba adi yaari, na wie abo ya n gusu so o.'

¹³ Ama, na fie n fo n abo nu, ase bu kun ka, 'M don, ti fen, ma sisi ma am e. Bo mini si i n la ka, am soroori su ka am yo lekun juma, na am de jete nwaa kun wo.

¹⁴ Nyini ti, de u nwaa na a ko. M koro ka m ma kasinfo n kabo m maari u n wo.

¹⁵ M la ma atin ka m yo m nwaa kabo m koro, nzen se? Wara, a si m kore fa ko m sakpa bo ma yo i n wo?" "

¹⁶ Na Yesu ase bu ka, "Ahin mienu n bu la ka, minem bo ba ka sin kisa ni, ba du mo, na bo ba du mo kisa n ba ka sin."

Kabo Yesu jajo fa kɔɔri i yiwee n su kpe nsan su ni

¹⁷ Saŋga bo Yesu ni i susufom, ni jama n sukɔ Yerusalem mie kpiri n nu ni, bu wo ko su so ni, na wo fere i susufo buru ni nnyom n ako aheme, na wo se bu ka,

¹⁸ "Am ti fen. Ya sukɔ Yerusalem lee, do ye bu ko tara mini Adamande Wa n a, na bu fa ma Nyeme sayoowa donguyofo nkpienkpienm ni, ni Nyeme noanie kerefom ni, na bu di m jore, na bu soro su ka bu kun m.

¹⁹ Na bere gusu nya fa m wura minem bo bu ti ma Yudafom saa nu, na bu yo m anzasi, na bu fin m ngbere, na bu nya kpama m baka jaanu n su na m wu, na i lesan ceen, na Nyeme ma m tenge m yiwee n nu."

Kabo Yesu kereeri ka mofa yo i nu kaan ni

²⁰ Na Zebedi yi afa i nbaa nnyom n aba akutu Yesu nyunu, asere i ahoma ka i yo sa be ma i.

²¹ Na Yesu abisa i ka, "A koro ka m yo nzu ma u a?" Na bara n abo i nu ka, "M koro ka a ma no ka saŋga bo a ba diiri u femeya ni, a ma m ahin nbaa nnyom ni atin na bu nu kun tana u saa fomboro su, na kun gusu tana u saa bie su."

²² Na Yesu ase bu ka, "Am si ma deke bo am susere i n ti a. Am koro di wahara n bo m di i ni?" Na ba bo i nu ka, "Een, ya koro yo i kere."

²³ Na Yesu ase bu ka, "Nahore, am di wahara n bo m di i ni. Ama, mini la ma atin bo m ma am be tana m saa fomboro su, na be tana m saa bie su. Ama, m Si Nyeme asese nyini tanaabiri n su, afa ase minem bo yiri ni i tii ayi bu n a."

²⁴ Saŋga bo i susufo burum n ba tiiri kabo Zebedi nbaa nnyom n seeri Yesu ni, na ba fa yaa bu nu.

²⁵ Na Yesu afere bu kere aba i bi, na wo se bu ka, "Am si tenle su ka minem bo bu su ma Nyeme, na bu yo bu nu nkpienkpienm ni, bere mie bu minem a, na bu tereterefom gusu kere kabo bu yiko ti barasu.

²⁶ Ama, i ti ma ye ni ka ambere yo so. Nzen sono bo i koro ka i wura i nu kpiri am kere nu, wo yo daka ka i mi yo i nu kaan, na i su am.

²⁷ Na bo i kaaki koro ka i yo am mofa, i ti ye ni ka i mi yo am kere akoo,

²⁸ kabo mini Adamande Wa n ni m tii aba má ka minem su m ni, ama, m baari ka m ba su minem wɔ, na m wu ma bu, na m de mine donɔgu tii ji.”

Kabo Yesu tuntuunri anyinsin nnyɔ nbem na bu ŋuuri asi ni

²⁹ Saɔga bo Yesu, ni i susufɔm ni sufite mie kpiri n bo bu fere i ka Yeriko ni, na jama beberebe asu bu su.

³⁰ Bu sukɔ ni, anyinsin nnyɔ nbem tana atin n nɔɔ su. Saɔga bo bu tiiri ka Yesu susin ni, na ba bo afere i, bu ŋa, “Ya Mibiɛ, Feme Davidi anuma, si ya aɔunfɔ.”

³¹ Na jama n atien bu ŋu ka bu yaki naɔmie. Ama, na ba kaaki abo afere abuka su ka, “Ya Mibiɛ, Feme Davidi anuma, si ya aɔunfɔ.”

³² Na Yesu aka ajina, na wɔ fere bu, na wɔ bisa bu ka, “Am koro ka m yo nzu ma am a?”

³³ Na ba bɔ i nu ka, “Ya Mibiɛ, ya koro ka a ma ya ŋu asi wɔ.”

³⁴ Na Yesu asi bu aɔunfɔ, na wɔ fa i saa akan bu nyumbaa ni, kpenɔa na ba ŋu asi, na ba su i su.

21

Kabo Yesu fuunri kaako wuraari Yerusalem ka feme dɛɛ su ni

¹ Bu kɔ ŋa bu dodo Yerusalem mie kpiri n nu, na bu ŋa bu wura mie n bo bu fere i ka Befage ni, nyini mie n dodo buka n bo bu fere i ka Oliva Buka n wɔ, dama oliva bakam gɔ su wɔ. Dɔ na Yesu asunma i susufɔm n nu nnyɔ,

² na wɔ se bu ka, “Am kɔ mie kaan n bo i wo am nyunu dɔ ni, am kɔ juuri, am ŋú ka kaako be minda, i wa jina i bi bere. Am nyangi i ni baa n kere bra.

³ Nzen be bisaari am ka nzu ti ye am sunyangi i a, am se i ka Mibiɛ ni koro bu a, na i má am kaaki fa bu ba kisa kisa.”

⁴ Ahin yoori sɔ ɔ, adena Nyeme nɔanie kanfɔ n nɔanie n bo i yo jɔjɔori i n yo yiiwa a, i ŋa,

⁵ “Se Siyonfɔm ka,

Am nie, am feme ni suba n a.

Wɔ yo i ŋu taraka, i fun kaako wɔ.”

⁶ Na i susufɔm n akɔ ayo kabo i seeri bu ni.

⁷ Na ba fa kaako n ni i wa n aba, na ba fa bu suturam anana bu ŋu, na Yesu afun atana su.

⁸ Na mine beberebe afa bu suturam atereki ase atin n nu, na nbem gusu abubu nyawa asese atin n nu.

⁹ Na jamam bo bu du i nyunu n ni bo bu wo i sin n kere, subo kuyigindi, bu ŋa,

“Hosana. Ya kansu Feme Davidi anuma ni.

Terefie wo yiri n bo i suba Micera n dɛɛ duma n nu n dɔ.

Ya kansu Nyeme bo i wo aɔgoro ni.”

¹⁰ Yesu kɔ wuraari Yerusalem ni, na mie n abo nu, na ba bisa ka, “Ye sɔnɔ bɔnɔ la ahin a?”

¹¹ Na jama n abɔ nu ka, “Ahin ti Yesu wɔ, Nyeme nɔanie kanfɔ n bo i fite Nazareti mie n bo i wo Galili awɔre n nu ni.”

Kabo Yesu fɔɔnri watafɔm fiteeri Nyeme Sereebiri Awuru n nu ni

¹² Na Yesu akɔ awura Nyeme Sereebiri Awuru n nu, na wɔ fɔn nenge tɔfɔm ni tofɔm kere afite awuru n nu, na wɔ kaaki ŋwaa kaakifɔm teebirim, ni tiwa tɔfɔm biem kere alanlanga.

¹³ Na wɔ se bu ka, “Ba kere i Nyeme Jore Kadasi n nu ka, Nyeme na o, ‘M awuru ni, bu ba fere i ka awuru bo bu ba sere Nyeme nu wɔ.’ Ama, ambere afa i yo awiefom fiebiri.”

¹⁴ Na anyinsinm, ni wobukam aba i do, Nyeme Sereebiri Awuru n nu, na wɔ ma bu anya laifie.

¹⁵ Sanga bo Nyeme sayoowa donguyofɔ nkpienkpienm, ni Nyeme nɔanie kerefom n nyuri sam n bo i yoori bu ni, ni kabo nbaatumam bo bu woori Nyeme Sereebiri Awuru n nu bo tuntuunri i ka, “Hosana. Ya kansu Feme Davidi anuma ni,” na yaa ati bu.

¹⁶ Nyini ti, na ba bisa Yesu ka, “A ti kabo nbaatumam n ase ni e?” Na Yesu abo bu nu ka, “Een, ma ti. Am nya kan ma kabo ba kere i Nyeme Jore Kadasi n nu n wɔ? Bo ba kere ka, ‘Woro Nyeme ye a kere nbaatumam, ni nbaatuma kan kanm, kabo bu kansu u nahore su a.’”

¹⁷ Na Yesu ayaki bu bere, na wɔ fite mie n nu ako Betani mie n nu, ako ada do.

Kabo Yesu yoori damba baka be ngbeen ni

¹⁸ I alecin ngarama fuun, na Yesu sukpie i nyi ko Yerusalem mie n kunnu, na ahɔe ati i.

¹⁹ Na wɔ nie anu damba baka be, atin n nɔɔ, na wɔ ko anie ka i nya suuwa n be di. Ama, i ko juuri baka n bu ni, wɔ nyu ma pui su, se nyawa ngumi a. Do na wɔ se baka n ka, “Sin nyuma sin, woro su ma suuwa kun.” Dika n nu bere, na baka n akaba awu.

²⁰ Sanga bo i susufom n nyuri nyini n so ni, na ba yo alekutura. Na ba bisa i ka, “Nzu ti ye baka n wuuri ndende so a?”

²¹ Na Yesu abo bu nu ka, “Nahore ye m suse am n a, woro kere bo a yoori Nyeme yarada na a yo ma sika, a koro yo sa n bo ma fa ayo ahin damba baka n be. Ma ahin ni ngumi, haari nzen a seeri ahin buka n ka, ‘Yasu ko to tieku n nu,’ i yo so o.”

²² Nzen am yoori yarada, deke kere bo am sere Nyeme ka am koro i, Nyeme yo i ma am.”

Kabo bu bisaari Yesu deke bo i yiko n fite ni

²³ Na Yesu akpie i nyi aba awura Nyeme Sereebiri Awuru n nu, na i sukere minem. I wo kere su so n na Nyeme sayoowa donguyofom, ni Yudafom nkpienkpienm aba i do, na ba bisa i ka, “Nma dee yiko nu ye a yo nyini sam kere a? Nma ma u nyini yiko ni, ye a yo nyini sam n a?”

²⁴ Na Yesu abo bu nu, ase bu ka, “Am ma m du mo bisa am bisaawa kun be ka, na nzen am boori m nu, na m gusu nya se am deke bo m yiko n fite.”

²⁵ Nma maari Yohane atin ye i ba bieeri minem Nyeme nzue n a? Nyeme nzen adamande?” Na ba se akuruwa bu nyu nu, kabo bu bo Yesu nu barasu. Bu na, “Nzen ya se i ka Nyeme maari i atin a, i bisa ya ka ye nzu ti ye ya da ma Yohane nyu a?”

²⁶ Ama, nzen ya seeri i ka adamande do, ya soro sere ka jama ni yaki ma ya. Ma pui ti, dama sono kere soroori su ka Yohane yo tiiri Nyeme nɔanie kanfo o nahore su.”

²⁷ Nyini ti, na ba bo i nu ka, “Ya si ma.” Na yiri gusu ase bu ka, “Mini mmoo se ma am sono bo i dee yiko nu na m yo ahin sam n kere ni.”

Mienu fa ko sono be ni i nbaa nnyo nbem su

²⁸ Na Yesu abisa bu ka, “Am sunsun ka ahin mienu bu la ka se wo lee? Sono be yo woori bere a, i la nbaabiesom nnyo. Een be na wo ko kpien n do, ako ase i ka, ‘M wa, ko baka suuwam fie n nu, na a ko yo juma nyuma.’”

²⁹ Na baa n ase i ka, ‘M kó má.’ Ama, kasin, na baa n aba akaaki i sunsunni, na wɔ kɔ.

³⁰ Na wɔ kɔ nyinga n dɔ, akɔ ase i gusu. Na baa n ase i ka, ‘Ma ti, m kó.’ Ama, wɔ kɔ má.

³¹ Tɔ, bu mine nnyom n nu, nma yoori i si n sa koroowa?” Na ba bɔ i nu ka, “Baakpien ni.” Dɔ na Yesu ase bu ka, “Nahɔre ye m suse am n a, lampodefom ni sakaram kere sufa Nyeme yo bu femɛ yaki am.

³² Dama ka, Yohane baari ka i bá kere am sa bo i kɔ atin su Nyeme dɔ ɔ, ama, am ayo má i yarada, na lampodefom ni sakaram, bere ayo i. Haari ni bo am njuuri kabo bu yoori yarada ni, am akaaki má am wo, na am yo i yarada.”

Kabo Yesu boori miɛnu niiri Yudafom nkpienkpienm ni

³³ Na Yesu ase bu ka, “Am so am sui na am ti miɛnu n be bekun. Awurufobie be yo woori bere a, na wɔ dɔ i baka suuwa barasu be fie, na wɔ kanda abara aye fie ni. Na wɔ lokoti yabue bambaka be kunma, ka i sumiemie baka suuwam ni nzue gɔ nu. Na wɔ ta kpafiri lenlenge be ka bu tana su sunie fie n kere su, na wɔ nya afa fie n awura i npadifom saa nu. Na wɔ kɔ atin.

³⁴ Saŋga bo i siiri ka wɔ ka kaan na baka suuwam n bí ni, na wɔ sunma i akɔom i npadifom n dɔ ka bu kɔ de i dɛɛ bo ba nya i n bra.

³⁵ Akɔom n kɔ juuri ni, na ba bo bu nu kun, na ba kun nyinga, na ba tu nyinga n gusu yabue.

³⁶ Na sɔnɔ n asunma i akɔɔ nyingam bekun, bu sunnu tara ciciri dɛem ni, na npadifom n ayo bu kabo bu yoori ciciri su dɛem ni.

³⁷ Na kasin, na wɔ ba asunma i wa, na wɔ se ka, ‘Bu má m wa n yiri jirima.’

³⁸ Ama, saŋga bo npadifom n njuuri ka baa ni suba ni, na ba se bu njuu nu ka, ‘I wa n bo i dí i aja n lɛɛ suba n a. Am bra na ya kun i na aja n kere ká ya dɛɛ.’

³⁹ Dɔ na ba tara i, na ba cin i atu baka suuwa fie n aheme, na ba kun i.”

⁴⁰ Na Yesu anya abisa bu ka, “Am sunsun ka fie fɔ n ba baari, i yó nyini npadifom ni se wɔ?”

⁴¹ Na ba bɔ i nu ka, “I bá ma nyini mine tiefom n kere wu kenkesi yiwee wɔ, na i fá fie n wura npadifo fɔfɔrem saa nu, bere bo bu má i nya i dɛɛ baka suuwam, saŋga bo bu ba biiri ni.”

⁴² Na Yesu ase bu ka, “Am nya kan má kabo ba kere i Nyeme Jore Kadasi n nu ni, nzen se? Bu na,

‘Yabue n bo bondo tafom n faari i tuuri ni,
yiri ye wɔ kaaki bondo n jaa yabuem n kere tii a.

Micera ni yoori i sɔ a.

Ya nju i na wɔ yo ya alekutura.’ ”

⁴³ Na Yesu ase bu ka, “M suse am wɔ lɛɛ, ka, bu dé Nyeme femeya n fite am dɔ, na bu fá ma minem bo bu bita i na i la kpere ni.” [

⁴⁴ Na wɔ kaaki ase ka, “Sɔnɔ kere bo i kpaasiiri ahin yabue n su, i mi búbu nu wɔ mumuku, na sɔnɔ kere gusu bo ahin yabue n tɔori i nju, i sán i mi samene wɔ.”]

⁴⁵ Nyeme sayoowa dɔnguyofom, ni Farasifom n tiiri miɛnu n bo Yesu boori i sɔ ni, na ba fa nu ka i boori i niiri bere wɔ.

⁴⁶ Nyini ti, na ba kpini atin kabo bu yo na bu tara i, ama, bu soroori jama n wɔ, dama bu kere na i ti Nyeme nɔanie kanfɔ ɔ.

22

Miɛnu fa kɔ konyaya di ni nu bambaka n su

- ¹ Na Yesu akaaki abo miɛnu be bekun, i ɲa,
² “Kabo Nyɛmɛ fɛmɛya n ti yaa. Fɛmɛ be yo sɛsɛeri i wa konyaya di ni nu su fa seeri a.
³ Na wɔ sunma i akɔɔm ka bu kɔ fere minɛm bo wɔ du mɔ abaandi bu ka bu ba konyaya di ni nu ni, ka bu bra. Ama, na ba kete ka bu ba má.
⁴ Na wɔ kaaki asunma akɔɔ nyingam ka bu kɔ se bɛrɛ n bo wɔ du mɔ abaandi bu n ka, ‘Am bra, dama ma yo m di ni nu n siriya kɛrɛ awie. Haari ma kun m tooram, ni nɛngɛndɔrɛ bo bu la lui ni, ayo siriya kɛrɛ awie. Am bra na am ba konyaya di ni nu ni.’
⁵ Ama, bu be mmɔɔ abɔ má bu nu. Na ba ka bu juma n yo su. Kun kɔɔri i fiesu wɔ, na nyinga gusu akɔ i juma yoobiri.
⁶ Na nyingam n atara i akɔɔm ni, na ba kere bu wuwuruwa, na ba kun bu.
⁷ Dɔ na yaa ati fɛmɛ n agaya, na wɔ sunma i sojam, na ba kɔ akun nyini minɛ kunfɔm ni kɛrɛ, na ba yara bu miɛ ni.
⁸ Na wɔ fere i akɔɔm ni, na wɔ se bu ka, ‘Konyaya di ni nu n ayo siriya, ama, minɛm bo m duuri mɔ baandiiri bu ka bu ba di i ni, i ti má ye ni ka bu dí i kun.
⁹ Nyini ti, am fite kɔ atɛngberem su, na am kɔ fere minɛm barasu kere bo am ɲuuri bu ni, ka bu bra konyaya di ni nu ni.’
¹⁰ Na akɔɔm n akɔ atɛngberem su, akɔ atien minɛm kɛrɛ bo bu kɔ ɲuuri bu n nɔɔ aba, minɛ kpam ni tiɛm kɛrɛ. Na konyaya awuru n ayi ni jama beberebe.
¹¹ Na fɛmɛ n akɔ, ka i kɔ niɛ jama ni, na wɔ ɲu ka sɔnɔ kun be wo jama n nu, i wura má konyaya sutura.
¹² Na fɛmɛ n abisa i ka, ‘M dɔn, a yo sɛ wuraari awuru n nu fɛn, ye a wura má konyaya sutura a?’ Ama, sɔnɔ n akoro abɔ má i nu.
¹³ Na fɛmɛ n ase i ngbɛfɛnɛm ka, ‘Am tara i, na am cici i saam, ni i jaam nyama, na am fa i tu dasin dɔ, awosin n nu. Dɔ na i sún, na i kán i saa.’ ”
¹⁴ Na Yesu anya ase bu ka, “Minɛm bo Nyɛmɛ afere bu n sunnu, ama, bo wɔ yi bu n sunnu má.”

Kabo bu sɔɔri Yesu ɲgɛɛ lampo tɔ busu ni

- ¹⁵ Na Farasifɔm n afite akɔ asɛsɛ su kabo bu sɔ Yesu ɲgɛɛ, na bu nya i taraabiri fa kɔ i nɔaniɛ jɔjɔɔwa su.
¹⁶ Na ba sunma bu susufɔm, ni Fɛmɛ Herode minɛm Yesu dɔ, na ba kɔ ase i ka, “Ya Kerefɔ, ya si ka a ti nahɔrɛ sefɔ ɔ, na a kere minɛm kabo Nyɛmɛ atin ti nahɔrɛ su, na u cɛcɛ wo má kabo minɛm jɔjɔ nu, dama a nie má sɔnɔ jinaabiri ti.
¹⁷ Tɔ, a ɲa sɛ wɔ? Ya dɛɛ atin n su, atin wo nu ka ya tɔ lampo ma Romafɔm Fɛmɛ Kpiri Siza, nzen atin wo má nu?”
¹⁸ Ama, na Yesu asi ka bu bita sunsunni tiɛ wɔ, na wɔ se bu ka, “Ambɛrɛ burukɔɔnufɔm ni, nzu ti ye am sukoro ka am sɔ m ɲgɛɛ a?
¹⁹ Am fa ɲwaa n bo bu fa tɔ lampo kaari n bra na m niɛ.” Na ba fa ɲwaa n aba ama i,
²⁰ na wɔ de ɲwaa n anie, na wɔ bisa bu ka, “Nɲma dɛɛ tii ni i duma wo ɲwaa n su n a?”
²¹ Na ba bɔ i nu ka, “Fɛmɛ Siza dɛɛ a.” Na Yesu ase bu ka, “Tɔ, deke bo i ti Fɛmɛ Siza dɛɛ, am fa ma Fɛmɛ Siza, na deke bo i ti Nyɛmɛ dɛɛ, am fa ma Nyɛmɛ.”

22 Saŋga bo bu tiiri ahin nɔaniɛ n sɔ ni, na ba miɛ, na ba kɔ ayaki i.

Kabo bu bisaari Yesu fa kɔɔri yiwee tenge jɔɛ su ni

23 Nyini cɛɛn n gbingbin na Sadusifo nbem aba Yesu dɔ. Bu dɛɛ kereewa la ka Nyemɛ tɛnge mǎ minɛm bu yiwee n nu n a. Na ba ba abisa i jɔɛ be, bu ŋa,

24 “Ya Kerefɔ, Moyisi yo seeri ka, nzen sɔnɔ wu yakiiri i yi, na i ni bara n anya mǎ baa, wɔ yo daka ka i niema n fa kunafo n na bu wu nbaam ma yiri n bo wɔ wu ni.

25 Tɔ, sɔnɔ be yo laari nbaabiesom nso wɔ, ya nu fɛn, na baakpiɛn n aja bara, na wɔ wu ayaki bara ni, ba wu mǎ baa.

26 Sɔ ye bo i tɔ i su nnyɔ su, ni nsan su n yoori a, haari fa kɔ kpuraari nso su ni.

27 Na bara n ni i tii aba aka sin awu.

28 Tɔ, kabo bu minɛ nso n kɛɛ aja bara n na ba wu sɔ ni, cɛɛn bo Nyemɛ bǎ tenge minɛm bu yiwee n nu ni, bara ni kǎ ŋma dɛɛ tenle su a?”

29 Na Yesu abɔ bu nu ka, “Am amini atin. Dama am ti mǎ deke bo ba kɛɛ i Nyemɛ Jɔɛ Kadasi n nu n bu, na am kaaki si mǎ kabo Nyemɛ yiko n ti barasu.

30 Dama saŋga bo Nyemɛ bǎ tenge minɛm bu yiwee n nu ni, ajaa wo mǎ bere kun. Ama, nyini cɛɛn ni, sɔnɔ kɛɛ kaaki ka Nyemɛ merɛkem bo bu wo aŋgoro n wɔ, dama bu ja mǎ ajaa kun.

31 Na fa kɔ kabo Nyemɛ bǎ tenge minɛm bu yiwee n nu barasu ni, am akan mǎ Nyemɛ Jɔɛ Kadasi n nu kabo i yo seeri am n wɔ, nzen sɛ? I ŋa,

32 ‘Mini ti Abraham, ni Izaki, ni Jakobu dɛɛ Nyemɛ n a.’ ” Na Yesu asa su ase bu ka, “Tɔ, kabo Nyemɛ ŋa i ti nyini minɛm n dɛɛ Nyemɛ ni, nyini kere ka bu toko la ŋɔɔ lɛɛ, dama Nyemɛ ti mǎ bo ba wu n dɛɛ Nyemɛ, ama, i ti bo bu la ŋɔɔ ni dɛɛ Nyemɛ a.”

33 Minɛm n tiiri i kereewa n sɔ ni, na ba yo alekutura.

Nyemɛ nɔaniɛ maawa n bo i tara bu kɛɛ n jɔɛ

34 Saŋga bo Farasifom tiiri ka Yesu ajojɔ ayi Sadusifom ni, na ba tien bu nɔɔ i dɔ.

35 Na bu nu kun be, bo i ti Nyemɛ nɔaniɛ kerefɔ n abisa Yesu bisaawa be ka i sɔ i ŋgɛɛ. I ŋa,

36 “Ya Kerefɔ, Nyemɛ nɔaniɛ maawa n bo i wo i nɔaniɛ kpamaawa n nu ni, bonɔ tara bu kɛɛ a?”

37 Na Yesu abɔ i nu ka, “Ba kɛɛ ka, ‘Koro Micɛra u Nyemɛ ni, ni u ahorembaa kun, ni u awiɛwiɛ, ni u sunsunni kɛɛ.’

38 Ahin ti nɔaniɛ maawa n bo i tara i kɛɛ a.

39 Bo i tɔ su nnyɔ su n ti ka nyini n wɔ. Ka o, ‘Koro u benggu kabo a koro u ŋu ni.’

40 Kabo ba kɛɛ Nyemɛ nɔaniɛ kpamaawam n kadasi n nu, ni Nyemɛ nɔaniɛ kanfom n dɛɛ n nu ni, i kɛɛ jina ahin nɔaniɛ maawa nnyom n su wɔ.”

Kristo Tiidefo n bo i ti Fɛmɛ Davidi anuma n jɔɛ

41 Saŋga bo Farasifo nbem ba tientienri bu nɔɔ ni, na Yesu abisa bu jɔɛ be fa kɔ Kristo Tiidefo n su. I ŋa,

42 “Am fa Kristo Tiidefo n bu ŋma a? Am sunsun ka i ti ŋma dɛɛ anuma a?” Na ba bɔ i nu ka, “I ti Fɛmɛ Davidi anuma a.”

43 Na Yesu abisa bu ka, “Ye nzu ti ye Nyemɛ Awiɛwiɛ n ba wuruari Fɛmɛ Davidi ŋu, ye i fereeri i ka i Mibiɛ a? I ŋa,

44 ‘Na Micɛra n ase m Mibiɛ n ka,

“Ba tana m saa fomboro su fen,
haari m bá má u kpofom kere ba kutu u jaa bu.” ’

⁴⁵ To, nzen Feme Davidi mmoo ni i tii yo fereeri Kristo n ka i Mibie, ye Kristo n yo se kaaki yo Feme Davidi anuma a?”

⁴⁶ Be akoro anya má noanie be abo má i nu. Nyini ti, fite nyini ceen n sin, be abo má su ka i bisa Yesu jore bekun.

23

Kabo Yesu na mine si bu nu sa ni Yudafo tereterefo nbem ni

¹ Na Yesu ajojo i susufom n ni jama n do, na wo se bu ka,

² “Nyeme noanie kerefom, ni Farasifom n ade Moyisi dee jinaabiri ni, ye bu kere minem Nyeme noanie kpamaawa n a.

³ Nyini ti, deke kere bo bu fa kere am ni, am soro i su, ama, má am yo sam bo bu yo bu ni, dama bere yo má sam bo bu kere ka minem yo bu ni.

⁴ Bu cici soori nonoori so minem wo, ama, bere ni bu tii soro má su ka bu fa bu saa kan i.

⁵ Deke kere bo bu yo i, bu koro ka minem nu bu wo, na bu kansi bu. Bu kere Nyeme noanie n wo, na bu yo i ka sebe, na bu fa cici bu numasu, adena minem nu i. Na bu yo bu tanlee noo njorem tintiin. ⁶ Nyini minem n anya awura bu tientienbunoo soom n nu ni, wara ba nya afere bu tientienbunoo bambaka diire diibirim ni, bu koro ka bu tana kpirikoro tanaabirim wo.

⁷ Bu koro ka minem suyo bu anse goosu wo, na bu ma bu jirima, na bu fere bu ka, ‘Ya Kerefo.’

⁸ Amere, má am ma be fere am ka ‘Ya Kerefo,’ dama am la kerefo kun n kpein wo. Amere kere ti nibaam wo.

⁹ Má am fere be ka am si, durunya n nu fen, dama am la Si kun n kpein wo, yiri wo angoro n a.

¹⁰ Má am ma be fere am ka i kpien, dama am kpien ti kun n kpein wo, yiri la Kristo Tiidefo ni.

¹¹ Bo i ti am kere tii ni, wo yo daka ka yiri su am a.

¹² Sono kere bo i wura i nu kpiri, Nyeme yo i mi kaan, na sono kere bo i yo i nu kaan, Nyeme wura i mi kpiri.”

Kabo Yesu na Yudafo tereterefo nbem ba nu anyumboro ni

¹³ Na Yesu akaaki ase ka, “Amere Nyeme noanie kerefom, ni Farasifom n bo am ti burukonufom ni, am ba nu anyumboro. Am kanda minem wo, adena má bu su Nyeme femeya n atin su, dama amere ni am tii kete ka am su má i atin n su, na am sukanda bo bu koro ka bu su i su ni. [

¹⁴ Amere Nyeme noanie kerefom ni Farasifom n bo am ti burukonufom ni, am ba nu anyumboro. Am sisi nkunafom na am fin bu nengem wo, na am jina sere Nyeme ce, adena minem nu ka am ti mine kpam wo. Jina ceen, amere ba nya suicin tara minem kere.]

¹⁵ Amere Nyeme noanie kerefom ni Farasifom n bo am ti burukonufom ni, am ba nu anyumboro. Am kpie tiekum wo, na am ko miem bo bu waarim su, adena am nya sono kun mmoo bo i kaaki i wo na i su am su, na sangha bo am nya nyaari i mi, am ma i satie yoowa tara am dee wo, adena yiri du am mo ko ceema sin nu.

¹⁶ Amere bo am ti ka anyinsinm na am kere minem atin ni, am ba nu anyumboro. Am na nzen sono taanri ndie fa ko Nyeme Sereebiri Awuru n do, i ti má pui. Ama, nzen sono kere bo i taanri sika nengem n bo bu wo Nyeme Sereebiri Awuru n nu ni, i mi ma i ndie taanwa n yo yiiwa.

¹⁷ Ambere bo am ti ka anyinsin sinnzinm ni, bono tara i bengu a? Sika nenngem ni, nzen Nyeme Sereebiri Awuru n bo yiri ma sika nenngem n yo casi n a?

¹⁸ Am kaaki na, nzen sono taanri Mikun n yoowa yoobiri ni, i ti ma pui. Ama, nzen sono taanri aceerim bo ba fa ase Mikun n yoowa yoobiri n su ni, wo yo daka ka i mi ma i ndie taanwa n yo yiiwa.

¹⁹ Ambere bo am ti ka anyinsinm ni, bono tara i bengu a? Aceerim ni, nzen Mikun n yoowa yoobiri n bo i ma aceerim n yo casi n a?

²⁰ Nyini dee ti, sono kere bo i taanri Mikun n yoowa yoobiri ni, i mi atan i ni dekem kere bo bu wo su n wo lee.

²¹ Na sono kere bo i taanri Nyeme Sereebiri Awuru ni, i mi atan i ni Nyeme bo i wo nu n wo lee.

²² Na nzen sono kere bo i taanri angoro ni, i mi atan Nyeme femeya bie n wo lee, ni yiri Nyeme bo i tana su ni.

²³ Ambere Nyeme noanie kerefom, ni Farasifom n bo am ti burukoonufom ni, am ba nu anyumboro. Am yi am jakam ma Nyeme wo, haari ni am maakunm, ni ngetem, ni nvannvanm kere, ama, am yo ma sam bo Nyeme noanie kpamaawa n kere ka am yo bu n na bu la anyunuyi tara bu kere ni. Bere la nahore sam, ni anunfo si, ni yaradayo. Wo yo daka ka na am yo nyini sam sanja kere, na am fa jaka yiiwam buka su.

²⁴ Ambere ti ka anyinsinm na am kere minem atin ni. Am kpokpo yi nminsenn bo bu ti kan kanm n wo, am deke nuuwam nu, ama, na am sanja nu nyoomam bere, am deke nuuwam nu.

²⁵ Ambere Nyeme noanie kerefom, ni Farasifom n bo am ti burukoonufom ni, am ba nu anyumboro. Am nmisi am kopum ni taalem sin wo, ama, na bu kunnu ayi ni dekem bo am fin bu fanja, ni anyii sayoowam wo.

²⁶ Woro Farasifo bo a ti ka anyinsin ni, du mo yo u kopu n kunnu casi ka, na i sin n gusu nya yo casi.

²⁷ Ambere Nyeme noanie kerefom, ni Farasifom n bo am ti burukoonufom ni, am ba nu anyumboro. Am ti ka fanjunmam bo ba bo bu nzue fofoe kpakpari, na bu yo nyunyumi n wo, ama, bu kunnu yiri ayi ni fuin buwem wo, ni fin barasu kere.

²⁸ Am ti so o lee. Am ma minem nu am ka am ti minem bo bu yo sa bo i ko atin su Nyeme do n wo, ama, am ahore su ayi ni burukoonu, ni satiem wo.”

Kabo Yesu na Nyeme ba cin Yudafo tereterefo nbem sui barasu ni

²⁹ Na Yesu asa su ase ka, “Ambere Nyeme noanie kerefom, ni Farasifom n bo am ti burukoonufom ni, am ba nu anyumboro. Am yo fanjunmam dongu fa ma Nyeme noanie kanfom wo, na am yo minem bo bu yo sa bo i ko atin su Nyeme do n fanjunmam nyunyumi.

³⁰ Na am se ka, nzen ma ambere yo woori bere, am nam sanja ni, ma am kun ma Nyeme noanie kanfom n ni, kabo am nam yo yoori bu ni.

³¹ Nyini ti, am asoro su ka am ti bere bo bu yo kuunri Nyeme noanie kanfom n dee busu nufom wo lee.

³² To, i ti ye ni ka am de am nam jinaabiri ni, na am yo bu satie yoowam n ko wie.

³³ Ambere burukoonufom bo am ti woom na am ti ka pumpuni nbaam ni, am yo se ye am koro nmati fite nu, bo am wura ma cema sin n nu a?

³⁴ Nyini ti ye m sunma Nyeme noanie kanfom, ni mine alecirafom, ni kerefom am do n a. Am kun bu nbem, na am fa bu nbem sense baka jaanu n su, na am fin bu nbem ngbere, am tientienbunoo soom n nu, na am ko mie miem su na am kere bu wuwuruwa.

³⁵ Nyini dɛɛ ti, Nyɛmɛ cín ambɛrɛ sui fa kɔ kabo am nam yo kuunri minɛm bo bu yo sa bo i kɔ atin su Nyɛmɛ dɔ durunya n nu. Bu yo yoori sɔ ɔ fite saŋga n bo bu kuunri sɔnɔ be bo i yo sa bo i kɔ atin su Nyɛmɛ dɔ n na bu fere i ka Abɛli ni, fa ba juuri saŋga n bo bu kuunri sɔnɔ be bo bu fere i ka Zakariya, Berakaya wa ni. Yiri ye am kuunri i Nyɛmɛ Sereebiri Awuru n nu, Casi Kɛrɛ Casi Sɔɔ n ni Mikun yoowa yoobiri n afien n a.

³⁶ Nahɔrɛ ye m suse am n a, nyini n kɛrɛ dɛɛ ti ye Nyɛmɛ bá cin ambɛrɛ nyumafɔm sui n a.”

Kabo Yesu ahore saaki maari Yerusalemfɔm barasu ni

³⁷ Na Yesu abo awie ase ka, “Keto, keto, ambɛrɛ Yerusalemfɔm. Ambɛrɛ kuunri Nyɛmɛ nɔaniɛ kanfɔm n a, na minɛm bo Nyɛmɛ sunmaari bu am dɔ ni, am atu bu yabuɛ. Saŋga kɛrɛ m koroori ka m tien am nɔɔ, na m fa m saa bara ye am, kabo akɔ tien i nbaam nɔɔ, i lanƙpɛtɛ nu ni, ama, am soro má m su.

³⁸ Am niɛ fɛn, Nyɛmɛ yáki am nu ji, na am miɛ n ká nɔgbɛɛn.

³⁹ M suse am wɔ lɛɛ, ka, fite kisa fa kɔ, am nɔ́ má m kun, má ka saŋga bo am bá se ka, “Terefiɛ wo yiri n bo i suba Micɛra n dɛɛ duma n nu n dɔ.”

24

Kabo Yesu seeri ka Nyɛmɛ Sereebiri Awuru ni bá bereki barasu ni

¹ Saŋga bo Yesu fiteeri Nyɛmɛ Sereebiri Awuru n nu na i wo kɔ su ni, na i susufɔm n aba i dɔ, aba ase i ka i niɛ kabo Nyɛmɛ sereebiri n ti barasu a.

² Na wɔ se bu ka, “M nɔ́ am aɔu ahinm kɛrɛ e? Nahɔrɛ ye m suse am n a, yabuɛ kun n kpein n mmɔɔ bá nana má i beɔgu su. Bu bá bereki i kɛrɛ go ɔ lɛɛ.”

Kabo Yesu kere fa kɔɔri durunya n awieeri su dɛɛ jɔrɛ ni

³ Saŋga bo Yesu fun kɔ tanaari Oliva Buka n su ni, na i susufɔm n aba i dɔ, bu ni yiri nɔgumi, na ba se i ka, “Ya Kerefɔ, se ya, saŋga bɔnɔ ye ahin sam kɛrɛ bá yo a? Ye nzu deke bá kere ya ka saŋga n adodo bo a bá bekun, na durunya n bá awieeri a?”

⁴ Na Yesu abo bu nu ka, “Am si am nɔ́ sa, na má am ma be dadaka am.

⁵ Dama mine dɔɔgu bá fa m duma ba, na bu sé ka, ‘Kristo Tiidefɔ n la mini wɔ.’ Na bu dádaka mine beberebe.

⁶ Saŋga bo am bá ti aluwa nɔ́ga fɛn, wara bu sukun lue dɔ, má am ma am ahore saaki. Wɔ yo daka ka nyini sam n kɛrɛ bá yo sin ka, ama, má am niɛ ka durunya n awieeri lɛɛ.

⁷ Daanfɛ daanfɛ bá kun lue ni bu beɔgum, na nfɛmɛm kún lue ni bu beɔgu nfɛmɛm. Na asien bá kpisi awɔrɛ awɔrɛm nu, na ahɔɛ tó.

⁸ Nyini n kɛrɛ bá yo kabo bara kutu cɛɛn bumboori dɛɛ wahara n ti n wɔ.

⁹ Nyini saŋga, na bu tára am ma yikofɔm na bu kére am wuwuruwa, na bu kún am. Mini dɛɛ ti, sɔnɔ kɛrɛ kpó am.

¹⁰ Nyini saŋga n na mine dɔɔgu bá kete m na bu su má m kun, na bu tó bu beɔgu, na bu kpó bu beɔgu.

¹¹ Na kɔrɛfɔm dɔɔgu bo bu yo bu nɔ́ ka bɛrɛ ti Nyɛmɛ nɔaniɛ kanfɔm ni bá ba, na bu dádaka minɛm beberebe.

¹² Satiɛyo bá sunnu n dɛɛ ti, mine dɔɔgu koro bá kɔ i sin.

¹³ Ama, wɔrɔ kɛrɛ bo a mindi deerɛ nyini n kɛrɛ kɔ juuri i awieeri, Nyɛmɛ dé u tii ji.

¹⁴ Na bu bá kan ahin labari kpa n fa kɔ Nyɛmɛ fɛmɛya n jɔrɛ su, kere durunya n nufɔm, na adamande kɛrɛ tí i ka, na durunya n nya bá awieeri.”

Anyumbaa ciire sa n bo i bá n jɔrɛ

¹⁵ Na Yesu akaaki ase bu ka, “Am bá ɲu anyumbaa ciire sa be bo Nyeme mmɔɔ kpɔ i n na Nyeme nɔaniɛ kanfɔ Daniɛli yo jɔjɔri i jɔrɛ ni, ka i jina sɔɔ casi n bo i wo Nyeme Sereebiri Awuru n nu ni. Ma sɔnɔ kere bo i kan ahin kadasi n ti i bu nyunyumi.

¹⁶ Nyini saɲga ni, wɔrɔ kere bo a tiiri i ɲga na a wo Yudiya asien n su, ɲmati kɔ bukam n su.

¹⁷ Wɔrɔ kere bo a wo kpata nu, má a wura gisan nu fa pui.

¹⁸ Na wɔrɔ kere gusu bo a wo fiesu, má a kpie u nyi kɔ awuru kɔ fa u sutura be.

¹⁹ Nyini saɲga ni yó kekereke agaya ma nyinsefɔm, ni nbaram bo bu nbaam toko nu ni.

²⁰ Am sere Nyeme ka má nyini sa n yó buke saɲga, wara Yudafɔm ɲumiyi cɛɛn ni.

²¹ Nyini saɲga ni wahara bo mine dí i, i tára wahara kere bo ba di i asin ni, fite saɲga n bo Nyeme yiiri durunya ni, haari ni kisa. Nahɔrɛ, nyini wahara n ɲusu bá má kun.

²² Ama, Nyeme akpie nyini saɲga n su. Nzen má wɔ kpie má i su, má sɔnɔ wo má bere bo i nya ɲgɔɔ, ama, i dɛɛ tienɲu minem bo wɔ yi bu n dɛɛ ti, ye wɔ kpie saɲga n su a.

²³ Nyini saɲga ni, na nzen be bá se am ka, ‘Am niɛ, Kristo Tiidefɔ ni wo fen n a,’ wara, ‘Am niɛ, yiri wo dɔ n a,’ má am de i mi nɔaniɛ ni.

²⁴ Dama kɔrefɔ nbem bá ba, na bu yó bu ɲu ka bere ti Kristo n a, na nbem gusu yó bu ɲu ka bu ti Nyeme nɔaniɛ kanfɔm wɔ. Bu yó alekutura sam beberebe fa kere am, na nzen bu koro nyaari atin, bu dádaka Nyeme dɛɛ minem mmɔɔ bo wɔ yi bu ni.

²⁵ Amɛrɛ, am ti fen, ma se am wɔ lɛɛ ka, na saɲga n nyá ba ju.

²⁶ Na nzen be bá seeri am ka, ‘Am niɛ, Kristo ni wo boro kpantain n nu dɔ n a,’ má am kɔ dɔ. Wara, nzen be bá seeri am ka, ‘Yiri fie sɔrɔ dɔ n a,’ má am yo i mi yarada.

²⁷ Dama mini Adamande Wa n ba ni, i bá ti kabo nzue kpɛɛɛ na i ta bara ye deke kere n wɔ, fite wiɛ afiiri fa kɔ ju wiɛ atɔɔri n wɔ.

²⁸ Deke kere bo deke fuin nya wo, pɛtem bara ye dɔ ɔ.”

Kabo Adamande Wa ni bá kaaki ba barasu ni

²⁹ Na Yesu akaaki ase bu ka, “Saɲga bo nyini wahara n kere ba siinri, ‘Awosin káta wiɛ n su,

na sara n gusu tá má bo minem ɲu i.

Na asarambaam fite aɲgoro titi toto,

na aɲgoro n kere kpísi.’

³⁰ Nyini saɲga ni, na mine ɲú deke be aɲgoro bo i kere ka mini Adamande Wa ni suba. Na minem bo bu wo durunya n nu n kere bó awie, na bu nyá ɲu ka mini Adamande Wa ni sufite aɲgoro yinyiɲgu n nu suje piɛpiɛu suba ni yiko bambaka ni.

³¹ Na bu tí ka awie be sukpura ni faɲga su, na m nyá sunma Nyeme merɛkem durunya n awɔrɛ n kere nu, na bu tien minem bo Nyeme ayi bu durunya n nu n kere nɔɔ.”

Kabo Yesu ɲa ya fa damba baka fa se nyaari barasu ni

³² Na Yesu akaaki ase ka, “Am fa damba baka n fa se nyaari. Saɲga bo am ba ɲu ka i nyawa akpɔnkpɔn, na i sufieɛie fɔfɔrɛ ni, am si ka dɔdɔri saɲga adodo lɛɛ.

³³ Mini Adamande Wa n ba ni bá yo sɔ ɔ. Saŋga bo am ba ŋu ka nyini sam kere bá suyo ni, am si tenle su ka saŋga n adodo læ, i cé má kun.

³⁴ Nahore ye m suse am n a, ahin nyumafom busu kere wú wie má ka, ye nyini sam kere bá yo a.

³⁵ Angoro n ni asienɔ n kere bá la awieeri, ama, m dæ nɔanie n yiri la má awieeri cɛn be.”

Kabo Yesu seeri ka ya si ya ŋu sa fa kɔ i ba n su ni

³⁶ Na Yesu akaaki ase ka, “Be si má saŋga ni, wara cɛn n bo m bá kpie m nyi ba ni. Haari Nyeme merékem bo bu wo i dɔ ni, ni mini bo m ti i wa ni mmɔ si má. Má ka ya Si Nyeme ŋumi si a.

³⁷ Mini Adamande Wa n ba saŋga ni yó kabo sɔnɔ be bo bu fere i ka Nowa saŋga na i yoori n wɔ.

³⁸ Saŋga bo wɔmbu n nya di má durunya n ni, sɔnɔ kere woori di ni nu su wɔ, na nbaram ni nbiesom suja bu bengum, fa kɔ juuri haari cɛn n bo Nowa wuraari lee bambaka n nu ni.

³⁹ Minem ayo asi má sa bo i bá yo ni, haari cɛn n bo wɔmbu n ba diiri bu kere ni. I yó sɔ ɔ, fa kɔ saŋga n bo mini Adamande Wa ni bá ba ni.

⁴⁰ Nyini saŋga ni, mine nnyɔ bá wo juma yo su fiesu, na Nyeme má bu bá fa kun n kɔ yaki kun ni.

⁴¹ Na nbaram nnyɔ wo ŋani saanbiri, na Nyeme má bu bá fa kun n kɔ yaki kun ni.

⁴² Tɔ, nyini ti, má am fa am ŋu ji na am daafi, dama am si má cɛn n bo am Mibie ni bá ni.

⁴³ Am si tenle su ka nzen má awurufobie n si saŋga bo awiefɔ ni bá i dika na i bá wɔ i, má i tana ŋminda a, na awiefɔ n koro ba wura má.

⁴⁴ Nyini ti, ambere gusu kpa am ŋu saŋga kere, dama mini Adamande Wa ni, m bá saŋga bo am sunsun má ka m bá n wɔ.”

Miɛnu fa kɔ akɔɔ nbem dabuŋu n jɔre

⁴⁵ Na Yesu akaaki ase ka, “Akɔɔ kpíen n bo i la dabuŋu na i kaaki la alecira n la ŋma a? Yiri la bo i mibie n afa akɔɔ nyingam awura i saa nu ka i kpaaki diire nu ma bu, saŋga bo i ti ye ni ka i ma bu ni.

⁴⁶ Nzen i mibie n ba ŋuuri ka i suyo i juma kabo i seeri ka i yo ni, terefie wo nyini akɔɔ n dɔ.

⁴⁷ Nahore ye m suse am n a, mibie ni fá i aja kere wura nyini akɔɔ n saa nu wɔ, na i níe i dika.

⁴⁸ Ama, nzen i ti akɔɔ tiefɔ, i súnsun ka i mibie ni kpíe má i nyi nde.

⁴⁹ A ŋu ka i subo akɔɔ nyingam wɔ, na i sudi, na i ni nzan nufom sunu bo.

⁵⁰ Dɔ, na i mibie n ba kpíeeri i nyi baari cɛn bo i sunsun má ka i bá, na i kaaki si má ba n saŋga ni.

⁵¹ Nyini saŋga n na i mibie n cín i sui agaya, na i fá i bo burukɔɔnufom n su. Dɔ na i sún, na i kán i saa.”

25

Miɛnu fa kɔ nsunguru buru nbem jɔre

¹ Na Yesu akaaki ase bu ka, “Saŋga bo mini Adamande Wa ni bá ba, na Nyeme Feme bá nie i minem su ni, i yó ka nsunguru buru nbem bo bu faari bu fitanam ka bu kɔ kpa konyafan atin n wɔ.

² Bu mine nnu tiiri alecirafo m wɔ, na nnu nyingam n ati sinnzinm.

³ Na sinnzinm n afa bu fitanam, ama, ba bita má ŋuin nu,

⁴ na alecirafo m n bere afa ŋuin abita nu.

⁵ Na ba kò aṅminda konyafan n aḗ, wò ba má nde, na daafiri aba ati nsungurum ni, na ba daafi.

⁶ Na jinanjin saṅga, na ba ti ka bu subo ndoori ka, 'Konyafan ni suba o, am fite na ya kò kpa i atin.'

⁷ Na nsunguru burum kere ayasu, ayo bu fitanam dɔṅgu.

⁸ Na sinnzinm n ase alecirafòm ni ka, 'Am bu am ṅguin n be ma ya, ya fitanam ni suno.'

⁹ Na alecirafòm n ase bu ka, 'Ai, ya ṅguin ni koro ju má ya ni ambere kere. Am kò ṅguin tɔfòm dɔ, na am kò to.'

¹⁰ Na nsunguru sinnzinm n akò ka bu kò to ṅguin ni. Bu kò wieeri ni, na konyafan n aju. Na nsunguru nnum bo ba kpa bu ṅu ni, asu i su, awura konyaya awuru n nu. Na ba tu anò ni.

¹¹ Kasin, na nsunguru nyingam bo bu kòori ṅguin to ni, aba ajina anò n nu, abo afere i ka, 'Ya mibié, ya mibié, teke anò n ma ya na ya wura.'

¹² Na konyafan n ase bu ka, 'Ai, nahore ye m suse am n a, m si má am cɛɛn be cɛɛn be.' "

¹³ Na Yesu ase i susufòm n ka, "Tò, nyini ti, má am fa am ṅu ji na am daafi, dama am si má cɛɛn n bo m bá ni."

Miɛnu fa kò akò nsan nbem dabuṅu n jɔre

¹⁴ Na Yesu ase bu ka, "Saṅga bo m bá ba ni, i yó kabo sɔnɔ be sukò atin, na i fereeri i akòm, na i faari i nenje kere wuraari bu saa nu, ka bu nie i dika n wò.

¹⁵ Na wò fa ṅwaa akpaaki bu kere nu, kabo bu koro bita i barasu. I faari ṅwaa n busu nnu maari kun wò, na wò fa busu nnyò n ama kun gusu, na wò nya afa busu kun n ama nyinga ni. Na wò kò atin ni.

¹⁶ Na bo i maari i busu nnu ni afa abo wata bu, na wò nya i ṅusu nnu abuka su.

¹⁷ Na bo i maari i busu nnyò n gusu ayo sò, na wò nya i ṅusu nnyò abuka su.

¹⁸ Ama, bo i maari i seseewa kun ni kò funduuri kunma wò, na wò fa i dɛɛ ṅwaa n awura nu, na wò kata su.

¹⁹ Na bu mibié n akò aḗ dɔ, haari na wò ba aba ka i ba nie kabo bu bita i ṅwaa n barasu ni.

²⁰ Na bo i maari i busu nnu n afa i dɛɛ ṅwaa aba, na wò se i mibié n ka, 'M mibié, nie. A maari m ṅwaa n busu nnu wò, ama, ma nya i ṅusu nnu abuka su.'

²¹ Na i mibié n ase i ka, 'Nfan. Wòrò akò kpa bo a la dabuṅu ni, kabo a kere ka a la dabuṅu nie deke kaan su ni, m fá dɔṅgu n mmòò wura u saa nu na a nie i dika. Bra na a ba nya ahorejò n bo ma nya i n be.'

²² Na bo i maari i busu nnyò n gusu aba ase i mibié n ka, 'M mibié, nie. A maari m ṅwaa n busu nnyò o, ama, ma nya i ṅusu nnyò abuka su.'

²³ Na i mibié n ase i ka, 'Nfan. Wòrò akò kpa bo a la dabuṅu ni, kabo a kere ka a la dabuṅu nie deke kaan su ni, m fá dɔṅgu n mmòò wura u saa nu na a nie i dika. Bra na a ba nya ahorejò n bo ma nya i n be.'

²⁴ Kasin, na bo i maari i seseewa kun ni aba, na wò se ka, 'M mibié, m si u sa ka a ti sɔnɔ fangafò o. Deke bo a dɔ má i ni, a kpié nyini wò. Na deke bo a bobo má i ni, a tientien nyini nòò a.

²⁵ Nyini ti ye sere tiiri m a, na ma fundu kunma afa u ṅwaa n afie i nu. Yiri yaa, de u deke.'

²⁶ Na i mibié n akaaki ase i ka, 'Wòrò akò tie nviɛyafò ni, a si tenle su ka deke bo ma dɔ má i ni, m kpié nyini wò, na deke bo ma bobo má i ni, m tientien nyini nòò a.

²⁷ Tɔ, má a si ka i ti sɔ ni, má wɔ yo daka ka a fa m ηwaa n kɔ seeri banɔkifɔm dɔ, na má m ba kpieeri m nyi baari, má m de m deke na m nya kperɛ buka su.'

²⁸ Dɔ na mibiɛ n ase i minɛm ka, 'Tɔ, am de ηwaa ni i dɔ kisa kisa, na am fa ma akɔɔ n bo i bita ηwaa n busu buru ni.

²⁹ Dama sɔnɔ kɛrɛ bo wɔ nya deke na i mi si i bita, bu má i buka su wɔ, na i nyá beberebe, ama, bo i si má i bita, haari ni nyini kaan n bo i la i ni, bu cín de i dɔ ɔ.

³⁰ Ama, m ahin akɔɔ ηgbɛɛn ni, am fa i tu awosin n nu, deke bo i sún, na i kán i saa.' "

Kabo Yesu bá di minɛm jɔrɛ barasu ni

³¹ Na Yesu akaaki ase ka, "Sanɔa bo mini Adamande Wa ni bá baari ni m jirima woowa n nu ni, ni Nyɛmɛ mɛrɛkɛm kɛrɛ ni, m bá tana m jirima fɛmɛya biɛ n su.

³² Na durunya n nu minɛm kɛrɛ bá tien bu nɔɔ m nyunu, na m kpáaki bu nu, busu nnyɔ, kabo bɔɛsasafɔ kpaaki yi nbɔɛm ni sirim nu barasu ni.

³³ Na m má m dɛɛ minɛm bo bu ti ka nbɔɛm ni jina m saa fɔmbɔrɔ su, na m má bo ba ka na bu ti ka sirim ni jina m saa biɛ su.

³⁴ Na mini fɛmɛ n sé bo bu wo m saa fɔmbɔrɔ su n ka, 'Ambɛrɛ bo m Si Nyɛmɛ ayo am kisi ni, am bra na am ba de fɛmɛya n bo wɔ sɛsɛ i su ase ama am, fite durunya n bumboori kɛrɛ ni.

³⁵ Deke bo i ti na m se am sɔ n la ka, ahɔɛ yo tiiri m, na am ama m diire. Nzuehɔɛ yo tiiri m, na am ama m nzue. M yo baari am dɔ ka wɔfɔ, na am ade m.

³⁶ M yo kaari m bu ηgbɛɛn, na am ama m sutura. M yo daari tukpaki, na am aba anie m dika. Bu yo nyiiri m dansaraka, na am akɔ anie m busu.'

³⁷ Dɔ na m minɛm bo bu yo sa bo i kɔ atin su ni nyá bɔ m nu ka, 'Ya Mibiɛ, sanɔa bɔnɔ ye ya ηuuri ka ahɔɛ ati u, ye ya maari u diire a, wara nzuehɔɛ ati u, ye ya maari u nzue a?

³⁸ Sanɔa bɔnɔ tenle su, ye a baari ya dɔ ka wɔfɔ, ye ya deeru u a, wara sanɔa bɔnɔ ye a kaari u bu ηgbɛɛn, ye ya maari u sutura a?

³⁹ Sanɔa bɔnɔ ye ya ηuuri ka a daari tukpaki, wara sanɔa bɔnɔ ye bu nyiiri u dansaraka, ye ya kɔ niɛri u busu a?'

⁴⁰ Dɔ na m nyá bɔ bu nu ka, 'Nahɔrɛ ye m suse am n a, sanɔa kɛrɛ bo am yo yoori sakpa fa maari m ahin ninbaa kan kanm ni kun, am yo maari mini wɔ lɛɛ.'

⁴¹ Na m nyá se bo bu wo m saa biɛ su n ka, 'Ambɛrɛ bo m Si Nyɛmɛ ayo am ηgbɛɛn na wɔ fa nɔɔ tie ase am ηu ni, am fa cinsi m bi bɛrɛ na am kɔ wura sin n bo i nɔ má n nu, nyini sin n ye ba tɔrɔ i afa ase Sitana ni i dɛɛ mɛrɛkɛm n a.

⁴² Deke bo i ti na m se am sɔ n la ka, ahɔɛ yo tiiri m, ama, am ama má m diire. Nzuehɔɛ yo tiiri m, ama, am ama má m nzue.

⁴³ M yo baari am dika, ama, am ade má m wɔfɔ. M yo kaari m bu ηgbɛɛn, ama, am ama má m sutura. M yo daari tukpaki, wara m yo woori dansaraka nu, ama, am akɔ anie má m busu.'

⁴⁴ Dɔ na bɛrɛ bo bu wo m saa biɛ su ni nyá bɔ m nu ka, 'Ya Mibiɛ, sanɔa bɔnɔ ye ya ηuuri u ka ahɔɛ ati u, wara nzuehɔɛ ati u, wara a baari ya wɔfɔ, wara a kaari u bu ηgbɛɛn, wara a daari tukpaki, wara a woori dansaraka, ye ya buka má u a?'

⁴⁵ Na m nyá kaaki se bu ka, 'Nahɔrɛ ye m suse am n a, sanɔa kɛrɛ bo am ayo má sakpa, ama má m ahin ninbaa kan kanm ni kun, am ayo ama má mini wɔ lɛɛ.'

⁴⁶ Na nyinim bere kó wo suicin n bo i la má awieeri n nu. Ama, na bo bu yo sa bo i kó atin su Nyeme dɔ ni, bere kó wo ɲɔɔ bo i la má awieeri n nu.”

26

Kabo bu sɛsɛri su ka bu tára Yesu ni

¹ Saŋga bo Yesu kereeri nyini kereewam kere wieeri ni, na wɔ se i susuƆm ni ka,

² “Am si ka wɔ ka lennyɔ ɔ, na bu di Butara cɛɛnkpiri ni. Dɔ ye bu nyá mini Adamande Wa n taraabiri a, na bu kpáma m baka jaanu n su.”

³ Dɔ na Nyeme sayoowa dɔɲguyofɔ nkpienkpienm ni, ni Yudafɔm nkpienkpienm n atien bu nɔɔ bu kpien n dika, bu fere i ka Kayafasi, yiri ti Nyeme sayoowa dɔɲguyofɔm kere kpien a,

⁴ na ba fa sɛsɛsu ka bu tara Yesu asiri nu na bu kun i.

⁵ Na ba se bu ɲɲɲu nu ka, “Má am ma ya yo i cɛɛnkpiri n saŋga. Má nyini, minem ni kéte yo naɲmie wɔ, na bu sutientien.”

Kabo bara be faari tulaaleɛ gɔɔri Yesu tii su ni

⁶ Yesu woori Betani mie n nu wɔ, sɔnɔ be dika, bu fere i ka Simon, i yo ti kokofɔ ɔ.

⁷ Saŋga bo Yesu wo diire di su ni, na bara be aba i dɔ, ni tulaaleɛ tuwa nvanvani bo i la gɔ agaya. Na wɔ teke tulaaleɛ tuwa n nɔɔ, na wɔ kaaki tulaaleɛ n kere ago Yesu tii su.

⁸ Yesu susufɔm ni ɲuuri i sɔ ni, na yaa ati bu agaya, na ba bisa bu ɲɲɲu nu ka, “Nzu ti ye wɔ saaki i sɔ a?”

⁹ Má ya tɔɔri nyini tulaaleɛ ni, má ya nyá ɲwaa beberebe, na má ya fá nyini ɲwaa n ma yaarifɔm.”

¹⁰ Na Yesu asi sunsunni bo bu bita i, na wɔ se bu ka, “Nzu ti ye am sukan bara ni ndie a? Sakpa lee ye wɔ yo ama m n a.

¹¹ Am ni yaarifɔm ni wo bere saŋga kere a, ama, mini, m wó má am dɔ saŋga kere.

¹² Tulaaleɛ n bo wɔ kaaki ago m ɲu ni, i kere ka i nzee bo wɔ fa ayo m siriya afa aɲminda m yiwee cɛɛn lee.

¹³ Nahɔre ye m suse am n a, deke kere bo bu bá kaanri Nyeme labari kpa n durunya n kere nu, bu kán i sayoowa n na minem tenge i su.”

Kabo Yudasi sɛsɛri su ka i tó Yesu ni

¹⁴ Na Yesu susufɔ buru ni nnyɔm nu kun bo bu fere i ka Yudasi Isikariyoti ni, ako Nyeme sayoowa dɔɲguyofɔ nkpienkpienm ni dɔ,

¹⁵ ako abisa bu ka, “Nzen m tɔɔri Yesu maari am, am má m nzu wɔ?” Na ba kan jete ɲwaa aburasan, afa ama i.

¹⁶ Fite nyini cɛɛn n na Yudasi akpini atin kabo i yó na bu nya Yesu taraabiri.

Kabo Yesu ni i susufɔm diiri cɛɛnkpiri diire ni

¹⁷ Na cɛɛnkpiri n bo bu di i ni kponɔ bo bu gɔ má ayiri nu na i yasu ni, i lekun cɛɛn, na Yesu susufɔm n aba i dɔ, aba abisa ka, “A koro ka ya kɔ ni kɔ sɛsɛ Butara cɛɛnkpiri n diire n su se a?”

¹⁸ Na wɔ se bu ka, “Am kɔ mie n kunnu, sɔnɔ be wo dɔ, na am kɔ se i ka, ‘Ya Kerefɔ n ɲa ɔ, i saŋga n aju. Na i ni i susufɔm ni bá di Butara cɛɛnkpiri diire ni, u dika n nu.’ ”

¹⁹ Na Yesu susufɔm n ako ayo kabo i seeri bu ni, na ba sɛsɛ Butara cɛɛnkpiri n diire n su.

20 Na naaso sanja, na Yesu ni i susufo buru ni nnyom n aba atana ka bu di diire ni.

21 Sanja bo bu tana wo diire n di su ni, na Yesu ase bu ka, "Nahore ye m suse am n a, am nu kun ba to m ma m kpofom a."

22 Na bu ahore asaaki, na bu kun kun n kere abisa i ka, "M Mibie, ye m na ma mini yiri e?"

23 Na Yesu abo bu nu ka, "Am nu kun bo m ni yiri sanja fa ya saa wura taale kun nu ni, yiri to m a."

24 Mini Adamande Wa ni wu kabo ba kere i Nyeme Jore Kadasi n nu ase ka m wu n wo, ama, sono n bo i to mini Adamande Wa n ni, i mi ba nu anyumboro. Ma ba wu ma i mi n mmoo, ma i ti ye."

25 Na Yudas bo i to Yesu n abisa i ka, "Ya Kerefo, m na ma mini yiri e?" Na Yesu abo i nu ka, "Kabo a jooori ni, i ti so o."

Ya Mibie kasin diire n jore

26 Sanja bo Yesu ni i susufom ni wo diire n di su ni, na Yesu afa kpono, na wo da Nyeme asi, na wo bubu i nu, na wo fa ama bu, na wo se bu ka, "Am de ahin kpono n na am di, i ti m nuniembaa a."

27 Na wo kaaki afa awa ni nzan, na wo da Nyeme asi, na wo fa ama bu, na wo se bu ka, "Am kere nu be."

28 Ahin nzan n ti m mbunja a lee, ye m sufa ma am n a. M mbunja n dee ti, ye Nyeme sufa sesusu na i di i di n a. Minem dogu satie dee ti, ye m mbunja ni songi go a, na Nyeme fa bu satie ce bu."

29 Na wo kaaki ase bu ka, "M suse am wo lee, ka, m nu ma ahin nzan bekun, ma ka een be bo m ni amere ba sanja nu i fofore, m Si Nyeme femeya n nu ni."

30 Nyini sin na ba di jue akansi Nyeme, na ba fite ako Oliva Buka n su.

Kabo Yesu seeri i susufom n ka bu ba nmati yaki i ni

31 Do na Yesu ase i susufom ni ka, "Nyuma dee kongue n nu, am kere nmati yaki m, dama ba kere i Nyeme Jore Kadasi n nu ka, Nyeme na, 'M bo kun boesasafu ni, na nboem ba sandi.'

32 Ama, m ba tengeeri m yiwee n nu, m du am mo ko Galili awore n nu."

33 Na Petoro ase i ka, "Nzen ahinm kere nmati yakiiri u, mini nmati yaki ma u da."

34 Na Yesu ase Petoro ka, "Nahore ye m suse u n a, nyuma kongue n nu, kana akonyuma ba bo, a kete kpe nsan ka a si ma m."

35 Na Petoro akaaki ase i ka, "Mini se ma so da. Nzen haari wo yo daka ka mini ni woro kere sanja wu mmoo, nka ya wu wo." Na i susufom n kere ase so.

Kabo Yesu jeke tiiri na i ko sereeri Nyeme ni

36 Na Yesu ni i susufom n ayasu ako aju awore be bo bu fere i ka Gesemane ni, na Yesu ase i susufom ni ka, "Am tana fen nminda m, na m ko do ko sere Nyeme."

37 Na wo fa Petoro ni Zebedi nbaa nnyom ni, na ba ko mo kaan. Bu ko juuri do, na ahoresaaki aba i do agaya, na i jeke ati.

38 Na wo se bu ka, "Ahoresaaki aba m do agaya, i yo m ka m wu wo mmoo. Am wo fen na am nminda m. Ma am daafi."

39 Na wo ko dede kaan, na wo butu i kunnu su. Na wo sere Nyeme, i na, "M Si Nyeme, nzen ma a soro su, yi m fite ahin anyumboro n bo i suba m do n nu. Haari ni nyini mmoo, ma a yo kabo m koro ni, ama, yo kabo a koro ni."

⁴⁰ I sere Nyeme wieeri ni, na wo kpie i nyi ako anu ka i susufo nsanm ni wo daafiri su. Na wo bisa Petoro ka, "Nzu ti ye am mine nsan n kere be mmoo koro kpie ma daafiri haari kaan so mmoo a?"

⁴¹ Na wo kaaki ase bu ka, "Am kpie daafiri, na am sere Nyeme adena ma deke be yo am na am wura satie nu. Ahorembaa n koro nyemesu, ama, anuniembaa n ayoroki."

⁴² Na wo kaaki ako asere Nyeme bekun, i na, "M Si Nyeme, nzen i ti u dee koroyanu ka m fite ma ahin anyumboro n bo i suba m do n nu, ma u dee koroowa n yo."

⁴³ Na wo kpie i nyi aba i susufom n do, na wo ba anu ka ba daafi bekun, dama daafiri ati bu agaya.

⁴⁴ Na Yesu ayaki bu bekun, na wo ko asere Nyeme kpe nsan su, ni nyini noanie jooowa kun bo i du mo jooori i ni.

⁴⁵ Nyini sin, na wo kpie i nyi aba i susufom n do, aba anu ka bu toko wo daafiri su, na wo se bu ka, "Am toko daafi yi am nuni wo? Am nie, sanja n aju, wo to mini Adamande Wa ni ama satieyofom.

⁴⁶ Am nie, sono n bo wo to m lee. Am yasu na ya ko."

Kabo bu taraari Yesu barasu ni

⁴⁷ Na sanja bo Yesu toko wo jooori su ni, na Yudas bo i ti Yesu susufo buru ni nnyom nu kun aju ni jama beberebe. Bu bita takobem ni koromam. Nyeme sayoowa danguyofom, ni Yudafo nkpikpienm ni sunmaari bu a.

⁴⁸ Na Yudas bo i tooori Yesu ni akere jama n nyaari su kabo bu si Yesu na bu tara i. I na, "Sono n bo m ko biti i ni, yiri lee. Am tara i."

⁴⁹ Sanja bo bu ko juuri deke bo Yesu wo ni, na Yudas akaba ako i do, na wo se i ka, "Ya Kerefo." Na wo biti i, na wo yo i anse.

⁵⁰ Na Yesu ase i ka, "M don, yo deke n bo a koro ka a yo i ni ndende." Na minem n aba atara Yesu, na ba bita i kenken.

⁵¹ Na Yesu susufom n nu kun acin aworo i takobe, na wo kpie sono be sui, nyini sono n ti Nyeme sayoowa danguyofom kpien n akoo o.

⁵² Na Yesu ase i ka, "Fa u takobe n kaaki wura i bue nu. Dama minem kere bo bu fa takobe yo juma ni, bere gusu ba wu ni takobe wo.

⁵³ A si ma ka nzen ma m sereeri m Si Nyeme, i sunma i merkem asese asese buru ni nnyo, na bu ba buka m kisa kisa bere?

⁵⁴ Ama, nzen m nya yoori so, kabo ba kere i Nyeme Jore Kadasi n nu ka wo yo daka ka i yo so ni, i yo se ye i ba yo yiiwa?"

⁵⁵ Na Yesu abisa jama n ka, "M ti finfo o, ye am fa takobem ni koromam na am ba tara m a? Een kere een m ni ambere wo Nyeme Sereebiri Awuru n nu a, ye m kere minem a, ama, am atara ma m.

⁵⁶ Ama, ahin kere yo so, adena kabo Nyeme noanie kanfo akere i Nyeme Jore Kadasi n nu n yo yiiwa a." Do na i susufom n kere anmati ayaki i.

Kabo bu fa Yesu koori jore diibiri ni

⁵⁷ Na bo bu taraari Yesu n afa i ako Kayafasi do, yiri ti Nyeme sayoowa danguyofom kpien n a. I dika n nu ye Nyeme noanie kerefo ni, ni Yudafo nkpikpienm n tienri bu noo a.

⁵⁸ Na Petoro asu Yesu su, i woori dede kaan ni yiri, haari i ko wuraari Nyeme sayoowa danguyofom kpien n dika gisan nu. I wuraari gisan n nu ni, na wo ko asanja atana tintinijinafo nu, adena i nu sa n bo i yo n awieeri.

⁵⁹ Na Nyeme sayoowa dɔnguyofɔ nkpienkpienm ni, ni Yudafoɔm tereterefoɔm n kere anienie minem bo bu ba di kore daani fa ko ngasi bo Yesu ado i ni, adena bu nya i taraabiri na bu kun i.

⁶⁰ Haari ni bo mine beberebe fite jina diiri kore daani n kere, ba nya ma jore bo bu fa kpie so i. Kasin na mine nnyo nbem ayasu ajina,

⁶¹ na ba se ka, "Ahin sono n na yiri koro fufu Nyeme Sereebiri Awuru ni, na i kaaki ta i lesan afien."

⁶² Na Nyeme sayoowa dɔnguyofɔm kpien n ayasu ajina, na wo bisa Yesu ka, "A la ma bonu be fa ko ahin jore n bo minem ni akpie aso u n su?"

⁶³ Ama, na Yesu amo i noo. Na Nyeme sayoowa dɔnguyofɔm kpien n ajojo i do bekun, i na, "Kisa, m koro ka a tan Nyeme bo i wo bere sangha kere ni. Nzen woro ti Nyeme Wa n bo i ti Kristo Tiidefo ni, se ya."

⁶⁴ Na Yesu abo i nu ka, "Kabo a joro ni, i ti so o. Ama, m suse am kere wo le ka,

'Fite nyuma fa ko, am ba nu mini Adamande Wa ni

ka m tana Nyeme Yikofɔ n saa fomboro su,

na am nu ka m fite agoro yinyingu n nu suba.' "

⁶⁵ Yesu bo nu so wieeri ni, na Nyeme sayoowa dɔnguyofɔm kpien n ason i tanle. Na wo se ka, "Wo joro awura Nyeme ngasi nu. Ya koro ma daanifo bekun. Amere mmoo ti kabo wo joro awura Nyeme ngasi n nu e.

⁶⁶ Ye am na se wo?" Na bu kere ase ka, "Wo kan ciire jore le, wo yo daka ka i wu."

⁶⁷ Na ba yi nanzue ago Yesu nyunuawa nu, na ba bo i, na ba bo i nyoonu,

⁶⁸ na ba se i ka, "Woro Kristo Tiidefo ni, nma bo u a? Kan kere ya."

Kabo Peto keteei ka i si ma Yesu ni

⁶⁹ Bu wo nyini kere su ni, na Peto toko tana gisan n nu, na afani be aba i bi, na wo se Peto ka, "Woro mmoo yo woori nyini Yesu Galilifo n do o."

⁷⁰ Ama, na Peto akete bu kere nyunu ase ka, "Ai, m si ma nyini jore n bo a sujoro i ni mmoo."

⁷¹ Na Peto afite ako gisan n ano n nu, na afani nyinga be aba anu i, na wo se minem bo bu jina bere n ka, "Ahin sono ni mmoo yo woori Yesu Nazaretifo n do o."

⁷² Na Peto akete bekun, na wo tan ndie, i na, "Mini si ma nyini sono ni mmoo."

⁷³ Wo ce ma na minem n bo bu jina bere n gusu ase Peto ka, "Nahore, a ti bu kun wo, dama u joroowa ni kere so a."

⁷⁴ Na Peto atan ndie afa i saa awura sin nu, i na, "M si ma nyini sono ni." Kpenga na akonyuma abo.

⁷⁵ Na Peto atenge su kabo Yesu seeri i ni, i na "Kana akonyuma ba bo, a kete kpe nsan su ka a si ma m." Na wo fite ako asun agaya.

27

Kabo bu faari Yesu ko jinaari Gomina Pilato nyunu ni

¹ Na alecin sangha na Nyeme sayoowa dɔnguyofɔ nkpienkpienm, ni Yudafoɔm nkpienkpienm n atana asese su kabo bu yo barasu na bu kun i.

² Na ba wura i joro ko, na ba fa i ako ama Pilato bo i ti Romafoɔm gomina ni.

Kabo Yudasi kuunri i nu ni

³ Saŋga bo Yudasi bo i tɔɔri Yesu n tiiri ka ba ma nɔɔ ka bu kun Yesu ni, na wɔ yo m si n sɔ, na wɔ kaaki awɔrɔ jete ηwaa aburasan n aba ama Nyeme sayoowa dɔŋguyofɔ nkpienkpienm, ni Yudafɔm nkpienkpienm ni.

⁴ Na wɔ se bu ka, “Ma yo satie kabo ma tɔ sɔnɔ bo i la má ηgasi be na bu kun i ni.” Na ba se i ka, “Ya cɛcɛ bɔnɔ wo nyini nu a? U dɛɛ jɔrɛ lɛɛ.”

⁵ Na Yudasi afa ηwaa n atu Nyeme Sereebiri Awuru n nu, na wɔ fite ako awura i kɔm nyama akun i ηu.

⁶ Na Nyeme sayoowa dɔŋguyofɔ nkpienkpienm n afa ηwaa ni, na ba se ka, “Ahin ηwaa n ti mbunja yiiwa ηwaa a. Nyeme nɔaniɛ kpamaawa n kere ka má be fa i ηusu fa saŋga Nyeme Sereebiri Awuru dɛɛ ηwaa n nu.”

⁷ Na ba yo anɔɔse, afa ηwaa n ato asien be, bo bu fere i ka yakati tafɔ juma yoobiri ni, ka bu fa yo wɔfɔm seebiri.

⁸ Nyini ti ye bu fere nyini asien n ka Mbunja Asien, haari ni nyuma sɔ n a.

⁹ Dɔ na nɔaniɛ n bo Nyeme nɔaniɛ kanfɔ Jeremiya yo jɔjɔri n ayo yiiwa, i ηa, “Ba fa jete ηwaa aburasan n bo Yisarelifɔm kere soroori su ka bu tɔ i kaari, sɔnɔ n dɛɛ ti ni,

¹⁰ na ba fa ηwaa n ato yakati tafɔ juma yoobiri, kabo Micera n seeri m ka bu yó lɛɛ.”

Kabo Gomina Pilato bisaari Yesu jɔrɛ ni

¹¹ Na ba fa Yesu ako ajina Gomina Pilato n nyunu, na wɔ bisa Yesu ka, “Wɔrɔ ti Yudafɔm femɛ n a?” Na wɔ bɔ i nu ka, “Kabo a jɔjɔ ni, i ti sɔ ɔ.”

¹² Na Nyeme sayoowa dɔŋguyofɔ nkpienkpienm, ni Yudafɔm nkpienkpienm akpie jɔrɛ asɔ Yesu, ama, wɔ bɔ má be nu.

¹³ Na Gomina Pilato abisa i ka, “A ti má jɔrɛ n kere bo ba kpie asɔ u ni?”

¹⁴ Ama, Yesu abɔ má jɔrɛ n haari kun be mmɔɔ nu, na gomina n abirisi agaya kabo wɔ bɔ má nu ni.

Kabo Gomina Pilato maari nɔɔ ka bu kun Yesu ni

¹⁵ Afɔ kere afɔ, Butara cɛenkpiri n nya ba ju, Romafɔm gomina yi dansaraka n bo jama n koro ka i yi i ji n wɔ.

¹⁶ Nyini saŋga ni, sɔnɔ be woori dansaraka n nu dɔ, bu fere i ka Barabasi, i ti má jɔrɛ bu, sɔnɔ kere si i sa.

¹⁷ Na saŋga bo jama n kere ba tiɛnri bu nɔɔ ni, na Gomina Pilato abisa bu ka, “Am koro ka m yi ηma ma am a, Barabasi ni, nzen Yesu n bo bu fere i ka Kristo Tiidefɔ ni?”

¹⁸ I seeri sɔ ni, dama i siiri tenle su ka bu si Yesu kɔrɛ ti ye bu faari i ba wuraari i saa nu a.

¹⁹ Saŋga bo Gomina Pilato wo Yesu jɔrɛdi su ni, na i yi asunma ase ka, “Má a se ka a yo nyini nahɔrefɔ n sa be, dama anuma kɔŋgue, ma cin alele fa kɔ nyini sɔnɔ n dɔ bo wɔ mie m agaya.”

²⁰ Ama, na Nyeme sayoowa dɔŋguyofɔ nkpienkpienm, ni Yudafɔm nkpienkpienm n awura jama n bu sin ka bu sere Gomina Pilato ka i yí Barabasi ma bu, na i kún Yesu.

²¹ Ama, na Gomina Pilato akaaki abisa jama n ka, “Nyini mine nnyɔm ni nu, am koro ka m yi ηma ma am a?” Na ba bɔ i nu ka, “Barabasi.”

²² Na Gomina Pilato abisa bekun ka, “Ye ahin Yesu n bo bu fere i ka Kristo Tiidefɔ ni, am koro ka m yó i sɛ wɔ?” Na bu kere abɔ i nu ka, “Kpama i baka jaanu n su na i wu.”

²³ Na Pilato abisa ka, “Ye nzu satie ye wɔ yo i a?” Ama, na ba kaaki atien kpa agaya bekun ase ka, “Kpama i baka jaanu n su na i wu.”

²⁴ Saŋga bo Gomina Pilato ŋuuri ka i koro yo má jɔrɛ n dɔŋgu, haari ni bo wɔ boro i nyi na i yo i dɔŋgu ni, jama n akete sukoro ka bu yo nanɔmiɛ. Nyini ti, na wɔ fa nzue aɔmisi i saa, jama n kɛrɛ nyunu, na wɔ se bu ka, “M saa wo má ahin sɔnɔ n yiwee nu. Am dɛɛ jɔrɛ lɛɛ.”

²⁵ Na jama n kɛrɛ ase i ka, “Tɔ, ma i yiwee ni ŋgasi su ya su, ni ya anumam kɛrɛ.”

²⁶ Dɔ na Gomina Pilato ayi Barabasi aji, na wɔ ma sojam n afin Yesu ŋgbere, na wɔ nya afa i awura bu saa nu ka bu kɔ kpama i baka jaanu n su na i wu.

Kabo sojam yoori Yesu anzasi ni

²⁷ Na Gomina Pilato n dɛɛ sojam n afa Yesu awura i gisan n nu, na ba tien bu beŋgu sojam kɛrɛ nɔɔ abara ayɛ i.

²⁸ Na ba yi Yesu sutura bo i wura i ni, na ba fa tanlɛɛ kɔkɔrɛ yorom be ka femɛya tanlɛɛ dɛɛ su awura i.

²⁹ Na ba fa buwe aɔɔ i ka kaba dɛɛ su, na ba fa aforo i tii ka femɛya kere dɛɛ su. Na ba fa kpama awura i saa nu, na ba kutu i nyunu suyo i anzasi, bu ŋa, “Yudafɔm Fɛmɛ ni, ya yo u anɛɛ.”

³⁰ Na ba yi nanzue aɔɔ i ŋu, na ba de kpama ni i dɔ, na bu sufin i tii baka.

³¹ Bu ba yoori i anzasi n wieeri ni, na ba yi tanlɛɛ kɔkɔrɛ yorom ni, na ba kaaki afa i tienɔgu dɛɛ sutura n awura i. Na ba nya afa i akɔ ka bu kɔ kpama i baka jaanu n su.

Kabo bu kpamaari Yesu baka jaanu n su ni

³² Saŋga bo bu sukɔ ni, na bu ni Sirenefɔ biɛ be ayɛ, bu fere i ka Simon. Na sojam n amɛ i ka i sɔ Yesu baka jaanu ni.

³³ Na ba kɔ aju awɔrɛ be bo bu fere i ka *Gologota* ni, *Gologota* n bu la ka Tereawa Woobiri.

³⁴ Na ba saŋga nzan ni ayiri wiwi barasu be ama Yesu ka i nu na i jo yaari ni, ama, i kaanri i nɔɔ ɔ, na wɔ kete, wɔ nu má i.

³⁵ Na ba nya akpama i baka jaanu n su, na ba ye i su ajina. Bu yoori sɔ wieeri ni, na ba tu mbaa na bu si kabo bu kpaaki i suturam nu, bu ŋuɔnu nu.

³⁶ Nyini sin na ba ka atana suniɛ Yesu.

³⁷ Na ba kɛrɛ jɔrɛ n bo bu kpiɛ sɔori i ni, afa abo akpama i baka jaanu n tii su, kɛrɛɛwa n la ka, “Yesu bo i ti Yudafɔm Fɛmɛ n lɛɛ.”

³⁸ Na ba kpama finfɔ nnyɔ nbem baka jaanu su adodo i, bu kpamaari kun i saa fɔmbɔrɔ su, na ba kpama kun n gusu i saa biɛ su.

³⁹ Na minem kɛrɛ bo bu sin dɔ ni, subobo bu tii, na ba kpiɛ i nzukɔ, bu ŋa,

⁴⁰ “Wɔrɔ bo a ŋa a fúfu Nyɛmɛ Sereebiri Awuru n na a káaki ta i lesan afien n lɛɛ, de u tii ji. Nzen a ti Nyɛmɛ Wa nahɔrɛ su, jura baka jaanu n su.”

⁴¹ Sɔ ye Nyɛmɛ sayoowa dɔŋguyofɔ nkpienkpienm, ni Nyɛmɛ nɔanie kerefɔm, ni Yudafɔm nkpienkpienm n gusu yoori i anzasi a,

⁴² bu ŋa, “Wɔ de minem tii aji, ama, i sukoro de má yiri ni i tii. M ŋa i ti Yisarelifɔm Fɛmɛ n wɔ e. Tɔ, ma i jura baka jaanu n su bra kisa kisa na ya niɛ, na ya yó i yarada.

⁴³ I daafi Nyɛmɛ ŋu a, ye i ŋa i ti Nyɛmɛ Wa a. Tɔ, nzen Nyɛmɛ koro i a, ma i de i tii ji kisa na ya niɛ.”

⁴⁴ Haari na finfɔ nnyɔm n bo bu kpamaari bu dodoori Yesu ni mmɔɔ akpiɛ i nzukɔ sɔ.

Kabo Yesu wuuri ni

⁴⁵ Wiɛsu kerefi buru ni nnyɔ sanɔa na awosin akata asien n kere su, haari naaso kerefi nsan.

⁴⁶ Na fa ko nyini sanɔa ni, na Yesu abo awie kpa ase ka, “*Eli, Eli, lama sabatani?*” I bu la ka, “M Nyeme, m Nyeme, nzu ti ye a yaki m aji a?”

⁴⁷ Na mine nbem jinaari bere, bu nbem n tiiri so ni, na ba se ka, “Am ti, ahin sono n sufere Eliya.”

⁴⁸ Kpenɔa na bu nu kun anmati afa mene, ado nzan gagaraki be nu, na wo fa awo baka su alaandi ato Yesu noo ka i nu.

⁴⁹ Ama, na nyingam n ase ka, “Am yaki na ya nie, ka Eliya ba de i tii ji?”

⁵⁰ Na Yesu abo awie kpa, na wo nya ayo Nyeme de.

⁵¹ Do na tani bambaka n bo bu fa kanda kpaakiiri Soo Casi n bo i wo Nyeme Sereebiri Awuru n nu n ati nu nnyɔ, fa i angoro ko jura i asienɔu. Na asien n akpisi, na yabue ngbingbirim akpakpaaki nu.

⁵² Na fanɔunmam ateke, na Nyeme minem donɔu bo ba wu n atenge bu yiwee nu.

⁵³ Na ba fite fanɔunmam n nu, na sanɔa bo Yesu ba tengeeri i yiwee n nu ni, na ba ko awura Yerusalem mie kpiri n nu, na mine donɔu anu bu.

⁵⁴ Na soja kpisen n ni i sojam n bo bu jina niɛeri Yesu ni, na bu nuuri kabo asien n kpisiiri barasu, ni kabo sa n kere yoori ni, na sere ati bu agaya, na ba se ka, “Ahin sono n ti Nyeme Wa a nahore su.”

⁵⁵ Na nbaram beberebe bo bu su i su fite Galili awore n nu na bu buka i ni, ajina dede sunie Yesu.

⁵⁶ Bu nu nbem la Mariya bo i fite Magadala mie n nu ni, ni Mariya n bo i nbaam la Yakobo ni Yosefu ni, ni Zebedi yi.

Kabo bu yoori Yesu sutura barasu ni

⁵⁷ Na naaso sanɔa na nenɔfo be aba, i fite Aramatiya mie kpiri n nu wo, bu fere i ka Yosefu. Yiri mmoo ti Yesu susufom kun wo.

⁵⁸ Na wo ko asere Gomina Pilato ka i fa Yesu nunie n ma i. Na Gomina Pilato ama noo ka bu ko fa ma i.

⁵⁹ Na Yosefu ako ayi Yesu fuin n apooɔndi nzee fofore nu,

⁶⁰ na wo ko ase i fanɔunma nu, yiri Yosefu de tienɔu yabue bu fanɔunma n bo ba lokoti i fofore ni. Na wo nya akundu yabue bambaka afa ato fanɔunma n ano ni, na wo ko.

⁶¹ Na Mariya Magadalafɔ ni, ni Mariya nyinga n atana afa bu nyunu awo fanɔunma ni.

Kabo tintinijinafom jina nmindaari Yesu fanɔunma ni

⁶² Na alecin fofore bo i ti Yudafoɔm Numiyi een ni, na Nyeme sayoowa donɔuyofɔ nkpienkpienm, ni Farasifom n ako Gomina Pilato do.

⁶³ Na ba ko ase i ka, “Ya si, ya tenge su ka sanɔa bo nyini korefo n yo la ngoo ni, na wo se ka yiri wuuri, i lesan een, i tenge i yiwee n nu.

⁶⁴ Nyini ti, ma noo na bu ko jina nminda i fanɔunma ni, fa ko ju haari lesan een ni, ma nyini, i susufom ni koro ko wo yi i nunie ni, na bu bu kore ka wo tenge wo. Nyini sanɔa, kasin de kore ni tara bumboori de ni.”

⁶⁵ Na Gomina Pilato ase bu ka, “Am fa tintinijinafom, na am ma bu ko jina nminda i fanɔunma n kabo am koro i barasu ni, na ma be koro yo poi.”

⁶⁶ Nyini ti, na ba ko ata ato fanɔunma n ano n kere, na ba ma tintinijinafom n ajina anminda abara aye i, adena ma be koro yo poi.

28

Kabo Yesu tengeeri i yiwee n nu ni

¹ Yudafom Niumiyi cɛɛn n sin dɛɛ alecin, bakue n bumboori, mone cɛɛn ngarama fuun, na Mariya Magadalafo ni, ni Mariya nyinga ni, ako ka bu ko nie Yesu fanjunma ni.

² Kpennga na asien n akpisi agaya, dama Micera n mereke be fiteeri angoro jura ba kundu yiiri yabue bambaka n fanjunma n ano n su a, na wo fun atana su.

³ Na wo ta fofoe papasi ka nzue kpeseewa dɛɛ su, na i sutura n kere ayo fofoe ka cisen.

⁴ Na sere ati tintinijinafom ni, na bu njunie subobo bu, na ba yo ka ba wu dɛɛ su wo.

⁵ Na Nyeme mereke n ase nbaram n ka, "Ma am ma sere ti am. M si ka am nienie Yesu bo bu kpamaari i baka jaanu n su n wo.

⁶ I wo ma fen. Wo tenge i yiwee n nu, kabo i yo seeri am ni. Am ba nie deke bo bu faari i seeri ni.

⁷ Am kpie am nyi na am ko se i susufom ni ka wo tenge i yiwee n nu. Am ti fen, i sudu am mo ko Galili awore n nu, do ye am ko ni i a. Ma se am lee."

⁸ Na ba fite fanjunma n nu ndende ni sere, ama, ni ahorejo, na ba njmati na bu ko se i susufom ni.

⁹ Bu sukoni, kpennga na bu ni Yesu aye, na wo yo bu anse. Na ba kutu i jaa bu, na ba ma i jirima.

¹⁰ Na wo se bu ka, "Ma am ma sere ti am. Am ko se m ninbaam ka bu ko Galili, do ye bu ko ni m a."

Kabo tintinijinafom seeri sa n bo i yoori ni

¹¹ Sanja bo nbaram n wo ko su ni, na tintinijinafom nbem ako mie n kunnu, ako ama Nyeme sayoowa danguyofonkpienkpienm ni labari, fa ko sa n kere bo wo yo n su.

¹² Na Nyeme sayoowa danguyofonkpienkpienm, ni Yudafonkpienkpienm n atien bu noo, afa asese su, na ba ma tintinijinafom ni njwaa beberebe,

¹³ na ba se bu ka, "Am se minem ka, sanja bo am adaafi kongue n ye i susufom ni ba wo yiiri i a.

¹⁴ Na nzen haari gomina n ba tiiri nyini labari ni, yere kan de am tii, na i yo ma am poi."

¹⁵ Na tintinijinafom n ade njwaa n na ba ko ase minem kabo nkpienkpienm n seeri bu ni. Nyini dɛɛ ti ye nyini labari n abara aye Yudafom do, fa ba ju haari ni nyuma n a.

Kabo Yesu faari i nu kereeri i susufom ni

¹⁶ Na i susufon buru ni kunm n ako Galili awore n nu na ba fun ako buka n su, deke bo Yesu seeri bu ka bu ko ni.

¹⁷ Sanja bo bu ko njuri i ni, na ba kutu ama i jirima, ama, bu nbem asunsun ka ma yiri lee.

¹⁸ Na Yesu acin adodo bu, na wo se bu ka, "Nyeme afa angoro ni asienku fen kere yiko, afa awura m saa nu.

¹⁹ Nyini ti, am ko durunya n kere nu, na am ma daanfie kere yo m susufom. Na am bie bu Nyeme nzue, Si, ni Baa, ni Awiewie Casi n dɛɛ duma nu.

²⁰ Na am kere bu ka bu de m nonie maawa n kere bo ma fa ama am ni. Am ti fen, m wo am do, sanja kere, fa ko haari durunya n awieeri."

Labari kpa n bo MARAKO akerε i ni

Kabo Yohane Nyeme Nzue Biefo kaanri Nyeme jore ni

¹ Ahin jore ni, i ti Nyeme Wa Yesu Kristo dee labari kpa n wo. Kabo i boori i bu yaa.

²⁻³ Nyeme yo seeri i wa n ka,
 “Ti fen, m sunma m sunmafo n na i du u mo,
 yiri sese u atin n su a.
 Yiri ko subo ndoori boro kpantain n nu se ka,
 ‘Am sese Mibie n atin n su,
 na am yo i atin n dongu.’”

Na Nyeme ama ba kere nyini jooowa n kere Nyeme noanie kanfo Esaya dee kadasi n nu.

⁴ Nyini sono n bo Nyeme sunmaari i n la sono be bo bu fere i ka Yohane Nyeme Nzue Biefo ni. I baari boro kpantain n nu, na i sukan Nyeme jore, i na, “Am kaaki am wo na m bie am Nyeme nzue, na Nyeme fa am ngasi ni am satie kere ce am.”

⁵ Na Yudiya asiensufom, ni Yerusalem mie nufom kere afite aba i do, na ba kan bu ngasi ni bu satie kere bo ba yo i akere Nyeme, na Yohane abie bu Nyeme nzue Yodan kunma n nu.

⁶ Yohane sutura wuraawa yo ti deke bo bu faari nyoma ndore wuuri i a, na wo fa jina abo i wi nu. I diire yo la lalom ni wie wo.

⁷ I kaanri Nyeme jore, i na, “Sono be wo m sin suba, i tara m fieo, m ti kaan ni bo m dodo i.”

⁸ Mini afa nzue abie am a, na am yo casi, ama, yiri fa Nyeme Awiewie Casi n wura am nu yo am casi a, kabo sono bie nzue na i yo casi ni.”

Kabo Yohane bieeri Yesu Nyeme nzue ni

⁹ Nyini sangga n na Yesu afite Nazareti, mie n bo i wo Galili awore n nu ni, na wo ba Yohane do, na Yohane abie i Nyeme nzue Yodan kunma n nu.

¹⁰ Sangga bo Yesu fiteeri nzue n nu ni, kpenga na wo nu ka angoro n ateke, na Awiewie Casi n ajura ka tiiwa dee su aba atana i nu.

¹¹ Na wo ti akonvi be nga angoro, i na, “Woro ti m wa a, m koro u agaya, m ahore ajo u nu.”

Kabo Sitana yoori Yesu na i nie ni

¹² Nyini jinaabiri n nu na Awiewie Casi n ama Yesu ako boro kpantain n nu.

¹³ I woori do een aburana, i ni boro nengem woori do a, na Sitana ayo i na i nie ka, i yo yiri Sitana n dee koroowa, nzen i yo ma. Ama, Yesu asoro ma su. Na Nyeme merkem aba asu i.

Kabo Yesu fereeri jombaa tarafon na nbem ka bu su i su ni

¹⁴ Sangga bo bu taraari Yohane nyiiri i dansaraka n sin, na Yesu ako Galili awore n nu, na i sukan labari kpa n fa ko Nyeme atin n su kere minem,

¹⁵ i na, “Sangga n aju bo Nyeme Feme ba nie i minem su. Am kaaki am wo, na am de Nyeme labari kpa n na am yo i yarada.”

16 Ye i ba sunati sin Galili kunma kpiri n nɔɔ su, na wɔ ɲu jombaa tarafɔ nnyɔ nbem. Berɛ la Simon ni i niɛma Andere. Bu wo bu diendie sandi su kunma kpiri n nu.

17 Na Yesu ase bu ka, “Am bra na am ba su m su, na m má am tien minem nɔɔ ma m, kabo am tara jombaa ni.”

18 I seeri sɔ ni, na ba kaba ayaki bu diendiem ni, na ba su i su.

19 I nati kɔɔri mɔ kaan bekun, na wɔ ɲu mine nnyɔ nbem. Berɛ la Yakobo ni i niɛma Yohane. Bu fere bu si ka Zɛbedi. Bu wo lee nu suyo bu diendiem dɔɲgu.

20 Dɔ na wɔ fere bu ka bu su i su, na ba yaki bu si ni, ni i npaadifom n lee n nu, na ba su i su.

Kabo Yesu fɔn yiiri ajini sɔnɔ be ɲu ni

21 Na ba kɔ aju mie kpiri n bo bu fere i ka Kapenam su. Na Yudafom ɲumiyi cɛen na Yesu awura bu tientienbunɔɔ sɔɔ n nu, bo bu sere Nyeme na bu kere Nyeme jɔre nu ni, na wɔ kan Nyeme nɔaniɛ akere minem ni.

22 Na bu kere ayo alekutura fa kɔ i kereewa n su, dama i kereewa n awo i ɲgumi ni Yudafom dɛɛ Nyeme nɔaniɛ kerefom ni. I kereewa n la yiko.

23 Nyini saɲga n nu na sɔnɔ bo ajini wo i ɲu n aba bu dɔ bu tientienbunɔɔ sɔɔ n nu, na wɔ bo awie

24 ase ka, “Yesu Nazaretifo, a koro nzu ya nu fen a? A ba ka a ba yo ya ɲgbɛen wɔ? M si u sa, wɔɔ ti sɔnɔ casi n bo Nyeme asunma u n a.”

25 Na Yesu atien ajini n ɲu ase ka, “Mɔ u nɔɔ berɛ, na a fite yaki sɔnɔ ni.”

26 Na ajini n akpisi sɔnɔ ni, na wɔ ciindi afite ayaki i.

27 Na minem kere ayo alekutura akɔ asin su, na ba bisa bu ɲuɲu nu ka, “Ee. Nzu la ahin? I ti kereewa fɔfɔre wɔ. Ahin sɔnɔ n la yiko bo i koro ma ajinim n mmɔɔ nɔɔ na bu de i.”

28 Nyini ti na Yesu duma akaba ata abara aye Galili awɔre n kere nu.

Kabo Yesu tuntunri tukpakifom beberebe Simon dika ni

29 Saɲga bo i fiteeri tientienbunɔɔ sɔɔ n nu ni, na i ni Yakobo ni Yohane akɔ awura Simon ni Andere dika.

30 Bu kɔ juuri awuru n nu ni, na ba se Yesu ka Simon sibara la má i ɲu, yakɔkɔ abo i, i da sɔɔ.

31 Na wɔ kɔ aso i saa nu aye i su atana, na yakɔkɔ n ayaki i, na wɔ kɔ ayo diire ama bu.

32 Nyini cɛen n naasɔ, dika bibiri saɲga, na minem afa tukpakifom kere ni minem bo ajinim wo bu ɲu n aba Yesu dɔ.

33 Na mie n nu jama n kere aba atien bu nɔɔ i dɔ anungbere n nu.

34 Na wɔ tuntun tukpaki barasu barasufom beberebe, na ba nya laifie, na wɔ fɔn ayi ajinim gusu beberebe. Wɔ du má su na ajinim n jɔjɔ, dama bu si i sa.

Kabo Yesu kaanri Nyeme jɔre Galili awɔre n nu ni

35 Na alecin akɔnyuma ciciri su, na Yesu ayasu afite akɔ dede awɔre be nu i ɲgumi, na wɔ kɔ asere Nyeme.

36 Na Simon ni i beɲgum akɔ i nienie.

37 Bu kɔ ɲuuri i ni, na ba se i ka, “Sɔnɔ kere sunienie u busu.”

38 Na Yesu ase bu ka, “Am ma ya kɔ mie nyiɲgam n su na m kɔ kan Nyeme jɔre kere bu gusu, dama ka nyini ti ye m baari durunya n nu a.”

39 Na wɔ bara aye Galili awɔre n kere nu, sukan Nyeme jɔre bu tientienbunɔɔ sɔɔm n nu, ye i fɔn yi ajinim minem ɲu a.

Kabo Yesu tuntuunri kokofɔ be ni

⁴⁰ Na kokofɔ be aba Yesu dɔ, na wɔ ba akutu i nyunu asere i jande ka i buka i. I ɲa, “Nzen a koro ka a ma m nya laifɛ, a koro ma m nya i.”

⁴¹ Na Yesu aɲu i aɲunfɔ, na wɔ tenge i saa anana i ɲu, na wɔ se i ka, “M koro. Nya laifɛ.”

⁴² Na kokobi n akaba ayaki sɔnɔ n na wɔ nya laifɛ.

⁴³ Na Yesu ama i atin ka i kɔ, na wɔ bɔbɔ i

⁴⁴ ase i ka, “Má a se ka a se be ahin jɔre ni, ama, kɔ na a kɔ fa u ɲu kere Nyemɛ sayoowa dɔnguyofɔ ni, na a kɔ yo yoowa n bo Moyisi yo kereeri dawafɔm ni, dama nyini kere minɛm ka a nya u ɲu a.”

⁴⁵ Ama, na wɔ kɔ abo ndoori, na labari n abara ayɛ deke n kerɛ, nyini ti, Yesu akoro ayi má i ɲu fofoe nu miɛm be nu kun, i fiɛri i ɲu ahɛmɛ wɔ, na minɛ afite awɔre n kerɛ nu aba i dɔ.

2

Kabo Yesu tuntuunri sɔnɔ bo i saam ni i jaam awu ni

¹ I yoori lennyɔ na Yesu akpie i nyi aba Kapenam miɛ kpiri n nu, na labari abara ayɛ ka i wo awuru,

² na minɛ atien bu nɔɔ i dɔ agaya haari fofoe anya má anɔ n bo bu fa wura sɔɔ n nu mmɔɔ, na Yesu akan Nyemɛ jɔre sukere bu.

³ I wo bu kere su ni, na minɛ nbem aba i dɔ, bu nu minɛ nna sɔ sɔnɔ bo i saam ni i jaam awu.

⁴ Jama n sunnuuri sɔ n dɛɛ ti, ba koro anya má fofoe bo bu fa sɔnɔ n dodo Yesu, na ba fiiti sɔɔ n bo Yesu wo nu n angoro buekun, na ba fa i ni i dasu n kerɛ aɔɔndi afa i ada sɔɔ n nu.

⁵ Yesu ɲuuri kabo bu yoori i yarada n sɔ ni, na wɔ se sɔnɔ n bo i saam ni i jaam awu n ka, “M dɔn, ma fa u satie ace u.”

⁶ Tɔ. Yudafɔm Nyemɛ nɔanɛ kerefɔm nbem tana berɛ, na ba sunsun bu ahore su ka,

⁷ “Ahin sɔnɔ n la atin bɔnɔ ye i jɔɔ wura Nyemɛ ɲgasi nu sɔ a? Be wo má berɛ bo i koro fa minɛm satie ni bu ɲgasi ce, sin Nyemɛ ɲu.”

⁸ Na Yesu afa nu i ahore su fa kɔ bu sunsunni bo bu bita i n su, na wɔ bisa bu ka, “Nzu ti ye am bita nyini sunsunni ni am ahore su a?”

⁹ Bɔnɔ ti kekereke a, bo m se sɔnɔ n ka, ‘Ma fa u satie ace u,’ nzen, ‘Yasu fa u dasu n na a nati n a’?

¹⁰ M kéré am ka mini Adamande Wa n la yiko durunya n nu bo m fa minɛm satie ni bu ɲgasi ce bu.” Na wɔ se sɔnɔ n ka,

¹¹ “Wɔrɔ, yasu fa u dasu n na a kɔ awuru.”

¹² I kaba yasu faari i dasu n wɔ, na wɔ fite jama n kerɛ nyumbaa nu. Na bu kerɛ ayo alekutura, na ba kansɛ Nyemɛ, na ba se ka, “Ya nya ɲu má ahin sa n ɲusu cɛɛn be.”

Kabo Yesu fereeri Levi ka i su i su ni

¹³ Na Yesu akaaki akpie i nyi akɔ Galili kunma kpiri n nɔɔ su, na jama beberebe akɔ atien bu nɔɔ i dɔ, na wɔ kan Nyemɛ jɔre akere bu.

¹⁴ I wo natiiri su susin ni, na wɔ ɲu lampodefɔ be bo bu fere i ka Levi, Alafeyo wa ni, ka i tana i juma yoobiri, na Yesu ase i ka, “Yasu bra na a ba su m su.” Na wɔ yasu asu i su.

¹⁵ Na Yesu akɔ Levi dika ka i kɔ di diire. Na satieyofɔm, ni lampodefɔm beberebe asu i su. Diire n diibiri dɔ ni, na bu dɔngɔ aba atana Yesu ni i susufɔm n dɔ, na ba sanɲa adi diire.

¹⁶ Na Nyeme noaniere kerefo nbem bo bu su Farasifom dee atin su ni, anu ka Yesu ni satieyofom, ni lampodefom tana sudi diire, na ba bisa i susufom ni ka, "Nzu ti ye Yesu ni lampodefom, ni satieyofom sangha di diire a?"

¹⁷ Na Yesu ati bu jɔjɔwa n na wo bo bu nu ka, "Minem bo bu la laifie n koro má ayirifo, má ka bo bu la má laifie ni koro a. Ma ba má ka m bá fere minem bo bu na bu yo sa bo i ko atin su Nyeme do n wo, ama, m baari satieyofom n dee ti wo."

Kabo Yesu kereeri noo cici jore ni

¹⁸ Ceen be na Yohane dee susufom ni Farasifom sucici bu noo, na mine nbem aba na ba bisa Yesu ka, "Nzu ti ye Yohane susufom ni Farasifom dee susufom cici bu noo, ye u deem bere cici má?"

¹⁹ Na Yesu abo bu nu ka, "Am sunsun ka konyayafom koro cici bu noo sangha bo konyafan n toko wo bu do ni, nzen se? Ai, sangha bo konyafan n wo bu do ni, bu yo má nyini.

²⁰ Ama, sangha suba bo bu bá yi konyafan n fite bu nu, nyini sangha n ye bu nya cici bu noo a."

²¹ Na Yesu akaaki ase ka, "Be koro fa má sanvuin fofore kpa to má tani dawa kunma, nzen i yoori so, sanvuin fofore ni son tani dawa n wo, na i teke i kunma n agaya buka su.

²² I kaaki ti so o bekun ka be koro fa má nzan nyiiwa fangafɔ go má dundu dawa bebete nu, nzen i yoori so, dundu ni tie wo, na i ka ngbeen, na nzan n kere songi. Ama, i ti ye ni ka bu fa nzan nyiiwa fangafɔ go dundu fofore biiwa nu."

Kabo Yesu jɔjɔ fa koori Numiyi ceen n jore ni

²³ Yudafo Numiyi ceen be, na Yesu ni i susufom ni sunati sin alembaa fie be nu, na i susufom n abubu be akpese.

²⁴ Na Farasifom n ase i ka, "Nie fen. Nzu ti ye u susufom ni suyo so a? Nyeme noaniere kpamaawa n kere ka má be yo so, Numiyi ceen ni."

²⁵ Na wo bo bu nu ka, "Am nya kan má Nyeme Jore Kadasi n nu, kabo Feme Davidi yo yoori sangha bo i ni i minem miere diire busu n wo, nzen se?"

²⁶ Nyini sangha Abiyata yo ti Nyeme sayoowa donguyofom kere kpien n a. Ahoe n ti, na Feme Davidi ako awura Nyeme Sereebiri Awuru n nu, na wo di kpɔnɔ n bo ba fa ama Nyeme ni, na wo ma i minem be. Ama, am si ka ya dee atin n su, Nyeme sayoowa donguyofom ngumi di nyini kpɔnɔ n a."

²⁷ Na Yesu akaaki ase bu ka, "Adamande dee ti ye Nyeme yiiri Numiyi ceen n a, má Numiyi ceen n dee ti ye Nyeme yiiri adamande a.

²⁸ Nyini ti, Numiyi ceen ni mmoo, mini Adamande Wa ni ti i Mibie a."

3

Kabo Yesu tuntuunri sonɔ asaa fuin be Numiyi ceen ni

¹ Na Yesu akaaki ako tientienbunoo soo n nu do bekun. Sonɔ asaa fuin be woori do.

² Na minem bo bu wo do n atu bu nyumbaa anie Yesu, na bu nie ka i tuntun asaa fuin n Numiyi ceen ni, nzen i tuntun má i, adena bu so i ngee na bu jaraki i ka wo saaki Numiyi ceen n ciire ni.

³ Na Yesu ase asaa fuin n ka, "Ba jina afien fen."

⁴ Na wo bisa bu ka, "Ya dee atin n su, atin wo nu ka ya yo sakpa Numiyi ceen ni, nzen ya yo satie wo? I kaaki ti ye ni ka ya de ngoo, nzen ya yi ngoo o?" Ama, ba bo má i nu.

⁵ Na Yesu anie bu nyunu abara aye, na wo fa yaa bu nu, na i ahore asaaki fa ko bu atii kekere n dee ti, na wo se sono n ka, "Tenge u saa ni." Na wo tenge i saa ni, na wo yo fanga bekun.

⁶ Na Farasifom n akaba afite tientienbunoo soo n nu ako Feme Herode minem do, na ba sese bu nu su kabo bu yo na bu kun Yesu.

Kabo jama beberebe tienri bu noo Yesu do ni

⁷ Nyini sin na Yesu ni i susufom n afite ako kunma kpiri n noo su, na jama beberebe afite Galili awore n nu asu i su. Nbem gusu fiteeri Yudiya dee awore n nu,

⁸ ni Yerusalem mie kpiri n nu, ni Idumeya dee awore n nu, na nbem gusu afite Yodan kunma n wie afiri ni, ni Tiro ni Sidon dee bue ni. Bu tiiri kabo Yesu yoori alekutura sam barasu ni, nyini ti ye bu baari i do a.

⁹⁻¹⁰ Yesu ama tukpakifom beberebe anya laifie n dee ti, bo bu la tukpaki kere koro ka bu mie bu nyi wo, na bu sakati wura na bu fa bu saa kan i. Nyini ti, na wo se i susufom ni ka bu kpa bu nu ni lee ma i, na nzen minem ba na bu mie i nu na i koro wura lee n nu.

¹¹ Sanga kere bo minem bo ajinim wo bu nu n nya nuuri i, bu kutu i nyunu wo, na bu ciindi na bu se ka, "Woro ti Nyeme Wa n a."

¹² Na wo bobo ajinim ni ni anyumboro ka, ma bu ma be si i sono nzuin nu.

Kabo Yesu yiiri mine buru ni nnyo ka bu yo i jaramasam ni

¹³ Na Yesu afun ako buka be su, na wo fere mine n bo i koorori ka bu ba i do ni, na ba ba i do.

¹⁴ Na wo yi bu nu buru ni nnyo, na wo fa bu ayo i jaramasam ka bu wo i do, na i susunma bu ka bu ko sukan Nyeme jore,

¹⁵ na wo ma bu yiko ka bu ko sufom yi ajinim minem nu.

¹⁶ I jaramasa buru ni nnyom ni bo i yiiri bu n la Simon bo Yesu tuunri i duma ka Peto ni,

¹⁷ ni Yakobo ni i niema Yohane, bo bu si la Zebedi na Yesu kaaki tuunri bu duma ka *Bowanaje*, i bu la ka bu tientien agaya ka nzue wo.

¹⁸ Bu nbem gusu la Andere, ni Filipu, ni Batolomeyo, ni Matio, ni Tomasi, ni Yakobo bo i si la Alafeyo ni, ni Tadayo, ni Simon bo i tu ngonni fa ko i asien su ni,

¹⁹ ni Yudas Isikariyoti bo i ba toori Yesu ni.

Kabo minem na Yesu ni Sitana dee ti kun ni

²⁰ Na Yesu ako awuru, na jama aba atien bu noo bekun bo i ni i susufom n akoro anya ma tana bo bu di diire mmoo.

²¹ Na sanga bo i minem tiiri i nga ni, na ba ko ka bu ko fa i ba awuru, dama minem na i nyunu akan i.

²² Na Yudafo Nyeme noanie kerefom bo bu fiteeri Yerusalem mie kpiri n nu n ase ka, "Belazebuli bo i ti ajinim kere dee feme ni, wo i nu a." Na ba kaaki ase ka, "Yiri ajinim kere feme ni ma i yiko ye i koro fon yi ajinim n a."

²³ Bu seeri so ni, na Yesu afere bu, na wo bo bu mienu. I na, "Sitana koro yo se fon yi i dee ajinim minem nu a?"

²⁴ Ya fa i ka, nzen femeya nya kpakpaakiiri nu wieeri, nyini femeya ni koro jina a? Ai, i koro jina ma.

²⁵ Na nzen awuru gusu bo i minem nya kpakpaakiiri nu, nyini awuru ni koro jina a? Ai, i koro jina ma.

²⁶ Nzen Sitana dee femeya n nya kpaakiiri nu wieeri, i koro jina a? Ai, i koro jina ma. Nzen i nya yoori so, i fanga wie wo.

27 Be koro wura má sɔnɔ fangafɔ dika na i fin i nenje, má ka wɔ tara i fanga acin i nyama ka, ye i nya koro fin i nenje n bo i wo awuru n nu a.”

28 Na Yesu akaaki ase ka, “M suse am nahɔre wɔ lɛɛ ka, Nyeme koro fa minem satie kere fa ce bu, haari fa kɔ sanja jɔre ngbɛɛnngbɛɛn kere bo bu jɔjɔri i fa kɔ Nyeme dɔ,

29 ama, sɔnɔ kere bo i jɔjɔ wuraari Awiewie Casi ni ngasi nu, Nyeme fá má i mi ngasi ce má i, dama i mi ayo satie bo i la má awieeri lɛɛ.”

30 Deke bo i ti na Yesu seeri sɔ n la ka, bere Nyeme nɔanie kerefom ni, bu na ajini wo i nu a.

Minem bo bu ti Yesu ni, ni i ninbaam nahɔre su n jɔre

31 Na Yesu ni, ni i niemam aba i dɔ awuru n bo i wo nu ni, na ba ka ajina dasin asunma ka bu fere i.

32 Na jama beberebe atana abara aye yiri Yesu na ba se i ka, “Ti fɛn. U ni, ni u niemam wo dasin koro u.”

33 Na wɔ se bu ka, “Am ma m kere am bo bu ti m ni, ni m niemam.”

34 Na wɔ nie abara aye minem bo bu tana bara yeeri i ni, na wɔ se bu ka, “Am nie. M ni, ni m niemam n yaa.

35 Sɔnɔ kere bo i yo Nyeme sa koroowa, yiri ti m siwa, ni m niwa, ni m ni a.”

4

Miɛnu fa kɔ kabo dɔdɔrifɔ be sandiiri alembaa ni

1 Na Yesu akaaki akɔ Galili kunma kpiri n nɔɔ su, na wɔ bo i bu sukere minem Nyeme jɔre, na jama beberebe atien bu nɔɔ i dɔ. Jama n sunnuuri beberebe n dɛɛ ti, na wɔ wura lee nu atana nzue n nu, na jama n kere atien bu nɔɔ fa dodo nzue n nɔɔ su.

2 Na wɔ bo miɛnu, na wɔ kere bu dekem beberebe. I na,

3 “Am ti fɛn. Dɔdɔrifɔ be yo fiteeri sɔ ɔ, ka i kɔ sandi alembaa.

4 Sanja bo i wo sandi su ni, na alembaam nbem atoto atin n nɔɔ, na anumam aba atambu bu ami.

5 Na nbem atoto tieka su, deke bo fa sunnu má ni, na fa sunnu má n dɛɛ ti, na wɔ ce má, na wɔ fi,

6 ama, sanja bo wie ba fiteeri agaya ni, na wɔ waandi, dama bunlui n akpama abi má n dɛɛ ti.

7 Na alembaa ni nbem atoto lolɔe nu, na lolɔe n anyi akata i nu, nyini ti, wɔ koro awura má mbaa.

8 Ama, na alembaam ni nbem atoto asien kpa su, na wɔ nyi awura mbaa zɔi zɔi.”

9 Na Yesu ase bu ka, “Bo i koro ka i ti ahin jɔre n bu, i ti ye ni ka i so i sui na i ti.”

Deke bo i ti na Yesu boori bu miɛnu n ni

10 Na sanja bo i kaari i ni i susufɔ buru ni nnyom ni, ni minem bo bu wo i dɔ sanja kere ni, na ba bisa i nyini miɛnu n bu.

11 Na wɔ bɔ bu nu ka, “Amberɛ ye Nyeme ama am asi i femɛya n nu asiri jɔre a, ama, minem bo bu su má m su ni, m bo i miɛnu kere bu a,

12 adena i yó kabo ba kere i Nyeme Jɔre Kadasi n nu ni, ka,
‘Bu nie ni nahɔre su,
ama, bu nu má pui.

Bu só bu sui ni nahɔre su,
ama, bu tí má deke n bo bu so bu sui ka bu ti i n bu,
dama nzen má bu tiiri i bu, má bu káaki bu wo wɔ,
na Nyeme fá bu satie ce bu.’ ”

Kabo Yesu kereeri miɛnu n bu ni

¹³ Na Yesu abisa bu ka, “Am ati má ahin miɛnu n bu? Ye am yó se ti miɛnu nyingam n kere bu a?”

¹⁴ Ahin miɛnu n bu la ka, dɔdɔɔrifɔ n ti ka sɔnɔ n bo i kan Nyeme jɔre n wɔ.

¹⁵ Mine nbem de Nyeme nɔanie n kabo alembaa n tɔtɔori atin n nɔɔ n wɔ. Bu nya tiiri Nyeme nɔanie n na bu de i, i ce má, na Sitana bá yi nɔanie n fite bu ahore su, a ɲu ka bu wara afi i sa.

¹⁶ Mine nbem gusu de Nyeme nɔanie n kabo alembaa n tɔtɔori tieka su n wɔ. Bu nya tiiri Nyeme nɔanie ni, a ɲu ka ba de i ndende ni ahorejɔ,

¹⁷ ama, i da má bu ahore su. Bu kaaki ti ka alembaa n bo i bunlui akpama abi má n wɔ. I woori bu dɔ kaan sɔ na nzen wahara, wara kekereke be ba tuuri bu fa kɔ bu nyemesu n su, a ɲu ka ba fa ati.

¹⁸ Nbem gusu de Nyeme nɔanie n kabo alembaa n tɔtɔori lolɔe nu n wɔ. Bu nya tiiri Nyeme nɔanie ni,

¹⁹ ama, bu sunsunni kere wo kabo bu yó na bu asiri káta su, na bu koro kabo bu yó na bu nyá ajekɛ kere, na bu ahore bi fa kɔ durunya n nu nenjem su, na Nyeme nɔanie n koro da má bu ahore su na i yo juma. Bu ti ka alembaa n bo i wura má mbaa n wɔ.

²⁰ Ama, mine nbem de Nyeme nɔanie n kabo alembaa n tɔtɔori asien kpa su n wɔ. Bu nya tiiri Nyeme nɔanie ni, na bu de i, na bu fa yo juma na i yo kperɛ beberebe.”

Kabo sɔnɔ koro so má sin su na i fa fie ni

²¹ Na Yesu abisa bu ka, “Am nya ɲu ka sɔnɔ be aso fitana su na i fa ganja butu su, nzen má nyini i fa kɔ se gado bu? I fa taka deke su angoro wɔ bo sɔnɔ kere koro ɲu i, má sɔ?”

²² Dama deke be wo má bere bo i wo fieɛwa nu, na bu bá ɲu má i, na deke be gusu wo má bere bo i wo asiri nu, na bu bá si má i.

²³ Sɔnɔ kere bo i koro ka i ti ahin jɔre n bu, i ti ye ni ka i so i sui na i ti.”

²⁴ Na wɔ se bu ka, “Am si am ɲu sa ni kabo am ti nɔanie barasu ni. Gɔngɔ bo am fa susu ma minem ni, sɔ ye Nyeme gusu fá susu ma am a, na bo Nyeme yó ma am ni tara sɔ n mmɔɔ.

²⁵ Dama sɔnɔ kere bo wɔ nya deke be Nyeme dɔ na i mi si i bita, Nyeme búka i su wɔ, ama, bo i si má i bita, haari ni nyini kaan n bo i la i ni, Nyeme dé i dɔ ɔ.”

Miɛnu fa kɔ kabo alembaa fi barasu ni

²⁶ Na wɔ kaaki ase bu ka, “Nyeme femɛya n ti ka kabo dɔdɔɔrifɔ be kɔ sandi alembaa i fiesu n wɔ. I dɛɛ la ka i sandi wɔ,

²⁷ na i kɔ da kɔngue, na i tenge alecin. Nyini sanga n ye alembaa n fi a, na i sunyi, i si má kabo i yoori barasu.

²⁸ Asien n buka alembaa n ye i fi a. I nya fi wieeri, na i nyi, na i nyinse, na i wɔrɔ, na i nya bi mbaa.

²⁹ Alembaa n ba bi ni, i kpie sanga lɛɛ, na i kpie i.”

Alembaa kaan be jɔre

³⁰ Na wɔ kaaki ase bu ka, “Ya fá nzu deke fa sunsun Nyeme femɛya n a? Wara ya fá miɛnu barasu bɔnɔ ye ya bó i fa kere kabo Nyeme femɛya n ti a?”

³¹ I ti ka nyem mbaa bo bu dɔ i wɔ. Yiri ti alembaa n kere kaan durunya n nu a.

³² Ama, bu nya ba dɔɔri i na i fiiri, i tara toro nyawam n kere bambaka, i koro nyi na i tetereki asambaa asambaa bo anumam koro yo bu tieirim nu.”

³³ Na Yesu afa nyini miɛenu n ni miɛenu nyingam beberebe akan Nyeme jɔre akere bu, kabo sɔnɔ kere koro ti i bu barasu.

³⁴ Jama n nya woori i dɔ, i se má bu pui, má ka miɛenu ye i bo bu a, ama, i ba kaari i ni i susufɔm ni, na i nya yi i bu kere kere bu.

Kabo Yesu kereeri ka i la yiko tara aɲuma ni nzue ni

³⁵ Nyini cɛen n naaso saɲga, na Yesu ase i susufɔm n ka, “Am ma ya kpie kɔ kunma kpiri n buekun dɔ.”

³⁶ Na i susufɔm n acin ayaki jama ni, na ba ba awura lee n bo Yesu wo nu n nu, na ba kɔ. Na nbem gusu afa lee nbem na ba su i su.

³⁷ Na aɲuma bambaka be ayasu, na i subo nzue gɔ lee n nu. Má lee ni suyi ni nzue wɔ.

³⁸ Nyini saɲga ni, Yesu afa piti ason i tii, ye i wo daafiri su lee n sin, na ba ba atenje i ase i ka, “Ya Kerefo, nzen ya suwu, u cɛɛ wo má ya nu fan?”

³⁹ Na wɔ yasu na wɔ tien aɲuma n ɲu, na wɔ se nzue n ka, “Da surum.” Na aɲuma n atara, na dika n kere atara jum.

⁴⁰ Na wɔ se bu ka, “Nzu ti ye am soro sere sɔ a? Am yo má m yarada?”

⁴¹ Na sere akaaki ati bu agaya, na ba bisa bu ɲuɲu nu ka, “Nzu sɔnɔmbiri barasu la ahin bo aɲuma ni nzue n mmɔɔ de i nɔanie a?”

5

Kabo Yesu fɔn yiiri ajinim sɔnɔ be ɲu ni

¹ Na Yesu ni i susufɔm n akpie kunma kpiri n akɔ aju Gerasafɔm deɛ awɔre n nu.

²⁻³ Saɲga bo Yesu fiteeri lee n nu ni, na sɔnɔ be afite faɲkunma nu aba akpa i atin. Nyini sɔnɔ n nati da faɲkunma nu wɔ, dama ajini wo i ɲu. Sɔnɔ be wo má bere bo i koro tara i cici i ni jɔrɔkɔ n mmɔɔ kun,

⁴ dama saɲga kere bu bo i tobari wɔ na bu wura i jɔrɔkɔ buka su, ama, haari ni nyini n mmɔɔ i titi jɔrɔkɔ n wɔ na i kaaki bo sandi tobari n nu. Be wo má bere bo i la faɲga koro tara i jina kun.

⁵ Kɔɲgue ni wiesu kere i wo faɲkunma nu sɔ ɔ, ni bukam su na i suciindi, na i sufa yabue kpiekpie i ɲu.

⁶⁻⁸ Na wɔ ɲu Yesu saɲga bo i toko wo dede ni yiri ni, na Yesu atien ajini n ɲu ase i ka, “Ajini, fite yaki nyini sɔnɔ ni.” Na sɔnɔ n aɲmati akɔ akutu Yesu nyunu, na wɔ ciindi ase ka, “Yesu, Micera Nyeme Kpiri n Wa, a koro nzu m dɔ fen a? M sere u wɔ, Nyeme ti, má a ma m ɲu anyumboro.”

⁹ Na Yesu abisa i ka, “Bu fere u se?” Na wɔ bo i nu ka, “Bu fere m ka Jama Beberbefɔ, dama ya sunnu.”

¹⁰ Na wɔ sere Yesu jande ka má i fɔn bu fite nyini awɔre n nu.

¹¹ Nyini saɲga afam beberebe wo dodo bere, bu wo buka be su sudi,

¹² na ajinim n asere Yesu ka, “Ma ya kɔ fun afam n ɲu.”

¹³ Na Yesu ama bu atin na ba fite akɔ afun afam n ɲu. Afam n ju akpii nnyɔ dika, na bu kere aɲmati acɔɔndi akɔ ato kunma kpiri nzue n nu, na nzue n adi bu.

¹⁴ Afa sasafɔm ɲuuri nyini n sɔ ni, na ba ɲmati akɔ abo ndoori mie kunnu, ni aheme aheme kere su. Na mine aba anie sa n bo i yoori ni.

¹⁵ Na ba ba Yesu dɔ, na ba ɲu sɔnɔ n bo ajinim n yo woori i ɲu n ka i tana Yesu bi wura tanlɛɛ, ni i nyunu koroya su, na sere ati bu.

¹⁶ Na minem bo bu ɲuuri sa n yoobiri ni, akan jɔrɛ n kɛrɛ akere jama n fa kɔ sa n bo i tuuri sɔnɔ n bo ajinim yo woori i ɲu ni, ni sa n bo i tuuri afam ni.

¹⁷ Bu tiiri jɔrɛ n sɔ ni, na ba nya asere Yesu jande ka i yasu bu awɔrɛ n nu.

¹⁸ Saɲga n bo Yesu suwura lee n nu na i kɔ ni, na sɔnɔ n bo ajinim yo woori i ɲu ni, asere i jande ka i ma i su i su.

¹⁹ Ama, na Yesu akete, na wɔ se i ka, “Kpie u nyi kɔ awuru na a kɔ kan kere u lamɔkɔm fa kɔ sakpa n bo Mibiɛ n ayo ama u ni, ni kabo wɔ si u aɲunfɔ barasu ni.”

²⁰ Na sɔnɔ n akpie i nyi akɔ akan sakpa n kɛrɛ bo Yesu ayo ama i ni, abara aye Miɛ Burum dɛɛ awɔrɛ n nu, na sɔnɔ kɛrɛ ayo alekutura.

Bara tukpakifɔ be, ni baabara be yiwee jɔrɛ

²¹ Na Yesu awura lee n nu akpie i nyi akpie kunma kpiri n buekun dɔ, na jama beberebe aba atien bu nɔɔ i bi nzue n nɔɔ su.

²² Na Yudafɔm kpien be wo bɛrɛ, yiri niɛ bu tientienbunɔɔ sɔɔ n su a. Bu fere i ka Yarusi. Na wɔ ba Yesu dɔ nzue n nɔɔ su na wɔ kutu i jaa bu,

²³ na wɔ sere i jande. I ɲa, “M wa sunguru atɔ cin. Bra na a ba fa u saa nana i ɲu na i nya ɲɔɔ ni laifiɛ.”

²⁴ Na Yesu asu i su na ba kɔ.

Na jama beberebe asu Yesu su haari bu kɔ sumiɛ i ɲu.

²⁵ Bara be woori jama n nu, i bita abiɛeri i afɔ buru ni nnyɔ lɛɛ bo i kpu na i kpie má.

²⁶ Wɔ di wahara, na wɔ saaki i ɲwaa kɛrɛ atuntun i ɲu ayirifɔm dɔ dede haari wɔ ba afie, ama, wɔ nya má laifiɛ se tukpaki n buka su kɔ ɔ.

²⁷ Na wɔ ti Yesu ɲga, na wɔ sakati awura jama n nu Yesu sin, afa i saa akan Yesu tanlɛɛ ni.

²⁸ Dama i seeri i kunnu ka, “Nzen m koro yoori aniɛ faari m saa kaanri i tanlɛɛ n mmɔɔ, m nyá laifiɛ.”

²⁹ Na wɔ yo sɔ n kpenɲa na i abiɛeri n akpie, na yiri ni i tiɪ aɲu ka wo nya laifiɛ.

³⁰ Jina n nu bɛrɛ na Yesu afa nu ka i yiko n be afite i ɲuniɛ nu akɔ ayo juma. Na wɔ kaaki aniɛ jama n nu, na wɔ bisa ka, “Nma faari i saa kaanri m tanlɛɛ n a?”

³¹ Na i susufɔm n ase i ka, “Wɔrɔ mmɔɔ aɲu kabo jama n amiɛ u barasu, ye nzu ti ye a bisa ka, ɲma fa i saa kaanri u a?”

³² Ama, na wɔ niɛ abara aye na i si sɔnɔ n bo i yoori sɔ ni.

³³ Na sere ati bara ni, i jina, i ɲuniɛ kɛrɛ subobo i fa kɔ sa n bo i tuuri i ni, na wɔ ba akutu Yesu nyunu, na wɔ kan jɔrɛ n kɛrɛ ni i nahɔrɛ atin su akere i.

³⁴ Na Yesu ase i ka, “M wa, yarada n bo a yo m ni, yiri ma a nya laifiɛ a. Kɔ awuru ni ahoreda, na má u tɔrɛ n ba u ɲu kun.”

³⁵ Saɲga n bo Yesu toko wo jɔjɔ su ni, na mine nbem afite tientienbunɔɔ sɔɔ n kpien n dika aba ase i ka, “U wa n wo má bɛrɛ. Nyini ti, má a dama ya Kerefɔ n kun.”

³⁶ Na jɔrɛ n ato Yesu sui nu, ama, na wɔ se kpien n ka, “Má a ma sere ti u, wɔrɔ yo m yarada.”

³⁷ Wɔ soro má su ka be su i su kun, má ka Petoro, ni Yakobo, ni i niɛma Yohane.

³⁸ Bu kɔ juuri kpien n dika ni, na Yesu awura aɲu ka mine beberebe suyo naɲmie, bu susun subo awie.

³⁹ Na wɔ bisa bu ka, “Nzu ti ye am suyo nanɛmie sun sɔ a? Baabara n awu má, wɔ daafi wɔ.”

⁴⁰ Na ba siri i. Na wɔ fɔn bu kɛɛ afite, na wɔ fa baabara n si ni i ni, ni i susufɔ nsanm ni, na ba kɔ sɔɔ n bo baabara n da nu ni.

⁴¹ Na wɔ kɔ atara i saa, na wɔ se i ka, “*Talita kumi.*” I bu la ka, “Sunɔguru kaan, m ɛa a yasu.”

⁴² Kpɛngɛ na sunɔguru n ayasu anati. I yo ti afɔ buru ni nnyɔ baa a. Na minɛm kɛɛ bo bu woori bɛɛ n ayo alekutura agaya.

⁴³ Na Yesu abɔɔ bu ni nahɔɛ su ka má bu ma be si sa n bo wɔ yo i ni, na wɔ se ka bu ma baa n deke be na i di.

6

Kabo Yesu ɛa Nyɛmɛ nɔaniɛ kanfɔ la má jirima i bɔsu ni

¹ Ye Yesu yasu kɔɔri i bɔsu na i susufɔm n asu i su.

² Na Yudaɔm Njumiyi cɛɛn n na wɔ kɔ bu tɛntɛnbunɔɔ sɔɔ n nu, na wɔ kɔ akan Nyɛmɛ jɔɛ akere bu. Minɛm bo bu tiiri i kereewa n kɛɛ yoori alekutura. Na ba bisa bu nɔnɔ nu ka, “Nifansu ye ahin sɔnɔ n kɔ sɔnsɔnri i si n kɛɛ a? Bu maari i alecira bɔnɔ ɔ? Ye alekutura sam bo i yo bu ni, i yo se yo bu a?”

³ Má Mariya wa n bo i ti kɔmpenta n lɛɛ? Má Yakobo ni Yose ni Yuda ni Simon n gɔɔ n lɛɛ? Am niɛ e. Má i niɛma nbaram mmɔɔ wo ya nu fɛn n a?” Na ba bu i nɔbɛɛn.

⁴ Na Yesu ase bu ka, “Deke kɛɛ bu ma Nyɛmɛ nɔaniɛ kanfɔ jirima, má ka i bɔsufɔm ni i lamɔkɔm ni i gisannufɔm dɔ nɔgumi.”

⁵ Nyini ti, wɔ koro ayo má alekutura sa be i bɔsu dɔ se i faari i saa nanaari tukpakifɔ nbem nɔ wɔ, na ba nya laifɛ.

⁶ Na wɔ yo i awarabo kabo i bɔsufɔm n ayo má i yarada ni.

Kabo Yesu sunmaari i susufɔ buru ni nnyɔm ni

Na Yesu abara aye ahɛmɛ miɛm n kɛɛ su, na i sukere minɛm.

⁷ Na wɔ fere i susufɔ buru ni nnyɔm ni, na wɔ sunma bu nnyɔ nnyɔ, na wɔ ma bu yiko ka bu kɔ sufɔn yi ajinim fite minɛm nɔ.

⁸⁻⁹ Na wɔ se bu ka, “Má am fa puitiripui kɔ ahin atin n bo am sukɔ ni, diire o, kuruku o, nɔwaa o. Ama, am fa kpama ni gbagbaa yiri. Má am se ka am fa tanlɛɛ buka bo am wura i n su.”

¹⁰ Na wɔ kaaki ase bu ka, “Am kɔ juuri miɛ be su, awuru kɛɛ bo am kɔ wuraari nu, am ka nyini awuru n nu, haari am bá fite miɛ n nu.

¹¹ Sasu bekun miɛ bo am kɔ wuraari nu na ba de má am wɔfɔ, na ba kaaki asoro má am su ka bu ti am nɔaniɛ ni, am fite yaki nyini miɛ n ni, na am kpɔnkpɔn yi am jaa tuturi kɛɛ. Nyini dí daani kere bu ka bu woowa ti má kpa.”

¹² Na i susufɔm n afite akɔ akan Nyɛmɛ jɔɛ akere minɛm ka bu kaaki bu wo.

¹³ Na ba fɔn ayi ajinim minɛm beberebe nɔ, na ba sere Nyɛmɛ ama tukpakifɔm dɔnɔgɔ, na ba fa nɔguin agɔ bu nɔ, na ba nya laifɛ.

Kabo bu kuunri Yohane Nyɛmɛ Nzue Biefɔ n barasu ni

¹⁴ Na Fɛmɛ Herode ati nyini sa n kɛɛ, dama Yesu duma ata abara aye deke kɛɛ. Na minɛm nbem ase ka, “Yohane Nyɛmɛ Nzue Biefɔ n ye wɔ tenɔge i yiwee n nu a, nyini ti ye i la yiko koro yo nyini alekutura sam kɛɛ a.”

¹⁵ Ama, na nbem ase ka, “Yiri la Eliya a.” Na nbem gusu ase ka, “I ti Nyɛmɛ nɔaniɛ kanfɔ ka dawa dɛɛm wɔ.”

16 Ama, Feme Herode tiiri nyini ni, na yiri ase ka, “Yohane bo m kpiseri i tii n ye wo tenge a.”

17 Feme Herode yo ma bu taraari Yohane nyiiri wo, dama yiri Feme Herode afin i goro Filipu yi Herodiya afa aja.

18 Má pui ti, dama Yohane ase Feme Herode ka, “Nyeme noanie kpamaawa n kere ka a la má atin ka a fa u goro yi ja i ngoo su.”

19 Yohane seeri so ni, na Herodiya afa i ngasi na wo fo anminda i kabo i nya i na i kun i. Ama, wo koro anya má i,

20 dama Feme Herode ni i tii soroori Yohane ka i ti sono fofoe bo i yo sa bo i ko atin su Nyeme do o. Wo koro má ka pui yo i. Na Feme Herode ajimi fa ko noanie n kere bo Yohane kan maari i n su, ama, haari ni nyini mmoo, i koro ka i suti i noanie n wo.

21 Ceen be so o na Herodiya aba anya Yohane taraabiri. Nyini ceen n ye Feme Herode sugo i baawu ceen agore n a. Na wo fere i gomina mine ngbingbirim, ni i soja nkpienkpienm, ni Galili mine tereterefom kere ka bu ba di na bu nu.

22 Agore n nu ni, na Herodiya wa sunguru awura ago akere Feme Herode ni i jamam, na bu kere ahore ajo. Do ye feme n seeri sunguru n ka, “Deke kere bo a koro, se m, na m má u.”

23 Na wo tan ndie ase i ka, “Haari a nga m kpaaki m femeya n buekun ma u mmoo, m fá ma u.”

24 Na sunguru n afite ako abisa i ni ka, “Ye m sere nzu wo?” Na i ni n ase i ka, “Ko se i ka a koro Yohane Nyeme Nzue Biefo n tiiawa a.”

25 Na wo nmati akpie i nyi ndende aba ase Feme Herode n ka, “M koro ka na a fa Yohane Nyeme Nzue Biefo n tiiawa ma m perente nu kisa kisa.”

26 Feme n tiiri so ni, na i ahore asaaki agaya, ama, ndie n bo i taanri i jama n nyunu n dee ti, wo koro akaaki má i noo.

27 Kpenga na feme n asunma soja nmindafom n kun ka i ko fa Yohane tiiawa bra. Na wo ko akpie i tii dansaraka soo n nu do.

28 Na wo fa ada perente n nu aba ama sunguru ni, na yiri gusu afa ako ama i ni ni.

29 Sangha bo Yohane susufom tiiri so n na ba ba afa fuin n ako ase i.

Kabo Yesu maari nbiesom akpii nnu ni bu minem diire ni

30 Na jaramasam n akpie bu nyi aba i do, na ba kan sam kere bo ba yo i n akere i, ni kabo ba kan Nyeme jore akere mine barasu.

31 Jama n dee ti, ba nya má anyunkoro bo bu di diire. Nyini ti, na Yesu ase bu ka, “Am ma ya ko deke bo minem wo má, na am ko yi am nuni.”

32 Na bere ngumi afa lee ni na ba ko.

33 Bu yasu sukoni, na minem dongu anu bu, na ba si bu, na ba fite mie miem su anmati adu bu mo ako aju deke bo bu sukoni.

34 Sangha bo Yesu fiteeri lee n nu ni, na wo nu jama beberebe, na wo si bu anunfo, dama bu ti ka nbom bo bu la má sasafoo, na wo kere bu dekem beberebe.

35 Na sangha bo wie ba suto ni, na i susufom n aba i do aba ase i ka, “Kisa, wie suto, ya wo boro gusu wo lee.

36 Ma minem n atin na bu ko mie kunnu ni aheme aheme miem su na bu ko nya diire be to di.”

37 Ama, na Yesu ase bu ka, “Amberem mmoo ni am tii nya deke be ma bu na bu di.” Na ba se i ka, “Nzen a nga ya to kpono ma ahin jama n kere, ya di nwaa beberebe.”

³⁸ Na wɔ bisa bu ka, “Amberɛ la kpɔnɔ nye wɔ? Am nienie na am nie.” Na ba kɔ anie na ba bɔ i nu ka, “Kpɔnɔ nnu ni jombaa nnyɔ wo bere a.”

³⁹ Na Yesu ase i susufɔm n ka bu ma jama n tana asese asese wura fiefie-wa n su.

⁴⁰ Na ba tana asese asese yaa yaa ni aburunu nnu.

⁴¹ Na wɔ fa kpɔnɔ nnu ni, ni jombaa nnyɔ ni, na wɔ ye i tii su angoro, na wɔ da Nyeme asi. Na wɔ kpiekpie kpɔnɔ nnu n nu, na wɔ fa ama i susufɔm n ka bu fa ma minem ni, na wɔ fa jombaa nnyɔ n gusu akpaaki bu kere nu.

⁴² Na bu kere adi na bu kunnu ayi.

⁴³ Na ba tambu kpɔnɔ, ni jombaa sinsin bo bu diiri na i kaanri ni, na ba nya kandie buru ni nnyɔ.

⁴⁴ Minem bo bu diiri kpɔnɔ n ni jombaa n kere yasuuri nbiesom akpii nnu wɔ.

Kabo Yesu natiiri nzue su ni

⁴⁵ Nyini sin na Yesu ama i susufɔm n awura lee n nu na bu du i mɔ kpie kɔ Besayida mie nu kunma kpiri n buekun, na yiri aka na i kaari jama ni.

⁴⁶ I kaari bu wieeri ni, na wɔ fun akɔ buka n su ka i kɔ sere Nyeme.

⁴⁷ Saŋga bo ale ba saanri ni, lee n aju kunma kpiri n afien, na Yesu ŋgumi aka kunma kpiri n sin.

⁴⁸ Na wɔ ŋu ka i susufɔm n sudi wahara lee n kaanbiri, dama aŋuma sun bu kɔ bu sin wɔ. Na fa kɔ akɔnyuma ciciri su, na wɔ nati nzue n su suba bu dɔ, na wɔ yo ka i susin bu ŋu.

⁴⁹ Saŋga bo bu ŋuuri ka i nati nzue n su ni, na ba sunsun ka, ŋumi a, na ba bo awie.

⁵⁰ Bu kere ŋuuri i sɔ ni, na sere ati bu agaya. Kpenga na Yesu ajojo bu dɔ, na wɔ se bu ka, “Am ma am ahore si, mini a, má am soro sere.”

⁵¹ Na wɔ wura lee n nu, na aŋuma n atara. Na i susufɔm n kere ayo alekutura agaya.

⁵² Dama ba koro ati má i bu kabo i la yiko koro faari kpɔnɔ nnu maari jama beberebem ni, bu ahorembaa ti kekereke n dee ti.

Kabo Yesu ma tukpakifom beberebe nyaari laifie ni

⁵³ Na ba kpie nzue n aba aju awɔre n bo bu fere i ka Genesareti n nu, na ba minda lee n aheme.

⁵⁴ Bu fiteeri lee n nu kpenga ni, na minem n asi ka Yesu lee.

⁵⁵ Na ba ŋmati abara aye miem n kere su, na deke kere bo bu tiiri i ŋga, bu sɔ bu tukpakifom ni bu dasum kere ba i dɔ ɔ.

⁵⁶ Na nzen i kɔɔri aheme miem wara mie kunnu, deke kere bo i fa, bu fa bu tukpakifom ba i dɔ sɔ ɔ, na bu sere i jande ka i ma bu fa bu saa kan i tanlee n jaa bu. Na bo bu yoori sɔ n kere anya laifie.

7

Yudafom nana sayoowa jɔre

¹ Na Yudafom Nyeme noanie kerefom nbem bo bu fite Yerusalem mie kpiri n nu ni, ni Farasifom n aba atien bu noo Yesu dɔ.

² Na ba ŋu ka Yesu susufom n nbem sudi diire bu saa fin, ba ŋmisi má bu saa kabo bu nana sayoowa ti barasu ni.

³ Dama Farasifom ni Yudafom kere la bu saa ŋmisi sayoowa bo i ti bu nana sa a. Bu nya ŋa bu di diire, bu du mɔ yo nyini sa n wɔ ka, na bu nya di.

⁴ Nzen haari bu fiteeri gɔ ba juuri awuru, bu di má nenngem bo ba fa aba ni, má ka ba ŋmisi i ka, na bu yo bu nana sayoowa bo bu yo na bu

di ni. Bu sayoowam sunnu. Bu nbem la ka bu ηmisi awam ni dundum ni ayabam wɔ.

⁵ Na Farasifom ni, ni Yudafom Nyeme noanie kerefom n abisa Yesu ka, “Nzu ti ye u susufom n su má ya nam sayoowa n su, ye bu di diire bu saa fin a?”

⁶ Na Yesu ase bu ka, “Nahore ye Nyeme noanie kanfo Esaya yo kaanri am jore ka am ti burukonufom n a. Wɔ kere i kadasi n nu ka, Nyeme ηa o, ‘Ahin minem ni, bu ma m jirima bu noo nu bere wɔ, ama, i wo má bu ahore su.

⁷ Bu kansi m ηgbɛɛn wɔ, dama bu kere mine adamande dɛɛ kereewam wɔ, na bu se ka nyini kereewa n fite Nyeme do o.”

⁸ Na Yesu ase bu ka, “Am ace Nyeme noanie maawa n ase buekun, na am nya susu adamande dɛɛ sayoowam su.”

⁹ Na wɔ se bu bekun ka, “Am la nahore bo am akpie mbenle ayaki Nyeme noanie maawa n na am asu am dɛɛ sayoowam su ni.

¹⁰ Dama Moyisi ase ka, ‘Bu u si ni u ni.’ Na wɔ kaaki ase ka, ‘Soɔo kere bo i jɔjɔri i si, ni i ni jore tie, wɔ yo daka ka bu kun i mi.’

¹¹ Ama, ambere kere ka nzen soɔo be la deke be bo i ti ye ni ka i fa buka i si ni i ni, i koro se bu ka ‘I ti *Koroban* wɔ.’ I bu la ka, ‘Deke bo má m fa ma am ni, ma fa ayi saraka ama Nyeme.’

¹² Nyini sanɔa ni, am akere ka i mi n koro buka má i si n ni i ni n lee.

¹³ Nyini n kere ka am abu Nyeme dɛɛ noanie n ηgbɛɛn lee, ye am su am dɛɛ sayoowam n bo am kere bu n su a. Na am la ahin sayoowam donɔu bo am kaaki yo bu so o.”

Kabo Yesu ηa diire diiwa koro yo má soɔo fin ni

¹⁴ Na Yesu akaaki afere jama n aba i bi bekun, na wɔ se bu ka, “Am kere so am sui na am ti jore n bo m sujojo ma am n bu.

¹⁵ Deke bo i wura soɔo noo nu koro yo má i mi fin, ama, deke bo i fite i mi ahore su yo i mi fin a. [

¹⁶ Bo i koro ka i ti ahin jore n bu, i ti ye ni ka i so i sui na i ti.]”

¹⁷ Sanɔa bo Yesu ba cinsi yakiiri jama n na i wuraari awuru n nu ni, na i susufom n abisa i nyini anyunderɛ n bu.

¹⁸ Na wɔ se bu ka, “Nka ambere gusu ati má jore n bu lee? Ambere si má ka deke bo i wura soɔo noo nu koro yo má i fin,

¹⁹ dama deke bo soɔo di, i wura má i ahore su se i wura i kunnu wɔ, na i kaaki je yi i, má so?” Yesu afa ahin jɔjɔwa n akere ka diire be la má ciire.

²⁰ Na wɔ kaaki ase bu ka, “Deke bo i fite soɔo ahore su, nyini yo i fin a.

²¹ Dama deke bo i wo i ahore su ma i sunsunni tie a. I koro ma i nati suyo sakaraya, na i suwɔ, na i sukun mine,

²² na i susaaki ajaa ciire, na i nyunu suboro nenɔe kpini su, na i suyo satietiem, na i sudadaka minem, na i suyo sa ηgbɛɛnηgbɛɛn bo i cɛɛ wo má nu, na i susi kore, na i nati susaaki minem duma, na i la karambani, na i nati suyo sinnzinya sam.

²³ Nyini satie n kere mmoo nya fite soɔo ahore su, nyini ma i mi kaaki findifo a.”

Kabo bara bo i ti má Yudafɔ yoori Yesu yarada ni

²⁴ Na Yesu ayasu ako awore n bo i wo dodo Tiro ni Sidon mie kpirim ni, na wɔ ko awura awuru be nu benle ka má soɔo be ηu i. Ama, wɔ koro afie má i ηu.

²⁵ Na bara be ati i nga na wɔ ba ndende aba akutu i jaa bu. Ajini wo i wa baabara ɲu.

²⁶ Bara n ti má Yudafo, i ti Fonisiyafɔ ɔ, bo i fite Siriya awɔre n nu wɔ. Na wɔ sere Yesu jande ka i fon yi ajini n bo i wo i wa n ɲu ni.

²⁷ Na Yesu ase i ka, “Ma nbaatumam n du mɔ di na bu kunnu yi ka, dama i ti má ye ni ka a fa nbaatumam diire na a fa ma caam.”

²⁸ Ama, na bara n ase i ka, “M Mibie, a la nahɔre, ama, haari ni nyini mmɔɔ, caam n tambu nbaatumam n diire n bo bu di na i tɔtɔ asiɛngu n na bu fa di.”

²⁹ Na Yesu ase i ka, “U noanie jɔjɔwa n dɛɛ ti, kɔ awuru. Ajini n afite ayaki u wa ni.”

³⁰ Na wɔ kɔ awuru akɔ aɲu ka i wa n da i dasu su, ajini n afite ayaki i.

Kabo Yesu tuntunri asuturi be barasu ni

³¹ Na Yesu ayasu Tiro awɔre n nu akɔ aju Sidon mie kpiri n nu, na wɔ fa bere asin Mie Burum dɛɛ awɔre n nu, aba aju Galili kunma kpiri n nɔɔ su.

³² Na mine nbem afa sɔnɔ be aba Yesu dɔ, i ti asuturi wɔ, na i koro jɔjɔ má nyunyumi. Na ba sere Yesu jande ka i fa i saa nana i ɲu na i nya laifie.

³³ Na Yesu afa sɔnɔ n afite jama n nu, i ni yiri ɲgumi, na wɔ fa i saa marakam awura i suim nu, na wɔ yi nanzue aɔ i saa su afa akan sɔnɔ n taferema,

³⁴ na Yesu aye i tii su anie aɲgoro na wɔ ɲuundi, na wɔ se sɔnɔ n ka, “Efata.” Nyini la ka, “Teke.”

³⁵ Jina n nu bere, na sɔnɔ n sui n ateke, na i taferema n gusu akaaki anyanɲi nu, na wɔ koro ajɔjɔ nyunyumi.

³⁶ Na Yesu abɔbɔ bu ka má bu ma be ti ka wɔ tuntun sɔnɔ ni, ama, kabo i bɔbɔori bu barasu ni, bu boori ndoori n gusu sɔ ɔ bara yeeri a.

³⁷ Na mine ayo alekutura haari akɔ asin su, bu ɲa, “I sayoowa kere kaba ti kpa a. I ma asuturim ti asui wɔ, na bobom jɔjɔ.”

8

Kabo Yesu maari minem akpii nna diire ni

¹ Nyini sanɲa n na jama beberebe aba atien bu nɔɔ Yesu dɔ bekun, bu la má deke bo bu di, na wɔ fere i susufɔm ni, na wɔ se bu ka,

² “Ahin jama n la m aɲunfo, dama i nyuma lesan lɛɛ bo bu wo m dɔ na bu la má deke bo bu di.

³ M koro yaki má bu na bu kɔ awuru ni ahɔɛ, má nyini, bu tɔ cin atin nu wɔ, dama bu nbem fite dede.”

⁴ Na i susufɔm n ase i ka, “Ye nifansu ye ya koro nya diire ahin boro n nu fen ma ahin minem n kere na bu kunnu yi a?”

⁵ Na wɔ bisa bu ka, “Am la kpɔnɔ nye wɔ?” Na ba bɔ i nu ka, “Nso.”

⁶ Na wɔ ma jamam n nɔɔ ka bu tana asiɛngu, na wɔ fa kpɔnɔ nso n na wɔ da Nyeme asi. Na wɔ kpiekpie i nu ama i susufɔm n ka bu fa ma jama ni. Na bere gusu afa akpakpaaki bu nu.

⁷ Bu la jombaa kan kan nbem gusu, na wɔ fa ada Nyeme asi, na wɔ fa ama i susufɔm n ka bu fa nyini n gusu ma jama ni.

⁸ Bu diiri na bu kunnu ayi. Na i susufɔm n atambu sinsin kaawa n kandie nso.

⁹ Jama ni ju akpii nna dika. Na Yesu anya akaari bu na ba kɔ awuru.

¹⁰ Na i ni i susufɔm n awura lee akɔ Damanuta dɛɛ awɔre n nu.

Kabo Farasifɔm koroori ka Yesu yo alekutura sa na i keteeri ni

11 Na Farasifo nbem aba i do, na ba se akuruwa ni Yesu. Bu koorori ka i yo alekutura sa be bo i kere ka i yiko n fite Nyeme do o, adena bu nya i ngee soobiri.

12 Na wo nuundi ni dimi i ahore su, na wo se ka, "Nzu ti ye ambere nyumafom koro ka m yo alekutura sa na am nu i a? M suse am nahore wo lee ka, m yo ma alekutura sa ma ma ambere nyumafom fuu."

13 Na wo yasu ayaki bu, na wo wura lee n nu akpie ako kunma n buekun do.

Bobowa fa ko Farasifom ni Feme Herode kereewam n su

14 Na i susufom n wara afi diire sa, ba bita ma pui, ma ka kpono kun n kpein woori lee n nu a.

15 Na Yesu atu bu fo, i na, "Am si am nu sa ni Farasifom, ni Feme Herode dee kpono ayiri n bo bu fa go kpono n nu na i yasu ni."

16 Na ba joko bu nu nu ka, "Ya la ma kpono n ti, ye i su se so n a."

17 Na Yesu afa nu kabo i susufom n sujoko bu nu nu ni, na wo bisa bu ka, "Nzu ti ye am sujoko ka am bita ma kpono a? Am nya si ma deke bo m sujoko i ni, am nya ti ma sa n bu? Am ahorembaa ti kekereke wanla.

18 I baari se ye am la anyumbaa na am nu ma asi a? Ye am la asui na am ti ma? Am tenge ma su ka

19 m yo faari kpono nnu kpiekpie maari mine akpii nnu? Ye bo i kaari ni, kandie nye ye am sasaari a?" Na ba bo i nu ka, "Kandie buru ni nnyo."

20 Na Yesu akaaki abisa bu bekun ka, "Ye kpono nso n bo m yo fa kpiekpie maari mine akpii nna n di? Sinsin kandie nye ye am sasaari a?" Na ba bo i nu ka, "Kandie nso."

21 Na wo se bu ka, "Haari ni kisa, am nya ti ma i bu?"

Kabo Yesu tuntuunri anyinsin be na i nuuri asi ni

22 Bu ko juuri Besayida mie n nu, na mine nbem afa anyinsin be aba Yesu do, na ba sere i jande ka i fa i saa nana i nu na i nya laifie.

23 Na wo so sono n saa nu afa i afite mie n nu, na wo yi nanzue ago i nyumbaa n nu. Na wo fa i saa anana i nu, na wo bisa i ka, "A nie, a nu deke be e?"

24 Na anyinsin n aye i tii su anie, na wo se Yesu ka, "M nu minem ka bu nati, ama, bu ti ka bakam wo."

25 Na Yesu akaaki afa i saa anana i nyumbaa n su bekun, na anyinsin n anie gbirim, na wo nu ka i nyumbaam n ateke, na wo nu deke kere casi.

26 Na Yesu ase i ka, "To atin nu ko awuru, na ma a se ka a fa mie n nu."

Kabo Petoro kereeri ka Yesu ti barasu ni

27 Na Yesu ni i susufom n ayasu ka bu ko Sizariya Filipu mie kan kanm su. Bu wo natiiri su ni, na wo bisa i susufom n ka, "Minem fa m bu nma a?"

28 Na ba bo i nu ka, "Bu na woro ti Yohane Nyeme Nzue Biefo n a, nbem na woro ti Nyeme noanie kanfo Eliya a, ye nbem gusu na a ti dawa dee Nyeme noanie kanfo nyingam n kun wo."

29 Na wo bisa bu bekun ka, "Ye ambere fa m bu nma a?" Na Petoro abo i nu ka, "Woro ti Kristo n a, Tiidefo n bo Nyeme ase ka i sunma i ni."

30 Na Yesu abobo bu ka ma bu ma be si ka yiri ti Kristo Tiidefo n a.

Kabo Yesu joko fa kori i yiwee n su ni

31 Nyini sin na wo bo i bu sukere i susufom n ka, "Wo yo daka ka mini Adamande Wa n di wahara dongu, na Yudafo nkpienkpienm, ni Nyeme sayoowa donguyofa nkpienkpienm, ni Nyeme noanie kerefo kere ba kete m nu na bu kun m. Ama, lesan cen sin na m tenge m yiwee n nu."

³² Na wɔ kan sa n kere bu kpain akere bu. Na Petoro afa i akɔ aheme, na wɔ jaraki i ase i ka, “Má a se ka a kan nyini jɔre ni.”

³³ Ama, na Yesu ace anie i susufom ni, na wɔ tien Petoro ɲu ase i ka, “Sitana, fa cinsi m bi bere. A sunsun má kabo Nyeme koro ni. A sunsun kabo adamande koro n wɔ.”

Kabo Yesu jɔɔ fa kɔɔri kabo minem su i su ni

³⁴ Na Yesu afere jama n ni i susufom n na wɔ se bu ka, “Sɔnɔ kere bo i koro ka i su m su, wɔ yo daka ka i mi wara fi i tienɲu sa koroowa sa, na i fa i yiwee baka jaanu n sɔ, na i su m su.

³⁵ Dama sɔnɔ kere bo i koro ka i fa i ɲɔɔ fie, i mi bá fun i. Ama, sɔnɔ kere bo i tɔɔri i ɲɔɔ mini ni m deɛ labari kpa n deɛ ti, i mi nyá ɲɔɔ.

³⁶ Nzen sɔnɔ nyaari durunya n nu deke n kere na i fuunri i ɲɔɔ, i kperɛ la bɔnɔ?

³⁷ Nzu deke ye sɔnɔ koro fa kaaki i ɲɔɔ a?

³⁸ Nyumafom ti satieyofom wɔ, bo bu su má Nyeme. Amberɛ bo am wo bu nu, na nyinse ti am fa kɔ mini ni m noanie n deɛ ti ni, so ye nyinse tí mini Adamande Wa n gusu fa kɔ am su, sanɲa bo m bá ba ni m Si Nyeme jirima woowa n nu, ni i mereke casim ni.”

9

¹ Na wɔ se bu ka, “Nahore ye m suse am n a, am nbem wo nu fen bo am wú má, má ka am aba anu ka Nyeme femɛya n aba ni yiko.”

Kabo Yesu ɲunie kaakiiri wo barasu ni

² Lesen cɛɛn sin na Yesu afa Petoro ni Yakobo ni Yohane afun buka lenlenge be su, bu ni yiri ɲgumi. Bu wo do n na ba ɲu ka i ɲunie akaaki wo,

³ na i tanlee n akaaki fofoe papasi bo i ɲusu nya má durunya n nu.

⁴ Do na mine nnyɔ nbem atie bu ɲu, na bu ni Yesu subo anzama. Bere la Eliya ni Moyisi, dawa deɛ Nyeme noanie kanfom ni.

⁵⁻⁶ Na sere ati Petoro ni susufo nyingam ni, na Petoro ajimi agaya na i nɔɔ afinfin i. Nyini ti na wɔ se Yesu ka, “Ya Kerefɔ, i ti kpa ka ya wo fen. Ma ya bo nambue nsan, u deɛ kun, Moyisi deɛ kun, na Eliya gusu deɛ kun.”

⁷ Na yinyingɲu akata bu ɲu, na ba ti akonvi be ɲga yinyingɲu n nu, na wɔ jɔɔ bu do. I ɲa, “M wa koroowa lee. Am de i noanie.”

⁸ Bu tiiri jɔɔɔwa n sɔ ni, kpenɲa na ba nienie abara aye, ama, ba ɲu má sɔnɔ be kun, má ka Yesu ɲgumi wo bu do a.

⁹ Na sanɲa bo bu ba sujura buka n su ni, na Yesu abobo bu ka, “Má am be se ka i bo sa n bo am anu i n su fa kere sɔnɔ be, haari fa kɔ sanɲa bo mini Adamande Wa ni bá wu na m tɛnge m yiwee n nu ka.”

¹⁰ Na ba de i noanie ni, ama, na ba bakati abisa bu ɲuɲu nu ka, “Ye nzu la ka, i bá wu na i tɛnge i yiwee n nu a?”

¹¹ Na ba bisa Yesu ka, “Ye nzu ti ye Nyeme noanie kerefom n bita jɔɔ ka Eliya dú mɔ ba ka, ye Kristo Tiidefo ni bá ba n a?”

¹² Na wɔ bo bu nu ka, “I ti nahore wɔ ka Eliya dú mɔ ba na i bá sese deke n kere su. Bu kerɛri se Nyeme Jore Kadasi n nu fa kɔ Adamande Wa n do a? Ba kere ka i bá di wahara agaya, na mine bú i ɲgbɛɛn.

¹³ Ama, m suse am wɔ lee, ka, Eliya adu mɔ aba, na minem ayo i kabo bu koro, kabo ba kere i Nyeme Jore Kadasi n nu lee.”

Kabo Yesu fon yiiri ajini fiteeri baa be ɲu ni

¹⁴ Saŋga bo Yesu ni i susufɔ nsanm ni kpieeri bu nyi ba juuri i susufɔ nyingam bi ni, na ba ŋu ka jama beberebe atien bu nɔɔ abara aye bu. Ye Nyeme nɔanɛ kerefɔm n nbem bita bu ni akuruwa.

¹⁵ Jama n ŋuuri Yesu sɔ ni, na ba yo alekutura, na ba bo nu aŋmati akpa i atin ayo i anse.

¹⁶ Na wɔ bisa bu ka, “Am se nzu akuruwa a?”

¹⁷ Sɔnɔ be woori jama n nu na wɔ bɔ i nu ka, “Ya Kerefɔ, ma fa m wa baabiesɔ aba u dɔ ka a tuntun i ma m, dama ajini bobom wo i ŋu.

¹⁸ Saŋga kere bo ajini n anya aba afa i, a ŋu ka wɔ fa i abo asiɛngu, na i nanzue sufite fufuku, na i sukpeɛ i jee, na i kese i ŋu. Ma sere u susufɔm n ka bu fɔn yi ajini ni, ama, ba kura má nu.”

¹⁹ Na Yesu ase bu ka, “Amaa. Amberɛ nyumafɔm, am la má yarada fieo. Nyuma sa ye m wo am dɔ fɛn a? Ye m yó sawɔre ni amberɛ kɔ ju se wɔ? Am fa baa n ba ma m.”

²⁰ Na ba fa baa ni aba i dɔ, na saŋga bo ajini n ŋuuri Yesu ni, kpeŋga na wɔ kpisi baa ni, na wɔ fa i abo asiɛngu, na wɔ da sukundu, na nanzue fufuku sufite i nɔɔ nu.

²¹ Na Yesu abisa i si n ka, “Saŋga bonɔ ye tukpaki n taraari i a?” Na si n abɔ i nu ka, “I kaan nu kere a.

²² Saŋga kere bo i nya ba yasu i ŋu, i fa i wura sin nu wɔ, wara nzue nu ka i kun i. Nyini ti, nzen a koro buka ya, si ya aŋunfɔ na a buka ya.”

²³ Na Yesu ase i ka, “Nzu ti ye a ŋa nzen m koro buka u a? Deke be ti má kekereke ma má minem bo bu yo Nyeme yarada ni.”

²⁴ Kpeŋga na baa n si asa Yesu nɔɔ su ka, “Ma yo yarada, ama, i sunnu má. Buka m na i sunnu.”

²⁵ Na Yesu aŋu ka jama n suŋmati ba i dɔ, na wɔ tien ajini n ŋu, i ŋa, “Wɔrɔ ajini n bo a ma baa n ayo bobo ni asuturi ni, mini suse u ka a fite yaki i a, na má a kpie u nyi ba i dɔ kun.”

²⁶ Kpeŋga na wɔ ciindi na wɔ kpisi baa n agaya, na wɔ fite ayaki i, na baa n aka ada ka wɔ wu dɛɛ su. Na minem n dɔŋgu ase ka wɔ wu wɔ.

²⁷ Ama, na Yesu atara i saa aye i su, na wɔ jina.

²⁸ Yesu ba wuraari awuru n nu ni, na i susufɔm n aba i dɔ, bere ŋgumi, abisa i ka, “Nzu ti ye yere akoro afɔn má nyini ajini n a?”

²⁹ Na wɔ bɔ bu nu ka, “Be koro fɔn má nyini ajini n ŋusu sɔ, má ka nyemesere.”

Kabo Yesu jɔjɔ fa kɔɔri i yiwee n su bekun ni

³⁰ Na Yesu ni i susufɔm n ayasu bere ako asin Galili awɔre n nu. Wɔ koro má ka be si i woobiri,

³¹ dama i sukere i susufɔm wɔ. Na wɔ se bu ka, “Bu bá tɔ mini Adamande Wa n ma mine nbem na bu kún m, ama, bu kuunri m wieeri, i lesan cɛɛn sin, na m téŋge m yiwee n nu.”

³² I jɔjɔri sɔ ni, i susufɔm n ati má i bu, ama, sere dɛɛ ti, ba koro abisa má i jɔre be.

Kabo Yesu kereeri sɔnɔ bo i tara bu kere ni

³³ Na ba kɔ aju Kapenam miɛ kpiri n nu, na saŋga bo bu wo awuru n nu ni, na Yesu abisa i susufɔm n ka, “Am wo atin n nu suba ni, am se nzu akuruwa a?”

³⁴ Ama, na bu kere atɔ amuna, dama bu wo atin n nu dɔ ni, na ba se akuruwa bu ŋuŋu nu fa kɔ sɔnɔ bo i tara bu kere bu nu.

³⁵ Na wɔ tana, na wɔ fere bere i susufɔ buru ni nnyɔm ni, na wɔ se bu ka, “Sɔnɔ kere bo i koro ka i kaaki mɔfɔ, wɔ yo daka ka i mi yo i ŋu kaan tara am kere na i kaaki yo am kere dɛɛ amusuisufɔ.”

³⁶ Na wɔ fa baa kaan be aba ajina bu afien, na wɔ biti i, na wɔ se bu ka,
³⁷ “Wɔrɔ kere bo ade ahin baakan n nusu m dɛɛ ti, a deeri mini wɔ lɛɛ.
 Bekun, wɔrɔ kere gusu bo a nya deeri mini, a de m Si Nyemɛ bo i sunmaari
 m wɔ lɛɛ.”

Kabo Yesu na bo i fite má i sin, jina i sin ni

³⁸ Na Yohane ase i ka, “Ya Kerefɔ, ya njuuri ka sɔnɔ be afa u duma sufa
 fɔn yi ajinim fite minem nju, ye ya na ya yaki má i, dama i wo má ya nu n
 dɛɛ ti.”

³⁹ Na Yesu ase ka, “Má am se ka am kanda i, dama sɔnɔ kere bo i nya
 sufa m duma n yo alekutura sam, i mi bá koro kaaki jɔjɔ má jɔrɛ tie fa kɔ
 m dɔ.”

⁴⁰ Dama sɔnɔ kere bo i fite má ya sin, i mi jina ya sin wɔ lɛɛ.

⁴¹ M suse am nahɔrɛ wɔ lɛɛ, ka sɔnɔ kere bo i maari am nzue ka am nu
 dama am su mini dɛɛ ti, i mi nyá i nkato.”

Kabo wɔ yo daka ka má sɔnɔ wura satie nu ni

⁴² Na Yesu akaaki ase bu ka, “Wɔrɔ kere bo u sayoowa ma ahin nbaatuma
 kan kanm n be bo i yo m yarada n be wuraari satie nu, i ti má kpa. Nzen
 má bu faari ngani san yabusɛ bambaka ciciiri u kɔm, na bu fa u kɔ tu tieku
 nu, i ti ye tara bo a ma ahin nbaatuma kan kanm n be wura satie nu ni.

⁴³⁻⁴⁴ Nzen u saa n be cin u wura satie nu a, kaba kpɛ i na a ka asaasin,
 na a nyá u nju kɔ Nyemɛ dɔ. I ti ye ni bo a la u saa nnyɔ n kere na a wura
 cɛɛma sin n bo i nɔ má n nu.

⁴⁵⁻⁴⁶ Nzen u jaa n be cin u wura satie nu a, kaba kpɛ i na a ka ajaasin,
 na a nyá u nju kɔ Nyemɛ dɔ. I ti ye ni bo a la u jaa nnyɔ n kere na bu ba
 fa u tu cɛɛma sin nu.

⁴⁷ Nzen u nyumbaa kun gusu cin u wura satie nu a, lokoti yi i tu, na a ka
 anyunu kun, na a wura Nyemɛ femɛya n nu. I ti ye ni bo a la u nyumbaa
 n nnyɔ n kere na bu ba fa u tu cɛɛma sin nu.

⁴⁸ Dɔ dɛɛ kakabam ni bo bu wura mine bo ba wu ni, bere wu má cɛɛn
 be, na sin n gusu bo i je nɔ má.

⁴⁹ Kabo bu fa njin nyina saraka nenje kere su fa ma Nyemɛ, na i yo casi
 barasu ni, so ye Nyemɛ cín sɔnɔ kere sui na i yó casi.

⁵⁰ Ya si ka njin yo fie, ama, nzen i fiefie nya ba saari wieeri, i koro yo
 má fiefie kun. Am ma am wo yo fie ka njin am bengɔ nu, na am wo ni
 tanalaifie.”

10

Kabo Yesu kereeri minem fa kɔ ajaa ni ajaa yaki atin su ni

¹ Yesu yasuuri Kapenam miɛ kpɛri n nu, na wɔ kɔ Yudiya dɛɛ awɔrɛ n nu,
 na wɔ kpɛi akɔ Yodan kunma n buekun dɔ fan, na jama beberebe ayandi
 aba atien bu nɔɔ i dɔ. Na wɔ kere bu kabo sangɔ kere na i kere bu barasu
 ni.

² Na Farasifo nbem aba i dɔ ka bu sɔ i ngeɛ fa kɔ i nɔanie n jɔjɔɔwa su,
 na ba bisa i ka, “Ya dɛɛ atin n su, atin wo nu ka sɔnɔ koro fa i yi ji i?”

³ Na Yesu abɔ bu nu ka, “Nɔanie maawa bɔnɔ ye Moyisi yo fa maari
 am a?”

⁴ Na ba bɔ i nu ka, “Moyisi yo maari atin ka nzen sɔnɔ koro ka i fa i yi
 ji, i ti ye ni ka i mi ma bara n ajaa yaki kadasi ka, na i nya fa i ji.”

⁵ Na Yesu ase bu ka, “Am ahorembaa kekereke n dɛɛ ti ye Moyisi yo
 kereeri nyini nɔanie maawa n maari am a.

⁶ Ba kere i Nyemɛ Jɔrɛ Kadasi n nu ka fite durunya n bumboori, ‘Nyemɛ
 yiiri biesɔ ni bara a.’

⁷ Na wɔ se ka, 'Nyini dɛɛ ti, i ti ye ni ka biɛsɔ n kpaaki i gisan yaki i si ni i ni, na i ni i yi saŋga wo.

⁸ Nyini saŋga bu minɛ nnyɔ n ayo deke kun lɛɛ.' Bu wo má bu ngungumi kun.

⁹ Nyini ti, deke bo Nyɛmɛ anya asaŋga i awie, má sɔnɔ kpaaki i nu kun."

¹⁰ Saŋga bo Yesu ni i susufɔm ba juuri awuru ni, na ba bisa i nyini nɔanie n bu.

¹¹ Na wɔ se bu ka, "Sɔnɔ kɛɛ bo i faari i yi jiiri, na i jaari bara fɔfɔɛ, i mi n asaaki ajaa ciire ni i yi n bo wɔ fa i aji n lɛɛ.

¹² Sasu bekun, bara kɛɛ bo i yakiiri i hun ajaa, na i kɔ jaari biɛsɔ fɔfɔɛ, nyini bara n gusu asaaki ajaa ciire lɛɛ."

Kabo Yesu yoori nbaatumam kisi ni

¹³ Minɛm sufa bu nbaam ba Yesu dɔ ka i fa i saa nana bu ŋu na i yo bu kisi, ama, na i susufɔm n atien bu ŋu.

¹⁴ Yesu ŋuuri i susufɔm sayoowa n sɔ ni, na yaa ati i, na wɔ se bu ka, "Am ma nbaatumam n bra m dɔ, má am fɔn bu. Dama bɛɛ ŋusu sɔ ye Nyɛmɛ fɛmɛya n ti bu dɛɛ a.

¹⁵ Nahɔɛ ye m suse am n a, wɔɔ kɛɛ bo a de má Nyɛmɛ fɛmɛya n nu jɔɛ kabo baatuma de deke i saa nnyɔ ni, a wúra má Nyɛmɛ fɛmɛya n nu."

¹⁶ Na wɔ kuku nbaatumam ni i saa nu, na wɔ fa i saa anana bu ŋu, na wɔ yo bu kisi.

Nenɛfɔ n ni nyɛmɛsu jɔɛ

¹⁷ Nyini sin na Yesu ayasu dɔ sukɔ. I wo kɔ n su ni, na sɔnɔ be aŋmati aba akutu i nyunu, na wɔ bisa i ka, "Ya Kerefɔ sɔnɔ kpa, m yó sɛ ye m bá nya ŋɔɔ n bo i la má awieeri n a?"

¹⁸ Na Yesu abɔ i nu ka, "Nzu ti ye a fere m ka sɔnɔ kpa a? Be ti má kpa sin Nyɛmɛ ŋu.

¹⁹ Ye m ŋa a si Nyɛmɛ nɔanie maawam ni e, bu ŋa, 'Má a kun sɔnɔ. Má a saaki ajaa ciire. Má a wɔ. Má a di kɔɛ daani. Má a sisi sɔnɔ. Bu u si ni u ni.' "

²⁰ Na sɔnɔ n abɔ i nu ka, "Ya Kerefɔ, ma su nyini nɔanie maawa n kɛɛ su haari m kaan nu."

²¹ Na Yesu anie sɔnɔ n na wɔ koro i agaya, na wɔ se i ka, "Deke kun ye wɔ kpiɛ u su a. Kɔ na a kɔ tɔ u aja kɛɛ, na a fa ŋwaa n ma yaarifɔm, na a bá nya ajɛkɛ Nyɛmɛ dɔ, na a bra ba su m su."

²² Yesu seeri i sɔ n na i ŋunie ayɔɔkɛ i. Na wɔ kɔ awuru ni ahoresaaki, dama i la nenɛ agaya n dɛɛ ti.

²³ Na Yesu anie i susufɔm n abara ayɛ, na wɔ se bu ka, "I yó kekereke bo nenɛfɔ wura Nyɛmɛ fɛmɛya n nu."

²⁴ Na i susufɔm n ayo alekutura ni nyini jɔjɔwa ni. Ama, na Yesu ase bu bekun ka, "Njam, i ti kekereke ka nenɛfɔm wura Nyɛmɛ fɛmɛya n nu.

²⁵ Kabo nyɔɔma sin misini bue nu ni, i ti má kekereke tara má kabo nenɛfɔ yo na i wura Nyɛmɛ fɛmɛya n nu ni."

²⁶ Na i susufɔm n amie akɔ asin su, na ba bisa bu ŋuŋu nu ka, "Ye nzen i ti sɔ e, ŋma koro fite nu a?"

²⁷ Na Yesu anie bu dɔ na wɔ se ka, "I ti deke bo adamande koro yo má i, ama, Nyɛmɛ dɔ, i ti má pui, dama Nyɛmɛ koro yo deke kɛɛ."

²⁸ Na Pɛtoro ase i ka, "Tɔ, ye yɛɛ ayaki deke kɛɛ susu u su e."

²⁹ Na Yesu ase ka, "Nahɔɛ ye m suse am n a, sɔnɔ kɛɛ bo i yakiiri i awuru, wara i ninbaam, wara i ni, wara i si, wara i nbaam, wara i asien, mini ni m labari kpa n dɛɛ ti,

³⁰ i mi nyá nyinim sɔ ɲusu yaa i ɲɔɔ su. I nyá awurum, ni ninbaam, ni nim, ni nbaam, ni asienm, na minem má i di wahara, na fa kɔ fa ba i nyá ɲɔɔ bo i la má awieeri.

³¹ Ama, mine dɔɲgu bo bu wo mɔ kisa ni bá ka sin, na bo bu ka sin kisa n bá du mɔ.”

Kabo Yesu jɔɔ fa kɔɔri i yiwee n su kpe nsan su ni

³² Saɲga bo Yesu ni i susufɔm suko Yerusalem mie kpiri n nu ni, na Yesu adu bu mɔ sunati, na i susufɔm n ajimi, na sere ati minem bo bu suuri i su ni, na wɔ kaaki afere i susufɔ buru ni nnyɔm n akɔ aheme, na wɔ jɔɔ bu dɔ bekun fa kɔ sa n bo i bá tu i ni.

³³ I ɲa, “Am ti fɛn. Ya suko Yerusalem lee, dɔ ye bu kó tara mini Adamande Wa n a, na bu fá m ma Nyeme sayoowa dɔɲguyofɔ nkpienkpienm ni, ni Nyeme noanie kerefɔm ni, na bu dí m jɔɔɛ, na bu sóro su ka bu kún m. Na bere gusu nyá fa m wura minem bo bu ti má Yudafɔm saa nu,

³⁴ na bu yó m anzasi, na bu yí nanzue gɔ m ɲu, na bu fín m ɲgbere, na bu nyá kun m, na i lesan cɛen sin, na m tɛnge m yiwee n nu.”

Kabo Yesu kereeri ka mɔfɔ yo i ɲu kaan ni

³⁵ Na Zɛbedi nbaam Yakobo ni Yohane aba Yesu dɔ aba ase i ka, “Ya Kerefɔ, ya koro ka deke kere bo ya sere u, a yo i ma ya.”

³⁶ Na wɔ bisa bu ka, “Am koro ka m yo nzu ma am a?”

³⁷ Na ba se i ka, “Saɲga bo a bá tana u jirima tanaabiri ni, ya koro ka a ma ya kun tana u saa fɔmbɔɔ su, na kun gusu tana u saa bie su.”

³⁸ Na Yesu ase bu ka, “Am si má deke n bo am susere i n ti a. Am kóro di wahara n bo m dí i ni, am káaki koro wu yiwee n bo m wú i ni, nzen se?”

³⁹ Na ba bɔ i nu ka, “Eɛn, ya kóro yo i kere.” Na Yesu ase bu ka, “Nahɔɔɛ. Am dí wahara n bo m dí i ni, na am káaki wu yiwee n bo m wú i ni.

⁴⁰ Ama, mini la má atin bo m má am be tana m fɔmbɔɔ su, na be tana m bie su. Ama, Nyeme asese nyini tanaabiri n su, afa ase ama minem bo yiri ni i tii ayi bu n a.”

⁴¹ Saɲga bo i susufɔ burum ni tiiri kabo Yakobo ni Yohane n seeri Yesu ni, na ba fa yaa bu ɲu.

⁴² Na Yesu afere bu kere aba i bi, na wɔ se bu ka, “Am si tenle su ka minem bo bu su má Nyeme n na bu yo bu ɲu nkpienkpienm ni, bere mie bu minem a, na bu tereterefɔm gusu kere kabo bu yiko ti barasu.

⁴³ Ama, wɔ ti má ye ni ka ambere yo sɔ. Nzen sɔnɔ be koro ka i wura i ɲu kpiri am kere nu, i ti ye ni ka i mi yo i ɲu kaan, na i su am.

⁴⁴ Na bo i kaaki koro ka i yo am mɔfɔ, i ti ye ni ka i mi yo am kere akɔɔ.

⁴⁵ Dama mini Adamande Wa n ni m tii aba má ka minem su m wɔ, ama, m baari ka m ba su minem wɔ, na m wu ma bu, na m de minem dɔɲgu tii ji.”

Kabo Yesu tuntuunri anyinsin be na i ɲuuri asi ni

⁴⁶ Na ba kɔ aju mie kpiri n bo bu fere i ka Yeriko ni. Saɲga bo Yesu ni i susufɔm, ni jama beberebe n sufite mie n nu ni, anyinsin be tana atin n nɔɔ wo sere su. Bu fere i ka Batimeyo, Timeyo dɛɛ wa.

⁴⁷ I tiiri ka Yesu Nazaretifɔ ni susin ni, na wɔ tien afere i, i ɲa, “Yesu, Feme Davidi anuma, si m aɲunfɔ.”

⁴⁸ Na jama n atien i ɲu ka i yaki naɲmie. Ama, na wɔ kaaki atien kpa abuka su ka, “Feme Davidi anuma, si m aɲunfɔ.”

⁴⁹ Na Yesu aka ajina, na wɔ se bu ka, “Am fere i ma m.” Na ba fere anyinsin ni, na ba se i ka, “Ma u ahore si na a yasu, i fere u.”

⁵⁰ Na wɔ fikindi i zaba n atu, na wɔ warakpin, na wɔ ηmati akɔ Yesu dɔ.

⁵¹ I kɔ juuri dɔ n na Yesu abisa i ka, “A koro ka m yo nzu ma u a?” Na anyinsin n abɔ i nu ka, “Ya Kerefɔ, m koro ka a ma m ηu asi wɔ.”

⁵² Na Yesu ase i ka, “Kɔ. Yarada n bo a yo m ni, nyini ma a nya laifɛ a.” Kpɛnga na wɔ kaba aɲu asi, na wɔ su i su akɔ.

11

Kabo Yesu wuraari Yerusalem ka femɛ dɛɛ su ni

¹ Bu kɔ ηa bu dodo Yerusalem miɛ kpiri n nu, na bu ηa bu wura miɛm bo bu fere bu ka Befage ni Betani n ni, nyini miɛm n dodo buka n bo bu fere i ka Oliva Buka n wɔ, dama oliva bakam gɔ su wɔ. Dɔ na Yesu asunma i susufɔm n nu nnyɔ,

² na wɔ se bu ka, “Am kɔ miɛ kaan n bo i wo am nyunu dɔ ni, am kɔ ηa am wura miɛ n nu, am ηú ka kaakobaa be minda, be nya fun má i. Am nyaŋgi i bra.

³ Nzen be bisaari am ka nzu ti ye am sunyaŋgi i a, am se i ka am Mibiɛ ni koro i a, ama, i má am kaaki fa i kpie i nyi ba kisa kisa.”

⁴ Na ba kɔ, na ba kɔ aɲu ka kaakobaa n minda anɔ be nu atɛgbere n su, na ba nyaŋgi i.

⁵ Na mine n bo bu jina dɔ n abisa bu ka, “Am suyo nzu lɛɛ, am sunyaŋgi kaakobaa n kɔ ni wɔ?”

⁶ Na ba se minɛm n kabo Yesu seeri bu ni, na ba ma bu atin.

⁷ Na ba fa kaakobaa n aba Yesu dɔ, na ba fa bu suturam anana kaakobaa n ηu, na Yesu afun atana su.

⁸ Na mine beberebe afa bu suturam atɛrɛki ase atin n nu, na nbem gusu abubu nyawa asese atin n nu.

⁹ Na bo bu du i nyunu n ni bo bu wo i sin n kɛɛ subo kuyigindi, bu ηa, “Hosana. Ya kansɪ Nyɛmɛ.

Tɛrɛfɛ wo yiri n bo i suba Micɛra n dɛɛ duma n nu n dɔ.

¹⁰ Tɛrɛfɛ wo ya si Davidi femɛya n bo i suba n dɔ. Ya kansɪ Nyɛmɛ bo i wo aŋgoro ni.”

¹¹ Na Yesu awura Yerusalem miɛ kpiri n nu, na wɔ kɔ Nyɛmɛ Sereebiri Awuru n nu. I kɔ juuri dɔ na wɔ niɛ abara aye deke n kɛɛ. Nyini saŋga wiɛ atɔ, nyini ti, na i ni i susufɔ buru ni nnyɔm n akpie bu nyi akɔ Betani.

Kabo Yesu yoori damba baka be ηgbɛɛn ni

¹² Na i alecin na ba yasu Betani miɛ n nu sukɔ, na ahɔɛ ati Yesu.

¹³ Na wɔ niɛ aɲu damba baka be ni i nyawa, ka i wo dede, na wɔ kɔ anie ka i nyá suuwa n be di. Saŋga bo i kɔ juuri baka n bu ni, wɔ ηu má pui su, baka n jina ni nyawa ηgumi wɔ, dama nyini saŋga n ti má damba su saŋga.

¹⁴ Na wɔ se baka n ka, “Sin nyuma sin, sɔnɔ di má u suuwa kun.” I seeri sɔ n na i susufɔm n ati.

Kabo Yesu fɔɔnri watafɔm fiteeri Nyɛmɛ Sereebiri Awuru n nu ni

¹⁵ Saŋga bo Yesu ni i susufɔm kɔ juuri Yerusalem miɛ kpiri n nu ni, na wɔ kɔ awura Nyɛmɛ Sereebiri Awuru n nu, na wɔ fɔn nenɛge tɔfɔm ni tɔfɔm kɛɛ afite awuru n nu, na wɔ kaaki ηwaa kaakifɔm n teebirim n ni tiwa tɔfɔm n biɛm kɛɛ alanlaŋga.

¹⁶ Wɔ soro má su na be sɔ sɔɔri nati sin Nyɛmɛ Sereebiri Awuru n nu.

¹⁷ Na wɔ kere minem ka, “Ba kere i Nyeme Jɔre Kadasi n nu ka, Nyeme ɲa o, ‘M awuru ni, bu bá fere i ka awuru n bo bu bá sere Nyeme n nu fa ma durunya n nufɔm kere wɔ.’ Ama, amɛere afa i ayo finfɔm woobiri.”

¹⁸ Nyeme sayoowa dɔɲguyofɔ nkpienkpienm n ni Nyeme nɔaniɛ kerefɔm n tiiri sa n bo Yesu yoori i ni, na ba kpini atin kabo bu yó na bu kún i, dama ba soro i. Deke bo i ti na bu soroori i n la ka, mine dɔɲgu tiiri i kereewa n na ba yo alekutura.

¹⁹ Nyini cɛen n naaso, na Yesu ni i susufɔm n afite miɛ n nu.

Kabo Yesu seeri ya ka ya yo Nyeme yarada ni

²⁰ Alecin ɲgarama bu ba susin sukɔ na ba ɲu ka damba baka n awu ako akpura haari i bunlui.

²¹ Na Petoro atenge su kabo Yesu seeri baka n ni, na wɔ se i ka, “Ya Kerefɔ, niɛ. Damba baka n bo anuma na a jɔjɔ gɔɔri i ɲu ni, wɔ wu.”

²² Na Yesu ase bu ka, “Am yo Nyeme yarada.

²³ Nahɔre ye m suse am n a, wɔwɔ kere bo a se ahin buka n ka, ‘Yasu kɔ to tieku n nu,’ na a yo má sika na a yo yarada ka deke n bo a seeri i ni, i yó, Nyeme yó i ma u.

²⁴ Nyini ti, m suse am wɔ læɛ, ka, deke kere bo am sere Nyeme ka am koro i, am yo yarada ka am anya i, Nyeme yó i ma am wɔ.

²⁵ Saɲga kere bo am ba susere Nyeme, na be ado am ɲgasi, am fa i mi ni ɲgasi ce i ka, adena am Si Nyeme bo i wo aɲgoro n gusu fá am dɛɛ ce am.

[²⁶ Nzen am fa má am benɲum ɲgasi ce má bu, am Si Nyeme bo i wo aɲgoro n gusu fá má am dɛɛ ɲgasi ce má am.]”

Kabo bu bisaari Yesu deke bo i yiko n fite ni

²⁷ Bu fa ba juuri Yerusalem miɛ kpiri n nu bekun, na Yesu awura Nyeme Sereebiri Awuru n nu, na i sunati bara ye i. I wo dɔ sɔɔ n na Nyeme sayoowa dɔɲguyofɔ nkpienkpienm, ni Nyeme nɔaniɛ kerefɔm, ni Yudafɔm nkpienkpienm n aba i dɔ,

²⁸ na ba bisa i ka, “Nma dɛɛ yiko nu ye a yo nyini sam kere a? Nma ma u nyini yiko n ye a yo nyini sam n a?”

²⁹ Na Yesu abɔ bu nu ka, “Am ma m du mɔ bisa am bisaawa kun be ka, na nzen am bɔɔri m nu, na m gusu nyá se am deke bo m yiko n fite.

³⁰ Nma maari Yohane atin ye i ba biɛeri minem Nyeme nzue n a? Nyeme nzen adamande? Am bɔ m nu.”

³¹ Na ba se akuruwa bu ɲuɲu nu, kabo bu bɔ Yesu nu barasu. Bu ɲa, “Nzen ya seeri i ka Nyeme maari i atin a, i bísá ya ka, ye nzu ti ye ya da má Yohane ɲu a?”

³² Ama, nzen ya se i ka adamande dɔ?” Dɔ gusu na ba soro jama ni. Má pui ti, dama sɔnɔ kere soroori su ka Yohane yo ti Nyeme nɔaniɛ kanfɔɔ nahɔre su.

³³ Nyini ti, na ba bɔ i nu ka, “Ya si má.” Na yiri gusu ase bu ka, “Mini mmɔɔ sé má am sɔnɔ bo i dɛɛ yiko nu na m yo ahin sam n kere ni.”

12

Kabo Yesu boori miɛnu niiri Yudafɔm nkpienkpienm ni

¹ Na Yesu abo bu miɛenum. I ɲa, “Sɔnɔ be yo woori bere a, na wɔ dɔ i baka suuwa barasu be fie, na wɔ kanda abara aye fie ni. Na wɔ lokoti yabuɛ bambaka be kunma, ka i sumiemie baka suuwam ni nzue go nu. Na

wɔ ta kpafiri lenlenge be ka bu tana su suniɛ fie n kere su, na wɔ nya afa fie n awura i npadifom saa nu. Na wɔ ko atin.

² Saŋga ba juuri bo i si ka baka suuwam n abi ni, na wɔ sunma i akoom kun i npadifom n do ka i ko de i dee bo ba nya i n bra.

³ Akoo n ko juuri ni, na ba tara i abo i, na ba fon i akpie i nyi i saa ngbeen.

⁴ Na fie n fo n asunma i akoo n kun bekun, na ba tara i abo i atie i tii, na ba kpa i nyinye.

⁵ Na wɔ kaaki asunma kun bekun, na ba kun yiri. Akoo kere bo fie n fo n nya sunmaari i a, a nu ka bu bo i wɔ, wara bu kun i wɔ.

⁶ Sono kun n kpein be ba kaari a, yiri la i wa koroowa ni. Yiri ye i ba kaari sin sunmaari a, na wɔ se ka, 'Bu ma m wa n yiri jirima.'

⁷ Ama, na nyini npadifom n ase bu nu nu ka, 'I wa n bo i di i aja n lee suba n a. Am bra na ya kun i na aja n kere ka ya dee.'

⁸ Do na ba tara i, na ba kun i, na ba cin i afite fie n nu afa i atu."

⁹ Na Yesu anya ase bu ka, "Am sunsun ka fie n fo ni yo se wo? I ba kun nyini npadifom n kere wo, na i fa fie n wura mine foforem saa nu."

¹⁰ Na wɔ sa su ase ka, "Amberɛ ni am tii akan Nyeme Jore Kadasi n nu anu i kabo ba kere i barasu. Bu na,

'Yabuɛ n bo bondo tafom n faari i tuuri ni,
yiri ye wɔ kaaki bondo n jaa yabuɛm kere tii a.

¹¹ Micera ni yoori i so a.

Ya nu i, na wɔ yo ya alekutura.' "

¹² Yesu seeri so ni, na Yudafo n kpienkpienm n akpini atin kabo bu yo na bu tara i, dama bu faari nu ka mienu n bo i boori i ni, i niiri bere wo, ama, bu soroori jama n dee ti, na ba yasus akoyaki i.

Kabo bu soo Yesu ngeɛ fa ko lampo to busu ni

¹³ Nyini sin na kpienkpienm n asunma Farasifom ni Feme Herode mine nbem na bu ba so Yesu ngeɛ na bu ti i noanie.

¹⁴ Na ba ba ase i ka, "Ya Kerefo, ya si ka a ti nahore sefo o, u cece wo ma kabo mine joro nu, dama a nie ma sono jinaabiri ti, ama, a kere minem wo nahore su kabo Nyeme atin ti barasu. To, ya dee atin n su, atin wo nu ka ya to lampo ma Romafom Feme Kpiri Siza, nzen atin wo ma nu?"

¹⁵ Ama, na Yesu asi ka bu ti burukoonufom wo, na wɔ bisa bu ka, "Nzu ti ye am sukoro ka am so m ngeɛ a? Am fa nwaa bra na m nie."

¹⁶ Na ba fa nwaa n aba ama i. Na wɔ de nwaa n anie, na wɔ bisa bu ka, "Nma dee tii ni i duma wo nwaa n su n a?" Na ba bo i nu ka, "Feme Siza dee a."

¹⁷ Na Yesu ase bu ka, "Deke bo i ti Feme Siza dee, am fa ma Feme Siza, na deke bo i ti Nyeme dee, am fa ma Nyeme." Na ba mie ni i noanie ni.

Kabo bu bisaari Yesu fa kori yiwee tenge jore su ni

¹⁸ Na Yudafo asese barasu nbem bo bu fere bu ka Sadiusifom ni, aba Yesu do. Bu dee kereewa la ka Nyeme tenge ma minem bu yiwee n nu n a. Na ba ba abisa i jore be, bu na,

¹⁹ "Ya Kerefo, Moyisi yo kereeri noanie be maari ya, ka nzen sono wu yakiiri i yi, na i ni bara n anya ma baa, wo yo daka ka i niema n fa kunofo n na bu wu nbaam ma goro n bo wo wu ni.

²⁰ To, sono be yo laari nbaabiesom nso, na baakpien n aja bara, na wo wu ayaki bara ni, ba nya ma baa.

²¹ Na bo i to i su n afa kunofo n aja, na yiri gusu awu ayaki bara ni, ba nya ma baa. Na bo i to i su nsan su n gusu afa i aja bekun.

²² I yo sɔ ɔ, na bu nso n kere aja bara n abara aye, na bu kere awu ayaki i, ba nya má baa, na bara n gusu aba aka sin awu.

²³ Kabo bu mine nso n kere aja bara n na ba wu sɔ ni, cɛɛn n bo Nyeme bá tenge minem bu yiwee n nu ni, bara ni ká nma dɛɛ wɔ?"

²⁴ Na Yesu abɔ bu nu ka, "Am amini atin. Deke bo i ti na am amini atin n la ka, am ti má deke bo ba kere i Nyeme Jɔre Kadasi n nu n bu, na am kaaki si má kabo i yiko n ti barasu.

²⁵ Dama sanɔga bo Nyeme má minem tenge bu yiwee n nu ni, ajaa wo má bere kun. Ama, nyini cɛɛn ni, sɔnɔ kere káaki ka Nyeme merkem bo bu wo angoro n wɔ.

²⁶ Na fa kɔ kabo Nyeme bá tenge minem bu yiwee n nu ni, am kaanri Moyisi dɛɛ kadasi ni, nzen am akan má i? Kabo i kerɛeri fa kɔ sanɔga bo sin n jeeri buwe baka n su n na Nyeme jɔjɔri i dɔ ni, i na, 'Mini ti Abraham, ni Izaki, ni Jakɔbu dɛɛ Nyeme n a.' "

²⁷ Na Yesu asa su ase bu ka, "Kabo Nyeme na i ti nyini minem n dɛɛ Nyeme ni, nyini kere ka bu toko la nɔɔ lɛɛ, dama Nyeme ti má bo ba wu n dɛɛ Nyeme, ama, i ti bo bu la nɔɔ n dɛɛ Nyeme a. Nyini ti, kabo am na Nyeme tɛnɔge má minem bu yiwee n nu, am amini fieo."

Nyeme nɔanie maawa n bo i tara bu kere n jɔre

²⁸ Na Nyeme nɔanie kerefɔm kun anɔ kabo Sadiusifɔm ni Yesu seeri bu beɔgu akuruwa ni, i tiiri kabo Yesu bɔɔri bu nu nyunyumi sɔ ni, na wɔ ba abisa i ka, "Nyeme nɔanie maawam ni, bɔnɔ tara bu kere a?"

²⁹ Na Yesu abɔ i nu ka, "Nɔanie n bo i tara bu kere n yaa, ba kere ka, 'Ambere Yisarelifɔm, am ti fen, ya Micera Nyeme n ti kun wɔ.

³⁰ Koro Micera u Nyeme ni, ni u ahorembaa kun, ni u awiewie, ni u sunsunni, ni u fanɔga kere.'

³¹ Bo i tɔ su nnyɔ n la ka o, 'Koro u beɔgu kabo a koro u nɔ ni.' Nɔanie maawa be wo má bere bo i tara ahin nnyɔm ni."

³² Na Nyeme nɔanie kerefɔ n ase Yesu ka, "Angba. Ya Kerefɔ, i nahore atin su lɛɛ ye a kan i n a. Ya Micera Nyeme n ti kun wɔ. Nyeme be wo má bere sin i nɔ.

³³ Wɔ kaaki ayo daka ka ya koro Nyeme ni ya ahorembaa kun, ni ya sunsunni, ni ya fanɔga kere, na ya kaaki koro ya beɔgu kabo ya koro ya nɔ ni, nyini nnyɔm n ti ye tara bo ya yo tiem, ni bo ya yi sarakam ma Nyeme ni."

³⁴ Na Yesu anɔ ka sɔnɔ n abɔ i nu kpa, na wɔ se i ka, "A waari má ni Nyeme femeya ni." Nyini sin, be abo má su ka i bisa Yesu jɔre bekun.

Kristo Tiidefɔ n bo i ti Feme Davidi anuma n jɔre

³⁵ Sanɔga bo Yesu woori Nyeme Sereebiri Awuru n nu sukere Nyeme nɔanie ni, na wɔ bisa minem jɔre be fa kɔ Kristo Tiidefɔ n su. I na, "Nzu ti ye Nyeme nɔanie kerefɔm n bita jɔjɔ ka Kristo n ti Feme Davidi anuma a?"

³⁶ Dama Awiewie Casi n yo wuraari Feme Davidi nɔ ni, na yiri ni i tii ase ka,

'Na Micera ase m Mibie n ka,

"Ba tana m saa fɔmbɔɔ su fen,

haari m bá ma u kpɔfɔm kere ba kutu u jaa bu." '

³⁷ Tɔ, Feme Davidi mmɔɔ ni i tii fereeri Kristo n ka i Mibie wɔ, ye Kristo n yo se kaaki yo Feme Davidi anuma a?"

Kabo Yesu na mine si bu nɔ sa ni Nyeme nɔanie kerefɔm ni

Ye jama beberebe n jina tiiri Yesu nɔanie n ni ahorejɔ a.

³⁸ I woori bu kere n su ni, na wɔ se bu ka, “Am si am ɲu sa ni Nyeme noanie kerefom ni, deke bo bu koro i n la ka, bu wura sutura ngbingbirim wɔ, na bu nati sujengbe, na sɔnɔ kere suyo bu anse goosu.

³⁹ Nyini minem n anya awura bu tientienbunɔɔ sɔm n nu ni, wara ba nya afere bu tientienbunɔɔ bambaka diire diibirim ni, bu koro ka bu tana kpirikoro tanaabirim wɔ.

⁴⁰ Nyini minem n sɔ fin nkunafom nengem wɔ, na bu jina sere Nyeme ce, adena minem ɲu ka bu ti mine kpam wɔ. Jina ceen, bere ba nya suicin tara minem kere.”

Kabo kunafɔ be yiiri saraka barasu ni

⁴¹ Na Yesu akɔ atana adodo alaka bo minem yi bu saraka ɲwaa wura nu ni, na i sunie kabo minem yi saraka barasu. Nengefom dongu yiiri ɲwaa beberebe wuraari saraka n nu.

⁴² Na kunafɔ yaarifɔ be gusu aba ayi ɲwaa kaan be bo i koro to má pui awura saraka n nu.

⁴³ Dɔ na Yesu afere i susufom n na wɔ se bu ka, “Nahore ye m suse am n a, nyini kunafɔ n ayi ɲwaa atara minem n kere.

⁴⁴ Dama nengefom la ɲwaa beberebe n de ti, ye ba yi be a. Ama, nyini kunafɔ n ni i yaari n kere, i deke kere bo i la i lee, ye wɔ yi i n a.”

13

Kabo Yesu seeri ka Nyeme Sereebiri Awuru ni ba bereki barasu ni

¹ Sanja bo Yesu sufite Nyeme Sereebiri Awuru n nu ni, na i susufom n nu kun be aba ase i ka, “Ya Kerefɔ, nie nyini yabue ngbingbirim ni. Nie kabo bu ti a. Nie nyini awuru bambaka ni. Nie kabo ba ta i barasu a.”

² Na Yesu ase i ka, “M ɲa a ɲu nyini ataari ngbingbirim n e? Yabue kun n kpein n mmɔɔ ba nana má i bengsu. Bu ba bereki i kere go o lee.”

Kabo Yesu kere fa kɔori durunya n awieeri su de jore ni

³ Na Yesu akɔ afun atana Oliva Buka n su sunie Nyeme Sereebiri Awuru ni. Na sanja bo yiri ni Petoro ni Yakobo ni Yohane ni Andere woori bu ngumi ni, na ba bisa i ka,

⁴ “Ya Kerefɔ, se ya, sanja bonɔ ye ahin sam n kere ba yo a? Ye nzu deke ba kere ya ka sanja n adodo bo nyini sam n kere ba yo a?”

⁵ Na Yesu anya ase bu ka, “Am si am ɲu sa na má am ma be dadaka am.

⁶ Dama mine dongu ba fa m duma n ba, na bu sé ka, ‘Yiri la mini n a.’ Na bu dadaka mine beberebe.

⁷ Sanja bo am ba ti aluwa nga fen, wara bu sukun lue dɔ, má am ma am ahore saaki. Wɔ yo daka ka nyini n kere ba yo ka, ama, má am nie ka durunya n awieeri lee.

⁸ Daanfie daanfie ba kun lue ni bu bengum, na nfemem kún lue ni bu bengum nfemem. Na asien ba kpisi awore aworem nu, na ahoe to. Nyini n kere ba yo kabo bara kutu ceen bumboori de wahara n ti n wɔ.

⁹ Am si am ɲu sa, dama bu ba fa am wura joredifom saa nu, na bu bo am bu tientienbunɔɔ sɔm n nu. Mini de ti, na bu di am jore gominam ni nfemem nyunu. Nyini má am atin, na am di m daani kere bu a.

¹⁰ Ama, wɔ yo daka ka daanfie kere du mɔ ti labari kpa n ka, ye durunya n awieeri ba ju a.

¹¹ Sanja n bo bu ba faari am kɔori jinaabiri, na bu ko di am jore ni, má am ma am ahore saaki fa ko kabo am ko jojo barasu. Noanie kere bo i to am noo nyini sanja ni, am jojo i, dama i fite Awiewie Casi n do o, i fite má am do.

¹² Gɔrɔm ni niemam bá tɔ bu beɲgu ma bu kpɔfɔm na bu kún bu, na sim tó bu nbaam, na nbaam kéte bu wufɔm ɲu, na bu má minem kun bu wufɔm ni.

¹³ Ama, wɔrɔ kere bo a mindi deeri nyini n kere kɔ ju i awieeri, Nyeme dé u tii ji.”

Anyumbaa ciire sa n bo i bá ba n jɔre

¹⁴ Na Yesu akaaki ase bu ka, “Am bá ɲu anyumbaa ciire sa be bo Nyeme mmɔɔ kpɔ i, ka bu má i jina Nyeme Sereebiri Awuru n nu, deke bo wɔ yo má daka ka i jina, na i sáaki i ni. Ma sɔnɔ kere bo i kan ahin kadasi n ti i bu nyunyumi. Nyini saɲga ni, wɔrɔ kere bo a tiiri i ɲga, na a wo Yudiya asien n su, ɲmati kɔ bukam n su.

¹⁵ Wɔrɔ kere bo a wo kpata nu, má a wura gisan n nu fa pui.

¹⁶ Na wɔrɔ kere gusu bo a wo fiesu, má a kpie u nyi kɔ awuru kɔ fa u sutura be.

¹⁷ Nyini saɲga ni yó kekere agaya ma nyinsefɔm, ni nbaram bo bu nbaam toko nu ni.

¹⁸ Am sere Nyeme ka má nyini sa n yó buke saɲga.

¹⁹ Nyini saɲga ni, wahara bo mine dí i, i tára wahara kere bo ba di i asin, fite saɲga n bo Nyeme yiiri durunya ni haari ni kisa, nyini wahara n ɲusu bá má kun.

²⁰ Ama, Micera n akpie nyini saɲga n su. Nzen má wɔ kpie má i su, má sɔnɔ wo má bere bo i nyá ɲɔɔ, ama, i deɛ tienɲu minem bo wɔ yi bu n deɛ ti, wɔ kpie saɲga n su a.

²¹ Nyini saɲga ni, nzen be bá se am ka, ‘Am niɛ, Kristo Tiidefɔ ni wo fen n a,’ wara ‘Am niɛ, yiri wo dɔ n a,’ má am de i mi nɔaniɛ ni.

²² Dama kɔrefɔ nbem bá ba na bu yó bu ɲu ka bere ti Kristo n a, na nbem gusu yó bu ɲu ka bu ti Nyeme nɔaniɛ kanfɔm wɔ. Bu yó alekutura sam beberebe fa kere am, na nzen bu koro nyaari atin, bu dádaka Nyeme deɛ minem bo wɔ yi bu ni.

²³ Amberɛ, ma se am i kere wɔ lɛɛ ka, na saɲga n nyá ba ju. Am si am ɲu sa.”

Kabo Adamande Wa ni bá kaaki ba barasu ni

²⁴ Na Yesu akaaki ase bu ka, “Saɲga bo nyini wahara n kere ba siinri, ‘Awosin káta wiɛ n su, na sara n gusu tá má bo minem ɲu i.

²⁵ Na asarambaam fíte aɲgoro titi toto, na aɲgoro n kere kpísi.’

²⁶ Na minem nyá ɲu ka mini Adamande Wa ni sufite aɲgoro yinyiɲgu n nu suje piepieu suba ni yiko bambaka.

²⁷ Na m nyá sunma Nyeme merékem durunya n awɔre n kere nu, na bu tíentien Nyeme minem bo Nyeme ayi bu durunya n nu n kere nɔɔ.”

Kabo Yesu ɲa ya fa damba baka fa se nyaari barasu ni

²⁸ Na Yesu akaaki ase ka, “Am fa damba baka n fa se nyaari. Saɲga bo am ba ɲu ka i nyawa akpɔnkpɔn, na i sufieɛie fɔfɔre ni, am si ka dɔdɔri saɲga adodo lɛɛ.

²⁹ Mini Adamande Wa n ba ni bá yo sɔ ɔ. Saɲga bo amberɛ gusu bá ɲu ka nyini sam kere bá suyo ni, am si tenle su ka saɲga n adodo lɛɛ, i cé má kun.

³⁰ Nahɔre ye m suse am n a, ka bo bu la ɲɔɔ kisa n wú wie má ka, ye nyini sam kere bá yo a.

³¹ Angoro ni asienggu kere bá la awieeri, ama, m dee noanie n yiri la má awieeri ceen be.”

Kabo Yesu seeri ka ya si ya nu sa fa ko i ba n su ni

³² Na Yesu akaaki ase ka, “Be si má sanja ni, wara ceen n bo m bá kpie m nyi ba ni. Haari Nyeme merkem n bo bu wo i do ni, ni mini bo m ti i wa n mmoo si má. Má ka ya Si Nyeme ngumi si a.

³³ Nyini ti, am si am nu sa. Má am fa am nu ji, dama am si má sanja n bo m bá ni.

³⁴ Mini Adamande Wa n baawa ni bá yo ka sono be ye wo yasu i dika ka i ko atin. Sanja bo i ba suko ni, na wo fa i awuru n awura i akoom saa nu, na wo ma bu kere ni bu juma bo bu yo. Na wo se danmindafu n ka má i fa i nu ji haari fa ko sanja bo i bá ba.

³⁵ Ambere mmoo si má sanja bo mini Awurufobie ni bá ba. Nzen ngarama a? Naaso o? Kongue jinanjin? Akonyuma bo sanja? Be si má. Nyini ti, má am fa am nu ji,

³⁶ na má am daafi na m bá fura am nu.

³⁷ Deke bo m sujoko se am ni, m joko ni sono kere pepere wo lee, ka, má am fa am nu ji na am daafi.”

14

Kabo bu seseeri su na bu tara Yesu ni

¹ Nyini sanja ni, wo ka lennyo o, na bu di bu ceenkpiri nbem. Bu fere kun n ka Butara ceenkpiri, bo bu di i na bu tenge su kabo Nyeme yo deer i bu nam tii fiteeri Ijipitifom asien su ni. Na kun la bo bu di i ni kpono bo bu go má ayiri nu na i yasu ni. Na Nyeme sayoowa donguyofu nkpienkpienm ni, ni Nyeme noanie kerefom ni, anienie atin kabo bu yo barasu na bu tara Yesu kun i fiewa nu.

² Na ba se bu nu nu ka, “Má am ma ya yo i ceenkpiri n sanja. Má nyini, minem ni kete yo nanmie wo, na bu sutientien.”

Kabo bara be goori Yesu tii su tulaale ni

³ Yesu woori Betani mie n nu wo, sono be dika, bu fere i ka Simon, i yo ti kokofu o. Sanja bo Yesu wo diire di su ni, na bara be aba ni tulaale tuwa nvanvani bo i la go agaya. Na wo bo abu tulaale tuwa n noo, na wo kaaki tulaale n kere ago Yesu tii su.

⁴ Na yaa ati minem ni nbem bo bu wo do ni, na ba se bu nu nu ka, “Nzu ti ye wo saaki tulaale n so a?”

⁵ Má ya toori i, má ya nya nwaa beberebe, na ya fa ma yaarifom.” Na ba kan bara ni ndie agaya.

⁶ Na Yesu ase bu ka, “Am yaki i benle. Má am kan i ndie. Sakpa lee ye wo yo ama m n a.

⁷ Am ni yaarifom ni wo bere sanja kere a, na nzen sanja be am ba koro ka am yo bu sakpa, am yo bu. Ama, mini, m wo má am do sanja kere.

⁸ Wo yo i dee fanga nyaari lee, wo kaaki tulaale n ago m nu ka i dee nzee bo wo fa ayo m siriya fa ko m yiwee ceen lee.

⁹ Nahore ye m suse am n a, deke kere bo bu bá kaanri Nyeme labari kpa ni durunya n kere nu, bu kan i sayoowa n na minem tenge i su.”

Kabo Yudasi seseeri su ka i to Yesu ni

¹⁰ Na Yudasi Isikariyoti bo i ti Yesu susufu buru ni nnyom ni kun be ni, ako Nyeme sayoowa donguyofu nkpienkpienm ni do, ka i ko to Yesu ma bu.

¹¹ Bu tiiri labari n sɔ ni, na bu ahore ajo, na bu gusu atan ndiɛ ama i ka bu má i ɲwaa. Na Yudasi akpini atin kabo i yó barasu na bu nya Yesu taraabiri.

Kabo Yesu ni i susufɔm diiri cɛɛnkpiri diire ni

¹² Na cɛɛnkpiri n bo bu di i ni kɔnɔ bo bu go má ayiri nu na i yasu ni, i lekun cɛɛn, nyini cɛɛn ye bu kun nbɔmbaam bo bu di na bu tenge Butara cɛɛnkpiri n su n a, na Yesu susufɔm n abisa i ka, “A koro ka ya kɔ ni kɔ sɛsɛ Butara cɛɛnkpiri n diire n su se a?”

¹³ Na Yesu afere bu nu nnyɔ na wɔ se bu ka, “Am kɔ miɛ n kunnu. Am ni sɔnɔ be yé. I sɔ nzue dundu. Am su i su,

¹⁴ kɔ awuru n bo i kó wura nu ni, na am bisa awurufɔbiɛ n ka, ‘Ya Kerefo n ɲa, sɔɔ bɔnɔ nu ye i ni i susufɔm ni dí Butara cɛɛnkpiri n diire n a?’

¹⁵ Na i kére am angoro sɔɔ bambaka n bo ba yo i dɔɲgu ase ni, dɔ ye am sɛsɛ diire n su se ya.”

¹⁶ Na i susufɔm ni akɔ miɛ n nu, na ba kɔ aɲu deke n kere sɔ, kabo Yesu seeri bu ni, na ba sɛsɛ Butara cɛɛnkpiri diire n su.

¹⁷ Na naasɔ saɲga, na Yesu ni i susufɔ buru ni nnyɔm ni kere aba dɔ.

¹⁸ Na saɲga bo bu tana wo diire n di su ni, na Yesu ase bu ka, “Nahɔre ye m suse am n a, am nu kun bá tɔ m ma m kpɔfɔm a. I mi ni mini susaɲga di diire n a.”

¹⁹ Na bu ahore asaaki, na bu kun kun n kere abisa i ka, “Ye m ɲa má mini yiri e?”

²⁰ Na Yesu abɔ bu nu ka, “Amberɛ buru ni nnyɔm nu kun yó nyini a, i mi ni mini susaɲga fa ya saa wura taale kun nu a.

²¹ Mini Adamande Wa ni wú kabo ba kere i Nyeme Jɔre Kadasi n nu ase ka m wú n wɔ, ama, sɔnɔ n bo i tó mini Adamande Wa n ni, i mi bá ɲu anyumboro. Má ba wu má i mi n mmɔɔ, má i ti ye.”

Ya Mibiɛ kasin diire n jɔre

²² Saɲga bo Yesu ni i susufɔm ni wo diire n di su ni, na Yesu afa kɔnɔ, na wɔ da Nyeme asi, na wɔ bubu i nu, na wɔ fa ama bu, na wɔ se bu ka, “Am de ahin kɔnɔ n na am di, i ti m ɲuniɛmbaa a.”

²³ Na wɔ kaaki afa awa ni nzan, na wɔ da Nyeme asi, na wɔ fa ama bu, na bu kere anu be.

²⁴ Na wɔ se bu ka, “Ahin nzan n ti m mbunja lɛɛ, ye m sufa ma am n a. Yiri ye Nyeme sufa sɛsɛsu na i di i di n a. Minɛm dɔɲgu satie dɛɛ ti, ye m mbunja ni soɲgi go a.”

²⁵ Na wɔ kaaki ase bu ka, “Nahɔre ye m suse am n a, m nú má nzan be kun, má ka cɛɛn n bo m bá nu i fɔfɔre Nyeme femeya n nu ni.”

Kabo Yesu seeri i susufɔm n ka bu bá ɲmati yaki i ni

²⁶ Nyini sin na ba di jue akansi Nyeme, na ba fite akɔ Oliva Buka n su.

²⁷ Na Yesu ase i susufɔm n ka, “Am kere bá ɲmati yaki m, dama ba kere i Nyeme Jɔre Kadasi n nu ka, Nyeme ɲa,

‘M bó kun bɔɛsasafɔ ni,
na nbɔɛm bá sandi.’

²⁸ Ama, m bá tengeeri m yiwee n nu ni, m dú am mɔ kɔ Galili awɔre n nu.”

²⁹ Na Petoro ase i ka, “Nzen ahinm kere ɲmati yakiiri u, mini ɲmáti yaki má u da.”

³⁰ Na Yesu ase Petoro ka, “Nahɔre ye m suse u a, nyuma kɔɲgue n nu, kana akonyuma bá bo kpe nnyɔ su, a kéte kpe nsan ka a si má m.”

31 Na Petoro abo i hoe ase i ka, “Mini sé má sɔ da. Nzen haari wɔ yo daka ka mini ni wɔrɔ kere sánnga wu mmɔɔ, ya wú ɔ.” Na i susufɔm n kere ase sɔ.

Kabo Yesu jeke tiiri na i kɔ sereeri Nyeme ni

32 Na ba yasu akɔ aju awɔre be bo bu fere i ka Gese mane ni, na Yesu ase i susufɔm ni ka, “Am tana fen n̄minda m, na m kó sere Nyeme.”

33 Na wɔ fa Petoro ni Yakobo ni Yohane na ba kɔ mɔ kaan. Bu kɔ juuri dɔ na ahoresaaki aba i dɔ agaya, na i jeke ati.

34 Na wɔ se bu ka, “Ahoresaaki aba m dɔ agaya, i yo m ka m wú ɔ mmɔɔ. Am wo fen na am n̄minda m. Má am daafi.”

35 Na wɔ kɔ dede kaan, na wɔ butu i kunnu su, na wɔ sere Nyeme ka nzen má i koro ma ahin anyumboro n sin yaki i.

36 I n̄a, “*Abba*,” i bu la ka, “M Si, wɔrɔ koro yo sa kere a. Nyini ti, yi m fite ahin anyumboro n bo i suba m dɔ n nu. Ama, má a yo kabo m koro ni, se kabo a koro ni.”

37 I sere Nyeme wieeri ni, na wɔ kp̄ie i nyi akɔ aju ka i susufɔ nsanm ni wo daafiri su. Na wɔ tenge bu na wɔ se Simon Petoro ka, “Simon, a daafi wɔ? A koro kp̄ie má daafiri, haari kaan sɔ mmɔɔ?”

38 Na wɔ kaaki ase bu ka, “Am kp̄ie daafiri, na am sere Nyeme, adena má deke be yo am na am wura satie nu. Ahorembaa n koro nyemesu, ama, an̄uniembaa n ayɔrɔki.”

39 Na wɔ kaaki akɔ asere Nyeme bekun ni nyini n̄oan̄ie jɔjɔwa kun bo i du mɔ jɔjɔri ni.

40 Na wɔ kp̄ie i nyi aba i susufɔm n dɔ, na wɔ ba aju ka ba daafi bekun, dama daafiri ati bu agaya. Ba koro ase má i pui.

41 Na wɔ kɔ asere Nyeme kpe nsan su, akaaki aba aju ka bu toko wo daafiri su, na wɔ se bu ka, “Am toko daafi yi am n̄umi wɔ? Wɔ se su. Sanga n aju, wɔ tɔ mini Adamande Wa ni ama satieyofɔm.

42 Am nie, sɔnɔ n bo wɔ tɔ m lee. Am yasu na ya kɔ.”

Kabo bu taraari Yesu barasu ni

43 Na sanga bo Yesu toko wo jɔjɔri su ni, na Yudasi bo i ti Yesu susufɔ buru ni nnyɔm nu kun aju ni jama beberebe. Bu bita takobem ni kɔrɔmam. Nyeme sayoowa dɔnguyofɔ nkpienkpienm n ni Nyeme n̄oan̄ie kerefɔm ni, ni Yudafɔm nkpienkpienm ni sunmaari bu a.

44 Na Yudasi bo i tɔori Yesu ni akere jama n nyaari su kabo bu sí Yesu na bu tara i. I n̄a, “Sɔnɔ n bo m kó biti i ni, yiri lee. Am tara i, na am bita i kenken, na am fa i kɔ.”

45 Sanga bo i kɔ juuri ni, i kaba kɔori Yesu dɔ ɔ, na wɔ bo afere i ka, “Ya Kerefɔ.” Na wɔ biti i, na wɔ yo i anse.

46 Na minem n atara Yesu na ba bita i kenken.

47 Na Yesu susufɔm bo bu jina bere n nu kun acin ayi i takobe, na wɔ kp̄ie sɔnɔ be sui, nyini sɔnɔ n ti Nyeme sayoowa dɔnguyofɔm kp̄ien n akɔɔ ɔ.

48 Na Yesu abisa bu ka, “M ti finfɔ ɔ ye am fa takobem ni kɔrɔmam na am ba tara m a?”

49 Cɛen kere cɛen m ni ambere wo Nyeme Sereebiri Awuru n nu a, ye m kere minem a, ama, am atara má m. Tɔ, i ti ye ni ka kabo ba kere i Nyeme Jɔre Kadasi n nu ka bu yó m ni yo yiiwa.”

50 Na i susufɔm n kere an̄mati ayaki i.

51 Na gbefene be gusu su Yesu su. I kara tani ngumi wɔ. Na ba laandi ka bu tara i,

52 na wɔ foro bu saa an̄mati ayaki tani ni, i bu ngbeen.

Kabo bu fa Yesu kɔɔri jɔɔɛ diibiri ni

⁵³ Na ba fa Yesu akɔ Nyemɛ sayoowa dɔɔguyofɔm kpien n dika, na Yuda-fɔm tereterefɔm kere aba atien bu nɔɔ. Bere la Nyemɛ sayoowa dɔɔguyofɔ nkpienkpienm ni, ni Yuda-fɔm nkpienkpienm ni, ni Nyemɛ nɔɔniɛ kerefɔm ni.

⁵⁴ Na Petoro asu Yesu su, ama, i woori dede kaan ni yiri, na wɔ kɔ awura Nyemɛ sayoowa dɔɔguyofɔm kpien n dika gisan nu. Na wɔ kɔ asanga atana tintinijinafɔm n nu atun sin.

⁵⁵ Na Nyemɛ sayoowa dɔɔguyofɔ nkpienkpienm ni, ni Yuda-fɔm tereterefɔm n kere anienie minem bo bu bá di daani fa kɔ ɔgasi bo Yesu ado i ni, adena bu nya i taraabiri na bu kun i, ama, ba nya má jɔɔɛ bo bu fa kpie sɔ i.

⁵⁶ Na daani difɔm beberebe afite ajina akpie kɔɔɛ asɔ Yesu, ama, bu nɔɔniɛ n ayo má kun.

⁵⁷ Na mine nbem gusu ayasu ajina akpie kɔɔɛ asɔ Yesu,

⁵⁸ bu ɔa, “Ya tiiri ka i ɔa, i fúfu ahin Nyemɛ Sereebiri Awuru n bo minem taari i ni, na lesan afien, na i káaki ta fɔfɔɔɛ bo i ti má kabo adamande ataari ti ni.”

⁵⁹ Haari ni nyini n mmɔɔ, bu nɔɔniɛ ni ayo má kun.

⁶⁰ Na Nyemɛ sayoowa dɔɔguyofɔm kpien ni ayasu ajina tereterefɔm n afien, na wɔ bisa Yesu ka, “A la má bɔnu be fa kɔ ahin jɔɔɛ n bo minem ni akpie asɔ u n su?”

⁶¹ Ama, na Yesu amɔ i nɔɔ, wɔ bɔ má jɔɔɛ be nu.

Na Nyemɛ sayoowa dɔɔguyofɔm kpien ni abisa i bekun ka, “Wɔɔɔ ti Nyemɛ n bo ya kere kansɔ i n dɛɛ Wa, Kristo Tiidefɔ n a?”

⁶² Na Yesu abɔ i nu ka, “Mini lɛɛ. Na ‘am bá ɔu mini Adamande Wa ni, ka m tana Nyemɛ Yikofɔ n saa fɔmbɔɔɔ su, na am ɔú ka m fite aɔgoro yinyiɔgu n nu suba.’ ”

⁶³ Yesu bɔ nu sɔ wieeri ni, na Nyemɛ sayoowa dɔɔguyofɔm kpien ni asɔn i tanlɛɛ. Na wɔ se ka, “Ya koro má daanifɔ bekun.

⁶⁴ Amberɛ mmɔɔ ti kabo wɔ jɔjɔ awura Nyemɛ ɔgasi n nu e. Ye am ɔa sɛ wɔ?” Na bu kere ase ka wɔ kan ciire jɔɔɛ, nyini ti, wɔ yo daka ka i wu.

⁶⁵ Bu kaanri sɔ wieeri ni, na bu nbem ayi nanzue aɔɔ Yesu ɔu, na ba fa sanvuin acin akata i nyumbaa, na ba bobo i, na ba se i ka, “Wɔɔɔ Nyemɛ nɔɔniɛ kanfɔ ni, kan kere ya sɔnɔ n bo i boori u ni.” Na tintinijinafɔm n gusu afinfin i nyɔɔnu.

Kabo Petoro keteeri ka i si má Yesu ni

⁶⁶ Bu wo nyini kere su ni, na Petoro toko wo gisan n nu, na afani be aba i bi, yiri ti Nyemɛ sayoowa dɔɔguyofɔm kpien n dɛɛ afani kun a.

⁶⁷ Sanga bo i nie ɔuuri Petoro ka i wo sin tuunbiri n ni, na wɔ nie Petoro nyunu dika gbirim, na wɔ se i ka, “Wɔɔɔ mmɔɔ yo woori nyini Yesu Nazarɛtifɔ n dɔ ɔ.”

⁶⁸ Na Petoro akete, i ɔa, “Ai, m si má nyini jɔɔɛ n bo a sujɔjɔ i ni.” Na wɔ fite gisan n nu aba lɛɛ n nu. Nyini sanga ni na akɔnyuma abo kpekun.

⁶⁹ Na afani n aba aɔu i dɔ, na wɔ kaaki ase minem bo bu jina bere ni ka, “Ahin sɔnɔ n ti bu nu kun wɔ.”

⁷⁰ Ama, na Petoro akete bekun.

Wɔ cɛ má na bo bu jina bere n gusu ase Petoro ka, “Nahɔɔɛ a, a ti bu nu kun wɔ, dama wɔɔɔ mmɔɔ ti Galilifɔ ɔ.”

⁷¹ Na wɔ tan ndie afa i saa awura sin nu, i ɔa, “M si má sɔnɔ n bo am sujɔjɔ i jɔɔɛ ni.”

⁷² Kpennga na akonyuma n abo kpe nnyo su, na Petoro atenge su kabo Yesu seeri i ni, i na, "Kana akonyuma ba bo kpe nnyo su, a kete kpe nshan su ka a si ma m." Na i ahore asaaki, na wo sun.

15

Kabo bu faari Yesu ko jinaari Gomina Pilato nyunu ni

¹ Na alecin sangha na Yudafoṃ tereterefoṃ kere atien bu noo. Bere la Nyeme sayoowa dongyufoṃ nkpienkpienm ni, ni Yudafoṃ nkpienkpienm ni, ni Nyeme nonie kerefoṃ ni. Na ba tana asese su kabo bu yo Yesu. Na ba wura i joro ko, na ba fa i ako ama Gomina Pilato.

² Na Gomina Pilato abisa i ka, "Woro ti Yudafoṃ feme n a?" Na wo bo i nu ka, "Kabo a joro ni, i ti so o."

³ Na Nyeme sayoowa dongyufoṃ nkpienkpienm ni akpie jore beberebe aso i.

⁴ Na Gomina Pilato abisa i bekun ka, "A la ma nonie bo a bo bu nu? Nie jore beberebe bo ba kpie aso u a."

⁵ Ama, Yesu abo ma jore be nu, na Gomina Pilato abirisi kabo Yesu abo ma nu ni.

⁶ Afo kere afo Butara cenkpiri n nya ba ju ni, Gomina Pilato yi dansaraka n bo jama n sere i ka i yi i ji n wo.

⁷ Nyini sangha ni sono be woori dansaraka so n nu do, bu fere i ka Barabasi. Sangha be minem yo keteeri gomina n nu wo, na ba tu lue, na i ni i benggu ketemafon nbem akun minem, nyini ti, na ba tara bu anyi bu dansaraka.

⁸ To. Kabo afo kere afo Gomina Pilato n yi dansaraka n kun ma bu ni, na jama n aba atien bu noo i bi na bu kere sono n bo i yi ma bu ni.

⁹ Na Gomina Pilato abisa bu ka, "Am koro ka m yi Yudafoṃ feme ni ma am a?"

¹⁰ I seeri so ni, dama i si tenle su ka Nyeme sayoowa dongyufoṃ nkpienkpienm ni si Yesu kore ti ye bu faari i ba wuraari i saa nu a.

¹¹ Na Nyeme sayoowa dongyufoṃ nkpienkpienm n awura jama n bu sin ka bu se Gomina Pilato ka i yi Barabasi ji ma bu.

¹² Na Gomina Pilato abisa bu ka, "Ye ahin sono n bo am fere i ka Yudafoṃ feme ni, am koro ka m yo i se wo?"

¹³ Na jama n atien ase ka, "Kpama i baka jaanu n su na i wu."

¹⁴ Na Gomina Pilato ase bu ka, "Ye nzu satie ye wo yo i a?" Ama, na ba kaaki atien agaya bekun ase ka, "Kpama i baka jaanu n su na i wu."

¹⁵ Do na Gomina Pilato akoro ka i jo jama n ahore, nyini dee ti, na wo yi Barabasi aji, na wo ma sojam afin Yesu ngbere, na wo nya afa i awura bu saa nu ka bu ko kpama i baka jaanu n su na i wu.

Kabo bu yoori Yesu anzasi ni

¹⁶ Na ba fa Yesu awura gomina n gisan n nu, na ba fere bu benggu sojam kere ka bu tien bu noo.

¹⁷ Na ba wura Yesu tanlee kokore yorom ka femeya tanlee su, na ba fa buwe ajo i ka kaba dee su, na ba fa aforo i tii ka femeya kere dee su, adena bu yo i anzasi.

¹⁸ Na ba yo bu nu ka bu suma i jirima, bu na, "Yudafoṃ Feme ni, ya yo u anse."

¹⁹ Na bu sufinfin i tii baka, na bu suyi nanzue go i nu, na bu sukutu i nyunu.

²⁰ Bu ba yoori i anzasi n wieeri ni, na ba yi tanlɛɛ kɔkɔrɛ yorom ni, na ba kaaki afa i tienɔgu dɛɛ sutura n awura i. Na ba nya afa i akɔ ka bu kɔ kpama i baka jaanu n su.

Kabo bu kpamaari Yesu baka jaanu n su ni

²¹ Saɔga bo bu sukɔ ni, na bu ni Sirenefo biɛ be ayɛ, bu fere i ka Simon, Alekizanda ni Rufusu si lɛɛ. I fite ahɛmɛ suba miɛ kunnɔ, na sojam n amie i ka i sɔ Yesu baka jaanu ni.

²² Na ba fa Yesu akɔ deke bo bu fere i ka *Gologota* ni, *Gologota* n bu la ka Tereawa Woobiri.

²³ Na minɛ nbem asaɔga nzan ni ayiri barasu be ama i ka i nu, na i jo yaari, ama, wɔ nu má i.

²⁴ Bu yoori nyini n kerɛ wieeri ni, na ba nya akpama i baka jaanu n su, na ba ye i su ajina, na ba tu mbaa na bu si kabo bu kpaaki i suturam nu, bu nɔnɔ nu.

²⁵ Bu kpamaari i baka jaanu n su ngarama kerefi ngɔna a.

²⁶ Na ba kerɛ jɔrɛ n bo bu kpiɛ sɔori i ni, na ba fa abo akpama i baka jaanu n tii su, kerɛɛwa n la ka, “Yudafɔm Fɛmɛ n lɛɛ.”

²⁷⁻²⁸ Na ba kpama finfo nnyɔ nbem baka jaanu su adodo i, bu kpamaari kun i saa fɔmbɔrɔ su wɔ, na ba kpama kun n gusu i saa biɛ su.

²⁹ Na minɛm kerɛ bo bu sin dɔ ni subobo bu tii, na bu sukpiɛ i nzukɔ, bu ɔa, “Eɛnhɛɛn, wɔrɔ bo a ɔa a fufu Nyɛmɛ Sereebiri Awuru n na a káaki ta i lesan afien n lɛɛ,

³⁰ jura baka jaanu n su na a de u tii ji.”

³¹ Na Nyɛmɛ sayoowa dɔnguyofɔ nkpiɛnkpiɛnm ni, ni Nyɛmɛ nɔanie kerefɔm ni gusu suyo i anzasi bu nɔnɔ nu, bu ɔa, “Wɔ de minɛm tii aji, ama, i sukoro de má yiri ni i tii.

³² Am ma ya niɛ Yisarelifɔm Fɛmɛ n bo i ɔa i ti Kristo Tiidefo ni, nzen i koro juraari baka jaanu n su kisa kisa, ya yó i yarada.” Na minɛ nnyɔm ni bo bu kpamaari bu dodoori i ni mmɔɔ akpiɛ i nzukɔ.

Kabo Yesu wuuri ni

³³ Wiesu kerefi buru ni nnyɔ saɔga na awosin akata asien n kerɛ su, haari naasɔ kerefi nsan.

³⁴ Na nyini saɔga ni, na Yesu abo awie kpa ase ka, “*Eli, Eli, lama sabatani?*” I bu la ka, “M Nyɛmɛ, m Nyɛmɛ, nzu ti ye a yaki m aji a?”

³⁵ Na minɛm nbem jinaari berɛ, bu nbem n tiiri sɔ ni, na ba se ka, “Am so am sui na am ti, i sufere Eliya.”

³⁶ Na bu kun nu aɔmati afa mɛnɛ adɔ nzan gagaraki be nu, na wɔ fa awɔ baka su alaandi atɔ Yesu nɔɔ ka i nu, na wɔ se ka, “Am yaki i na ya niɛ, ka Eliya bá jura i baka jaanu n su.”

³⁷ Na Yesu abo awie kpa kpekun, na wɔ nya ayo Nyɛmɛ dɛɛ.

³⁸ Na tani bambaka n bo bu fa kpaakiiri sɔɔ casi n bo i wo Nyɛmɛ Sereebiri Awuru n nu n ati nu nnyɔ, fa i angoro kɔ jura asiɛngu.

³⁹ Na soja kpiɛn n bo i jinaari baka jaanu n nyunu ɔuuri kabo Yesu boori awie na i wuuri barasu ni, na wɔ se ka, “Ahin sɔnɔ n ti Nyɛmɛ Wa a nahɔre su.”

⁴⁰ Na nbara nbem ajina dede suniɛ Yesu. Bu nu nbem la Mariya bo i fite Magadala miɛ n nu ni, ni Salome, ni Mariya n bo i nbaam la Yakobo kaan n ni Yose.

⁴¹ Berɛ yo suuri Yesu su wɔ saɔga bo i wo Galili awɔrɛ n nu na bu subuka i. Nbaram beberebe gusu yo woori dɔ bo bu suuri i su baari Yerusalem miɛ kpiri n nu.

Kabo bu yoori Yesu sutura barasu ni

⁴² Kabo nyini cɛɛn n tiiri Njumiya cɛɛn n kpokpo cɛɛn ni, i naaso wie,

⁴³ na Yosefu bo i fite Aramatiya mie kpiri n nu ni, na wo fa ahoresi na wo ko anu Gomina Pilato, na wo sere i ka i fa Yesu njunie n ma i. Yosefu yo ti sono jirimafo o Yudafo tereterefo n nu, na i sunsunni kere yo la ka, i nminda sanja bo Nyeme ba di i femeya n wo.

⁴⁴ Gomina Pilato tiiri kabo wo se ni, na wo yo alekutura kabo Yesu akaba awu ni. Na wo sunma afere soja kpian n na i bisa i na i ti ka Yesu wuuri ni, wo ce?

⁴⁵ I tiiri soja n nɔanie wieeri ni, na wo ma Yosefu atin ka i ko fa i njunie ni.

⁴⁶ Na Yosefu ato nzee, na wo yi fuin n baka jaanu n su, na wo fa nzee ni apɔɔndi i. Na wo ko afa i awura yabue bu bo ba lokoti i ayo i fanjunma n nu, na wo fa i ase nu, na wo kundu yabue bambaka afa ato fanjunma n anɔ ni.

⁴⁷ Na Mariya Magadalafo ni, ni Mariya n bo i wa la Yose ni ajina anie anu deke bo bu seeri Yesu ni.

16*Kabo Yesu tengeeri i yiwee n nu ni*

¹ Na naaso sanja bo Njumiya cɛɛn n asin ni, na Mariya Magadalafo ni, ni Salome, ni Mariya n bo i wa la Yakobo ni, aba ato tulaale nvanvani ka bu fa ko go Yesu njunie n su.

² Na Yudafo bakue n bumboori, mone cɛɛn ngarama fuun, fa ko wie tie sanja, na ba ko Yesu fanjunma n su.

³ Sanja bo bu sukɔ ni, na ba bisa bu bengu ka, “Nma ko kundu yi yabue n bo i to fanjunma n anɔ n ma ya?”

⁴ Deke bo i ti na bu seeri so n la ka, yabue n ti bambaka agaya. Na ba tu bu tii anie anu ka yabue n to ma anɔ ni.

⁵ Na ba wura yabue bu fanjunma n nu anu ka gbefene be tana nu saa fomboro su, i wura tanle fofoe yorom be, na ba yo alekutura.

⁶ Na wo se bu ka, “Ma am yo alekutura. M si ka am nienie Yesu Nazaretifo n bo bu kpamaari i baka jaanu n su n wo. Wo tenge i yiwee n nu. I wo ma fen. Am nie, deke bo bu faari i seeri n yaa.

⁷ Am kpie am nyi na am ko se Petoro ni nyingam n kere ka wo du am mo sukɔ Galili, do ye am ko nu i a, dama kabo i yo seeri am lee.”

⁸ Na ba fite fanjunma n nu ni njumatiiri, na bu njunie subobo bu ni sere. Ba bo ma su ase ma be, dama sere ati bu agaya.

Kabo Yesu faari i nu kereeri Mariya Magadalafo ni

[
⁹ Mone cɛɛn ngarama fuun ye Yesu tengeeri i yiwee n nu a. I du mo yiiri i nu kereeri Mariya Magadalafo n wo. Yiri la bara n bo Yesu fon yiiri ajini nsom i nu ni.

¹⁰ Na wo ko atu Yesu susufom ni ka bu wo ahoresaaki ni sun su, na wo se bu ka wo nu Yesu.

¹¹ Sanja bo i seeri bu ka Yesu atenge i yiwee n nu na wo nu i ni, ba de ma i nɔanie ni.

Kabo Yesu faari i nu kereeri i susufo nnyo nbem ni

¹² Nyini sin na Yesu susufo nnyo nbem afite Yerusalem mie kpiri n nu sukɔ aheme, na wo yi i nu akere bu, bo ba koro afa ma nu nde ka yiri lee.

¹³ Na ba kpie bu nyi aba ase nyingam n ka ba ɲu Yesu, ama, haari ni nyini mmɔɔ, ba de má.

Kabo Yesu faari i ɲu kereeri i susufɔ buru ni kunm ni

¹⁴ Nyini kere sin na saɲga bo i susufɔ buru ni kunm n wo diire di su ni, na wɔ yi i ɲu akere bu. Na wɔ jaraki bu kabo bu ahorembaa ti kekereke ni, ni kabo ba yo má yarada ni minem bo bu ɲuuri i saɲga bo i tengeeri i yiwee n nu na bu ba seeri bu ni.

¹⁵ Na wɔ se bu ka, “Am kɔ durunya n kere nu na am kɔ kan m labari kpa n kere adamande kere.

¹⁶ Na sɔnɔ kere bo i yoori m yarada, na am biɛeri i Nyeme nzue, Nyeme dé i tii ji, ama, bo ba yo má yarada ni, Nyeme dí bu jɔre na i yó bu ɲgbɛɛn.

¹⁷ Na bo bu yoori yarada, bu nyá yiko bo bu koro yó ahin alekutura sam ni. Bu fá m дума fɔn yi ajinim fite minem n ɲu, na bu jójó anie barasu barasu bo bu si má bu,

¹⁸ na nzen bu taraari woom wara bu diiri nenge diiwa n mmɔɔ, i yó má bu pui. Bu fá bu saa nana tukpakifɔm ɲu, na bu nyá laifie.”

Kabo Nyeme faari Yesu fun kɔɔri aɲgoro ni

¹⁹ Saɲga bo Mibie Yesu jójóori bu dɔ wieeri ni, na Nyeme afa i afun ako aɲgoro ako atana i saa fɔmbɔrɔ su.

²⁰ Na i susufɔm n ako deke n kere kɔ sukan i labari kpa ni, na Mibie n awo bu dɔ abuka bu, na wɔ ma bu yiko, na ba yo alekutura sam bo i kere ka bu labari kpa kaanwa n kere ti nahɔre wɔ.]

Labari kpa n bo LUKA akere i ni

¹ Ya si Teyofilosi, mine danggu boroori bu nyi na ba kere sam bo bu yoori ya nu fen n afa ase.

² Kabo jore n ti na bu kereeri i ni, yiri ye minem seeri ya n a, nyini minem bo bu woori i bumboori ni, bere nuuri i a, bere kaanri a.

³ To, kabo mini ni m tii ayi koresi anie sereya n kere, fite sangga n bo jore n boori i bu ni, ma nu ka i ti kpa ka mini gusu kere i kere sese i su na i ko atin su fa ma woro Teyofilosi bo a la anyunuyi ni,

⁴ adena a si ka bo ba kan akere u n kere ti nahore wo.

Kabo Nyeme mereke n koori Zakariya do n jore

⁵ Sangga bo Herode yo ti Yudiya fema ni, Nyeme sayoowa dangguyofa be wo bere, bu fere i ka Zakariya. I fite Abiya dee Nyeme sayoowa dangguyofom asese n nu wo. Bu fere i yi dama ka Elizabeti, yiri mmoo ti Aaron busu nufu o.

⁶ Bere nnyom kere yo ti minem bo bu su Nyeme nahore su wo, na bu deer i n onanie maawam ni, na bu yoori dekem kere bo i se ka minem yo i ni.

⁷ Ama, ba wu ma baa, dama Elizabeti ti noroka a, na bekun i ni i hun n kere ayo nkpienm agaya.

⁸ Ceen n be, na Zakariya awo Yudafom Nyeme Sereebiri Awuru n Soa Casi n nu suyo i Nyeme sayoowa dangguyofa juma, dama nyini ceen n ti bu dee busu nufom ceen wo.

⁹ Nyeme sayoowa dangguyofom la bu nana sayoowa be. Bu tu mbaa a, na bu yi bu nu kun. Nyini ceen ni, bu yiiri Zakariya a, ka i wura bu Nyeme Sereebiri Awuru n Soa Casi n nu, na i kunkun ayiri kunkuunwa nvanvani. Nyini ti, na wo ko awura nu.

¹⁰ Ayiri nvanvani n kunkun sangga ba juuri ni, na jama kere aka gisan nu susere Nyeme.

¹¹ Na Nyeme mereke aba ayi i nu akere Zakariya, i jina Mikun n yoowa yoobiri fomboro su, deke bo wo kunkun ayiri nvanvani n ni.

¹² I nuuri mereke n so ni, na wo bo biri, na sere ati i.

¹³ Ama, na mereke n ase i ka, "Zakariya, ma a ma sere ti u. Nyeme ade u sere ni. U yi Elizabeti ba wu baabieso, na a tun i dama ka Yohane.

¹⁴ Baa n bo i wu i n dee ti, u ahore jo agaya ko sin su, na mine danggu gusu ahore jo.

¹⁵ Baa ni ba yo sono bambaka a Nyeme do. Wo yo ma daka ka i nu nzan fieo. Haari i ni kunnu, ye Nyeme Awiewie Casi ni wura i nu a.

¹⁶ Na i ma Yisareli busu nufom danggu kpie bu nyi ba yiri Micera Nyeme n bo i ti ye ni ka bu su i n do.

¹⁷ Awiewie Casi n fanga wo yiri nu ka Nyeme onanie kanfo Eliya a, yiri du Micera nyunu a, adena i yo nbaasim ni bu nbaam afien danggu a, na i kaaki mine keteewam sunsunni, na bu yo mine kpam, na i sese Nyeme minem su se i."

¹⁸ Na Zakariya ase Nyeme mereke n ka, "Nzu deke ye m fa si ka jore n bo a sujoko i ni yo nahore a? Dama ma yo kpien, m yi gusu ayo buke."

19 Na merেকে n ase i ka, “Bu fere m ka Gabiriyeli. Mini wo Nyeme nyunu a. Ye wɔ sunma m u dɔ ka m fa ahin labari kpa n ba ma u a.

20 Ti fɛn. Nɔaniɛ n bo m sujɔɔ i ni bá yo nahɔre wɔ, saŋga bo Nyeme koro ka i yo ni. Ama, a yo má m nɔaniɛ n yarada dɛɛ ti, a tó amuna, na a kóro jɔɔ má haari cɛɛn bo a bá ŋu ka nɔaniɛ n bo m sujɔɔ i n ayo nahɔre.”

21 Nyini saŋga n kere minem n toko jina gisan nu ŋminda Zakariya, na ba birisi deke bo i ti na wɔ cɛ Sɔɔ Casi n nu sɔ ni.

22 Saŋga bo i ba fiteeri ni, wɔ koro ajɔɔ má bu dɔ. Dɔ na ba fa nu ka wɔ ŋu alekutura deke be Sɔɔ Casi n nu. Dama wɔ koro ateke má i nɔɔ ajɔɔ má, se i fa i saa jɔɔ bu dɔ a.

23 Saŋga bo Zakariya ba yoori i juma kere wieeri Nyeme Sereebiri Awuru n nu ni, na wɔ kpie i nyi akɔ i bɔsu.

24 Wɔ cɛ má, na i yi Elizabeti anyinse. Wɔ yi má i ŋu fofoe nu haari sara nnu.

25 Na wɔ se ka, “Kisa, ya Micera n anie aŋu m aŋunfɔ. Wɔ yi m afite nyinse bambaka nu.”

Kabo Nyeme merেকে n kɔɔri Mariya dɔ n jɔre

26 Saŋga bo Elizabeti nyinse n ba juuri sara nsen ni, na Nyeme asunma merেকে Gabiriyeli mie be bo i wo Galili awɔre n nu, na bu fere i ka Nazareti ni,

27 ka i kɔ fa labari ma sunguru be bo bu fere i ka Mariya ni. Nyini saŋga, ba fa i ace biɛsɔ be, bu fere i ka Yosefu, i fite Feme Davidi dɛɛ busu n nu wɔ. I ni Mariya nya saŋga da má, dama wɔ nya ja má i.

28 Na merেকে n awura i ŋu, na wɔ se i ka, “Sunguru, m yo u anse ni terefie. A di Nyeme ahɔroma, na i kaaki wo u dɔ.”

29 Mariya tiiri ahin nɔaniɛ n ni, na wɔ yo i alekutura, na wɔ birisi ase ka, “Ahin anse yoowa n bu la ka se wɔ lɛɛ?”

30 Na merেকে n ase i ka, “Mariya, má a ma sere ti u. A di Nyeme ahɔroma beberebe.

31 So u sui na a ti. M ŋa a bá nyinse, na a wú baabiɛsɔ, na a tún i duma ka Yesu.

32 I bá yo sɔnɔ bambaka, na bu fere i ka, Nyeme Feme Kpiri n Wa. Ya Micera Nyeme fá i na Davidi femeya bie ma i,

33 na i yó Jakobu busu nufɔm feme saŋga kere, na i dɛɛ femeya ni lá má awieeri.”

34 Na Mariya abisa merেকে n ka, “Ye ahin yó se koro yo a? Dama m nya si má biɛsɔ.”

35 Na merেকে n abɔ i nu ka, “Nyeme Awiewie Casi ni bá wura u ŋu, na Nyeme dɛɛ yiko n bá wo u dɔ. Nyini ti, baa n bo a wú i ni, i bá yo baa casi wɔ, na bu fére i ka Nyeme Wa.

36 Nie fɛn, Elizabeti bo i ti u lamɔkɔ ni, yiri bo bu ŋa i ti ŋɔrɔka ni, haari ni bo wɔ yo buke ni, wɔ nyinse, i sara nsen lɛɛ.

37 Pui wo má bere bo Nyeme koro yo má i.”

38 Na Mariya ase i ka, “Tɔ, m ti Micera n afani wɔ. Ma nyini sam kere yo ma m kabo a se ni.” Na merেকে n akɔ ayaki i.

Kabo Mariya kɔ niɛri Elizabeti busu ni

39 Nyini dɛɛ sin, wɔ cɛ má, na Mariya akpa i ŋu, na wɔ yasu ndende akɔ Zakariya ni i yi Elizabeti bɔsu ka i kɔ nie bu busu. Nyini mie n wo Yudiya asien n su bukam n afien wɔ.

40 Na wɔ kɔ awura Zakariya dika, na wɔ yo Elizabeti anse.

41 Elizabeti tiiri Mariya anse yoowa n ni, na baa n bo i wo i kunnu n akpisi i ŋu. Dɔ na Awiewie Casi n awura Elizabeti ŋu,

⁴² na wɔ bo awie kpa, i ŋa, “Nyeme ayo u kisi atara nbaram kere, wɔ kaaki ayo baa n bo a bita i nyinse n kisi.

⁴³ Nzu jirima la ahin n bo Nyeme afa ama m n a, ka m Mibie deɛ ni aba anie m busu a?

⁴⁴ Dama m tiiri u anse yoowa n na baa n bo i wo m kunnu ni, akaba akpisi i ŋu ni akunnujo.

⁴⁵ Terefie wo u do, dama a yo yarada ka Mibie n noanie n bo wɔ kan akere u ni, i ba yo yiiwa angba.”

Kabo Mariya diiri jue kansiri Nyeme ni

⁴⁶ Na Mariya ase ka,

“M kansi Mibie ni m ahorembaa su.

⁴⁷ M ahore ajo Nyeme ŋu, yiri bo i ti m Tiidefo ni.

⁴⁸ Haari ni bo m ti i afani n kere ni, i wara afi ma m sa.

Fite nyuma fa ko, minem kere ba fere m ka terefiefo.

⁴⁹ Dama ka Micera yiko kere fo ni ayo sakpa beberebe ama m, i duma ti casi.

⁵⁰ Saŋga kere saŋga i si anunfo o, i si minem bo bu soro i n kere anunfo o.

⁵¹ Wɔ fa i yiko asaa ni, afon asandi karambanifom, ni bu sunsunni tie n kere.

⁵² Wɔ yi nfeme bambakam afite bu femeya biem n su, na wɔ ye tarakam saa su.

⁵³ Wɔ ma ahofom nenje kpakpam na bu kunnu ayi, na wɔ fon nengefom na ba ka bu saa ngbeen.

⁵⁴⁻⁵⁵ Sesesu n bo i yo faari na i diiri i di ni ya nam ni, wɔ ma i ayo yiiwa, ye wɔ ba abuka Yisarelifom bo bu su i ni.

I wara afi ma Abraham sa.

Wɔ si i ni i sinfom kere anunfo saŋga kere.”

⁵⁶ Na Mariya aka Elizabeti bi, sara nsan, na wɔ nya aba akaaki ako i bosu.

Kabo bu wuuri Yohane Nyeme Nzue Biefo n ni

⁵⁷ Elizabeti kutu ceɛn ni, na wɔ wu baabieso.

⁵⁸ Na Elizabeti tanafom, ni i lamosim tiiri ka Micera n ayo i sakpa bo i la ma anusu ni, na bu ni yiri kere kunnu ajo.

⁵⁹ Baa n lemocue ceɛn n ba juuri ni, na ba tien bu noo na bu wura i kenkenne, na bu tun i duma. Ma bu koro ka bu fa i si Zakariya duma fa tun i a.

⁶⁰ Ama, na i ni ase ka, “Ai, bu fere i ka Yohane wɔ.”

⁶¹ Na ba se i ka, “U lamosi nu, bu fere ŋma so a?”

⁶² Na ba fa bu saa ajɔjo baa n si n do, na bu si duma bo i koro ka bu fa tun i wa ni.

⁶³ Do na Zakariya afa i saa akere ka, bu ma i deke be na i kere, na wɔ de i na wɔ kere ka, “I duma la Yohane.” Na nyini jore n ayo bu kere alekutura.

⁶⁴ Jina n nu bere, na Nyeme ateke i noo na wɔ bo i bu ajɔjo bekun, na i sukansi Nyeme.

⁶⁵ Na sere ati bu tanafom kere. Na minem akan nyini sa n bo i yoori n jore abara aye Yudiya awore n bukam n kere su.

⁶⁶ Na minem kere bo bu tiiri i n afa jore n ase bu ahore su na bu susunsun, na ba bisa bu ŋu ka, “Baa n ba nyiiri, i yo nzu baa leɛ?” Bu seeri so ni, dama bu kere anu ka Micera n yiko n wo i ŋu.

Kabo Zakariya kaanri Nyeme nɔanie n ni

⁶⁷ Na Awiewie Casi n awura baa n si Zakariya ɲu, na wɔ kan Nyeme nɔanie, i ɲa,

⁶⁸ “Am ma ya kansi ya Micera ni,
yiri bo i ti Yisarelifɔm Nyeme ni.

Dama ka wɔ ba anie i minem busu,
na wɔ de bu tii aji.

⁶⁹ Wɔ ma ya tiidefɔ fangafɔ,
i fite i amusuisufɔ Feme Davidi dɛɛ busu n nu wɔ.

⁷⁰ Nyeme yo maari i nɔanie kanfɔ casim jɔjɔri dawa sanɲa

⁷¹ ka i bá de ya tii fite ya kpɔfɔm,
ni bo bu koro má ya n saa nu.

⁷² Sɔ ye i kereeri ka i si ya nam aɲunfɔ,
na i wara fi má i sɛsɛsu casi n sa a.

⁷³⁻⁷⁴ I yo faari nyini sɛsɛsu n na wɔ di i di ni ya na Abraham

ka i de ya tii fite ya kpɔfɔm saa nu,
adena ya koro su i bo ya soro má sɛɛ,

⁷⁵ na ya yo casi na ya yo sa bo i kɔ atin n su i dɔ,
haari ni ya ɲɔɔ awieeri.

⁷⁶ Wɔrɔ, m wa ni, bu bá fere u ka
Micera Nyeme Kpiri n dɛɛ nɔanie kanfɔ.

Dama a dú ya Micera n mɔ
na a kó sɛɛ i atin su ɲmindanda i.

⁷⁷ Na a má i minem si ka i fá bu satie ce bu n dɛɛ ti,
ye i dé bu tii ji a.

⁷⁸ Dama Nyeme si ya aɲunfɔ agaya n dɛɛ ti,
i má aɲgoro wein n ta ma ya.

Nyini wein n ti kabo wie fite na i ti n wɔ,

⁷⁹ na i má wein ta ma minem bo bu wo awosin nu
na bu soro yiwee sɛɛ ni.

Na i bá kere ya atin bo i ma ahoreda.”

⁸⁰ Na baa n anyi, na Nyeme ayo i sunsunni fanɲa, na wɔ kɔ awo boro kpantain nu dɔ i ɲumi, haari cɛɛn n bo i ba yiiri i ɲu fiteeri fofoe nu kere Yisarelifɔm ni.

2*Kabo bu wuuri Yesu ni*

¹ Nyini sanɲa na Romafɔm femɛ kpiri n bo bu fere i ka Siza Agusito ni, ama ɲɔɔ ka bu kɛɛ i minem kɛɛ duma.

² Nyini sanɲa ni tiiri ciciri su dɛɛ minem duma kɛɛɛwa n ɲusu a. Nyini sanɲa n ye sɔnɔ be bo bu fere i ka Kurenɔsi n ti Siriya awɔɛ n nu gomina n a.

³ Nyini ti, na deke bo sɔnɔ kɛɛ wo na ba kɔ bu na mie su na bu kɔ kere bu duma.

⁴ Dɔ na Yosefu gusu afite Nazareti mie n bo i wo Galili awɔɛ n nu ni, na i kɔ kɛɛ i duma. I kɔori mie n bo bu fere i ka Betilehem na i wo Yudiya awɔɛ n nu wɔ, dɔ ye bu wuuri Feme Davidi a. Yosefu ti Feme Davidi dɛɛ busu nufɔ n ti ye i kɔori awɔɛ n nu dɔ a.

⁵ I ni Mariya bo ba fa ace i ni kɔori a. Nyini sanɲa ni, Mariya bita nyinse.

⁶ Bu wo dɔ n na sanɲa n aju bo Mariya wu baa.

⁷ Ba nya má fofoe wɔfɔm daabiri n nu bo bu da. Nyini ti, na ba kɔ awura deke bo bu fa nenɲendɔrem wura, dɔ na wɔ wu i sunɲuru baa, baabiesɔ.

Na wɔ fa baa n apɔɔndi sanvuin nu, na wɔ fa i ada neɲgendɔrem diire diibiri alaka nu.

Kabo merɛkem tiɛri nbɔɛsasafɔm ɲu ni

⁸ Nbɔɛsasafɔm nbem wo nyini awɔre n nu dɔ sunie bu nbɔem dika, kɔɲgue,

⁹ na Micera n merɛke akaba atie bu ɲu, na Micera n ama i wein ata abara aye bu, na sere ati bu agaya,

¹⁰ ama, na merɛke n ase bu ka, “Má am ma sere ti am. Ma ba ka m ba ma am labari kpa a. Nyini labari ni, yiri má minem kere ahore jɔ agaya.

¹¹ Ahin kɔɲgue n nu bere, ba wu am Tiidefɔ ni, Feme Davidi bosu n nu, yiri ti Kristo n bo Nyeme ase ka i súnma i n a, am Mibie ni.

¹² Deke bo i kere am na am sí nu n la ka, am kó ɲu ka ba fa i apɔɔndi sanvuin nu afa i ada neɲgendɔrem diire diibiri alaka nu.”

¹³ Jinaabiri n nu bere na merɛkem beberebe akaba afite aɲgoro abuka nyini kun n su, na bu sukansi Nyeme, bu ɲa,

¹⁴ “Kansi wo Nyeme bo i wo aɲgoro n dɔ.

Na ahoreda wo minem bo bu wo asiɲgu fen n dɔ

na Nyeme ahore ajo bu ɲu ni.”

¹⁵ Saɲga bo merɛkem n fiteeri bu dɔ kpieeri bu nyi kɔɔri aɲgoro ni, na nbɔɛsasafɔm ni ase bu ɲuɲu nu ka, “Am ma ya kɔ Betilehem mie n nu na ya kɔ ɲu deke n bo wɔ yo na Micera n ayi akere ya ni.”

¹⁶ Nyini ti, na ba kɔ ndende, na ba kɔ aɲu Mariya ni Yosefu, na ba ɲu baa n gusu ka i da neɲgendɔrem diire diibiri alaka n nu.

¹⁷ Saɲga bo bu kɔ ɲuuri baa n ni, na ba kan nɔanie n kere bo merɛke n fa maari bu fa kɔ baa n ɲusu jɔre n akere minem.

¹⁸ Na minem kere bo bu tiiri kabo nbɔɛsasafɔm seeri bu ni, n ayo alekutura.

¹⁹ Na Mariya afa nyini sereya n kere bo i yoori ni ase i ahore su.

²⁰ Na nbɔɛsasafɔm n akpie bu nyi akɔ bu nbɔem n bi, na bu sukansi Nyeme na bu subo tuntun i fa kɔ deke n kere bo ba ɲu i na ba ti i n deɛ ti. Deke n kere yoori kabo merɛke n seeri bu n wɔ.

Kabo bu tuunri Yesu duma ni

²¹ Saɲga bo lemɔcɔe cɛen n ba juuri ni, na ba wura baa n kenkenne, na ba tun i duma ka Yesu. Duma n bo merɛke n fa maari i ka, na i ni nyinseeri i n lee.

Kabo bu faari Yesu kɔɔri Nyeme Sereebiri Awuru n nu barasu ni

²² Na cɛen n aju bo Yosefu ni Mariya kɔ yo bu fin ɲmisi sayoowa kabo Nyeme nɔanie kpamaawa n bo i fa maari Moyisi n kereeri ka bu yo ni. Nyini ti, na ba fa baa n akɔ Yerusalem mie kpiri n nu na bu kɔ fa i wura Micera n saa nu.

²³ Kabo ba kere i Micera n nɔanie kpamaawa n nu ni, ba kere ka, “Baa-biesɔ kere bo i ti i ni sunɲuru baa, i ti ye ni ka bu fa i kɔ ma Micera ni, na i yó i deɛ.”

²⁴ Na ba kɔ ayo yoowa, kabo Micera n nɔanie kpamaawa n akere ka bu yo i ni, bu faari bumbuku wara tiiwa nnyɔ yoori yoowa n a.

²⁵ Nyini saɲga ni, sɔnɔ be wo Yerusalem, bu fere i ka Simeyon. I yo ti sɔnɔ bo i yo sa bo i kɔ atin su Nyeme dɔ ɔ, na i ti sɔnɔ bo i soro Nyeme, na i ɲminda fa kɔ saɲga bo Yisarelifɔm nya bu tiide n wɔ. Na Awiewie Casi n wo i ɲu.

²⁶ Na Awiewie Casi n ama wɔ si ka i wú má, má ka i nyumbaa aba aɲu Kristo ni, Tiidefɔ n bo Micera n ase ka i súnma i ni.

²⁷ Na Awiewie Casi n ama Simeyon ako Nyeme Sereebiri Awuru n nu. Nyini sanja n ye Yesu si ni i ni gusu afa i ako ka bu ko yo yoowa kabo Nyeme noanie kpamaawa n akere ka bu yo n a.

²⁸ Simeyon nuuri baa n so ni, na wo kaba ade baa ni i saa nu, na wo kansi Nyeme, i na,

²⁹ “M Mibie, u noanie n bo a yo seeri m ni, ayo yiiwa, ma mini u akoo n atin kisa na m fite durunya n nu ni ahoreda.

³⁰ Dama kisa mini ni m tii nyumbaa anu Tiidefo ni,

³¹ yiri ye a sese i su,

ye a ma minem kere nyumbaa anu i a.

³² Yiri ti wein n a, na i kere minem u atin ni,

bere bo bu ti ma Yudafom ni,

na i wura Yisarelifom kpiri,

bere bo bu ti u dee minem ni.”

³³ Simeyon jooori baa n jore so ni, na i si ni i ni ayo alekutura.

³⁴ Na Simeyon asere Nyeme, na wo yo bu kisi. Na wo se baa n ni ka, “Ahin baa n ye Nyeme ayi i ka i ma Yisarelifom dongu kpaasi, na dongu gusu yasu n a. Yiri yo deke bo i ti alekutura sa, na minem dongu ba kete i.

³⁵ So ye i ba yi bu asiri nu sunsunni tiem kere fite fofoe nu a. Na yiri ti, u ahore saaki agaya, kabo takobe kpie sono na i yo ya ni.”

³⁶⁻³⁸ Nyini sanja n nu no o, na bara be, i ti Nyeme noanie kanfo o, na i gusu wo do, na wo ba baa n bi. I duma la Anna, na bu fere i si ka Fanuweli, Aseri dee busu nufoa. Bara n ti buke wo nahore su, i jaari i hun, bu afo nso ye i kaari kunafo a. Nyini sanja ni, i la afo aburamocue ni nna. Wo kpaaki ayaki ma Nyeme Sereebiri Awuru ni, i cici i noo so o, na i ko susere Nyeme, wiesu ni kongue. I ba juuri baa n bi ni, na wo da Nyeme asi na yiri gusu ajojo baa n jore akere minem kere bo bu nminda ka Nyeme sunma Tiidefo n na i de Yisarelifom tii ji ni.

Kabo bu faari Yesu kooori awuru ni

³⁹ Sanja bo Yosefu ni Mariya yoori yoowa n kere bo Micera n noanie kpamaawa n kere ka bu yo n wieeri ni, na ba kpie bu nyi ako bu bosu Nazareti bo i wo Galili awore n nu ni.

⁴⁰ Na baa n anyi, na wo nya fanga ni Alecira, na Nyeme ahorma awo i do agaya.

Kabo bu faari Yesu kooori Yerusalem mie kpiri n nu ni

⁴¹ Afo kere afo, Yesu si ni i ni ko Yerusalem mie kpiri n nu wo, na bu ko di Butara eenkpiri, bo bu di i na bu tenge su kabo Nyeme yo deeru bu nam tii fiteeri Ijipitifom asien su ni.

⁴² Sanja bo Yesu ba juuri afo buru ni nnyo ni, na ba ko na bu ko di eenkpiri n kabo bu yo afo kere afo ni.

⁴³ Bu ba diiri eenkpiri n wieeri na bu sukpie bu nyi ko awuru ni, na Yesu yiri aka Yerusalem do. I si ni i ni asi ma ka wo ka do.

⁴⁴ Bu sunsunni la ka i wo abengu natiirifom n nu wo, nyini dee ti, bu wo ko su wo haari wie ko suto. Do na ba bo i bu sunienie i, bu lamosim ni bu danfom nu.

⁴⁵ Ama, ba nu ma i, na ba nya kpie bu nyi ako Yerusalem na bu ko nienie i.

⁴⁶ I lesan een na ba ko anu ka i tana Nyeme Sereebiri Awuru n nu, Nyeme noanie kerefom afien suso i sui, na i subisa bisaawam.

⁴⁷ Na minem bo bu tiiri i noanie n kere ayo alekutura, fa ko kabo i la si na i bo noanie bisaawam nu barasu ni.

⁴⁸ Na san̄ga bo i si ni i ni ba ŋuuri i n na ba miε, na i ni abisa i ka, “M wa, nzu ti ye a yo ya sɔ a? A ma mini ni u si ahore asaaki akɔ asin su, haari ya nati wo u niεniε su.”

⁴⁹ Na wɔ se bu ka, “Nzu ti ye am nati niεniε m busu a? Am si má ka wɔ yo daka ka m wo m Si awuru n nu wɔ?”

⁵⁰ Ama, ba ti má nɔaniε n bo i seeri bu nu n bu.

⁵¹ Na Yesu asu bu su, na ba kp̄ie bu nyi akɔ Nazareti miε n nu, na wɔ de bu nɔaniε. Na i ni afa nyini sam kere ase i ahore su.

⁵² Na Yesu sunyi, na i alecira subuka su, na i sayoowam susun Nyeme ni adamande kere nu.

3

Kabo Yohane Nyeme Nzue Biefo n kaanri Nyeme jɔre ni

¹ Romafɔm femε kp̄iri bo bu fere i ka Siza Tiberiyosi n diiri i femeya ni, afɔ buru ni nnu, nyini san̄ga ye sɔnɔ be bo bu fere i ka Pɔntiyo Pilato n ti Yudiya awɔre n nu gomina, na sɔnɔ be bo bu fere i ka Herode n niε Galili awɔre n nu su, na i gɔrɔ bo bu fere i ka Filipu n gusu niε awɔre nnyɔ nbem bo bu fere bu ka Iturayɔ ni Tarakonitidɔ n su, na sɔnɔ be bo bu fere i ka Lusaniya n gusu niε awɔre n bo bu fere i ka Abilene n su.

² Nyini san̄ga ni, Anasi ni Kayafasi jina Nyeme sayoowa dɔnguyofɔm kere kp̄ien n jinaabiri a. Na Nyeme afa i nɔaniε n ama Yohane Zakariya wa, boro kpantain n nu.

³ Nyini ti, na Yohane akɔ Yodan kunma n awɔre n kere n nu sukan Nyeme jɔre, i ŋa, “Am kaaki am wo na m bie am Nyeme nzue, na Nyeme fa am ŋgasi ni am satie kere ce am.”

⁴ Sɔ ye wɔ yo yiiwa, kabo Nyeme ma ba kere i nɔaniε kanfɔ Esaya dεε kadasi n nu ka,

“Sɔnɔ be subo ndoori boro kpantain n nu ka,

‘Am sεε Mibiε n atin su,

na am yo i atin n dɔŋgu.

⁵ Na bu bá bereki bukam n ni kperem kere,

na bu bá tɔtɔ kunma kunma kere bo i wo buka n bu,

na atin kere bo wɔ biri, bu bá tenge,

na bu bá tɔtɔ i kunma kunma n kere.

⁶ Na adamande kere bá ŋu kabo Nyeme dé bu tii ji barasu ni.’ ”

⁷ Na jama beberebe afite aba Yohane dɔ ka i bie bu Nyeme nzue. Na wɔ se bu ka, “Ambere burukɔnufɔm bo am ti ka woom ni, ŋma seeri am ka am ŋmati fite suicin kekereke n bo Nyeme sufa ba am dɔ n nu a?”

⁸ Am yo sakpa bo i kere ka am akaaki am wo. Na má am sunsun ka, Abraham ti am na dεε ti, na am koro fite nyini suicin n nu. M suse am wɔ lεε, ka, Nyeme koro ma ahin yabuem ni kaaki nbaam ma Abraham.

⁹ Nyeme asi i samba n nana ase baka kere bu na i kp̄ie i ji sin nu, yiri bo i suuwa ti má kpa ni.”

¹⁰ Na jama n abisa Yohane ka, “Ye ya yo se wɔ lεε kisa n a?”

¹¹ Na wɔ bɔ bu nu ka, “Sɔnɔ kere bo i la tanlεε nnyɔ, i mi ma sɔnɔ bo i la má be n kun, na bo i la diire gusu yo sɔ.”

¹² Na lampodefɔ nbem aba i dɔ ka i bie bu Nyeme nzue, na ba bisa i ka, “Ya Kerefo, ye ya yo se wɔ?”

¹³ Na wɔ se bu ka, “Má am de ŋwaa kɔ tara kabo i ti ye ni ka am de ni.”

¹⁴ Na soja nbem gusu aba i dɔ aba abisa i ka, “Ye yere di, ya yó se wɔ?” Na wɔ se bu ka, “Má am miε be de ŋwaa i dɔ, na má am tun be nzuin. Am ma am nyunu yi am ŋkatɔ.”

¹⁵ Na minem bo bu tana niε Kristo n atin nu ka i ba ni, yiri Tiidefo n bo Nyeme ase ka i sunma i ni, bu sunsun ka, beni, kisa Yohane ti Kristo Tiidefo n a.

¹⁶ Yohane siiri nyini dεε ti, na wo se bu ka, “Mini sufa nzue biε am a, na am yo casi, ama, bo i tara m fieo wo m sin suba. M ti kaan ni bo m dodo i. Yiri fa Awiewie Casi n ni sin yo am casi a, kabo sono biε nzue na i yo casi ni.

¹⁷ I bita i ngani bakiti fieeba suba, na i ba bakiti yi ngani mbaa n busu go i bondo nu, na i nya yara kunkun n sin n bo i je na i no ma n nu.”

¹⁸ So ye Yohane kaanri labari kpa n kereeri minem a, na wo joro jore dongu ase bu ka bu kaaki bu wo.

¹⁹ Ama, na Yohane akan Feme Herode ndie ka wo fa i goro yi Herodiya aja i hun ngoo su, na wo kaaki ayo sa ngbenngben beberebe.

²⁰ I satie bo i ti tie tara i kere n la ka i taraari Yohane nyiiri i dansaraka a.

Kabo Yohane biεeri Yesu Nyeme nzue barasu ni

²¹ Sanga bo Yohane biεeri minem Nyeme nzue ni, na wo biε Yesu gusu. Bu biεeri i wieeri, na i susere Nyeme ni, do na angoro n ateke,

²² na Awiewie Casi n ajura aba atana i nu ka tiiwa dεε su. Na wo ti akonvi be nga angoro, i na, “Woro ti m wa a, m koro u agaya, m ahore ajo u nu.”

Yesu Kristo nam дума yaa

²³ Sanga bo Yesu boori i juma n bu ni, nyini sanga i la afo aburasan. Mine yo sunsun ka i si la Yosefu bo i ti Heli wa n wo, na Heli si la

²⁴ Matati, na Matati si la Levi, na Levi si la Meleki, na Meleki si la Yanayi, na Yanayi si la Yosefu nyinga n bo

²⁵ i si la Matatiya ni, na Matatiya si la Amosi, na Amosi si la Nahumu, na Nahumu si la Esili, na Esili si la Nagayi,

²⁶ na Nagayi si la Maati, na Maati si la Matatiya nyinga n bo i si la Semeni ni, na Semeni si la Yoseki, na Yoseki si la Yoda,

²⁷ na Yoda si la Yowanani, na Yowanani si la Resa, na Resa si la Zorobabeli, na Zorobabeli si la Salatiyeli, na Salatiyeli si la Nieri,

²⁸ na Nieri si la Meleki nyinga n bo i si la Adi ni, na Adi si la Kosamu, na Kosamu si la Elimadamu, na Elimadamu si la Eri,

²⁹ na Eri si la Yosuwa, na Yosuwa si la Eliyeza, na Eliyeza si la Yorimu, na Yorimu si la Matati nyinga bekun, na nyini Matati n si la Levi nyinga bekun,

³⁰ na nyini Levi n si la Simeyon, na Simeyon si la Yuda, na Yuda si la Yosefu nyinga n bo i si la Yonamu ni, na Yonamu si la Eliyakimu,

³¹ na Eliyakimu si la Meliya, na Meliya si la Menna, na Menna si la Matata, na Matata si la Natani, na Natani si la Feme Davidi,

³² na Feme Davidi si la Jese, na Jese si la Yobedi, na Yobedi si la Boosi, na Boosi si la Sala, na Sala si la Naasoni,

³³ na Naasoni si la Aminadabu, na Aminadabu si la Adimini, na Adimini si la Arani, na Arani si la Hesarom, na Hesarom si la Farese, na Farese si la Yuda nyinga n bo

³⁴ i si la Jakabu ni, na Jakabu si la Izaki, na Izaki si la Abraham, na Abraham si la Tara, na Tara si la Nakoro,

³⁵ na Nakoro si la Seruku, na Seruku si la Ragawu, na Ragawu si la Faleki, na Faleki si la Ebera, na Ebera si la Sala nyinga bekun,

³⁶ na nyini Sala n si la Keena, na Keena si la Arafakadi, na Arafakadi si la Semu, na Semu si la Nowa, na Nowa si la Lameki,

³⁷ na Lameki si la Matusala, na Matusala si la Henoki, na Henoki si la Yareti, na Yareti si la Malsheeli, na Malsheeli si la Keena nyinga bekun,

³⁸ na Keena n si la Enosi, na Enosi si la Seti, na Seti si la Adam, na Adam si la Nyeme.

4

Kabo Sitana yoori Yesu na i nie ni

¹ Awiewie Casi n woori Yesu nu agaya, na wo fite Yodan kunma n awore n nu, na Awiewie Casi n afa i ako boro kpantain n nu ko sukere i atin.

² I woori do ceen aburana, na Sitana ayo i na i nie ka, i yo yiri Sitana n dee koroowa, nzen i yo ma i. Nyini ceen aburana n kere ni, wo di ma pui, nyini dee sin, na aho aba ati i.

³ Na Sitana n ase i ka, "Nzen a ti Nyeme Wa, se ahin yabue n na i kaaki diire."

⁴ Ama, na Yesu abo i nu ka, "Ba kere i Nyeme Jore Kadasi n nu ka, ma diire ngumi ma sono ngoo a."

⁵ Na Sitana afa i afun ako angoro lenlenge, na i nyumbaambaa n nu bere, na wo kere i durunya n nu asien n kere.

⁶ Na wo se i ka, "Woro ye m ma a nie ahin asien n kere su a, na m fa bu ajekem kere ma u, dama Nyeme afa i kere awura m saa nu, na mini gusu koro fa ma sono kere bo m koro.

⁷ Nzen a kutu suuri m, m fa nyinim kere ma u."

⁸ Na Yesu ase i bekun ka, "Ba kaaki akere i Nyeme Jore Kadasi n nu ka, 'Kutu Micera u Nyeme ni, na a su yiri ngumi.' "

⁹ Na Sitana n akaaki afa Yesu ako Yerusalem mie kpiri n nu, na wo fa i ako ajina Nyeme Sereebiri Awuru n tii su lenlenge, na wo se i ka, "Nzen a ti Nyeme Wa, fite fen ti to asienngu na m nie.

¹⁰ Dama ba kere i Nyeme Jore Kadasi n nu ka, 'Nyeme ma i merkem noo ka bu nie u dika na bu kanda u.'

¹¹ Ba kaaki akere i ka, 'Bu fa bu saa so u nu, na ma u jaa bo yabue be.' "

¹² Ama, na Yesu akaaki ase i ka, "Ba kaaki akere i Nyeme Jore Kadasi n nu ka, 'Ma a yo Micera Nyeme n na a nie kabo i yiko ti barasu.' "

¹³ Sangha bo Sitana n yoori Yesu yoowa barasu n kere na i nie i ni, na wo ko ayaki Yesu ka.

Kabo Yesu boori i juma bu Galili awore n nu ni

¹⁴ Na Yesu akpie i nyi ako Galili awore n nu, ni Awiewie Casi n dee yiko nu. Na i labari abara aye nyini awore n kere pepere nu.

¹⁵ Na wo kere minem Yudafo m tientienbunoo soom nu, na sono kere akansi i.

Kabo Yesu na Nyeme noanie kanfo la ma jirima i bosu ni

¹⁶ Na Yesu ako Nazareti mie n nu, do ye bu taari i a, na wo nyi, na Yudafo m Numiyi ceen n be, na wo ko bu tientienbunoo soo n nu, kabo i nati ko ni. Na wo yasu ajina ka i kan Nyeme Jore Kadasi ni,

¹⁷ na ba fa Nyeme noanie kanfo Esaya dee kadasi n ama i. Na wo teke i, na wo nie anu awore n bo ba kere i nu ka,

¹⁸ "Micera n Awiewie n wo m do, dama wo yi m ka m kan labari kpa n kere jaarifom.

Na wɔ sunma m ka m kɔ minem bo ba tara bu domuem n dɔ,
 na m se bu ka m bá de bu tii ji,
 na m kɔ anyinsinm dɔ,
 na m se bu ka m bá teke bu nyumbaa,
 na m kɔ minem bo bu bita bu miɛ n dɔ,
 na m se bu ka m bá de bu tii ji,

¹⁹ na m bo ndoori ka,
 afo n nu Micera ni má i minem di i ahɔrɔma.”

²⁰ Na Yesu akan awie, na wɔ kata Nyeme Jɔre Kadasi n su, na wɔ fa ama i bitafo ni, na wɔ tana. Na minem kere bo bu wo tientienbunɔɔ sɔɔ n nu n afa bu nyumbaa akpama i ɲu.

²¹ Na wɔ se bu ka, “Nyuma dɛɛ cɛɛn n nu, ahin Nyeme Jɔre Kadasi n bo ma kan i na am ati i ni, ayo yiiwa.”

²² Na sɔnɔ kere akan kpa ama i, na ba yo alekutura kabo i nɔanie jɔjɔwa n ti kpa barasu ni, na ba bisa bu ɲuɲu nu ka, “Má Yosefu wa n lɛɛ?”

²³ Na Yesu ase bu ka, “M si tenle ka am bó m ahin anyundere ni ka, ‘Ayirifo, tuntun u ɲu.’ Na am sé m ka, ‘Sam n bo ya tiiri ka a yoori bu Kapenam miɛ kpiri n nu ni, yo bu u bɔsu fen gusu na ya niɛ.’ ”

²⁴ Na Yesu akaaki ase bu ka, “Nahɔre ye m suse am n a, Nyeme nɔanie kanfo la má jirima haari kaan sɔ mmɔɔ i bɔsufɔm dɔ.

²⁵ Am tenge su kabo Nyeme nɔanie kanfo Eliya dɛɛ sangga n na nzue ato má afo nsa ni kpaaki nu, na ahɛ bambaka tɔori ni. I ti nahɔre wɔ ka, nyini sangga, kunafo m beberebe woori Yisareli asien n su,

²⁶ ama, Nyeme asunma má Eliya nyini kunafo m be dɔ, se i sunmaari i kunafo kun be dɔ a, i wo miɛ be bo bu fere i ka Zarefati na i ti má Yudafo m miɛ kpiri n wɔ, i wo Sidon dɛɛ awɔre n nu wɔ.

²⁷ Sasu bekun, Nyeme nɔanie kanfo Elisa dɛɛ sangga, i ti nahɔre wɔ ka kokobi yo taraari minem beberebe Yisareli asien n su, ama, Nyeme ama wɔ tuntun má bu kun n kpein mmɔɔ, se i tuntuunri kokofɔ kun be wɔ, bu fere i ka Naama, i ti má Yudafo, i fite Siriya awɔre nu wɔ.”

²⁸ Minem bo bu wo sɔɔ n nu n tiiri sɔ ni, na yaa ati bu agaya.

²⁹ Na ba yasu aso i nu, acin i afite miɛ n nu akɔ kperɛ n bo miɛ n wo su ni, ka bu fa i ji buka n bu asienɲu.

³⁰ Ama, na wɔ nati asin jama n afien akɔ.

Kabo Yesu fon yiiri ajini sɔnɔ be ɲu ni

³¹ Dɔ na wɔ kɔ miɛ kpiri n bo bu fere i ka Kapenam na i wo Galili awɔre n nu ni, na Njumiya cɛɛn ni, na wɔ kɔ awura bu tientienbunɔɔ sɔɔ n nu sukere minem.

³² Na ba yo alekutura fa kɔ i kereewa n su, dama i jɔjɔwa n la yiko.

³³ Na sɔnɔ be wo tientienbunɔɔ sɔɔ n nu dɔ, ajini wo i ɲu, na wɔ bo awie kpa ase ka,

³⁴ “Oi, Yesu Nazaretifo, a koro nzu ya nu fen a? A ba ka a ba yo ya ɲgbɛɛn wɔ, nzen sɛ? M si u sa, wɔrɔ ti sɔnɔ casi bo Nyeme asunma u n a.”

³⁵ Na Yesu atien ajini n ɲu ase ka, “Mɔ u nɔɔ bere na a fite yaki sɔnɔ ni.” Na ajini n akpisi sɔnɔ n abo asienɲu jama n kere nyunu, na ba fite ayaki sɔnɔ ni, ba ma má i mandim be.

³⁶ Na minem kere ayo alekutura, na ba bisa bu ɲuɲu nu ka, “Nzu alekutura nɔanie jɔjɔwa n la ahin? Dama i la yiko nahɔre su bo i koro ma ajinim nɔɔ na bu fite yaki sɔnɔ.”

³⁷ Na i labari n abara aye nyini awɔre n kere nu.

Kabo Yesu tuntuunri tukpakifo m beberebe Simon dika ni

³⁸ Na Yesu afite tientienbunɔɔ sɔɔ n nu, na wɔ kɔ awura Simon dika, na ba se i ka Simon sibara la má i ɲu, yakɔkɔ abo i agaya.

³⁹ Na Yesu akɔ ajina i bi, na wɔ ma yakɔkɔ n nɔɔ ka i fite yaki bara ni. Na wɔ fite ayaki i, na bara n akaba ayasu, na wɔ kɔ ayo diire ama bu.

⁴⁰ Na naasɔ dika bibiri saɲga, na minem n afa tukpaki barasu barasu fɔm kɛrɛ aba Yesu dɔ ka i tuntun bu, na wɔ fa i saa anana bu ɲu, na bu kɛrɛ anya laifɛ.

⁴¹ Na wɔ fɔn ayi ajinim n gusu afite minem beberebe ɲu, na ajinim n acindi, na ba se i ka, “Wɔrɔ ti Nyemɛ Wa n a.” Ama, na Yesu akan ajinim n ndiɛ, wɔ du má su na bu jɔjɔ, dama bu si ka yiri ti Kristo n a, Tiidefɔ n bo Nyemɛ ase ka i súnma i ni.

Kabo Yesu kɔ kaanri Nyemɛ jɔrɛ Yudaɲɔm tientienbunɔɔ sɔɔm nu ni

⁴² Ale ba ciinri, na Yesu afite miɛ n nu akɔ awo awɔrɛ be nu i ɲgumi. Na minem n akɔ i niɛniɛ, na saɲga bo bu kɔ ɲuuri i ni, na ba kpini atin kabo bu yo na má i kpaaki yaki bu.

⁴³ Ama, na wɔ se bu ka, “Wɔ yo daka ka m kɔ miɛ nyingam gusu su na m kɔ kan labari kpa fa kɔ Nyemɛ fɛmɛya n su kere bu gusu, dama ka nyini ti ye Nyemɛ sunmaari m a.”

⁴⁴ Nyini ti, na wɔ bara aye sukan Nyemɛ jɔrɛ ni, tientienbunɔɔ sɔɔm nu bu awɔrɛ n kɛrɛ nu.

5

Kabo Yesu fereeri i susufɔ ciciri su dɛɛm ni

¹ Cɛɛn be na Yesu jina Genesareti kunma kpiri n nɔɔ su, na jama beberebe abara aye i, na bu susun bu beɲgu ka bu ju i bi na bu ti Nyemɛ nɔaniɛ ni.

² Dɔ na wɔ ɲu lee nnyɔ nbem ka bu wo kunma n nɔɔ su. Jombaa tarafɔm n afite ayaki leem wo bu diendiɛm ɲmisi su.

³ Na Yesu awura lee n kun nu, nyini lee n ti Simon dɛɛ wɔ, na Yesu ase Simon ka i sun lee n kɔ kaan. Na Yesu atana lee n nu, na i sukere jama ni.

⁴ Saɲga bo i kere wieeri ni, na wɔ se Simon ka, “Sun lee n na i kɔ ɲgongɔ n nu, na am sandi am diendiɛm na am tara jombaa.”

⁵ Na Simon ase Yesu ka, “M Mɔfɔ, ya yo jumam ni anyumbo anuma kɔɲgue kɛrɛ fa ba ju haari ni kisa, ya tara má pui. Ama, nzen a se sɔ yiri, m fá diendiɛm n sandi nzue n nu.”

⁶ Na ba fa diendiɛm n asandi nzue n nu, na ba tara jombaa beberebe haari má diendiɛm ni jinaari ka bu sɔn ɔ.

⁷ Nyini ti, ba fa bu saa apaati bu lamɔkɔm bo bu wo lee nyinga n nu ka bu ba buka bu. Na ba yiyi jombaam n agɔ lee nnyɔ n nu, na ba yi haari leem ni jinaari ka bu sa nzue wɔ.

⁸ Saɲga bo Simon Petoro ɲuuri nyini sɔ ni, na wɔ kɔ akutu Yesu jaa bu ase i ka, “M Mibiɛ, cinsi m bi bɛrɛ, dama m ti satieyofɔ ɔ.”

⁹ Deke bo i ma i seeri sɔ n la ka, i ni nyingam kɛrɛ ayo alekutura fa kɔ kabo ba tara nyini jombaa beberebe n barasu ni.

¹⁰ Yakobo ni Yohane gusu woori bɛrɛ, bu si la Zɛbedi, bu ni Simon saɲga tara jombaa n a. Na bu gusu ayo alekutura. Na Yesu ase Simon ka, “Má a ma sɛrɛ ti u, fite kisa fa kɔ, m má a sutien minem nɔɔ ma m, kabo a tara jombaa ni.”

¹¹ Na ba cin ayi lee n afite nzue n ahɛmɛ, na ba yaki deke n kɛrɛ bɛrɛ, na ba su i su.

Kabo Yesu tuntuunri kokofɔ be ni

12 Cɛɛn n be sɔ ɔ, na Yesu wo miɛ be su, kokofɔ be wo nyini miɛ n nu. Sanga bo i ɲuuri Yesu sɔ ni, na wɔ ɲmati aba akutu, na wɔ fa i nyunu abutu asiɛngu, na wɔ sere i jande ka, “M Mibiɛ, nzen a koro ka a ma m nya laifiɛ, a koro ma m nya i.”

13 Na Yesu atenge i saa anana i ɲu na wɔ se i ka, “M koro. Nya laifiɛ.” Na kokobi n akaba ayaki sɔnɔ ni.

14 Na Yesu abɔbɔ i ase i ka, “Má a se ka a se be, ama, kɔ na a kɔ fa u ɲu kere Nyeme sayoowa dɔnguyofɔ ni, na a kɔ yo yoowa n bo Moyisi yo kereeri dawafɔm ni, dama nyini kere minem ka a nya u ɲu a.”

15 Ama, haari ni nyini mmɔɔ, na i labari abara aye deke n kere, na minem aba i dɔ na bu ba ti Nyeme jɔre kaanwa n na i tuntun bu tukpaki barasu barasu kere na bu nya laifiɛ.

16 Ama, yiri ba yo, i yi i ɲu kɔ deke bo minem wo má n wɔ, na i kɔ sere Nyeme.

Kabo Yesu tuntuunri sɔnɔ bo i saam ni i jaam awu ni

17 Cɛɛn n be sɔ ɔ, Yesu wo minem kere su, na Farasifɔm nbem, ni Yuda-fɔm Nyeme nɔaniɛ kerefɔm tana bere. Bu fiteeri miɛ miɛm bo bu wo Galili ni Yudiya awɔrem n nu, ni Yerusalem miɛ kpiri n nu baari a. Na Nyeme ama Yesu yiko bo i tuntun tukpakifɔm na bu nya laifiɛ.

18 Dɔ na mine nbem asɔ sɔnɔ be ni i dasu aba, i saam ni i jaam awu, na bu sumiɛ bu nyi ka bu fa i wura sɔɔ n nu wɔ, na bu fa i se Yesu nyunu.

19 Ama, jama n sunnuuri sɔ n deɛ ti, ba koro anya má atin. Nyini ti, na ba fa i afun sɔɔ n tii su, na ba fiiti anya fofoe, na ba cɔondi i ni i dasu n kere ase jama n afien Yesu nyunu.

20 Yesu ɲuuri kabo bu yoori i yarada n sɔ ni, na wɔ se bie n ka, “Ma fa u satie ace u.”

21 Na Nyeme nɔaniɛ kerefɔm ni Farasifɔm n abisa bu ɲuɲu nu ka, “Sɔnɔ bɔnɔ la ahin bo i jɔjɔ wura Nyeme ɲgasi nu sɔ a? Be wo má bere bo i koro fa minem satie ni bu ɲgasi ce bu, sin Nyeme ɲgumi ɲu.”

22 Na Yesu afa nu fa kɔ bu sunsunni bo bu bita i n su, na wɔ se bu ka, “Nzu ti ye am bita nyini sunsunni ni am ahore su a?”

23 Bɔnɔ ti kekereke a, bo m se ka, ‘Ma fa u satie ace u,’ nzen, ‘Yasu nati’ n a?”

24 M kere am ka mini Adamande Wa n la yiko durunya n nu bo m fa satie ni ɲgasi ce.” Na wɔ se sɔnɔ n bo i saam ni i jaam awu n ka, “Wɔrɔ, yasu fa u dasu n na a kɔ awuru.”

25 Kpenɲa na sɔnɔ n ayasu jama n kere nyunu, na wɔ fa i dasu n na i sukansi Nyeme sukɔ awuru.

26 Na bu kere ayo alekutura agaya, na ba kansu Nyeme, na sere ati bu, bu ɲa, “Nyuma, ya ɲu alekutura sam bo ya nya ɲu má i.”

Kabo Yesu fereeri Levi ka i ba su i su ni

27 Nyini sin, na Yesu afite bere, na wɔ kɔ aɲu lampodefɔ be bo bu fere i ka Levi, i tana i juma yoobiri. Na Yesu ase i ka, “Yasu bra na a ba su m su.”

28 Na Levi ayaki deke n kere, ayasu asu i su.

29 Na Levi afa Yesu akɔ i dika, na wɔ kɔ ayo di ni nu bambaka, na ba tien bu nɔɔ adi, bu ni lampodefɔm beberebe, ni mine nyinga nbem.

30 Na Farasifɔm nbem ni Nyeme nɔaniɛ kerefɔm nbem bo bu ni bere wo ni, aɲuɲuti i, na ba bisa Yesu susufɔm n ka, “Nzu ti ye am ni lampodefɔm, ni satieyofɔm sanga di diire na am nu nzan a?”

³¹ Na Yesu ase bu ka, “Minem bo bu la laifie n koro má ayirifo, má ka bo bu la má laifie ni koro a.

³² Ma ba má ka m ba fere minem bo bu na bu yo sa bo i ko atin su Nyeme do n wo, ama, m baari ka m ba fere satieyofom wo, na bu kaaki bu wo.”

Kabo Yesu kereeri nwo cici jore ni

³³ Na mine nbem aba abisa Yesu ka, “Nzu ti ye Yohane dee susufom ni Farasifom deem cici bu nwo na bu sere Nyeme sanja kere sanja ye u deem bere di ye bu nu a?”

³⁴ Na Yesu abo bu nu ka, “Am koro mie má konyayafom ka bu cici bu nwo, sanja bo konyafan n toko wo bu do ni.

³⁵ Ama, sanja suba bo bu ba yi konyafan n fite bu nu, nyini sanja n ye bu nya cici bu nwo a.”

³⁶ Na Yesu abo ahin mienu n akere bu, i na, “Sono koro fa má sanvun fofore kpa to má tani dawa kunma, nzen i yoori so, sanvun fofore ni son dawa n wo, i to má su.

³⁷ I kaaki ti so o bekun ka be koro fa má nzan nyiiwa fangafogoo má dundu dawa bebete nu, nzen i yoori so, dundu ni tie wo, na i ka ngbeen, na nzan n kere songi butu.

³⁸ Ama, i ti ye ni ka bu fa nzan nyiiwa fangafogoo dundu fofore biiwa nu.

³⁹ Sono nya nuuri nzan nyiiwa wieeri, i koro má nzan mone kun. A ti ka i na, ‘Nzan nyiiwa ni ti kpa a.’ ”

6

Kabo Yesu jajo fa koori Numiyi ceen jore ni

¹ Numiyi ceen be, na Yesu ni i susufom ni sunati sin alembaa fie be nu, na i susufom n abubu be, na ba nunuka i bu saa nu akpese.

² Na Farasifo nbem abisa bu ka, “Nzu ti ye am suyo so a? Nyeme noanie kpamaawa n kere ka má be yo so Numiyi ceen.”

³ Na Yesu abisa bu ka, “Am nya kan má Nyeme Jore Kadasi n nu, kabo Feme Davidi yo yoori sanja bo ahoe tiiri i ni i minem na ba si má kabo bu yo n wo, nzen se?”

⁴ Ahoe n ti, na wo ko awura Nyeme Sereebiri Awuru n nu, na wo fa kpoko n bo ba fa ama Nyeme ni, na wo di, na wo ma i minem be. Ama, am si ka ya dee atin n su, Nyeme sayoowa donguyofom ngumi di nyini kpoko n a.”

⁵ Na Yesu ase bu ka, “Mini Adamande Wa ni ti Numiyi ceen n Mibie a.”

Kabo Yesu tuntunri sono asaa fuin be Numiyi ceen ni

⁶ Na Numiyi ceen n be bekun, na Yesu ako awura tientienbunoo soo n nu, na wo kere minem. Sono be woori do, i saa fomboro awu.

⁷ Nyeme noanie kerefom ni Farasifom nbem woori do, na ba koro ka bu nya nge bo bu so Yesu na bu nya i taraabiri. Nyini ti, ba tu bu nyumbaa anie Yesu, na bu nie ka i tuntun sono asaa fuin n Numiyi ceen ni, nzen i tuntun má i.

⁸ Ama, na Yesu asi bu sunsunni bo bu bita i, na wo se sono asaa fuin n ka, “Yasu bra ba jina afen fen.” Na sono n ayasu ako ajina do.

⁹ Na Yesu abisa bu ka, “Ya dee atin n su, atin wo nu ka ya yo sakpa Numiyi ceen ni, nzen ya yo satie wo? I kaaki ti ye ni ka ya de ngoo, nzen ya kun wo?”

¹⁰ Na Yesu anie bu nyunu abara aye, na wo nya ase sono asaa fuin n ka, “Tenje u saa ni.” Na sono n ayo so, na i saa n ayo fanga bekun.

¹¹ Na yaa ati bu agaya, na ba bo i bu afa sesesu kabo bu yo Yesu barasu.

Kabo Yesu yiiri minε buru ni nnyɔ ka bu yo i jaramasam ni

¹² Nyini sanƙa n na Yesu afun ako buka be su ka i ko sere Nyeme, na wo sere Nyeme nyini kɔngue n kere.

¹³ Sanƙa bo ale ba ciinri ni, na wo fere i susufom ni, na wo yi bu nu, buru ni nnyɔ, na wo fa bu ayo i jaramasam.

¹⁴ Bere la Simon bo Yesu tuunri i duma ka Petoro ni, ni i niema bo bu fere i ka Andere ni, ni Yakobo, ni Yohane, ni Filipu, ni Batolomeyo,

¹⁵ ni Matio, ni Tomasi, ni Yakobo bo i si la Alafeyo ni, ni Simon bo i tu ngoni fa ko i asien su ni,

¹⁶ ni Yudasi bo i si la Yakobo ni, ni Yudasi Isikariyoti bo i ba tɔɔri Yesu ni.

Kabo Yesu kaanri Nyeme jɔre na i ma tukpakifom nyaari laifie ni

¹⁷ Na Yesu ni i jaramasam n acɔɔndi buka n aba ajina awɔre be nu, i susufom nyingam beberebe woori do, ni jama beberebe. Bu fiteeri Yudiya de awɔre n kere nu wo, ni Yerusalem mie kpiri n nu, ni Tiro ni Sidon awɔre n bo i wo tieku n noo su ni.

¹⁸ Bu baari ka bu ba ti i kereewa n wo, na i tuntun bu, na minem bo ajinim wo bu nu kere bu yaari n gusu aba, na wo tuntun bu, na ba nya laifie.

¹⁹ Minem kere boro bu nyi wo, na bu fa bu saa kan i, dama yiko fite i do ye bu kere nya laifie a.

Kabo terefie ni anyumboro ti barasu ni

²⁰ Na Yesu anie i susufom, na wo se bu ka,
"Amberε bo am ti yaarifom ni,
terefie wo am do,
dama Nyeme femeya n ti am de wo.

²¹ Amberε bo ahɔe ati am kisa ni,
terefie wo am do,
dama Nyeme ba ma am akunnuyi.

Amberε bo am ahore asaaki kisa ni,
terefie wo am do,
dama Nyeme ba ma am ahoreda.

²² Amberε bo minem ba kpɔ am, na bu ke te am, na bu kpie am nzuko, na bu saaki am duma ka am ti satieyofom ni, nzen i kere fite ka mini Adamande Wa n de ti, terefie wo am do.

²³ Bu ba yoori am so, am ma am ahore jo, na am tutu am kom. Dama am ba nya nkato bambaka Nyeme do. Kabo bu nam yo yoori dawa de Nyeme noanie kanfom n le.

²⁴ Ama, amberε bo am la ajekε beberebe kisa ni,
am ba nu anyumboro bambaka,
dama am adu mo ayo am koroowa n de ti.

²⁵ Amberε bo am adi na am kunnu ayi kisa ni,
am ba nu anyumboro bambaka,
dama ahɔe ba ti am.

Amberε bo am siri kisa ni,
am ba nu anyumboro bambaka,
dama am ba sun haari na am ba nya ma nyunvuin.

²⁶ Amberε bo sɔno kere kansu am ni, am ba nu anyumboro bambaka, dama so ye bu nam yo kansuiri korɔfom n bo bu yo bu nu ka bu ti Nyeme noanie kanfom n a."

Kabo i ti ye ni ka ya koro ya kpɔfom barasu ni

²⁷ Na Yesu ase bu ka, “Ama, m se amberε bo am suso am sui na am ti n wɔ lεε ka, am koro am kpɔfɔm, na am yo sakpa ma bo bu yo am satie ni.

²⁸ Minem bo bu jɔjɔ nɔanie tie gɔ am ηu ni, am yo bu kisi, na minem bo bu kere am wuwuruwa ni, am kaaki sere Nyeme ma bu.

²⁹ Nzen be fin u nyɔɔnu, kaaki bue nyinga n gusu ma i na i fin i buka su, na nzen be de u tanlεε bambaka, kaba fa u tanlεε kaan n bo i wo i bu mmɔɔ n buka i su.

³⁰ Sɔnɔ kere bo i sere u deke be, má a kpie i, na sɔnɔ kere bo i fa u deke be, má a bisa i busu kun.

³¹ Kabo am koro ka minem yo ma am ni, am yo i sɔ ma bu.”

³² Na wɔ kaaki ase bu ka, “Nzen am nya koroori minem bo bu koro am ni ηgumi, i kansi la bɔnɔ ɔ, ye am ba nya i a? Dama haari satieyofɔm mmɔɔ yo sɔ ɔ.

³³ Na nzen am nya yoori sakpa maari minem bo bu yo sakpa ma am ni, i kansi la bɔnɔ ɔ? Dama haari satieyofɔm mmɔɔ yo sɔ ɔ.

³⁴ Na nzen am fa nenje fie minem bo am sunsun ka bu bá tɔ am kaari ni, i kansi la bɔnɔ ɔ, ye am bá nya i a? Dama haari satieyofɔm mmɔɔ fie bu benju satieyofɔm wɔ, na bu bá de i ηusu sɔ.

³⁵ Ama, wɔ yo daka ka am koro am kpɔfɔm, na am yo sakpa ma bu, na má am fie be nenje be, na am sunsun ka i tɔ kaari. Dɔ ye am nyá i ηkato bambaka a, na am yó Micera Nyeme Kpiri ni nbaam. Dama yiri yo sakpa ma satieyofɔm, ni bo bu si má aye ni.

³⁶ Am si anunfo kabo am Si Nyeme si anunfo ni.”

Kabo Yesu ηa má ya jɔjɔ be jɔre jaraki i ni

³⁷ Na Yesu ase bu ka, “Má am jɔjɔ be jɔre na am jaraki i, na Nyeme gusu dí má am jɔre na i jaraki am. Má am ma bu di be jɔre cin i sui, na Nyeme gusu dí má am jɔre cin má am sui. Am fa minem satie ce bu, na Nyeme gusu fá am dεε ce am.

³⁸ Am ma minem deke bo bu koro, na Nyeme gusu má am. Kabo Nyeme má am n la ka, i fá gɔngɔ dɔngɔ susu ma am a, na i yí kɔ butu. Nyini ti, gɔngɔ bo am fa susu ma minem ni, sɔ ye Nyeme gusu fá susu ma am a.”

³⁹ Na Yesu abo ahin anyunderε n akere bu, i ηa, “Anyinsin koro bita má i benju anyinsin kpama, nzen i yoori sɔ, bu nnyɔ n kere kó to kunma nu wɔ.

⁴⁰ Sɔnsɔnfo tara má i kerefɔ, ama, sanja bo wɔ ba asɔnsɔn juma n awie, i ni i kerefɔ n kere ase wɔ lεε.”

⁴¹ Na wɔ bisa bu ka, “Nzu ti ye a nie ηu wura mbaa n bo i wo u niwa nyumbaa nu, ye a nie ηu má yeenzin n bo i wo u dεε nyumbaa n nu a?

⁴² A yo sε koro se u niwa ka, ‘Ma m yi wura mbaa n bo i wo u nyumbaa nu ni,’ ye a ηu má yeenzin n bo i wo u dεε nyumbaa n nu n a? Wɔrɔ burukɔnufɔ ni, du mɔ yi yeenzin n bo i wo u nyumbaa nu n ka, na a nyá ηu asi nyunyumi, na a yí wura mbaa n bo i wo u niwa n dεε nyumbaa nu ni.”

Kabo Yesu ηa ya fa minem sayoowa fa si kabo bu ti ni

⁴³ Na Yesu ase ka, “Baka bo i ti kpa su má suuwa tie, na baka bo i ti má kpa gusu su má suuwa kpa.

⁴⁴ Baka kere suuwa kere kabo baka n ti barasu a. Sɔnɔ kere si ka a koro titi má damba buwe baka su. A kaaki koro titi má cacabu kpanji baka su.

⁴⁵ Sɔnɔ kpa ni i deke kpa kere bo i bita i ahore su, fa sakpa ba a. Na sɔnɔ tie gusu ni i deke tie bo i bita i ahore su, fa satie ba a. Dama dekem bo am sunsun bu am ahore su sanja kere n ye am jɔjɔ bu a.”

Miɛnu fa kɔ ataari tafɔ nnyɔ nbem jɔre

⁴⁶ Na Yesu akaaki ase ka, “Nzu ti ye am fere m ka, ‘Ya Mibiɛ, ya Mibiɛ,’ ye am yo má deke bo m se ka am yo a?”

⁴⁷ Sɔnɔ kɛrɛ bo i baari m dɔ, na i tiiri m nɔaniɛm n na i deerɪ bu na i fa yoori juma, m kɛrɛ am kabo i mi ti barasu.

⁴⁸ I mi ti ka sɔnɔ bo i ɲa i tá awuru na i fundu kunma ɲgɔɲgɔ na i kɔ kpura yabuɛ, na i se sɔɔ n jaa. Wɔmbu koro wura na nzuɛtinm kɛrɛ koro yi sandi ba kpura awuru ni, i yó má i pui, dama ataari n ayo faɲga n ti.

⁴⁹ Ama, sɔnɔ kɛrɛ bo i tiiri m nɔaniɛm n na wɔ de má i, afa ayo má juma, i mi ti ka sɔnɔ bo i taari i awuru na wɔ se má i jaa yabuɛ su n wɔ. Wɔmbu ba wurari na nzuɛtinm kɛrɛ ba yi kpura nyini awuru ni, na i kaba tɔ faɲga su bo i busu ɲu má n wɔ.”

7

Kabo soja kpɛn be yoori Yesu yarada agaya ni

¹ Saɲga bo Yesu jɔjɔri minɛm dɔ ni nyini nɔaniɛm n kɛrɛ wieeri ni, na wɔ kɔ Kapɛnam miɛ kpɪri n nu.

² Na Romafɔm soja kpɛn be wo dɔ, i la i akɔɔ bo i koro i agaya, wɔ da tukpaki sukoro ka i wu.

³ Soja kpɛn n tiiri Yesu ɲga ni, na wɔ sunma Yudaɔm nkpiɛnkpiɛnm nbem ka bu kɔ sere i ka i ba tuntun i akɔɔ n na i nya laifiɛ.

⁴ Na ba kɔ Yesu dɔ akɔ asere i jande ka, “I ti ye ni ka a ba buka ahin soja kpɛn ni.

⁵ Dama i koro ya minɛm n agaya haari wɔ ta tientienbunɔɔ sɔɔ ama ya.”

⁶ Dɔ na Yesu asu bu su akɔ. Saɲga bo bu kɔ dodoori awuru n kaan sɔ ni, na soja kpɛn n asunma i danɔm Yesu dɔ, bu kɔ juuri ni, na ba se i ka, “Ya Mibiɛ, soja kpɛn n ɲa má a fie u ɲu. I ɲa i ti kaan ni bo a ba i dika.

⁷ Nyini ti ye i ɲa wɔ bu má ka i ti pui bo i ba u nyunu n a. Ama, haari a maari nɔaniɛ n mmɔɔ, i akɔɔ ni nyá laifiɛ.

⁸ Dama yiri mmɔɔ ni i tii wo sɔnɔ saa nu wɔ, na yiri gusu nya la i dɛɛ sojam bo i niɛ bu su. Na bo i nya se i ka, ‘Kɔ fɛn,’ na i kɔ, na i se nyiɲga gusu ka, ‘Bra fɛn,’ na i ba. Na i se i akɔɔ n gusu ka, ‘Yo ahin,’ na i yo i.”

⁹ Saɲga bo Yesu tiiri sɔ ni, na wɔ yo i alekutura, na wɔ kaaki aniɛ jama n bo bu su i su n na wɔ se ka, “M suse am wɔ lɛɛ, ka, ma nya aɲu má sɔnɔ bo i la yarada agaya ka ahin sɔnɔ n ɲusu, haari fa saɲga ni Yisareliɔm mmɔɔ.”

¹⁰ Na minɛm bo soja kpɛn n sunmaari bu n akpiɛ bu nyi akɔ i dika. Bu kɔ juuri, na ba ɲu ka i akɔɔ n anya laifiɛ.

Kabo Yesu tengeeri kunaɔ be wa i yiwee nu ni

¹¹ Nyini sin, wɔ cɛ má, na Yesu akɔ miɛ kpɪri be bo bu fere i ka Nayin n su, i ni i susufɔm, ni jama beberebe kɔori a.

¹² Saɲga bo i kɔ ɲa i wura miɛ n nu ni, kpɛɲga i ni minɛm aye, sɔnɔ be awu miɛ n nu, bu susɔ i fite na bu kɔ se i. Sɔnɔ n bo wɔ wu n ti bara kunaɔ be wa a, i wa kɛrɛ la yiri ɲgumi kpɛin wɔ. Na jama beberebe afite miɛ n nu susu kunaɔ n su.

¹³ Mibiɛ Yesu n ɲuuri kunaɔ n sɔ ni, na aɲunɔ ati i, na wɔ se i ka, “Má a sun.”

¹⁴ Na Yesu akɔ afa i saa akan dangɔ n bo fuin n da su ni, na minɛm bo bu sɔ i n aka ajina. Na Yesu ase ka, “Gbɛfɛnɛ, m suse u wɔ lɛɛ, yasu.”

¹⁵ Dɔ na gbɛfɛnɛ n ayasu atana na wɔ jɔjɔ minɛm dɔ, na Yesu akaaki afa i ama i ni.

¹⁶ Na sere ati sono kere, na ba kansi Nyeme, na ba se bu nju nu ka, "Nyeme noanie kanfo bambaka be aba ya do. Nyeme aba anie i minem busu."

¹⁷ Sa n bo Yesu yoori i n dee ti, na i labari n abara aye Yudiya awore n kere, ni aworem kere bo bu dodo bere ni.

Kabo Yohane Nyeme Nzue Biefo n sunmaari i susufom Yesu do ni

¹⁸ Sangha bo Yohane dee susufom ba kaanri nyini jorem kere kereeri i ni, na wo fere bu mine nnyo,

¹⁹ na wo sunma bu Mibie Yesu n do ka bu ko bisa i ka, "Woro ye bu yo seeri ka a ba n a, nzen ya nminda sono fofore be wo?"

²⁰ Bu ba juuri Yesu do n na ba se i ka, "Yohane Nyeme Nzue Biefo ni sunmaari ya u do a, na ya ba bisa u ka, 'Woro ye bu yo seeri ka a ba n a, nzen ya nminda sono fofore be wo?' "

²¹ Nyini sangha n nu, na Yesu atuntun mine beberebe bo bu la tukpaki barasu barasum, na wo fon ayi ajinim afite minem nu, na wo ma anyinsinm beberebe anu asi.

²² Na Yesu ase minem bo Yohane sunmaari bu n ka, "Am kpie am nyi na am ko se Yohane fa ko sam bo am ati bu na am anu bu ni, ka anyinsinm anu asi, wobukam akoro anati, kokofom anya laifie, asuturim ati asui, minem bo ba wu n atenge, na yaarifom gusu akoro ati labari kpa ni.

²³ Terefie wo minem bo bu yo m yarada na bu la ma sika be, ni mini n do."

²⁴ Sangha bo minem bo Yohane sunmaari bu n ko wieeri ni, na Yesu ajojo jama n do, fa ko Yohane nusu jore. I na, "Sangha bo am fite koori Yohane do boro kpantain n nu ni, am koori ka am ko nu nzu wo? Am koori ka am ko nu sono bo i ti ka barankpaati fofoe bo anuma n kankan i wo?"

²⁵ Nzen ma nyini, am fite koori ka am ko nu nzu wo? Am na am ko nu sono bo i wura sutura kpakpa a, nzen se? Ai, am si ka minem bo bu wura nyini suturam na bu di fiefie ni, bu wo nfemem dika a.

²⁶ Nzen ma nyini, am koori ka am ko nu nzu wo? Am koori ka am ko nu Nyeme noanie kanfo o, nzen se? Een, m suse am wo lee, ka, am anu sono bo i tara Nyeme noanie kanfo.

²⁷ Dama Yohane ye bu yo kereeri i nusu jore, Nyeme Jore Kadasi n nu ka,

'Nyeme na o,
"M du mo sunma m sunmafo n na i du u mo,
yiri ko yo atin n dongu se u a." ' ' "

²⁸ Do na Yesu ase bu ka, "M suse am wo lee, ka, sono wo ma durunya n nu fen bo i tara Yohane. Ama, sono kere bo i ti kaan Nyeme femeya n nu n tara yiri Yohane."

²⁹ Minem kere bo bu woori do ni, haari fa sangha ni lampodefom ni, tiiri kabo Yesu jooori ni, na ba soro su ka Nyeme dee atin ni ti atin nahore a, dama bu ma Yohane adu mo abie bu Nyeme nzue.

³⁰ Ama, na Farasifom ni Nyeme noanie kerefom n akete kabo Nyeme kereeri ka bu yo ni, dama ba kete ka ma Yohane bie bu Nyeme nzue.

³¹ Na Yesu ase bekun ka, "Ye m fa nzu fa sunsun kabo nyumafu ti a? Bu ti ka nzu wo?"

³² Bu ti ka nbaatuma kan kanm bo bu tana goosu wo, na bu sufere bu benggu, bu na,

'Ya kan tere ama am, ama, am abo ma kereba.
Ya di see jue ama am, ama, am asun ma.'

³³ Deke bo i ti na m se sɔ n la ka, Yohane Nyeme Nzue Biɛfɔ n ba juuri ni, i ciciiri i nɔɔ ɔ, i di má diire, i nu má nzan yiri fieo, nyini ti, na am ase ka ajini wo i ɲu.

³⁴ Ama, mini Adamande Wa n ba juuri, na m ni mine asanga adi, na ya sanga anu, na am ase ka, ‘Am niɛ, ahin sɔnɔ n yiri, i ti ayaakpirifɔ ɔ, na i nu nzan nahɔre su. Wɔ tara lampodefɔm, ni satieyofɔm danfoya.’

³⁵ Tɔ, minem kere bo bu su Nyeme dɛɛ alecira n atin n su ni, bere kere ka i ti nahɔre a.”

Kabo Yesu kɔɔri Simon Farasifɔ n dika ni

³⁶ Farasifɔ be yo baandiiri Yesu a, ka i bra i dika ba di diire, na Yesu ako i dika, na wɔ kɔ awura ka i di diire ni.

³⁷ Bara be woori nyini miɛ n nu, i ti satieyofɔ ɔ. I tiiri ka Yesu wo Farasifɔ n dika n wo diire di su, na wɔ fa tulaaleɛ nvanvani tuwa kun aba.

³⁸ Na wɔ ba ajina Yesu jaa dika, na i susun, na i nyunvuin sugɔ Yesu jaa su. Na wɔ kutu aso i jaa nu, na wɔ fa i tiɲmiɛ tintiin anunuka i, na wɔ kaaki tulaaleɛ n agɔ i jaa nnyɔ n kere su.

³⁹ Na Farasifɔ n bo i baandiiri Yesu n ase i kunnu ka, “Ahin sɔnɔ n ti má Nyeme nɔaniɛ kanfɔ, nzen má i ti Nyeme nɔaniɛ kanfɔ, má i si ahin bara n bo i sufa i saa kan i n kabo i woowa ti barasu, má i si ka i ti satieyofɔ.”

⁴⁰ Dɔ na Yesu ase i ka, “Simon, m koro ka m se u jɔre be.” Na wɔ se Yesu ka, “Ya Kerefɔ, se m.”

⁴¹ Na Yesu ase i ka, “Mine nnyɔ nbem wo bere a, na ba kɔ ɲwaafo be dɔ ako afie ɲwaa. Kun dɛɛ kaari n sunnu má, ama, kun n yiri dɛɛ sunnu, i kpaaki ciciri dɛɛ n ɲusu buru.

⁴² Bu mine nnyɔ n nu, bu be mmɔɔ akoro atɔ má ɲwaafo n kaari ni, nyini ti, na wɔ yaki ɲwaa n ace bu. Ye a sunsun ka bu mine nnyɔ n nu, ɲma koro ɲwaafo n agaya?”

⁴³ Na Simon abɔ Yesu nu ka, “Mini dɔ, m sunsun ka sɔnɔ n bo i kaari sunnuuri ni, yiri koro i agaya.” Na Yesu ase i ka, “A la nahɔre.”

⁴⁴ Dɔ na Yesu ace anie bara ni, na wɔ se Simon ka, “M ɲa a ɲu ahin bara ni e? M ba juuri u dika n nu ni, a ma má m nzue ka m ɲmisi m jaa, ama, yiri afa i nyunvuin anmisi m jaa, ye wɔ fa i tiɲmiɛ n anunuka m jaa n na i wu.

⁴⁵ Bekun, a biti má m na a yo m anse ni ba mmɔɔ, ama, kabo m ba juuri, yiri akere kabo i koro m, wɔ yaki má m jaa so nu.

⁴⁶ A fa má ɲguin ka a kpakpa má m tii, ama, yiri afa tulaaleɛ akaaki ago m jaa su.

⁴⁷ Nyini ti, m suse u wɔ læɛ ka, i satie sunnu ye Nyeme afa i kere ace i a, nyini dɛɛ ti, wɔ kere m i koro agaya. Ama, sɔnɔ bo i satie sunnu má na Nyeme afa ace i a, i mi koro mmɔɔ sunnu má.”

⁴⁸ Dɔ na Yesu ase bara n ka, “Ma fa u satie kere ace u.”

⁴⁹ Mine nyɲgam n bo bere gusu tana wo diire n di su n tiiri sɔ ni, na ba bisa bu ɲuɲu nu ka, “Nma la ahin sɔnɔmbiri n bo i koro fa minem satie ce bu a?”

⁵⁰ Na Yesu akaaki ase bara n ka, “Yarada n bo a yo m ni, nyini ma a nya u tii a. Kɔ awuru ni ahoreda.”

8

Kabo nbara nbem bukaari Yesu barasu ni

¹ Nyini sin na Yesu ajɲgbe miɛ kpirim, ni aheme aheme miɛm su, na i sukan labari kpa n fa kɔ Nyeme femeya n su. I ni i susufɔ buru ni nnyɔm ni kɔɔri a.

² Na nbara beberebe nbem gusu asu i su. Bu nbem ye i tuntuunri bu tukpaki barasu barasu n a. Bu kun ye i fɔn yiiri ajinim nso fiteeri i ɲu n a, bu fere i ka Mariya Magadalafo ni,

³ ni kun bo bu fere i ka Yowana, na i hun la sɔnɔ be bo bu fere i ka Cusa na i niɛ Fɛmɛ Herode dika n kɛrɛ su ni, ni bara bo bu fere i ka Susanna ni. Nyini nbaram kɛrɛ fa bu tiɛŋgu deke bo bu la i wɔ, na ba fa abuka Yesu ni i susufɔm ni.

Miɛnu fa kɔ kabo dɔdɔɔrifɔ be sandiiri aɛmbaa ni

⁴ Na jama beberebe atien bu nɔɔ Yesu dɔ, bu fiteeri miɛ su miɛ su baari a. Na wɔ bo bu ahin miɛnu ni, i ɲa,

⁵ “Dɔdɔɔrifɔ be fiteeri sɔ ɔ, ka i kɔ sandi aɛmbaa. Saɲga bo i wo sandi su ni, na nbem atɔtɔ atin n nɔɔ, na minem atientien su asin, na anumam aba atambu bu ami.

⁶ Na nbem atɔtɔ tieka su, na wɔ fi, wɔ cɛ má na wɔ waandi, dama niniki awɔ má asien n bu n dɛɛ ti.

⁷ Na aɛmbaa ni nbem atɔtɔ lɔlɔɛ nu, na lɔlɔɛ n anyi akata i ɲu.

⁸ Ama, na nbem atɔtɔ asien kpa su, na wɔ nyi awura mbaa zɔi zɔi.” Yesu seeri sɔ wieeri ni, na wɔ nya atien kpa ase ka, “Bo i koro ka i ti ahin jɔrɛ n bu, i ti ye ni ka i so i sui na i ti.”

Deke bo i ti na Yesu boori bu miɛnu n ni

⁹ Dɔ na Yesu susufɔm n abisa i nyini miɛnu n bu,

¹⁰ na wɔ bo bu nu ka, “Amberɛ ye Nyemɛ ama am asi i femeya n nu asiri jɔrɛ kɛrɛ a, ama, bo ba ka ni, m bobo i miɛnu kere bu a. Adena i yó kabo ba kɛrɛ i Nyemɛ Jɔrɛ Kadasi n nu ni, ka,

‘Bu níɛ wɔ,

ama, bu ɲú má pui.

Bu só bu sui wɔ,

ama, bu tí má deke n bo bu so bu sui ka bu ti i n bu.’ ”

Kabo Yesu kereeri miɛnu n bu ni

¹¹ Na Yesu asa su ase bu ka, “Tɔ, miɛnu n bo m boori i n bu yaa. Aɛmbaa n ti Nyemɛ nɔaniɛ n wɔ lɛɛ.

¹² Aɛmbaa n bo bu tɔtɔɔri atin nɔɔ n la minem bo bu ti Nyemɛ nɔaniɛ ni, i cɛ má, na Sitana bá yi i fite bu ahore su, adena má bu yó yarada na bu nyá tiide.

¹³ Aɛmbaa n bo bu tɔtɔɔri tieka su n la minem bo bu ti Nyemɛ nɔaniɛ n na bu de i ni ahorejɔ, ama, i da má bu ahore su. Bu kaaki ti ka aɛmbaa n bo i bunlui akpama abi má n wɔ. I woori bu dɔ kaan sɔ, na saɲga bo kekereke be ba tuuri bu, a ɲu ka ba fa ati.

¹⁴ Aɛmbaa n bo bu tɔtɔɔri lɔlɔɛ nu n la minem bo bu nya tiiri Nyemɛ nɔaniɛ ni na bu su i atin su, a ɲu ka bu sunsunni kɛrɛ wo kabo bu yó na bu asiri káta su, na bu nyá durunya n nu ajekɛm, na bu yó bu koroowa, a ɲu ka Nyemɛ nɔaniɛ n koro da má bu ahore su na i yo juma. Bu ti ka aɛmbaa bo i bi má n wɔ.

¹⁵ Ama, aɛmbaa n bo bu tɔtɔɔri asien kpa su n la minem bo bu ti Nyemɛ nɔaniɛ n na bu de i ni bu ahore fofoe nahɔrɛ su, na bu de i ni bu saa nnyɔ, na bu mindi bita i, na bu fa i yo juma ni.”

Kabo sɔnɔ koro so má sin su na i fa fie ni

¹⁶ Na Yesu ase ka, “Sɔnɔ be nya so má fitana su na i fa gaɲga butu su, wara i fa se gado bu, ama, i fa taka deke su aɲgoro wɔ, adena minem bo bu ba wura awuru n nu n koro ɲu asi.

¹⁷ Deke be wo má bεre bo i wo fiεwa nu na bu bá ηu má i, deke be gusu wo má bεre bo i wo asiri nu na bu bá si má i.

¹⁸ Nyini dεε ti, am si am ηu sa ni kabo am ti nɔanie n barasu ni. Dama sɔnɔ kere bo wɔ nya deke be Nyeme dɔ na i mi si i bita, Nyeme búka i su wɔ, ama, bo i si má i bita, haari ni nyini kaan n bo i sunsun ka wɔ nya i ni, Nyeme dé i dɔ ɔ.”

Minem bo bu ti Yesu ni, ni i ninbaam nahɔre su n jɔre

¹⁹ Na Yesu ni, ni i niemam aba i dɔ, ama, jama sunnuuri i dɔ n dεε ti, ba koro aju má i bi.

²⁰ Na be ase i ka, “M Mibiε, u ni, ni u niemam jina dasin koro u.”

²¹ Na Yesu ase bu ka, “M ni, ni m niemam la minem bo bu ti Nyeme nɔanie n na bu de i na bu fa yo juma n wɔ.”

Kabo Yesu kereeri ka i la yiko tara aηuma ni nzue ni

²² Cεen n be sɔ ɔ, na Yesu ni i susufɔm n awura lee nu, na wɔ se bu ka, “Am ma ya kpiε kɔ kunma kpiri n buekun dɔ.” Nyini ti, na ba yasu na bu kɔ.

²³ Bu wo kɔ su ni, na Yesu adaafi, na aηuma bambaka be ayasu na i subo nzue gɔ lee n nu. Má lee ni suyi ni nzue wɔ, na anyumboro atu bu.

²⁴ Na Yesu susufɔm n akɔ atenge i, na ba se i ka, “Ya Mɔfɔ, ya Mɔfɔ e, ya wu awie.” Na Yesu ayasu, na wɔ tien nzue n ni aηuma n bo i subo n ηu, na ba tara, na dika n atara jum.

²⁵ Dɔ na Yesu ase i susufɔm ni ka, “Nzu ti ye am yo má m yarada a?” Na ba yo alekutura na sere akaaki ati bu agaya, na ba bisa bu ηuηu nu ka, “Nzu sɔnɔmbiri barasu la ahin bo i ma aηuma ni nzue mmɔɔ nɔɔ na bu de i a?”

Kabo Yesu fɔn yiiri ajinim fiteeri sɔnɔ be ηu ni

²⁶ Na Yesu ni i susufɔm n akpiε kunma kpiri n akɔ aju Gerasafɔm dεε awɔre n nu, na kunma kpiri n wo i ni Galili dεε awɔre n afien ni.

²⁷ Yesu fiteeri lee n nu ni, na miε n nu sɔnɔ be aba akpa i atin, ajinim wo i ηu, wɔ cε, i nati i bu ηgbεen wɔ sanɔga kere, i da má awuru, má ka fanɔkunma nu.

²⁸ I ηuuri Yesu ni, na wɔ bo awie kpa, na wɔ kutu haari Yesu jaa bu, na wɔ ciindi ase ka, “Yesu, Micera Nyeme Kpiri n Wa, a koro nzu ya nu fen a? M sere u wɔ ka, má a ma m ηu anyumboro.”

²⁹ Deke bo i ti na i seeri sɔ n la ka, Yesu ama ajinim n nɔɔ ka bu fite yaki i. Sanɔga kere sanɔga ajinim n fun i ηu wɔ, haari ni bo bu niε i dika, na bu bo i tobari, na bu wura i jɔrɔkɔ buka su ni, i sandi i kere wɔ, na ajinim n fa i kɔ boro kpantain n nu.

³⁰ Na Yesu abisa i ka, “Bu fere u sε?” Na wɔ bɔ i nu ka, “Bu fere m ka Jama Beberebefɔ.” Deke bo i ti na i seeri sɔ n la ka, ajinim beberebe wo i ηu wɔ.

³¹ Na ba sere Yesu jande ka má i fɔn bu kɔ wura kunma n bo i kɔ ηgɔngɔ na i la má awieeri n nu.

³² Nyini sanɔga afam beberebe wo dodo bεre, bu wo buka be su sudi, na ajinim n asere Yesu ka i ma bu kɔ fun afam n ηu, na wɔ ma bu atin.

³³ Na ba fite ayaki sɔnɔ ni, na ba kɔ afun afam n ηu. Dika n nu bεre, na bu kere aηmati acɔɔndi akɔ ato kunma kpiri nzue n nu, na nzue n adi bu.

³⁴ Afa sasafɔm n ηuuri nyini n sɔ ni, na ba ηmati akɔ abo ndoori mie kunnu, ni aheme aheme kere su.

³⁵ Na minem aba na bu ba niε sa n bo wɔ yo ni, na ba ba Yesu dɔ, anu sɔnɔ n bo ajinim n yo woori i ɲu n ka i tana Yesu bi wura tanlɛɛ, ni i nyunu koroya su. Dɔ na sɛrɛ ati bu.

³⁶ Na minem n bo bu ɲuuri sa n yoobiri ni, akan jɔrɛ n kɛrɛ akere jama n kabo i ba yoori na sɔnɔ n bo ajinim yo woori i ɲu n anya laifiε ni.

³⁷ Na minem kɛrɛ bo bu fite nyini awɔrɛ n nu n asere Yesu jande ka, i yasu bu awɔrɛ n nu bɛrɛ, dama sɛrɛ ati bu agaya. Na Yesu ayasu awura lee nu ka i kɔ.

³⁸ Dɔ na sɔnɔ n bo ajinim afite ayaki i n asere Yesu ka, i ma i su i su. Ama, Yesu asoro mǎ i su, na wɔ se i ka,

³⁹ “Kpie u nyi kɔ awuru, na a kɔ kan kere minem fa kɔ sakpa n bo Nyemε ayo ama u n su.” Na sɔnɔ n akpie i nyi akɔ akan akere miε n nufɔm kere fa kɔ sakpa n kɛrɛ bo Yesu ayo ama i ni.

Bara tukpakifɔ be, ni baabara be yiwee jɔrɛ

⁴⁰ Saɲga bo Yesu kpieri i nyi kɔ juuri kunma kpiri n buekun dɔ ni, i kɔ ɲu ka jama n atien bu nɔɔ sunmindɔ i wɔ, na ba yo i anse ni ba.

⁴¹ Dɔ na sɔnɔ be aba Yesu dɔ, yiri ti kpien bo i niε bu tientienbunɔɔ sɔɔ n su a, bu fere i ka Yarusi. Na wɔ ba akutu asiɛɲgu Yesu jaa bu asere i ka, jande i bra i dika,

⁴² dama i wa baabara kun n kpein bo i la i n suwu, i la afɔ buru ni nnyɔ ɔ. Yesu wo kɔ su n na jama n amie i ɲu agaya.

⁴³ Bara be woori jama n nu, i bita abiεeri i afɔ buru ni nnyɔ lɛɛ, bo i kpu na i kpie mǎ, ama, be akoro atuntun mǎ i na i nya laifiε.

⁴⁴ Na wɔ sakati awura jama n nu Yesu sin, afa i saa akan Yesu tanlɛɛ n jaa bu ni, kpenɲa na abiεeri n ajina.

⁴⁵ Na Yesu abisa ka, “Nma fa i saa kaanri m a?” Na sɔnɔ kɛrɛ ase ka ba si mǎ, na Petoro ase i ka, “Ya Mɔfɔ, wɔrɔ mmɔɔ ɲu kabo jama n abara aye na bu miε u ɲu barasu.”

⁴⁶ Ama, na Yesu ase ka, “Sɔnɔ be afa i saa akan m, dama ma fa nu ka m yiko n be afite m ɲuniε nu akɔ ayo juma.”

⁴⁷ Na bara n anu ka i koro fiε mǎ i ɲu, na wɔ ba ajina Yesu nyunu, i ɲuniε kɛrɛ subobo i. Na wɔ kutu haari Yesu jaa bu akan jɔrɛ n akere i, jama n kɛrɛ nyunu, kabo i ba yoori na i kaba nyaari laifiε ni.

⁴⁸ Na Yesu ase i ka, “M wa, yarada n bo ayo m ni, yiri ma a nya laifiε a. Kɔ awuru ni ahoreda.”

⁴⁹ Saɲga n bo Yesu toko wo jɔjɔ su ni, na sɔnɔ be afite tientienbunɔɔ sɔɔ n kpien n dika aba ase i ka, “U wa n wo mǎ bɛrɛ. Nyini ti, mǎ a dama ya Kerefɔ n kun.”

⁵⁰ Ama, na Yesu ati jɔrɛ n na wɔ se baa n si n ka, “Mǎ a ma sɛrɛ ti u, wɔrɔ yo m yarada, i nyǎ laifiε.”

⁵¹ Bu kɔ juuri kpien n dika n nu ni, wɔ soro mǎ su, na be wura buka i su, mǎ ka Petoro, ni Yakobo, ni i niεma Yohane, ni baa n si, ni i ni.

⁵² Minem kɛrɛ bo bu woori dɔ n wo awie bo su wɔ, na bu sukoko. Nyini dɛɛ ti, na Yesu ase ka, “Mǎ am sun, wɔ wu mǎ, wɔ daafi wɔ.”

⁵³ Na ba siri i, dama bu si ka wɔ wu wɔ.

⁵⁴ Ama, na Yesu akɔ atara i saa, na wɔ tien kpa ase i ka, “M wa, yasu jina.”

⁵⁵ Na wɔ nya ɲgɔɔ bekun, na wɔ kaba ayasu ajina, na Yesu ase ka bu ma baa n deke be na i di.

⁵⁶ Na baa n si, ni i ni ayo alekutura akɔ asin su, ama, na Yesu abɔbɔ bu ni nahɔrɛ su ka, mǎ bu ma be si sa n bo wɔ yo ni.

9

Kabo Yesu sunmaari i susufɔ buru ni nnyɔm ni

¹ Na Yesu afere i susufɔ buru ni nnyɔm ni, na wɔ tien bu nɔɔ, na wɔ ma bu yiko ka bu kɔ sufɔn yi ajini barasu barasum kere fite minem ɲu, na bu ma tukpakifɔm nya laifie.

² Dɔ na wɔ sunma bu ka bu kɔ kan Nyeme jɔre fa kɔ kabo Nyeme bá nie i minem su ni, na bu tuntun tukpakifɔm na bu nya laifie,

³ na wɔ se bu ka, “Má am fa puitiripui kɔ ahin atin n bo m susunma am ni, kpama o, kuruku o, diire o, ɲwaa o. Má am fa tanlɛɛ be mmɔɔ buka bo am wura i n su.

⁴ Am kɔ juuri mie be su, na awuru kere bo am kɔ wuraari nu, am ka nyini awuru n nu haari am bá fite mie n nu.

⁵ Sasu bekun, mie bo am kɔ wuraari nu, na ba de má am wɔfɔ, am fite yaki nyini mie ni, na am kpɔnkpɔn yi am jaa tuturi kere. Nyini dí daani kere bu ka bu woowa ti má kpa.”

⁶ Na i jaramasam n akɔ ajɛngbe abara aye mie miem su akan labari kpa n jɔre akere minem deke n kere bo bu kɔori ni, na ba tuntun tukpakifɔm na ba nya laifie.

Kabo Feme Herode birisi fa kɔori Yesu sayoowam su ni

⁷ Na Feme Herode ati sa n kere bo Yesu ayo i ni, na wɔ birisi, dama mine nbem ɲa Yohane Nyeme Nzue Biɛfɔ n ye wɔ tenge i yiwee n nu a,

⁸ ye nbem ɲa Nyeme nɔanie kanfɔ Eliya ye wɔ yi i ɲu afite fofoe nu, na nbem gusu ase ka dawa dɛɛ Nyeme nɔanie kanfɔ nyinga n be ye wɔ kaaki atenge aba a.

⁹ Na Feme Herode ase ka, “M ma ba kpɛ Yohane tii e, ye ɲma la ahin sɔnɔ n bo m ti i sayoowam ɲga sɔ n a?” Na wɔ boro i nyi ka i ɲu Yesu.

Kabo Yesu maari nbiesɔm akpii nnu ni bu minem diire ni

¹⁰ Sanga bo Yesu jaramasam n kpɛeri bu nyi baari i dɔ ni, na ba kan sam kere bo ba yo i n akere i. Na wɔ fa bu na ba kɔ awo mie be su awɔre be nu bere ɲgumi. Bu fere mie n ka Besayida.

¹¹ Jama n tiiri Yesu ɲga sɔ ni, na ba sa i su akɔ dɔ. Na wɔ de bu, na wɔ kan Nyeme jɔre fa kɔ kabo Nyeme bá nie i minem su barasu. Na wɔ tuntun tukpakifɔm, na ba nya laifie.

¹² Sanga bo wie ba sukɔ tɔ ni, na i jaramasam n aba i dɔ aba ase i ka, “Ma minem n atin na bu kɔ mie kunnu ni aheme aheme miem su na bu kɔ nienie diire di na bu nya daabiri da, dama deke bo ya wo ni, ya wo boro wɔ lɛɛ.”

¹³ Ama, na Yesu ase bu ka, “Amberɛ mmɔɔ ni am tii nya deke be ma bu na bu di.” Na ba se i ka, “Deke bo ya la i kere la kpɔnɔ nnu wɔ, ni jombaa nnyɔ, i jú má. A koro ka ya kɔ to diire ba ma ahin jama n kere wɔ, nzen sɛ a?”

¹⁴ Deke bo i ti na bu seeri sɔ n la ka, nbiesɔm kɔ yasuuri mine akpii nnu wɔ. Na Yesu ase i susufɔm n ka, “Am ma bu tana asese asese aburunu nnu na bu di.”

¹⁵ I susufɔm ni maari bu kere tanaari sɔ wieeri ni,

¹⁶ na Yesu afa kpɔnɔ nnu ni, ni jombaa nnyɔ ni, na wɔ ye i tii su angoro, na wɔ da Nyeme asi, na wɔ kpɛkpɛ i kere n nu, na wɔ fa ama i susufɔm ni ka bu fa ma minem ni.

¹⁷ Na bu kere adi, na bu kunnu ayi. Na ba tambu kpɔnɔ, ni jombaa sinsin bo bu diiri na i kaari ni, na ba nya kandie buru ni nnyɔ.

Kabo Peto kereeri ka Yesu ti barasu ni

18 Ceen n be so o, Yesu wo nyemesere su i ngumi, i susufom ni wo i bi. I sereeri Nyeme wieeri n na wo bisa bu ka, "Minem fa m bu nma a?"

19 Na ba bo i nu ka, "Bu na woro ti Yohane Nyeme Nzue Biefo n a, nbem na woro ti Nyeme noanie kanfo Eliya, ye nbem gusu na woro ti dawa dee Nyeme noanie kanfo nyinga n be ye wo tenge aba a."

20 Na wo nya abisa bu bekun ka, "Ye ambere fa m bu nma a?" Na Petoro abo i nu ka, "Woro ti Kristo n a, Tiidefo n bo Nyeme ase ka i sunma i ni."

Kabo Yesu jajo fa koori i yiwee n su ni

21 Na Yesu abobo bu ka, ma bu se ka bu se be jore n bo Petoro ajajo i ni,

22 i na, "Wo yo daka ka mini Adamande Wa n di wahara dongu, na Yudafom nkpienkpienm, ni Nyeme sayoowa donguyofon nkpienkpienm, ni Nyeme noanie kerefom kere ba kete m nu, na bu kun m. Ama, na i lesan ceen, na Nyeme ma m tenge m yiwee n nu."

Kabo Yesu jajo fa koori kabo minem su i su ni

23 Na wo se bere kere pepere ka, "Sono kere bo i koro ka i su m su, wo yo daka ka i mi wara fi i tiengu sa koroowa sa, na i fa i yiwee baka jaanu n so, na i su m su ceen kere ceen.

24 Dama sono kere bo i koro ka i fa i ngoo fie, i mi ba fun i. Ama, sono kere bo i toori i ngoo mini dee ti, i mi nya ngoo.

25 Nzen sono nyaari durunya n nu deke n kere na i fuunri i ngoo na i kaari ngbeen, i kpere la bono?

26 Sono kere bo nyinse ti i fa ko mini ni m noanie n su, so ye nyinse ti mini Adamande Wa n gusu fa ko bu su a, sangha bo m ba ba ni m jirima woowa n nu, ni m Si Nyeme dee jirima woowa ni, ni i mereke casim ni.

27 Nahore ye m suse am n a, am nbem wo nu fen bo am wu ma, ma ka am aba anu ka Nyeme femeya n aba."

Kabo Yesu nunie kaakiiri wo barasu ni

28 Yesu jajoori nyinim kere wieeri so ni, fa ko i lemocue ceen, na wo fa Petoro ni Yohane ni Yakobo na ba fun ako buka be su ka bu ko sere Nyeme.

29 I wo nyemesere n su ni, na i nyunuawa akaaki wo, na i tanlee n akaaki fofoe papasi.

30 Do na minem nnyo nbem atie bu nu, bu ni Yesu subo anzama. Bere la Moyisi ni Eliya, dawa dee Nyeme noanie kanfom ni.

31 Na bere gusu ata fofoe papasi, na bu sujajo i do fa ko kabo i sangha ba ju bo i ko Yerusalem mie kpiri n nu ni, na i yoori so na Nyeme koroowa n yo yiiwa.

32 Nyini sangha, Petoro ni i bengum wo daafiri su, bu ba tengeeri n na ba nu kabo Yesu woowa n akaaki barasu, i ni mine nnyom ni jina.

33 Sangha bo minem n ba suko yaki Yesu ni, na Petoro ase i ka, "Ya Mofa, i ti kpa ka ya wo fen. Ma ya bo nambue nsan, u dee kun, Moyisi dee kun, na Eliya gusu dee kun." I jajo o, wo si ma kabo i seeri ni.

34 I toko wo jajoori su n na yinyingu akata bu nu liim, na sere ati i susufom ni, sangha bo yinyingu n sukata bu nu ni.

35 Na ba ti akonvi be nga yinyingu n nu, i na, "M wa lee, yiri ye ma yi i a. Am de i noanie."

36 Bu tiiri jajoowa n so ni, bu nu ka Yesu ngumi jina a. Nyini sangha ni, i susufom n abo ma su akan akere ma be fa ko sam n bo bu nuuri i n su.

Kabo Yesu fon yiiri ajini fiteeri baa be nu ni

³⁷ Na i alecin, na Yesu ni i susufɔ nshanm ni sujura buka n su ni, na jama beberebe akpa i atin.

³⁸ Dɔ na sɔnɔ be awo jama n nu atien ase ka, “Ya Kerefɔ, m sere u wɔ, si m wa baabiesɔ n anunfɔ, m wa kere lɛɛ.

³⁹ Niɛ, ajini wo i ɲu, sanɔa kere bo i ba ɲa i yasu i ɲu, i kaba bo awie kungerekun wɔ, na i fa i bo asiɛngu, na i nanzue sufite fufuku, i bita i kere i wahara sɔ sɔ sanɔa kere, i koro má ka i fite yaki i.

⁴⁰ Ma sere u susufɔm ni lɛɛ ka bu fɔn yi ajini ni, ama, ba kura má nu.”

⁴¹ Na Yesu ase ka, “Amaa. Ambere nyumafɔ satieyofɔm, am la má yarada fieo. Nyuma sa ye m wo am dɔ fen a? Ye m yó sawɔre ni ambere kɔ ju se wɔ?” Dɔ na wɔ se baa n si ka, “Fa baa n bra fen.”

⁴² Sanɔa bo baa ni suba Yesu dɔ ni, na ajini n abo i aji asiɛngu, na wɔ da sukpisi. Na Yesu atien ajini n ɲu na baa n anya laifie, na wɔ kaaki afa i ama i si.

⁴³ Na minem kere amie fa kɔ yiko bambaka bo Nyeme la i ni.

Kabo Yesu jɔjɔ fa kɔɔri i yiwee n su bekun ni

Sam n kere bo Yesu woori bu yo su n dɛɛ ti, nyini ma mine kere yoori alekutura n a. Dɔ na wɔ se i susufɔm ka,

⁴⁴ “Ambere, am so am sui na am ti deke bo m koro ka m se am ni. Bu bá tɔ mini Adamande Wa n ma mine nbem.”

⁴⁵ Ama, i jɔjɔri sɔ ni, i susufɔm n ati má i bu. Nyeme ayi má i nyi akere má bu, nyini ti ye ba koro ati má i bu. Ama, sere dɛɛ ti, ba koro abisa má i fa kɔ nyini jɔre n su.

Kabo Yesu kereeri sɔnɔ bo i tara bu kere ni

⁴⁶ Na i susufɔm n ase akuruwa bu ɲuɲu nu fa kɔ sɔnɔ bo i tara bu kere ni.

⁴⁷ Yesu siiri bu sunsunni bo bu bita i n dɛɛ ti, na wɔ fa baa kaan be ajina bu afien i bi,

⁴⁸ na wɔ se bu ka, “Wɔrɔ kere bo a deeri ahin baakan n ɲusu m dɛɛ ti, a deeri mini wɔ lɛɛ. Bekun, wɔrɔ kere gusu bo a nya deeri mini, a deeri m si bo wɔ sunma m wɔ lɛɛ. Dama bo am sunsun ka i ti kaan am kere nu ni, yiri ti kpiri tara am kere a.”

⁴⁹ Dɔ na Yohane ase i ka, “Ya Mɔfɔ, ya ɲuuri ka sɔnɔ be afa u duma sufa fɔn yi ajinim fite minem ɲu, ye ya ɲa ya yáki má i, dama i wo má ya nu n dɛɛ ti.”

⁵⁰ Na Yesu ase ka, “Má am se ka am kanda i, dama sɔnɔ kere bo i fite má am sin, i mi jina am sin wɔ lɛɛ.”

Kabo Samariyafɔm keteeri ka bu de má Yesu ni

⁵¹ Sanɔa n ba dodoori bo Nyeme má Yesu fun kɔ angoro ni, na wɔ bu i tii nu ka i ti ye ni ka i kɔ Yerusalem miɛ kpiri n nu.

⁵² Na wɔ sunma sunmafɔm Samariya aheme miɛ be su ka bu kɔ suyo deke kere siriya ɲmindai.

⁵³ Ama, na Samariyafɔm n akete ka bu de má i, dama ka i susin kɔ Yerusalem n dɛɛ ti.

⁵⁴ Yakobo ni Yohane ɲuuri nyini n sɔ ni, na ba se ka, “Ya Mibiɛ, a koro ka ya ma sin fite angoro ba di bu, nzen se a?”

⁵⁵ Na Yesu ace anie, na wɔ jaraki bu.

⁵⁶ Dɔ na Yesu ni i susufɔm n asin akɔ miɛ nyinga be su.

Minem bo bu koro ka bu su Yesu su n jɔre

⁵⁷ Sanɔa bo Yesu ni i susufɔm n wo kɔ su ni, na sɔnɔ be aba ase Yesu ka, “Deke kere bo a kɔ, m sú u su wɔ.”

⁵⁸ Na Yesu ase i ka, “N̄aakum la kunmam, na anumam gusu la tieerim, ama, mini Adamande Wa n yiri, m la má m tii daabiri.”

⁵⁹ Na wɔ se sɔnɔ nyinga be ka, “Su m su.” Ama, na sɔnɔ n ase i ka, “M Mibiɛ, ma m du mɔ kɔ yo m si sutura ka, na m nyá ba su u su.”

⁶⁰ Na Yesu ase i ka, “Yaki bo ba wu ni, na bu se bu beɲgu, wɔrɔ kɔ na a kɔ kan Nyeme jɔre fa kɔ kabo Nyeme Feme bá nie i minem su ni.”

⁶¹ Na sɔnɔ nyinga be bekun ase Yesu ka, “M Mibiɛ, m bá su u su, ama, ma m kɔ kaari m dikafɔm ka, na m bá.”

⁶² Na Yesu ase i ka, “Sɔnɔ kere bo i ti ka toora dɔdɔrifɔ na i wo dɔ su, na i kaaki nie i sin, i ti má ye ni ka Nyeme yo i mi feme.”

10

Kabo Yesu sunmaari i susufɔ aburaso ni nnyɔm ni

¹ Nyini sin na Mibiɛ Yesu n ayi i susufɔ aburaso ni nnyɔ nyinga nbem, na wɔ sunma bu nnyɔ nnyɔ ka bu du mɔ kɔ mie miem kere bo yiri ni i tii ase ka i bá kɔ su ni.

² Na wɔ se bu ka, “Fiesu diire n sunnu, ama, bo bu kɔ i tambu n sunnu má. Nyini ti, am sere Mibiɛ n bo i dɛɛ la fie n ka i sunma jumayofɔm na bu kɔ i tambu.

³ Ama, am ti fen. Am kɔ. M susunma am wɔ lɛɛ, kabo nbɔmbaam kɔ sangga bedim nu barasu ni.

⁴ Má am se ka am fa ɲwaa, wara kuruku, wara gbagbaa, má am se ka am jina atin nu yo be mmɔɔ anɛɛ.

⁵ Awuru kere bo am kɔ wuraari nu, am du mɔ se ka, ‘Nyeme ma am tanalaifɛ.’

⁶ Nzen tanalaifɛfɔ wo nyini awuru n nu, am ma am tanalaifɛ n ka i mi n dɔ, ama, nzen wɔ ti má sɔ, Nyeme dé tanalaifɛ ni i mi n dɔ.

⁷ Awuru bo am kɔ wuraari nu na bu deerɛ am wɔfɔ, am ka nyini awuru n nu, na am di na am nu deke kere bo bu fa ma am, dama i ti ye ni ka jumayofɔ nya i juma ni ɲkatɔ. Má am nati awuru kere nu.

⁸ Am kɔ juuri mie be su na bu deerɛ am wɔfɔ, am di deke kere bo bu fa ma am.

⁹ Am tuntun tukpakifɔm bo bu wo dɔ n na bu nya laifɛ, na am se bu ka, ‘Sangga bo Nyeme Feme bá nie i minem su n adodo am lɛɛ.’

¹⁰ Ama, nzen am kɔ juuri mie be su na ba de má am wɔfɔ, am fite kɔ atɛgbere n su, na am se bu ka,

¹¹ ‘Haari am mie n tuturi mmɔɔ mata má ya jaa, ya kpɔnkpɔn yi i wɔ, nyini di daani kere ka am woowa ti má kpa. Ama, i ti ye ni ka am si ka sangga bo Nyeme Feme bá nie i minem su n adodo lɛɛ.’

¹² Nyini ti, m suse am wɔ lɛɛ, ka, jina cɛɛn, nyini mie n nufɔm, Nyeme cín bu sui tara Sodom mie kpiri n nu satieyofɔm.”

¹³ Na Yesu akaaki ase ka, “Tɔ, amberɛ Korazinfɔm, am bá ɲu anyumboro. Amberɛ Besayidafɔm gusu, am bá ɲu anyumboro. Alekutura sam bo m yo maari am ni, má nzen m yoori bu Tiro, ni Sidon mie kpirim n nu, má minem n akaaki bu wo dada kere na bu fa pirim bɔtɔ, ni nzuin yo bu yoowa n bo i kere ka bu ahore asaaki, bu satie yoowa n dɛɛ ti ni.

¹⁴ Ama, amberɛ, Nyeme bá cin am sui tara Tiro ni Sidon dɛɛ satieyofɔm.

¹⁵ Amberɛ Kapenamfɔm gusu, am sunsun ka Nyeme bá ye am su kɔ aɲgoro wɔ, nzen sɛ? Ai. I bá yo am kaan wɔ, na i fá am cɔndi kɔ Yiweefɔm Woobiri.”

¹⁶ Na Yesu ase i susufɔm ka, “Sɔnɔ kere bo i de am nɔanie, i mi de m dɛɛ nɔanie wɔ lɛɛ, na sɔnɔ kere bo i kete am nɔanie, i mi kete m dɛɛ nɔanie

wɔ lɛɛ, na sɔnɔ kɛrɛ bo i kete m dɛɛ nɔaniɛ, i mi kete yiri n bo i sunmaari m wɔ lɛɛ.” I jɔjɔ wieeri, na ba kɔ.

17 Saŋga bo i susufɔ aburaso ni nnyɔm ni kpieeri bu nyi baari Yesu do ni, na bu ahore ajo agaya, na ba se i ka, “Ya Mibiɛ, haari ajinim mmɔɔ de ya nɔaniɛ wɔ, nzen ya nya atien bu ɲu u dɛɛ duma n nu.”

18 Na Yesu ase bu ka, “M ɲuuri Sitana ka wɔ fite aŋgoro atɔ, kabo nzue kpɛsɛ na i ti barasu n wɔ.”

19 Na Yesu ase ka, “Am ti fɛn. Ma ma am yiko adena am tientien woom ni bundaanim ɲu, na am kunma yiri kpɔfɔ n faŋga kɛrɛ na pui yó má am.

20 Haari ni nyini kɛrɛ ni, má am ma am ahore jo ka ajinim de am nɔaniɛ ɲgumi n dɛɛ ti, ama, am ma am ahore jo ka ba kɛrɛ am duma ase Nyeme dika.”

21 Nyini saŋga n na Awiewiɛ Casi n ama Yesu ahorejo akɔ sin su, na wɔ sere Nyeme ase ka, “M Si Nyeme, wɔrɔ ti aŋgoro ni asiɛngu kɛrɛ Mibiɛ a. M da u asi ka a fa nyini dekem bo alecirafɔm ni sifɔm si má i ni, ayi akere bo bu ti ka nbaatam ni. M Si, i ti nahɔrɛ wɔ, kabo a koroori ka i yo lɛɛ.”

22 Yesu sereeri Nyeme n wieeri ni, na wɔ se ka, “M Si afa deke kɛrɛ awura m saa nu. Be si má Nyeme Wa ni, má ka i Si Nyeme ni si i a, na be gusu si má i Si ni, má ka Baa ni si i a, ni minem bo Baa n koro ka i yi i kere bu ni, bere si i a.”

23 Do na Yesu ace anie i susufɔm ni, na wɔ jɔjɔ bere ɲgumi do, i ɲa, “Amberɛ la terefie ka am aɲu dekem bo am ɲu bu ni.

24 M suse am wɔ lɛɛ, ka, Nyeme nɔaniɛ kanfɔm ni nfemem beberebe koroori ka bu ɲu deke n bo am ɲu i ni, ama, ba ɲu má i, na ba koro ka bu ti deke n bo am ti i ni, ama, ba ti má i.”

Miɛnu fa kɔ Samariya sɔnɔ aɲunfɔ sifɔ be

25 Na Nyeme nɔaniɛ kerefɔ be aba Yesu do ka i ba sɔ i ɲgɛɛ. Na wɔ bisa Yesu ka, “Ya Kerefɔ, ye m yo sɛ wɔ, ye m nyá ɲgɔɔ n bo i la má awieeri n a?”

26 Na Yesu abɔ i nu ka, “Ba kɛrɛ i sɛ wɔ, Nyeme Jɔrɛ Kadasi n nu a? A ti i bu sɛ wɔ?”

27 Na sɔnɔ n abɔ Yesu nu ka, “Ba kɛrɛ ka, ‘Koro Micera u Nyeme ni, ni u ahorembaa kun, ni u awiewiɛ, ni u faŋga, ni u sunsunni kɛrɛ, na a koro u beɲgu kabo a koro u ɲu ni.’ ”

28 Na Yesu ase i ka, “A kan nahɔrɛ wɔ, yo sɔ na a nyá ɲgɔɔ.”

29 Ama, na Nyeme nɔaniɛ kerefɔ n akoro ka i yo i ɲu ka i ti sɔnɔ bo i yo sa bo i kɔ atin su Nyeme do ɔ, nyini ti, na wɔ bisa Yesu ka, “M beɲgu la ɲma a?”

30 Na Yesu abɔ i nu ka, “Sɔnɔ be yo woori bere a, na wɔ yasu Yerusalem ka i kɔ mie kpiri be su, bu fere do ka Yeriko, na atin bujaanufɔm akɔ atara i ade i neɲge kɛrɛ, na ba bo i akɔ ayaki i ɲgɔɔ n kaan sɔ ɔ.

31 I ba yoori ka Nyeme sayoowa doɲguyofɔ kpɛien be su nyini atin n su, ama, saŋga bo i kɔ ɲuuri sɔnɔ n bo atin bujaanufɔm abo i ni, na wɔ san asin ayaki i.

32 I tiiri sɔ bekun, na Levi busu nufɔ be susin bere, na wɔ ɲu i, na i gusu asan asin.

33 Ama, na Samariyafo be gusu ba bita nyini atin ni, na wɔ ba aɲu sɔnɔ ni, i ɲuuri i sɔ ni, na aɲunfɔ ati i.

34 Na wɔ kɔ sɔnɔ n bi, na wɔ fa ɲguin ni nzan afa aɲmisi kambuem ni, na wɔ cici i, na wɔ fa sɔnɔ n na wɔ ma wɔ tana i kaako su, na wɔ fa i ako wɔfɔm deebiri, na wɔ kɔ anie i dika.

³⁵ Alecin na wɔ yi n̄waa be ama sɔnɔ bo i niɛ awuru n su ni. Na wɔ se i ka, ‘De na a niɛ i dika ma m, na m ba kpieeri m nyi baari, m tɔ deke kere bo a saaki i afa aniɛ i dika ni.’

³⁶ Tɔ, u sunsunni nu, nyini mine nsanm n nu, bɔnɔ kere ka i ti sɔnɔ n beɲgu a?”

³⁷ Na Nyeme noaniɛ kerefo n abɔ i nu ka, “Sɔnɔ n bo i siiri i aɲunfo ni.” Na Yesu ase i ka, “Kɔ na a kɔ yo sɔ.”

Yesu ni Marata ni Mariya jɔre

³⁸ Saɲga bo Yesu ni i susufom n wo kɔ su ni, na ba kɔ aju miɛ be su, bara be woori dɔ, bu fere i ka Marata, na wɔ de Yesu wɔfo i dika.

³⁹ Marata la i niɛma be, bu fere i ka Mariya, na wɔ tana Yesu bi, na i suti kabo Yesu kere barasu ni.

⁴⁰ Ama, na wɔ yo Marata ahoresaaki kabo yiri n̄gumi wo juma yo su ni, nyini ti, na wɔ ba ase Yesu ka, “M Mibiɛ, u cɛɛ wo má nu ka m niema n ayaki juma n kere aji mini n̄gumi saa su, nzen se? Se i ka i ba buka m.”

⁴¹ Na Mibiɛ n abɔ i nu ka, “M danfo Marata, a fa juma beberebe ata u n̄u nyi, ye a suwaraki a,

⁴² ama, deke kun n kpein be akpiɛ u su a. Mariya yiri, deke bo i ti kpa tara i kere ye wɔ yi i n a, na be wo má bere bo i koro de i dɔ.”

11

Kabo Yesu kereeri ya nyemesere atin barasu ni

¹ Cɛɛn n be sɔ ɔ, na Yesu wo nyemesere su awɔre be nu. I ba sere wieeri ni, na i susufom ni kun ase i ka, “Ya Mibiɛ, kere ya nyemesere atin, kabo Yohane kereeri i dɛɛ susufom ni.”

² Na Yesu ase bu ka, “Saɲga bo am ba susere Nyeme, am se ka o, ‘Ya Si Nyeme,

ma minem bu u duma casi ni.

Ma u femɛya n bra.

³ Ma ya nɔɔ nu diire cɛɛn n kere cɛɛn.

⁴ Fa ya satie ce ya,

dama yere gusu fa ce bo bu do ya n̄gasi n wɔ.

Má a ma deke be yo ya na ya wura satie nu.’ ”

⁵ Na Yesu ase ka, “Ma m fa i ka, nzen am nu kun kɔɔri i danfo dika kɔɲgue jinanjin, na i kɔ se i ka, ‘M danfo, fie m kpɔnɔ nsan.

⁶ M danfo atin natiirifo be aba m dika jina n nu bere lee, m gusu la má diire bo m fá ma i.’

⁷ Na yiri n bo i wo sɔɔ n ase ka, ‘Má a miɛ m. Ma tu anɔ awie, na m nbaam da a. M koro yasu má na m má u poi.’

⁸ Tɔ, m suse am wɔ lee, ka, má ka am ti danfoya n dɛɛ ti ye i yásu na i ma u kpɔnɔ n a, ama, i bá yasu na i ma u deke kere bo a koro, dama ka a fie ni sere n dɛɛ ti.

⁹ Nyini ti, m suse am wɔ lee, ka, am sere deke bo am koro i Nyeme dɔ, na i má am. Am nienie deke bo am koro i dɔ, na am n̄jú i. Am bobo anɔ ni, na i téke i ma am.

¹⁰ Dama sɔnɔ kere bo i sere deke be Nyeme dɔ, i má i, na sɔnɔ kere bo i nienie deke be, i n̄jú i wɔ, na sɔnɔ kere bo i bobo anɔ ni, i téke i ma i.

¹¹ Amberɛ bo am ti nbaasim ni, n̄ma ye i wa sere i jombaa ye i mi kéte na i fá woo ma i wa n a? Ai, be yo má sɔ.

¹² Wara, amberɛ nu n̄ma ye i wa sere i karafɔ ye i kéte na i fá bundaani ma i wa n a? Ai, be yo má sɔ.

¹³ Tɔ, amberɛ, haari ni bo am ti satieyofɔm ni, am si aceeri kpam bo am fa ce am nbaam, nzu ti ye nzen am sereeri am Si Nyemɛ bo i wo angoro ni, i koro ma má am Awiewiɛ Casi n a?”

Kabo minɛm ɲa Yesu ni Sitana dɛɛ ti kun ni

¹⁴ Saɲga be na Yesu afɔn ayi ajini afite sɔnɔ be ɲu, wɔ yo i bobo. Ajini n fite yakiiri sɔnɔ n sɔ ni, na wɔ koro ajɔɔ. Na jama n ayo alekutura.

¹⁵ Ama, na minɛ nbem ase ka, “Belazɛbuli bo i ti ajinim kɛɛ dɛɛ fɛmɛ n na bu kaaki fere i ka Sitana ni, yiri ma ahin sɔnɔ n yiko ye i koro fɔn yi ajinim a.”

¹⁶ Na nbem gusu akoro ka bu sɔ i ɲɛɛ. Nyini ti, na ba se i ka i yo alekutura sa be bo i kere ka i yiko n fite Nyemɛ dɔ ɔ.

¹⁷ Ama, Yesu siiri bu sunsunni n sɔ ni, na wɔ se bu ka, “Fɛmɛya kɛɛ bo i nya kpakpaakiiri nu wieeri, nyini fɛmɛya ni ká ɲgbɛɛn wɔ. Awuru gusu kɛɛ bo i kpakpaakiiri nu wieeri, nyini awuru ni sánda wɔ.

¹⁸ Na nzen Sitana dɛɛ fɛmɛya n nya kpaakiiri nu wieeri, i kóro jina a? Ai, i kóro jina má. Deke bo i ti na m se sɔ n la ka, am ɲa Belazɛbuli ma m yiko ye m koro fa fɔn yi ajinim a.

¹⁹ Tɔ, ye nzen am ɲa Belazɛbuli maari m yiko, ye m fa fɔn yi ajinim a, ye ɲma maari am dɛɛ minɛm ni yiko ye bu bita fɔn yi bu n a? Nyini ti, kabo am minɛm yoori ni, nyini kere ka am la má nahɔɛ.

²⁰ Ama, Nyemɛ dɛɛ yiko nu ye mini fɔn yi ajinim a. Nyini n kere ka, Nyemɛ wo am nu suniɛ i minɛm su lɛɛ.

²¹ Nzen sɔnɔ faɲgafɔ nya faari i biɛsɔya nɛɲge kɛɛ jina ɲmindaari i dika, pui koro yo má i awuru n nu nɛɲge be.

²² Ama, nzen sɔnɔ nyiɲga nya taraari i faɲga, i koro tu ɲgoni ni yiri na i kunma i faɲga, na i de i biɛsɔya nɛɲge n bo i daafi i ɲu ni, na i fin i nɛɲge kɛɛ kɔ na i ni i beɲgum kɔ kpaaki nu.

²³ Sɔnɔ kɛɛ bo i jina má m sin, i mi ti m kpɔfɔ ɔ. Na sɔnɔ kɛɛ gusu bo i buka má m na ya tien minɛm nɔɔ, i mi sandi minɛm wɔ.

²⁴ Nzen ajini nya fite yakiiri sɔnɔ, i kɔ jɛɲgbe bara ye boro kpantain nu wɔ, deke bo nzue wo má, na i kɔ nienie woobiri bo i tana yi i ɲumi. Nzen wɔ nya má woobiri, nyini saɲga, a ti ka i ɲa, ‘Ma m kpie m nyi kɔ m woobiri dawa ni.’

²⁵ Na i kaaki kɔ, i kɔ ɲu ka ba kpara dika n nyunyumi, asese deke kere su.

²⁶ Na i nyá kɔ fa ajinim nso, bo bu ti tie tara yiri ni i tii, na bu kere bá wura woobiri dawa n nu. Nyini saɲga, a ɲu ka sɔnɔ n woowa ayo tie atara kabo i yo ti dawa ni.”

²⁷ Saɲga bo Yesu seeri sɔ wieeri ni, bara be wo jama n nu, na wɔ se Yesu ka, “Terefiɛ wo bara n bo i wuuri u na i maari u nyufini n dɔ.”

²⁸ Ama, na Yesu ase i ka, “Terefiɛ wo minɛm bo bu ti Nyemɛ nɔaniɛ n na bu de i ni dɔ a.”

Kabo Yesu keteeri ka i yo má alekutura sa bo bu koro i ni

²⁹ Saɲga bo minɛm sutien bu nɔɔ bara ye Yesu sɔ ni, na wɔ se bu ka, “Amberɛ nyumafɔm ti satieyofɔm wɔ. Am koro ka m yo alekutura sa na am ɲu i wɔ, ama, m yó má i, má ka alekutura sa n bo Nyemɛ yo yoori i maari i nɔaniɛ kanfɔ Jona ni ɲgumi.

³⁰ I ti sɔ lɛɛ, kabo sa n bo i yo tuuri Jona n kereeri Ninevafɔm ka Nyemɛ sunmaari i ni, sɔ ye sa n bo i bá tu mini Adamande Wa n gusu kɛɛ amberɛ nyumafɔm ka Nyemɛ asunma m a.

³¹ Feme bara be yo fiteeri haari i bosu Seba wo, na i ba ti Feme Solomon dæ ngonle jɔjɔwa noanie ni. Jina cæen, yiri bá yasu jina na i jára ki ambere nyumafom nahore su, dama kisa, m suse am wo ka, mini tara Feme Solomon, ama, am ade má m noanie ni.

³² Jona yo kaanri Nyeme jore kereeri Ninevafom na ba kaaki bu wo. Jina cæen, bere bá yasu jina na bu jára ki ambere nyumafom, dama kisa, m suse am wo ka, mini tara Jona, ama, am akete ka am kaaki má am wo.”

Kabo Yesu kereeri anyumbaa kpa jore ni

³³ Na Yesu akaaki ase ka, “Sɔno koro so má fitana su na i fa se fiæwa nu, wara i fa ganɔa butu su. Ama, i fa taka deke su angoro wo, adena minem bo bu ba wura awuru n nu n koro ŋu asi.

³⁴ Ya nyumbaa ni ti ka fitana ma ya ŋuniembaa n a. Nzen u nyumbaa nya ti kpa, u ŋuniembaa n kere ta wein n wo læ. Ama, nzen i nya ti má kpa, u ŋuniembaa n kere wo awosin nu wo læ.

³⁵ Nyini ti, si u ŋu sa na má a se ka wein wo u do, ama, i ti awosin wo.

³⁶ Nzen u ŋuniembaa n kere woori wein nu, na awosin be awo má nu, i tá a papasi, kabo fitana sin ta wura u ni.”

Kabo Yesu ŋa YudaƆm teretereƆm nbem bá ŋu anyumboro ni

³⁷ Saŋa bo Yesu jɔjɔ wieeri so ni, na Farasifo be asere i ka i bra na bu di diire i dika, na Yesu akɔ awura ka i di diire ni.

³⁸ Na Farasifo n abirisi kabo Yesu anmisi má i ŋu ka, ye i sudi diire ni.

³⁹ Na Mibie n ase i ka, “Ambere Farasifo, am ŋmisi am kɔpu ni am taale sin wo, ama, am kunnu ayi ni anyii sayoowam, ni sunsunni tiem wo.

⁴⁰ Ambere sinnzinm ni, sɔno kere si ka Nyeme yoori deke kere kunnu ni i sin a.

⁴¹ Má nzen am fa deke bo i wo am kɔpu ni am taale kunnu ma yaarifom, má deke kere bo am yo i, má i yo casi ma am wo Nyeme do.

⁴² Ambere Farasifo ni, am bá ŋu anyumboro, dama am yi am jakam ma Nyeme wo, haari ni am maakunm, ni ŋgetem, ni nvanvanm kere, ama, am yo má nahore sam, na am kaaki koro má Nyeme. Wo yo daka ka am yo nyini sam saŋa kere, na am fa jaka yiwam buka su.

⁴³ Ambere Farasifo ni, am bá ŋu anyumboro. Am koro ka am tana kpirikoro tanaabirim wo, am tientienbunɔ soom n nu, na am koro ka minem yo am anse goosu wo, na bu ma am jirima.

⁴⁴ Am bá ŋu anyumboro. Am ti ka faŋkunmam bo bu la má nyaari seewa be n wo, na minem nati su na bu si má ka faŋkunma læ.”

⁴⁵ Na Nyeme noanie kerefom n kun ase Yesu ka, “Ya Kerefɔ, nzen a seeri so, a kpie nzuko asaŋa ya kere mmoo læ.”

⁴⁶ Na Yesu ase i ka, “Ambere Nyeme noanie kerefom ni, ambere mmoo bá ŋu anyumboro. Am cici soori nonoori so minem wo, ama, ambere ni am tii soro má su ka am fa am saa kan i.

⁴⁷ Ambere bá ŋu anyumboro. Am yo faŋkunmam dongu fa ma Nyeme noanie kanfom wo, bere bo am nam yo kuunri bu ni.

⁴⁸ Nyini kere ka ambere ni am tii saa woori sa n bo am nam yo yoori i n nu læ. Bere kuunri Nyeme noanie kanfom n a, na ambere ata bu faŋkunmam.

⁴⁹ Nyini ti, ye Nyeme Alecirafo n seeri ka, ‘M sunma m noanie kanfom, ni m jaramasam bu do, na bu kún nbem, na bu kere nbem wuwuruwa.’

⁵⁰ Nyini ti, Nyeme cin ambere nyumafom sui fa ko kabo am nam yo kuunri Nyeme noanie kanfom, fiteeri durunya n bumboori fa ba ju haari ni kisa ni.

⁵¹ Bu yo yoori sɔ ɔ, fite saŋga n bo bu kuunri sɔnɔ be bo bu fere i ka Abeli n fa ba juuri saŋga n bo bu kuunri sɔnɔ be bo bu fere i ka Zakariya ni. Yiri ye bu kuunri i Nyeme Sereebiri Awuru n nu, Casi Kere Casi Sɔɔ n ni Mikun yoowa yoobiri n afien n a. Nahɔre ye m suse am n a, nyini sam kere dɛɛ ti ye Nyeme bá cin ambere nyumafɔm sui n a.

⁵² Ambere Nyeme nɔanie kerefɔm ni, am bá ɲu anyumboro. Am akere má minem Nyeme atin, kabo i ti ye ni ka am kere bu ni, na ambere ni am tii akete ka am su má i atin n su, ye am akanda bo bu koro ka bu su i su ni.”

⁵³ Saŋga bo Yesu yasuuri nyini dika n nu ni, na Nyeme nɔanie kerefɔm, ni Farasifɔm n afa i kpɔ agaya, na ba bisa i bisaawam beberebe,

⁵⁴ na ba boro bu nyi na bu sɔ i ɲɛɛ, adena i jɔjɔ wura Nyeme ɲgasi nu.

12

Kabo wɔ yo daka ka ya soro Nyeme ɲgumi ni

¹ Saŋga n bo nyini n kere sukɔ su ni, na jama beberebe aba atien bu nɔɔ haari bu kɔ sutientien bu beɲgu ɲu. Na Yesu abo i bu ka i jɔjɔ, na wɔ du mɔ ase i susufɔm n ka, “Am si am ɲu sa ni Farasifɔm dɛɛ kpɔnɔ ayiri n bo bu fa gɔ kpɔnɔ nu na i yasu ni. M suni bu dɛɛ burukɔɔnu sayoowam wɔ.

² Deke be wo má fiɛwa nu bo bu bá ɲu má i, deke be gusu wo má asiri nu bo bu bá si má i.

³ Nyini ti, deke kere bo am jɔjɔri i kɔɲguɛ, bu bá jɔjɔ i wiesu wɔ. Na deke kere bo am tuuri i asuturi sɔɔ, bu bá bo i ndoori wɔ, na sɔnɔ kere tí i.”

⁴ Na Yesu akaaki ase ka, “M danfɔm, m suse am wɔ lɛɛ, ka, má am soro minem bo bu koro kun aɲuniembaa ni, na nyini sin, bu koro yo má pui kun ni.

⁵ Ama, m kere am sɔnɔ bo i ti ye ni ka am soro i. Am soro Nyeme, yiri koro kun aɲuniembaa n a, na i kaaki la yiko bo i koro fa i ji cɛema sin nu. M suse am wɔ lɛɛ, ka, yiri ti sɔnɔ bo am soro i a.

⁶ Am si ka njɔrem nnu ɲwaa ti kaan sɔ ɔ, má sɔ? Ama, bu kun n kpein mmɔɔ wo má bere bo Nyeme nie má i dika.

⁷ Haari am tiiɲmie mmɔɔ bo i wo am tii su ni, Nyeme si i kere nɔ. Nyini ti, má am soro sere. Am la anyunuyi Nyeme dɔ tara njɔrem beberebe.”

⁸ Na Yesu akaaki ase bu ka, “M suse am wɔ lɛɛ, ka, sɔnɔ kere bo i kan kereeri minem ka i ti m susufɔ, mini Adamande Wa n gusu bá kan kere Nyeme merékem n ka i mi ti m dɛɛ wɔ.

⁹ Ama, sɔnɔ kere gusu bo i keteeri minem nyunu ka i ti má m susufɔ, mini Adamande Wa n gusu bá kete Nyeme merékem nyunu ka i mi ti má m dɛɛ.

¹⁰ Sɔnɔ kere bo i jɔjɔ wuraari mini Adamande Wa ni ɲgasi nu, Nyeme fá i mi ɲgasi ce i, ama, sɔnɔ kere bo i jɔjɔ wuraari Awiewie Casi ni ɲgasi nu, Nyeme fá má i mi ɲgasi ce má i.

¹¹ Saŋga bo bu ba faari am baari bu tientienbunɔɔ sɔɔm nu, wara nfemem ni nfaɲgafɔm nyunu ka bu di am jɔre, má am ma am ahore saaki fa kɔ kabo am jɔjɔ barasu.

¹² Dama nyini saŋga n ba juuri, Awiewie Casi ni kere am nɔanie kere bo wɔ yo daka ka am jɔjɔ i a.”

Miɛnu fa kɔ sɔnɔ neɲgefɔ sinnzin be su

¹³ Sɔnɔ be woori jama n nu, na wɔ se Yesu ka, “M Kerefɔ, se m gɔɔ ka i kpaaki aja bo ya si ayaki i ama ya n nu, na i fa m dɛɛ ma m.”

14 Na Yesu ase i ka, “Wɔrɔ, ηma ayi m, ka m di am jɔrɛ na m kpaaki am aja nu ma am a?”

15 Na Yesu ase jama n kerɛ ka, “Am niɛ am tii su dɔŋgu na am si am ηu sa fa kɔ anyii barasu kerɛ sa, dama sɔnɔmbiri nenɛge ti má i ηgɔɔ, haari i mi n koro i la i ka sɛ.”

16 Dɔ na Yesu abo bu ahin miɛɛnu ni, i ηa, “Sɔnɔ nenɛgefɔ be yo woori berɛ a, na wɔ dɔ i fie, na wɔ nya diire beberebe.

17 Na wɔ sunsun i tii nu na wɔ se ka, ‘M la má deke bo m fa ahin diire n kerɛ se. Ye m yó sɛ wɔ?’

18 Na wɔ se ka, ‘Kabo m yó yaa, m sún m bondom kerɛ ji wɔ, na m tá ηgbingbirim, na m fá m diire n ni nenɛge kerɛ bo m la bu n wura nu.

19 Na m nyá se ka ma di terefie, puitiripui kpíe má m su kun, m tána a, ahin afɔ nye nye n kerɛ, na m dí na m nú na m ahore jó.’

20 Ama, na Nyeme ase i ka, ‘Wɔrɔ sinnzin ηgbeɛn ni. Ahin kɔngue n nu berɛ, m yí u ηgɔɔ n fite u dɔ. Na m níe ka nyini nenɛge n kerɛ bo a tien i nɔɔ ni ká ηma dɛɛ wɔ?’ ”

21 Na Yesu akaaki ase bekun ka, “I ti sɔ ɔ lɛɛ, fa kɔ minɛm bo bu kpini nenɛge beberebe fa se durunya n nu fɛn ni, ama, Nyeme dɔ, bu la má pui.”

Kabo Yesu ηa má ya tana koko ni

22 Na Yesu ase i susufɔm n ka, “Nyini ti, m suse am wɔ lɛɛ, ka, má am tana sukoko fa kɔ am ηgɔɔ su, kabo am dí, na má am kaaki sukoko fa kɔ am ηunie su, kabo am nyá suturam bo am fá wura na am kára.

23 Dama ηgɔɔ tara diire, na aηuniɛmbaa n gusu tara suturam.

24 Am niɛ anumam, haari ni bo bu dɔ má ni, na bu kaaki kpíe má ni, bu la má bondo gusu, bo bu fa diire wura nu, se Nyeme ma bu diire ye bu di a. Amberɛ la anyunuyi tara anumam e.

25 Am nu, ηma tana koko fa kɔ i koroowam su ye i mi koro buka i ηgɔɔ tintiin su haari kaan sɔ a? Ai, be wo má berɛ.

26 Nzen am koro yo má nyini deke n kaan n be sɔ, nzu ti ye dekem bo bu kaari n kerɛ miɛ am a?

27 Am niɛ kabo wuram bo pum barasu barasu a. Bu yo má juma be, bu kaaki tu má gise. Ama, m suse am wɔ lɛɛ, ka, haari Femɛ Solomon ni i nenɛge n kerɛ bo i yo la i ni, wɔ la má sutura bo i yo nyumi juuri nyini wura pum ni be.

28 Nzen wuram bo bu wo berɛ nyuma, na ahunma a ηú ka ba kpíe bu na bu yara bu, ye Nyeme niɛ bu dika, nzu ti ye i níe má amberɛ bo am tara wuram co n a? Amberɛ, am la má yarada fieo.

29 Nyini ti, saŋga kerɛ, má am ma am sunsunni wo deke bo am dí, ni deke bo am nú su. Má am tana koko fieo.

30 Dama durunya n nufɔm bo bu su má Nyeme ni, berɛ sunsun sɔ ɔ saŋga kerɛ. Am Si Nyeme si ka am koro nyini dekem ni.

31 Má am yo sɔ, ama, am kpini Nyeme femɛya n busu ka, na i nyá ba fa nyini dekem n buka am su.”

32 Na Yesu akaaki ase ka, “Má am soro sɛrɛ, haari ni bo am ti ka nbɔɛm bo bu sunnu má ni, dama am Si Nyeme ayi am ka am ni yiri saŋga di i femɛya n a.

33 Am tɔ am deke bo am la i, na am fa ηwaa n ma jaarifɔm. Am kpini ajɛke seebiri bo i saaki má n busu. Am fa ajɛke bo i kpíe má su n fa se Nyeme dika n nu, dɔ ye awiefɔ koro wura wɔ má i a, na watarawam gusu koro muka má i.

34 Dama deke bo am ajɛke wo ni, am ahorembaa kerɛ gusu wó dɔ ɔ.”

Kabo Yesu na i susufom ni kpa bu nu nminda i sanja kere ni

³⁵ Na Yesu ase ka, “Am kpa am nu wo, na am so am fitana sunminda.

³⁶ Am yo so o, ka minem bo bu tana nminda bu mibie bo wo ko konyaya, na i ba n wo, na sanja bo i ba boboori ano n kpenja ni, bu kaba teke i wo na i wura.

³⁷ Terefie wo nyini akoom n do, nzen bu mibie n ba nu ka bu toko tana nminda i. Nahore ye m suse am n a, i ma bere tana a, na yiri ni i tii fa diire ba ma bu na bu di.

³⁸ Nzen haari i kpieeri i nyi ba juuri kongue jinanjin, wara akonyuma bo sanja, na i ba nu ka bu toko tana nminda i, terefie wo bu do.

³⁹ Am si tenle ka nzen ma awurufobie n si sanja bo awiefi ni ba i dika na i ba wo i, ma i tana nminda a, na awiefi n koro ba wura ma.

⁴⁰ Amberere gusu kpa am nu sanja kere, dama mini Adamande Wa ni ba sanja bo am sunsun ma ka m ba n wo.”

⁴¹ I jooori so n na Petoro abisa i ka, “Ya Mibie, a bo ahin mieenu n ni yere wo, nzen a ni sono kere wo?”

⁴² Na Yesu abisa i ka, “Amusuisufi kpien n bo i la dabuju na i kaaki la alecira n la nma a? Yiri la bo i mibie n afa amusuisufi nyngam awura i saa nu ka i kpaaki diire nu ma bu, sanja bo i ti ye ni ka i ma bu ni.

⁴³ Nzen i mibie n ba nuuri ka i suyo juma n kabo i seeri i ka i yo i ni, terefie wo nyini amusuisufi n do.

⁴⁴ Nahore ye m suse am n a, nyini amusuisufi n mibie ni fa i aja kere wura i saa nu wo, na i nie i dika.

⁴⁵ Ama, nzen i ti amusuisufi tiefi, i sunsun ka i mibie ni kpie ma i nyi ba ma nde. A nu ka i subo amusuisufi nyngam ni, bu nbiesom ni nbaram kere, na i sudi na i sunu nzan bo,

⁴⁶ do na i mibie n ba kpie i nyi ba cen bo i sunsun ma ka i ba, na i kaaki si ma ba n sanja ni. Nyini sanja n na i mibie n cin i sui agaya, na i fa i bo minem bo bu yo ma i yarada n su.

⁴⁷ Na nzen amusuisufi n si deke bo i mibie n koro ka i yo i, na wo yo ma siriya na i yo deke bo i mibie n koro ka i yo ni, i bo i wo nyunyumi.

⁴⁸ Ama, nzen amusuisufi bo i si ma deke bo i mibie n koro ka i yo i, na i yoori deke be bo i ti ye ni ka i cin i sui, i dee suicin n ti kaan so o. Sono kere bo bu ce i aceeri beberebe, i ti ye ni ka i mi fa yo deke bo wo yo daka ka i yo i, na sono kere bo Nyeme ce i aceeri beberebe agaya, i ti ye ni ka i mi su i ko tara so.”

Kabo Yesu na wo fa kpakpaakinu aba ni

⁴⁹ Na Yesu akaaki ase bu ka, “Ma fa Nyeme jore n aba ka i yara durunya n nufom ka sin dee su wo. Ma nyini sin n jeeri kisa, ma m koro.

⁵⁰ Ama, m la wahara be bo i ti ye ni ka m di i, ma ka ma di i awie, m ahore da ma.

⁵¹ Am sunsun ka ma fa tanalaifie aba durunya n nu a? Ai, m suse am wo lee, ka, ma fa ma tanalaifie baari a, ama, ma fa kpakpaakinu aba a.

⁵² Fite kisa fa ko, awuru kun nufom mine nnu kpakpaaki nu. Mine nsan ti bu busu bu ngumi wo, na mine nnyo ti bu busu bu ngumi.

⁵³ Baabieso ni i si koro ma bu bengu jore, na baabara ni i ni koro ma bu bengu jore, na baa n ni, ni i wa yi koro ma bu bengu jore.”

Kabo Yesu jarakiiri minem ka bu si ma sam bo bu suyo n bu ni

⁵⁴ Na Yesu ase jama n ka, “Sanja bo am nu ka nzue yinyingu atien i noo wie afiri, a ti ka am na, nzue ba nyuma, a nu ka i ba a gusu.

⁵⁵ Na san̄ga bo am ɲu ka aɲuma sukpiɛ fite nyunu ndiema biɛ su, a ti ka am ɲa, nyuma wiɛ fite agaya, a ɲu ka i fite wo.

⁵⁶ Ambere burukɔɔnufɔm ni, nzu dɛɛ ti ye am koro niɛ angoro ni asien̄gu na am si sam bo bu bá yo n a, ye am niɛ ye am koro si má sam bo bu suyo ahin san̄ga n bu a?”

⁵⁷ Na Yesu akaaki ase bu ka, “Nzu ti ye ambere ni am tii sunsun má na am si sa bo i kɔ atin su a?”

⁵⁸ Nzen u ni be la jɔɛ, na nzen i koro ka i fa u kɔ jɔɛdifo dɔ, jɔkoti tara i mi n jaa, na má jɔɛ n ju jɔɛdifo n dɔ, má nyini, i mi ni cín u kɔ jɔɛdifo n dɔ, na yiri gusu fá u ma dansaraka niɛfo ni, na yiri gusu nyá nyi u.

⁵⁹ M suse am wo lɛɛ, ka, nzen a woori dɔ, na a tɔ má kaari n kere awie má, a nyá má atin fite má dansaraka n nu.”

13

Kabo i ti ye ni ka ya kaaki ya wo barasu ni

¹ Nyini san̄ga n na mine nbem wo dɔ, na ba se Yesu kabo Galilifo nbem yo kɔɔri ka bu kɔ yo yoowa ma Nyeme, na bu wo yo su ni, na Gomina Pilato gusu ama minem aba akun bu.

² Na wo se bu ka, “Ye kabo bu kuunri nyini Galilifom ni, am sunsun ka nyini kere ka bu dɛɛ satie yoowa tara Galilifom kere dɛɛ wo, nzen se?”

³ Ai, i ti má sɔ fieo. M suse am wo lɛɛ, ka, nzen am akaaki má am wo, ambere mmɔɔ bá ka ɲgbɛɛn sɔ ɔ lɛɛ.

⁴ Ye mine buru ni mɔcuem bo Silowam dɛɛ awɔɛ n nu kobe bambaka n tɔ gɔɔri bu ɲu n di? Am sunsun ka i kere ka bu dɛɛ satie yoowa tara Yerusalemfom kere dɛɛ wo, nzen se?”

⁵ Ai, i ti má sɔ fieo. M suse am wo lɛɛ, ka, nzen am akaaki má am wo, ambere mmɔɔ bá ka ɲgbɛɛn sɔ ɔ lɛɛ.”

Miɛnu fa kɔ damba baka n bo wo su má n su

⁶ Dɔ na Yesu abo bu ahin miɛnu ni, i ɲa, “Sɔnɔ be yo woori bere a, ye damba baka jina i baka suuwa barasu barasum fie nu. Na wo kɔ anienie ka i nie, beni i ɲú suuwa su, ama, wo ɲu má puitiripui su.

⁷ Nyini ti, na wo kɔ ase fie n niɛfo n ka, ‘Nie, afo kun kun sɔ nsan lɛɛ, bo m ba nie ahin damba baka n su ka, beni m ɲú suuwa a, ama, m ɲu má pui su. Nyini ti, kpiɛ i ji. Nzu ti ye i jina bere susaaki asien n a?’

⁸ Ama, na fie n niɛfo n abo i nu ka, ‘M mibie, yaki i benle, na ya nie i kɔ ju afo kun bekun na ya nie. M fúndu kunma bara ye i bu wo, na m gó i nanyeti.

⁹ Dɔ na nzen baka n suuri suuwa, i ti kpa, nzen wo su má, na a koro ma m kpiɛ i ji.’ ”

Kabo Yesu tuntunri bara be Numiyi cɛɛn n ni

¹⁰ Numiyi cɛɛn n be sɔ ɔ, na Yesu wo minem kere su, tientienbunɔɔ sɔɔm kun nu.

¹¹ Bara be woori dɔ, ajini wo i ɲu, wo bu i wi, i afo buru ni mɔcuɛ lɛɛ, i koro yasu jina má.

¹² San̄ga bo Yesu ɲuuri i n na wo bo afere i, na wo se i ka, “Bara, a nya u tii afite u tukpaki n nu.”

¹³ San̄ga bo Yesu suse sɔ n na wo fa i saa anana i ɲu, kpen̄ga na wo ten̄ge i ɲu ajina, na wo kansi Nyeme.

¹⁴ Ama, na yaa ati tientienbunɔɔ sɔɔ n kpiɛn ni, ka Yesu atuntun sɔnɔ Numiyi cɛɛn ni. Na wo se minem ni ka, “Ya la lesen bo wo yo daka ka ya

fa yo juma, nyini ti, am bra nyini cɛɛnm ni, na bu bá tuntun am, ama, má Njumiyi cɛɛn n yiri.”

¹⁵ Na Yesu ase i ka, “Amberɛ burukɔɔnufɔm ni. Njumiyi cɛɛn ni, am n̄ma nu ye i nyan̄gi má i naani, wara i kaako, na i kɔ ma i nzue a?”

¹⁶ Ye ahin bara ni mmɔɔ ti Abraham busu nufɔɔ, ye Sitana afa i ayo i dɛɛ, afɔ buru ni mɔcɛɛ lɛɛ, wɔ yo má daka ka m tuntun i Njumiyi cɛɛn n na i nya laifɛ, nzen sɛ?”

¹⁷ I seeri sɔ n na wɔ wura i kpɔfɔm ni nyinse, ama, na minem n bere ahore ajɔ fa kɔ alekutura sam bo wɔ yo bu n su.

Miɛnu fa kɔ alembaa kaan be jɔre su

¹⁸ Na Yesu akaaki ase bu ka, “Nyemɛ femɛya n ti ka nzu wɔ? Ye m fá nzu deke fa sunsun kabo i ti a?”

¹⁹ I ti ka alembaa kaan kabo nyem mbaa ti n wɔ, bo sɔnɔ be dɔɔri i fiesu ni, na wɔ fi, na wɔ nyi atetereki asambaa asambaa, na anumam akoro ayo bu tiɛrim su.”

Miɛnu fa kɔ kpɔnɔ ayiri n su

²⁰ Na Yesu akaaki ase bu bekun ka, “Ye m fá nzu deke fa sunsun kabo Nyemɛ femɛya n ti a?”

²¹ I ti ka ayiri bo bu fa gɔ kpɔnɔ samɛnɛ nu na i yasu ni, na bara be fa gɔɔri samɛnɛ beberebe nu, na i kere yasuuri n wɔ.”

Kabo Yesu jɔjɔ fa kɔɔri anɔ n bo i ti fii n su ni

²² Yesu sukɔ Yerusalem miɛ kpiri n su ni, na wɔ nati asin miɛ ngbingbirim ni kan kanm su, sukere minem.

²³ Na sɔnɔ be abisa i ka, “Ya Mibiɛ, minem bo Nyemɛ dé bu tii ji ni, bu sunnu, nzen bu sunnu má?” Na Yesu ase bu ka,

²⁴ “Am boro am nyi na am fa anɔ n bo i ti fii n na am wura, dama m suse am wɔ lɛɛ, ka, mine beberebe bá koro ka bu wura, ama, bu bá koro wura má.

²⁵ Saɔga n ba juuri, awurufɔbie ni yásu nyi anɔ n wɔ, nyini saɔga n na am jína anɔ n su, subobo, na am sére i jande ka, ‘Ya Mibiɛ, teke anɔ n ma ya.’ Na i gusu nyá se am ka, ‘Ai, m si má am sa.’

²⁶ Dɔ na am sé i ka, ‘Ya ni wɔɔɔ yo diiri a, na ya nu, na a kere minem ni yere kere, ya bɔsu dɔ.’

²⁷ Ama, na i káaki se am bekun ka, ‘Amberɛ satieyofɔm ni, m si má am sa fieo, am cinsi m bi bere.’

²⁸ Na am n̄jú ka Abraham, ni Izaki, ni Jakɔbu, ni Nyemɛ nɔanie kanfɔm ni, ka bu wo Nyemɛ femɛya n nu, na kabo ba fa amberɛ atu dasin ni, dɔ na am sún, na am kán am saa.

²⁹ Na minem fite durunya n awɔre nna n kere nu, na bu bá tana Nyemɛ femɛya n nu, na bu dí na bu nú.

³⁰ Am ti fɛn. Minem bo bu wo mɔ kisa ni, bá ka sin, na bo bu ka sin kisa n bá du mɔ.”

Kabo Yesu ahore saaki maari Yerusalemfɔm barasu ni

³¹ Nyini saɔga n na Farasifɔ nbem aba Yesu dɔ aba ase i ka, “I ti ye ni ka a n̄mati fite fɛn, na a kɔ deke be, dama Femɛ Herode koro ka i kun u wɔ.”

³² Na Yesu ase bu ka, “Am kɔ na am kɔ se nyini n̄aaku sɔnɔmbiri ka o, ‘Ti fɛn. M sufɔn ajinim fite minem n̄u wɔ, na m ma tukpakifɔm nya laifɛ, nyuma ni ahunma n̄gumi wɔ, na ahieni na m wíe m juma.’

³³ Haari ni nyini mmɔɔ, wɔ yo daka ka m sukɔ ɔ, nyuma, ni ahunma, ni ahieni, dama Nyeme noanie kanfo kere ti ye ni ka bu kun i Yerusalem mie kpiri n nu wɔ.”

³⁴ Na Yesu abo awie ase ka, “Oi, ambere Yerusalemfo. Ambere kuunri Nyeme noanie kanfo n a, na minem bo Nyeme sunmaari bu am do ni, am atu bu yabue. Saŋga kere m koro ka m tien am noo, na m fa m saa bara ye am, kabo ako tien i nbaam noo, i lanƙpete nu ni, ama, am soro ma m su.

³⁵ Am nie fen, Nyeme yaki am nu ji. M suse am wo lee, ka, fite kisa fa ko, am nu ma m kun, ma ka saŋga bo am ba se ka, ‘Terefie wo yiri n bo i suba Micera n dee duma n nu n do.’ ”

14

Kabo Yesu tuntuunri sono be Njumiyi ceen ni

¹ Njumiyi ceen n be so ɔ, na Farasifo kprien be afere Yesu ka i bra i dika na bu di diire, na Yesu ako. Saŋga bo i wo diire n di su ni, na mine aba atana suyi i koresi.

² Kpenƙa na sono be ayasu ajina Yesu nyunu, i saam ni i jaam kere awura,

³ Yesu juuri sono n so ni, na wo bisa Nyeme noanie kerefom ni, ni Farasifo n ka, “Ya dee atin n su, atin wo nu ka ya tuntun tukpakifo Njumiyi ceen ni, nzen atin wo ma nu?”

⁴ Ama, ba bo ma i nu, na Yesu ama sono n anya laifie, na wo ma i atin na wo ko.

⁵ Do na wo nya abisa bu ka, “Am nu nma ye nzen i wa baabieso, wara i naani, toori bura nu, Njumiyi ceen ni, ye i mi kaba yi ma i fite ma?”

⁶ Ama, ba koro abo ma i ahin bisaawa n nu.

Kabo Yesu tuuri bu fo fa ko kpirikoro sam su ni

⁷ Na Yesu anu kabo wofom nbem sunienie kpirikoro tanaabiri na bu tana ni, do na wo bo ahin mienu ni, akere bu kere.

⁸ I na, “Saŋga kere bo sono be ba fere u ka a bra ba di konyaya diire i dika, a ko, ma a tana jirima tanaabiri ni, a yoori so, a ko nu ka wo fere sono be bo i tara u,

⁹ nyini saŋga n na sono n bo wo fere am kere ni, yiri nya ba u do na i ba se u ka, ‘M don, yasu ma ahin sono n tanaabiri.’ Nyini saŋga, a nu ka wo wura u nyinse lee, na a ko kaan koobiri.

¹⁰ Ama, sono fereeri u ka a bra i dika ba di diire, a ko juuri, du mo ko tana kaan tanaabiri ka. Do na sono n bo wo fere u ni, yiri nya ba u do na i ba se u ka, ‘M don, yasu bra na a ba tana ahin tanaabiri nyunyumi ni.’ Nyini n so koro wura u kpiri, u benggu wofom kere n nyunu a.

¹¹ Dama sono kere bo i wura i nu kpiri, Nyeme yo i mi kaan wo, na sono bo i yo i nu kaan, Nyeme wura i mi kpiri.”

¹² Do na Yesu anya ase sono n bo i baandiiri i n ka, “Saŋga bo a na a fere minem na bu ba di diire u dika, ma a fere u danfo, wara u ninbaam, wara u lamoyam, wara u bengum bo bu la ajekere, nzen a yoori so, bere gusu ba fere u ceen n be so ɔ, nyini saŋga ni, ba to u kaari awie lee.

¹³ Ama, saŋga kere bo a na a baandi mine na bu ba di diire u dika, baandi yaarifom, ni wobukam, ni bo bu saam ni bu jaam awu ni, ni anyinsinm.

¹⁴ A nya yoori so, terefie wo u do. Bere koro to ma u kaari, ama, Nyeme ba to u kaari a, ceen bo minem bo bu yo sa bo i ko atin su Nyeme do n ba tenge bu yiwee n nu ni.”

Mienu fa ko di ni nu bambaka n su

¹⁵ Yesu seeri sɔ n na wɔfɔm nu kun ase i ka, “Nka terefie wo minem bo bu bá tana Nyeme femeya n nu di diire n dɔ.”

¹⁶ Na Yesu ase i ka, “Sɔnɔ be yo woori bere a, na wɔ yo diire beberebe, na wɔ baandi jama beberebe ka bu ba di diire ni.

¹⁷ Na sanɔa n bo diire n ba yoori siriya ni, na wɔ sunma i akɔɔ ka i kɔ se minem n bo wɔ du mɔ abaandi bu n ka, ‘Am bra, deke kere ayo siriya.’

¹⁸ Na bu kun kun kere asere atin ka bu koro ba má diire n di. Na ciciri su dɛɛ sɔnɔ n ase akɔɔ n ka, ‘Jande, m sere u wɔ, ma to asien, i ti ye ni ka m kɔ nie kabo i ti wɔ, m koro ba má.’

¹⁹ Na nyiŋga n ase ka, ‘Ma to m tooram asese busu nnu, m koro ka m kɔ fa bu yo juma kisa kisa na m nie, m sere u wɔ jande, m koro ba má.’

²⁰ Na nyiŋga n gusu ase ka, ‘Ma ja bara kisa lee, nyini dɛɛ ti, m koro ba má.’

²¹ Na akɔɔ n akpie i nyi akɔ ase i mibie n kabo minem kere ase i ni. Dɔ na yaa ati awurufobie n agaya, na wɔ se yiri akɔɔ n ka, ‘Yo ndende na a kɔ mie kunnu atinberem kere su, na a kɔ fere jaarifɔm, ni wɔbukam, ni anyinsinm, ni minem bo bu saam ni bu jaam awu ni, na a fa bu bra.’

²² Wɔ ce má na akɔɔ n akɔ aba, na wɔ se ka, ‘M mibie, ma yo kabo a seeri ka m yo ni, ama, fofoe toko ka.’

²³ Na awurufobie n ase i ka, ‘Fite kɔ mie n aheme aheme, ni i korokam kere nu, na a kɔ fere minem ka bu bra, adena m awuru n yi ni jama.

²⁴ M suse am wɔ lee, ka, nyini minem kere bo m baandiiri bu na ba ba má ni, bere kun n kpein mmɔɔ nɔɔ kán má m diire n kun.’ ”

Kabo ya yaki deke kere na ya su Yesu su ni

²⁵ Sanɔa bo Yesu wo kɔ su ni, na jama beberebe asu i su, na wɔ ce anie bu, na wɔ se bu ka,

²⁶ “Sɔnɔ kere bo i koro ka i ba m dɔ, i koro yo má m susufɔ, má ka i mi akoro m atara i si, ni i ni, ni i yi, ni i nbaam, ni i ninbaam, ni i sinbaam, ni haari yiri mmɔɔ ni i ti.

²⁷ Sɔnɔ kere bo i koro sɔ má i yiwee baka jaanu n na i su m su, i mi koro yo má m susufɔ.

²⁸ Ma m fa i ka sɔnɔ ŋa i ta awuru, i du mɔ tana wɔ, na i bu akunta ka, na i nie ka i la ŋwaa bo i koro ju awuru n ta.

²⁹ Nzen i ŋwaa ju má bo i ta awuru n wie, na i boori i bu na wɔ wie má i, sɔnɔ kere bo i sin ŋuuri sa n bo wɔ yo i ni, i mi síri wɔ,

³⁰ na bu sé ka, ‘Ahin sɔnɔ n boori i awuru n bu wɔ, ama, wɔ koro awie má i.’

³¹ Ma m kaaki fa i ka nzen feme bo i la i sojam akpii buru ye i koro ka i kɔ lue ni i beŋgu feme be bo yiri la sojam akpii aburanyɔ, i tána sunsun wɔ ka, na i nie ka i koro kun lue ni i beŋgu ni.

³² Nzen i ŋuuri ka i koro kɔɔ má nu, i dú mɔ sunma sɔnɔ ɔ, na i kpá i beŋgu feme n atin na i kó sere i ka, i má bu yo jɔre n dɔŋgu.”

³³ Na Yesu ase ka, “I ti sɔ ɔ lee, ni ambere gusu dɔ, sɔnɔ kere bo i wara afi má i tienɔgu deke, i mi koro yo má m susufɔ.”

Njin bo i la má kperɛ n dɛɛ jɔre

³⁴ Na Yesu akaaki ase ka, “Njin yo fie, ama, nzen i fiefie nya ba saari wieeri, i koro yo má fiefie kun.

³⁵ I koro buka má asien ni mmɔɔ na i kaaki koro buka má nanyeti na i yo diire, ŋka bu fa butu wɔ. Bo i koro ka i ti ahin jɔre n bu, i ti ye ni ka i mi so i sui na i ti.”

15

Miɛnu fa kɔ bɔɛ n bo i miniiri n jɔɛ

¹ Cɛɛn n be sɔ ɔ, na lampodefɔm ni satieyofɔm beberebe aba Yesu dɔ na bu ba ti i kereewam ni.

² Na Farasifɔm ni Yudaɔfɔm Nyɛmɛ nɔanɛ kerefɔm n aɲuɲuti, bu ɲa, “Ahin sɔnɔ n de satieyofɔm wɔ, haari na i ni bere sangɔ di diire wɔ mmɔɔ.”

³ Dɔ na wɔ bo bu ahin miɛnu ni, i ɲa,

⁴ “Nzen ambere be nu la i nbɔɛm yaa, na kun miniiri, i mi yó sɛ wɔ? I yáki nbɔɛ aburaɲɔna ni ɲɔnɔm ni boro n nu wɔ, na i kó nienɛ kun n bo wɔ mini ni haari i bá ɲu i.

⁵ Sangɔ bo i ba ɲuuri wieeri ni, na i ahore jó na i fá i fa bo i bɛɛ,

⁶ na i fá i fa ba awuru. Dɔ na i fére i danfom ni i tanafom kere na bu tien bu nɔɔ, na i sé bu ka, ‘M ahore ajo ka ma ɲu m bɔɛ n bo i miniiri ni. Nyini ti, am ma m ni ambere kere kunnu jó.’

⁷ M suse am wɔ lɛɛ, ka, i tí sɔ ɔ lɛɛ, nzen sɔnɔ kun kaakiiri i wo, ahorejo wó Nyɛmɛ dika n nu tara mine aburaɲɔna ni ɲɔna bo bu ɲa bu yo sa bo i kɔ atin su Nyɛmɛ dɔ na wɔ yo má daka ka bu kaaki bu wo ni.”

Miɛnu fa kɔ ɲwaa n bo i miniiri n jɔɛ

⁸ Na Yesu abo bu miɛnu bekun, i ɲa, “Nzen bara be la i jɛɛ ɲwaa buru, na kun miniiri, i mi yó sɛ? I só sin su wɔ, na i kpára bara ye awuru n nu, na i nienɛ deke n kere, haari i bá ɲu i.

⁹ Na sangɔ bo i ba ɲuuri ni, i fére i danfom ni i tanafom kere, na bu tien bu nɔɔ, na i sé bu ka, ‘M ahore ajo ka ma ɲu m ɲwaa n bo i miniiri ni. Nyini ti, am ma m ni ambere kere kunnu jó.’

¹⁰ M suse am wɔ lɛɛ, ka, i ti sɔ ɔ lɛɛ, nzen satieyofɔ kun kaakiiri i wo, ahorejo wó Nyɛmɛ merɛkem n dɔ.”

Miɛnu fa kɔ biɛ be bo i wa miniiri n jɔɛ

¹¹ Na Yesu akaaki abo bu miɛnu be bekun, i ɲa, “Sɔnɔ be yo woori bere a, i la nbaabiesom nnyɔ.

¹² Cɛɛn n be sɔ ɔ, na kaan n ase i si n ka, ‘M si, kpaaki u aja kere nu na a fa m dɛɛ ma m kisa.’ Na i si n akpaaki aja n nu, na wɔ fa bu nnyɔ n kere dɛɛ ama bu.

¹³ Wɔ cɛ má, na kaan n atɔ i dɛɛ nenje n kere bo i si n fa maari i ni. I nyaari ɲwaa n wieeri sɔ ni, na wɔ yasu akɔ asien dede be su. Dɔ na wɔ kɔ adi ɲwaa ni ɲgbɛɛnɲgbɛɛn haari na i kere aba awie.

¹⁴ Sangɔ bo i ba diiri ɲwaa n kere wieeri n na ahɔɛ bambaka be atɔ nyini asien n su. Dɔ, wɔ la má pui bo i di kun.

¹⁵ Nyini ti, na wɔ fa i ɲu akɔ awura nyini asien n su miebaa be saa nu, ka i yo juma ma i mi ni, adena i nya diire di. Dɔ na miebaa n afa i akɔ i fiesu ka i kɔ sunɛ i afam dika.

¹⁶ Na ahɔɛ aba ati i agaya, haari i ba koro ka i di afam dɛɛ diire n be mmɔɔ ɔ, ama, be ama má i deke be na i di.

¹⁷ Kasin, na wɔ ba aɲu i ɲu ɲgbɛɛn fa kɔ sa n bo wɔ yo i n su, na wɔ bu i tii nu, na wɔ se i ɲu ka, ‘M si npadifom kere di diire wɔ na i ka, ama, mini ba wɔ fen suwu ni ahɔɛ n a.

¹⁸ M kpie m nyi kɔ m si dɔ ɔ, na m kó se i ka, “M si, ma do Nyɛmɛ ni wɔɔ kere ɲgasi.

¹⁹ I ti má ye ni ka a fere m ka u wa kun, fa m yo u npadifom ni kun.” ’

²⁰ Dɔ na wɔ yasu na i kpie i nyi kɔ i si dɔ.

Sangɔ bo i toko wo dede suba ni, na i si n aɲu i, na wɔ si i aɲunfo agaya. Na wɔ ɲmati akpa i atin, na wɔ fa i saa abara aye i, na wɔ biti i.

²¹ Na baa n ase i si n ka, 'M si, ma do Nyeme ni wɔɔ kere ɲgasi. I ti má ye ni ka a fere m ka u wa kun.'

²² Ama, na i si n afere i akɔɔm, na wɔ se bu ka, 'Am kɔ ndende na am kɔ niɛ suturam kere nu bo i ti kpa, na am fa ba wura i, na am fa ɲгаа ba wura i saa maraka, na am fa gbagbaa ba wura i jaa.

²³ Na am nya kɔ niɛ naanim n nu, na am tara bo i la anyunuyi bra, na am ba kpiɛ i kɔm yo i dɔɲgu, na am ma ya di na ya nu.

²⁴ Dama m ahin wa ni, i wuuri wɔ, ye wɔ tenge a, i miniiri wɔ, ye ma ɲu i a.' Dɔ na ba bo i bu ni di ni nu.

²⁵ Nyini sangá n kere baakpiɛn n toko wo fiesu. I ba suba awuru, na sangá bo i ba dodoori awuru n na wɔ ti ka bu wo agɔɔɔ gɔ su ni jue.

²⁶ Dɔ na wɔ fere i si akɔɔm kun, na wɔ bisa i ka, 'Nzu sa yoori awuru a?'

²⁷ Na akɔɔ n abɔ i nu ka, 'U niɛma ye wɔ ba awuru a, ye u si ama nɔɔ ye ya kpiɛ naani bo i la anyunuyi n kɔm, dama u niɛma n aba awuru ni laifiɛ n ti.'

²⁸ Na yaa ati baakpiɛn ni agaya, haari na wɔ kete ka i wura má awuru n nu. Nyini ti, na i si n afite aba asere i jande ka i wura.

²⁹ Ama, na wɔ se i si n ka, 'Ti fen, afɔ nye nye lɛɛ bo m wo u dɔ yo juma ma u, ka m ti akɔɔ ɔ, ma kete má u nɔaniɛ be. A koro ama má m puitiripui, haari sirimbaa mmɔɔ ka m gusu fa na m ni m danfom fa di na ya nu.

³⁰ Ama, u ahin wa n yiri, wɔ fa u aja bo a fa ama i n akɔ boro, na wɔ kɔ ayo i koroowa ni nbarasakaram. Haari ni nyini n kere ni, i kpieeri i nyi ba juuri awuru ni, a ma nɔɔ ka bu kpiɛ naani bo i la anyunuyi n kɔm ma i.'

³¹ Na i si n ase i ka, 'M wa, sangá kere mini ni wɔɔ wo bere a, deke kere bo i ti m dɛɛ ti u dɛɛ wɔ.

³² Ama, wɔ yo daka ka ya di na ya nu na ya gɔ agɔɔɔ, dama u niɛma ni, i wuuri wɔ, ye wɔ tenge a, i miniiri wɔ, ye ma ɲu i a.' "

16

Miɛnu fa kɔ amuisufɔ kpiɛn n bo wɔ la má dabuɲu ni

¹ Na Yesu ase i susufɔm n ka, "Biɛ nengefɔ be woori bere a, i la i amuisufɔ kpiɛn bo yiri niɛ i nenge n kere su a. Na minem aba nengefɔ n dɔ aba se i ka i amuisufɔ kpiɛn ni susaaki i nengem ni.

² Nyini ti, na wɔ fere i, na wɔ se i ka, 'M suti jɔɔɔ nbem fa kɔ u dɔ. Nyini ti, ba bu akunta kere m na m si kabo a bita m nengem barasu, dama a koro niɛ má bu dika kun.'

³ Na amuisufɔ kpiɛn n ase i tii nu ka, 'Ye kisa na m mibiɛ ni sufɔn m fite m juma n nu ni, m yó se wɔ? M la má fanɲa bo m koro dɔ, m gusu nyunu asin ni bo m nati susere.

⁴ Ἐξηχῆεν, kisa m si kabo m yo, na haari nzen m ba fuunri m juma ni, m fún má m danfom bo m kó wo bu dɔ.'

⁵ Nyini ti, na wɔ fere minem kere bo bu bita i mibiɛ n kaari n kun kun. Na wɔ bisa ciciri su dɛɛ sɔnɔ n ka, 'A bita m mibiɛ n kaari nye wɔ?'

⁶ Na wɔ bɔ i nu ka, 'M bita i ɲguin nzue sɔ ganɲa yaa kun wɔ.' Na amuisufɔ kpiɛn n ase i ka, 'De u kaari kadasi ni, na a tana, na a kere ka a bita ganɲa aburunu wɔ.'

⁷ Na wɔ nya abisa nyinɲa gusu ka, 'Ye wɔɔ di, a bita kaari nye wɔ?' Na wɔ bɔ i nu ka, 'M bita i alembaa pirim bɔtɔ yaa kun wɔ.' Na amuisufɔ kpiɛn n ase i gusu ka, 'De u kaari kadasi na a kere ka a bita pirim bɔtɔ aburamɔɔɔ wɔ.'

⁸ I mibiɛ ɲuuri sɔ ni, na wɔ kansu i fa kɔ nyini ɲɔnle bo i la i n su, haari ni bo i la má dabuɲu ni. Kabo i ti lɛɛ, durunya n nufɔm la ɲɔnle fa kɔ

durunya n nu dɛɛ sayoowam n su tara minɛm bo Nyɛmɛ ma bu wo wein n nu ni.”

⁹ Na Yesu ase bu bekun ka, “M suse am wɔ lɛɛ, ka, am fa durunya n nu dɛɛ fin ajɛkɛ bo am la i n fa tara danfoya, adena ajɛkɛ n ba n̄mati yakiiri am, na minɛm bá de am wura woobiri kpa bo i la má awieeri n nu.

¹⁰ Sɔnɔ kɛrɛ bo minɛm koro daafi i n̄u ka i bita deke kaan ni nahɔrɛ atin, yiri ye bu koro daafi i n̄u ka i bita deke bambaka mmɔɔ ni nahɔrɛ atin a. Ama, sɔnɔ kɛrɛ bo bu koro daafi má i n̄u ka i bita deke kaan ni nahɔrɛ atin, bu koro daafi má i mi n̄u ka i bita deke bambaka mmɔɔ.

¹¹ Tɔ, nzen ambɛrɛ la má dabuŋu bo am koro bita durunya n nu dɛɛ fin ajɛkɛm ni nahɔrɛ atin, n̄ma fá Nyɛmɛ dɛɛ ajɛkɛm wura am saa nu?

¹² Na nzen am la má dabuŋu bo am koro bita be dɛɛ ajɛkɛm ni nahɔrɛ atin, n̄ma fá deke bo i bá yo am tien̄gu dɛɛ ma am a?

¹³ Sɔnɔ kun koro san̄ga su má mibiɛm nnyɔ. Nzen i n̄a i yó sɔ, i kpó kun n wɔ, na i kóro nyinga ni, wara, i bóro i nyi su kun wɔ, na i bú nyinga ni n̄gbɛɛn. Am koro san̄ga su má Nyɛmɛ ni ajɛkɛ.”

Kabo Yesu tuuri Farasifɔm fɔ barasu ni

¹⁴ San̄ga bo Farasifɔm n tiiri ahin n kɛrɛ n sɔ ni, na ba siri i, dama bu ti n̄waa korofɔm wɔ.

¹⁵ Na Yesu ase bu ka, “Ambɛrɛ n̄a am ti minɛm bo bu yo sa bo i kɔ atin su Nyɛmɛ dɔ na minɛm n̄u am n a, ama, Nyɛmɛ yiri si am ahore su kɛrɛ. Dama deke bo adamande sunsun ka i n̄usu nya má ni, nyini ye Nyɛmɛ kpɔ i a.

¹⁶ Nyɛmɛ Jɔrɛ Kadasi n bo Moyisi ni Nyɛmɛ nɔaniɛ kanfɔm kɛrɛeri i n wo bɛrɛ ka, ye Yohane nya baari a, nyini n sin, na ba kan labari kpa n akere minɛm fa kɔ Nyɛmɛ fɛmɛya n su, na sɔnɔ kɛrɛ suboro i nyi ka i kpini atin na i wura nu.

¹⁷ I ti má kekereke na an̄goro ni asiɛngu kɛrɛ bá mini, ama, Nyɛmɛ dɛɛ nɔaniɛ kpamaawa n kampiti sɔ mmɔɔ ká má n̄gbɛɛn.

¹⁸ Sɔnɔ kɛrɛ bo i faari i yi jiiri na i jaari bara fɔfɔrɛ, i mi n asaaki ajaa ciire lɛɛ. Na sɔnɔ kɛrɛ bo i jaari bara bo wɔ fite i hun ajaa bu, i mi n asaaki ajaa ciire lɛɛ.”

Miɛnu fa kɔ nen̄gefɔ be ni Lazarosi jɔrɛ

¹⁹ Na Yesu ase bu ka, “Nen̄gefɔ be yo woori bɛrɛ a, san̄ga kɛrɛ san̄ga, i wura sutura kpa kpa bo i la gɔ ɔ, na i sudi i koroowa cɛɛn n kɛrɛ cɛɛn.

²⁰ Na yaarifɔ be gusu wo bɛrɛ, bu fere i ka Lazarosi, kambue abara aye i deke kɛrɛ. Na bu sufa i ba tana nen̄gefɔ n anɔ nu,

²¹ adena nen̄gefɔ n ba sudi diire, na nzen be toto asiɛngu, na i gusu fa di. Haari na caam ba sutafi i kambue n nu.

²² Na sɔnɔ yaarifɔ n aba awu, na Nyɛmɛ merɛkɛm aba afa i akɔ an̄goro Abraham bi. Na nen̄gefɔ n gusu aba awu na ba se i,

²³ na yiri akɔ Yiweefɔm Woobiri. I wo wahara di su dɔ sɔ ni, na wɔ ye i tii su an̄u Abraham dede dɔ, Lazarosi wo i bi.

²⁴ Dɔ na wɔ bo afere Abraham ase i ka, ‘Ya si Abraham, si m an̄unfɔ. Na a sunma Lazarosi na i fa i saa maraka dɔ nzue nu na i fa ba dɔ m taferema, dama m wo wahara bambaka nu wɔ, sin nu fɛn.’

²⁵ Ama, na Abraham ase i ka, ‘Ten̄ge su ka san̄ga bo a la n̄gɔɔ wo durunya n nu ni, a yoori u koroowa a, na Lazarosi yiri adi durunya n nu wahara n kɛrɛ. Ama, kisa yiri wo fie di su, ye wɔrɔ wo wahara di su n a.

²⁶ Bekun, kunma ngongo wo u ni yere afien, bo be koro fite má fen na i kó u bi. Be gusu koro fite má u bi dọ na i ba ya dọ fen.'

²⁷ Na nengefọ n ase ka, 'Ya si Abraham, m sere u wọ, ka a sunma Lazarosi na i kó m si awuru n nu,

²⁸ m ninbaam nnu wo dọ, na i kó bọbọ bu ka bu si bu ọu sa na má bu bá wo ahin wahara bambaka woobiri n bo m wo ni.'

²⁹ Na Abraham ase i ka, 'Nyeme Jore Kadasi n bo Moyisi ni Nyeme nọanie kanfọm kere maari bu ni, i wo bu dọ. Wọ yo daka ka bu so bu sui na bu ti i bu, na bu si bu ọu sa.'

³⁰ Na nengefọ n ase i ka, 'Ya si Abraham, bu dé má i. Ama, nzen sọno fiteeri minem bo ba wu n dọ kọri bu dọ, bu káaki bu wo.'

³¹ Ama, na Abraham ase i ka, 'Nzen ba so má bu sui na bu ti Nyeme Jore Kadasi n bo Moyisi ni Nyeme nọanie kanfọm kere maari bu ni, haari nzen sọno tengeeri i yiwee n nu mmọọ baari, bu dé má i.' "

17

Kabo Yesu kereeri minem fa kọ nyemesu barasu ni

¹ Na Yesu ase i susufọm n ka, "Sam nbem bo bu yo na bu fa mine wura satie nu ni, nyini sam ni bá yo sanja kere, ama, anyumboro wo sọno kere bo i ma nyini sam yoori n dọ.

² Nzen má bu faari ngani san yabue ciciiri i mi kọm na bu fa i kọ tuuri tieku nu mmọọ, má i ti ye tara bo i mi ma ahin yaradayofọm n be wura satie nu.

³ Nyini ti, am si am ọu sa. Nzen wọro kere bo u niwa yoori u satie be, jaraki i, na nzen i kaakiiri i wo, na a fa i satie n ce i.

⁴ Nzen i yoori u satie kọ jinaari haari kpe nso mmọọ wie kun nu, na i baari u dọ ba seeri u ka, 'Ma yo u satie,' fa i satie n ce i."

⁵ Na Yesu jaramasam n ase i ka, "Buka ya na ya yarada yo biiwa."

⁶ Na Mibie n ase bu ka, "Nzen má am la yarada bo i kọ ju kabo nyem mbaa ti ni mmọọ, má am koro se ahin koto baka n ka, 'Kpekiti ni u bunlui n kere na a kọ jina tieku n nu,' má i de am nọanie n wọ.

⁷ Ma m fa i ka, am nu, nzen be la akọo na i wo fiesu wara i sasa nbọem wọ, na i ba baari awuru, am nu ọma ye i kaba se akọo n ka, 'Ba tana na a di diire' a?

⁸ Am be se má i sọ da. Ama, kabo a se i n la ka, 'Yo m diire siriya, na a jina ọminda na m di na m nu ka, na a nya kọ yo u dee di.'

⁹ Nzen u akọo n deeri u nọanie na i yoori juma bo a se i ka i yo i ni, a se má i ka, 'M da u asi.'

¹⁰ I ti sọ o lee, ambere gusu dọ, sanja bo am ayo juma n kere bo am mibie n ase ka am yo i ni, am se ka, 'Yere ti akọom wọ, ya ti má ye ni ka bu kansia ya, dama ya juma lee, ye ya yo i n a.' "

Kabo Yesu tuntuunri kokofọ buru nbem na bu nyaari laifie ni

¹¹ Sanja bo Yesu sukọ Yerusalem mie kpiri n nu ni, na wọ sin Samariya ni Galili awọrem n afien.

¹² I kọ ọa i wura mie kaan be nu, na i ni kokofọ buru nbem aye. Na ba jina dede

¹³ atien kpa ka, "Ya Mọfo Yesu, si ya aņunfọ."

¹⁴ I ọuuri bu sọ n na wọ se bu ka, "Am kọ na am kọ fa am ọu kere Nyeme sayoowa dọnguyofọm ni, na bu fiti am na bu nie." Na ba de atin sukọ, bu wo kọ su n na bu kere aņu ka ba nya laifie.

15 Dɔ na bu nu kun ɲuuri ka wɔ nya laifiɛ sɔ ni, na wɔ kpɛ i nyi aba Yesu dɔ sutien kpa sukansi Nyemɛ.

16 Na wɔ ba akutu haari Yesu jaa bu asiɛngu, na wɔ da i asi. Nyini sɔnɔ n ti Samariyafo ɔ.

17 Dɔ na Yesu abisa ka, “Má mine buru nyaari laifiɛ a, ye ɲɔna nyingam n wo ni?”

18 Nzu ti ye ahin sɔnɔ n bo i ti má Yudafo ni ɲgumi aba ka i ba da Nyemɛ asi a?”

19 Dɔ na wɔ se sɔnɔ n ka, “Yarada n bo a yo m ni, yiri ma a nya laifiɛ a. Yasu na a kɔ awuru.”

Kabo Nyemɛ Fɛmɛ bá niɛ i minɛm su barasu ni

20 Na Farasifo nbem abisa Yesu ka, “Ye saɲga bɔnɔ ye Nyemɛ Fɛmɛ bá niɛ i minɛm su a?” Na wɔ bɔ bu nu ka, “Sa be wo má bɛɛ bo i koro kere am saɲga bo Nyemɛ Fɛmɛ bá niɛ i minɛm su.

21 Be se má ka, ‘Am niɛ, yiri yaa fɛn,’ wara, ‘Yiri lɛɛ dɔ.’ Dama m se am nahɔɛ wɔ lɛɛ ka, Nyemɛ wo am nu fɛn jina n nu, suniɛ i minɛm su.”

22 Na wɔ se i susufɔm ni ka, “Saɲga suba bo am bá koro ka am ɲu mini Adamande Wa n ba saɲga ni, haari cɛɛn kun mmɔɔ, ama, am ɲú má i.

23 Nbem bá ba na bu sé am ka, ‘Am niɛ, yiri lɛɛ dɔ,’ wara, ‘Yiri yaa fɛn.’ Ama, má am fite kɔ su bu su.

24 Dama mini Adamande Wa n ba cɛɛn ni, i tí kabo nzue kpɛse na i ta papasi bara ye deke kɛɛ n wɔ.

25 Ama, kana ahin kɛɛ bá yo, wɔ yo daka ka m du mɔ di wahara beberebe, na ambɛɛ nyumafɔm bá kete m.

26 Mini Adamande Wa n ba saɲga ni yó kabo ya na Nowa saɲga na i yoori n wɔ.

27 Nyini saɲga ni, sɔnɔ kɛɛ woori di ni nu su wɔ, na nbaram ni nbiesom suja bu bengum, fa kɔ juuri haari cɛɛn n bo Nowa wuraari lee bambaka n nu, na wombu n ba diiri deke kɛɛ n wɔ.

28 I yo sɔ ɔ lɛɛ bekun, ka Loti dɛɛ saɲga ni. Nyini saɲga ni, sɔnɔ kɛɛ woori di ni nu su wɔ, na nbem sutɔ, na nbem suto, na nbem sudɔ dɔdɔɔri, na nbem suta fa.

29 Cɛɛn n bo Loti fa yasuuri Sodom miɛ kpɛri n nu ni, nyini cɛɛn n ye sin ni ferewita sin fiteeri aɲgoro a, na wɔ ba atɔ miɛ n nu adi deke n kɛɛ.

30 Kabo cɛɛn n bo mini Adamande Wa ni bá yi m ɲu kere lɛɛ.”

31 Na Yesu akaaki ase ka, “Nyini cɛɛn ni, wɔɔ kɛɛ bo a wo kpata nu, na u neɲge wo awuru n nu, má a wura gisan nu fa pui. I ti sɔ ɔ lɛɛ, wɔɔ kɛɛ gusu bo a wo fiesu, má a kpɛ u nyi kɔ awuru.

32 Am teɲge su fa kɔ sa bo i yoori Loti yi ni.

33 Dama sɔnɔ kɛɛ bo i ɲa i kpíni i ɲgɔɔ busu, i mi bá fun i, ama, na sɔnɔ kɛɛ bo i tɔɔri i ɲgɔɔ maari m, i mi nyá ɲgɔɔ.

34 M suse am wɔ lɛɛ, ka, nyini cɛɛn n kɔɲgue, mine nnyɔ ɔ dá dasu kun su wo daafiri su a, na Nyemɛ má bu bá fa kun n kɔ yaki kun ni.

35 Na nbaram nnyɔ kási wo ɲgani san su, na Nyemɛ má bu bá fa kun n kɔ yaki kun ni. [

36 Na biesom nnyɔ bá wo juma yo su fiesu, na Nyemɛ má bu bá fa kun yaki kun ni.]”

37 I susufɔm tiiri sɔ ni, na ba bisa i ka, “Ya Mibiɛ, nifansu ye ahin sam kɛɛ bá yo a?” Na wɔ bɔ bu nu ka, “Deke kɛɛ bo deke fuin nya wo, pɛɛm bara ye dɔ ɔ.”

18

Miɛnu fa kɔ bara kunafo n ni jɔredifo be jɔre

¹ Dɔ na Yesu abo miɛnu akere i susufɔm n ka wɔ yo daka ka bu sere Nyeme sanɔa kere, na mǎ bu yaki i sere.

² I ɔa, “Jɔredifo be woori miɛ be su a, i soro mǎ Nyeme, na i kaaki bu mǎ be.”

³ Na bara kunafo be awo nyini miɛ n su, sanɔa kere i ba jɔredifo n dɔ ɔ, na i ba sere i ka, ‘Jɔre bo mini ni m kpɔfo n bita i ni, buka m na m nya nahɔre.’

⁴ Na wɔ ce bo jɔredifo n bo mǎ i n nu. Ama, na kasin, na wɔ ba asunsun i tii nu, na wɔ se ka, ‘Haari ni bo m soro mǎ Nyeme na m bu mǎ be ni,

⁵ ama, kabo sanɔa kere na ahin kunafo n bita kpiɛ m daafiri n deɛ ti, m mǎ i nya nahɔre wɔ. Nzen ma yo mǎ sɔ, i suba m dɔ sɔ ɔ, haari i bá ma m wara yi m ɔu.’ ”

⁶ Na Yesu akaaki ase bu ka, “Ye m ɔa am ati kabo nyini jɔredifo findifo n seeri ni.

⁷ Ye nzu ti ye Nyeme búka mǎ i deɛ minem bo bu sun fere i kɔngue ni wiesu kere a, na bu nyá nahɔre a? I cé mǎ ni bu buka.

⁸ M suse am wɔ leɛ, ka, i búka bu wɔ na bu nya nahɔre ndende. Ama, haari ni nyini mmɔɔ, sanɔa bo mini Adamande Wa n ba baari, m bá ɔu minem bo bu toko yo m yarada, nzen se a? Ai, m ɔú mǎ be.”

Miɛnu fa kɔ Farasifo n ni lampodefɔ n jɔre

⁹ Na Yesu akaaki abo ahin miɛnu n akere minem bo bu sunsun ka bere yo sa bo i kɔ atin su Nyeme dɔ na bu bu mǎ be ni.

¹⁰ I ɔa, “Cɛɛn n be sɔ ɔ, na mine nnyɔ nbem akɔ ka bu kɔ sere Nyeme, Nyeme Sereebiri Awuru n nu. Kun n ti Farasifo ɔ, na nyinga n ti lampodefɔ.

¹¹ Na Farasifo n ajina i ɔgumi abo i hoe asere Nyeme ka, ‘Micera Nyeme, m da u asi ka m ti mǎ kabo mine nyingam ti barasu ni. M ti mǎ anyiifo, m ti mǎ findifo, m saaki mǎ ajaa ciire, haari m ti mǎ ka nyini lampodefɔ n bo i jina dɔ ni.

¹² Leso kun kun kere nu, m cici m nɔɔ kpe nnyɔ nnyɔ ɔ, na deke buru kere bo m la i, m yi i kun kun ma u wɔ.’

¹³ Ama, na lampodefɔ n ajina dede, haari wɔ koro mǎ ka i ye i tii su nie aɔgoro mmɔɔ, na wɔ fa i saa ataka i beɔgu nu, na wɔ se ka, ‘Micera Nyeme, m ti satieyofɔ ɔ, si m aɔunfo.’ ”

¹⁴ Na Yesu ase ka, “M suse am wɔ leɛ, ka, nyini mine nnyɔm ni sereeri Nyeme wieeri, na bu kɔ juuri awuru ni, Nyeme deerɔ lampodefɔ ni ka i ti sɔnɔ bo i yo sa bo i kɔ atin su i dɔ a, mǎ Farasifo ni. Dama sɔnɔ kere bo i wura i ɔu kpɔri, Nyeme yó i kaan wɔ, ama, na sɔnɔ bo i yo i ɔu kaan, Nyeme wúra i mi kpɔri wɔ.”

Kabo Yesu yoori nbaatumam kisi ni

¹⁵ Cɛɛn be na mine nbem sufa bu nbaam ba Yesu dɔ ka i fa i saa nana bu ɔu na i yo bu kisi. I susufɔm n ɔuuri i sɔ ni, na ba tien minem n ɔu.

¹⁶ Ama, na Yesu afere nbaatumam ni, na wɔ se ka, “Am ma nbaatumam n bra m dɔ, mǎ am fɔn bu. Dama bere ɔusu sɔ ye Nyeme femeya n ti bu deɛ a.

¹⁷ Nahɔre ye m suse am n a, wɔrɔ kere bo a de mǎ Nyeme femeya n nu jɔre kabo baatuma de deke i saa nnyɔ ni, a wúra mǎ Nyeme femeya n nu fieo.”

Neɔgefɔ n ni nyemesu jɔre

18 Na Yudafɔ nkpienkpienm be abisa Yesu ka, “Ya Kerefɔ sɔnɔ kpa, m yó sɛ ye m bá nya ɲgɔɔ n bo i la má awieeri n a?”

19 Na wɔ bo i nu ka, “Nzu ti ye a fere m ka sɔnɔ kpa a? Be ti má kpa sin Nyeme ɲu.

20 Ye m ɲa a si Nyeme nɔanie maawam ni e, bu ɲa, ‘Má a saaki ajaa ciire. Má a kun sɔnɔ. Má a wɔ. Má a di kɔre daani. Bu u si ni u ni.’ ”

21 Na sɔnɔ n ase i ka, “Ma su nyini nɔanie maawam n kere su haari m kaan nu.”

22 Yesu tiiri sɔ n na wɔ se i ka, “Deke kun be ye wɔ kpie u su a. Kɔ na a kɔ tɔ u aja n kere, na a fa ɲwaa n ma yaarifɔm, na a bá nya ajekɛ Nyeme dɔ, na a bra ba su m su.”

23 Ama, sɔnɔ n tiiri sɔ n na i ahore asaaki, dama i la nenge agaya n deɛ ti.

24 Na Yesu anie sɔnɔ n nyunu, na wɔ se i ka, “I ti kekereke bo nengefɔ wura Nyeme femɛya n nu.

25 Kabo nyɔɔma sin misini bue nu ni, i ti má kekereke tara má kabɔ nengefɔ yo na i wura Nyeme femɛya n nu.”

26 Minem ni tiiri sɔ ni, na ba bisa ka, “Ye nzen i ti sɔ e, ɲma koro fite nu a?”

27 Na wɔ bo nu ka, “Deke bo adamande koro yo má i, Nyeme koro yo i.”

28 Na Petoro ase i ka, “Tɔ, ye yere ayaki ya dekem kere susu u su e.”

29 Na wɔ se bu ka, “Nahɔre ye m suse am n a, sɔnɔ kere bo i yakiiri i awuru, wara i yi, wara i ninbaam, wara i wufɔm, wara i nbaam, Nyeme femɛya n deɛ ti,

30 i mi nyá nyinim ɲusu sɔ yaa i ɲgɔɔ su, na fa kɔ fa ba, i nyá ɲgɔɔ n bo i la má awieeri ni.”

Kabo Yesu jɔjɔ fa kɔɔri i yiwee n su kpe nsan su ni

31 Na Yesu afere i susufɔ buru ni nnyɔm n akɔ aheme, na wɔ se bu ka, “Am ti fen. Ya sukɔ Yerusalem lee, dɔ ye bu kó yo mini Adamande Wa n kabɔ Nyeme nɔanie kanfɔm akere ka bu yó m n a.

32 Na bu fá m wura minem bo bu ti má Yudafɔm saa nu, na bu yó m anzasi, na bu kpíe m nzukɔ, na bu yí nanzue gɔ m ɲu,

33 na bu fín m ɲgbere, na bu nyá kun m, na i lesan cɛen, na m ténge m yiwee n nu.”

34 Ama, i susufɔm n ati má i jɔjɔɔwa n be bu. Nyeme ayi má i nyi akere má bu, nyini ti, ba koro ati má i bu.

Kabo Yesu tuntuunri anyinsin be na i ɲuuri asi ni

35 Saɲga bo Yesu kɔ sudodo miɛ kpiri be bo bu fere i ka Yeriko ni, na anyinsin be tana atin n nɔɔ su wo sere su.

36 I tiiri ka jama n wo sin su ni, na wɔ bisa ka, “Nzu suyo a?”

37 Na ba se i ka, “Yesu Nazaretifɔ ni susin a.”

38 Dɔ na wɔ tien afere i, i ɲa, “Yesu, Feme Davidi anuma, si m aɲunfɔ.”

39 Na minem n atien i ɲu ka i yaki naɲmie. Ama, haari ni nyini mmɔɔ, na wɔ kaaki atien kpa abuka su ka, “Feme Davidi anuma, si m aɲunfɔ.”

40 Yesu tiiri sɔ n na wɔ ka ajina, na wɔ se ka bu fa i bra i dɔ. Na ba fere i ama i. I ba dodoori ni, na Yesu abisa i ka,

41 “A koro ka m yo nzu ma u a?” Na wɔ bo i nu ka, “M Mibiɛ, m koro ka a ma m ɲu asi wɔ.”

42 Na Yesu ase i ka, “Nju asi bekun. Yarada n bo a yo m ni, nyini ma a nya laifɛ a.”

⁴³ Kpennga na wɔ kaba aɲu asi, na wɔ su i su, sukansi Nyeme. Jama n ɲuuri i sɔ n na bu kere gusu akansi Nyeme.

19

Yesu ni Zakayosi dɛɛ jɔrɛ

¹ Yesu kɔ wuraari Yeriko miɛ kpiri n nu na wɔ koro ka i sin.

² Biɛ be woori dɔ, bu fere i ka Zakayosi, i ti lampodefɔm kere kpɛn wɔ, na i la ajɛke agaya.

³ Na wɔ boro i nyi ka i ɲu Yesu na i si i. Ama, jama asunnu agaya n dɛɛ ti, wɔ koro aɲu má i, dama i ti sɔnɔ tika a.

⁴ Nyini ti, na wɔ ɲmati adu jama n mɔ akɔ afun baka na i ɲu i, dama wɔ ɲu ka Yesu fá nyini baka n bu sin a.

⁵ Saɲga bo Yesu ba juuri nyini awɔrɛ n nu n na wɔ nie aɲgoro, na wɔ se i ka, “Zakayosi, jura bra ndende, dama wɔ yo daka ka m yo u wɔfɔ ɔ nyuma.”

⁶ Na wɔ jura ndende, na wɔ kɔ ade i wɔfɔ ni ahorejɔ bambaka.

⁷ Na bo bu ɲuuri i n kere aɲuɲuti. Bu ɲa, “Ahin sɔnɔ n akɔ na i kɔ da satieyofɔ dika.”

⁸ Na Zakayosi ayasu ajina, na wɔ se Mibiɛ n ka, “M Mibiɛ, ti fɛn. M kpáaki m ajɛke kere nu busu nnyɔ, na m fá buekun n ma jaarifɔm. Na nzen ma sisi be, m tó i sɔ ɲusu nna, na m fá ma i mi.”

⁹ Na Yesu ase i ka, “Nyuma dɛɛ cɛɛn n nu, Nyeme ade ahin awuru n nufɔm tii aji, dama ahin sɔnɔ ni mmɔɔ ti Abraham busu nufɔɔ.

¹⁰ Nahɔrɛ, mini Adamande Wa n baari ka m bá nienie minem bo ba mini n wɔ na m dé bu tii ji.”

Miɛnu fa kɔ akɔɔ buru nbem dabuɲu n jɔrɛ

¹¹ Saɲga bo minem ni toko so bu sui ti ahin jɔrɛm bo Yesu sujɔɔ bu ni, na Yesu akaaki abo bu miɛnu be, dama nyini saɲga ni wɔ ka kaan sɔ na i wúra Yerusalem miɛ kpiri n nu, na minem asunsun ka saɲga n akaba aju bo Nyeme bá nie i minem su lɛɛ.

¹² Nyini ti, na wɔ se bu ka, “Feme baa be yo woori bere a, cɛɛn be sɔ ɔ, na wɔ yasu ka i kɔ asien dede be su ka i kɔ di femɛya na i kpie i nyi ba.

¹³ Kana i ba kɔ ni, na wɔ fere i akɔɔm buru, na wɔ fa ɲwaa akpaaki bu kere nu, na wɔ se bu ka, ‘M kɔ wieeri, amberɛ si kabo am yo ahin ɲwaa n a, haari m bá kpie m nyi ba.’

¹⁴ Nyini sɔnɔ n gusu, i minem akoro má ka i yo bu femɛ, bu kpɔ i wɔ, nyini ti, na ba sunma minem ka bu kɔ se ka, ‘Ya koro má ka ahin sɔnɔ n bá yo ya femɛ.’

¹⁵ Na sɔnɔ n akɔ adi femɛya ni, na wɔ kpie i nyi aba. I ba juuri kpennga i kaba tieɛnri i akɔɔm ni nɔɔ ɔ, adena i si kperɛ bo ba nya i fite i ɲwaa bo i fa maari bu n nu.

¹⁶ Na akɔɔ n bo i du mɔ baari n ase i ka, ‘M mibiɛ, u ɲwaa n bo a fa maari m ni, ma nya i ɲusu buru abuka su.’

¹⁷ Na i mibiɛ n ase i ka, ‘Nfan. Wɔrɔ akɔɔ kpa, kabo a kere ka a la dabuɲu nie deke kaan su ni, m má a nie miem buru su.’

¹⁸ Na akɔɔ n bo i tɔ su nnyɔ su n aba, na wɔ se ka, ‘M mibiɛ, u ɲwaa n bo a fa maari m ni, ma nya i ɲusu nnu abuka su.’

¹⁹ Na wɔ se nyini n gusu ka, ‘M má a nie miem nnu su.’

²⁰ Na akɔɔm n kun be aba ase ka, ‘M mibiɛ, u ɲwaa n bo a fa maari m yaa, m fa pɔɔndiiri sanvuin nu fa seeri wɔ.

21 M soroori sere wɔ, dama a ti u sɔnɔ fangafɔ ɔ. A de deke bo i ti má u dɛɛ, na a kaaki kpiɛ deke bo a dɔ má i.'

22 Na wɔ se akɔɔ n ka, 'Wɔrɔ akɔɔ tiefɔ ni, u nɔaniɛ n bo a jɔjɔ i n ye m fá yo u nɔbɛɛn a. A ɲa a si tenle ka m ti m sɔnɔ fangafɔ ɔ, na m de deke bo i ti má m dɛɛ, na m kaaki kpiɛ deke bo ma dɔ má i, má sɔ?'

23 Tɔ, ye nzu ti ye a fa má m ɲwaa n akɔ ase má banɲifɔm dɔ a? Na má m ba kpieeri m nyi baari, má m nya kperɛ buka su.'

24 Dɔ na wɔ se bo bu jina dɔ n kere ka, 'Am de ɲwaa n fite i dɔ, na am fa ma akɔɔ n bo wɔ nya m ɲwaa n ɲusu buru abuka su ni.'

25 Ama, na ba se i ka, 'Ya mibiɛ, ye yiri du mɔ la u ɲwaa n ɲusu buru e.'

26 Na wɔ se bu ka, 'M suse am wɔ lɛɛ, ka, sɔnɔ kere bo i la deke be, bu má i be buka su wɔ. Ama, sɔnɔ kere bo i la má pui, haari ni nyini kaan n bo i la i ni, bu cín de i dɔ ɔ.'

27 Ama, m ahin kpɔfɔm bere yiri, má ba koro má ka m yo bu fɛmɛ, am fa bu ba jina m nyunu fɛn na am kun bu kere.' "

Kabo Yesu wuraari Yerusalem ka fɛmɛ dɛɛ su ni

28 Yesu seeri sɔ wieeri ni, na wɔ du bu nyunu na bu kɔ Yerusalem mie kpiri n nu.

29 I ba dodoori miɛm bo bu fere bu ka Befage ni Betani, nyini miɛm ni dodo buka n bo bu fere i ka Oliva Buka n wɔ, dama oliva bakam gɔ su wɔ. Dɔ na wɔ sunma i susufɔm n nu nnyɔ,

30 na wɔ se bu ka, "Am kɔ mie kaan n bo i wo am nyunu dɔ ni, am kɔ ɲa am wura mie n nu, am ɲú ka kaakobaa be minda, be nya fun má i. Am nyaŋgi i bra fɛn.

31 Nzen be bisaari am ka nzu ti ye am sunyaŋgi i a, am se i ka Mibiɛ ni koro i a."

32 Na bere n bo i sunmaari bu n akɔ, akɔ aɲu kaakobaa n ka i minda kabo i seeri bu ni.

33 Saŋga bo bu sunyaŋgi i ni, na i fɔm n abisa bu ka, "Nzu ti ye am sunyaŋgi kaakobaa n a?"

34 Na ba bɔ bu nu ka, "Mibiɛ ni koro i a."

35 Na ba fa i aba Yesu dɔ, na minɛm n atɛrɛki bu suturam anana kaakobaa n ɲu, na ba buka Yesu na wɔ fun.

36 I fun tanaari su wieeri n na i wo kɔ su ni, na minɛm n afa bu suturam atɛrɛki ase atin n nu.

37 Saŋga bo i ba dodoori Yerusalem mie kpiri n nu, fa kɔ awɔrɛ n bo i atin kaba cɔɔndi Oliva Buka n su ni, na i susufɔm beberebe sukansi Nyeme ni ahorejɔ, na bu subo kuyigindi, dama ba ɲu alekutura sakpakpam bo wɔ yo i n dɛɛ ti.

38 Bu ɲa,

"Terefiɛ wo fɛmɛ n dɔ,

Yiri n bo i suba Micera n dɛɛ duma n nu ni.

Ahoreda wo aŋgoro,

na kansi wo Nyeme bo i wo aŋgoro n dɔ."

39 Dɔ na Farasifɔm nbem bo bu wo jama n nu n ase Yesu ka, "Ya Kerefɔ, tien u susufɔm n ɲu ka bu yaki naɲmie."

40 Na wɔ se bu ka, "M suse am wɔ lɛɛ, ka, nzen má bere yakiiri naɲmie, má am ɲu ka yabuɛm bo bu da bere n ayasu suyo naɲmie."

Kabo Yesu suunri Yerusalemfɔm n dɛɛ ti ni

41 Saŋga bo Yesu ba dodoori Yerusalem mie kpiri n na i ɲuuri i sɔ ni, na wɔ sun mie n dɛɛ ti,

⁴² na wɔ se ka, “Nzen má nyuma dɛɛ cɛɛn n nu am si sam bo bu fa ahoreda ba ni, má i ti má sɔ. Ama, kabo i ti ni, am koro ŋu má nyini sam ni.

⁴³ Saŋga ni suba bo am kpɔfɔm bá ta kanda bara ye am deke kɛɛ na am kóro fite má nu.

⁴⁴ Bu kún am ni am nbaam, na bu fúfu am ahin miɛ n kɛɛ pepere, haari yabuɛ kun n kpein mmɔɔ bá nana má i beŋgu su. Ahin n kɛɛ bá yo sɔ, dama am asi má saŋga n bo Nyɛmɛ baari ka i ba de am tii ji ni.”

Kabo Yesu fɔɔnri watafɔm fiteeri Nyɛmɛ Sereebiri Awuru n nu ni

⁴⁵ Dɔ na Yesu akɔ awura Nyɛmɛ Sereebiri Awuru n nu, na wɔ bo i bu sufɔn yi watafɔm,

⁴⁶ na wɔ se bu ka, “Ba kɛɛ i Nyɛmɛ Jɔɛ Kadasi n nu ka, Nyɛmɛ ŋa o, ‘M awuru ni, bu bá fere i ka awuru bo bu bá sere Nyɛmɛ nu.’ Ama, ambere afa i ayo awiefɔm fieebiri.”

⁴⁷ Cɛɛn n kɛɛ cɛɛn, Yesu kere minɛm wɔ Nyɛmɛ Sereebiri Awuru n nu. Na Nyɛmɛ sayoowa dɔŋguyofɔ nkpienkpiɛnm, ni Nyɛmɛ nɔaniɛ kerefɔm, ni Yudaɔm teretereɔm n akoro ka bu kun i,

⁴⁸ ama, ba koro anya má atin, dama minɛm n kɛɛ koroori ka bu so bu sui wɔ, na bu ti i kereewam ni.

20

Kabo bu bisaari Yesu deke bo i yiko n fite ni

¹ Cɛɛn be sɔ ɔ, Yesu wo Nyɛmɛ Sereebiri Awuru n nu sukere minɛm, na i sukan labari kpa n kere bu. I wo kere su n na Nyɛmɛ sayoowa dɔŋguyofɔ nkpienkpiɛnm, ni Nyɛmɛ nɔaniɛ kerefɔm, ni Yudaɔm nkpienkpiɛnm aba i dɔ

² aba ase i ka, “Ŋma dɛɛ yiko nu ye a yo nyini sam kɛɛ a? Kan na ya ti. Ŋma ma u nyini yiko ni, ye a yo nyini sam n a?”

³ Na wɔ bɔ bu nu ka, “Am ma m du mɔ bisa am bisaawa kun be ka. Kisa, ambere kan na m ti,

⁴ ŋma maari Yohane atin ye i ba biɛeri minɛm Nyɛmɛ nzue n a? Nyɛmɛ nzen adamande?”

⁵ Na ba bisa bu ŋuŋu nu kabo bu bɔ i nu barasu, bu ŋa, “Nzen ya seeri i ka Nyɛmɛ maari i atin a, i bisa ya ka, ye nzu ti ye ya da má Yohane ŋu a?”

⁶ Ama, nzen ya seeri i ka adamande dɔ, minɛm kɛɛ tú ya yabuɛ wɔ, dama bu kɛɛ soroori su ka Yohane yo tiiri Nyɛmɛ nɔaniɛ kanfɔ ɔ nahɔɛ su.”

⁷ Nyini ti, na ba bɔ i nu ka, “Ya si má sɔnɔ bo i maari i atin.”

⁸ Na yiri gusu ase bu ka, “Mini mmɔɔ sé má am sɔnɔ bo i dɛɛ yiko nu na m yo ahin sam n kɛɛ ni.”

Kabo Yesu boori miɛnu niiri Yudaɔm nkpienkpiɛnm ni

⁹ Dɔ na Yesu abo minɛm ahin miɛnu ni, i ŋa, “Sɔnɔ be yo woori bere a, na wɔ dɔ i baka suuwa barasu be fie. Na wɔ nya afa awura i npadifɔm saa nu, na wɔ kɔ atin akɔ aɛɛ.

¹⁰ Saŋga ba juuri bo i si ka baka suuwam n abi ni, na wɔ sunma i akɔɔm kun i npadifɔm n dɔ, ka i kɔ de i dɛɛ bo ba nya i n bra. Akɔɔ n kɔ juuri ni, na ba tara i abo i, na ba fɔn i akpie i nyi i saa ŋgbɛɛn.

¹¹ Na fie n fɔ n asunma i akɔɔ n kun bekun, na ba tara i abo i, na ba kpa i nyinyɛ, na ba ma wɔ kpie i nyi i saa ŋgbɛɛn.

¹² Kpe nsan su ni, na wɔ sunma akɔɔ nyiŋga, na ba tara i abo i, na ba ma i mandim, na ba fa i atu baka suuwam fie n ahɛmɛ.

¹³ Dɔ na fie n fɔ n ase ka, ‘Ye m yó sɛ wɔ lɛɛ kisa? M súnma m tienɔu wa koroowa n wɔ, beni, bu má yiri jirima.’

¹⁴ Ama, sanɔa bo npadifɔm n nɔuri ka baa ni suba ni, na ba se bu nɔnu nu ka, ‘I wa n bo i dí i aja n lɛɛ suba n a. Am bra na ya kun i, adena aja n kere ká ya dɛɛ.’

¹⁵ Dɔ na ba cin i atu baka suuwam fie n ahemɛ, na ba kun i.” Na Yesu anya abisa bu ka, “Am sunsun ka fie n fɔ ni yó bu sɛ wɔ?”

¹⁶ I bá kun nyini npadifɔm n kere wɔ, na i fá fie n wura mine fɔfɔrem saa nu.”

Sanɔa bo minem ni tiiri sɔ n na ba se ka, “Nyemɛ yo ya kisi ni nyini.”

¹⁷ Na Yesu acɛ anie bu dɔ na wɔ se bu ka, “Kabo ba kere i Nyemɛ Jɔre Kadasi n nu ni, am tiiri i bu sɛ wɔ? Bu nɔa, ‘Yabuɛ n bo bondo tafɔm n faari i tuuri ni,

yiri ye wɔ kaaki bondo n jaa yabuɛm kere tii a.’

¹⁸ Sɔnɔ kere bo i kpaasiiri nyini yabuɛ n su, i mi búbu nu wɔ mumuku, na sɔnɔ kere gusu bo nyini yabuɛ n tɔori i nɔu, i sán i mi samene wɔ.”

¹⁹ I seeri sɔ ni, na Nyemɛ nɔanie kerefɔm ni, ni Nyemɛ sayoowa dɔnguyofɔ nkpienkpienm n akaba akpini atin kabo bu yo na bu tara i, dama bu faari nu ka miɛenu n bo i boori i ni, i bo niiri bere wɔ, ama, bu soroori minem dɛɛ ti, na ba yaki i.

Kabo bu sɔori Yesu nɔɛɛ lampo tɔ busu ni

²⁰ Nyini ti, na Nyemɛ nɔanie kerefɔm ni, ni Nyemɛ sayoowa dɔnguyofɔ nkpienkpienm n akpini atin kabo bu yo na bu nya Yesu taraabiri. Na ba bo mine nbem ajaakpien ka bu yo bu nɔu ka bu ti mine kpam wɔ, na bu ba sɔ i nɔɛɛ na bu bisa i nɔanie nbem, adena bu koro fa i wura gomina yikofɔ n saa nu.

²¹ Na nyini minem n ase Yesu ka, “Ya Kerefɔ, ya si ka u nɔanie jɔjɔwa ni u kereewa kere ti nahɔre wɔ, na a tantambu má nu, ama, a kere minem wɔ nahɔre su kabo Nyemɛ atin ti barasu.

²² Tɔ, ya dɛɛ atin n su, atin wo nu ka ya tɔ lampo ma Romafɔm Feme Kpiri Siza, nzen atin wo má nu?”

²³ Ama, na wɔ fa nu ka bu koro ka bu kpie i mbenle wɔ, na wɔ se bu ka,

²⁴ “Am fa nɔwaa bra na m nie.” Bu fa baari ni, na wɔ bisa bu ka, “Am nie ahin nɔwaa ni. Nma dɛɛ tii ni i duma wo su a?” Na ba bɔ i nu ka, “Feme Siza dɛɛ a.”

²⁵ Na wɔ se bu ka, “Tɔ, deke bo i ti Feme Siza dɛɛ, am fa ma Feme Siza, na deke bo i ti Nyemɛ dɛɛ, am fa ma Nyemɛ.”

²⁶ Dɔ na ba nɔu ka bu koro nya má i taraabiri minem nyunu bere, ama, kabo i bɔori bu nu n dɛɛ ti, na ba mie, na ba tɔ amuna.

Kabo bu bisaari Yesu fa kɔori yiwee tenge jɔre su ni

²⁷ Na Yudaɔm asese barasu nbem bo bu fere bu ka Sadiusifɔm ni, aba Yesu dɔ. Bu dɛɛ kereewa la ka Nyemɛ tenge má minem bu yiwee nu n a. Na ba ba abisa i jɔre be, bu nɔa,

²⁸ “Ya Kerefɔ, Moyisi yo kereeri nɔanie be maari ya, ka nzen sɔnɔ wu yakiiri i yi na i ni bara n anya má baa, wɔ yo daka ka i niema n fa kunaɔn n na bu wu nbaam ma gɔrɔ n bo wɔ wu ni.

²⁹ Tɔ, sɔnɔ be yo laari nbaabiesɔm nso a, na baakpien n aja bara, na wɔ wu ayaki bara ni, ba nya má baa.

³⁰ Sɔ ye bo i tɔ i su nnyɔ su,

³¹ ni nsan su n yoori a, haari fa kɔ kpuraari nso su ni, bu be mmɔɔ anya má baa ye bu wuuri a.

³² Kasin na bara n gusu aba awu.

³³ Tɔ, kabo bu minɛ nso n kerɛ aja bara n na ba wu sɔ ni, cɛɛn n bo Nyɛmɛ bá tenge minɛm bu yiwee n nu ni, bara ni ká nma dɛɛ wɔ?"

³⁴ Na Yesu abɔ bu nu ka, "Nbaram ni nbiesɔm bo bu wo bɛrɛ kisa ni ja ajaa,

³⁵ ama, nbaram ni nbiesɔm bo Nyɛmɛ anɔ ka bɛrɛ ti ye ni ka bu bá tenge bu yiwee n nu fa kɔ fa ba ni, bɛrɛ ja má ajaa kun,

³⁶ dama bu wu má kun. Bu wo bɛrɛ ka Nyɛmɛ mɛrɛkɛm wɔ. Bu ti Nyɛmɛ nbaam wɔ, dama ka ba tenge bu yiwee n nu.

³⁷ Na fa kɔ kabo Nyɛmɛ bá tenge minɛm bu yiwee n nu ni, Moyisi mmɔɔ yo kereeri ka i ti sɔ ɔ. Wɔ kerɛ i Nyɛmɛ Jɔrɛ Kadasi n nu, fa kɔ sangɔ bo sin n jeeri buwe baka n su ni, ka, Mícɛra ni ti Abraham, ni Izaki, ni Jakɔbu dɛɛ Nyɛmɛ a."

³⁸ Na Yesu asa su ase bu ka, "Tɔ, kabo Mícɛra n ti nyini minɛm dɛɛ Nyɛmɛ ni, nyini kere ka bu toko la nɔɔ lɛɛ. Nyɛmɛ ti má bo ba wu n dɛɛ Nyɛmɛ, i ti bo bu la nɔɔ ni dɛɛ Nyɛmɛ a, dama sɔnɔ kerɛ nɔɔ fite yiri dɔ a."

³⁹ Dɔ na Nyɛmɛ nɔaniɛ kerefɔ nbem ayasu ase i ka, "Nfan. Ya Kerefɔ, u bɔ nu n ti kpa."

⁴⁰ Nyini sin, be abo má su ka i bisa i jɔrɛ bekun.

Kristo Tiidefɔ n bo i ti Fɛmɛ Davidi anuma n jɔrɛ

⁴¹ Na Yesu ajɔɔ minɛm dɔ fa kɔ Kristo Tiidefɔ n su, na wɔ bisa bu ka, "Ye nzu ti ye bu bita jɔɔ ka Kristo n ti Fɛmɛ Davidi anuma a?"

⁴² Dama kabo ba kerɛ i Kansi Jue kerɛɛwam n nu ni, Fɛmɛ Davidi ni i tii ase ka,

'Na Mícɛra n ase m Mibiɛ n ka,

"Ba tana m saa fɔmbɔrɔ su fɛn,

⁴³ haari m bá ma u kpɔfɔm kerɛ ba kutu u jaa bu." '

⁴⁴ Tɔ, Fɛmɛ Davidi mmɔɔ fereeri Kristo n ka i Mibiɛ wɔ, ye Kristo n yo se kaaki yo Fɛmɛ Davidi anuma a?"

Kabo Yesu n̄a minɛ si bu n̄u sa ni Nyɛmɛ nɔaniɛ kerefɔm ni

⁴⁵ Sangɔ bo minɛm n kerɛ jina wo i nɔaniɛ n ti su sɔ ni, na Yesu ase i susufɔm n ka,

⁴⁶ "Am si am n̄u sa ni Nyɛmɛ nɔaniɛ kerefɔm ni, deke bo bu koro i n la ka, bu wura sutura n̄gbingbirim wɔ, na bu nati sujɛngbe, na sɔnɔ kere suyo bu anse gɔɔsu. Nyini minɛm n anya awura bu tientienbunɔɔ sɔm n nu ni, wara ba nya afere bu tientienbunɔɔ bambaka diire diibirim ni, bu koro ka bu tana kpirikoro tanaabirim wɔ.

⁴⁷ Nyini minɛm n sɔ fin nkunafɔm nɛngem wɔ, na bu jina sere Nyɛmɛ cɛ, adena minɛm n̄u ka bu ti minɛ kpam wɔ. Jina cɛɛn, bɛrɛ bá nya suicin tara minɛm kerɛ."

21

Kabo kunafɔ be yiiri saraka ni

¹ Tɔ, na Yesu anie anɔ kabo nɛngɛfɔm suyi bu n̄waa wura alaka bo minɛm yi saraka wura nu ni.

² Kunafɔ yaarifɔ be gusu woori dɔ, na wɔ ba ayi n̄waa kaan be bo i koro to má pui awura saraka n nu, na Yesu anɔ i.

³ Dɔ na wɔ se ka, "Nahɔrɛ ye m suse am n a, nyini kunafɔ n ayi n̄waa atara minɛm kerɛ.

⁴ Dama nɛngɛfɔm la n̄waa beberebe n dɛɛ ti, ye ba yi be a. Ama, nyini kunafɔ n ni i yaari n kerɛ, i deke kerɛ bo i la i lɛɛ ye wɔ yi i n a."

Kabo Yesu seeri ka Nyeme Sereebiri Awuru ni bá bereki ni

⁵ Na Yesu susufo nbem ajojo fa ko Nyeme Sereebiri Awuru n su, kabo ba ta i ni yabue ngbingbirim ni aceerim bo bu fa ba ce Nyeme na i yo nyumi barasu ni. Bu wo jajo n su so ni, na Yesu ase ka,

⁶ “Nyini dekem bo am nu bu ni, sanja suba bo yabue kun n kpein n mmoo ba nana ma i benju su. Bu ba bereki i kere go o lee.”

Kabo Yesu kereeri fa ko durunya n awieeri su dee jore ni

⁷ Na Yesu susufom n abisa i ka, “Ya Kerefo, sanja bono ye ahin sam kere ba yo a? Ye nzu deke ba kere ya ka sanja n adodo bo ahin sam n kere ba yo a?”

⁸ Na wo se bu ka, “Am si am nu sa, na ma am ma be dadaka am. Dama mine dogu ba fa m duma ba, na bu se ka, ‘Yiri la mini a.’ Na bu kaaki se am ka, ‘Sanja n aju lee.’ Ama, ma am su bu su.

⁹ Sanja bo am ba ti aluwa nga fen, wara bu sukun lue do, ma am ma sere ti am. Dama wo yo daka ka nyini sam n kere ba yo sin ka, ama, i kere ma ka durunya n awieeri lee.”

¹⁰ Na wo kaaki ase bu ka, “Daanfie daanfie ba kun lue ni bu benjum, na nfemem kun lue ni bu benju nfemem.

¹¹ Na asien ba kpisi agaya, na ahoe to, na aloba to awore aworem nu, na ya ba nu anyumbaa ciire sa nbem ka bu sutie fite angoro n nu.

¹² Ama, kana ahin sam kere ba yo ni, bu tara am, na bu kere am wuwuruwa, na bu fa am wura yikofom saa nu, na bu di am jore bu tientienbunoo soom nu, na bu nyi am dansaraka, na bu fa am wura nfemem ni gominam saa nu, na bu fa am jina bu nyunu, mini dee ti.

¹³ Ahin ma am atin a, na am koro kan labari kpa n kere bu.

¹⁴ Ama, am du mo yo am sunsunni nu na ma am ma i mie am, kabo bu ko bisa am na am jajo barasu.

¹⁵ Dama mini ma am alecira noanie bo am jajo a, na am kprofom be mmoo koro la ma noanie be bo bu koro jajo bo am asi, wara bu fa ta am nyi.

¹⁶ Haari am wufom, ni am ninbaam, ni am lamosim, ni am danfom mmoo ba to am ma nfanfafom, na bu kun am nbem.

¹⁷ Mini dee ti, sono kere kpo am.

¹⁸ Ama, am tiimie kun n kpein mmoo ka ma ngbeen.

¹⁹ Nzen am mindi deeri nyini n kere, am nya ngoo.”

Kabo Yesu jajoeri ka Yerusalem mie ni ba saaki barasu ni

²⁰ Na Yesu akaaki ase i susufom n ka, “Sanja bo am ba nu ka sojam abara aye Yerusalem mie kpiri n ni, am si tenle su ka i ce ma, bu saaki mie n kere lee.

²¹ Nyini sanja ni, woro kere bo a tiiri i nga na a wo Yudiya asien n su, nmati ko bukam n su. Woro kere bo a wo mie n nu, nmati fite nu. Na woro kere gusu bo a wo mie n aheme, ma a kpie u nyi ko mie n nu kun.

²² Dama ahin suicin kekereke sanja ni yo yiiwa, kabo ba kere i Nyeme Jore Kadasi n nu n kere.

²³ Nyini sanja ni yo kekereke agaya ma nyinsefom, ni nbaram bo bu nbaam toko nu ni. Dama minem n bo bu wo ahin asien n su ni di yaari agaya, na Nyeme cin bu sui.

²⁴ Na bu kun nbem lue nu, na bu tara nyingam domue, na bu fa bu ko asien asienm n kere su, na minem bo bu ti ma Yudafom ni saaki mie n kere haari fa ko ju sanja bo bu yiko ba wie.”

Kabo Adamande Wa ni ba kaaki ba barasu ni

²⁵ Na Yesu ase bu ka, “Na alekutura sam nyá ba tie fite wie n ni sara n, ni asarambaam kere nu. Na durunya n nu fen, asien asienm n sufom kere ahore tánda, na sere tí bu, fa kó kabo tieku nzue n bo barasu, na i yo nanmie agaya ni.

²⁶ Sam bo bu bá yo durunya n nu n dɛɛ ti, nyini má sere ti minem na bu tó cin, dama angoro n kere kpisi wɔ.

²⁷ Na minem nyá ɲu ka mini Adamande Wa ni sufite angoro yinyingɲu n nu suje piepieu suba ni yiko bambaka.

²⁸ Saɲga bo nyini sam n kere bá suyo ni, am yasu na am ye am tii su ni ahoresi, dama saɲga n adodo bo Nyeme bá de am tii lee.”

Kabo Yesu ɲa ya fa damba baka fa se nyaari barasu ni

²⁹ Dɔ na Yesu abo ahin miɛenu n akere bu. I ɲa, “Am nie damba baka ni baka nyingam kere.

³⁰ Saɲga bo am nya ba ɲu ka bu sufieɲe nyawa fɔfɔre ni, amberɛ ni am tii si ka dɔdɔori saɲga adodo lee.

³¹ Kabo Nyeme Feme bá nie i minem su ni, i yó sɔ ɔ. Saɲga bo amberɛ gusu bá ɲu ka nyini sam kere suyo ni, am si tenle ka i cé má, Nyeme Feme bá nie i minem su lee.

³² Nahore ye m suse am n a, bo bu la ɲgɔɔ kisa ni wú wie má ka, ye ahin sam kere bá yo a.

³³ Angoro n ni asienɲu n kere bá la awieeri, ama, m dɛɛ nɔanie n yiri, i la má awieeri cɛɛn be.”

Kabo Yesu seeri ka ya si ya ɲu sa fa kɔ i ba n su ni

³⁴ Na Yesu ase i susufom n ka, “Am si am ɲu sa, na má am susaaki am saɲga sutien am nɔɔ sunu nzan subo, na má am ma durunya n nu sa koroowa mie am, na má m ba ni fúra am nu

³⁵ kabo toroku tara deke ni. Dama nyini cɛɛn bá fura minem bo bu wo durunya n nu wɔ.

³⁶ Má am fa am ɲu ji, am sere Nyeme saɲga kere ka i ma am fanɲa na am kóro fite nyini kekereke n kere bo bu suba n nu, na am bá koro jina mini Adamande Wa n nyunu.”

³⁷ Ale kere bo i cin, Yesu kɔ Nyeme Sereebiri Awuru n nu wɔ, na i kɔ sukere minem, ale nya ba san, na i kɔ Oliva Buka n su.

³⁸ Ale kere bo i cin ɲgarama fuun, minem ni ba i dɔ Nyeme Sereebiri Awuru n nu wɔ, na bu ti i kereewam ni.

22

Kabo bu seseeri su ka bu kun Yesu ni

¹ Saɲga n ba dodoori bo bu di bu cɛɛnkpiri n bo bu di i ni kponɔ bo bu gɔ má ayiri nu na i yasu ni. Yiri ye bu kaaki fere i ka Butara cɛɛnkpiri n a.

² Na Nyeme sayoowa dɔɲguyofɔ nkpienkprienm ni, ni Nyeme nɔanie kerefom ni, anienie atin kabo bu yo barasu na bu kun Yesu, dama bu soroori minem ni ahore wɔ.

³ Na Sitana awura Yudasi Isikariyoti ni, yiri ti Yesu susufɔ buru ni nnyom ni kun be a.

⁴ Nyini ti, na wɔ kɔ asese su ni Nyeme sayoowa dɔɲguyofɔ nkpienkprienm ni, ni Nyeme Sereebiri Awuru n tintinijinafɔ nkpienm ni, kabo i tó Yesu ma bu ni.

⁵ Bu tiiri nyini n sɔ ni, na bu ahore ajo, na ba se ka bu má i ɲwaa.

⁶ Na Yudasi asoro su, na wɔ kpini atin na i tó Yesu ma bu, saɲga bo jama wo má i dɔ ni.

Kabo Yesu ni i susufom seseeri su ka bu di ceenkpiri diire ni

⁷ Na ceenkpiri ceen n aju, ceen n bo bu di kpono bo bu go ma ayiri nu na i yasu ni. Nyini ceen n ye wo yo daka ka bu kpie nbombaam kom n a, na bu fa tenge Butara ceenkpiri n su.

⁸ Na Yesu asunma Petoro ni Yohane, i na, "Am ko sese Butara ceenkpiri n diire n su na ya ba di."

⁹ Na ba bisa i ka, "A koro ka ya ko ni ko sese diire n su a?"

¹⁰ Na wo bo bu nu ka, "Am ti fen, am ko na am wura mie n nu, am ni sono be kaba ye, i so dundu ni nzue. Am su i su ko wura awuru n bo i ko wura nu ni.

¹¹ Na am bisa awurufobie n ka, 'Ya Kerefɔ n na, soɔ bono nu ye i ni i susufom ni di Butara ceenkpiri diire n a?'

¹² Na i kere am angoro soɔ bambaka n bo ba yo i kere dongu ni, do ye am sese diire n su se ya."

¹³ I jɔɔ wieeri ni, na ba ko anu deke n kere so kabo Yesu seeri bu ni, na ba sese Butara ceenkpiri diire n su.

Kabo Yesu ni i susufom ni diiri Butara ceenkpiri diire ni

¹⁴ Sanga n ba juuri, na Yesu ni i jaramasam n aba atana ka bu di diire ni.

¹⁵ Na wo se bu ka, "Kabo m koori lee, m boroori m nyi wo ka m ni ambere sanga di ahin Butara ceenkpiri diire n ka, na m nya di m wahara ni.

¹⁶ Dama m suse am wo lee, ka, m di ma ahin diire n kun, ma ka i ba yo yiiwa Nyeme femeya n nu."

¹⁷ Do na wo fa awa ni nzan, na wo da Nyeme asi, na wo se bu ka, "Am de na am nu, na am fa ma am benggu.

¹⁸ M suse am wo lee, ka, m nu ma ahin nzan n kun, ma ka ceen n bo Nyeme Feme ba nie i minem su."

¹⁹ Na Yesu akaaki afa kpono, na wo da Nyeme asi, na wo bubu i nu, na wo fa ama bu, na wo se bu ka, "Ahin kpono n ti m nuniembaa lee, ye m sufa ma am n a. Am yo ahin so adena am fa tenge m su."

²⁰ Bu diiri diire n wieeri ni, na wo kaaki afa awa ni nzan ni, na wo yo so, na wo se bu ka, "Ahin nzan n ti sesesu fofore n bo Nyeme sufa m mbunja n sudi i di n a. Ambere dee ti ye m mbunja ni songi go a.

²¹ Ama, am nie. Sono n bo i to m ni wo diire n diibiri fen, m ni yiri susanga di diire n a.

²² Mini Adamande Wa ni wu kabo Nyeme adu mo acici ka m wu n wo, ama, sono n bo i to m ni, i mi ba nu anyumboro."

²³ Do na ba bisa bu nu nu ka, "Ye ya nu nma koro yo ahin sa n a?"

Kabo Yesu kereeri ka mofɔ yo i nu kaan ni

²⁴ Na Yesu jaramasam n ase akuruwa bu nu nu nu fa ko sono bo i tara bu kere bu nu.

²⁵ Na Yesu ase bu ka, "Minem bo bu su ma Nyeme n dee nfemem, bere mie bu minem a, na bere bo bu la yiko minem nu ni, bu fere bu ka bukafom.

²⁶ Ama, ma ambere yo so. Sono bo i tara am kere am nu ni, i ti ye ni ka i mi yo i nu kaan, na bo i ti am mofɔ n gusu, i ti ye ni ka i mi yo i nu kaan na i su am.

²⁷ Sono bo i tana di diire ni, ni bo i su amusui ni, nma tara i benggu a? Yiri la bo i tana di ni, ma so o? Ama, mini wo am nu ka sono bo i su amusui wo.

²⁸ Sanga kere bo m woori kekereke nu, ambere jinaari m sin a.

²⁹ Kabo m Si Nyeme ama m atin ka m di femeya ni, so ye mini gusu fá ma am a,

³⁰ na am dí na am nú m femeya n nu, na am tána femeya biem su, na am níe Yisarelifom anɔ buru ni nnyom n su."

Kabo Yesu seeri ka Simon Petoro bá kete i ni

³¹ Na Yesu ase Simon ka, "Simon, ti fen. Sitana asere atin ka i kpaja am kabo bu kpaja ngani n wo.

³² Ama, ma sere Nyeme ama u na má a yaki m yaradayo. Na sangá bo a ba kaaki ba suuri m su bekun ni, buka u ninbaam ni, na bu nya ahoresi."

³³ Na wo se i ka, "M Mibié, m nmáti yaki má u da, nka bu sanga nyi wɔɔ ni mini kere wo, na ya sanga wu."

³⁴ Na Yesu ase i ka, "Petoro, m suse u wo lee ka, nyuma, kana akonyuma bá bo, a kéte kpe nsan su ka a si má m."

Kabo Yesu seeri i susufom fa ko sa kekerekem bo bu bá yo ni

³⁵ Na Yesu abisa i susufom n ka, "Sanga bo m sunmaari am na am abita má nwaa kuruku, wara kuruku, wara gbagbaa ni, nzu kpiéeri am su a?" Na ba bo i nu ka, "Pui akpie má ya su."

³⁶ Na wo se bu ka, "Ama, kisa, wɔɔ kere bo a la nwaa kuruku, wara kuruku, fa i, na wɔɔ kere bo a la má takobe, to u tanlee na a fa nwaa n to be.

³⁷ Dama ba kere i Nyeme Jore Kadasi n nu ka, 'Bu faari m buuri satieyofom kun wo.' M suse am wo lee, ka, wo yo daka ka, mini dee ti, na i yo yiiwa. Nahore, deke n bo bu kere niiri mini ni, i suyo yiiwa."

³⁸ Na ba se i ka, "Ya Mibié, nie. Takobe nnyo yaa fen." Na wo se bu ka, "Wo se su."

Kabo Yesu jeke tiiri n na i ko sereeri Nyeme ni

³⁹ Na Yesu afite mie n nu, na wo ko Oliva Buka n su, kabo i nati yo ni, na i susufom n asu i su.

⁴⁰ Sanga bo i ko juuri do ni, na wo se i susufom n ka, "Am sere Nyeme, adena má deke be yo am na am wura satie nu."

⁴¹ Do na wo yaki bu, na wo ko mo kaan, na wo kutu asere Nyeme.

⁴² I na, "M Si Nyeme, nzen i ti u koroyanu, yi m fite ahin anyumboro n bo i suba m do n nu. Haari ni nyini mmoo, má a yo kabo m koro ni, ama, se kabo a koro ni."

⁴³ Na Nyeme mereke be atie afite angoro aba asi i ahore.

⁴⁴ Ahoretanda n bo i tuuri i n dee ti, na wo sere Nyeme ni anyumboro abuka su, na i anjuye sukpinkpin asiengu ka mbunja dee su.

⁴⁵ I sereeri Nyeme n wieeri ni, na wo yasu akpie i nyi ako i susufom n do, i ko nuuri ka bu wo daafiri su, dama bu ahore asaaki agaya n dee ti.

⁴⁶ Na wo se bu ka, "Nzu ti ye am da daafi a? Am yasu jina na am sere Nyeme, adena má deke be yo am na am wura satie nu."

Kabo bu taraari Yesu ni

⁴⁷ Na sanga bo i toko wo jɔɔɔri n su ni, na jama be aba aju. Yudasi bo i ti i susufo buru ni nnyom nu kun ni, duuri bu mo a, na wo ko Yesu do ka i ko biti i,

⁴⁸ ama, na Yesu abisa i ka, "Yudasi, a biti m ye a ma bu nya mini Adamande Wa n taraabiri a?"

⁴⁹ Sanga bo i susufom bo bu wo i do n nuuri sa n bo i suba ni, na ba bisa i ka, "Ya Mibié, ya kpie bu takobe, nzen se?"

⁵⁰ Na bu nu kun akpie ayi sono be sui, i saa fomboro dee ni, nyini sono n ti Nyeme sayoowa dongyofo n kere kpien n akoo o.

⁵¹ Ama, na Yesu atien i susufom n nju ka, "Má am yo so kun." Na wo fa i saa akan sono n sui ni, na wo nya laifie.

⁵² Do na Yesu ase Nyeme sayoowa donguyofo nkpienkpienm ni, ni tintini-jinafo nkpienkpienm ni, ni Yudafo nkpienkpienm kere bo bu baari ka bu ba tara i n ka, "M ti awiefu o, ye am fa takobem ni koromam na am ba tara ma?"

⁵³ Ceen n kere ceen m ni ambere wo Nyeme Sereebiri Awuru n nu a, am atara ma m. Ama, kisa ti sangha bo Nyeme ama atin, na am ni Sitana bo i wo awosin nu n kere am yiko a."

Kabo Petofo keteeri ka i si ma Yesu ni

⁵⁴ Na ba tara Yesu afa i ako awura Nyeme sayoowa donguyofom n kere kpien n dika, na Petofo asu bu su, ama, i woori dede kaan ni bere wo.

⁵⁵ Mine nbem atoro sin gisan n afien, atana abara aye i, na Petofo ako abuka bu su.

⁵⁶ I tanaari na sin wein n goori i nju ni, na afani be anu i. Na wo nie i nyunu dika gbirim, na wo se bu ka, "Ahin sono ni mmoo ti i susufu o."

⁵⁷ Ama, na wo kete, i na, "Bara, m si ma i."

⁵⁸ Nyini sin, wo ce ma, na sono be gusu aba anu i, na wo se i ka, "Woro mmoo ti bu kun wo." Ama, na wo se i ka, "Woro, m ti ma bu kun."

⁵⁹ Na fa ko sangha su bekun, na sono kun be ajina su kekereke ase ka, "Nahore, ahin sono n ti bu kun wo, dama yiri gusu ti Galilifo o."

⁶⁰ Ama, na wo se i ka, "Woro, m si ma ahin jore n bo a sujoro i ni mmoo." Sangha bo i toko wo joro n su ni, na akonyuma akaba abo.

⁶¹ Na Mibie Yesu n ace anie Petofo nyunu, na wo tenge su kabo Mibie n seeri i ni, i na, "Nyuma, kana akonyuma ba bo, a kete kpe nsan su ka a si ma m."

⁶² Na wo fite ako asun agaya.

Kabo bu yoori Yesu anzasi na bu boori i barasu ni

⁶³ Na minem bo bu bita Yesu ni, ayo i anzasi, na ba bo i.

⁶⁴ Na ba fa sanvuin acin akata i nyumbaa, na ba bisa i ka, "Woro Nyeme noanie kanfo ni, nma bo u a? Kan kere ya."

⁶⁵ Na ba kpie i nzuko barasu barasu n kere.

Kabo Yudafo tereterefo diiri Yesu jore barasu ni

⁶⁶ Na ale acin, na Yudafo tereterefo atien bu noo, Nyeme sayoowa donguyofo nkpienkpienm ni, ni Nyeme noanie kerefo n gusu buka su, na ba fa Yesu aba bu tientienbunoo n nu.

⁶⁷ Na ba se i ka, "Nzen a ti Kristo Tiidefo n a, se ya." Na wo se bu ka, "Nzen m seeri am ka yiri la mini, am de ma,

⁶⁸ na nzen m bisaari am bisaawa, am bo ma m nu.

⁶⁹ Ama, fite kisa fa ko, mini Adamande Wa ni ba tana Nyeme Yikofu n saa fomboro su wo."

⁷⁰ Do na bu kere abisa i ka, "Nka woro ti Nyeme Wa n a?" Na wo bo bu nu ka, "Kabo am joro ni, i ti so o."

⁷¹ Na ba se ka, "Ya koro ma daanifo be kun. Yere mmoo ni ya tii ati kabo wo se ni."

23

Kabo bu faari Yesu ko jinaari Gomina Pilato nyunu ni

¹ Na bu tereterefo n kere bo ba tien bu noo n ayasu, na ba fa Yesu ako ama Gomina Pilato.

² Na ba bo i bu sujaraki i, bu ɲa, “Ya kɔ aɲu ka ahin sɔnɔ ni sudaka ya minem ka bu kete gomina ni, na má bu tɔ lampo kaari ma Feme Kpiri Siza, i ɲa ka yiri ni i tii ti Kristo Tiidefɔ n a, nyini la ka i ti feme wɔ lɛɛ.”

³ Na Gomina Pilato abisa i ka, “Wɔrɔ ti Yudafɔm feme n a?” Na wɔ bo i nu ka, “Kabo a jɔjɔ ni, i ti sɔ ɔ.”

⁴ Dɔ na Gomina Pilato ase Nyeme sayoowa dɔɲguyofɔ nkpienkpienm ni, ni jama n kere ka, “Ma ɲu má ɲgasi bo ahin sɔnɔ n ado i.”

⁵ Ama, na ba jina kun su, na ba jaraki i, bu ɲa, “I kereewa n ama Yudiya awɔre n nu minem kere ahore ayasu. I boori i bu Galili awɔre n nu wɔ, ye kisa wɔ fa aba fen n a.”

Kabo bu faari Yesu kɔ jinaari Feme Herode nyunu ni

⁶ Gomina Pilato tiiri sɔ ni, na wɔ bisa ka, “Sɔnɔ n ti Galilifɔ ɔ?”

⁷ I tiiri ka i fite dɔ ni, na wɔ ma ba fa i akɔ Feme Herode dɔ, dama yiri yo niɛ nyini awɔre n su a. Nyini saɲga ni, Feme Herode gusu woori Yerusalem miɛ kpiri n nu.

⁸ Feme Herode ɲuuri Yesu ni, na wɔ yo i fie akɔ asin su, dama wɔ ti i ɲga aɛɛ, na wɔ koro ka i ɲu i na i yo alekutura sa nbem na i niɛ.

⁹ Nyini ti, na wɔ bisa Yesu bisaawam beberebe, ama, wɔ bo má i nu.

¹⁰ Na Nyeme sayoowa dɔɲguyofɔ nkpienkpienm ni, ni Nyeme nɔanie kerefɔm n afite ajina sujaraki i ni anyumboro su.

¹¹ Na Feme Herode ni i sojam n ayo Yesu anzasi, na ba bu i ɲgbɛɛn, na ba fa tanlɛ nyunyumi awura i, na ba fa i akpie i nyi akɔ Gomina Pilato dɔ.

¹² Nyini saɲga ni, Feme Herode ni Gomina Pilato yo kpɔ bu beɲgu wɔ, ama, nyini cɛɛn n gbɪngbin na ba kaaki danfom.

Kabo Gomina Pilato maari nɔɔ ka bu kun Yesu ni

¹³ Na Gomina Pilato afere Nyeme sayoowa dɔɲguyofɔ nkpienkpienm ni, ni Yudafɔm tereterefɔm ni, ni minem ni,

¹⁴ na wɔ se bu ka, “Am faari ahin sɔnɔ n baari m dɔ, na am ase ka i sukere minem na bu kete gomina n wɔ. Mini ni m tii anie jɔre n nu am nyunu fen, ama, ma ɲu má ɲgasi bo wɔ do i.

¹⁵ Feme Herode mmɔɔ ni i tii aɲu má i ɲgasi be, nyini dɛɛ ti ye wɔ kaaki i aba ama ya n a. Nahɔre, ahin sɔnɔ n ado má ɲgasi be bo bu kun i.

¹⁶ Nyini ti, m má bu fin i ɲgbere na m yáki i na i kɔ.” [

¹⁷ Afɔ kere afɔ, Butara cɛɛnkpiri n nya ba juuri ni, wɔ yo daka ka Gomina Pilato yi dansaraka n kun ji.]

¹⁸ Ama, na jama n kere atien kungerekun ase ka, “Yi ahin sɔnɔ ni ɲgɔɔ, na a yi Barabasi ma ya.”

¹⁹ Yiri Barabasi ni i beɲgu ketemafɔ nbem yo kpiɛeri jɔre, Yerusalem miɛ kpiri n nu, na ba di aluwa na ba kun mine. Nyini ti ye bu taraari i dansaraka n a.

²⁰ Gomina Pilato koroori ka i yaki Yesu nu ji n dɛɛ ti, na wɔ kaaki ajɔjɔ jama n dɔ bekun.

²¹ Ama, na bu sutientien suse ka, “Kpama i baka jaanu n su na i wu. Kpama i.”

²² Na wɔ kaaki ase bu kpe nsan su ka, “Ye nzu satie ye wɔ yo i a? Mini aɲu má satie be bo wɔ yo i na bu kun i. M má bu fin i ɲgbere wɔ, na m yáki i na i kɔ.”

²³ Ama, na ba kaaki atien kpa amie i ka i kpama Yesu baka jaanu n su. Na bu naɲmie yoowa agaya n akunma Gomina Pilato.

²⁴ Na wɔ ma nɔɔ ka bu yo Yesu kabo minem koro ni.

²⁵ Na wɔ yi sɔnɔ n bo minem n koroori i n aji, yiri bo i kpiniiri jɔre na i kuunri minem na bu nyiiri i dansaraka ni. Ama, Yesu yiri, na wɔ ma bu nɔɔ ka bu kun i, kabo Yudafoɔm koro ni.

Kabo bu kpamaari Yesu baka jaanu n su ni

²⁶ Na sojam n afa Yesu afite, na saɔga bo bu wo ko su ni, na bu ni bie be aye, bu fere i ka Simon, i ti Sirenefo ɔ. I fite aheme suba mie kunnu, na sojam n amie i ka i so baka jaanu n su Yesu su.

²⁷ Na jama beberebe asu i su, bu nbem ti nbaram wɔ, na bu susun, na bu sukoko, i dee ti.

²⁸ Na Yesu ace anie bu, na wɔ se bu ka, “Yerusalem nbaram, ma am sun mini dee ti, ama, am sun ambere ni am nbaam dee ti.

²⁹ Am ti fen, saɔga ni suba bo minem ba se ka, ‘Terefie wo nɔɔkam n do, ni bo bu nya wu ma nbaam ni, ni bo nbaam nya nu ma bu nyufini ni.’

³⁰ Nyini saɔga n ye minem se ka,

‘Nzen ma bukam bereki go ya nu,
na kperem kata ya nu,

ma i ti ye.’

³¹ Nzen bu faari baka mone wuraari sin nu na i jeeri, ye baka wuruuwa yiri yo se wo lee?”

³² Na ba fa satieyofɔ nnyo nbem gusu ako ka bu ko kun bu ni Yesu kere.

³³ Saɔga bo bu ko juuri dika be bo bu fere i ka Tereawa woobiri ni, na ba kpama Yesu baka jaanu n su, na ba ye i su ajina. Na ba kpama satieyofɔ nnyo nbem baka jaanu n su adodo i, bu kpamaari kun i saa fomboro su wo, na ba kpama kun n gusu i saa bie su.

³⁴ Na Yesu ase ka, “M Si Nyeme, fa bu satie ce bu, dama bu si ma sa n bo bu suyo i ni.” Na ba tu mbaa na bu si kabo bu kpaaki i suturam nu.

³⁵ Na minem n ajina do sunie i, na Yudafoɔm tereterefoɔm mmoo ayo i anzasi. Bu na, “I na i koro de minem tii ji. Nzen yiri ti Kristo Tiidefo n bo Nyeme ayi i ni, ma i de i nu tii ji.”

³⁶ Na sojam n gusu ayo i anzasi, na ba fa nzan gagaraki be ama i ka i nu,

³⁷ na ba se ka, “Nzen woro ti Yudafoɔm Feme n a, de u tii ji.”

³⁸ Na ba kere kereewa be abo akpama i baka jaanu n tii su, kereewa n la ka, “Yudafoɔm Feme n lee.”

³⁹ Na satieyofɔ nnyom bo bu saɔga kpamaari bu ni Yesu ni, bu nu kun ato i nu ni nzuko, i na, “Ma woro ti Kristo Tiidefo n a? De u tii ji na a de yere gusu ji.”

⁴⁰ Ama, na nyinga n ajaraki i, i na, “A soro ma Nyeme wo? M na ya dee suicin ni i dee n kere ti kun wo.

⁴¹ Ya dee suicin n yiri, i ti deke bo ya de i wo, dama kabo i ti ye ni ka bu yo ya lee, ama, yiri ado ma ngasi be.”

⁴² Na wo kaaki ase ka, “Yesu, a ba baari ni u femeya ni, tenge m su.”

⁴³ Na Yesu ase i ka, “Nahore ye m suse u n a, nyuma dee ceen n nu, a ba wo m do alezanda nu.”

Kabo Yesu wuuri ni

⁴⁴⁻⁴⁵ Na fa ko wiesu kerefi buru ni nnyo saɔga, wie n afite ma na awosin akata asien n kere su haari naaso kerefi nsan, na tani bambaka n bo bu fa kanda kpaakiiri Soɔ Casi n bo i wo Nyeme Sereebiri Awuru n nu n ati nu nnyo, i afien.

⁴⁶ Na Yesu abo awie kpa, i na, “M Si Nyeme, ma fa m nu awura u saa nu.” I seeri so wieeri n na wo yo Nyeme dee.

⁴⁷ Saɗga bo soja kpɛn ŋuuri sa n bo wɔ yo sɔ ni, na wɔ kansɩ Nyɛmɛ, na wɔ se ka, “Nahɔrɛ su, ahin sɔnɔ n tiiri sɔnɔ fɔfoe wɔ.”

⁴⁸ Na minɛm kɛrɛ bo ba tien bu nɔɔ jina wo i niɛ su ni, saɗga bo bu ŋuuri sa n bo wɔ yo n sɔ ni, na bu kɛrɛ afa bu saa ataka i beɗgu nu, na ba kpɛ bu nyi akɔ awuru.

⁴⁹ Na Yesu danfom n kɛrɛ, ni nbaram bo bu suuri i su fiteeri Galili awɔrɛ n nu ni, ajina dede kaan suniɛ sam n kɛrɛ bo bu yoori ni.

Kabo bu yoori Yesu sutura barasu ni

⁵⁰ Sɔnɔ be woori bɛrɛ, bu fere i ka Yosefu, i ti Yudafoɗm tereterefoɗm nu kun wɔ, na i ti sɔnɔ kpa, na i yo sa bo i kɔ atin su Nyɛmɛ dɔ.

⁵¹ Wɔ soro má su ni sunsunni n bo i beɗgum faari i na bu yoori Yesu barasu ni. I fite miɛ kpɛri n bo bu fere i ka Aramatiya na i wo Yudiya awɔrɛ nu n wɔ, na i dɛɛ la ka, i ŋminda wɔ, fa kɔ saɗga bo Nyɛmɛ Fɛmɛ bá niɛ i minɛm su.

⁵² Na wɔ kɔ Gomina Pilato dɔ, na wɔ kɔ asere i ka i fa Yesu ŋuniɛ n ma i.

⁵³ Na wɔ kɔ ayi fuin ni baka jaanu n su, na wɔ fa nzee n apɔɔndi i. Na wɔ kɔ afa i awura yabue buɛ bo ba lokoti i ayo i faɗkunma n nu na ba nya ase má sɔnɔ be nu ni, na wɔ fa i ase nu.

⁵⁴ Nyini cɛɛn n tiiri Njumiya cɛɛn n kpokpo cɛɛn wɔ, i naaso, wɔ ka kaan na bu di Njumiya cɛɛn ni.

⁵⁵ Nbaram bo bu suuri Yesu su fiteeri Galili awɔrɛ n nu ni, bɛrɛ suuri Yosefu su, na ba kɔ aɗu yabue buɛ faɗkunma ni, ni kabo bu seeri fuin n barasu.

⁵⁶ Na ba kpɛ bu nyi akɔ awuru ka bu kɔ kpa bu ŋu ni ŋguin nvanvanim ni tulaalɛm. Na alecin Njumiya cɛɛn ni, na ba yi bu ŋumi kabo Nyɛmɛ maari Moyisi nɔɔ ka bu yo ni.

24

Kabo Yesu tengeeri i yiwee n nu ni

¹ Na alecin, Yudafoɗm bakue n bumboori, mɔnɛ cɛɛn ŋgarama fuun, na nbaram n afa tulaalɛɛ nvanvani bo ba kpɛni ase ni, na ba fa akɔ yabue buɛ faɗkunma n su.

² Bu kɔ juuri dɔ n na ba ŋu ka yabue bambaka n akundu ayaki faɗkunma n aɔɔ ni.

³ Ama, bu wuraari faɗkunma n nu ni, ba ŋu má Mibiɛ Yesu ŋuniɛ ni,

⁴ na ba miɛ aka ajina gbirim, kpɛɗga na ba ŋu ka nbiesom nnyɔ jina, bu wura sutura fɔfoe papasi.

⁵ Na sere ati nbaram n agaya, na ba biri bu tii haari asiɛɗgu, na minɛm n abisa bu ka, “Nzu ti ye am sunienie fuinm nu na am ŋu sɔnɔ bo i la ŋɔɔ a?”

⁶ I wo má fɛn. Wɔ tenge i yiwee n nu. Am tenge su kabo i yo seeri am ni, saɗga bo i yo wo Galili awɔrɛ n nu ni,

⁷ i ŋa, ‘Wɔ yo daka ka bu bá fa mini Adamande Wa n wura satieyofom saa nu, na bu kpáma m baka jaanu n su, ama, na lesan cɛɛn na m tɛɗge m yiwee n nu.’ ”

⁸ Dɔ na ba tenge Yesu nɔaniɛ bo i yo seeri bu n su,

⁹ na ba fite faɗkunma n nu, na ba kpɛ bu nyi akɔ akan sam n kɛrɛ bo ba ŋu i ni, akere i susufɔ buru ni kunm ni, ni nyingam kɛrɛ.

¹⁰ Nbaram ni la Mariya bo i fite Magadala miɛ n nu ni, ni Yowana, ni Yakobo dɛɛ ni Mariya, ni bu beɗgu nbara nbem, bɛrɛ kaanri nyini sam n kɛrɛ kereeri i jaramasam n a.

11 Ama, bu tiiri jɔrɛ n bo nbaram kan kereeri bu ni, bu sunsuunri ka i ti jɔrɛ ɲgbɛɛn wɔ, ba yo má yarada.

12 Ama, na Petoro ayasu aɲmati ako faɲkunma n nu, i kɔ juuri n na wɔ kasi anie faɲkunma n nu, wɔ ɲu má pui, má ka nzee n ɲgumi da. Na wɔ kpie i nyi aba awuru, na wɔ birisi fa kɔ sa n bo wɔ yo n su.

Kabo Yesu faari i ɲu kereeri i susufɔ nnyɔm barasu ni

13 Nyini cɛɛn ni, na Yesu susufɔ nnyɔ nbem sukɔ miɛ kaan be bo bu fere i ka Emɔsi n su, i ni Yerusalem miɛ kpiri n waari má agaya.

14 Bu wo kɔ su ni, na bu subo anzama fa kɔ sa n kere bo wɔ yo n su.

15 Bu nati wo nyini anzama n bo su ni akuruwa ni, na Yesu ni i tii aba atu bu atin nu,

16 na ba ɲu i, ama, ba koro asi má ka yiri lɛɛ.

17 Na wɔ bisa bu ka, “Am wo natiiri n su atin n nu ni, am boori nzu anzama n a?” Na ba ka ajina gbirim ni ahoresaaki.

18 Na bu nu kun be bo bu fere i ka Kelɔpasi n abɔ i nu ka, “I yo sɛ ye wɔfɔm kere bo bu wo Yerusalem miɛ kpiri n nu n si sam bo ba yo nyini lennyɔ n nu bere, ye wɔrɔ ɲgumi si má?”

19 Na wɔ bisa bu ka, “Nzu sam?” Na ba bɔ i nu ka, “Yesu Nazaretifo n jɔrɛ. I yo tiiri Nyeme nɔanie kanfɔ bo i la yiko wɔ, fa kɔ i alekutura sam ni i kereewam su, na i sayoowam sun Nyeme ni minem n kere nu.

20 Na Nyeme sayoowa dɔɲguyofɔ nkpienkpienm ni tereterefɔm n ama ba di i jɔrɛ ka bu kun i, na ba kpama i baka jaanu n su.

21 Ama, yere yo laari tama ka yiri ye wɔ ba ka i bá de Yisarelifɔm tii ji a. Deke bo i buka nyinim kere su n la ka, nyini sam kere yoori, i nyuma lesan lɛɛ.

22 Haari ni nyini n mmɔɔ, ya nbaram nbem ba kaanri alekutura jɔrɛ be kereeri ya. Bu kɔɔri yabuɛ buɛ faɲkunma n nu wɔ ɲgarama fuun,

23 ama, ba ɲu má fuin n dɔ. Bu kpieeri bu nyi ba juuri ni, na ba se ya ka, bu kɔ ɲuuri Nyeme merékem ka alele nu wɔ, faɲkunma n nu, na ba se bu ka i la ɲgɔɔ.

24 Na ya nu nbem gusu ako faɲkunma n nu, bu kɔ ɲuuri deke n kere sɔ ɔ, kabo nbaram seeri ni, ama, ba ɲu má yiri.”

25 Na Yesu ase bu ka, “Amberɛ, ɲgɔnlɛ akpie am su wɔ, nzen sɛ, ye dada kere am nya yo má yarada, fa kɔ jɔrɛ n kere bo Nyeme nɔanie kanfɔm jɔjɔri n su?”

26 Am si má ka wɔ yo daka ka Kristo Tiidefɔ n di nyini wahara n kere ka, na Nyeme wura i kpiri?”

27 I seeri sɔ n na wɔ kan i ɲusu jɔrɛ akere bu, kabo ba kere i Nyeme Jɔrɛ Kadasi n kere nu ni, i boori i bu ni Moyisi dɛɛ kereewam wɔ, na wɔ nya akan kabo Nyeme nɔanie kanfɔm kere kereeri ni.

28 Bu ba kɔ suju miɛ n bo bu sukɔ su ni, na Yesu ayo ka yiri susin kɔ mɔ,

29 ama, na ba sere i ni anyumboro, na ba se i ka, “Ba yo ya wɔfɔ. Wie atɔ, ale susan lɛɛ.” Nyini ti, na wɔ wura awuru n nu ka i da bu dɔ.

30 Saɲga bo i tanaari na bu kere di diire n ni, na wɔ fa kpɔnɔ, na wɔ da Nyeme asi, na wɔ bubu i nu afa ama bu.

31 Dɔ na bu nyunu ateke i ɲu, na ba si i, kpenɲa na wɔ mini ayaki bu.

32 Na ba se bu beɲgu ka, “Saɲga bo i jɔjɔri ya dɔ atin n nu na i kaanri Nyeme Jɔrɛ Kadasi n bu kereeri ya ni, i maari ya ahorejɔ kɔ sin su wɔ, má sɔ?”

33 Na ba kaba ayasu bere akpie bu nyi ako Yerusalem miɛ kpiri n nu, na ba kɔ aɲu ka i susufɔ buru ni kunm ni, ni nyingam n atien bu nɔɔ,

³⁴ bu suse ka, “Ya Mibiε n atenje nahore su. Wɔ yi i ηu akere Simon.”

³⁵ Na susufɔ nnyɔm n akan sa n bo i yoori atin n nu dɔ ni, ni kabo bu siiri ka yiri ni, sanɔa bo i bubuuri kponɔ n nu maari bu ni.

Kabo Yesu yiiri i ηu kereeri i susufɔm ni

³⁶ Sanɔa bo susufɔ nnyɔm n wo jɔre n kan su sɔ ni, na Yesu ni i tii akaba aba ajina bu afien, na wɔ se bu ka, “Nyeme ma am ahoreda.”

³⁷ Na sere ati bu agaya, dama bu sunsun ka ηumi ye ba ηu i a.

³⁸ Na wɔ bisa bu ka, “Nzu deke mie am a? Nzu ti ye am yo sika?”

³⁹ Am nie m saam ni m jaam, mini ni m tii lee. Am fa am saa kan m na am nie, ηumi la má anuniembaa ni buwem kabo am ηu ka m la i ni.”

⁴⁰ I seeri sɔ wieeri n na wɔ fa i saam ni i jaam deke bo bu boori i bulaari n afa akere bu.

⁴¹ I yoori bu alekutura na bu ahore jɔ kɔ siinri su ni, haari ni nyini n kere, ba koro ayo má yarada. Dɔ na wɔ bisa bu ka, “Am la diire be fen bo am di?”

⁴² Na ba fa jombaa n bo ba tun i n be ama i,

⁴³ na wɔ de akpese bu nyumbaa nu bere.

⁴⁴ Na wɔ se bu ka, “Ahin noaniem bo m yo jɔjɔri bu sanɔa bo m toko wo am dɔ n lee, ka, wɔ yo daka ka m ηusu jɔre kere yo yiiwa, kabo ba kere i Nyeme noaniε kpamaawa n bo i fa maari Moyisi deε kadasi n nu, ni Nyeme noaniε kanfɔm deε n nu, ni kansu jue kerewam n nu ni.”

⁴⁵ Na wɔ teke bu nyi na bu si Nyeme Jɔre Kadasi n bu,

⁴⁶ na wɔ se bu ka, “Kabo ba kere i Nyeme Jɔre Kadasi n nu n lee, ka, Kristo Tiidefɔ ni bá di wahara, na bu kún i, na lesan ceen na i tenge i yiwee n nu.

⁴⁷ Bu bó i bu Yerusalem mie kpiri n nu wɔ, na bu kán labari kpa n jore i duma nu kere daanfie kere, ka, bu kaaki bu wo na Nyeme fá bu satie ce bu.

⁴⁸ Amberε dí nyini sam daani a.

⁴⁹ Am ti fen, mini bá sunma aceeri n bo m Si Nyeme seeri ka i fá ma am, na i bá wura am ηu n a. Ama, amberε ηmínda mie n kunnu fen, haari sanɔa bo yiko ni bá fite angoro ba wura am ηu.”

Kabo Nyeme ma Yesu fun kɔri angoro barasu ni

⁵⁰ Na wɔ fa bu afite mie n kunnu ako aju Betani mie n aheme, dɔ na wɔ ye i saa su na wɔ yo kisi ago bu ηu.

⁵¹ I wo bu kisi n yo su sɔ ni, na wɔ yaki bu, na Nyeme ama wɔ fun ako angoro.

⁵² Na ba kutu asu i, na ba kpie bu nyi ako Yerusalem mie kpiri n nu ni ahorejɔ bambaka.

⁵³ Na ba kɔ awo Nyeme Sereebiri Awuru n nu sukansi Nyeme sanɔa kere.

Labari kpa n bo YOHANE akerε i ni

Yesu ti Nɔanie n bo i ma ηgɔɔ n a

¹ Kana Nyeme ba yi durunya ni, be woori bere bo bu fere i ka Nɔanie. I ni Nyeme woori bere a. Yiri Nɔanie ni ti Nyeme a.

² Fite i bumboori n kere, yiri ni Nyeme wo bere a.

³ Na Nyeme ama Nɔanie n ayi deke n kere. Deke be wo má bere bo wo yi má i.

⁴ Ngɔɔ fite yiri Nɔanie ni dɔ a. Nyini ηgɔɔ ni fa wein ba tekeeri adamande nyi a.

⁵ Na wein n aje awosin nu, na awosin n akoro akunma má wein ni.

⁶ Nyeme yo sunmaari sɔnɔ be, bu fere i ka Yohane.

⁷ I baari ka i ba di nyini wein n daani wɔ, na i kan i jɔre kere minem, adena sɔnɔ kere bo i tiiri kabo i kan ni, na bu daari nyini wein n ηu.

⁸ Yohane n mmɔɔ ni i tii yo ti má wein ni, ama, i baari ka i ba di wein n daani wɔ.

⁹ Nyini wein ni ti wein nahɔre su n a, bo wɔ ba durunya n nu, na i teke adamande kere nyi.

¹⁰ Yiri n bo bu fere i ka Nɔanie n yo woori durunya n nu wɔ, Nyeme faari yiri yiiri durunya n a, haari ni nyini n kere mmɔɔ, durunya n nufɔm asi má i.

¹¹ Na wɔ ba i tienngu dɛɛ asien n su minem dɔ, na ba kete ka bu de má i.

¹² Ama, na minem kere bo bu deeri i, na bu daari i ηu ni, na wɔ ma bu atin ka bu kaaki Nyeme nbaam.

¹³ Bu Nyeme nbaa kaakiiwam n ti má ka bu wu bu ni adamande mbunja a, nzen má nyini, i ti má ka biesɔ ni bara sanja a ye bu wu bu a, ama, Nyeme ni i tii, ti bu Si a.

¹⁴ Na yiri Nɔanie n akaaki adamande aba awo ya dɔ. Ahɔroma ni nahɔre wo i dɔ beberebe. Ya ηu i jirima woowa ni, nyini jirima woowa n ye Nyeme afa ama i Wa kun n kpein n a.

¹⁵ Yohane diiri i daani kereeri minem, na wɔ tien ase ka, “Nyini sɔnɔ n bo m yo seeri am ka i wo m sin suba na i tara m fieo n lee, dama kana bu ba wuuri m ni, yiri wo bere wɔ.”

¹⁶ I ahɔroma beberebe n dɛɛ ti, ye ya di i ahɔroma, na ya toko di i buka su.

¹⁷ Nyeme yo faari i nɔanie kpamaawa ni maari Moyisi ka i fa kere Yisarelifɔm, ama, Yesu Kristo aba ka i ba kere ya kabo Nyeme ahɔroma n ni i nahɔre n ti barasu wɔ.

¹⁸ Be nya ηu má Nyeme, má ka i Wa kun n kpein n bo i ni i Si Nyeme n ti kun ni, na i wo Nyeme dɔ ni, yiri ye wɔ kere ya kabo Nyeme ti a.

Yohane Nyeme Nzue Biefɔ n daani diiwa ni

¹⁹ Ahin ti daani diiwa n bo Yohane yo diiri i, sanja bo Yudafɔm nkpien-kpienm n bo bu wo Yerusalem mie kpiri n nu n sunmaari Nyeme sayoowa dɔnguyofɔm ni bu bukafɔm ka bu kɔ bisa Yohane ka, “Wɔrɔ la ηma a?”

²⁰ Yohane afie má bu jɔre be su, na wɔ kan i kere kpain akere bu. I ηa, “Má mini ti Kristo ni, Tiidefɔ n bo Nyeme ηa i súnma i n a.”

21 Na ba bisa i bekun ka, “Ye wɔrɔ la ŋma a? Wɔrɔ ti Nyɛmɛ nɔaniɛ kanfɔ Eliya n a?” Na wɔ se bu ka, “Má yiri la mini.” Na ba kaaki abisa i ka, “Wɔrɔ ti Nyɛmɛ nɔaniɛ kanfɔ n a?” I ŋa, “Ai.”

22 Na ba sa su abisa i ka, “Ye wɔrɔ la ŋma a? Ma ya nɔaniɛ na ya kɔ se bo bu sunmaari ya ni. Wɔrɔ ŋa, wɔrɔ la ŋma tenle su a?”

23 Na wɔ se bu ka, “Sɔnɔ n bo Nyɛmɛ nɔaniɛ kanfɔ Esaya yo kerɛeri i jɔrɛ ka i bá subo ndoori boro kpantain nu n ka, ‘Am yo Mibiɛ n atin n dɔŋgu.’ Yiri la mini.”

24 Minɛm bo bu bisaari Yohane bisaawa ni, Farasifɔm bo bu ti Yudafɔm asɛsɛ be ni sunmaari bu a.

25 Na ba kaaki abisa i ka, “A ŋa a ti má Kristo Tiidefɔ ni, a kaaki ti má Eliya, na a kaaki ti má Nyɛmɛ nɔaniɛ kanfɔ n ni, ye nzu ti ye a biɛ minɛm Nyɛmɛ nzue a?”

26 Na wɔ bɔ bu nu ka, “Mini biɛ minɛm Nyɛmɛ nzue wɔ. Ama, sɔnɔ be wo am nu fɛn bo amberɛ si má i.

27 I wo m sin suba, m ti kaan ni bo m dodo i mmɔɔ.”

28 Ahin sa n kerɛ yo yoori miɛ n bo bu fere i ka Betani n nu wɔ, i wo Yodan kunma n wiɛ afiiri, deke bo Yohane yo biɛeri minɛm Nyɛmɛ nzue n wɔ.

Kabo Yohane ŋa Yesu ti Nyɛmɛ bɔmbaa ni

29 Alecin fɔfɔrɛ na Yohane aɲu ka Yesu suba i dɔ, na wɔ se ka, “Am niɛ, Nyɛmɛ bɔmbaa n bo wɔ ba ka i ba yi durunya n nufɔm satie n lɛɛ.

30 Yiri, ye m yo seeri am ka sɔnɔ n bo i wo m sin suba na i tara m fieo n lɛɛ, dama i yo woori berɛ wɔ ka, ye bu wuuri m a, yiri lɛɛ.

31 Mini mmɔɔ ni m tii yo si má i, m dɛɛ la ka m biɛ minɛm Nyɛmɛ nzue wɔ, adena amberɛ Yisarelifɔm si i.”

32 Na Yohane adi daani ase minɛm ka, “Ma ŋu ka Nyɛmɛ Awiewie Casi n afite angoro ajura ka tiiwa dɛɛ su aba atana i ŋu, na wɔ wo i dɔ.

33 Mini mmɔɔ ni m tii yo si má i, ama, Nyɛmɛ bo i sunmaari m ka m ba biɛ mine Nyɛmɛ nzue ni, yiri seeri m ka, ‘A bá ŋu ka m Awiewie ni júra ba tana sɔnɔ be ŋu, na i wó i dɔ, yiri má m Awiewie Casi n ba wura minɛm ŋu a.’

34 Ma ŋu i sɔ ye m sudi daani kere mine a, ka yiri ti Nyɛmɛ Wa n nahɔrɛ su a.”

Minɛ n bo bu du mɔ yoori Yesu susufɔm ni

35 Na alecin fɔfɔrɛ bekun na Yohane ni i susufɔm ni nnyɔ jina.

36 Na wɔ niɛ aɲu ka Yesu wo natiiri su susin, na wɔ se ka, “Am niɛ, Nyɛmɛ Bɔmbaa n lɛɛ.”

37 I susufɔ nnyɔm n tiiri sɔ n na ba kɔ asu Yesu su.

38 Na Yesu akaaki anie aɲu ka bu susu i su, na wɔ bisa bu ka, “Am koro nzu wɔ?” Na ba bisa i ka, “*Rabi*, a da ni wɔ?” *Rabi* bu la ka, ya Kerefɔ.

39 Na wɔ se bu ka, “Am bra na am ba niɛ.” Nyini sanɲa ni, naaso kerefi nna abo, na ba su i su, na ba kɔ aɲu deke bo i wo ni. Na ba ka i dɔ nyini cɛɛn ni.

40 Nyini mine n nnyɔm n bo bu yo tiiri kabo Yohane seeri n na bu suuri Yesu su ni, bu nu kun ye bu fere i ka Andere n a, bo i gɔrɔ la Simon Petoro ni.

41 Nyini sin na Andere akɔ aɲu i gɔrɔ Simon, na wɔ se i ka, “Ya ŋu *Mesaya* ni.” *Mesaya* bu la ka Kristo, Tiidefɔ n bo Nyɛmɛ ase ka i súnma i ni.

⁴² Na wɔ fa i aba Yesu dɔ. Na Yesu anie i nyunu, na wɔ se i ka, “Bu fere u ka Simon wɔ, wɔrɔ ti Yohane wa n a, ama, bu bá fere u ka Kefasi.” I bu la ka yabuɛ, i ni Petoro kere ti duma kun wɔ.

Kabo Yesu fereeri Filipu ni Natanieli ka bu su i su ni

⁴³ Alecin fɔfɔre na Yesu ayasu ka i kɔ Galili deɛ awɔre n nu. Na wɔ kɔ anu sɔnɔ be bo bu fere i ka Filipu ni, na wɔ se i ka, “Ba su m su.”

⁴⁴ Filipu bɔsu la mie be bo bu fere i ka Besayida n wɔ. I ni Andere ni Petoro kere fite mie kun su wɔ.

⁴⁵ Na Filipu gusu akɔ anu sɔnɔ be bo bu fere i ka Natanieli, na wɔ se i ka, “Ya ŋu sɔnɔ n bo Moyisi yo kereeri i jɔre Nyeme nɔanie kpamaawa kadasi n nu ni, na Nyeme nɔanie kanfɔm gusu yo kereeri i jɔre bu deɛ kadasi n nu ni. Yiri la Yesu n bo i fite Nazareti ni, na i si la sɔnɔ be bo bu fere i ka Yosefu ni.”

⁴⁶ Na Natanieli abisa i ka, “Deke kpa koro fite Nazareti deɛ mie n gusu nu?” Na Filipu ase i ka, “Bra na a ba nie.”

⁴⁷ Nyini sanɔa na Yesu anu ka Natanieli suba i dɔ, na wɔ se ka, “Ahin sɔnɔ n ti Yisarelifo baa a nahore su, bo sa be wo má i ŋu.”

⁴⁸ Na Natanieli abisa i ka, “A yo se siiri m a?” Na Yesu abɔ i nu ka, “M ŋuuri u sanɔa bo a toko tana damba baka n bu n wɔ, nyini sin ye Filipu fereeri u n a.”

⁴⁹ Na Natanieli ase i ka, “Ya Kerefɔ, wɔrɔ ti Nyeme Wa n a, nahore su. Wɔrɔ ti Yisarelifɔm Feme n a.”

⁵⁰ Na Yesu ase i ka, “Bo ma se u ka m ŋuuri u damba baka n bu n ti ye a yo m yarada, nzen se? A bá ŋu alekutura sam bo bu tara sɔ.

⁵¹ Nahore ye m suse am a. Am bá ŋu kabo angoro bá teke na Nyeme merékem bá sufun kɔ angoro, na bu bá sujura ba mini Adamande Wa n dɔ.”

2

Kabo Yesu kɔɔri konyaya be Kana mie kpiri n nu ni

¹ Nyini sin, i lesan cɛen na konyaya be awo Kana, mie kpiri n bo i wo Galili awɔre n nu ni. Na Yesu ni gusu akɔ konyaya n nu.

² Na ba fere Yesu ni i susufɔm n ka bu gusu ba di konyaya n be.

³ Sanɔa bo konyayafɔm nzan n ba kpiɛeri bu su ni, na Yesu ni aba ase i ka, “Bu nzan n awie.”

⁴ Na Yesu abɔ i nu ka, “M ni, ye a ŋa m yo se wɔ? M sanɔa nya ju má.”

⁵ Na i ni ase awurunbaam n ka, “Am yo deke kere bo i se am.”

⁶ Nyini dika n nu, yabuɛ cuŋgu nsen jina bere, bo i kun kun kere koro de nzue ganɔa nnu wara nsen. Yudafɔm la bu yoowa be, bu fa nyini cuŋgum n nu nzue ni, ye bu bita ŋmisi bu fin a.

⁷ Na Yesu ase awurunbaam n ka, “Am sa nzue go cuŋgum n nu na bu yi.” Na ba go i kere nzue na ba yi.

⁸ Na Yesu akaaki ase bu ka, “Kisa am sa be kɔ ma konyafan danfo ni.” Na ba sa be akɔ ama i.

⁹ Bu sa kɔ maari i ni, na nzue n akaaki nzan. Na wɔ fa akan i nɔɔ. Wo si má deke bo nyini nzan n fite. Ama, awurunbaam bo bu saari nzue ni, bere si deke bo i fite. Na wɔ fere konyafan ni,

¹⁰ ase i ka, “Sɔnɔ kere nya ŋa bu ma nzan, bu du mɔ fa nzan fiefie n ma jama n a ka, na ba nya aba anu abo ni, na bu nya fa bo i yo má fie n ma bu, ama, wɔrɔ, a fa bo i yo fie n aka sin a.”

¹¹ Kabo Yesu maari nzue kaaki nzan ni, nyini tiiri i ciciri su dɛɛ alekutura sa. I yoori nyini sa n Kana, bo i wo Galili awɔrɛ n nu n wɔ, na i kere kabo i la yiko n bo i fite Nyemɛ dɔ, na i susufɔm n ayo i yarada.

¹² Nyini sin, na i ni i ni, ni i niɛmam, ni i susufɔm n akɔ miɛ kpiri n bo bu fere i ka Kapɛnam, na ba kɔ ayo lennyɔ dɔ.

Kabo Yesu fɔɔnri watafɔm fiteeri Nyemɛ Sereebiri Awuru n nu ni

¹³ Wɔ ka kaan na Yudaɔm di bu cɛɛnkpiri n bo bu fere i ka Butara cɛɛnkpiri ni. Na Yesu akɔ Yerusalem miɛ kpiri n nu.

¹⁴ Na wɔ kɔ awura Nyemɛ Sereebiri Awuru n nu aɲu ka mine wo dɔ suto naanim, ni nbɔɛm, ni bumbuku tiwam, na ɲwaa kaakifɔm gusu tana dɔ.

¹⁵ Na wɔ fa nyama aɲɔ i ka ɲgbere dɛɛ su, na wɔ fa afɔn ayi nbɔɛm n ni naanim n kere afite Nyemɛ Sereebiri Awuru n nu. Na wɔ sandi ɲwaa kaakifɔm ɲwaa n kere abutu, na wɔ nya akaaki bu teebirim kere alanlanga.

¹⁶ Na wɔ se minɛm bo bu tɔ bumbuku tiwam n ka, “Am fa am bumbukum n fite fɛn. Má am se ka am fa m Si Nyemɛ Sereebiri Awuru n yo gɔ kun.”

¹⁷ Na i susufɔm n aba atɛɲge su ka ba kere i Nyemɛ Jɔrɛ Kadasi n nu ka, “M Nyemɛ Fɛmɛ, m nyunu aboro u awuru n jɔrɛ su, nyini kún m a.”

¹⁸ Na Yudaɔ nkpiɛnm abisa i ka, “A yó nzu alekutura sa bo i kere ya ka a la atin bo a yo sɔ a?”

¹⁹ Na Yesu ase bu ka, “Am bo fufu ahin Nyemɛ Sereebiri Awuru ni, na lesan afiɛn m káaki ta i bekun.”

²⁰ Na ba se i ka, “Aɔ aburana ni nsen ye bu fa taari ahin Nyemɛ Sereebiri Awuru n a. I yo sɛ ye wɔrɔ ba se ka a káaki ta i lesan afiɛn a?”

²¹ I yo kaanri sɔ ni, i faari i ɲuniɛmbaa ni fa sunsun Nyemɛ Sereebiri Awuru n a.

²² Na sanɲa bo i ba wu tɛɲgeeri i yiwee n nu ni, na i susufɔm n atɛɲge su ka i yo seeri sɔ, na ba de nɔaniɛ n bo ba kere i Nyemɛ Jɔrɛ Kadasi n nu ni, na ba yo Yesu jɔjɔwa n yarada.

Yesu si kabo adamande woowa ti barasu

²³ Sanɲa bo i wo Yerusalem na bu sudi Butara cɛɛnkpiri ni, i yoori alekutura sam, na mine dɔɲgu aɲu i, na ba yo i yarada.

²⁴ Ama, yiri afa má i ɲu agɔ má bu ɲu, dama i si kabo adamande woowa ti.

²⁵ Má pui ti, yiri mmɔɔ ni i tii si kabo adamande ahore su ti barasu, má be se i a.

3

Kabo Yesu kaanri Nyemɛ jɔrɛ kereeri Nikodemo ni

¹⁻² Cɛɛn be kɔɲgue sɔ ɔ, na Yudaɔm kpiɛn be aba Yesu dɔ, bu fere i ka Nikodemo. I ti Farasifɔm ni kun be wɔ. Na wɔ se Yesu ka, “Ya Kerefɔ, ya si ka a ti kerefɔ n bo a fite Nyemɛ dɔ ɔ, dama be koro yo má alekutura sa bo a yo bu ni, má ka Nyemɛ wo i mi dɔ.”

³ Na Yesu ase i ka, “Nahɔrɛ ye m suse u a. Sɔnɔ koro fa má Nyemɛ yo má i fɛmɛ, má ka ba wu i fɔfɔrɛ.”

⁴ Na Nikodemo abisa i ka, “Sɔnɔ nyunu ati, bu yo sɛ koro kaaki wu i fɔfɔrɛ a? I koro kaaki wura i ni kunnu na bu wu i bekun?”

⁵ Na Yesu ase i ka, “Nahɔrɛ ye m suse u a, sɔnɔ koro wura má Nyemɛ fɛmɛya n nu, má ka ba wu i fɔfɔrɛ fa kɔ nzue biɛwa ni Awiewiɛ Cási n dɛɛ atin n su.

⁶ Deke bo adamande awu i, i ti adamande wɔ, na deke bo Awiewie Casi n awu i, i ti awiewie wɔ.

⁷ Má a ma i yo u alekutura fa kɔ kabo ma se u ka wɔ yo daka ka bu wu am fɔfɔre ni.

⁸ Saŋga kere a ti ka aŋuma kpie kɔ ɔ, ye a ti i naŋmie nga a, ama, a si má deke bo i fite, na a kaaki si má deke bo i sukɔ, nyini ti, sɔnɔ kere bo Awiewie Casi n awu i ti sɔ ɔ.”

⁹ Na Nikodemo abisa Yesu ka, “I yo se ye ahin koro yo a?”

¹⁰ Na Yesu akaaki abisa i ka, “Wɔrɔ bo a kere Yisarelifɔm Nyeme nɔanie n na bu nyunu yi u ni, i yo se ye a si má ahin n a?”

¹¹ Nahɔre ye m suse u a, sa bo ya si i, ye ya jɔjɔ i jɔre a, na sa bo ya nyumbaa aŋu i, ye ya di i daani kere minem a, ama, am akete ya daani diiwa ni.

¹² M suse am sam bo bu wo durunya n nu fen wɔ lee, ama, am sude má i, ye m ba seeri am sam bo bu wo Nyeme femeya n nu, am yó se de i a?

¹³ Be nya fun má Nyeme dɔ, má ka mini Adamande Wa n bo m woori i dɔ na ma jura aba ni.

¹⁴ Kabo Moyisi yo faari jawii yoori i ka woo dee su n na i fa i bara yeeri baka n na i yeeri i su kpamaari boro kpantain n nu ni, wɔ yo daka ka sɔ ye minem bá ye mini Adamande Wa n su a.

¹⁵ Na sɔnɔ kere bo i yoori m yarada, i nyá ngɔɔ bo i la má awieeri ni.”

¹⁶ Nyeme akoro durunya n nufɔm agaya n dee ti, na wɔ fa i kunnu Wa kun n kpein n afa ama bu, adena sɔnɔ kere bo i yo i yarada, i mi ká má ngbɛen, ama, i nya ngɔɔ bo i la má awieeri ni.

¹⁷ Nyeme asunma má i Wa n durunya n nu ka i ba di bu jɔre cin bu sui wɔ, ama, wɔ sunma i ka i ba de bu tii ji wɔ.

¹⁸ Sɔnɔ kere bo i daafiiri Nyeme Wa n ŋu, Nyeme dí má i mi n jɔre, ama, sɔnɔ kere bo wɔ da má i ŋu, Nyeme adu mɔ adi i jɔre ka, dama ka wɔ da má Nyeme Wa kun n kpein n ŋu n dee ti.

¹⁹ Kabo Nyeme di bu jɔre n la ka, wein n aba durunya n nufɔm dɔ, ama, bu satie yoowa n dee ti, ba koro awosin n atara wein ni.

²⁰ Sɔnɔ kere bo i yo satie kpɔ wein n wɔ, i koro má ka i kɔ wein n nu, na i satiem fite fɔfoe nu.

²¹ Ama, sɔnɔ kere bo i su nahɔre atin su, i fite fɔfoe nu wɔ, na mine kere ŋu ka i sayoowa n su Nyeme atin n su wɔ.

Kabo Yohane diiri Yesu ŋu daani barasu ni

²² Nyini sin na Yesu ni i susufɔm n ako Yudiya dee awɔre n nu. Na ba kɔ adi lennyɔ dɔ, na i subie minem Nyeme nzue.

²³ Nyini saŋga n na Yohane gusu subie minem Nyeme nzue. I wo Ayinon mie n nu fa dodo Salim awɔre n nu, dama nzue sunnu dɔ n dee ti. Na minem suba i dɔ na i subie bu Nyeme nzue.

²⁴ Nyini saŋga ni, ba nya anyi má Yohane dansaraka.

²⁵ Na Yohane susufɔm ni Yudafɔ be awura akuruwa fa kɔ bu fin kpara n dee yoowa atin su.

²⁶ Na ba kɔ Yohane dɔ ako ase i ka, “Ya Kerefo, nie. Sɔnɔ n bo i yo baari u dɔ Yodan kunma n wie afiiri n na a yo diiri i ŋu daani kereeri mine ni, yiri wo dɔ subie minem Nyeme nzue n a, bu kere sukɔ i dɔ ɔ.”

²⁷ Na Yohane ase bu ka, “Sɔnɔ koro nya má deke be, má ka Nyeme afa nyini deke n ama i.

²⁸ Ambere ni am tii woori m daani ka m ŋa má mini ti Kristo Tiidefo n a, ama, Nyeme sunmaari m ka m du i mɔ ɔ.

²⁹ Bu nya jaari konya, i ti konyafan n dɛɛ wɔ, ama, na konyafan n danfo jina suso i sui ti deke bo konyafan ni jɔjɔ se i, nyini sanɔa na i danfo n ahore jɔ. Nyini ahorejɔ kun ni, wo mini gusu dɔ a.

³⁰ Wɔ yo daka ka i dɛɛ duma n fun, na m dɛɛ n kpɛ su.”

Yiri bo i fite angoro n dɛɛ jɔrɛ

³¹ Yiri bo i fite angoro n tara sɔnɔ kɛrɛ. Na bo i fite durunya n nu fɛn ti durunya n nu fɛn fɔ ɔ, na i jɔjɔwa kɛrɛ ti durunya n nu fɛn jɔrɛ wɔ. Ama, yiri n bo i fite angoro n tara sɔnɔ kɛrɛ.

³² Deke bo wɔ ɲu i, ni bo wɔ ti i, ye i di i daani kɛrɛ minɛ a, ama, be de má i daani diiwa ni.

³³ Ama, sɔnɔ kɛrɛ bo i deeri i daani diiwa n asoro su akere ka Nyɛmɛ ti nahɔrɛfɔ lɛɛ.

³⁴ Dama yiri n bo Nyɛmɛ asunma i ni, Nyɛmɛ nɔaniɛ n ye i kan i a, dama Nyɛmɛ afa i Awiewie Casi n ama i bo i la má anusu.

³⁵ Nyɛmɛ koro i Wa ni, na wɔ fa deke n kɛrɛ awura i saa nu.

³⁶ Na sɔnɔ kɛrɛ bo i daari Nyɛmɛ Wa n ɲu, i la ɲɔɔ bo i la má awieeri ni. Na sɔnɔ kɛrɛ bo i kete i nɔaniɛ ni, i nyá má ɲɔɔ n bo i la má awieeri ni, ama, Nyɛmɛ fá yaa cin i sui.

4

Kabo Yesu seeri Samariyafo bara be i tii su jɔrɛ ni

¹⁻² Tɔ. Na Farasifɔm n ati ka Yesu sunya minɛm dɔngɔ bo bu susu i su na i biɛ bu Nyɛmɛ nzue tara Yohane. Ama, má Yesu ni i tii biɛ bu Nyɛmɛ nzue n a, i susufɔm ni biɛ bu a. Sanɔa bo Yesu faari nu sɔ ni,

³ na wɔ yasu Yudiya awɔrɛ n nu akaaki ka i kɔ Galili dɛɛ awɔrɛ n nu bekun.

⁴ I sukɔ ni, wɔ yo daka ka i fa Samariya dɛɛ awɔrɛ n nu sin a.

⁵ Na wɔ kɔ aju Samariya miɛ kpiri be bo bu fere i ka Suka n su, na i wo dodo asien n bo Jakɔbu yo fa maari i wa Yosefu dawa sanɔa ni.

⁶ Jakɔbu bura n wo nyini dika n nu wɔ. Natiiri fie n dɛɛ ti, na Yesu ako atana bura n su. Nyini sanɔa wie abi kenken.

⁷ Na Samariya bara be aba ka i ba sa nzue, na Yesu ase i ka, “Ma m nzue n be na m nu.”

⁸ Nyini sanɔa ni, i susufɔm n ako miɛ kunnu ka bu kɔ to diire.

⁹ Na bara n ase i ka, “Ee, wɔrɔ, a ti Yudafo e, ye m gusu ti m Samariyafo bara. Nzu ti ye a se m ka m ma u nzue a?” Dama Yudafo ni Samariyafo m tɔ má pui.

¹⁰ Na Yesu ase i ka, “Nzen má a si Nyɛmɛ aceeri ni, na má a si sɔnɔ n bo i susere u nzue ni, má wɔrɔ sere i a, na i má u nzue bo i ma ɲɔɔ ni.”

¹¹ Na bara n ase i ka, “Ya si, bura n wo ɲɔ, u gusu la má goroka, ye a nya nyini nzue n bo i ma ɲɔɔ n ni wɔ?”

¹² Wɔrɔ, ɲka a ɲa a tara ya na Jakɔbu n wɔ, nzen sɛ? Yiri maari ya nyini bura n a. I ni i nbaam fa sanɔa ni i nengendɔrɛm kɛrɛ yo nuuri nyini bura n nu wɔ.”

¹³ Na Yesu ase i ka, “Sɔnɔ kɛrɛ bo i nu ahin nzue ni, nzuehɔɛ tí i mi bekun,

¹⁴ ama, sɔnɔ kɛrɛ bo i nu nzue n bo m má i ni, nzuehɔɛ tí má i mi kun fieo, dama nzue n bo m má i ni, i wó i kunnu tie kabo bura nzue tie n wɔ, na i má i ɲɔɔ bo i la má awieeri ni.”

¹⁵ Na bara n ase i ka, “Ya si, ma m nyini nzue n be na m nu, adena má nzuehɔɛ ti m kun, na má m kaaki ba sa nzue fɛn kun.”

¹⁶ Na Yesu ase i ka, “Kɔ fere u hun na am bra.”

17 Na bara n ase Yesu ka, “M la má hun.” Na Yesu ase i ka, “Kabo a ña a la má hun ni, i ti nahòre wò.”

18 Dama nbiesòm nnu ye a fite bu ajaa bu n a, na haari bo u ni yiri wo bere kisa mmòò ni, i ti má u hun. A se nahòre wò.”

19 Na bara n ase i ka, “Ya si, ma ñu ka a ti Nyeme ñoanié kanfò o.”

20 Ya na Samariyafòm yo suuri Nyeme ahin buka n su wò. Ama, ambere Yudafoñ ña wò yo daka ka sòño kere su Nyeme Yerusalem mie kpiri n nu wò.”

21 Na Yesu ase i ka, “Bara, de bo m suse u ni, sañga suba bo am sú má ya Si Nyeme ahin buka n su, wara Yerusalem mie n nu.”

22 Ambere Samariyafòm ña am su Nyeme wò, ama, am si má i. Ama, yere Yudafoñ si i, ye ya su i a. Dama tiide n fite Yudafoñ dò o.”

23 Sañga suba bo wò ju awie, na bo bu su ya Si Nyeme ni, i Awiewie Casi ni búka bu ye bu sú i ni nahòre su a. Dama nyini minem ñusu ye ya Si Nyeme koro ka bu su i a.

24 Nyeme ti awiewie wò, nyini dæ ti, bo bu su i ni, wò yo daka ka i Awiewie Casi n búka bu na bu sú i ni nahòre su.”

25 Na bara n ase i ka, “Tò, m si ka Kristo Tiidefò ni bá. I ba juuri, i kán ya deke kere kere ya.”

26 Na Yesu ase i ka, “Mini bo m sujòjo u dò ni, mini læ.”

27 Nyini sañga n nu na Yesu susufòm n afite mie n kunnu aju, na jòre n amie bu kabo Yesu ni bara n wo jòjo su ni. Ama, bu be abisa má bara n ka, “A koro nzu i dò a?” Be gusu abisa má Yesu ka, “Nzu ti ye a sujòjo bara n dò a?”

28 Na bara n ayaki i dundu n bere, na wò kpie i nyi ako mie n kunnu ako ase minem ka,

29 “Am ba nie sòño be bo wò se m m tii su sa kere bo ma yo i. Beni, kisa, Kristo Tiidefò n læ fan?”

30 Na minem n afite mie n nu, na bu kò Yesu dò.

31 Bara n kòori n dæ sin, na Yesu susufòm n asere i ka, “Jande, ya Kerefò, di diire.”

32 Na wò se bu ka, “M la diire bo m di bo am si má i.”

33 Na i susufòm n abisa bu ñuñu nu ka, “Be afa diire aba ama i wò di wò, nzen se?”

34 Na wò se bu ka, “M diire n la ka, m yo yiri bo wò sunma m dæ koroowa na m yó i juma n wie.”

35 Na wò bo bu anyunderè ase ka, “Am ña wò ka sara nna na am tambu fiesu nenjem. Ama, mini suse am wò læ, am tu am tii na am nie, fiesu diire n abi ni kpie.”

36 Sòño bo i kpie diire ni, i nya i ñkatò, i ti ka sòño bo i tien mine nòò, na bu nya ñgòò bo i la má awieeri ni, dòfò ni kpiefò n kere nya ahorejo.”

37 Be bu ña ‘Be dò, na be kpie ni,’ i ti nahòre wò.

38 Ambere yiri, mini asunma am a, ka am kò kpie diire n bo am adò má i ni. I ti ka nbem adu mò akan Nyeme ñoanié n akere minem, ye am dæ la ka am ma bu yo m yarada. Nbem dæ jumayoowa ye am sudi i kperè n a.”

39 Bara n seeri minem bo bu fite mie n nu n kabo Yesu ase i tii su sa kere n dæ ti, na Samariyafòm dònju bo bu fite mie n nu n ada Yesu ñu.

40 Nyini ti, bu ba juuri Yesu dò ni, na ba sere i ka i ka bu dò, na wò kò awo bu dò cæn nnyò.

41 Na mine dònju ada i ñu abuka su fa kò i ñoanié jòjòowa n ti.

⁴² Na ba se bara n ka, “Kisa, má u dɛɛ jɔjɔwa n ɲgumi ti ye ya da i ɲu a, ama, yere mmɔɔ ni ya tii ati i nɔanie jɔjɔwa, na ya si nu ka ahin sɔnɔ n ti bo i baari ka i ba de durunya n nufɔm tii wɔ, nahɔre su.”

Kabo Yesu maari fɛmɛ n kpiɛn be wa nyaari laifɛ ni

⁴³ Yesu woori bu dɔ cɛɛn nnyɔ n sin, na wɔ yasu bere ako Galili dɛɛ awɔre n nu.

⁴⁴ Dama yiri mmɔɔ ni i tii adu mɔ akan ka Nyemɛ nɔanie kanfɔ la má jirima i tienɲu bɔsu.

⁴⁵ Saɲga bo i kɔ juuri Galili ni, na ba de i ni bu sa nnyɔ, dama bu yo ɲuuri kabo i yoori alekutura sam cɛɛnkpiri n saɲga, Yerusalem miɛ kpiri n nu ni, dama bere mmɔɔ yo kɔori nyini cɛɛnkpiri n di ti.

⁴⁶ Na Yesu akaaki ako Kana, miɛ kpiri n bo i wo Galili awɔre n nu ni, deke bo i yo maari nzue kaakiiri nzan ni. Fɛmɛ n kpiɛn be woori dɔ. I wa be la má laifɛ, i wo Kapenam miɛ kpiri n nu.

⁴⁷ Na saɲga bo kpiɛn n tiiri ka Yesu afite Yudiya dɛɛ awɔre n nu ako aju Galili ni, na wɔ kɔ Yesu dɔ ako asere i ka i wa suwu, i ma bu kɔ na i kɔ tuntun i, na i nya laifɛ.

⁴⁸ Na Yesu ase i ka, “Ma ɲu ka nzen am aɲu má alekutura sam, am yo má m yarada.”

⁴⁹ Na kpiɛn n ase i ka, “M Mibiɛ, bra ndende, má nyini, a cɛɛri, a bá ɲu ka m wa n awu.”

⁵⁰ Na Yesu ase i ka, “Kɔ. U wa n anya laifɛ.” Na wɔ de Yesu nɔanie ni, na wɔ kaaki ako.

⁵¹ Na saɲga bo i sukɔ awuru ni, na i akɔɔm akpa i atin aba ase i ka, “U wa n anya laifɛ.”

⁵² Na wɔ bisa bu ka, “Saɲga bɔnɔ ye i ɲunie n jɔori a?” Na ba se i ka, “Anuma wiɛsu kerefi kun saɲga ye i ɲunie n jɔori a.”

⁵³ Dɔ na baa n si n atenɲe su ka, nyini saɲga n nu lɛɛ, ye Yesu seeri i ka i wa n anya laifɛ n a. Na i ni i dikafɔm kere ada Yesu ɲu.

⁵⁴ Kabo Yesu ma baa n nyaari laifɛ ni, nyini tiiri i alekutura sa nnyɔ su bo i yoori saɲga bo i fite Yudiya dɛɛ awɔre n nu kɔori Galili n a, na i kere kabo i la yiko n bo i fite Nyemɛ dɔ.

5

Kabo Yesu tuntuunri sɔnɔ be kunma n nɔɔ su ni

¹ Nyini sin na Yesu ako Yerusalem miɛ kpiri n nu na i kɔ di Yudafɔm cɛɛnkpiri be.

² Kunma be da dodoori anɔ n bo bu fa nbɔɛm fa sin wura miɛ n nu ni. Hiburu anie nu bu fere nyini kunma n ka Besata, i la kpatam nnu wɔ.

³ Landurifɔm beberebe dada kpatam n nu, bu nu nbem ti anyinsinm, nbem ti kujandafɔm, na bu nbem gusu ɲunie bukun awu bo bu koro yasu má. [

⁴ Bu da ɲminda dɔ, dama saɲga saɲga Nyemɛ mereke jura ba kunma n nu wɔ, na i ba kankan nzue n nu. Nzue kankanwa n dɛɛ sin, na landurifo n bo i du mɔ juraari nzue n nu, i tukpaki n koro i ti ka sɛ, i yaki wɔ, na i nya laifɛ.]

⁵ Sɔnɔ be woori bu nu bo wɔ da tukpaki i afɔ aburasan ni mɔcɛ lɛɛ.

⁶ Yesu ɲuuri i sɔ ni, na wɔ fa nu ka sɔnɔ n tukpaki n ace i ɲu, na wɔ bisa i ka, “A koro ka a nya laifɛ wɔ?”

⁷ Na tukpakifo n ase Yesu ka, “M Mibiɛ, m la má bukafɔ be bo nzue n nya ba kankan, na i kuku m wura nu. Saɲga kere bo nzue n nya ba kankan, na m ba ɲa m wura nu, a ɲu ka be adu m mɔ.”

⁸ Na Yesu ase i ka, “Yasu, fa u dasu n na a nati.”

⁹ Jinaabiri n nu bere na sono n anya laifie, na wo yasu afa i dasu n sunati. Nyini ceen n bo Yesu tuntuunri sono n ti Nnumiyi ceen wo.

¹⁰ Nyini ti na Yudafo nkpienkpienm n ase sono n bo wo nya laifie n ka, “Nyuma ti Nnumiyi ceen wo. Ya dee atin n su, atin wo ma nu bo a so u dasu ni.”

¹¹ Na wo se bu ka, “Sono n bo i tuntuunri m ni, yiri seeri m ka m fa m dasu na m nati a.”

¹² Na ba bisa i ka, “Nyini sono n la nma a, ye i seeri u ka a fa u dasu nati a?”

¹³ Ama, na sono n bo wo nya laifie n akoro asi ma i mi n bo i tuntuunri i ni, dama Yesu awura jama n nu ako.

¹⁴ Nyini sin na Yesu aba anu i, Nyeme Sereebiri Awuru n nu, na wo se i ka, “Ti fen. Kisa a nya laifie, ma a yo satie kun. Ma nyini, a di wahara bo i tara nyini n nusu.”

¹⁵ Na sono n ako ase Yudafo nkpienkpienm ni ka Yesu tuntuunri i a.

¹⁶ Nyini ti, na ba kere Yesu wuwuruwa, dama wo tuntun sono Nnumiyi ceen n dee ti.

¹⁷ Na wo se bu ka, “M Si toko yo juma haari ba ju ni nyuma, nyini ti ye m gusu yo a.”

¹⁸ Yesu jɔjɔri so n dee ti, na Yudafo nkpienkpienm n aboro bu nyi abuka su ka bu kun i. Ma ka bo wo saaki Nnumiyi ceen n ciire n ngumi dee ti, ye bu kpi ka bu kun i a, ama, bo wo kaaki ase ka Nyeme ti i Si n dee ti. Nyini kere ka wo fa i nu abu Nyeme wo lee.

Kabo Yesu yiko ti barasu ni

¹⁹ Na Yesu ase bu ka, “Nahore ye m suse am a, mini Nyeme Wa n ni m tii, m koro bo ma m tieenu yo ma pui, ma ka deke bo m nu ka m Si yo i ni, ye mini gusu yo i a.

²⁰ Dama m Si Nyeme koro mini i Wa ni, na i sukere m deke kere bo i yo i ni, na i ba kere m sakpakpam bo m yo bu tara so, na i yo am alekutura.

²¹ Kabo m Si Nyeme ye minem bo ba wu n su n na i ma bu ngoo ni, so ye mini gusu ma minem bo ma yi bu ni ngoo a.

²² Dama m Si Nyeme ni i tii di ma be jore, ama, wo fa joredi atin kere ama mini i Wa n wo,

²³ adena sono kere bu m kabo bu bu m Si ni. Sono kere bo i bu ma m, i mi abu ma m Si bo wo sunma m n lee.

²⁴ Nahore ye m suse am a, sono kere bo i ti m noanie n na i de i, na i da Nyeme bo wo sunma m n nu, i mi la ngoo bo i la ma awieeri, na m di ma i mi jore. I mi afite yiwee nu anya ngoo lee.

²⁵ Nahore ye m kaaki suse am a, ka sangga suba bo wo ju awie, na mine bo ba wu ni ti mini Nyeme Wa n noanie ni, na bo bu tiiri i na bu deer i, bu nya ngoo.

²⁶ Dama kabo ngoo fite yiri m Si Nyeme do ni, so ye wo ma mini i Wa n gusu yiko ka m ma minem ngoo a,

²⁷ na wo kaaki ama m atin ka m di mine jore, dama m ti Adamande Wa a.

²⁸ Ma am ma ahin jɔjɔwam n yo am alekutura. Sangga suba bo mine bo ba wu n kere ti m noanie ni,

²⁹ na bu tenge bu yiwee n nu. Minem bo bu yo yoori sakpa ni, bu tenge na bu nya ngoo bo i la ma awieeri, na minem bo bu gusu yo yoori satie ni, bu tenge na bu nya suicin.”

Sam bo bu di Yesu nu daani ni

³⁰ Na Yesu asa su ase ka, “M koro bo má m tiɛnu yo má pui. Kabo Nyeme se m ni, so ye m di minem jɔɛ a. Nyini ti, m jɔɛ diiwa n ti nahɔɛ wɔ, dama m yo má m dɛɛ koroowa, ama, m yo yiri n bo wɔ sunma m n dɛɛ koroowa a.

³¹ Nzen m di m ɲu daani kere am, am de má ka i ti nahɔɛ,

³² ama, be wo bɛɛ bo i di m ɲu daani. Yiri la m Si Nyeme. Na m si ka i daani diiwa n ti nahɔɛ wɔ.

³³ Am yo sunmaari minem Yohane dɔ, na wɔ se am nahɔɛ, kabo m ti barasu.

³⁴ M de má adamande daani diiwa, ama, m kan kabo Yohane seeri am ni, adena am nya am tii.

³⁵ Yohane yo ti ka fitana bo i je na i ta a, na amɛɛ ayo asoro su ka am wo i wein nu ni ahorejɔ fa kɔ sanɔa su.

³⁶ Ama, m la deke bo i di m ɲu daani bo i tara Yohane dɛɛ ni, yiri la sam bo m Si Nyeme akere m ka m yo bu wie ni. Nyini sam ni di m ɲu daani ka m Si asunma m a.

³⁷ Na m Si bo wɔ sunma m ni, yiri gusu adi m ɲu daani a. Am nya ti má i konvi, am kaaki nya ɲu má i kabo i ti barasu,

³⁸ na i nɔaniɛ wo má am ahore su, dama wɔ sunma m am dɔ, na am ada má m ɲu.

³⁹ Am kan Nyeme Jɔɛ Kadasi n wɔ, na am fiiti i nu, dama am sunsun ka nyini kere am atin bo am fa na am nya ɲɔɔ bo i la má awieeri a, ama, nyini kerɛɛwam nu di m ɲu daani a.

⁴⁰ Haari ni nyini n mmɔɔ am akete ka am ba má m dɔ na am ba nya ɲɔɔ.

⁴¹ M koro má kansii adamande dɔ.

⁴² M si am sa, na m si ka, Nyeme dɛɛ koro n wo má am ahore su.

⁴³ Mini ade m Si jinaabiri aba, ye am ade má m, ama, nzen be baari ni i tienɔa ba, am dé yiri wɔ.

⁴⁴ Amɛɛ, am koro am ɲuɲu nu kansii wɔ, na bu susu am, ama, am koro má kansii yiri n ɲgumi bo i ti Nyeme n dɔ, nyini ti, i yo sɛ ye am koro da m ɲu a?

⁴⁵ Má am sunsun ka mini kó jaraki am m Si Nyeme dɔ a. Am jarakifo la Moyisi, bo am la tama ka yiri búka am ni.

⁴⁶ Moyisi yo kerɛɛri m ɲusu jɔɛ wɔ. Nyini ti, nzen má am de i nɔaniɛ ni, má am de m gusu dɛɛ ni.

⁴⁷ Ama, am ade má kabo i yo kerɛɛri i ni, i yó sɛ ye am koro de bo m suse am n a?”

6

Kabo Yesu maari nbiɛɔm akpii nnu ni bu minem diire ni

¹ Nyini sin, na Yesu akpiɛ ako Galili kunma kpiri n bo bu kaaki fere i ka Tiberiya n bukun dɔ.

²⁻⁴ Nyini sanɔa, wɔ ka kaan, na Yudaɔm di bu Butara cɛɛnkpiri ni. Na jama beberebe asu i su, dama ba ɲu kabo wɔ yo alekutura sam atuntun tukpakifo na ba nya laifii ni. Na Yesu ni i susufɔm n afun ako atana buka be su.

⁵ Na Yesu atu i tii aniɛ anu ka jama beberebe suba i dɔ, na wɔ bisa Filipu ka, “Ya nya diire nifansu wɔ, na ya to ma ahin minem kere a?”

⁶ Yiri mmɔɔ ni i tii si kabo i yó barasu, ama, i subo Filipu kunnu na i niɛ wɔ.

⁷ Na Filipu ase i ka, “Haari nzen ya faari ɲwaa beberebe toori diire maari bu, i jú má bo bu kere koro nya kan kan dí.”

⁸ Na i susufom kun bo bu fere i ka Andere, na i goro la Simon Petoro n ase Yesu ka,

⁹ “Gbefene kaan be wo ya nu fen, i bita kpono nnu ni jombaa nnyo, ama, i koro ju ma ahin minem kere.”

¹⁰ Wura mone sunnu bere, na Yesu ase i susufom ka, “Am ma minem kere tantana wura n su.” Na ba ma minem kere atantana. Nbiesom ngumi ko yasuri mine akpii nnu wo.

¹¹ Na Yesu afa kpono n na wo da Nyeme asi, na wo kpakpaaki i nu ama minem bo bu tantana ni, na wo kaaki afa jombaa n ayo i so, na bu kere anya kabo bu koro.

¹² Bu kere diiri na bu kunnu yiiri ni, na wo se i susufom n ka, “Am tientien sinsin n bo ba di i na wo ka n noo. Ma am ma be ka ngbeen.”

¹³ Na ba tientien kpono sinsin n bo ba di i na wo ka n noo, na wo yi kandie buru ni nnyo.

¹⁴ Minem n nuuri nyini alekutura sa n bo Yesu yoori ni, na ba se ka, “Nahore, ahin sono n ti Nyeme noanie kanfo n bo bu seeri ka i ba durunya n nu n a.”

¹⁵ Yesu faari nu ka bu koro ka bu tara i fanga, na bu fa i yo bu feme n dee ti, na wo yasu afite bu nu yiri ngumi, ako buka n su.

Kabo Yesu natiiri nzue su ni

¹⁶ I naaso sanja, na Yesu susufom n ajura ako kunma kpiri n nu,

¹⁷ na ba ko awura lee nu ka bu kaaki kpie ko Kapenam mie kpiri n nu. Ale aba asan kere, na Yesu nya ba ma bu do,

¹⁸ na anuma sukpie fanga su, na nzue nyama gusu suyasu.

¹⁹ Nyini sanja ni, i susufom n wo nzue n su ako aju kunma kpiri n afien, na ba nu Yesu ka i nati nzue n su suba dodo lee ni, na sere ati bu.

²⁰ Na Yesu ase bu ka, “Mini a, ma am ma sere ti am.”

²¹ Na ba ma wo wura lee n nu. Jinaabiri n nu bere, na ba ju deke bo bu suko ni.

Kabo jama n sunienie Yesu busu ni

²² Alecina jama n bo bu kaari kunma kpiri n buekun do n afa nu ka lee kun n kpein woori kunma n su anuma n a. Na ba si nu ka Yesu susufom n ngumi wuraari lee n nu kori a, ama, yiri mmoo ni i tii awura ma nu.

²³ Na lee nbem afite mie n bo bu fere i ka Tiberiya n aba aju kunma n noo su, fa dodo deke bo Yesu sereeri Nyeme gori kpono n su maari minem na bu diiri ni.

²⁴ Na jama n anie, ba nu ma Yesu ni i susufom n bere, nyini ti, na ba wura leem n nu ako Kapenam ko sunienie Yesu busu.

Kabo Yesu na yiri ti diire n bo i ma ngoo n a

²⁵ Minem n ko nuuri Yesu kunma kpiri n buekun do ni, na ba bisa i ka, “Ya Kerefo, sanja bono ye a baari fen a?”

²⁶ Na wo se bu ka, “Nahore ye m suse am n a, ma alekutura sam bo m yoori bu n ti ye am sunienie m busu a, ama, kabo m maari am diire na am kunnu ayi n dee ti a.

²⁷ Ma am ma am nyunu boro diire bo i saaki n busu, ama, am ma am nyunu boro diire bo i wie ma, na i ma ngoo bo i la ma awieeri n busu. Mini Adamande Wa ni ma am nyini diire n a, dama mini ngumi, ye m Si Nyeme ase m nyaari akere ka m ti i dee a.”

²⁸ Na ba bisa i ka, “Ya yo se koro yo juma n bo Nyeme koro ka ya yo i n a?”

29 Na Yesu abo bu nu ka, “Juma n bo Nyeme koro ka am yo i n la ka, am yo mini bo wo sunma m yarada.”

30 Na ba bisa i ka, “Ye a yo nzu alekutura sa kere ya, na ya nu i na ya yo u yarada? A yo sa bono o?”

31 Dama sangha bo ya nam yo woori boro kpantain nu ni, bu diiri diire be bo bu fere i ka *mana* n wo. Kabo ba kere i Nyeme Jore Kadasi n nu lee, ka yiri maari bu diire n bo i fite angoro ye bu diiri a.”

32 Na Yesu ase bu ka, “Nahore ye m suse am n a, ma Moyisi yo maari nyini diire n bo i fite angoro n a, ama, m Si Nyeme maari am diire n bo i fite angoro nahore su a.”

33 Dama diire n bo Nyeme ma n la bo i fite angoro, na i ba ma durunya n nufom ngoo ni.”

34 Na ba se i ka, “Ya Mibie, nka a ma ya nyini diire n sangha kere.”

35 Na Yesu ase bu ka, “Mini ti diire n bo i ma ngoo n a. Sono kere bo i ba m do, ahoe ti ma i mi, na sono kere bo i yo m yarada, nzuehoe ti ma i mi kun.

36 Ama, ma se am, haari ni bo am anu m n kere, am suyo ma m yarada.

37 Sono kere bo m Si fa i maari m, i ba m do, na woro kere bo a ba m do, m kete ma u fieo.

38 Dama ma fite ma angoro aba ma ka m ba yo m dee koroowa, ama, m baari ka m ba yo Nyeme bo wo sunma m dee koroowa a.

39 Yiri n bo wo sunma m dee koroowa la ka, minem kere bo wo fa ama m ni, ma m ma bu be mmoo mini, ama, i koro ka m tenge bu kere jina ceen na bu nya ngoo.

40 Dama m Si koroowa la ka, sono kere bo i nu mini i Wa n na i yo m yarada, i mi nya ngoo bo i la ma awieeri, na m tenge i jina ceen.”

41 I seeri ka yiri ti diire n bo wo fite angoro aba n dee ti, na minem ni sununuti i.

42 Na ba se ka, “Ma Yosefu wa Yesu n lee? Ya si i si ni i ni kere e. Ye i baari se, ye i na i fiteeri angoro baari a?”

43 Na Yesu ase bu ka, “Ma am nunuti am nunu nu.

44 Be koro ba ma m do, ma ka m Si Nyeme bo wo sunma m ni, acin i mi adodo m, na m tenge i mi jina ceen.

45 Kabo Nyeme noanie kanfom yo kereeri lee, ka, ‘Nyeme kere sono kere nyaari a.’ Na sono kere bo i ti Nyeme kereewa n na i siiri nu, i mi ba m do.

46 Nyini kere ma ka be adu mo anu Nyeme wo lee, ma ka mini ngumi bo m fite m Si Nyeme do n anu i a.

47 Nahore ye m suse am n a, ka sono kere bo i yo m yarada, i la ngoo bo i la ma awieeri.

48 Mini ti diire n bo i ma ngoo n a.

49 Am nam yo diiri diire n bo bu fere i ka *mana* n boro kpantain nu, ama, na ba wu.

50 Ama, ahin diire n ti diire barasu be bo i fite angoro wo, na sono kere bo i diiri i, i wu ma.

51 Mini ti diire n bo wo fite angoro aba, na i ma ngoo n a. Sono kere bo i di ahin diire ni, i nya ngoo bo i la ma awieeri. Diire n bo m ma n la m nuniebaa ni, bo m fa ma durunya n nufom, na bu nya ngoo ni.”

52 Yesu seeri so ni, na yaa ati bu, na bu suse akuruwa bu nunu nu ka, “Ahin sono ni yo se koro fa i nuni ma ya na ya di a?”

⁵³ Na Yesu ase bu ka, “Nahore ye m suse am n a, má ka am di mini Adamande Wa n ηuniembaa ni, na am nu m dεε mbunja ni, ambere ni am tii la má ηgɔɔ n bo i la má awieeri ni.

⁵⁴ Sɔnɔ kere bo i di m dεε ηuniembaa ni, na i nu m mbunja ni, i mi la ηgɔɔ n bo i la má awieeri ni, na m tɛnge i mi jina cɛen.

⁵⁵ Dama m dεε ηuniembaa ni, ti deke bo i ti diire nahore su a, na m mbunja n ti deke bo i ti nuuwa nahore su a.

⁵⁶ Sɔnɔ kere bo i di m dεε ηuniembaa ni, na i nu m mbunja ni, i mi wo ni mini, na mini gusu wo ni yiri lεε.

⁵⁷ Yiri m Si bo i ma ηgɔɔ ni sunmaari m a, i dεε ti, ye m la ηgɔɔ a, so ye sɔnɔ kere bo i di m ηuniembaa ni, mini dεε ti, ye i nyá ηgɔɔ a.

⁵⁸ Ahin ni ti diire n bo wɔ fite angoro aba n a, i ti má ka diire n bo am nam yo diiri na i sin na bu wuuri ni. Sɔnɔ kere bo i di ahin diire ni, i nyá ηgɔɔ n bo i la má awieeri.”

⁵⁹ Yesu kereeri nyini kereewa n kere sanja bo i wo Kapenam bu tientien-bunɔɔ sɔɔ nu n wɔ.

Kabo Petoro seeri ka Yesu ti sɔnɔ bo i ma ηgɔɔ n bo i la má awieeri n a

⁶⁰ Yesu susufɔm dɔnggu tiiri i jɔjɔɔwa n sɔ ni, na ba se ka, “Ahin kereewa n ti kekereke. Njma koro de i a?”

⁶¹ Na Yesu afa nu ka bu sunɔnɔti fa kɔ i kereewa n su, na wɔ se bu ka, “Ahin jɔjɔɔwa n dεε ti ye am koro ka am kaaki am sin n a?”

⁶² Ye nzen má am ηu ka mini Adamande Wa n sukaaki sufun kɔ angoro, deke bo m fite baari ni, má am se se wɔ lεε?

⁶³ Awiewie Casi ni ma mine ηgɔɔ a. Adamande yiko be koro ma má ηgɔɔ. Nɔanie n bo ma jɔjɔ akere am ni, yiri ma am nya Awiewie Casi n bo i ma ηgɔɔ n a.

⁶⁴ Ama, am be n mmɔɔ ada má m ηu.” Má pui ti, fite sanja bo Yesu boori i juma n bu ni, ye i si bo bu yo má i yarada n a, ni sɔnɔ n bo i bá tɔ i ni.

⁶⁵ Na wɔ se bu ka, “Nyini dεε ti ye ma se am ka be wo má bere bo i koro ba m dɔ, má ka m Si ama atin ka i mi yo m susufɔ.”

⁶⁶ I seeri sɔ n sin, na i susufɔm dɔnggu akaaki ayaki i ka bu su má i su kun.

⁶⁷ Na wɔ bisa i susufɔ buru ni nnyɔm ni ka, “Ambere gusu koro ka am kaaki yaki m wɔ fan?”

⁶⁸ Na Simon Petoro abɔ i nu ka, “M Mibiε, ya kó ηma dɔ a? Wɔrɔ ti sɔnɔ n bo i la nɔanie n bo i ma ηgɔɔ n bo i la má awieeri n a.

⁶⁹ Ye ya yo u yarada, na ya si ka wɔrɔ ti sɔnɔ casi n bo a fite Nyeme dɔ n a.”

⁷⁰ Na Yesu abɔ nu ka, “M ηa am buru ni nnyɔ ye m yiiri am e, má sɔ? Ama, am nu kun ti Sitana sɔnɔ ɔ.”

⁷¹ I jɔjɔ niiri Yudasi wɔ, Simon Isikariyoti wa ni. Yiri Yudasi tiiri buru ni nnyɔm ni kun wɔ, ama, yiri bá tɔ Yesu n a.

7

Kabo Yesu ni i niemam boori anzama barasu ni

¹ Nyini sin na Yesu afa Galili awɔre n nu subara ye, wɔ koro má ka i kɔ Yudiya dεε awɔre n nu, dama Yudafɔm nkpienkpienm koro ka bu kun i wɔ.

² Nyini sanja, wɔ ka kaan na Yudafɔm di bu cɛenkpiri be bo bu fere i ka Nambue Bo cɛenkpiri ni.

³ Na Yesu niemam ase i ka, “Fite ahin awɔre n nu na a kɔ Yudiya, adena u susufɔm gusu kɔ ɲu sam bo a yo bu ni.

⁴ Dama sɔnɔ kere bo i koro ka mine si kabo i ti barasu, i fa má i sayoowa fie má minem sin, nzen a yo alekutura sam wɔ, ma durunya n nufɔm kere si u sa.”

⁵ I niemam n mmɔɔ ayo má i yarada, nyini ti ye bu seeri sɔ n a.

⁶ Na Yesu ase bu ka, “M sanɣa nya ju má, ama, amɛre yiri, sanɣa kere bo am koro, am kɔ ɔ.

⁷ Amɛre ye durunya n nufɔm koro kpɔ má am a, ama, bu kpɔ mini wɔ, dama m se bu wɔ, ka bu sayoowam ti má kpa.

⁸ Am kɔ cɛnkpiri n di, m kɔ má, dama m sanɣa nya ju má.”

⁹ I seeri bu sɔ ni, na wɔ ka Galili dɔ lee nnyɔ.

Kabo Yesu kɔ diiri Nambue Bo cɛnkpiri ni

¹⁰ I niemam kɔri ka bu kɔ di cɛnkpiri ni, na Yesu gusu aba asa bu su, ama, wɔ yi má i ɲu fofoe nu, i fie kɔri a.

¹¹ Na Yudaɔm nkpienkpienm ni sunienie i, na ba bisa ka, “Ye i wo ni wɔ?”

¹² Na jama n sutu asuturi bu benɣu dɔ i busu. Nbem ɲa, “I ti sɔnɔ kpa a.” Ye nbem gusu ɲa, “Ai, i dadaka minem wɔ.”

¹³ Ama, be akoro akan má i jɔre fofoe nu, dama bu kere soro Yudaɔm nkpienkpienm n wɔ.

¹⁴ Sanɣa bo ba di cɛnkpiri n akɔ aju afien ni, na Yesu akɔ awura Nyeme Sereebiri Awuru n nu, sukere minem.

¹⁵ Na Yudaɔm nkpienkpienm n ayo alekutura, na ba bisa ka, “I yo se ye ahin sɔnɔ n la nyini si n ɲusu sɔ a, bo be akere má i a?”

¹⁶ Na Yesu ase bu ka, “Deke bo m fa kere am ni, i ti má m tienɣu kereewa, ama, m Si Nyeme bo wɔ sunma m ni, yiri kere m kabo m kere a.

¹⁷ Sɔnɔ kere bo i ɲa i yó Nyeme koroowa ni, ye i sí kabo m kereewa n ti a, nzen m kereewa n fite Nyeme dɔ, wara m tienɣu kereewa.

¹⁸ Sɔnɔ kere bo i jɔjɔ i koroyanu, i mi koro ka bu kansi i wɔ, ama, bo i koro ka bu kansi sɔnɔ bo i sunma i ni, nyini sɔnɔ ni jɔjɔ nahɔre a, na kore be wo má i ɲu.

¹⁹ M ɲa Moyisi yo maari am Nyeme nɔanie kpamaawa n a, má sɔ? Ama, am be n mmɔɔ su má i atin su. Ye nzu ti ye am koro ka am kun m a?”

²⁰ Na jama n ase i ka, “Ajini wo u ɲu. Nma koro ka i kun u a?”

²¹ Na Yesu ase bu ka, “Sa kun be lee, ye ma yo i n a, ye wɔ yo am kere alekutura n a.

²² Moyisi yo maari am nɔɔ ka am wura am nbaabiesɔm kenkenne lemɔcɛ cɛen, nzen haari i tɔ Njumiya cɛen n mmɔɔ, am yo i, ama, má Moyisi yo boori i bu ka bu wura kenkenne n a, am nam yo boori i bu a.

²³ Am wura nbaabiesɔm kenkenne Njumiya cɛen wɔ, adena má am bu nɔanie kpamaawa n bo Nyeme fa maari Moyisi ni ngbeen, ye nzen ma tuntun sɔnɔ mɔmɔ kun Njumiya cɛen n na wɔ nya laifie, nzu ti ye am afa yaa m ɲu a?

²⁴ Má am nie sɔnɔ nyunu dika na am di i jɔre, ama, am si i wo nahɔre su, na am nya di i jɔre.”

Kabo minem bisaari ka Yesu ti Kristo Tiideɔ n a

²⁵ Yesu seeri sɔ ni, na Yerusalemɔm nbem abisa bu ɲuɲu nu ka, “Má ahin sɔnɔ n ye Yudaɔm nkpienkpienm koro ka bu kun i n a?”

²⁶ Am nie e. Wɔ yi i ɲu fofoe nu ye i jɔjɔ a. Be suse má i pui mmɔɔ. Beni, Yudaɔm nkpienkpienm asi ka yiri ti Kristo Tiideɔ n nahɔre su n a.

27 Ama, saŋga bo Kristo Tiidefo n ba baari, be sí má deke bo i fite. Ahin sɔnɔ n yiri, ya si deke bo i fite.”

28 Na saŋga bo Yesu sukere Nyeme Sereebiri Awuru n nu ni, na wɔ tien faŋga su ase ka, “Am sunsun ka am si m nahɔre su, nzen se? Ye am si deke bo m fite? Ma ba má ni m deɛ yiko nu wɔ. Yiri n bo wɔ sunma m ni ti nahɔrefo a, ama, am si má i.

29 Mini si i a, dama m fite i dɔ ɔ, yiri sunmaari m a.”

30 Nyini ti, na ba kpi ka bu tara i, ama, be afa má i saa akan má i, dama i saŋga nya ju má.

31 Na jama n dɔŋgu ayo i yarada, na ba se ka, “Saŋga bo Kristo Tiidefo n ba baari, i yó alekutura sam tara ahin sɔnɔ n wɔ, nzen se?”

Kabo bu sunmaari tintinijinafɔm ka bu kɔ tara Yesu ni

32 Na Farasifɔm n ati kabo jama n sutu asuturi sukan Yesu jɔre, na bu ni Nyeme sayoowa dɔŋguyofɔ nkpienkpienm n asunma tintinijinafɔm ka bu kɔ tara i.

33 Na wɔ se ka, “M wó am dɔ saŋga kaan, na m nya bá kɔ yiri n bo i sunmaari m n dɔ.

34 Am bá nienie m busu, na am nju má m. Deke bo m bá wo ni, am koro kɔ má dɔ.”

35 Na Yudafo nkpienkpienm n abisa bu nju nu ka, “Yiri koro ka i ko ni wɔ, ye yere koro nju má i a? I kó ya minem dɔ ɔ, bo ba sandi awura Girikifɔm asien su ni, na i kó kere Girikifɔm ni Nyeme jɔre ni, nzen se a?”

36 I na se wɔ lɛɛ? Bo i na ya bá nienie i busu na ya nju má i ni, na bekun, deke bo i sukɔ ni, ya koro kɔ má dɔ.”

Kabo sɔnɔ bo i yo Yesu yarada nya nzue n bo i ma ngɔɔ ni

37 Cɛenkpiri n awieeri cɛen n ti cɛenkpiri n tii a. Nyini cɛen n na Yesu ayasu ajina, na wɔ tien faŋga su ase ka, “Sɔnɔ kere bo nzuehɔe ati i, i mi bra m dɔ na i ba nu.

38 Dama ba kere i Nyeme Jɔre Kadasi n nu ka, sɔnɔ kere bo i yo m yarada, ‘Nzuetin bo i ma ngɔɔ ni, i sɔŋgi fite i mi ahorembaa su a.’ ”

39 Yesu jɔjɔ niiri Awiewie Casi n wɔ, ka sɔnɔ kere bo i yo yiri Yesu yarada nya Awiewie Casi ni. Nyini saŋga ni, Nyeme nya fa má i Awiewie Casi n ma má, dama wɔ nya wura má Yesu kpiri.

Kabo Yesu deɛ ti, na jama n nɔɔ woori bu ngungumi ni

40 Na jama n nu mine nbem tiiri kabo i seeri sɔ ni, na ba se ka, “Ahin sɔnɔ n ti Nyeme nɔanie kanfo n wɔ nahɔre su.”

41 Na nbem ase ka, “Yiri ti Kristo Tiidefo n a.” Ama, na nbem gusu ase ka, “Kristo Tiidefo ni fite má Galili da.

42 Ba kere i Nyeme Jɔre Kadasi n nu ka Kristo Tiidefo ni yó Feme Davidi anuma a, na bu wú i Betlehem, Feme Davidi bosu wɔ.”

43 Yesu deɛ ti, na jama n nɔɔ awo bu ngungumi,

44 na nbem akoro ka bu tara i, ama, be afa má i saa akan má i.

Kabo Yudafo nkpienkpienm ayo má Yesu yarada ni

45 Na tintinijinafɔm n akpie bu nyi ako Nyeme sayoowa dɔŋguyofɔm ni, ni Farasifɔm n dɔ, na ba bisa bu ka, “Nzu ti ye am afa má i aba má?”

46 Na tintinijinafɔm n abɔ bu nu ka, “Be nya koro jɔjɔ má kabo nyini sɔnɔ n jɔjɔ ni.”

47 Na Farasifɔm n abisa bu ka, “Wɔ daka ambere gusu wɔ fan?”

48 Am nya ti ka Yudafo nkpienkpienm wara Farasifɔm n be ayo i yarada a?

⁴⁹ Ama, ahin jama n si má Nyeme noanie kpamaawa ni, nyini ti, Nyeme ayo bu ngbeen.”

⁵⁰ Na Nikodemo bo i ti Farasifom kun n na i yo ko nyuri Yesu ni, ase bu ka,

⁵¹ “Ya dee atin n su, kana ya ba di sono jore jara i, ma ka ya bisa i na ya ti sa bo wo yo i n ka.”

⁵² Na ba bisa i ka, “Woro n mmoo fite Galili wo? Kan Nyeme Jore Kadasi n na a nie. A nyu ma ka Nyeme noanie kanfo n be mmoo fite Galili.”

[
⁵³ Bu se so wieeri ni, na bu kere asandi ako awuru.

8

¹ Na Yesu ako buka n bo bu fere i ka Oliva Buka n su, dama oliva bakam go su wo.

Bara ajaafɔ n bo i saakiiri ajaa ciire n jore

² Alecin ngarama fuun na Yesu akaaki ako Nyeme Sereebiri Awuru n nu. Na jama n kere aba atien bu noo i do. Na wo tana sukere bu Nyeme noanie.

³ Na Nyeme noanie kerefom, ni Farasifom nbem afa bara ajaafɔ be bo bu ko taraari i ka i ni bieso da, na ba fa i ajina bu afien.

⁴ Na ba se Yesu ka, “Ya Kerefo, ya ko atara ahin bara n ka i susaaki ajaa ciire wo.

⁵ Noanie kpamaawa n bo Nyeme fa maari Moyisi n kere ka, nyini nbaram nyusu so, ya tu bu yabue bo kun bu. Nyini ti, ye woro na se?”

⁶ Bu seeri so n na bu so i nge, na bu jara i wo. Na Yesu abiri i tii asienngu sufa i saa maraka sukere asienngu.

⁷ Bu wo i bisa n su ni, na wo ye i tii su ase bu ka, “Bo i na wo nya yo ma satie am nu, ma i mi du mo tu i yabue.”

⁸ Na wo kaaki abiri i tii sukere asienngu.

⁹ Bu tiiri so ni, na bu kere aloroki kun kun ako. Nkpienm ni du mo a. Na wo ka Yesu ni bara ni ngumi.

¹⁰ Na Yesu aye i tii su, na wo bisa bara n ka, “Bara, bu wo ni? Be ase ma ka i ti ye ni ka bu kun u, nzen se?”

¹¹ Na bara n abo i nu ka, “Ai, m Mibie, be ase ma ka i kun m.” Na Yesu ase i ka, “Mini mmoo se ma ka be kun u. Ko, ama, ma a yo satie kun.”]

Kabo Yesu na yiri ti durunya n nufom wein n ni

¹² Na Yesu akaaki ase jama n ka, “Mini ti durunya n nufom wein a. Bo i su m su kere wo ma awosin nu kun, ama, i nya wein bo i ma ngoo ni.”

¹³ Na Farasifom n ase i ka, “Woro, a sudi u nyu daani wo, be de ma u daani n ka i ti nahore.”

¹⁴ Na Yesu ase bu ka, “Haari nzen m di m nyu daani n mmoo, m daani diiwa n ti nahore wo, dama m si deke n bo m fite baari, na m kaaki si deke bo m sukoo ni. Ama, ambere, am si ma deke bo m fite, na am kaaki si ma deke bo m sukoo n gusu.

¹⁵ Ambere, am di jore kabo durunya n nufom di bu bengum jore n wo, ama, mini ni m tii, m di ma be jore.

¹⁶ Ama, haari nzen m di mine jore n mmoo, m jore diiwa n ti nahore wo, dama ma mini ngumi di minem jore a, ama, mini ni m Si bo i sunmaari m ni di a.

¹⁷ Ba kere am Nyeme noanie kpamaawa n nu ka, nzen mine nnyo daani diiwa yo kun, nyini la ka i ti nahore wo lee.

18 Mini ni m tii di m ηu daani a, na m Si bo wɔ sunma m gusu di m daani.”

19 Na ba bisa i ka, “U si wo ni?” Na wɔ bo bu nu ka, “Am si má m ni m Si n be n mmɔɔ. Nzen má am si mini, má am si m Si n mmɔɔ.”

20 Saŋga bo Yesu seeri sɔ ni, i wo minem kere su Nyeme Sereebiri Awuru n nu, fa dodo deke bo bu yi bu saraka ηwaa fa ma Nyeme n wɔ. Ama, be akoro atara má i, dama i saŋga nya ju má.

Kabo Yesu seeri ka i fite má durunya n nu fen ni

21 Na Yesu akaaki ase bu ka, “M bá kɔ yaki am, na am bá nienie m busu, ama, am ηú má m, na am bá wu ni am satie ni. Deke bo m sukɔ ni, am koro kɔ má dɔ.”

22 Na Yudafoɔm n abisa ka, “I ηa deke bo i sukɔ ni, ya koro kɔ má dɔ. Nyini la ka, i kún i ηu wɔ lɛɛ, nzen se a?”

23 Na wɔ se bu ka, “Amberɛ fite durunya n nu fen wɔ, ama, mini fite aŋgoro wɔ. Amberɛ ti durunya n nu fen foɔm wɔ, ama, mini fite má durunya n nu fen.

24 Nyini ti ye ma se am ka, am wú ni am satie n a, dama nzen am yo má m yarada ka mini la sɔnɔhɔre n bo m se am ka m ti ni, am wú ni am satie n wɔ.”

25 Na ba bisa i ka, “Ye wɔrɔ la ηma a?” Na Yesu ase bu ka, “Kabo m se am saŋga kere ni, m ti sɔ ɔ.

26 M la sa dɔŋgu bo m jɔjɔ fa kɔ am dɔ, na m la sa dɔŋgu bo m fa di am jɔre jaraki am, ama, yiri bo i sunmaari m ti nahɔrefɔ ɔ, na deke bo i se m ni, nyini ye m kan kere durunya n nufɔm a.”

27 Yesu seeri sɔ ni, ba si má ka i jɔjɔ niiri i Si Nyeme wɔ.

28 Na wɔ se bu ka, “Am bá yeeri mini Adamande Wa n su baka jaanu n su, ye am sí ka mini la sɔnɔhɔre n bo m se am kabo m ti n a, na m yo má deke be m dɛɛ yiko nu, ama, m se kabo m Si akere m wɔ.

29 Yiri bo i sunmaari m n wo m dɔ, wɔ nya yaki má m cɛen be, dama saŋga kere m yo deke bo i sun i nu wɔ.”

30 I jɔjɔri sɔ ni, na jama n dɔŋgu ayo i yarada.

Kabo Yesu seeri Yudafoɔm ka bu satie dɛɛ ti ma ba yo akɔɔm n a

31 Na Yesu ase Yudafoɔm bo bu yo i yarada n ka, “Nzen am de m nɔanie ni, am ti m susufɔm wɔ nahɔre su.

32 Na am sí deke bo i ti nahɔre ni, na nahɔre ni má am nya am tii a.”

33 Na ba se i ka, “Ya ti Abraham anumam wɔ, be nya fa má ya yo má i akɔɔm. Ye nzu ti ye a ηa ya nyá ya tii a?”

34 Na Yesu ase bu ka, “Nahɔre ye m suse am a, ka, sɔnɔ kere bo i yo satie, i mi ti satie akɔɔ.

35 Akɔɔbaa koro ka má awuru n nu saŋga kere, ama, awurubaa yiri wo awuru n nu wɔ saŋga kere.

36 Nyini ti, nzen mini awurubaa n nya deerɛ am tii jiiri, am nyá am tii nahɔre su.

37 M si ka am ti Abraham anumam wɔ, ama, am koro ka am kun m wɔ, dama am ade má m nɔanie ni.

38 Deke bo mini aɲu i m Si dɔ n ye m suse am a, ama, amberɛ, deke bo am ti i am si dɔ, ye am yo a.”

39 Na ba se i ka, “Ya si la Abraham.” Na wɔ se bu ka, “Nzen má am ti Abraham nbaam, má am yo i sayoowa a.

40 Kabo i ti ni, ma se am nahɔre sam bo m tiiri i Nyeme dɔ n wɔ, ama, am koro ka am kun m wɔ. Abraham ayo má nyini be sɔ.

⁴¹ Ambere, am yo am si sayoowa a." Na ba se i ka, "Yere, ya ti má soma nbaam. Ya si la Nyeme ngumi wó."

⁴² Na Yesu ase bu ka, "Nzen má Nyeme ti am Si, má am koro m, dama m fiteeri Nyeme dɔ ɔ, ye m baari fen n a. Ma ba má ni m dɛɛ yiko nu, ama, yiri sunmaari m a.

⁴³ Nzu ti ye am ti má m jɔjɔowa n bu a? Dama am koro de má m nɔanie n dɛɛ ti.

⁴⁴ Sitana ti am si wɔ, na am koro ka am yo kabo am si koro n wɔ, i fite ka i bumboori kere, i ti sɔnɔ kunfɔ ɔ, na i su má nahɔre su, dama nahɔre haari kun mmɔɔ wo má i dɔ, i dɛɛ la ka i bu kɔre wɔ, dama yiri ti kɔrefɔ a, na yiri kaaki ti kɔrefɔm kere si a.

⁴⁵ Ama, mini se nahɔre n ti, am de má m nɔanie ni.

⁴⁶ Am nma koro kere m satie bo ma yo i a? Nzu ti ye m se am nahɔre, ye am de má m nɔanie n a?

⁴⁷ Sɔnɔ kere bo i ti Nyeme dɛɛ, i mi ti Nyeme nɔanie wɔ. Deke bo i ti na am ti má Nyeme nɔanie n la ka, am ti má i dɛɛm wɔ."

Kabo Yesu ti kpiri tara Abraham ni Nyeme nɔanie kanfɔm ni

⁴⁸ Na Yudaɔm n ase i ka, "Bo ya nja a ti Samariyaɔ ɔ, na ajini wo u nja ni, i ti má nahɔre wɔ, nzen se a?"

⁴⁹ Na Yesu ase bu ka, "Ajini wo má m nja, ama, m bu m Si n wɔ, ye ambere bu má m.

⁵⁰ M sukoro má ka mine wura m nja kpiri wɔ, be wo bere bo i koro ka i wura m kpiri, yiri ti jɔredifɔ a.

⁵¹ Nahɔre ye m suse am a, ka, sɔnɔ kere bo i bita m nɔanie ni, i mi wú má fieo."

⁵² Na ba se i ka, "Kisa, ye ya si ka ajini wo u nja a. Abraham ni Nyeme nɔanie kanfɔm ni kere awu, ama, wɔrɔ nja sɔnɔ kere bo i bita u nɔanie ni, i mi wú má fieo.

⁵³ A tara ya si Abraham bo wɔ wu n wɔ? I ni Nyeme nɔanie kanfɔm kere awu. A bu u nja se wɔ?"

⁵⁴ Na Yesu ase bu ka, "Nzen m wura m nja kpiri, i ti ngbeen wɔ. M Si wura m kpiri a, yiri bo am nja i ti am Nyeme ni,

⁵⁵ ama, am si má i. Mini si i a. Haari nzen m nja m si má i, m yó kɔrefɔ ka ambere wɔ. Ama, m si i, na m bita i nɔanie ni.

⁵⁶ I yoori am si Abraham fie ka i nja m ba n nu, i njuuri i, na i ahore ajo."

⁵⁷ Na ba se i ka, "A nya ju má aɔ aburunu, ye i yo se ye a nja a njuuri Abraham a?"

⁵⁸ Na Yesu ase bu ka, "Nahɔre ye m suse am a, kana bu ba wuuri Abraham ni, mini wo bere wɔ."

⁵⁹ I seeri sɔ ni, na ba fa yabuɛ ka bu bo kun i, ama, na wɔ lɔrɔki afite Nyeme Sereebiri Awuru n nu.

9

Kabo Yesu tekeeri anyinsin be nyumbaa ni

¹ Na sanja bo Yesu wo natiiri su ni, na wɔ nja sɔnɔ be, bu wuuri i ni, i ti anyinsin wɔ.

² Na i susufɔm n abisa i ka, "Ya Kereɔ, nzu ti ye bu wuuri ahin sɔnɔ ni anyinsin a? I wufɔm yoori satie, nzen i dɛɛ satie a?"

³ Na Yesu ase bu ka, "I ti má i ni i wufɔm be mmɔɔ satie dɛɛ ti, ama, Nyeme koro ka minem nja kabo i yo alekutura sa fa ma i a.

⁴ Kabo wie toko wo bere ni, am ma ya yo yiri n bo wɔ sunma m juma ni. Ale bá san bo be koro yo má juma be.

⁵ Kabo m toko wo durunya n nu ni, mini ti durunya n nufom wein a.”

⁶ Yesu seeri so ni, na wo yi nanzue ago asienggu, na wo fa akpita naatie afa aboroki anyinsin nyumbaa nnyo n kere.

⁷ Na wo se i ka, “Ko na a ko nmisi u nyunu Silowam bura n nu.” Silowam n bu la ka, ba sunma i wo. Na wo ko anmisi i nyunu n na wo nu asi, na wo kaaki aba awuru.

⁸ Na i lamokom ni minem bo bu yo nuuri i sangga kere ka i sere ni, abisa ka, “Ma ahin sono ni yo tana fen sere n a?”

⁹ Nbem na, “Yiri a.” Nbem gusu na, “Ma yiri a. I feremafu a.” Na yiri n mmoo ni i tii suse bu ka, “Mini a.”

¹⁰ Na ba bisa i ka, “Ye i yoori se ye u nyumbaa n ateke a?”

¹¹ Na wo se bu ka, “Sono n bo bu fere i ka Yesu ni, yiri kpitaari naatie borokiiri m nyumbaa n a. Na wo se m ka m ko Silowam bura n nu, na m ko nmisi m nyunu. Na ma ko anmisi, kpena na ma nu asi.”

¹² Na ba bisa i ka, “Ye yiri n wo ni?” Na wo se bu ka, “M si ma.”

Kabo Farasifom bisaari sono n fa ko i nyumbaa tekewa n su ni

¹³ Na ba fa sono n bo i yo tiiri anyinsin n ako Farasifom do.

¹⁴ Nyini een n bo Yesu kpitaari naatie na i fa tekeeri anyinsin nyumbaa n tiiri Numiyi een wo.

¹⁵ Nyini ti, na Farasifom gusu akaaki abisa i ka, “I yoori se ye a nuuri asi a?” Na wo se bu ka, “I faari naatie borokiiri m nyumbaa n a, na ma nmisi i, na ma nu asi.”

¹⁶ Na Farasifom nbem ase ka, “Ahin sono n fite ma Nyeme do, dama i bita ma Numiyi een ciire ni.” Ama, na nbem gusu ase ka, “I yo se ye satieyofu koro yo alekutura sam ka ahin nusu so a?” Na bu kere noo awo i ngungumi.

¹⁷ Na ba kaaki abisa sono n bo i yo tiiri anyinsin bekun ka, “Ye woro bo wo teke u nyumbaa ni, a bu i se wo?” Na wo se ka, “I ti Nyeme nonie kanfu o.”

¹⁸ Yudafo nkpienkpienm n ade ma ka i yo tiiri anyinsin wo, ye i nu asi kisa, ma ka bu ba fereeri i si, ni i ni,

¹⁹ na ba bisa bu ka, “Am wa n bo am na am wuuri i na i ti anyinsin ni, yiri la ahin? Ye i yoori se ye i nu asi kisa a?”

²⁰ Na i si, ni i ni abo bu nu ka, “Ya si i ka i ti ya wa a, ya wuuri i anyinsin wo.

²¹ Ama, ya si ma kabo i yoori barasu na i koro nu asi kisa ni, yere gusu kaaki si ma sono bo i tekeeri i nyumbaa ni. Wo ju i tienggu sono, am bisa i, yiri mmoo ni i tii se am.”

²² Deke bo i ti na i si, ni i ni seeri so ni, bu soroori Yudafo nkpienkpienm n ahore wo, dama Yudafo nkpienkpienm n adu mo ase ka sono kere bo i seeri ka Yesu ti Kristo Tiidefo ni, bu fon i mi fite bu tientienbunoo soo n nu wo.

²³ Nyini dee ti ye i si, ni i ni seeri ka, “Wo ju i tienggu sono, am bisa yiri mmoo ni i tii n a.”

²⁴ Na ba kaaki afere sono n bo i yo tiiri anyinsin n bekun, na ba se i ka, “Nie Nyeme ti, na a joo nahore. Yere si ka ahin sono n ti satieyofu o.”

²⁵ Na wo se bu ka, “Nzen i ti satieyofu o, i ti ma satieyofu o, mini si ma. Deke bo m si i n la ka, m yo tiiri anyinsin wo, ama, kisa m nu asi.”

²⁶ Na ba bisa i ka, “I yoori u se wo, ye i tekeeri u nyumbaa n se wo?”

²⁷ Na wo bo bu nu ka, “Ma du mo ase am kabo i tekeeri m nyumbaa ni, ye am ade ma. Ye nzu ti ye am koro ka m kan kere am bekun a? Ambere gusu, am koro ka am yo i susufom wo, nzen se?”

28 Na ba tɔ i ɲu ni nzukɔ kpɛ ase i ka, “Wɔrɔ ti nyini sɔnɔ n susufɔ a, yɛrɛ yiri, ya ti Moyisi dɛɛ susufɔm wɔ.

29 Ya si ka Nyɛmɛ yo jɔjɔri Moyisi dɔ a, ama, nyini sɔnɔ n yiri, ya si má i fiteebiri n mmɔɔ.”

30 Na wɔ se bu ka, “Ahin ti alekutura wanla, am si má i fiteebiri, ama, wɔ teke m nyumbaa.

31 Ya si ka Nyɛmɛ de má satieyofɔ nyɛmɛsere, ama, sɔnɔ kɛrɛ bo i su Nyɛmɛ atin su, na i yo i sa koroowa, Nyɛmɛ de i sere wɔ.

32 Fite durunya n bumboori, sɔnɔ be nya ti má ka be ateke sɔnɔ bo bu wuuri i na i ti anyinsin nyumbaa.

33 Nzen má ahin sɔnɔ n afite má Nyɛmɛ dɔ, má i koro yo má pui.”

34 Na ba se i ka, “Wɔrɔ yiri, bu wuuri u satieyofɔ ɔ, ye wɔrɔ koro ka a kere yɛrɛ a?” Na ba fɔn i afite.

Kabo Yesu ɲa bo bu de má Adamande Wa n ti anyinsinm ni

35 Yesu tiiri ka ba fɔn ayi sɔnɔ n ni, na wɔ kɔ aɲu i, na wɔ bisa i ka, “A yo Adamande Wa n yarada a?”

36 Na sɔnɔ n abisa i ka, “M Mibiɛ, yiri la ɲma a? Se m na m yo i yarada.”

37 Na Yesu ase i ka, “A ɲu i e, yiri la mini n bo m sujɔɔ u dɔ ni.”

38 Na sɔnɔ n ase i ka, “M Mibiɛ, ma yo u yarada.” Na wɔ kutu Yesu nyunu akansi i.

39 Na Yesu ase ka, “M baari durunya n nu ka m ba di minem jɔrɛ wɔ, na bo bu ɲu má asi n ɲú asi, na bo bu ɲu asi n yó anyinsinm.”

40 Farasifɔm nbem bo bu woori i bi dɔ n tiiri sɔ ni, na ba se i ka, “Nka a ɲa a se ka yɛrɛ gusu ti anyinsinm wɔ lɛɛ fan?”

41 Na Yesu ase bu ka, “Nzen má am ti anyinsinm, má am la má ɲgasi, ama, kabo am nya ɲa am ɲu asi ni, am toko la ɲgasi lɛɛ.”

10

Kabo Yesu boori miɛɛnu niiri bɛɛsasafɔ ni

1 Na Yesu ase ka, “Nahɔrɛ ye m suse am a, sɔnɔ bo i lɔrɔki wura nbɔɛm sɔɔ n nu, na wɔ fa má anɔ n nu awura má, i mi ti awiefɔ ɔ, na i kaaki ti sɔnɔ bo i nati fin minem di wɔ.

2 Sɔnɔ bo i fa anɔ n wura nbɔɛm sɔɔ n nu, yiri ti nbɔɛm sasafɔ n a.

3 Anɔ niefɔ ni teke anɔ n ma i a, na i fere i dɛɛ nbɔɛm n дума, na i nbɔɛm ni ti i konvi, na i fa bu fite.

4 Nzen i nya faari i nbɔɛm kɛrɛ fiteeri, i du bu mɔ ɔ, na i dɛɛ nbɔɛm n su i su, dama bu si i konvi.

5 Sɔnɔ bo bu si má i, bu sú má i su fieo, bu ɲmáti yaki i wɔ, dama bu si má i konvi.”

6 Na Yesu abo ahin miɛɛnu n akere bu, ama, ba ti má i bu.

Kabo Yesu ɲa yiri ti bɛɛsasafɔ kpa n ni

7 Ba ti má miɛɛnu n bu n ti, na Yesu akaaki ase bu bekun ka, “Nahɔrɛ ye m suse am a, mini ti nbɔɛm anɔ n bo bu fa wura sɔɔ n nu n a.

8 Bɛrɛ kɛrɛ bo bu duuri m mɔ baari, na bu yo bu ɲu ka bu niɛ nbɔɛm su ni, bu ti awiefɔm wɔ, ni minem bo bu nati fin minem di wɔ, ama, nbɔɛm n ade má bu jɔjɔwa ni.

9 Mini ti anɔ n a, na sɔnɔ kɛrɛ bo i fa m dɛɛ anɔ n wuraari, i nyá tiide, na i wúra na i fite, na i nyá i diire di.

10 Awiefɔ dɛɛ la ka i ba wɔ ɔ, na i kun, na i saaki. Mini aba ka bu nyá ɲgɔɔ bo i la má aɲusu.

11 Mini ti bɔ́esasafo kpa n a. Bɔ́esasafo kpa n tɔ́ i ngɔ́ɔ ɔ́, na i wu ma i nbɔ́em ni.

12 Padifo n bo ba fa i ka i sasa nbɔ́em n ti má bɔ́esasafo nahɔ́re su, na nbɔ́em n ti má i dɛem. Nyini ti, nzen i ba nyuri ka bedi suba, i ηmati yaki nbɔ́em wɔ́. Na bedi n wura bu nu tara nbem, na bo ba ka n sandi.

13 I ti padifo n dɛe ti, na i cɛce wo má nbɔ́em n nu, nyini ti ye i ηmati yaki bu n a.

14-15 Mini ti bɔ́esasafo kpa n a. Kabo m Si Nyeme si m na m si i ni, sɔ́ ye mini gusu si m dɛe nbɔ́em a, na bu gusu si m. Na m tɔ́ m dɛe ngɔ́ɔ na m wu ma bu.

16 M la nbɔ́e nyiŋga nbem bo bu ti m dɛem, bo bu wo má ahin nbɔ́em n nu. Wɔ́ yo daka ka m fa bu gusu ba wura ahinm n nu. Bere gusu tí m konvi na bu dé i, na bu yó kun na bu sasafɔ́ yó kun.

17 M tɔ́ m dɛe ngɔ́ɔ fa ma m minem, na m káaki de i bekun, nyini dɛe ti ye m Si koro m n a.

18 Be sude má m dɛe ngɔ́ɔ ni m dɔ́, ama, mini ni m tii suto i m koroyanu a. M la atin bo m tɔ́ m dɛe ngɔ́ɔ ni, na m kaaki la atin bo m de i bekun. M Si maari m nɔ́ ka m yo sɔ́ a.”

19 Yesu seeri sɔ́ n dɛe ti, na Yudafo nkpienkpienm n nɔ́ awo i ngunɔ́gumi bekun.

20 Na bu dɔ́ngu n ase ka, “Ajini wo i nyu, nyini dɛe ti, wɔ́ bo fie a. Nzu ti ye am so am sui i dɔ́ a?”

21 Ama, nbem ηa, “Má sɔ́nɔ́ bo ajini wo i nyu jɔ́jɔ́wa la ahin. Ajini yo se koro teke anyinsin nyumbaa?”

Kabo Yudafo m keteeri Yesu ni

22 Fufuku sanɔ́ na Yudafo m ba sudi bu cɛenkpiri n Yerusalem mie kpiri n nu, na bu tenɔ́e su kabo bu yo tekeeri Nyeme Sereebiri Awuru n ni, na bu yoori i dɔ́ngu ni.

23 Na Yesu sunati bara ye Solomon Lele n bo i wo Nyeme Sereebiri Awuru n nu ni.

24 Na Yudafo nbem atien bu nɔ́ abara aye i, na ba bisa i ka, “Sanɔ́a bɔ́nɔ́ ye a bá kan teke ya nyi a? Nzen wɔ́rɔ́ ti Kristo Tiidefo n a, se ya nahɔ́re kpain.”

25 Na Yesu ase bu ka, “Ma se am, ye am ade má a. Alekutura sam bo m yo bu m Si duma n nu ni, di m nyu daani a.

26 Ama, am yo má m yarada, dama am ti má m dɛe nbɔ́em.

27 M dɛe nbɔ́em ti m konvi. M si bu, na bu su m su.

28 M ma bu ngɔ́ɔ bo i la má awieeri, na bu ká má ngbɛen cɛen be fieo. Be gusu koro fin má bu fite má m saa nu.

29 M Si bo i faari bu maari m ni, tara deke kere fanɔ́a, na be wo má bere bo i koro fin bu fite m Si saa nu.

30 Mini ni m Si ti deke kun wɔ́.”

31 Na Yudafo m afa yabuɛ bekun ka bu bo kun i.

32 Na Yesu ase bu ka, “Ma yo alekutura sakpam dɔ́ngu, bo m Si kereeri m na am anu i, ye sa bɔ́nɔ́ ti ye am ηa am kun m n a?”

33 Na Yudafo m n ase i ka, “Má sakpam bo a yo bu n be dɛe ti ye ya ηa ya kún u a, ama, bo a jɔ́jɔ́ wura Nyeme ηgasi nu n ti, dama a ti adamande wɔ́, ama, na a se ka a ti Nyeme wɔ́.”

34 Na wɔ́ se bu ka, “Ba kere i am Nyeme Jɔ́re Kadasi n nu ka, Nyeme ηa, ‘Am ti ka Nyeme wɔ́.’

35 Be koro bu má Nyeme Jɔ́re Kadasi ni ngbɛen. Nyeme yo seeri bu ka bu ti ka Nyeme wɔ́, bere bo bu deeru Nyeme nɔ́anie ni,

³⁶ ama, mini yiri, m Si Nyeme ayi m, ye wo sunma m durunya n nu a. Ye nzu ti ye amberε ηa ma kan ciire jore, dama m ηa mini ti Nyeme Wa a?

³⁷ Nzen m yo má m Si juma ni, má am yo m yarada.

³⁸ Ama, nzen m yo bu na haari am yo má m yarada mmoo a, am yo m juma n yarada, adena am si nahore su ka mini ni m Si n ti deke kun wo.”

³⁹ I seeri so ni, na ba kpi ka bu tara i bekun, na wo loroki afite bu nu.

⁴⁰ Na Yesu akaaki akpie ako Yodan kunma n buekun do ako aju deke bo Yohane yo biεeri minem Nyeme nzue ni, na wo wo do.

⁴¹ Na jama beberebe aba i do, na ba se ka, “Yohane ayo má alekutura sa be, ama, jooowa kere bo i yo joo fa koori ahin sono n nusu n ti nahore wo.”

⁴² Na mine dongu ayo i yarada do.

11

Kabo Lazarosi wuuri ni

¹ Na sono be bo bu fere i ka Lazarosi n ada tukpaki. I ninbaam la Mariya ni Marata. Bu bosu la Betani.

² Nyini Mariya n bo i niwa Lazarosi daari tukpaki ni, yiri ba faari tulaaleε nvanvanifo goori Yesu jaa su ye i faari i tiηmie tintiin nunukaari i n a.

³ Na i ninbaa nbaabaram n asunma ka bu ko se Yesu ka, “Ya Mibie, u danfo n bo a koro i agaya n ada tukpaki.”

⁴ Yesu tiiri so ni, na wo se ka, “Ahin tukpaki n ti má yiwee tukpaki, ama, i yo so, na minem ηu Nyeme jirima woowa kabo i ti, na Nyeme ma minem ηu mini bo m ti i Wa n gusu jirima woowa.”

⁵ To, Yesu koori Marata ni Mariya ni bu niwa Lazarosi.

⁶ Ama, i tiiri ka Lazarosi ada tukpaki ni, na wo ka deke bo i woori n ceen nnyo abuka su.

⁷ Nyini sin na Yesu ase i susufom ka, “Am ma ya kaaki ko Yudiya dee awore n nu.”

⁸ Na i susufom n ase i ka, “Ya Kerefō, má anzoni fen ye Yudafom ηa bu tu yabue bo kun u n a? Ye a sukoro ka ya kpie ya nyi ko do bekun n a?”

⁹ Na Yesu ase bu ka, “Fa ηgarama ko ju naaso, m ηa i ti wie kun wo e. Sono bo i nati wiesu bo má i jaa, dama durunya n nu wein ni ma i ηu asi a.

¹⁰ Ama, sono bo i nati kongue bo i jaa, dama wein wo má i do.”

¹¹ Yesu jooori so n sin, na wo kaaki ase bu ka, “Ya danfo Lazarosi adaafi, ama, m suko na m ko tenge i lee.”

¹² Na i susufom n ase i ka, “Ya Mibie, nzen wo daafi wo, i nyá laifie.”

¹³ Kabo Yesu seeri n la ka, Lazarosi awu wo, ama, i susufom bere sunsun ka i ηa wo daafi nahore su wo.

¹⁴ Nyini ti, na Yesu ase bu kpain ka, “Lazarosi awu.

¹⁵ Ama, amberε dee ti, wo yo m fie ka ma wo má do, adena am yo yarada. Am ma ya ko i do.”

¹⁶ Na Tomasi bo bu fere i ka Ndaa n ase i lamoko susufom n ka, “Am ma yere gusu ko, nzen bu ko kuunri i a, na ya ni yiri kere awu.”

Kabo Yesu ηa yiri tenge minem yiwee nu ni

¹⁷ Sanga bo Yesu ko juuri ni, i juuri ka ba se Lazarosi i lenna lee.

¹⁸ Betani ni Yerusalem miem waari má ni i bengu.

¹⁹ Na Yudafom dongu aba Marata, ni Mariya do ka bu ba dada bu ahore, bu niwa n bo wo wu n dee ti.

²⁰ Marata tiiri ka Yesu suba ni, na wo kpa i atin, ama, na Mariya aka awuru.

²¹ Na Marata ase Yesu ka, “M Mibie, nzen má a woori fen, má m niwa n awu má.

22 Ama, haari ni nyini mmɔɔ, m si ka deke kere bo a sere Nyeme, i yó i ma u.”

23 Na Yesu ase i ka, “U niwa ni ténge i yiwee n nu bekun.”

24 Na Marata ase i ka, “M si ka i bá tenge i yiwee nu jina cɛɛn, sanɔa bo Nyeme bá tenge minem bu yiwee nu ni.”

25 Na Yesu ase i ka, “Mini ti sɔnɔ bo i tenge minem bu yiwee nu, na i má bu ngɔɔ n a. Sɔnɔ kere bo i yo m yarada, haari nzen i wuuri, i nyá ngɔɔ.

26 Na sɔnɔ kere bo i la ngɔɔ na i yo m yarada, i mi wu má fieo. A yo ahin jɔjɔwa n yarada a?”

27 Na Marata ase i ka, “M Mibiɛ, ma yo yarada ka wɔɔ ti Nyeme Wa, Kristo Tiidefɔ n a, bo i ɔa i súnma i durunya n nu ni.”

Kabo Yesu suunri ni

28 Marata seeri sɔ n sin, na wɔ kaaki akɔ afere i niwa Mariya benle, na wɔ se i ka, “Ya Mibiɛ n aba, i ɔa a bra.”

29 Mariya tiiri sɔ ni, i kaba bereki yasuuri wɔ, na wɔ kɔ i dɔ.

30 Nyini sanɔa, na Yesu nya ju má miɛ n nu, i toko wo deke bo Marata kɔ tuuri i n wɔ.

31 Na Yudaɔm bo bu woori awuru n nu Mariya bi, na bu sudada i ahore ni, bu ɔuuri kabo i bereki yasu fiteeri ni, na ba su i su. Bu sunsuunri ka i sukɔ deke bo bu seeri Lazarosi n wɔ, na i kɔ sun.

32 Sanɔa bo Mariya kɔ juuri deke bo Yesu wo n na i ɔuuri i ni, na wo kutu i nyunu, na wɔ se i ka, “M Mibiɛ, nzen má a woori fen, má m niwa n awu má.”

33 Yesu ɔuuri ka i susun ni, ni kabo Yudaɔm n bo bu suuri i su baari n gusu wo sun su ni, na i ahore asaaki, na wɔ mi i ɔumi.

34 Na wɔ bisa bu ka, “Am seeri i ni wɔ?” Na ba se i ka, “Ya Mibiɛ, bra na a ba niɛ.”

35 Na Yesu asun.

36 Nyini ti na Yudaɔm n ase ka, “Am niɛ kabo i koro i agaya barasu a.”

37 Ama, na bu nbem ase ka, “Yiri n bo i teke anyinsin n nyumbaa ni, má i koro tuntun má sɔnɔ ni, na i wu má, nzen se?”

Kabo Yesu tengeeri Lazarosi i yiwee nu ni

38 Na Yesu ahore asaaki bekun, na wɔ kɔ deke bo bu seeri Lazarosi ni. I ti yabuɛ buɛ fanɔunma wɔ, ye bu faari i seeri nu a, na ba fa yabuɛ nyinɔa atɔ anɔ ni.

39 Na Yesu ase bu ka, “Am ba yi yabuɛ ni.” Na sɔnɔ n bo wɔ wu n niwa Marata ase i ka, “M Mibiɛ, kisa wɔ bun, dama bu seeri i nyuma lenna leɛ.”

40 Na Yesu ase i ka, “Ma se má u ka, nzen a yoori m yarada, a ɔú Nyeme jirima woowa kabo i ti barasu?”

41 I seeri sɔ ni, na ba lakati yabuɛ ni. Na wɔ ye i tii su anɔro, na wɔ se ka, “M Si, m da u asi ka a de m sere.

42 M si ka sanɔa kere a de m sere wɔ, ama, ahin minem bo bu jina fen n dɛɛ ti, ye m seeri sɔ a, adena bu yo m yarada ka wɔɔ sunmaari m a.”

43 I sereeri Nyeme n wieeri ni, na wɔ tien ase ka, “Lazarosi, fite.”

44 Na sɔnɔ n bo wɔ wu n afite fanɔunma n nu. Tani pɔɔndiiri i saa, ni i jaa, na tani kun pɔɔndiiri i tii. Na Yesu ase bu ka, “Am nyanɔi yi tani n na am ma i kɔ.”

Kabo bu sɛsɛeri su ka bu kun Yesu ni

45 Yudaɔm dɔngɔ bo bu baari Mariya dɔ ɔuuri sa n bo Yesu yoori i ni, na ba yo i yarada.

46 Na bu nbem akɔ Farasifɔm n dɔ akɔ ase bu kabo Yesu ayo ni.

⁴⁷ Na Farasifom ni Nyeme sayoowa dɔnguyofɔ nkpienkpienm n afere Yudafoṃ tereterefoṃ ni, na ba tien bu nɔɔ. Na ba se ka, “Ye ya yo se wo? Am nie e, ahin sɔnɔ ni suyo alekutura sayoowam dɔngu.

⁴⁸ Nzen ya yaki i na i suyo sɔ, minem kere yɔ i yarada a, na Roma yikofom bá saaki ya Nyeme Sereebiri Awuru ni, na bu kún ya minem ni.”

⁴⁹ Na bu nu sɔnɔ be bo bu fere i ka Kayafasi ni, bo i ti Nyeme sayoowa dɔnguyofom kere kpien nyini afo n ase ka, “Amberɛ, am si má pui.

⁵⁰ Am si má kabo i ti n wo, nzen se? Ka nzen am ma sɔnɔ kun wu maari minem kere, i ti ye ni bo ya minem kere bá wu ni.”

⁵¹ Má i koroyanu ye i seeri sɔ a, ama, yiri ti Nyeme sayoowa dɔnguyofom kere kpien nyini afo n ti, ye Nyeme ma i seeri ka Yesu wú ma Yudafoṃ n a.

⁵² Na má bere ngumi dɛɛ ti ye i wú a, ama, adena i tien Nyeme nbaam nɔɔ, na bu yo kun, bere bo ba sandi ako asien nbem n su.

⁵³ Nyini dɛɛ ti, fite nyini cɛɛn n fa kɔ, na ba sɛsɛ su ka bu kun Yesu.

⁵⁴ Nyini dɛɛ ti, wo yi má i ɲu fofoe nu anati má Yudafoṃ nu kun. Ama, i fiteeri bere ni, na wo kɔ awɔre be bo i wo dodo boro kpantain dɛɛ bue ni, na i ni i susufom n ako awo mie n bo bu fere i ka Efirayim n su.

⁵⁵ Nyini sanɲa, wo ka kaan, na Yudafoṃ di bu Butara cɛenkpiri ni, na mine dɔngu afite ahemem aba Yerusalem mie kpiri n nu, na bu ba kpakpara bu ɲu fin ka, na cɛenkpiri n nya ju.

⁵⁶ Na ba niɛniɛ Yesu busu, na sanɲa bo bu wo Nyeme Sereebiri Awuru n nu ni, na ba bisa bu ɲuɲu nu ka, “Am sunsun se wo? I bá cɛenkpiri ni? Ya de má ka i bá.”

⁵⁷ Ama, Nyeme sayoowa dɔnguyofɔ nkpienkpienm ni, ni Farasifom n ama nɔɔ ka sɔnɔ kere bo i si deke bo Yesu wo, i se bu na bu kɔ tara i.

12

Kabo Mariya faari tulaalɛ nvanvanifo gɔɔri Yesu jaam su ni

¹ Na sanɲa bo i ba kaari lesen, na bu di Butara cɛenkpiri ni, na Yesu ako Betani, Lazarosi bɔsu, yiri bo Yesu tengeeri i yiwee n nu ni.

² Na ba su Yesu wɔfo dɔ. Marata faari diire n ba maari bu a, Lazarosi gusu woori minem bo bu ni Yesu diiri diire n nu.

³ Na Mariya afa tulaalɛ nvanvani bo i la gɔ agaya tuwa bambaka kun, na wo fa agɔ Yesu jaa su, na wo fa i tiɲmie tintiin anunuka i jaam kere su, na tulaalɛ ni nvani ade awuru n kere.

⁴ Na Yesu susufom kun bo bu fere i ka Yudasi Isikariyoti bo i bá tɔ Yesu n abisa ka,

⁵ “Nzu ti ye bara n atɔ má tulaalɛ n na i nya ɲwaa beberebe, na ya fa ma jaarifom a?”

⁶ I ti awiefɔ n dɛɛ ti ye i seeri sɔ a, má ka i cɛɛ wo jaarifom nu wo. Yiri ti bu ɲwaa bitafo a, na i suwo ɲwaa n be sanɲa sanɲa.

⁷ Na Yesu ase ka, “Yaki Mariya benle, i dɛɛ nzee bo i sufa yo m fa kɔ m yiwee cɛɛn leɛ.

⁸ Dama am ni jaarifom ni wo bere sanɲa kere a, ama, am ni mini koro wo má bere sanɲa kere.”

⁹ Yudafoṃ beberebe tiiri ka Yesu woori dɔ ni, na ba ba i dɔ, má ka Yesu ngumi ti ye bu baari a, ama, bu baari ka bu ba ɲu Lazarosi n bo Yesu tengeeri i yiwee n nu n wo.

¹⁰ Nyini dɛɛ ti, na Nyeme sayoowa dɔnguyofɔ nkpienkpienm n asɛsɛ su ka bu kun Lazarosi gusu.

¹¹ Dama i dɛɛ ti ye Yudafoṃ dɔngu akaaki bu sin abo bu a, ye ba yo Yesu yarada n a.

Kabo Yesu wurari Yerusalem ka fεmε dεε su ni

¹² Na alecin na jama n bo bu baari ka bu ba di Butara cεenkpiri n ati ka Yesu suba Yerusalem miε kpiri n nu.

¹³ Na ba kpiεkpiε kpakpa nyawa akε akpa i atin, na bu subo kuyigindi, bu ηa,

“*Hosana*. Ya kansi Nyεmε.

Terefiε wo yiri n bo i suba Micεra n dεε duma n nu n dε.

Terefiε wo Yisarelifεm fεmε n dε.”

¹⁴ Na Yesu anu kaakobaa be, na wε fun atana su, kabo ba kεre i Nyεmε Jεre Kadasi n nu ni,

¹⁵ “Amberε Siyonfεm, mǎ am soro sεre.

Am niε, am fεmε ni suba n a,

i fun kaakobaa wε.”

¹⁶ Nyini sanu, i susufεm nya si mǎ nyini sam n bo ba yo n kεre bu. Mǎ ka sanu bo Yesu ba tengeeri i yiwee n nu, na bu ηuuri i jirima woowa n sin, na ba nya atεnge su, ka ba kεre i Nyεmε Jεre Kadasi n nu ka bu yό i sε ε, na ba kaaki atεnge su, ka ba yo i sε nahεre su.

¹⁷ Na jama n bo bu yo woori Yesu dε, sanu n bo i fereeri Lazarosi fiteeri fanunma n nu, na i tengeeri i yiwee n nu ni, na bu sukan labari ni.

¹⁸ Nyini alekutura sa n bo i yoori i na minεm tiiri n dεε ti, na ba kpa i atin.

¹⁹ Na Farasifεm n ase bu ηunηu nu ka, “Am anu mǎ i? Ya koro yo mǎ pui kun. Yiri ye durunya n nufεm kεre susu i su n a.”

Kabo Girikifε nbem ba bisaari Yesu busu ni

²⁰ Minεm bo bu baari Yerusalem miε kpiri n nu Butara cεenkpiri n sanu n ka bu ba su Nyεmε ni, bu nbem ti Girikifεm wε.

²¹ Na ba ba Filipu dε, i fite miε n bo bu fere i ka Besayida na i wo Galili awεre n nu n wε. Na ba se i ka, “Njabiε, ya koro ka ya ηu Yesu wε.”

²² Na Filipu akε ase Andere, na bu nnyε n kεre akε ase Yesu.

²³ Na Yesu ase ka, “Sanu n aju bo Nyεmε wura mini Adamande Wa n kpiri.

²⁴ Nahεre ye m suse am n a, mǎ ka alembaa awura fa nu, na wε kpεrε, i ti i tii wε. Ama, nzen i wurari fa nu na i kpεrεori, ye i wura mbaa beberebe a.

²⁵ Sεnε kεre bo i koro i ηgεε, i mi bǎ fun i, ama, sεnε kεre bo i koro mǎ i ηgεε durunya n nu fen, i mi bǎ nya ηgεε bo i la mǎ awieeri.

²⁶ Sεnε kεre bo i su m, wε yo daka ka i mi su m su, na deke bo m wo ni, m amusuisufε gusu wό dε ε. Na sεnε kεre bo i suuri m, m Si Nyεmε wura i mi kpiri.”

Kabo Yesu jεjε fa kεori i yiwee n jεre su ni

²⁷ Na Yesu ase ka, “Kisa, m ahore asaaki, ye m se sε wε? M koro se ka, m Si Nyεmε, yi m fite ahin anyumboro bo i suba m dε n nu, nzen sε? Ai, m koro se mǎ sε, dama nyini dεε ti ye m baari a.

²⁸ M dεε bo m se la ka, m Si, kere kabo u jirima woowa ti.” Na akonvi be atien afite angoro ase ka, “Ma du mε akere kabo m jirima woowa ti, na m kǎaki kere i bekun.”

²⁹ Jama n bo bu jina Yesu bi n tiiri akonvi ni ηga ni, na bu nbem ase ka, “Nzue akpura.” Na nbem gusu ase ka, “Nyεmε merεke ajεjε i dε a.”

³⁰ Na Yesu ase bu ka, “Amberε dεε ti ye akonvi n jεjεori a, mǎ mini dεε ti a.

³¹ Sanu n aju bo Nyεmε dǎ durunya n nufεm jεre, na i fεn yi Sitana bo i ti bu fεmε ni.

³² Ama, mini, bu ba yɛeri m su jinaari angoro baka jaanu n su, m cín sɔnɔ kɛrɛ ba m dɔ.”

³³ Kabo i yo seeri sɔ n kere yiwee n bo i bá wu i n wɔ.

³⁴ Na jama n ase i ka, “Ya ti i Nyɛmɛ Jɔrɛ Kadasi n nu ka, Kristo Tiidefo ni wo bɛrɛ sanɔga kɛrɛ. I wú má. Ye i yoori sɛ ye wɔrɔ nɔ, wɔ yo daka ka bu bá yɛeri Adamande Wa n su jinaari angoro baka jaanu n su a? Ye Adamande Wa n la nma a?”

³⁵ Na Yesu ase bu ka, “Mini bo m ti wein ni, m wo am nu kisa, ama, m cé má. Nyini dɛɛ ti, am nya wo ni wein ni, am sunati wein nu wɔ, na má awosin tu am. Sɔnɔ kɛrɛ bo i wo awosin nu, i mi si má deke bo i sukɔ ni.

³⁶ Am nya wo ni wein ni, am yo i yarada, na m má am yo wein dɛɛ nbaam.” Yesu seeri sɔ ni, na wɔ fite bu nu akɔ afiɛ deke be, na má be nɔ i.

Kabo Yudafoɔm ayo má Yesu yarada ni

³⁷ Yesu yo yoori alekutura sam dɔngɔ na ba nɔ i, haari ni nyini mmɔɔ, ba yo má i yarada.

³⁸ Nyini ma Nyɛmɛ nɔaniɛ kanfo Esaya jɔrɛ n bo i yo kɛrɛeri n yo yiiwa. I nɔ,

“M Nyɛmɛ Fɛmɛ, nma ade jɔrɛ n bo ya kan i n a?

Ye nma ye a yi u yiko akere i a?”

³⁹ Nyini dɛɛ ti, ye ba koro ayo má Yesu yarada n a. Kabo Esaya akaaki ase ka,

⁴⁰ “Nyɛmɛ ama ba yo anyinsinm na má bu nɔ asi,

na wɔ ma bu ahore ayo kekereke

na má bu ti i nɔaniɛ n bu,

adena má bu kaaki ba i dɔ

na bu nya laifiɛ.”

⁴¹ Esaya yo nɔuri Yesu jirima woowa n dɛɛ ti, ye i kaanri i nɔ jɔrɛ n a.

⁴² Yudafo nkpienkpienm dɔngɔ mmɔɔ yoori Yesu yarada, ama, bu soroori Farasifoɔm n ahore n dɛɛ ti, ba koro ayi má bu nɔ fofoe nu. Nzen bu yiiri bu nɔ ka ba yo i yarada, Farasifoɔm ni fón bu fite bu tientienbunɔɔ sɔɔ n nu wɔ.

⁴³ Dama Yudafo nkpienkpienm n yo koroori adamande kansi taraari Nyɛmɛ dɛɛ.

Kabo Yesu seeri ka i nɔaniɛ ni dí minɛm jɔrɛ ni

⁴⁴ Na Yesu atien ase ka, “Sɔnɔ kɛrɛ bo i yo m yarada, má mini nɔgumi ye i yo m yarada, ama, i yo bo wɔ sunma m n gusu yarada a.

⁴⁵ Na sɔnɔ kɛrɛ bo i niɛ na i nɔuri m, ti ka wɔ nɔ m Si Nyɛmɛ bo i sunmaari m n lɛɛ.

⁴⁶ Mini bo m ti wein n aba durunya n nu, adena sɔnɔ kɛrɛ bo i yo m yarada, i wó má awosin nu.

⁴⁷ Sɔnɔ kɛrɛ bo i ti m nɔaniɛ n na i de má i, m di má i mi jɔrɛ, dama ma ba má ka m ba di durunya n nufɔm jɔrɛ wɔ, ama, m baari ka m ba de bu tii ji wɔ.

⁴⁸ Sɔnɔ kɛrɛ bo i kete m, na i de má m nɔaniɛ ni, i jɔredifo wo bɛrɛ wɔ. Nɔaniɛ n bo ma jɔjɔ i ni, yiri dí i mi jɔrɛ jina cɛɛn n a.

⁴⁹ Dama má m koroyanu ye m kan sɔ a, ama, m Si n bo wɔ sunma m ni, yiri maari m nɔɔ, kereeri m nɔaniɛ kun kun kɛrɛ bo m jɔjɔ i n a.

⁵⁰ M si ka i nɔaniɛ maawa n ti deke bo i ma nɔɔ bo i la má awieeri n wɔ. Nyini dɛɛ ti, kabo m Si seeri m ni, sɔ ye m jɔjɔ a.”

13

Kabo Yesu ηmisiiri i susufom n jaa ni

¹ Alecin bo má bu di Butara cɛenkpiri n ni, na Yesu asi nu ka sanɔa n aju bo i fíte durunya n nu kaaki kɔ i Si Nyemɛ dɔ. Na i dɛɛ tienɔgu minem bo bu wo durunya n nu na i koro bu ni, i koro bu sɔ ɔ haari i kɔ ju i fanɔa nyaari.

² Na kɔngue sanɔa bo bu wo diire n di su ni, na Sitana awura Yudasi, Simon Isikariyoti wa n tii nu ka i tɔ Yesu ma i kpɔfom.

³ Na Yesu asi nu ka i Si Nyemɛ afa deke n kere awura i saa nu, na i kaaki si ka i fiteeri Nyemɛ dɔ baari a, na i káaki kɔ i dɔ ɔ.

⁴ Na wɔ nya yasu ajina, na wɔ yi i tanlɛɛ n ase, na wɔ fa papawo abo i wi nu.

⁵ Na wɔ sa nzue agɔ nyanga nu, na wɔ bo i bu sunmisi i susufom n jaa, na wɔ fa papawo n bo i bo i wi nu ni sunuka bu jaam.

⁶ I ba kpuraari Simon Petoro, na wɔ bisa Yesu ka, “M Mibiɛ, na wɔrɔ ba ηmisi m dɛɛ jaa?”

⁷ Na Yesu ase i ka, “Sa bo m suyo i ni, a koro ti má i bu kisa, ama, fa kɔ fa ba, a bá ti i bu.”

⁸ Na Petoro ase i ka, “Ai, a ηmisi má m jaa haari durunya n ba yasu.” Na Yesu ase i ka, “Nzen ma ηmisi má u jaa, m ni wɔrɔ akpaaki lɛɛ.”

⁹ Dɔ na Simon Petoro anya ase i ka, “M Mibiɛ, nzen i ti sɔ a, má a ηmisi m jaa ηgumi, ama, ηmisi m saam ni m tii kere.”

¹⁰ Na Yesu ase i ka, “Sɔnɔ anya abie nzue, ηka i ηmisi i jaa a, i bie má nzue kun, dama i ηunie kere ti casi wɔ. Amberɛ, am ti casi wɔ, ama, má am kere.”

¹¹ Yesu siiri bo i bá tɔ i ma i kpɔfom ni, nyini ti ye i ηa má bu kere ti casi n a.

¹² I ηmisi bu jaam wieeri ni, na wɔ fa i tanlɛɛ n awura, na wɔ kɔ atana i tanaabiri ni. Na wɔ bisa bu ka, “Kabo ma yo am ni, am ati i bu?”

¹³ Am fere m ka am Kerefɔ ɔ, na am kaaki fere m ka am Mibiɛ. Am jɔjɔ nahɔre wɔ, dama m ti sɔ ɔ.

¹⁴ Tɔ. Kisa na mini bo m ti am Mibiɛ, ni am Kerefɔ, na ma ηmisi am jaam ni, wɔ yo daka ka amberɛ gusu ηmisi am beɔngum jaam sɔ.

¹⁵ Dama ma yo akere am lɛɛ, na am gusu yo am beɔngum kabo ma yo am ni.”

¹⁶ Na wɔ se bu ka, “Nahɔre ye m suse am a, akɔ koro tara má i mibiɛ, na bekun sunmafɔ gusu koro tara má bo i sunmaari i ni.

¹⁷ Nzen am sin ahin n kere, na am yoori sɔ, terefie wo am dɔ.

¹⁸ M sujɔjɔ ni má am kere wɔ, dama m si bo ma du mɔ ayi bu ni. Ama, kabo ba kere i Nyemɛ Jɔre Kadasi n nu ni, i ti ye ni ka i yo yiiwa, ka, ‘Sɔnɔ n bo m ni yiri sanɔa di diire taale kun nu, yiri akaaki m jaa tufɔ n a.’

¹⁹ M suse am sa bo i bá yo wɔ lɛɛ, na i ba yoori, na am yo m yarada ka mini la sɔnhɔre n bo ma se am kabo m ti n a.

²⁰ Nahɔre ye m suse am a, sɔnɔ kere bo i de sɔnɔ bo m sunma i ni, i mi ade mini wɔ lɛɛ, na sɔnɔ kere bo i de mini, i mi ade yiri bo i sunmaari m wɔ lɛɛ.”

Kabo Yesu seeri ka Yudasi tɔ i ma i kpɔfom ni

²¹ Yesu seeri bu sɔ wieeri ni, na i ahore asaaki akɔ asin su, na wɔ se bu kpain ka, “Nahɔre ye m suse am a, am nu kun bá tɔ m ma m kpɔfom a.”

²² Na i susufom n abirisi, sunie bu ηunju nu, ama, ba si má bo i yó nyini sa n ni.

²³ Bu nu kun be bo Yesu koro i agaya n tana mata Yesu.

24 Na Simon Peto abo i nyumbaa i do ka i bisa Yesu ka, i ni nma a?

25 Na yiri n acin adodo Yesu, na wo bisa i ka, "Ya Mibiε, a ni nma a?"

26 Na Yesu ase i ka, "So no n bo m kpιe too n bo toro n nu na m fa ma i ni, yiri lee." Na wo fa too n abo toro n nu, na wo fa ama Yudasi, Simon Isikariyoti wa ni.

27 Yesu faari too n maari Yudasi wieeri ni, na Sitana awura i tii nu, na Yesu ase i ka, "Sa n bo a na a yo i ni, ko yo i ndende."

28 Ama, bu ke re bo bu wo ori diire n di su ni, bu be mmoo asi ma deke n bo i ti na Yesu seeri i so ni.

29 Yudasi tiiri bu nwaa bitafu n dee ti, bu nbem sunsun ka Yesu na i ko to deke be na bu fa di cenkpiri n wo, wara i ko yi nwaa n be fa ma yaarifom wo.

30 Yudasi diiri too n wieeri ni, na wo yasu afite ako. Nyini sang a ni, i ti kongue wo.

Kabo Yesu maari bu noanie maawa fofore ni

31 Yudasi fite ko wieeri ni, na Yesu ase ka, "Kisa ye Nyeme wura mini Adamande Wa n kpiri a, na m dee ti ye mine wura m Si Nyeme kpiri a.

32 Na nzen bu wurari Nyeme kpiri m dee ti, Nyeme gusu wura m kpiri, na Nyeme ma i yo kisa bere."

33 Na wo se bu ka, "M nbaam, m ce ma am nu fen. Am ba nienie m busu fie wo, na kabo m yo seeri Yudafo m ni, so ye m suse am kisa, ka am koro ko ma deke bo m suk o ni.

34 Noanie maawa fofore ye m sufa ma am n a, yiri la ka, am koro am bengum. Kabo ma koro am ni, am koro am bengu so.

35 Nzen am koro am bengu, nyini ye so no ke re si ka am ti m susufom a."

Kabo Yesu seeri ka Peto ke te kpe nsan ka i si ma i ni

36 Na Simon Peto abisa i ka, "Ya Mibiε, a ko ni wo?" Na Yesu abo i nu ka, "Deke bo m suk o ni, a koro su ma m su kisa, ama, sang a suba bo a ba su m su."

37 Na Peto akaaki abisa i ka, "Ya Mibiε, nzu ti ye m koro su ma u su kisa? Nzen i yo yiwee mmoo a, m wu u dee ti."

38 Na Yesu abisa i ka, "A koro wu m dee ti? Nahore ye m suse u a, kana akonyuma ba bo, a ke te kpe nsan su ka a si ma m."

14

Kabo Yesu na yiri ti atin n bo so no koro fa i suk o Nyeme do ni

1 Na Yesu ase i susufom n ka, "Ma am ma am ahore saaki. Am yo Nyeme yarada, na am yo m gusu yarada.

2 M Si Nyeme dika n nu, soom sunnu do, nzen ma i ti ma so, ma m se ma am. M ko na m ko sese woobiri su se am.

3 Na nzen m ko sese woobiri n su seeri am, m kaaki ba fa am ko deke bo m ko wo ni, na deke bo m wo ni, am gusu wo do o.

4 Na deke bo m suk o ni, am si atin ni."

5 Na Tomasi ase i ka, "Ya Mibiε, ya si ma deke bo a suk o ni, ye ya yo se si atin n a?"

6 Na Yesu ase i ka, "Mini ti atin n a, ni nahore, ni ngoo n a. Mini ngumi ti atin n bo so no koro fa i na i ko m Si Nyeme do a.

7 Nzen ma am siiri m, ma am si m Si mmoo, ama, fa nyuma fa ko, am asi i, na am anu i."

8 Na Filipo ase i ka, "Ya Mibiε, kere ya u Si ni, deke bo ya koro i ke re lee."

⁹ Na Yesu abisa i ka, “Filipu, bo m ni ambere awo bere ace so n na a si má m? Sono kere bo wo nu mini anu m Si lee, ye nzu ti ye am na m kere am m Si n a?”

¹⁰ A yo má yarada ka m ni m Si n ti deke kun wo, nzen se? Jore n bo ma jajo ama am ni, má m tiengu jajoowa, ama, m Si bo m ni yiri ti kun ni, yo i juma.

¹¹ Bo m na, m ni m Si n ti deke kun ni, am yo m yarada. Nzen má nyini, am yo m yarada sam bo m yo bu n dee ti.

¹² Nahore ye m suse am n a. Sono kere bo i yo m yarada, yiri mmoo yó ahin sam bo m yo bu ni, na i yó bo bu tara ahin mmoo, dama m sukó m Si doo.

¹³ Na deke kere bo am fa m duma fa sereeri i, m yó i ma am, adena mini Baa ni má minem wura m Si kpiri.

¹⁴ Na nzen am ba faari m duma fa sereeri m deke be, m yó i ma am.”

Kabo Yesu jajo fa koori Awiewie Casi n su ni

¹⁵ Na Yesu ase bu ka, “Nzen am koro m, am dé m noanie maawam ni.

¹⁶ M sére m Si Nyeme, na i má am Bukafó fofore bo i bá wo am do sanja kere.

¹⁷ Yiri la Awiewie Casi n bo i se nahore ni. Durunya n nufom koro de má i, dama bu nu má i, na bekun bu kaaki si má i, ama, ambere si i, dama i wo am do, na i bá wo am nu.

¹⁸ M koori, m yaki má am na am ka ayikam, m káaki ba am do.

¹⁹ Wo ka kaan na durunya n nufom nu má m kun, ama, ambere nu m. M la ngoo n dee ti, am gusu nyá ngoo.

²⁰ Nyini ceen n ye am sí ka mini ni m Si n ti deke kun a, na mini ni ambere gusu ti deke kun wo.

²¹ Sono kere bo i de m noanie maawam, na i su i su, i mi ti bo i koro m a, na bo i koro m ni, m Si gusu koro yiri wo, na mini mmoo koro i mi, na m yí m nu kere i.”

²² Na Yudasi, má Yudasi Isikariyoti ni, ase ka, “Ya Mibie, nzu ti ye a yí u nu kere yere a, ye a yí má u nu kere má durunya n nufom a?”

²³ Na Yesu ase i ka, “Sono kere bo i koro m, i dé m noanie ni, na m Si mmoo koro i mi, na ya bá, na ya bá wo i do.

²⁴ Sono kere bo i koro má m, i dé má m noanie ni. Noanie n bo ma jajo i ni, i ti má m dee noanie, i ti m Si n bo i sunmaari m dee wo.

²⁵ M toko wo am do, ye m suse am ahin kere a,

²⁶ ama, m Si Nyeme sunma Bukafó ni, m duma n nu, yiri la Awiewie Casi ni, yiri kére am deke kere a, na i káaki tenge am su fa ko deke kere bo ma kere am ni.”

²⁷ Na wo se bu ka, “Ahoreda n ye m sufa ma am n a. M dee ahoreda n ye m sufa ma am a. Má kabo durunya n nufom ma am ahoreda ye m suma am n a. Má am ma am ahore saaki, má am soro sere.

²⁸ Am ati ka ma se ka, ‘M kó na m káaki ba am do bekun.’ Nzen má am koro m, má am ahore jo ka m sukó m Si n do, dama m Si tara m.

²⁹ Sa bo wo nya yo má lee, ye ma se am n a, adena i bá yoori, na am yo m yarada.

³⁰ M jajo má am do jore beberebe kun, dama Sitana bo i ti durunya n nufom tii ni suba. Ama, i koro yo má m pui.

³¹ M koro ka durunya n nufom si ka, m koro m Si ni, nyini dee ti ye m yo deke kere bo i se m ka m yo i n a.”

Na wo se bu ka, “Am yasu na ya ko.”

15

Kabo Yesu na yiri ti baka n ni i tii nahore su n a

¹ Na Yesu ase bu ka, “Mini ti baka n bo i su suuwa nahore su a, ye m Si Nyeme ti nyini baka n fie niefo.

² Asambaa kere bo i wo m su na i su ma, m Si kpie i ji wo, na asambaa kere bo i wo m su na i su, i kpiekpie i nyawa n yo i dongu wo, na i su nyunyumi.

³ Jore n bo m jjo maari am ni, yiri adu mo ayo am casi a.

⁴ Am wo ni mini na m gusu wo ni amberere. Kabo baka asambaa be wo ma bere bo i koro su i ngumi, ma ka i wo baka n su. So ye am gusu koro su ma, ma ka am wo m do.

⁵ Mini ti baka n a, ye amberere ti asambaam ni, sono kere bo i wo m do, na mini mmoo wo i do, i mi su suuwa nyunyumi wo, dama am koro yo ma pui, ma ka am awo m do.

⁶ Sono kere bo i wo ma m do, bu kpie i ji wo, kabo bu kpie baka asambaa na i wu n wo, na bu tien bu noo wura sin nu na bu je ni.

⁷ Nzen am wo m do, na m noanie n wo am ahore su, deke kere bo am koroori i, na am sereeri Nyeme, am nya i.

⁸ Nzen am su suuwa nyunyumi, nyini kere ka am ti m susufom a, na i wura m Si kpiri.

⁹ Kabo m Si koro m ni, so ye mini mmoo koro am a, am wo ni m koro ni.

¹⁰ Ma de m Si noanie maawam n dee ti ye i koro m a. Nzen am gusu de m noanie maawam ni, m gusu koro am so o.

¹¹ Ma se am ahin sam na am ahore jo kabo m ahore ajo n wo, na am ahore jo n ko sin su.

¹² M noanie maawa n la ka o, am koro am bengu kabo m koro am ni.

¹³ Koro be wo ma ahin koro n sin, ka sono wu i danfom ti.

¹⁴ Nzen am su m noanie maawa n su, am ti m danfom wo lee.

¹⁵ M fere am m danfom wo, m fere ma am ka m akoo kun, dama sono akoo si ma i mibie sayoowa kere, ama, deke kere bo ma ti i m Si do ni, ma fa akere am.

¹⁶ Ma amberere yiiri m a, ama, mini ayi am ase ka am ko su suuwa bo i wo bere sangha kere, na deke kere bo am ba fa m duma n sereeri m Si, i yo i ma am.

¹⁷ Noanie maawam n bo m sufa ma am la ka, am koro am bengum.”

Kabo Yesu na durunya n nufom kpo i susufom ni

¹⁸ Na Yesu asa su ase bu ka, “Nzen durunya n nufom kpo am, am si nu ka o, ba du mo akpo mini wo, ye bu nya ba sukpo am n a.

¹⁹ Nzen ma am ti durunya n nufom dee minem, ma bu koro am kabo bu koro bu bengu n wo. Ama, bo ma yi am afite durunya n nufom nu, na am ti ma durunya n nufom dee minem n ti, ye bu kpo am n a.

²⁰ Ma am ma am wara fi ka ma se am ka, akoo tara ma i mibie. Nzen bu yo kereeri m wuwuruwa, so ye bu kere am gusu wuwuruwa a. Na nzen bu yo deereri m noanie, bu de am gusu dee ni.

²¹ Bu yo am nyini n kere, m dee ti, dama bu si ma m Si bo i sunmaari m ni.

²² Nzen ma ma ba akan ma m ju jore akere ma bu, ma bu si ma ka ba yo satie, ama, kisa na ma kan akere bu ni, bu koro kan fite ma nu ka ba yo ma satie.

²³ Sono kere bo i kpo m, i kpo mini ni m Si n kere wo lee.

²⁴ Ma yo alekutura sam bo ba ɲu i. Be wo má bεε bo i koro yo nyini alekutura sam sɔ. Nzen má ma yo má nyini alekutura sam na ba ɲu má i, má be fa má bu ɲgasi ka bu ti satieyofɔm. Ama, kisa, ba ɲu nyini n kεε, na bu toko kpɔ m ni m Si ni.

²⁵ Nyini ma kabo ba kεε i Nyεmε Jɔrε Kadasi n nu n ayo yiiwa n a, ka, 'Bu kpɔ m kpɔ ɲgbεen wɔ.'

²⁶ Na Bukafɔ n bo m súnma i fite m Si dɔ na i bá am dɔ ni, yiri ti Awiewie Casi n bo i kere kabo Nyεmε ti nahɔrε su n a, yiri dí m ɲusu daani kere am a.

²⁷ Na am gusu di m daani, dama m ni amβεε wo bεε a, fite m juma n bumboori ba ju ni kisa.

16

¹ M suse am ahin sam kεε bo bu bá yo n wɔ, na bu ba yoori, na má am kaaki am sin bo m.

² Bu bá fɔn yi am fite bu tientienbunɔɔ sɔɔm n nu, ama, saɲga suba bo bu bá kun am, na bu súnsun ka bu susu Nyεmε wɔ.

³ Bu si má m ni m Si n dεε ti, ye bu yó nyini sam kεε n a.

⁴ Ma se am sam bo bu bá yo lεε, na i saɲga ba juuri, na am tɛɲge su ka m yo seeri am."

Kabo Awiewie Casi n juma ti barasu ni

Na Yesu asa su ase bu ka, "M ni amβεε yo woori bumboori n dεε ti, ye ma yo ase má am ahin kεε a.

⁵ Ama, kisa m sukaaki kɔ yiri bo i sunmaari m n dɔ ɔ, ye am be akoro abisa má m ka, 'Ye a sukɔ ni wɔ?'

⁶ Bo ma se ka m kó yaki am dεε ti, am ahore asaaki agaya.

⁷ Ama, nahɔrε ye m suse am n a, i ti am buka su wɔ ka m kɔ, dama nzen má m kɔ má, má Bukafɔ ni bá má, ama, nzen m kɔori, m súnma i am dɔ.

⁸ I baari, i kére durunya n nufɔm deke bo i ti satie, na i kére bu deke bo i ti sakpa na i kɔ atin su Nyεmε dɔ, na i káaki kere bu kabo Nyεmε bá di sɔnɔ kεε jɔrε barasu.

⁹ I kére bu deke bo i ti satie, dama bu yo má m yarada.

¹⁰ Na i kére bu deke bo i ti kpa na i kɔ atin su Nyεmε dɔ, dama m sukɔ m Si n dɔ ɔ, na am ɲú má m kun.

¹¹ Na i káaki kere bu kabo Nyεmε bá di sɔnɔ kεε jɔrε, dama Nyεmε adi Sitana bo i ti durunya n nufɔm kεε tii n jɔrε ayo i ɲgbεen.

¹² M toko la jɔrε dɔɲgu bo má m se am, ama, am koro de má i kεε kisa.

¹³ Ama, Awiewie Casi n bo i se nahɔrε n ba baari, yiri kére am nahɔrε atin kεε a, dama jɔrε kεε bo i kán kεε am ni, má i dεε yiko nu ye i fá kan, ama, kabo Nyεmε kére i ni, sɔ ye i kán, na i kére am sam bo bu bá yo ni.

¹⁴ Yiri wúra m kpiri a, dama i kán m ɲu jɔrε kere am.

¹⁵ Deke kεε bo i ti m Si dεε, i ti m dεε wɔ, nyini dεε ti ye ma se am ka, i kán m ɲu jɔrε kere am n a."

Kabo Yesu kaanri ahoresaaki ni ahorejɔ jɔrε ni

¹⁶ Na Yesu ase bu ka, "Wɔ ka kaan na am ɲú má m, ama, i ba yoori kaan buka su na am ɲú m bekun."

¹⁷ Na i susufɔm n nbem abisa bu ɲuɲu nu ka, "Nzu jɔrε ye i jɔjɔri i sɔ n a? I ɲa, wɔ ka kaan na ya ɲú má i, ama, i ba yoori kaan buka su, ya ɲú i bekun. Ye wɔ kaaki ase bekun ka, i sukɔ i Si dɔ ɔ."

18 Na ba kaaki abisa bu n̄n̄u nu ka, “Ye ahin d̄e, i ba yoori kaan n bu la ka se w̄ l̄e? Ya si má i j̄j̄owa n bu.”

19 Na Yesu afa nu ka bu koro ka bu bisa i nyini j̄j̄owa n bu w̄. Na w̄ bisa bu ka, “Bo m seeri ka w̄ ka kaan na am n̄ú má m, ama, i ba yoori kaan buka su, am n̄ú m bekun n ye am subisa am n̄n̄u nu, na am si i bu, nzen se?”

20 Nah̄e ye m suse am a, am̄ere bá sun na am k̄ko, ama, na durunya n nuf̄m bere ahore j̄. Am̄ere ahore bá saaki, ama, am ahoresaaki ni bá kaaki ahorej̄.

21 Nzen bara anya akutu ka i wu baa, i la ahoresaaki, dama i wahara sanḡa ye w̄ ju a, ama, i ba wuuri baa n wieeri, i t̄nge má i wahara n bo w̄ sin n su kun, dama baa n bo w̄ wu i durunya n nu n ti, i ahore aj̄.

22 I ti s̄ o, am gusu d̄, kisa, am la ahoresaaki, ama, m bá n̄u am bekun, na am ahore j̄ bo s̄n̄o koro dé má am ahorej̄ n am d̄.

23 Nyini c̄en ni, am b̄isa má deke be busu m d̄. Nah̄e ye m suse am a, deke k̄ere bo am sereeri m Si ni, m duma n nu, i yó i ma am.

24 Am nya sere má m Si deke be m duma n nu haari ni nyuma. Kisa am sere i, na am nyá i, na am ahore j̄ k̄o sin su.”

Kabo Yesu akunma durunya n ni

25 Na Yesu ase bu ka, “Ma se am ahin n k̄ere anyund̄ere nu w̄ l̄e, sanḡa suba bo m bó má am anyund̄ere kun, ama, m kán m Si n̄u j̄re k̄ere kpain k̄ere am a.

26 Nyini c̄en ni, am fá m duma n fa sere Nyem̄e, má mini sere Nyem̄e ma am a.

27 Yiri m Si ni i tii koro am a, dama am koro m na am ayo yarada ka m fite i d̄ o.

28 M fiteeri m Si d̄ o baari durunya n nu a, ye kisa m sufite durunya n nu kaaki k̄o i d̄ a.”

29 Na Yesu susuf̄m n ase i ka, “Kisa a j̄j̄o ya d̄ weinwein w̄, a bo má ya anyund̄ere kun.

30 Ama, kisa ya si ka a si deke k̄ere, w̄ ti má ye ni ka be bisa u deke be, dama kana bu ba bisa u deke be, a si kabo bu koro ka bu bisa u ni, nyini ma ya si ka a fite Nyem̄e d̄ n a.”

31 Na w̄ bisa bu ka, “Am ayo yarada kisa?”

32 Ama, sanḡa suba bo w̄ ju awie, bo am k̄ere bá sandi yaki mini n̄gumi, na s̄n̄o k̄ere k̄o i dika, ama, m wo má m n̄gumi, dama m Si Nyem̄e wo m d̄.

33 Ma se am ahin k̄ere na am la ahoreda m d̄. Am n̄ú kekereke durunya n nu, ama, am fa ahoresi, dama ma kunma durunya ni.”

17

Kabo Yesu sereeri Nyem̄e maari i susuf̄m n ni

1 Yesu seeri s̄o wieeri ni, na w̄ ye i tii su anie angoro na w̄ sere Nyem̄e. I n̄a, “M Si, sanḡa n aju. Wura mini u Wa n k̄piri, adena m gusu wura u k̄piri.

2 Dama a ma m yiko ka m nie min̄em k̄ere su, na bo a fa bu ama m ni, m má bu n̄ḡo bo i la má awieeri.

3 W̄o n̄gumi ti Nyem̄e nah̄e su a. Na min̄e bo bu si u, na bu si mini Yesu Kristo n bo a sunmaari m ni, bere la n̄ḡo bo i la má awieeri n a.

4 Ma wura u k̄piri durunya n nu, dama ma yo juma n bo a ma m ka m yo i n awie.

⁵ M Si, sanja bo durunya nya bo má i bu ni, m yo woori u dɔ ɔ, ye a wura m kpiri a. Kisa, kaaki wura m kpiri u dɔ bekun.

⁶ Minem n bo a yiiri bu fiteeri durunya n nu fen, ma kere bu kabo a ti barasu. Bu tiiri u dɛem wɔ, ye a faari bu maari m a, ye ba de u nɔanie n a.

⁷ Kisa bu si ka deke kere bo a fa ama m ni, fite u dɔ ɔ.

⁸ Dama nɔanie n kere bo a jɔjɔ fa maari m ni, m gusu ajɔjɔ ama bu, ye ba de i, ye ba si ka i ti nahɔre ka m fiteeri u dɔ ɔ, ye ba yo yarada ka wɔrɔ sunmaari m a.

⁹ M susere u ma bere wɔ, má bo bu wo durunya n nu ni, ama, minem bo a fa bu ama m ni, bere ye m sere u ma bu a, dama bu ti u dɛe minem wɔ.

¹⁰ M minem kere ti u dɛem wɔ, ye u dɛem gusu kere ti m dɛem, ye ba ma minem anu m jirima woowa ni.

¹¹ Kisa, m suba u dɔ lɛɛ, m ká má durunya n nu fen kun, ama, bere ká fen wɔ. M Si, wɔrɔ bo a ti casi ni, yo bu kanda u duma n bo a fa maari m n yiko nu, na bu yo deke kun, kabo mini ni wɔrɔ ti kun ni.

¹² Sanja bo m woori bu dɔ ni, m yoori bu kanda u duma n bo afa ama m yiko nu wɔ. M niɛeri bu su, na bu be aka má ngbɛɛn, má ka bo wɔ ka ngbɛɛn haari i ni kunnu ni, adena kabo ba kere i Nyeme Jɔre Kadasi n nu n yo yiiwa.

¹³ Kisa m suba u dɔ lɛɛ, ama, m toko wo durunya n nu ye m jɔjɔ ahin jɔjɔwɔ n na bu nya m dɛe ahorejɔ n kɔ sin su.

¹⁴ Ma fa u nɔanie n afa ama bu, na kabo m ti má durunya n nu fen fɔ be ni, sɔ ye bu gusu ti má durunya n nu fen fɔm a, nyini dɛe ti, durunya n nufɔm koro má bu jɔre.

¹⁵ M susere má u ka a yi bu fite durunya n nu wɔ, ama, m susere u ka a kanda Sitana satieyofɔ ni, na i yaki bu.

¹⁶ Kabo m ti má durunya n nu fen fɔ ni, sɔ ye bu gusu ti má durunya n nu fen fɔm a.

¹⁷ U nɔanie n ti nahɔre wɔ. Ma u nɔanie n bo i ti nahɔre n yo bu casi.

¹⁸ Kabo a sunmaari m durunya n nu ni, sɔ ye m gusu asunma bu a.

¹⁹ Bere dɛe ti, ye ma fa m ɲu ama u a, adena bere gusu fa bu ɲu ma u nahɔre n dɛe ti.

²⁰ M susere má u ma má bere ngumi wɔ, ama, m susere u ma minem bo bu bá yo m yarada ahinm dɛe nɔanie kaanwa n ti wɔ.

²¹ M Si, m sere u ka a ma bu kere yo kun, kabo a wo m dɔ, na m gusu wo u dɔ ni, ma bere gusu wo ya dɔ, adena durunya n nufɔm yo yarada ka wɔrɔ sunmaari m a.

²² U jirima woowa n bo a maari m ni, ma fa ama bu, na bu yɔ kun kabo m ni wɔrɔ ti kun ni.

²³ M wo bu dɔ, na u gusu wo m dɔ, nyini ma bu yo deke kun kabo a koro ka bu ti n a, na durunya n nufɔm si ka wɔrɔ sunmaari m a, na kabo a koro m ni, a koro u minem gusu sɔ ɔ.

²⁴ M Si, m koro ka a ma minem bo a fa bu ama m n bá wo m dɔ, deke bo m wo ni, na bu ɲú m jirima woowa n bo a fa maari m ni, dama sanja bo a nya ayi má durunya n ye a koro m a.

²⁵ M Si, wɔrɔ yo sa kere bo i kɔ atin su n a, durunya n nufɔm si má u, ama, mini si u, na ahinm gusu si ka wɔrɔ sunmaari m a.

²⁶ Ma kere bu kabo a ti barasu, na m toko sukere bu wɔ, adena koro n bo a koro m n wó bu nu, na m ni bere yɔ kun.”

18

Kabo bu kɔɔri ka bu kɔ tara Yesu ni

¹ Yesu sereeri Nyeme wieeri ni, na i ni i susufom n ayasu ako akpie Kedoron nzuetin n buekun do, deke bo baka fie be wo ni, na ba ko awura baka fie n nu.

² Yudasi bo i suto Yesu ma i kpofom ni si dika n nu, dama Yesu ni i susufom nati tien bu noo do o sanja sanja.

³ Na Yudasi aba do. Sojam su i su, ni tintinijinafom bo Nyeme sayoowa dnguyofom nkpienkpienm n ni Farasifom asunma bu n buka su. Bu bita fitanam, ni wura sinm, ni biesoya nengem.

⁴ Yesu si sa kere bo i ba tu i ni, na wo kpa bu atin abisa bu ka, "Am koro nma a?"

⁵ Na ba bo i nu ase i ka, "Ya koro Yesu Nazaretifo n wo." Na wo se bu ka, "Yiri la mini." Yudasi bo i toori i ni jina sojam n nu.

⁶ Yesu seeri ka, "Yiri la mini" ni, na bu kere akoko bu sin akpakpaasi asienngu.

⁷ Na wo kaaki abisa bu bekun ka, "Am koro nma a?" Na ba se i ka, "Ya koro Yesu Nazaretifo n wo."

⁸ Na wo se bu ka, "Ma se am ka yiri la mini. Nzen am koro mini wo, am ma ahin minem bere ko."

⁹ I seeri so ni, na i noanie bo i yo joro i n ayo yiiwa, ka, "Minem bo a fa bu ama m ni, m ma ma bu be ka ma ngenen."

¹⁰ Nyini sanja Simon Petoro jina bita takobe, na wo cin aworo i akpie sono be sui, i saa fomboro dee ni, nyini sono n ti Nyeme sayoowa dnguyofom kpien n akoo o. Bu fere i ka Malikusi.

¹¹ Na Yesu ase Petoro ka, "Fa u takobe n wura i bue nu. A na ma m nu anyumboro n bo m Si afa ama m n wo?"

Kabo bu taraari Yesu kori bu kpien Anasi do ni

¹² Na sojam, ni bu kpien, ni Yudafom nkpienkpienm n tintinijinafom n atara Yesu acici i nyama.

¹³ Bu du mo faari i kori sono be bo bu fere i ka Anasi n do o ka. Anasi sibi la Kayafasi. Kayafasi ti Nyeme sayoowa dnguyofom kpien n nyini afo n a.

¹⁴ Yiri Kayafasi ti bo i yo seeri Yudafom ka i ti ye ni ka sono kun wu ma minem kere n a.

Kabo Petoro keteeri ka i si ma Yesu ni

¹⁵ Bu taraari Yesu sukoo ni, na Simon Petoro ni Yesu susufo n kun asu i su ako. Nyeme sayoowa dnguyofom kpien n si nyini Yesu susufo n dee ti, ye i suuri Yesu su wuraari yiri Nyeme sayoowa dnguyofom kpien n gisan nu a.

¹⁶ Ama, na Petoro yiri aka ajina dasin ano n nu, na yiri susufo n bo Nyeme sayoowa dnguyofom kpien n si i ni afite, na wo ba afani n bo i jina kanda ano n do, na wo sere i atin na wo fa Petoro awura.

¹⁷ Na afani n bo i jina kanda ano n abisa Petoro ka, "Woro mmoo ti nyini sono n susufom nu kun wo, ma so?" Na Petoro ase i ka, "Ai, m ti ma bu kun."

¹⁸ Ayere sanja lee, na Nyeme sayoowa dnguyofom kpien ni ngbefenem, ni tintinijinafom atoro sin wo tun su, na Petoro gusu ajina bu bi sutun sin n be.

Kabo Nyeme sayoowa dnguyofom n kpien n diiri Yesu jore ni

¹⁹ Na Nyeme sayoowa dnguyofom n kpien n abisa Yesu fa ko i susufom n jore, ni kabo i kereewa n ti barasu ni.

20 Na Yesu ase i ka, “Sanja kere m jojo sono kere nyunu wo, na m kere bu Nyeme noanie ni bu tientienbunoo soom n nu, ni Nyeme Sereebiri Awuru n nu, deke bo Yudafom kere tien bu noo ni, m kan ma jore be fiewa nu.

21 Ye nzu ti ye a bisa ma? Bisa minem bo bu tiiri m kereewa n ka m seeri bu se wo. Bere si kabo m seeri bu na.”

22 Yesu seeri so ni, na tintinijinafo n bo i jina dodo i n abo i nyoonu, na wo bisa Yesu ka, “So ye a bo Nyeme sayoowa dnguyofom kpien n nu a?”

23 Na Yesu ase i ka, “Nzen ma jojo jore bo wo ko ma atin su, kan na m ti. Ye nzen bo ma se n ti nahore, nzu ti ye a bo m nyoonu a?”

24 Na Anasi ama ba fa i ni nyama ciciiwa n so ako Kayafasi bo i ti Nyeme sayoowa dnguyofom n kpien n do.

Kabo Petoro keteeri bekun ka i si ma Yesu ni

25 Simon Petoro jina woori sin n tun su ni, na ba bisa i ka, “Woro mmoo ti i susufom kun wo, ma so?” Na Petoro akete, i na, “Ai, m ti ma bu kun.”

26 Na Nyeme sayoowa dnguyofom kpien n akoo be, i dikafu la sono n bo Petoro kpie yiiri i sui ni, na wo se Petoro ka, “Ma nu ma u ka a wo i bi baka fie n nu do?”

27 Na Petoro akete bekun, kpena akonyuma abo.

Kabo bu faari Yesu baari Gomina Pilato do ni

28 Na alecin ngarama fun na ba fa Yesu afite Kayafasi dika n nu, na ba fa i ako gomina n dika, bu fere gomina n ka Pilato. Yudafom awura ma gisan nu, adena ma bu yo bu nu fin, na bu koro di ma Butara eenkpiri ni.

29 Nyini ti, na Pilato afite aba bu do dasin abisa bu ka, “Ahin sono n bo am afa i aba m do ni, i ngasi la bono?”

30 Na ba se i ka, “Nzen ma wo do ma ngasi be, ma ya fa ma i ba ma u do.”

31 Na Pilato ase bu ka, “Ambere mmoo ni am tii fa i ko di i jore kabo am jore di atin kere ni.” Na Yudafom n ase i ka, “Ya la ma atin bo ya kun sono.”

32 Bu seeri so ni, adena Yesu noanie n bo i seeri kabo i ba wu barasu n yo yiiwa.

33 Na Pilato akaaki awura gisan n nu, na wo fere Yesu abisa i ka, “Woro ti Yudafom Feme n a?”

34 Na Yesu abisa i ka, “U dee sunsunni nu lee, nzen be seeri u a?”

35 Na Pilato abisa i ka, “M ti Yudafu o? U minem ni Nyeme sayoowa dnguyofom nkpienkpienm ni faari u baari m do a. A do nzu ngasi wo?”

36 Na Yesu ase i ka, “M femeya n ti ma durunya n nu fen femeya. Nzen ma m femeya n ti durunya n nu fen femeya, ma m susufom ba kun lue m busu, na ma be koro tara ma m wura ma Yudafom saa nu. Ama, m femeya n ti ma durunya n nu fen dee.”

37 Na Pilato abisa i bekun ka, “Nka a ti feme wo lee?” Na Yesu ase i ka, “Bo a na m ti feme ni, i ti so o. Bu wuuri m durunya n nu ka m ba di nahore n daani wo. Na sono kere bo i su nahore n su, i de m noanie n wo.”

38 Na Pilato abisa i ka, “Nahore la nzu wo?”

Kabo bu maari noo ka bu kun Yesu ni

Pilato seeri i so, na wo kaaki afite ako Yudafom do ako ase bu ka, “Ma nu ma i ngasi be wo do i.

39 Ama, am la am yoowa be bo i ma m atin ka m yi dansaraka kun ma am Butara eenkpiri n di sanja. Am koro ka m yi ambere Yudafom Feme ni ji ma am a, nzen se?”

40 Na ba tien ase ka, "Má yiri. Ya koro Barabasi wɔ." Barabasi ti sɔnɔ bo i nati fin minem di wɔ.

19

1 Na Pilato ama ba fa Yesu ako afin i ngbere.

2 Na sojam n awura i tanlɛɛ kɔkɔrɛ yorom ka femɛya dɛɛ su, na ba fa buwe aɲɔ i ka kaba dɛɛ su, na ba fa aforo i tii.

3 Na bu suba i dɔ suyo i anzasi se i ka, "Yudafɔm Fɛmɛ, ya yo u anse." Na ba bo i nyɔɔnu.

4 Na Pilato akaaki afite aba Yudafɔm dɔ aba ase bu ka, "Am ti fɛn, m sufa i fite ba kere am wɔ, na am si ka ma ɲu má ɲgasi bo wɔ do i."

5 Yesu tie fiteeri ni tanlɛɛ kɔkɔrɛ yorom ni, ni i tii buwe kaba n ni, na Pilato ase bu ka, "Am niɛ, sɔnɔ n yaa."

6 Deke bo i tie fiteeri na Nyemɛ sayoowa dɔɲguyofɔm nkpienkpienm ni tintinijinafɔm ɲuuri i sɔ ni, kpenɲa na ba tien, bu ɲa, "Am kpama i baka jaanu n su na i wu. Am kpama i." Na Pilato ase bu ka, "Amberɛ mmɔɔ ni am tii fa i kɔ kpama i e. Mini, ma ɲu má ɲgasi bo wɔ do i."

7 Na ba se i ka, "Ya la nɔaniɛ kpamaawa be, wɔ yo daka ka i wu, dama i ɲa i ti Nyemɛ Wa a."

8 Pilato tiiri ka Yesu ɲa i ti Nyemɛ wa ni, na sɛrɛ ati i abuka su.

9 Na wɔ kaaki awura gisan n nu abisa Yesu ka, "A fite ni wɔ?" Ama, Yesu abɔ má i nu.

10 Na Pilato akaaki abisa i ka, "A bɔ má m nu? A si má ka m la yiko bo m koro ma bu fa u ji, na m kaaki la yiko bo m koro ma bu kpama u baka jaanu n su?"

11 Na Yesu ase i ka, "Nzen má Nyemɛ ama má u atin, maala má yiko bo a koro yo m pui. Nyini ti, sɔnɔ n bo i faari m wuraari u saa nu ni, i satie yoowa tara u dɛɛ."

12 I seeri sɔ ni, na Pilato akpi kabo i yo na i yaki Yesu nu ji. Ama, na Yudafɔm sutientien suse ka, "Nzen a yakiiri i nu jiiri, u ni Fɛmɛ Siza danfoya awie lɛɛ, dama sɔnɔ kɛrɛ bo i yo i ɲu ka i ti femɛ, i mi ti Fɛmɛ Siza kpɔfɔ ɔ."

13 Pilato tiiri sɔ ni, na wɔ fa Yesu afite, na wɔ tana jɔrɛ diibiri n su bimbindi n su. Yudafɔm anie nu bu fere i ka *Gabata*, i bu la ka, deke bo ba fa yabue asese su ayo i dɔɲgu ni.

14 Nyini cɛɛn n tiiri bu Butara cɛɛnkpiri n kpokpo cɛɛn wɔ, wiɛsu kerefi buru ni nnyɔ sanɲa a. Na Pilato ase Yudafɔm ka, "Am femɛ n yaa."

15 Na ba kaaki atien ase ka, "Am fa i kɔ, am fa i kɔ kpama i baka jaanu n su." Na Pilato abisa bu ka, "M fá am femɛ n kɔ kpama i baka jaanu n su?" Na Nyemɛ sayoowa dɔɲguyofɔm nkpienkpienm n ase ka, "Ya la má femɛ be sin Fɛmɛ Siza ɲu."

16 Bu seeri sɔ wieeri ni, na Pilato anya afa i ama bu ka bu kɔ kpama i baka jaanu n su.

Kabo bu kpamaari Yesu baka jaanu n su ni

Na ba de Yesu ako.

17 Na yiri ni i tii asɔ i baka jaanu n ako awɔrɛ n bo bu fere i ka Tereawa Woobiri ni, Yudafɔm anie nu bu fere dɔ ka *Gologota*.

18 Na ba kpama i baka jaanu n su dɔ, na ba kaaki akpama mine nnyɔ nbem adodo i, bu kpamaari kun i saa fɔmbɔrɔ su, na ba kpama kun i saa biɛ su, na Yesu awo bu afien.

19 Na Pilato akɛrɛ kɛrɛɛwa be amata i tii su baka jaanu n su. Kɛrɛɛwa n la ka, "Yesu Nazaretifo n bo i ti Yudafɔm Fɛmɛ n lɛɛ."

²⁰ Bu kerɛeri nyini kerɛewa n Yudafɔm, ni Romafɔm, ni Girikifɔm dɛɛ aniem kerɛ nu wɔ, na Yudafɔm dɔŋgu aŋu i, na ba kan i, dama deke bo bu kpamaari i n waari má ni mie kunnu.

²¹ Na Nyɛmɛ sayoowa dɔŋguyofɔm nkpienkpiɛnm n akete ase Pilato ka, “Má a kerɛ ka, ‘Yudafɔm Fɛmɛ n lɛɛ,’ ama, kerɛ ka, ‘Ahin sɔnɔ ŋa, “Mini ti Yudafɔm Fɛmɛ n a.” ’ ’ ”

²² Na Pilato ase bu ka, “Bo ma kerɛ i ni, nyini lɛɛ wɔ.”

²³ Sojam n kpamaari i baka jaanu n su wieeri ni, na ba kpaaki i nenɛge wuraawam nu busu nna, na bu kerɛ afa kun kun, na wɔ ka i tanlɛɛ yorom bo i wo i bu na i wura be gɔ su ni, i la má gise kpaabiri, ama, ba wu i kerɛ angoro kɔ jura asiɛŋgu wɔ.

²⁴ Na ba se ka, “Má am ma ya sɔnsɔn i nu, ama, am ma ya tu mbaa na ya si bo i dí i.” Bu yoori sɔ adena Nyɛmɛ Jɔrɛ Kadasi n yo yiiwa, bo ba kerɛ i ka,

“Ba kpaaki m nenɛge wuraawam nu,
na ba tu mbaa m tanlɛɛ n bo i wo m bu n busu ni.”
Nyini ti ye sojam yoori sɔ n a.

²⁵ Na Yesu ni, ni Yesu ni niɛmabara, ni Kolopasi yi Mariya, fa kɔ tuuri Mariya n bo i fite Magadala n jina dodo deke bo bu kpamaari Yesu ni.

²⁶ Yesu niɛ ŋuuri i ni ni, ni i susufɔ n bo i koro i agaya n ka bu jina dodo i ni, na wɔ se i ni n ka, “M ni, niɛ fɛn, u wa la ahin.”

²⁷ Na wɔ se i susufɔ n gusu ka, “Niɛ fɛn, u gusu ni lɛɛ.” Nyini cɛɛn n kerɛ na Yesu susufɔ n afa Yesu ni, na wɔ kɔ awo i dɔ.

Kabo Yesu wuuri ni

²⁸ Nyini sin na Yesu asi nu ka wɔ yo i juma kerɛ awie, na wɔ se ka, “Nzuehɔɛ ti m wɔ.” I seeri sɔ ni, adena Nyɛmɛ nɔɔniɛ n yo yiiwa.

²⁹ Nyini saŋga dundu be taka berɛ, wɔ yi ni nzan gagaraki, na ba fa mɛnɛ afa awɔ baka su afa abo nu alaandi atɔ i nɔɔ.

³⁰ Yesu de nu wieeri ni, na wɔ se ka, “Wɔ wie.” Na wɔ biri i tii, na wɔ yo Nyɛmɛ dɛɛ.

Kabo bu wɔɔri Yesu kpɛ i nvin nu ni

³¹ Nyini cɛɛn n ti Nɔmɛyɛ cɛɛn n kpokpo cɛɛn n ti, ba koro má ka minem bo ba kpama bu baka jaanu n su n ka sense su bu Nɔmɛyɛ cɛɛn ni, dama Nɔmɛyɛ cɛɛn n bo i suba n ti cɛɛnkpɛri bambaka bu dɔ ɔ. Nyini dɛɛ ti, ye bu sereeri Pilato ka i ma bu kɔ bubu bo ba kpama bu baka jaanu n su jaam n a, na bu yi bu kɔ se bu.

³² Nyini ti, na sojam n akɔ abo abubu sɔnɔ n kun jaam, ni nyiŋga n gusu dɛɛ, berɛ n bo bu kpamaari bu dodoori Yesu ni.

³³ Ama, saŋga bo bu ba kpuraari Yesu ni, bu ŋuuri ka yiri awu, nyini dɛɛ ti, ba bubu má i jaam.

³⁴ Ama, na sojam kun afa kpɛ awɔ Yesu nvin nu, kpɛŋga na nzue ni mbunja susɔŋgi fite.

³⁵ Sɔnɔ n bo i nyumbaa ŋuuri i ni, yiri di i daani a, adena am yo yarada. I jɔrɛ n ti nahɔrɛ wɔ, na kabo i di daani n gusu ti nahɔrɛ wɔ.

³⁶ Ahin n kerɛ yoori, adena kabo ba kerɛ i Nyɛmɛ Jɔrɛ Kadasi n nu n yo yiiwa. Ba kerɛ ka, “I buwe kun n kpein mmɔɔ bu má.”

³⁷ Ye ba kaaki akere ka, “Minɛm bá niɛ yiri n bo ba wɔ i kpɛ n wɔ.”

Kabo bu seeri Yesu ni

³⁸ Nyini dɛɛ sin, na sɔnɔ be bo bu fere i ka Yosefu n asere Pilato atin na i yi Yesu ŋuniɛ n kɔ se i. Na Pilato ama i atin, na wɔ kɔ ayi i ŋuniɛ n baka jaanu n su akɔ. Yiri Yosefu fite mie kpɛri n bo bu fere i ka Aramatiya n

su wɔ, i yo tiiri Yesu susufɔm kun wɔ, ama, i soroori Yudafɔm ahore ti, wɔ yi mǎ i ɲu fofoe nu.

³⁹ Na Nikodemo bo i yo baari Yesu dɔ kɔŋgɛ be n gusu aba, i bita ɲguin nvanvani ni tulaalɛ sangaawa, i nɔnɔri ju pobu aburana.

⁴⁰ Na ba fa Yesu ɲuniɛ ni, na ba yo i kabo Yudafɔm yo bu fuin na bu se i ni, bu faari tulaalɛ n gɔri i ɲu wɔ, na ba nya afa nzee apɔɔndi i.

⁴¹ Deke bo bu kpamaari Yesu ni, baka fie be wo dɔ. Nyini baka fie n nu yabue buɛ bo ba lokoti i ayo i faɲkunma wo dɔ, bo bu nya se mǎ fuin nu ni.

⁴² Nyini cɛɛn n ti ɲumiya cɛɛn n kpokpo n dɛɛ ti, na bekun, faɲkunma n waari mǎ ni bɛɛ ni, ye bu faari i kɔ seeri nu n a.

20

Kabo Yesu tengeeri i yiwee n nu ni

¹ Yudafɔm bakue n bumboori, mɔnɛ cɛɛn ɲgarama fuun, nyini sanga dika toko ti liim, na Mariya n bo i fite Magadala n akɔ yabue buɛ faɲkunma n su. I kɔ juuri ni, i ɲuuri ka ba yi yabue bambaka n bo bu fa tɔri faɲkunma n anɔ ni.

² Na wɔ ɲmati akɔ Simon Petoro ni Yesu susufɔ n bo i koro i agaya n dɔ, na wɔ se bu ka, “Ba yi Mibiɛ n faɲkunma n nu, ya si mǎ deke bo ba fa i akɔ ase.”

³ Na Petoro ni i lamɔkɔ n ayasu ka bu kɔ faɲkunma n su.

⁴ Bu mine nnyɔ ni sunmati kɔ a, ama, na kun n anmati asin Petoro ɲu adu mɔ aju faɲkunma n su.

⁵ Na wɔ kasi anie faɲkunma n nu, anu ka nzee n da, ama, wɔ wura mǎ faɲkunma n nu.

⁶ Ama, na Simon Petoro yiri aka sin aba aju, na wɔ wura faɲkunma n nu, anu ka nzee n da,

⁷ na wɔ ɲu ka tani n bo bu fa ciinri Yesu tii ka kaba n gusu bubu nu da i ɲgumi.

⁸ Nyini sanga na yiri n bo i du mɔ juuri faɲkunma n su n awura nu, i ɲuuri i ni, na wɔ yo yarada kabo Yesu yo seeri bu ni.

⁹ Ama, ba nya asi mǎ Nyeme Jɔɛ Kadasi n bo i ɲa Yesu tɛnge i yiwee n nu n bu.

¹⁰ Na ba kaaki akɔ awuru.

Kabo Yesu yiiri i ɲu kereeri Mariya n bo i fite Magadala ni

¹¹ Ama, na Mariya aka ajina faɲkunma n su, na i susun. I wo sun su ni, na wɔ kasi anie faɲkunma n nu.

¹² Na wɔ ɲu mɛɛkɛm nnyɔ ka bu wura tanlɛ fofoe tana deke bo bu faari Yesu ɲuniɛ n daari ni, kun tana deke bo bu faari i tii wɔri ni, na nyinga gusu tana deke bo bu faari i jaa wɔri ni.

¹³ Na ba bisa i ka, “Bara, nzu ti ye a sun a?” Na wɔ se bu ka, “Ba yi m Mibiɛ n wɔ, ye m si mǎ deke bo ba fa i ase.”

¹⁴ I seeri sɔ ni, na wɔ kaaki anie i sin. I ɲuuri ka Yesu jina, ama, wɔ si mǎ ka Yesu lɛɛ.

¹⁵ Na Yesu abisa i ka, “Bara, nzu ti ye a sun a? A koro ɲma a?” Mariya ɲuuri i sɔ ni, i sunsun ka fie n niefɔ a. Na wɔ se i ka, “M jakpiɛn, nzen wɔɔ ayi i akɔ ase deke be a, kere m na m kɔ fa i.”

¹⁶ Na Yesu afere i ka, “Mariya.” Na wɔ kaaki anie Yesu dɔ, na wɔ se i ka, “Raboni.” Yudafɔm dɛɛ anie n nu, i bu la ka, ya Kerefɔ.

¹⁷ Na Yesu ase i ka, “Má a fa u saa kan m, dama ma nya akò má m Si dɔ, ama, kò na a kò se m ninbaam n ka, ‘M sukò m Si bo i ti am Si ni, ni m Nyeme bo i ti amberɛ mmɔɔ Nyeme n dɔ.’ ”

¹⁸ Na Mariya n bo i fite Magadala n akò ase bu ka, “Ma ɲu Mibiɛ ni.” Na wɔ se bu jɔrɛ n kɛrɛ bo Yesu akan akere i ni.

Kabo Yesu yiiri i ɲu kereeri i susufɔm ni

¹⁹ Na bakue n bumboori, mɔnɛ cɛɛn n naaso sanɣa, na Yesu susufɔm woori sɔɔ be nu, na ba tu anɔ n agɔ bu ɲu, dama bu soroori Yudafo nkpiɛnkpiɛnm wɔ. Na Yesu aba ajina bu afiɛn ase bu ka, “Am ma am ahore da.”

²⁰ I seeri sɔ wieeri ni, na wɔ fa i saam deke bo bu boori i bulaari ni, ni i nvin deke bo bu wɔɔri i kpiɛ n akere bu. I susufɔm ɲuuri i sɔ ni, na bu ahore ajo.

²¹ Na wɔ kaaki ase bu ka, “Am ma am ahore da, kabo m Si sunmaari m ni, sɔ ye mini gusu susunma am a.”

²² I seeri sɔ wieeri ni, na wɔ yi i ɲumi agɔ bu ɲu, na wɔ se bu ka, “Am de Nyeme Awiewie Casi ni.

²³ Sɔnɔ kɛrɛ bo am faari i satie ceeri i, Nyeme fá i satie ce i. Ama, sɔnɔ kɛrɛ bo am fa má i satie ce má i, Nyeme fá má i satie ce má i.”

Kabo Yesu yiiri i ɲu kereeri Tomasi ni

²⁴ Sanɣa bo Yesu yiiri i ɲu kereeri i susufɔm buru ni nnyɔm ni, bu nu kun awo má bu nu. Yiri la Tomasi bo bu fere i ka Ndaa ni.

²⁵ I ba baari ni, na ba se i ka, “Ya ɲu Mibiɛ ni.” Na wɔ se bu ka, “Má ka ma ɲu i saa kunma n bo bu kpamaari i ni, na m fa m saa maraka wura nu, na m fa m saa wura i nvin nu deke bo bu wɔɔri i kpiɛ ni, m yó má yarada fieo.”

²⁶ Na i lemɔcɛ cɛɛn, na ba wo sɔɔ n nu bekun. Nyini cɛɛn ni, Tomasi gusu woori bu nu, na ba yandi atu anɔ ni. Na Yesu aba ajina bu nu, na wɔ se bu ka, “Am ma am ahore da.”

²⁷ Na wɔ se Tomasi ka, “Fa u saa maraka ba wura m saa kunma n nu, na a fa u saa ba wura m nvin kunma n nu. Na a yaki sika na a yo yarada.”

²⁸ Na Tomasi ase i ka, “Wɔrɔ ti m Mibiɛ, ni m Nyeme a.”

²⁹ Na Yesu ase i ka, “Bo a ɲu m ti ye a yo yarada? Terefiɛ wo bu dɔ, bo bu nya ɲu má m na bu yo yarada ni.”

Deke bo i ti na bu kerɛeri ahin kadasi n ni

³⁰ Yesu yo yoori alekutura sam beberebe na i susufɔm n anɲu i, ama, ba kɛrɛ má i kɛrɛ awura má ahin kadasi n nu.

³¹ Ama, ba kɛrɛ ahinm ni, adena am yo yarada ka Yesu Nyeme Wa ni ti Kristo n a, Tiidefo n bo Nyeme ase ka i súnma i ni, na am yarada ni ma am nya ɲɔɔ i dɛɛ duma n nu.

21

Kabo Yesu yiiri i ɲu kereeri i susufɔm n bekun ni

¹ Nyini sin, na Yesu ayi i ɲu akere i susufɔm n bekun kunma kpiri n bo bu fere i ka Tiberiya n nɔɔ su. Kabo i faari i ɲu kereeri bu n la ka,

² i susufɔ nbem atien bu nɔɔ, berɛ la Simon Petoro, ni Tomasi n bo bu fere i ka Ndaa ni, ni Natanieli n bo i fite Kana bo i wo Galili asien n su ni, ni Zebedi nbaa nnyɔm ni, ni i susufɔ nnyɔ nbem.

³ Na Simon Petoro ase bu ka, “M suko jombaa tara lee.” Na ba se i ka, “Yɛrɛ mmɔɔ sù u su kò ɔ.” Na ba wura lee n nu akò, bu woori nzue n nu haari ale kò sucin, ba nya koro tara má pui.

⁴ Sangá bo ale ba ciinri wein ni, na Yesu aba ajina kunma n nɔɔ su, ama, i susufɔm n asi má ka yiri lɛɛ.

⁵ Na wɔ bisa bu ka, “M nbaam, am anya má jombaa, má sɔ?” Na ba se i ka, “Ai, ya nya má be.”

⁶ Na wɔ se bu ka, “Am sandi am diendie n lee n fɔmbɔɔ su dɛɛ bue ni, am nyá be.” Bu sandiiri ni, na ba tara jombaa beberebe, haari ba koro ama má diendie n su.

⁷ Na Yesu susufɔ n bo i koro i agaya n ase Petoro ka, “Ya Mibie lɛɛ.” Deke bo Petoro tiiri ka, bu Mibie lɛɛ ni, nyini sangá i jina i nuniɛ ngbɛɛn wɔ. Na wɔ yo ndende afa i tanlɛɛ abo i wi nu, na wɔ ti ato nzue n nu.

⁸ Ama, na i beɲgu susufɔm n bo bu wo lee n nu ni, sucin diendie n bo wɔ yi ni jombaa ni, na bu fa ba kunma n nɔɔ su ni. Deke bo bu wo n ni kunma n nɔɔ su n waari má, i tiiri ajaari natiiwa yaa kun wɔ.

⁹ Bu cin kɔ juuri kunma n nɔɔ su ni, na bu fiteeri lee n nu ni, bu njuuri ka sinmɔnɛ da, jombaa nana su, kɔnɔ da bɛɛɛ.

¹⁰ Na Yesu ase bu ka, “Am fa jombaa n bo am atara bu kisa n be bra.”

¹¹ Na Simon Petoro awura lee n nu, na wɔ cin diendie n bo wɔ yi ni jombaa ngbingbiri n aba ahɛmɛ. Jombaa n kɛɛ kɔ yasuuri yaa ni aburunu ni nsan a, ama, haari ni nyini jombaa beberebe n kɛɛ, diendie n ati má.

¹² Na Yesu ase i susufɔm n ka, “Am ba yo daraka.” Bu be abo má su, na i bisa i ka, “Wɔɔ nma?” dama bu kɛɛ si ka bu Mibie n a.

¹³ Na Yesu aba afa kɔnɔ n ama bu, na wɔ fa jombaa n gusu abuka bu su.

¹⁴ Ahin yoori kpe nsan su, bo i yiiri i nju kereeri i susufɔm n a, sangá bo i tengeeri i yiwee n nu ni.

Kabo Yesu ni Petoro boori anzama ni

¹⁵ Bu yoori daraka n wieeri ni, na Yesu abisa Simon Petoro ka, “Yohane wa Simon, a koro m tara kabo nyingam ni koro m ni?” Na wɔ se i ka, “ɛɛn, m Mibie, wɔɔ mmɔɔ si ka m koro u.” Na Yesu ase i ka, “Nie m nbɔmbaam dika.”

¹⁶ Na wɔ kaaki abisa i kpe nnyɔ su ka, “Yohane wa Simon, a koro m?” Na Petoro ase i ka, “ɛɛn, m Mibie, wɔɔ mmɔɔ si ka m koro u.” Na Yesu ase i ka, “Nie m nbɔɛm dika.”

¹⁷ Na wɔ kaaki abisa i kpe nsan su ka, “Yohane wa Simon, a koro m?” Na Petoro ahore asaaki kabo wɔ bisa i kpe nsan su kɛɛ ka, i koro i ni? Na Petoro ase i ka, “M Mibie, wɔɔ si deke n kɛɛ a, a si ka m koro u.” Na Yesu ase i ka, “Nie m nbɔɛm dika.”

¹⁸ Nahɔɛ ye m suse u n a, ka sangá bo a yo ti gbɛfɛnɛ ni, wɔɔ mmɔɔ ni u tii bo u wi nu kujara kɔ deke kɛɛ bo a koro a, ama, a ba yoori kpiɛn, a yɛ u saa su angoro wɔ, na be bó u kujara na i fá u kɔ deke bo a koro má ni.”

¹⁹ I seeri sɔ n na i kere kabo Petoro bá wu barasu, na minɛm nju kabo Nyɛmɛ jirima woowa n ti barasu. Nyini sin na wɔ se Petoro ka, “Su m su.”

Yesu ni i susufɔ n bo i koroori i agaya n jɔɛ

²⁰ Na Petoro akaaki anie anju ka bɛɛ susufɔm nu kun bo Yesu koro i agaya n su bu su. Yiri la bo bu yo sudi diire na i tana mataari Yesu na i bisaari i ka, “M Mibie, nma tó u n a?”

²¹ Petoro njuuri ka i su bu su sɔ ni, na wɔ bisa Yesu ka, “M Mibie, ye ahin n gusu di?”

²² Na Yesu ase i ka, “Nzen m koro ka i wo bɛɛ haari sangá bo m bá kaaki ba, i nya u sɛ? Wɔɔ su m su.”

²³ I seeri so n na labari n abara aye i susufom do, ka i nyini susufo ni wu ma. Yesu ase ma ka i wu ma, ama, i na, "Nzen m koro ka i wo bere haari sangga bo m ba kaaki ba, i nya u se?"

²⁴ Nyini Yesu susufo ni diiri ahin jorem kere daani a, yiri kaaki kereeri ahin jorem kere a, na ya si ka i daani diiwa n ti nahore n a.

²⁵ Yesu yo yoori sam dongu, bo ma bu na bu kere i kere, ma de ma ka bu nya fofoe durunya n nu, bo bu fa nyini kadasim n kere fa se.

Yesu Jaramasam SAYOOWAM

¹ Ya si Teyofilosu, m kadasi n bo m du mo kere maari u ni, m yo seeri u fa ko sam bo Yesu yo yoori bu n kere, ni kabo i kereeri minem, sanja bo i boori i juma n bu ni,

² haari fa ko ju sanja bo Nyeme faari i fun koori angoro ni. Kana i ba fun ko ni, Nyeme Awiewie Casi n de e yiko nu ye i yo seeri i jaramasam bo wo yi bu n sam bo bu ba yo n a.

³ Yesu wu tengeeri n de e sin, na wo wo durunya n nu ceen aburana, na i suyi i nu sukere bu sanja sanja su, bo i kere ka i la ngoo nahore su. Na ba nu i, na wo jojo bu do fa ko Nyeme femeya n su.

⁴ Na sanja bo Yesu ni i jaramasam ba ti enri bu noo wo diire di su ni, na wo se bu ka, "Ma am se ka am fite Yerusalem mie kpiri n nu, ama, am nminda ko ju sanja bo m Si Nyeme fa Awiewie Casi n ba ma am, yiri ye i yo seeri ka i fa ma am n a. Yiri ye m yo kaanri i jore kereeri am n a.

⁵ Yohane yo faari nzue bieeri am a, ama, i ce ma, mini fa Awiewie Casi n ba wura am nu a."

Kabo Nyeme ma Yesu fun koori angoro barasu ni

⁶ Na sanja bo Yesu ni i jaramasam n ba ti enri bu noo ni, na ba bisa i ka, "Ya Mibie, kisa ye a kaaki fa femeya n ma yere Yisarelifom, nzen se?"

⁷ Na Yesu ase bu ka, "Deke bo m Si Nyeme koro ka i yo i, ye i yo a, ambere koro si ma nyini sanja wara ceen ni."

⁸ Ama, sanja bo Awiewie Casi n ba wuraari am nu, i ma am fanja na am di m nusu daani Yerusalem mie kpiri n nu, ni Yudiya awore n kere nu, ni Samariya awore n kere nu, haari ko kpura durunya n kere pepere su.

⁹ Sanja bo Yesu seeri so wieeri ni, na Nyeme ama wo fun ako angoro, bu toko jina wo nie su ni, na yinyingu akata i nu, ba nu ma i kun.

¹⁰ Bu jina wo nie su kabo i sufun ko angoro n nu barasu ni, na mine nnyo nbem akaba aba ajina bu bi, bu wura sutura fofoe,

¹¹ na ba bisa bu ka, "Galilifom, nzu ti ye am jina nie angoro n nu so a? Yiri Yesu ni, kabo am anu ka i sufun ko angoro n nu barasu ni, am ba kaaki nu i so o lee, sanja bo i ba sukpie i nyi ba ni."

Sono bo i deeri Yudasi jinaabiri n jore

¹² Nyini sanja ni, Yesu jaramasam yo woori buka n bo bu fere i ka Oliva Buka n su wo. Do ni Yerusalem mie kpiri n nu waari ma. Na ba kpie bu nyi ako Yerusalem.

¹³ Bu ko juuri n na ba fun ako angoro soo n bo bu da nu n ni. Bere bo bu koori do n la Petoro, ni Yohane, ni Yakobo, ni Andere, ni Filipu, ni Tomasi, ni Batolomeyo, ni Matio, Yakobo bo i si la Alafeyo ni, ni Simon bo i tu ngoni fa ko i asien su ni, ni Yudasi bo i si la Yakobo ni.

¹⁴ Bu tien bu noo so o sanja kere, na bu susere Nyeme, bu ni nbaram nbem, ni Yesu ni Mariya, ni Yesu niemam ni.

¹⁵ Ceen be so o, na yaradayofom n atien bu noo, bu kere ko yasuuri mine yaa ni aburanyo o. Do na Petoro ayasu ajina bu afien ase bu ka,

¹⁶ "M ninbaam, wo yo daka ka noanie n bo Awiewie Casi n yo maari Feme Davidi noo na i kereeri i Nyeme jore Kadasi n nu n yo yiiwa, kabo i kereeri fa ko Yudasi jore ni, ka yiri du minem bo bu ba tara Yesu n mo a.

17 Yudasi yo tiiri ya nu kun wɔ, ya ni yiri sangɔ yoori juma n a.”

18 Ya si Teyofilosi, si nu ka Yudasi afa ŋwaa n bo i yoori satie na i nyaari i ni, na wɔ fa ato asien, dɔ na wɔ kpaasi, na wɔ wu, na i kunnu atie, na i ayaya kere afite ago.

19 Na Yerusalemfɔm kere ati nyini jɔre ni, nyini ti, na ba fere nyini asien ni, bu anie nu ka *Akelidama*, i bu la ka, Mbunja Asien.

20 Tɔ, na Petoro akaaki ase bu ka, “Bu yo kereeri i Kansi Jue kereewam n nu, ka,

‘Ma i dika n ka bonfo,
na ma be wo nu.’

Na wɔ kaaki akere ka,
‘Ma sɔnɔ be de i jinaabiri ni.’

21-22 Nyini ti, wɔ yo daka ka i mi ti sɔnɔ bo i woori ya nu, sangɔ bo ya Mibie Yesu woori bere na ya nati tien ya nɔɔ i dɔ ni, fite sangɔ n bo Yohane bieeri Yesu Nyeme nzue ni, haari fa kɔ juuri cɛen n bo Nyeme maari Yesu fun kɔori angoro yakiiri ya ni.”

23 Nyini ti, na ba yi mine nnyɔ ajina. Bu kun la Yosefu bo bu fere i ka Basabasi, na bu kaaki fere i ka Jusitosi ni, ye kun n la bo bu fere i ka Matiyasi ni.

24 Dɔ na ba sere Nyeme, bu ŋa, “Ya Mibie, wɔrɔ si kabo sɔnɔ kere sunsunni ti barasu a. Ahin mine nnyɔm ni nu, kere ya bo a koro ka ya yi i,

25 na i yo u jaramasa na i yo ahin juma ni, na i jina Yudasi jinaabiri, yiri bo wɔ yaki u ako i koroobiri ni.”

26 Na ba tu mbaa na bu yi mine nnyɔm nu kun, na ba yi Matiyasi abuka Yesu jaramasa buru ni kunm n su.

2

Kabo Awiewie Casi n wuraari Yesu susufɔm n ŋu ni

1 Yudafɔm cɛenkpiri n bo bu fere i ka Pentekoti n di cɛen, nyini sangɔ ni, na Yesu susufɔm kere atien bu nɔɔ dika hɔre kun.

2 Kpenɔa na ba ti nanmie be ŋga angoro n nu ka anuma bo i sukpie fanga su, na wɔ de sɔɔ n bo bu tana nu n kere abara aye.

3 Dɔ na ba ŋu deke be ka sin taferema dee su, na wɔ sandi atantana bu kun kun n kere tii su.

4 Na Awiewie Casi n awura bu kere ŋu, na bu sujɔɔ anie barasu barasu bo Awiewie Casi n ma bu koro jɔɔ i.

5 Tɔ, nyini sangɔ, Yudafɔm bo bu soro Nyeme n atien bu nɔɔ Yerusalem mie kpiri n nu, bu fiteeri durunya n awɔre n kere baari a, ka bu ba su Nyeme.

6 Sangɔ bo bu tiiri nanmie ni ŋga sɔ ni, na jama beberebe aba atien bu nɔɔ, na jɔre n amie bu, dama bu kere tiiri ka Yesu susufɔm ni sujɔɔ bere kun kun n kere bo ba tien bu nɔɔ n dee anie nu.

7 Na ba birisi na ba yo alekutura, na ba se ka, “Ahin minem kere bo bu wo jɔɔ su n ti Galilifɔm wɔ,

8 ye i baari se, ye bu sujɔɔ, ye ya kun kun n kere ti ka bu jɔɔ ya dee aniem n a?

9 Ya fite awɔre barasu barasu kere n nu wɔ, nbem fite Patiya, na nbem fite Mediya, na nbem fite Elam, na nbem fite Mesopotamiya, na nbem fite Yudiya, na nbem fite Kapadosiya, na nbem fite Pontusi ni Esiya,

10 na nbem fite Firigiya, na nbem fite Pamfliya, na nbem fite Ijipiti asien n su, na nbem fite Libiya asien bo i wo dodo Sirene mie kpiri n ni. Ya nbem gusu fite Roma mie kpiri n su wɔ.

¹¹ Ya nbem ti Yudafom, ni minem bo bu ti má Yudafom na ba kaaki bu wo ka bu ti Yudafom ni, ye ya nbem gusu fite Kereti asien n su, na nbem fite Arabiya asien n su, ama, ya kere ti ka bu jɔɔ ya deɛ aniem n nu wo, fa ko sakpakpam kere bo Nyeme ayo bu n su.”

¹² Na ba yo alekutura, ba si má kabo bu yo, na bu subisa bu nɔnɔ nu ka, “Ahin sa n bu la ka se wo leɛ?”

¹³ Ama, na bu nbem ayo Yesu susufom n anzasi, na ba se ka, “Ai, ba nu nzan abo wo.”

Kabo Petoro kaanri Nyeme noanie barasu ni

¹⁴ Do na Petoro ni i beɔgu buru ni kunm n ayasu ajina, na wo ye i konvi su ase jama n ka, “M lamoko Yudafom, ni ambere kere bo am wo Yerusalem mie kpiri n nu ni, am so am sui nyunyumi na am ti deke n bo m sukan kere am ni.

¹⁵ Ahin minem bo am sunsun ka ba nu nzan abo ni, ba nu má nzan, kisa ngarama kerefi ngona ye ya wo nu n a.

¹⁶ Ama, nyini n bo am ti ka bu jɔɔ anie barasu barasu ni, i ti kabo Nyeme noanie kanfo Joweli yo jɔɔori n wo leɛ, i na,

¹⁷ ‘Nyeme na o, fa ko durunya n awieeri,
m fá m Awiewie n wura minem kere nu.

Na am nbaabiesom ni nbaabaram kán Nyeme noanie n kere minem,
na am ngbefenem nú deke nbem nahore su ka alele nu,
na am nkpienkpienm dá cin alele.

¹⁸ Nahore, nzen cɛen n ba juuri,
m fá m Awiewie n wura m akoom n nu,
i bara ni i bieso kere,
na bu kán m noanie n kere mine.

¹⁹ Na m yó alekutura sam barasu barasu beberebe
angoro ni asienɔ fɛn,
na am nú mbunja, ni sin, ni nmisini bambaka.

²⁰ Na wie n sí biri,
na sara n káaki kokore ka mbunja.

Nyini sin, na Mibie n cɛen bambaka n bo i la jirima n nyá ju.

²¹ Nyini cɛen ni, sɔno kere bo i bo fereeri Mibie n дума, i mi nyá tiide.’ ”

²² Na Petoro ase bu ka, “Ambere Yisarelifom, am so am sui na am ti fɛn. Nyeme akere am ka yiri sunmaari Yesu bo i fite Nazareti mie n nu n a. Nyini ti, ye i ma i yoori alekutura sam, ni sa ngbingbirim am nu n a, kabo ambere ni am tii si i ni.

²³ Nyeme deɛ koroyanu, ye i du mo ciciiri ka i má am nya Yesu taraabiri a, ye am faari i wuraari mine tiem saa nu, ye bu kpamaari i baka jaanu n su kuunri i n a.

²⁴ Ama, na Nyeme atenge i afite i yiwee n nu, yiwee akoro ala má i yiko, dama i tiiri kekereke na yiwee koro kunma i.

²⁵ Dama Feme Davidi yo jɔɔori fa ko yiri Yesu nusu jore, i na,
‘Ma nu i ka Mibie n wo m do sanɔga kere,
nyini deɛ ti, puitiripui koro yo má m.

²⁶ Nyini deɛ ti, m ahore ti daawa, na m jɔɔ ni ahorejo,
haari ni bo m bá wu ni, m la tama fa ko m nuniembaa n su,

²⁷ dama woro Nyeme, a yáki má m na m ka fuinm n nu,
a yáki má na u deɛ amusuisufo casi ka mini so wu kpɔɔ.

²⁸ A kere m atin bo m fa na m nya ngoo,
na kabo a wo m do ni, nyini má m la ahorejo nahore su a.’

29 M ninbaam, m koro ka m se am nahore su wo, fa ko ya na Feme Davidi nusu jore. I yo wuuri wo, na ba se i, i fanjunma toko wo ya nu fen haari ni nyuma.

30 I tiiri Nyeme nɔaniɛ kanfo n dɛɛ ti, na wo si ka Nyeme atan ndie ka, i yi yiri Feme Davidi busu nufom n nu kun, na i di i femeya n kabo yiri Feme Davidi yo tiiri barasu ni.

31 Feme Davidi du mo nuuri sa n bo Nyeme ba yo i ni, na wo jɔɔ fa ko Kristo su, Tiidefo n bo Nyeme ase ka i sunma i ni, ka i ba wu na i tɛnge i yiwee nu, i na,

‘Nyeme yaki ma na i ka fuinm nu,
na i nuniembaa n kporo.’

32 Yiri Yesu n ye Nyeme tɛngeeri i yiwee n nu a, na ya kere anu i, ye ya sudi i daani a.

33 I Si Nyeme aye i su ako angoro afa atana i saa fomboro su, ye wo ma i Awiewie Casi n bo wo se ka i fa ma i ni. Deke bo am anu i ni, ni deke n bo am ati i ni, yiri la Awiewie Casi n bo i seeri ka i fa ma ya ni.

34 Ma Feme Davidi ni i tii fun kori angoro a, ama, na wo se ka,

‘Micera n ase m Mibie n ka,

“Bra, ba tana m saa fomboro su fen,

35 haari m ba ma a kunma u kporom.” ’ ’ ”

36 Na Petoro akaaki ase ka, “I ti ye ni ka Yisarelifom kere si ka, yiri Yesu n bo ambere yo kpamaari i baka jaanu n su n ye Nyeme afa i ayo Mibie n ni Kristo, ya Tiidefo n a.”

37 Sangha bo minem n tiiri ahin jore n so ni, na bu ahore asaaki agaya, na ba bisa Petoro ni Yesu jaramasa nyingam n ka, “Ya ninbaam, ye ya yo se wo?”

38 Na Petoro ase bu ka, “Am kaaki am wo, na ya bie am kun kun kere Nyeme nzue, Yesu Kristo dɛɛ duma n nu, na Nyeme fa am satie ce am, na i fa Awiewie Casi n ce am.

39 Dama Nyeme yo seeri ka i fa Awiewie Casi n ma ambere ni am busu nufom, ni minem bo bu wo dede ni, ni minem kere bo ya Micera Nyeme n fere bu ka bu bra yiri ni i tii do n wo.”

40 Na Petoro ajojo jore beberebe atu bu fo ni anyumboro su, i na, “Am yi am nu fite suicin n bo Nyeme ba fa cin ahin nyumafɔ satieyofom n nu.”

41 Na bu dongu ayo i nɔaniɛ n yarada, na ba bie bu Nyeme nzue, nyini cɛɛn ni, na ba nya mine, ba yo ka akpii nsan abuka bu nu su.

42 Na bu nyunu aboro ka bu sonson Yesu jaramasam kereewam ni, na bu kere ayo anɔɔkun, na bu sangha di diire, na bu sangha sere Nyeme.

Kabo Yesu susufom woowa tiiri barasu ni

43 Na Nyeme ama Yesu jaramasam n ayo alekutura sam barasu barasu beberebe, na sonɔ kere asoro Nyeme.

44 Na yaradayofom n ayo deke kere ni anɔɔse, na ba soro su ka, deke kere bo bu la i n ti bu kere dɛɛ wo.

45 Bu to bu nenge kere bo bu la i wo, na bu kpaaki njwaa n nu, na bo bu la ma be n kere nya be.

46 Cɛɛn n kere cɛɛn, bu ba tien bu noo Nyeme Sereebiri Awuru n nu wo, na bu nati sutien bu noo awuru awurum nu, na bu sangha di diire ni ahorejo, ni bu kunnu fofoe,

47 na bu sukansi Nyeme, na minem akoro bu jore. Na cɛɛn kere cɛɛn na bu sunya minem bo Nyeme ma bu anya tiide n abuka bu nu su.

3

Kabo wɔbuka be nyaari laifɛ barasu ni

¹ Cɛɛn n be naaso wiɛ kerefi nsan sanɔa, na Petoro ni Yohane ako Nyeme Sereebiri Awuru n nu ka bu ko sere Nyeme. Sanɔa bo bu fa sere Nyeme lɛɛ.

² Sɔno be woori do, bu wuuri i wɔbuka wo, na mine nbem aso i aba atana Nyeme Sereebiri Awuru nu ano n bo bu fere i ka Anɔ Nyunyumi ni, na i tana susere minem bo bu ba nyemesere ni, ka bu ma i njwaa. Cɛɛn n kere cɛɛn bu fa i ba wo, na i ba susere.

³ Nyini cɛɛn ni, sanɔa bo i nuuri Petoro ni Yohane ka bu suwura Nyeme Sereebiri Awuru n nu ni, na wo sere bere gusu ka bu ma i deke be.

⁴ Na Petoro ni Yohane afa bu nyumbaa akpama i nu, na Petoro ase i ka, "Nie ya do fen."

⁵ Nyini ti, na wo tu i tii sunie bu do, i sunsun ka bu ma i deke be wo.

⁶ Na Petoro ase i ka, "M la ma njwaa bo m ma u, ama, deke bo m la i na m fa ma u yaa, Yesu Kristo Nazaretifo n dee duma nu, m na, a yasu nati."

⁷ Do na Petoro aso wɔbuka n saa fomboro nu, na wo ye i su ajina, kpenɔa sɔno n jaam kere ayo fanga,

⁸ nyini ti, na wo warakpin, na wo jina i jaa su, na wo bo i bu sunati bara ye. Do na wo su bu su awura Nyeme Sereebiri Awuru n nu, na i sunati, na i suwarakpin, na i sukansi Nyeme.

⁹ Na jama n kere anu ka i sunati, na i sukansi Nyeme.

¹⁰ Sanɔa bo minem ni siiri nu ka, yiri bo i yo tana Nyeme Sereebiri Awuru n Anɔ Nyunyumi n nu sere n lɛɛ ni, na ba mie atana, na sa n bo i yoori sɔno n ayo bu alekutura.

Kabo Petoro kaanri Nyeme noanie n Nyeme Sereebiri Awuru n nu ni

¹¹ Sanɔa bo wɔbuka n bita Petoro ni Yohane barasu ni, na mine kere ayo alekutura, na ba njmati aba bu do awore be bo bu fere i ka Solomon dee Lele n nu.

¹² Sanɔa bo Petoro nuuri minem so ni, na wo se bu ka, "Yisarelifom, nzu ti ye am fa ahin sa n yo alekutura ye am nie ya so a? Am sunsun ka ya dee yiko nu ye ahin sɔno n anati a, wara am sunsun ka ya yo sa bo i ko atin su Nyeme do n dee ti, nzen se? Ai, i ti ma so.

¹³ Nyeme bo Abraham ni Izaki ni Jakobu ni ya nam suuri i ni, yiri ye wo wura i amusuisufo Yesu n kpiri bambaka a. Ama, am faari i wuraari yikofom saa nu wo, na am akete i Gomina Pilato nyunu, ka am koro ma i, haari ni bo ma gomina n na i yaki i nu ji ni.

¹⁴ I ti Nyeme sɔno fofoe wo, bo i yo sa bo i ko atin su Nyeme do o, ama, na am akete i, na am asere gomina n jande ka i yaki sɔno kunfo nu ji.

¹⁵ Na am akun yiri Yesu n bo i ma ya njoo ni, ama, Nyeme atenge i yiwee n nu, ya nuuri i wo ye ya sudi i daani a.

¹⁶ Ahin sɔno bo am nu i na am si i ni, Yesu dee duma n yiko nu ma i jaam kere ayo fanga n a. Deke n bo am anu i ni, i fite ka sɔno n ayo Yesu duma n yarada n dee ti, nyini ma wo nya laifɛ ye am kere anu i n a."

¹⁷ Na Petoro anya ase bu ka, "M ninbaam, m si ka ambere ni am tereferom kere be mmoo asi ma sam bo am yo yoori bu ni.

¹⁸ Dawa sanɔa, Nyeme ma i noanie kanfom kere yo jooori ahin jore kere, ka, Kristo, Tiidefo n bo Nyeme ase ka i sunma i ni ba, na i ba di wahara, nyini lɛɛ ye wo yo yiiwa bere n a.

¹⁹ Nyini dee ti, am kaaki am wo, na am su Nyeme, na i fa am satie ce am,

²⁰ na i má am nyá ñumiyi, na i nyá sunma Kristo, Tiidefɔ n bo wɔ yi i ka i bá am dɔ ni, yiri la Yesu.

²¹ Wɔ yo daka ka i wó Nyemɛ dɔ angoro, haari fa kɔ ju sanɔa n bo Nyemɛ má deke kere yo yiiwa, kabo dawa sanɔa na i maari i noaniɛ kanfɔ casim n nɔɔ na bu seeri ni.

²² Moyisi yo seeri ka, 'Am Micera Nyemɛ súnma i noaniɛ kanfɔ kabo i sunmaari mini Moyisi n wɔ. Nyini sɔnɔ ni yó am dɛɛ tienɔgu sɔnɔ bo i fite am nu wɔ. I ti ye ni ka am de i noaniɛ, na am yo deke kere bo i se ka am yo i.

²³ Sɔnɔ kere bo i de má Nyemɛ noaniɛ kanfɔ n noaniɛ ni, Nyemɛ yí i mi fite i dɛɛ minem nu wɔ, na i ká ñgbɛɛn.'

²⁴ Nyemɛ noaniɛ kanfɔm kere bo bu jɔjɔri fite Samuweli sanɔa haari ba ju ni nyuma, bu kere jɔjɔri fa kɔ ahin sam bo bu suyo nyuma n su wɔ.

²⁵ Amɛɛɛ ti Nyemɛ noaniɛ kanfɔ dɛɛ busu nufɔm a, am dɛɛ la sesesu n bo Nyemɛ yo diiri i di ni am nam ni. Na wɔ se ya na Abraham ka, 'U busu nufɔm dɛɛ ti ye m yó durunya n nufɔm kere kisi a.'

²⁶ Nyini dɛɛ ti, ye i du mɔ yiiri i amusuisufɔ n ye i sunmaari i am dɔ n a, ka i bá yo am kisi, nyini la ka, i má am kaaki am wɔ, na i yí am fite am satie kere nu."

4

Kabo Yudaɔfɔ teretereɔm diiri Petoro ni Yohane jɔɛ ni

¹ Petoro ni Yohane toko jɔjɔ jama n dɔ ni, na minem nbem aba bu dɔ, bere la Nyemɛ sayoowa dɔnguyofɔm nbem, ni Nyemɛ Sereebiri Awuru n nu tintiniɔinaɔfɔm kpiɛn, ni Sadiusifɔm nbem.

² Bu baari ni yaa su wɔ, kabo Yesu jaramasa nnyɔm ni sukere minem ka Yesu wuuri ni, i tengeeri i yiwee nu wɔ, nyini kere ka minem wu, bu tenge bu yiwee nu wɔ lɛɛ.

³ Nyini ti, na ba tara Petoro ni Yohane. Bu taraari bu naaso sanɔa a, na ba nyi bu haari ale ako acin.

⁴ Ama, na mine dɔngɔ bo bu tiiri Yesu jaramasa ni kereewa n ayo yarada. Nyini ti, bere kere bo bu yoori yarada ni, bu nbiesɔm kɔ yasuuri mine akpii nnu wɔ.

⁵ Alecin ñgarama na Yudaɔfɔm teretereɔm, ni bu nkpiɛnkpiɛnm, ni Nyemɛ noaniɛ kereɔm kere atien bu nɔɔ Yerusalem miɛ kpiri n nu.

⁶ Bo bu gusu woori dɔ n la Anasi bo i ti Nyemɛ sayoowa dɔnguyofɔm kere kpiɛn ni, ni mine nbem bo bu fere bu ka Kayafasi, ni Yohane, ni Alekizanda, ni minem bo bu wo Nyemɛ sayoowa dɔnguyofɔm busu nu n kere tienri bu nɔɔ ɔ.

⁷ Na ba fa Petoro ni Yohane aba ajina bu afien, na ba bisa bu ka, "Am yoori se yoori ahin sa n a? Am la yiko bɔnɔ, wara ñma dɛɛ duma nu ye am fa tuntuunri sɔnɔ n ye wɔ nya laifie n a?"

⁸ Na Awiewie Casi n awura Petoro ñu, na wɔ se bu ka, "Ya teretereɔm ni ya nkpiɛnkpiɛnm,

⁹ sakpa n bo ya yo i ama wɔbuka ni, ni kabo i yoori barasu na wɔ nya laifie n dɛɛ ti, ye am sudi ya jɔɛ bisa ya sɔ a, nzen se?"

¹⁰ I ti ye ni ka amɛɛɛ ni Yisarelifɔm kere si ka o, ahin sɔnɔ n bo i jina bere na wɔ nya laifie ni, i fite Yesu Kristo Nazaretifɔ n duma n nu wɔ. Yiri ye am kuunri i, ye Nyemɛ tengeeri i fiteeri i yiwee n nu n a.

¹¹ Ba kere i ñusu jɔɛ Nyemɛ Jɔɛ Kadasi n nu ka, 'Yabuɛ n bo amɛɛɛ bondo tafɔm faari i tuuri ni, yiri ye wɔ kaaki bondo n jaa yabuɛm kere tii a.'

12 Yiri ngumi ye Nyeme ayi i ka i ba de sonɔ kere tii a, duma be wo má durunya n kere nu bo i koro de ya tii ji, má ka Yesu Kristo dɛɛ duma ni ngumi.”

13 Na Yudafɔ yikofɔm ni tereterefɔm n aɲu kabo Petoro ni Yohane la ahoresi barasu ni, na ba si ka ba kɔ má kara be mmɔɔ, na wɔ yo bu alekutura. Dɔ na ba si nu ka bu yo suuri Yesu su wɔ.

14 Bu ɲuuri ka sonɔ n bo wɔ nya laifɛ n jina Petoro ni Yohane bi ni, nyini dɛɛ ti, ba koro ase má jɔɛ be.

15 Na ba se Petoro ni Yohane ka bu fite sɔɔ n nu. Bu fite wieeri ni, na bere nkpienkpienm n abo Petoro ni Yohane n ɲusu anzama.

16 Na ba bisa bu ɲuɲu nu ka, “Ye ya yó ahin minem se wɔ? Dama sonɔ kere bo i wo Yerusalem mie kpiri n nu si ka ba yo ahin alekutura sa bambaka ni, ya koro se má ka ba yo má i e.

17 Ama, nzen ya koro má ka ahin jɔɛ n bara ye deke n kere, am ma ya ɲɔɲɔɔ bu ka, má bu se ka bu bo Yesu duma mmɔɔ na be ti.”

18 Nyini ti, na ba kaaki afere Petoro ni Yohane awura, na ba ma bu nɔɔ ka, má bu se ka bu bo Yesu duma, wara bu kan i ɲusu jɔɛ kere minem.

19 Ama, na Petoro ni Yohane ase bu ka, “Ambere mmɔɔ ni am tii, am nie nu na am nie e, Nyeme atin su, bɔɔɔ ti ye a, ya de am dɛɛ nɔɔɔ n wɔ, nzen ya de Nyeme dɛɛ n wɔ?

20 Ya sukan kere minem n wɔ fa kɔ sam n bo yere ni ya tii ati bu, na ya ɲu bu ni, ya koro mɔ má ya nɔɔ.”

21 Na bere yikofɔm, ni tereterefɔm n aɲɔɲɔɔ bu nahɔɛ su, na ba yaki bu nu aji. Bu nieeri nu, bu ɲu ka bu koro yo má bu pui, dama minem kere wo Nyeme kansi su wɔ fa kɔ sa n bo wɔ yo ni.

22 Sonɔ n bo bu yoori nyini alekutura sa n maari i na i nyaari laifɛ ni, i tara afɔ aburana.

Kabo yaradayofɔm n sereeri Nyeme ka i ma bu ahoresi ni

23 Saɲga bo Petoro ni Yohane nyaari bu tii ni, bu kaba kpieeri bu nyi kɔɔri bu beɲgu Yesu susufɔm n dɔɔ, na ba kan jɔɛ n kere bo Nyeme sayoowa dɔɲguyofɔ nkpienm, ni nkpienkpienm n seeri ni.

24 Yaradayofɔm ni tiiri nyini jɔɛ n kere sɔ ni, na bu kere ayo anɔɔkun, na ba sere Nyeme, bu ɲa, “Ya Micera Yikofɔ, wɔɔɔ yiiri aɲgoro ni asiɲgu a, ni tieku n ni dekem kere bo bu wo nu ni.

25 Wɔɔɔ yo ma u Awiewie Casi n wuraari ya na Davidi bo i ti u dɛɛ amusuisufɔ n ɲu a, na wɔ se ka,

‘Nzu ti ye minem bo bu ti má Yudafɔm afa yaa agaya sɔ a.
ye minem bita sunsunni bo i la má kperɛ a?’

26 Ye durunya n nu nfemem ayasu ajina,

na bu yikofɔm atien bu nɔɔ,
ka bu tu lue ni Micera Nyeme ni,

ni Kristo, Tiidefɔ n bo Nyeme ase ka i súnma i n a.’

27 Tɔ, kabo Feme Davidi yo kaanri ni, i ti nahɔɛ wɔ, ka Feme Herode, ni Gomina Pɔntiyo Pilato fa saɲga ni minem bo bu ti má Yudafɔm, ni Yudafɔm yo tieɲri bu nɔɔ ahin mie n nu wɔ, na ba kete Yesu, u amusuisufɔ casi n bo a yiiri i ka yiri ti Tiidefɔ ni.

28 Bu tieɲri bu nɔɔɔ, na ba yo dekem kere bo u dɛɛ yiko n ni u koroyanu na a du mɔ acici ka bu yo ni.

29 Ya Mibie, ti kabo kisa bu ɲɔɲɔɔ ya barasu, nyini ti, ma yere u akɔɔm n ahoresi, na ya kan u dɛɛ labari kpa n na má ya soro sere.

³⁰ Fa u yiko n tuntun tukpakifom na bu nya laifie, na a ma ya yiko na ya tuntun mine, na ya yo alekutura sam barasu barasu, u amusuisufo casi Yesu n dɛɛ duma nu.”

³¹ Saŋga bo bu sereeri Nyeme n wieeri so ni, na dika n bo bu wo nu n akpisi. Na Awiewie Casi n awura bu kere ŋu, na ba kan Nyeme jore ni ahoresi.

Kabo Yesu susufom ni yoori anɔɔse barasu ni

³² Yaradayofom n yo yoori anɔɔse wo, na ba saŋga ayo deke n kere kun. Be wo ma bere bo i se ka i nenje be tiiri i tienju dɛɛ. Ama, bu kere kpaaki deke n kere bo bu la i nu ma bu benju wo.

³³ Na Yesu jaramasam n akan Nyeme jore ni yiko bambaka, na ba kan akere minem kabo Yesu tengeeri i yiwee n nu ni. Na Nyeme ama bu kere adi ahɔɔma beberebe.

³⁴ Be awo ma bu nu bo i miɛri deke be busu. Bo bu laari asienm, ni awurum toori bu wo, na ba fa ŋwaa kere bo bu nyaari i ni,

³⁵ aba ama Yesu jaramasam ni, na bere gusu akpaaki i nu ama bo bu la ma pui ni, na ba fa ayo deke bo i mie bu.

³⁶ Sono be yo woori bu nu, bu fere i ka Yosefu, i ti Levi busu nufo o, bu wuuri i asien be bo bu fere i ka Sipurusi n su wo. Na Yesu jaramasam n atun i duma ka Banabasi, i bu la ka, sono bo i ma mine ahoresi ni.

³⁷ Nyini sono n toori i asien n bo i la i, na wo fa ŋwaa n aba ama Yesu jaramasam ni.

5

Ananiyasi ni i yi Safira dɛɛ jore

¹ Sono be yo woori do bu fere i ka Ananiyasi, na bu fere i yi ka Safira, na ba to bu aja be.

² Ama, na yiri ni i yi n ayo bu nookun, na wo yi ŋwaa n be afie, na wo fa bo i kaari n ama Yesu jaramasam ni.

³ Na Petoro abisa i ka, “Ananiyasi, nzu ti ye a ma Sitana awura u sunsunni nu, ye a fa ŋwaa n bo a toori u asien n na a nyaari i n be afie a, ye a ŋa a dadaka Nyeme Awiewie Casi n a?”

⁴ Saŋga n bo a nya to ma i ni, i ti u dɛɛ wo, kisa gusu bo a to i ni, ŋwaa n ti u dɛɛ wo. Ye nzu ti ye a yo ahin sa n a? Ma adamande ngumi ye a ŋa a dadaka a, ama, a ŋa a dadaka Nyeme wo.”

⁵ Ananiyasi tiiri nyini noanie n so ni, i kaba kpaasiiri wo, na wo wu, na sono kere bo i tiiri nyini sa n bo wo yo ni, na sere ati bu agaya.

⁶ Na ngbefenem ayasu afa tani apɔɔndi i, na ba fa i afite ako ase i.

⁷ Wo ce ma, na i yi gusu aba, wo si ma sa bo wo yo ni.

⁸ Na Petoro abisa i ka, “U ni u hun aja n bo am toori i n ŋwaa n kere lee?” Na wo bo Petoro n nu ka, “Een, i kere lee.”

⁹ Do na Petoro abisa i ka, “Nzu ti ye u ni u hun ayo am nookun na am yo Micera n Awiewie n na am nie a? Nie fen, minem bo bu faari u hun ko seeri i ni, bu jaa busu wo anɔ n nu, bu fa woro mmoo fite lee.”

¹⁰ Jina n nu bere, na wo kaba akpaasi Petoro jaa bu, na wo wu. Bo bu seeri i hun n ba ŋuuri ka yiri gusu awu, na ba fa i ako ase i adodo i hun ni.

¹¹ Na Kristo jama n kere, ni minem kere bo bu tiiri nyini sa n bo wo yo ni, na sere ati bu kere agaya.

Kabo Yesu jaramasam n yoori alekutura sam barasu ni

¹² Na Yesu jaramasam n ayo alekutura sam barasu barasu dɔŋgu minem n nu bo i kere ka Nyeme wo bu dɔ. Na yaradayofom n kere atien bu nɔɔ Solomon Lele n bo i wo Nyeme Sereebiri Awuru n nu ni.

¹³ Minem bo ba yo má Yesu yarada ni soroori sere wo, ba koro asanga má bu nu, ama, na minem n awura bu kpiri.

¹⁴ Na mine beberebe ayo Mibie n yarada, subuka bu su sanga kere, bu sunnu, nbiesom ni nbaram.

¹⁵ Na alekutura sam bo Yesu jaramasam yoori bu n dɛɛ ti, na mine aso bu tukpakifom, ni bu dasum aba ase atingberem nɔɔ su, adena Petoro ba sunati sin, na haari i awiewie mmɔɔ tɔ go bu nbem nu, na bu nyá laifie.

¹⁶ Na mine beberebe afite mie miem bo bu bara ye Yerusalem mie kpiri n su ni, na ba fa tukpakifom ni minem bo ajinim yaki má bu n aba, na bu kere anya laifie.

Kabo bu kereeri Yesu jaramasam n wuwuruwa barasu ni

¹⁷ Na Nyeme sayoowa dɔŋguyofom n kere kpien ni, ni i bengum bo bu su Sodusifom atin su ni, aba asi Yesu jaramasam ni kore agaya.

¹⁸ Na ba tara Yesu jaramasam ni, ako anyi bu dansaraka.

¹⁹ Ama, nyini cɛɛn n kɔŋgue, na Nyeme mereke aba ateke dansaraka anɔ ni, na wo yi Yesu jaramasam n afite, na wo se bu ka,

²⁰ “Am kɔ na am kɔ jina Nyeme Sereebiri Awuru n nu, na am kan ahin ngɔɔ fɔfɔre n bo am anya i n jɔre kere kere minem.”

²¹ Na jaramasam n ade i nɔanie ni, na alecin ngarama fuun, na ba ko ajina Nyeme Sereebiri Awuru n nu, na ba bo i bu sukere mine.

Sanga bo Nyeme sayoowa dɔŋguyofom n kere kpien n ni i dɛɛ jama nbaam n ba juuri ni, na ba fere Yudafɔ tereterefom ni, ni Yisareli nkpien-kpienm kere, na ba tien bu nɔɔ na bu fa sesesu, dɔ na ba ma nɔɔ ka bu ko yi Yesu jaramasam ni dansaraka n nu bra.

²² Ama, minem n bo bu sunmaari bu n ko juuri ni, ba nu má jaramasam ni dansaraka sɔɔ n nu, na ba kpie bu nyi aba ase bu.

²³ Bu na, “Sanga bo ya ko juuri ni, dansaraka anɔ n kere nyi wo kenken, tintinijinafom gusu jina anɔ n nu bere, ama, sanga bo ya ba tekeeri anɔ n ni, ya nu má sɔnɔ kun n kpein mmɔɔ sɔɔ n nu.”

²⁴ Sanga bo Nyeme sayoowa dɔŋguyofom n kere nkpienm, ni Nyeme Sereebiri Awuru n nu tintinijinafom kpien n tiiri sɔ ni, na ba birisi, ba si má sa bo wo yo.

²⁵ Dɔ na sɔnɔ be aba ase bu ka, “Am ti fen. Minem bo am taraari bu ko nyiri bu ni, bu wo Nyeme Sereebiri Awuru n nu wo minem kere su.”

²⁶ Nyini ti, na Nyeme Sereebiri Awuru n nu tintinijinafom kpien n afa i minem ako, na ba ko atara Yesu jaramasam n aba. Bu ko faari bu ni, ba mie má bu, dama bu soroori ka minem ni tu bu yabue wo.

²⁷ Na ba fa jaramasam n aba, na ba fa bu ajina minem bo ba tien bu nɔɔ n nyunu. Na Nyeme sayoowa dɔŋguyofom n kere kpien n abisa bu bisaawam.

²⁸ I na, “Ya maari am nɔɔ nahɔre su ka, má am se ka am kere kereewa be ahin sɔnɔ n duma nu. Ama, am nie kabo am ayo a. Am afa am kereewa n abara aye Yerusalem mie kpiri n kere nu, ye am koro ka am se ka yere kuunri i a.”

²⁹ Na Petoro ni jaramasa nyingam n abɔ bu nu ka, “Wo yo daka ka ya de Nyeme nɔanie wo, má adamande dɛɛ.

³⁰ Nyeme bo i ti ya nam dɛɛ Nyeme ni, yiri tengeeri Yesu fiteeri i yiwee n nu, yiri bo am kuunri i na am kpamaari i baka jaanu n su ni.

³¹ Yiri Yesu, ye Nyeme afa i atana i saa fomboro su, ka i yo ya Mofa ni ya Tiidefo, na i ma yere Yisarelifom atin, na ya kaaki ya wo, na Nyeme fa ya satie kere ce ya.

³² Yere ni Awiewie Casi ni di ahin sam n daani kan kere mine a. Yiri Awiewie Casi n ye Nyeme afa ama minem bo bu de i noanie n a.”

³³ Saŋga bo minem bo ba tien bu noo n tiiri nyini jore n so ni, na yaa ati bu agaya, ma bu koroori ka bu kun Yesu jaramasam wo.

³⁴ Ama, na bu nu kun, i ti Farasifo o, bu fere i ka Gameli, i kaaki ti Nyeme noanie kpamaawa n kerefo o, bo minem kere ma i jirima agaya. Na wo yasu ajina, na wo ma noo ka bu fa jaramasam n fite dasin kaan ka.

³⁵ Do na wo se jama n kere ka, “M lamoko Yisarelifom, am nie am tii su dogu fa ko sa n bo am koro ka am fa yo ahin minem ni.

³⁶ Am tenge su ka afo be, na sono be, bu fere i ka Tiyodasi, na wo ba, na wo yo i nu ka i ti sono bo i nusu nya ma durunya n nu wo, na mine ba yo ka yaa nna kere asu i su. Ama, wo ce ma, na mine akun i, na i susufom n kere anmati asandi, na i dee atin n aka ngbeen.

³⁷ Nyini sin, saŋga bo bu na bu kere asien n su jama duma na bu si bu no ni, na sono be gusu aba, yiri la Yudasi bo i fite Galili asien n su ni. Na jama beberebe asu i su, ama, na mine akun yiri gusu, na i susufom n kere anmati asandi.

³⁸ Nyini ti, kabo i ti ni, m suse am wo, ma am se ka am yo ahin minem ni pui. Am yaki bu benle. Nzen atin n bo bu bita i n ti adamande dee, i ka ngbeen wo.

³⁹ Ama, nzen i ti Nyeme dee, am koro yo ma ahin mine ni pui. Am ba nu ka am si ma na am sukun lue ni Nyeme.”

⁴⁰ Na ba de Gameli fotuuwa ni. Na ba fere Yesu jaramasam n awura, na ba fin bu ngbere, na ba ma bu noo ka, ma bu se ka bu bo Yesu duma mmoo kere mine kun. Na ba yaki bu, na ba ko.

⁴¹ Yesu jaramasam ni fiteeri minem bo ba tien bu noo n do wieeri ni, na bu ahore ajo agaya, ka Nyeme abu bu awura be nu, dama ba di nyinse Yesu dee duma n nu.

⁴² Na ceen n kere ceen, na bu suwura Nyeme Sereebiri Awuru n nu, ni minem dika, na bu yaki ma Nyeme noanie n kere ni, na bu sukan Nyeme labari kpa n kere bu ka Yesu ti Kristo n a, Tiidefo n bo Nyeme ase ka i sunma i ni.

6

Kabo bu yiiri bukafu nsom ni

¹ Na fa ko saŋga su, na Yesu susufom n asunnu abuka su, na Yudafo bo bu jajo Giriki anie n ni anjuti Yudafo bo bu jajo Hiburu anie ni. Bu na ceen kere ceen na bu ce nkunafom diire ni, bu bu ma bu deem wura ma nu.

² Nyini ti, na Yesu jaramasam buru ni nnyom n afere susufom n kere pepere atien bu noo, na ba se bu ka, “I ti ma ye ni ka yere ni ya tii yaki Nyeme jore n kan, na ya sunie diire jore su.

³ Nyini ti, m ninbaam, am nie am nju nu, na am yi mine nso bo bu la anyunuyi, na Awiewie Casi n wo bu do, na bu la alecira, na bu kaaki la sunsunni kpa, na ya ma bere nie nyini sereyam n kere su.

⁴ Na yere ni ya tii nya ya nu, na ya nyunu boro nyemesere, ni Nyeme noanie n kan su.”

⁵ Yesu jaramasam n seeri so ni, na wo yo minem kere fie fa ko bu jajoowa n su. Na ba yi sono be, bu fere i ka Satefano, i ti sono bo i la yarada nahore

su wɔ, na Awiewie Casi n wo i ɲu, ni Filipu, ni Porokoron ni, ni Nikanɔ, ni Timona, ni Pamenasi, ni Nikola bo i fite mie kpiri n bo bu fere i ka Antiyoki n su, na wɔ kaaki i ɲu ka i ti Yudafo, na i su bu dɛɛ atin n su ni.

⁶ Na jama n afa bu aba Yesu jaramasam n dɔ, na ba fa bu saa anana bu ɲu, na ba sere Nyeme ama bu.

⁷ Na Nyeme noanie ni susandi subuka su. Na mine beberebe ayo yarada abuka Yesu susufom su Yerusalem mie kpiri n nu. Na Nyeme sayoowa dongyufom gusu dongu ayo yarada.

Kabo bu taraari Satefano barasu ni

⁸ Satefano ti sonɔ bo i diiri Nyeme ahɔroma wɔ beberebe, na Nyeme ama i yiko nahore su, na wɔ yo alekutura sa barasu barasu minem n nu.

⁹ Ama, na Yudafo nbem ayasu ajina ase akuruwa ni yiri. Nyini minem wo asese n bo bu fere i ka Ma De M Tii tientienbunɔɔ sɔɔ n nu wɔ. Bu nbem fite mie kpirim n bo bu fere bu ka Sirene, ni Alekizanderiya n wɔ. Na bu nbem gusu fite Silisiya ni Esiya dɛɛ awɔrem n nu wɔ.

¹⁰ Ama, na Awiewie Casi ni ama Satefano alecira, na wɔ koro akan ayi bu.

¹¹ Nyini dɛɛ ti, na ba ma mine nbem ɲwaa ka bu kpie kɔre sɔ Satefano ka, ba ti ka wɔ kpie Moyisi ni Nyeme nzuko.

¹² Bu seeri sɔ n dɛɛ ti, na ba ye minem yaa su, ni nkpienkpienm ni, ni Nyeme noanie kerefom, na ba tara i ako Yudafo tereterefom dɔ.

¹³ Dɔ na ba fa mine nbem aba, na ba kpie kɔre asɔ i. Bu ɲa, “Sanga kere ahin sonɔ n jɔjɔ ɲgbɛɛnɲgbɛɛn wɔ fa kɔ ya Nyeme Sereebiri Awuru casi n su, na i kaaki jɔjɔ ɲgbɛɛnɲgbɛɛn fa kɔ Nyeme noanie kpamaawa su.

¹⁴ Ya ti ka i ɲa, Yesu Nazaretifo ni bɔ fufu ya Nyeme Sereebiri Awuru n kere gɔ, na i kaaki ya nana sayoowam kere bo Moyisi fa kereeri ya ni.”

¹⁵ Na bere tereterefom n kere afa bu nyumbaa akpama Satefano ɲu, na ba ɲu ka i nyunuawa akaaki wo ka Nyeme mereke dɛɛ su.

7

Kabo Satefano jɔjɔri barasu ni

¹ Na Nyeme sayoowa dongyufom kere kpien n abisa Satefano ka, “Ahin jɔre n kere bo ba kan i n ti nahore wɔ?”

² Na Satefano abɔ i nu ka, “M sim ni m ninbaam, am so am sui na am ti fen. Kana ya na Abraham kɔ wo Harani mie kpiri n nu ni, Nyeme Kpiri n yo yiiri i ɲu kereeri Abraham Mesopotamiya dɛɛ asien n su wɔ.

³ Na wɔ se i ka, ‘Fite yaki u asien n bo a tana su ni, ni u minem, na m kere u asien bo m koro ka a kɔ tana su ni.’

⁴ Nyini ti, na Abraham ayasu Kaladiya asien n su, na wɔ kɔ awo Harani mie kpiri n nu. I woori dɔ ye i si ba wuuri a. Nyini sin, na Nyeme ama wɔ yasu dɔ aba atana ahin asien n bo ya wo su kisa ni.

⁵ Nyini sanga, Nyeme nya fa mɔ asien n haari kampiti sɔ mmɔɔ ma mɔ Abraham na i se ka i ti i dɛɛ. Nyeme yo seeri i ka i fɔ asien n ma i ni i busu nufom wɔ. Sanga bo i seeri i sɔ ni, na Abraham nya wu mɔ baa.

⁶ Na Nyeme ase i ka, ‘U busu nufom bɔ kɔ yo wɔfom wɔ asien be su, na bu fɔ bu yo nkɔkɔm, na bu kere bu wahara agaya kɔ ju afo yaa nna.’

⁷ Ama, na Nyeme ase ka, ‘M bɔ cin minem n bo bu fɔ u minem yo bu nkɔkɔm n sui, na m nyɔ yi u minem fite nyini asien n su, na bu kɔaki ba fen, na bu bɔ su m.’

⁸ Dɔ na Nyeme afa sesesu na wɔ di i di ni Abraham, i ɲa, ‘Baa kere bo a wuuri i, i ti ye ni ka a wura i kenkenne. Nyini kere ka a bita sesesu n bo

ya di i di n a.' Nyini ti, Abraham ba wuuri Izaki ni, i wuraari i kenkenne wo lemocue ceen. Na Izaki gusu aba wu Jakobu, na wo wura i kenkenne i lemocue ceen, na Jakobu gusu aba awu i nbaa buru ni nnyom bo bu ti ya nam ni, na wo wura bu kenkenne lemocue ceen.

⁹ Na Jakobu nbaam n asi bu niema Yosefu kore, na ba to i afa ama Ijipiti asien n sufom. Ama, na Nyeme awo i do,

¹⁰ na wo yi i afite kekereke kere bo i tuuri i nu, na wo ma i alecira, na wo di Ijipiti Feme Faaro ahoroma. Na feme n afa i dika n kere, ni Ijipiti asien n ama i ka i nie i dika.

¹¹ Na ahoe aba ato Ijipiti, ni Kanana asienm n su, abi aboro mine nu, bo ya nam anya ma diire bo bu di.

¹² Na bu si Jakobu ati ka diire wo Ijipiti asien n su, na wo sunma i nbaam. Ciciri su dee sunma ni, na ba ko ato diire n aba.

¹³ Bu ba kpieeri bu nyi kori ajaari nnyo su ni, na Yosefu ayi i nu akere i sinbaam ni, na Feme Faaro gusu asi Yosefu dikafom.

¹⁴ Na Yosefu asunma i sinbaam n ka bu ko fa bu si, ni i dikafom kere ka bu bra i do Ijipiti asien n su. Minem kere ko yasuuri aburaso ni nnu wo, bo bu baari Ijipiti asien n su.

¹⁵ Na Jakobu, ni i dikafom kere ako Ijipiti asien n su, do ye i ni i nbaam n kere ko wuuri a.

¹⁶ Na ba fa bu aba Sekem mie kpiri n nu, na ba se bu fanjunma n bo Abraham toori i jete nwaa beberebe Hamo nbaam do ni.

¹⁷ Sangha n ba dodoori bo deke n bo Nyeme yo seeri ka i yo ma Abraham n yo yiiwa ni, nyini sangha ni, na ya minem ni atere ade Ijipiti asien n kere su.

¹⁸ Bo woori do so o, haari na sono be aba adi Ijipiti asien n su feme, yiri asi ma Yosefu.

¹⁹ Na yiri ni afa sunsunni tie adadaka ya nam, na wo bita bu ni tie bita, na wo se ya nam ka bu fa bu nbaam fa tu, adena bu wu.

²⁰ Nyini sangha n ye bu wuuri Moyisi a, i yo ti baa bo i yo nyumi agaya Nyeme do o. Na ba bita i i si dika haari sara nsan,

²¹ na ba nya ayi i afite, na Feme Faaro wa baabara afa i ayo i kunnu wa.

²² Na ba kere i Ijipitifom ngonle ni alecira barasu barasu kere, na wo yasu, na i duma ata fa ko i sayoowa ni i jooowa kere nu.

²³ Sangha bo Moyisi ba juuri afo aburana ni, na i sunsunni ama i ka i ko nie i lamoko Yisarelifom busu.

²⁴ Na wo nu ka Ijipitifom be sukere Yisarelifom kun be wuwuruwa. I nuuri i so ni, wo sun ma i nu, na wo ko abo akun Ijipitifom ni.

²⁵ Moyisi sunsunri ka, i dee minem ni ti i bu wo, ka, Nyeme ye wo yi i ka i ba de bu tii ji a, ama, ba ti ma i bu so.

²⁶ I alecin, na wo nu ka Yisarelifom mine nnyo sudi aluwa n bu nu nu, na wo ko akpata bu, na wo se bu ka, 'Njam, am ti fen, m na am kere ti kun wo e, ye nzu ti ye am sudi aluwa?'

²⁷ Ama, na yiri n bo i sukere i bengu n wuwuruwa n asun Moyisi ako i sin, na wo bisa i ka, 'Nma fa u yoori ya niesufom ni ya joredifo a?'

²⁸ A koro ka a kun mini gusu, kabo anuma a kuunri Ijipitifom wo, nzen se a?'

²⁹ Moyisi tiiri nyini jore n so ni, na wo nmati afite Ijipiti asien n su ako awo Madiya asien n su akaaki wofom do. Do na wo ba aja bara, na wo wu nbaabiesom nnyo.

³⁰ Na afo aburana sin, na Nyeme merere be ayi i nu akere Moyisi boro kpantain n nu, fa dodo buka n bo bu fere i ka Sinayi n su, i nu ka sin fofoe be je buwe baka be su, ama, i yara ma, merere n wo sin n nu.

³¹ Moyisi ɲuuri i sɔ ni, na wɔ yo alekutura, na wɔ cin adodo ka i niɛ i nyunyumi. Dɔ na Micera n ajojo i dɔ, ase i ka,

³² ‘Mini ti u nam Nyeme a, u na Abraham, ni Izaki, ni Jakobu.’ Na sere ati Moyisi, na i ɲuniɛ subobo i, wɔ bo má su ka i niɛ i kun.

³³ Na Micera n ase Moyisi ka, ‘Deke bo a jina n ti m tiɛngu dɛɛ asien casi wɔ, cin yi u gbagbaa ni.

³⁴ Ma ɲu kabo m minem wo kekereke nu Ijipiti asien n su barasu. Ma ɲu kabo bu fiefie barasu, nyini dɛɛ ti ye ma jura aba ka m ba de bu tii ji. Bra na m sunma u Ijipiti asien n su.’

³⁵ Tɔ, yiri Moyisi ye Yisarelifom keteeri i n a, na ba bisa i ka, ‘Nma fa u yoori ya niesufɔ ni ya jɔɛdifo a?’ Moyisi, yiri ye Nyeme sunmaari i mereke i dɔ baka n bo i je sin fofoe na i yara má n su, na mereke n ase i ka i kɔ de minem tii ji na i yo bu kpɛn n a.

³⁶ Na wɔ du Yisarelifom mɔ, na wɔ yi bu afite Ijipiti asien n su, na wɔ yo alekutura sam beberebe dɔ, ni kunma kpɛri n bo bu fere i ka Kunma Kɔkɔɛ n su, ni saɲga bo bu wo boro kpantain n nu afɔ aburana ni.

³⁷ Yiri Moyisi yo seeri Yisarelifom ka, ‘Nyeme bá yi am busu nufɔ be na i yó i nɔaniɛ kanfɔ, kabo m ti ni.’

³⁸ Yiri Moyisi, i ni ya na Yisarelifom yo woori boro kpantain n nu n a, yiri ye Nyeme mereke n jɔjɔri i dɔ Sinayi Buka n su n a, yiri ye Nyeme yo faari i nɔaniɛ n bo i ma ɲɔɔ n maari i ka i fa ma ya nam n a.

³⁹ Ama, ya nam akoro má ka bu de i, na ba kete i na ba koro ka má bu kpɛ bu nyi kɔ Ijipiti asien n su.

⁴⁰ Na ba se Moyisi gɔɔ Aarɔn ka, ‘Ta amɔɛm ma ya na bu du ya mɔ fa ya nati. Ya si má sa bo wɔ yo yiri Moyisi n bo i faari ya fiteeri Ijipiti asien n su ni.’

⁴¹ Na ba yi yi bu sikam, na ba fa ata amɔɛ ka nambaa dɛɛ su, na ba yo tie ama i, na ba su i, na ba di cɛɛnkpɛri fa kɔ nyini deke n bo bere ni bu tii ayo i n su.

⁴² Nyini ti, na Nyeme akaaki i sin abo bu, na wɔ ma bu susu asarambaam bo bu wo angoro ni, kabo ba kere i Nyeme nɔaniɛ kanfom dɛɛ kadasi n nu lɛɛ. Bu ɲa,

‘Amberɛ Yisarelifom, am yo yoori yoowam boro kpantain n nu afɔ aburana ni,
am yo maari mini wɔ?’

⁴³ Ai, am yo sɔri amɔɛ n bo bu fere i ka Mɔlɛki na am afa tani abo i nambue n sɔ i nati wɔ,
ni amɔɛ n bo bu fere i ka Refani na i ti ka asarambaa be ni.
Bere ye am ta bu ka amɔɛm ye am su bu a.

Nyini ti, ye m má bu taraari am kɔ miɛ be bo i sin Babilɔn miɛ kpɛri n ɲu n a.’

⁴⁴ Ya nam ni, bere yo laari nambue n bo i kere ka Nyeme wo bu dɔ n boro kpantain n nu a. Bu yoori i kabo Nyeme kereeri Moyisi ka i yo i n wɔ.

⁴⁵ Ya nam yo faari nyini nambue n maari bu sinfom wɔ, na bu ni bu mɔfɔ Yosuwa afa i akɔ asien n bo Nyeme fɔn yiiri minem su na i fa maari bu ni. Na nyini nambue n awo bu dɔ haari Feme Davidi saɲga.

⁴⁶ Na Feme Davidi adi ahɔrɔma Nyeme dɔ, na wɔ sere Nyeme ka i ma i ta awuru bo Jakobu ni i dikafom fa su Nyeme. Feme Davidi akoro ata má i,

⁴⁷ ama, i wa Feme Solomon yo taari awuru n maari Nyeme a.

⁴⁸ Haari ni nyini mmɔɔ, Micera Nyeme Kpɛri n yiri tana má awuru bo adamande ata i nu, kabo Nyeme nɔaniɛ kanfɔ n ajojo i ni. I ɲa,

⁴⁹ ‘Micera n ɲa o,

Aṅgoro ni ti m femeya tanaabiri a,
na asienggu nya ti deke bo m jaa gbagbaa tien.

Ye am ta nzu awuru barasu ma m a?

Am nya nyini fofoe n ni ye m wo nu a?

⁵⁰ Má mini yoori ahin dekem ni kere a? ”

⁵¹ Na Satefano akaaki ase bu ka, “Amberε, am ahorembaa ti kekereke, na am sui ti tantanantan ka minem bo bu su má Nyeme ni. Am nati kete Nyeme Awiewie Casi n wɔ, kabo am nam yo yoori lee.

⁵² Nyeme nɔanie kanfo bono ye am nam akere má i wuwuruwa? Na ba kun minem ni, bo bu seeri ka Sono n bo i yo sa bo i ko atin su ni bá ni.

⁵³ Amberε ye Nyeme yo sunmaari i merékem ye bu faari i nɔanie kpamaawa maari am n a, ama, am ade má i.”

Kabo bu tuuri Satefano yabue bo kuunri i barasu ni

⁵⁴ Kabo Satefano jɔjɔri so ni, na yaa ati Yudafo tereterefom n agaya, na ba kan bu nɔo awura nu, na bu sukpeεε bu jee.

⁵⁵ Ama, na Awiewie Casi n awura Satefano ŋu, na wɔ tu i tii anie aṅgoro, na wɔ ŋu kabo Nyeme woowa ata papasi barasu. Na wɔ ŋu ka Yesu jina Nyeme saa fomboro su.

⁵⁶ Na wɔ se bu ka, “Am nie, ma ŋu ka aṅgoro n ateke ye Adamande Wa n jina Nyeme saa fomboro su.”

⁵⁷ I seeri so ni, na Yudafo tereterefom n atien kpa, na ba fa bu saa ato bu suim. Do na ba kaba abereki ato Satefano ŋu.

⁵⁸ Na ba cin i afite mie n aheme, na bu sutu i yabue, na bere bo bu di daani jaraki i, na bu sutu i yabue, na ba yi bu suturam ama gbefene anyunutifo be ka i sunie bu dika, bu fere nyini gbefene n ka Soolu.

⁵⁹ Bu wo Satefano yabue n tu su so ni, na i gusu subo fere Mibie ni, i ŋa, “M Mibie Yesu, de m ŋɔɔ ni.”

⁶⁰ Na wɔ kutu asienggu, na wɔ bo awie kpa, i ŋa, “M Mibie, má a fa bu ŋgasi fa ko sa n bo bu suyo i n su.” I seeri so wieeri ni, kpenɔa na i ni durunya n akpaaki.

8

¹ Soolu yo soroori su ka bu kun Satefano a.

Kabo Soolu kereeri Kristo jama n wuwuruwa barasu ni

Nyini ceen n gbingbin ye bu boori i bu kereeri Kristo jamam wuwuruwa agaya, bere bo bu wo Yerusalem mie kpiri n nu ni. Na bu kere aṅmati asandi ako Yudiya, ni Samariya dee awore n kere nu, i ko kaari Yesu jaramasam ni ngumi wɔ, Yerusalem mie kpiri n nu a.

² Na Nyeme sufɔ nbem ako ayo Satefano sutura, na ba sun sukoko agaya.

³ Ama, na Soolu aboro i nyi kabo i yo na i ka Kristo jama ni ngbeen, na i suwura awuru awurum nu, na i sucin yi yaradayofom ni, nbaram ni nbiesom kere, na i ma bu ko nyi bu dansaraka.

Kabo Filipu kaanri labari kpa n jore kereeri Samariyafom ni

⁴ Yaradayofom n bo bu sandiiri awore n kere nu ni, na ba nati sukan labari kpa n kere minem kere.

⁵ Na Filipu ako Samariya mie kpiri n su, ako sukan kere minem fa ko Kristo, Tiidefo n bo Nyeme ase ka i sunma i ni.

⁶ Na wɔ yo alekutura sam. Bu tiiri kabo i jɔjɔ na bu ŋuuri alekutura sam bo i yoori bu ni, na bu kere aso bu sui nyunyumi, na ba ti kabo i se ni.

⁷ Na wɔ fɔn ayi ajinim mine dɔngu ɲu. Bu ba sufite yaki minem ni, bu tien ni faŋga su na bu fite. Na minem beberebe bo bu saam ni bu jaam awu ni, ni wɔbukam kere anya laifie.

⁸ Nyini ti, na ahorejo bambaka aba Samariya mie kpiri n nu.

⁹ Na sɔno be ayo awo Samariya mie kpiri n nu, bu fere i ka Simon, i nati yo boboyaya wɔ, na minem bo bu wo mie n nu ayo alekutura, na i sukere i ɲu ka i ti sɔno bambaka a.

¹⁰ Na sɔno kere, tarakam ni nfangafom kere asoro su ka yiri la Nyeme dee yiko n a. Na ba fere i ka Yiko Bambakafɔ n bo i fite Nyeme do n a.

¹¹ Deke bo i ti na bu koro i jore n la ka, i yo yoori nyini boboyaya juma n bu do ace.

¹² Ama, sanga bo Filipu ba kaanri labari kpa n jore n fa ko Nyeme femeya n ni Yesu Kristo dee atin n su, na bu deer i noanie ni, na wɔ bie bu Nyeme nzue, nbaram ni nbiesom kere.

¹³ Na Simon mmoo ni i tii ayo yarada, na Filipu abie i Nyeme nzue, na i susu Filipu su deke kere bo i ko, na wɔ ɲu abonɔ sam barasu beberebe bo Filipu yoori bu ni, na wɔ yo i alekutura.

¹⁴ Na Yesu jaramasam bo bu wo Yerusalem mie kpiri n nu n ati ka Samariyafom gusu ade Nyeme noanie n ni, nyini ti, na ba sunma Petoro ni Yohane bu do.

¹⁵ Sanga bo bu ko juuri do ni, na ba sere Nyeme ama bere bo ba yo yarada ni, adena Awiewie Casi n wura bu ɲu.

¹⁶ Dama ba bie bu Nyeme nzue ya Mibie Yesu dee duma n nu wɔ, ama, Awiewie Casi n nya wura ma bu ɲu.

¹⁷ Na Petoro ni Yohane afa bu saa anana bu tii su, na ba sere Nyeme ama bu, na Awiewie Casi n awura bu ɲu.

¹⁸ Simon ɲuuri ka Yesu jaramasam faari bu saa nanaari yaradayofom ni tii su, na bu sereeri Nyeme maari bu, na Awiewie Casi n wuraari bu ɲu ni, na wɔ fa ɲwaa aba ka i fa ma Petoro ni Yohane,

¹⁹ na wɔ se bu ka, "Am ma mini mmoo ahin yiko n be, adena sɔno kere bo m fa m saa nana i ɲu na Awiewie Casi n wura i mi ɲu."

²⁰ Ama, na Petoro ase i ka, "Woro, u ni u ɲwaa kere ka ɲgbɛɛn, dama a sunsun ka a koro fa ɲwaa to Nyeme aceeri n wɔ.

²¹ U saa wo ma juma n nu fieo, dama u sunsunni ti ma kpa Nyeme do.

²² Kaaki u wo fa ko u satie n bo a bita i n su, na a sere Nyeme, adena nyini sunsunni tie n bo i wo u ahore su ni, i fa ce u.

²³ Dama ma ɲu ka u ahorembaa yo wi agaya, na u satie akunma u."

²⁴ Do na Simon ase Petoro ni Yohane ka, "Jande, am sere Mibie n ma m, adena ma ahin sam kere bo am ajojo i n be ba tu m."

²⁵ Petoro ni Yohane diiri daani n na bu kaanri Mibie n labari kpa n jore kereeri mine wieeri ni, na ba kpie bu nyi ako Yerusalem mie kpiri n nu. Bu wo ko su ni, na ba kan labari kpa n Samariya mie aheme aheme dɔngu su.

Filipu ni Itiyopiya sɔno n jore ni

²⁶ Na Micera n mereke aba ase Filipu ka, "Yasu na a fa wie atoori u saa bie su dee atin n bo i fa Yerusalem mie kpiri n nu fa ko Gaza mie kpiri n nu ni." I ti atin bo i fa boro kpantain n nu wɔ.

²⁷ Na Filipu ayasu, na wɔ ko, i wo ko su n na wɔ ko atu Itiyopiya sɔno bo i fite Itiyopiya asien su, i la jinaabiri bambaka, yiri nie Itiyopiya feme bara n nenje kere su a. Wɔ ko asu Nyeme Yerusalem

²⁸ sukpie i nyi kɔ awuru, i tana i kpɔŋgɔ toroku nu wɔ, na i sukan Nyeme nɔɔnie kanfɔ Esaya dɛɛ kadasi ni.

²⁹ Na Awiewie Casi n ase Filipu ka, “Cin dodo kpɔŋgɔ toroku n na a su i su.”

³⁰ Na wɔ ŋmati akɔ ati ka i sukan Nyeme nɔɔnie kanfɔ Esaya dɛɛ kadasi ni. Na wɔ bisa sɔnɔ n ka, “A ti kadasi n bo a sukan i n bu?”

³¹ Na sɔnɔ n abɔ i nu ka, “M yo sɛ ti i bu a, bo má ka sɔnɔ akan i bu akere m?” Na wɔ se Filipu ka i wura toroku n nu ba tana i bi.

³² Nɔɔnie n bo i wo i kan su n la bo ba kɛɛ i ka,
 “Yiri ti ka bɔɛ bo bu sufa i kɔ kpie i kɔm wɔ,
 i kaaki ti ka bɔmbaa bo bu sukpiekpie i ndɔɛ,
 na i sun má,
 sɔ ye wɔ se má jɔɛ be a.

³³ Bu yo faari i wuraari jɔɛdifoɔm saa nu wɔ,
 na ba kpie kɔɛ asɔ i, na ba wura i nyinse.

Be wo má bɛɛ bo i bá koro jɔjɔ fa kɔ i busu nufɔm dɔ,
 dama bu yo yiiri i ŋgɔɔ durunya n nu fɛn.”

³⁴ Na Itiyopiya sɔnɔ n abisa Filipu ka, “Jande, m koro ka a se m, Nyeme nɔɔnie kanfɔ n yo jɔjɔ ahin jɔɛ n ni ŋma a? I jɔjɔ niiri i ŋu wɔ, nzen be a?”

³⁵ Dɔ na Filipu abo i bu ni nyini Nyeme Jɔɛ Kadasi n bo yiri sɔnɔ n sukan i ni, na wɔ kan Yesu labari kpa n jɔɛ n akere i.

³⁶ Bu wo kɔ su ni, na ba kɔ aju awɔɛ be nu, na ba ŋu nzue, na sɔnɔ n ase i ka, “Niɛ, nzue yaa e, ye nzu kanda ka a koro bie má m Nyeme nzue a?” [

³⁷ Na Filipu abo i nu ka, “Nzen a yoori Yesu Kristo yarada ni u ahorembaa kɛɛ, m koro bie u.” Na sɔnɔ n ase i ka, “Ma yo yarada ka Yesu Kristo ti Nyeme Wa n a.”]

³⁸ Na wɔ ma toroku n ajina, na bu kɛɛ ajura awura nzue n nu, na Filipu abie i Nyeme nzue ni.

³⁹ Na ba fite nzue n nu, bu fite wieeri ni, na Mibie n Awiewie n akaba akpara Filipu akɔ, sɔnɔ n aɲu má i kun, na wɔ kɔ awuru ni ahorejɔ.

⁴⁰ Na Filipu aɲu ka i wo mie kpiri n bo bu fere i ka Azotusi n nu, na wɔ yasu dɔ sukɔ, na wɔ kan labari kpa n akere minem mie kɛɛ bo i siinri su ni, haari na wɔ kɔ aju Sizariya mie kpiri n nu.

9

Kabo Sɔɔlu wo kaakiiri barasu ni

¹⁻² Nyini saɲga n kɛɛ ni, na Sɔɔlu suboro i nyi se kabo i yo na i kere Yesu susufɔm n wuwuruwa haari i bá kun bu. Na wɔ koro ka i kɔ Damasiko mie kpiri n nu, na i kɔ tara nbaram ni nbiesɔm bo bu su Yesu atin su ni, na i wura bu jɔɔkɔ, na i fa bu ba Yerusalem mie kpiri n nu. Nyini dɛɛ ti, na wɔ kɔ Nyeme sayoowa dɔŋguyofɔm kere kpɛn n dɔ, akɔ ade kadasi bo i koro la atin wura Yudaɔm tientienbunɔɔ sɔɔm n nu na i tara bu.

³ Na wɔ de atin akɔ, i kɔ sudodo Damasiko, na sin akaba afite aɲgoro ata abara aye i.

⁴ Na wɔ kpaasi haari asiɛɲgu, na wɔ ti akonvi be ŋga, i ŋa, “Sɔɔlu, Sɔɔlu e, nzu ti ye a kere m wuwuruwa sɔ a?”

⁵ Na wɔ bisa ka, “M Mibie, wɔɔ ŋma a?” Na wɔ bɔ i nu ka, “Mini Yesu, mini ye a kere m wuwuruwa n a.

⁶ Ama, yasu jina na a wura mie n kunnu na m má sɔnɔ be kere u deke bo wɔ yo daka ka a yo ni.”

⁷ Na minem n bo bu su Soolu su n aka ajina surum, ba koro ase má jore be, bu tiiri akonvi ni nga a, ama, ba nu má sɔnɔ be.

⁸ Na Soolu ayasu ajina, na wɔ teke i nyumbaa, ama, wɔ nu má asi. Nyini ti, na ba so i saa nu, na ba cin i awura Damasiko miɛ n kunnu.

⁹ I woori dɔ, i lesan bo wɔ nya koro nu má asi, nyini sanɗa n gusu, i di má, i nu má.

¹⁰ Yesu susufɔ n kun be woori Damasiko miɛ kpiri n nu dɔ, bu fere i ka Ananiyasi. Na Mibiɛ ni aba i dɔ ka alɛɛ nu. Na wɔ jɔjɔ i dɔ ka, “Ananiyasi.” Na wɔ bɔ i nu ka, “M Mibiɛ, mini yaa.”

¹¹ Na Mibiɛ n ase i ka, “Yasu, fa atin n bo bu fere i ka Atingbere Tengeewa n su, na a kɔ sɔnɔ n bo bu fere i ka Yudasi n dika, na a bisa ka a koro sɔnɔ be bo bu fere i ka Soolu ni, na i fite miɛ kpiri n bo bu fere i ka Tarasu n wɔ. Yiri Soolu n wo dɔ wo nyemesere su,

¹² wɔ nu sɔnɔ be ka alɛɛ nu, bu fere i ka Ananiyasi, wɔ wura i dɔ afa i saa anana i nu ka i kaaki nu asi bekun.”

¹³ Na Ananiyasi abɔ i nu ka, “M Mibiɛ, mine dɔnggu akan nyini sɔnɔ n jɔrɛ akere m, kabo i kere u minem ni wuwuruwa Yerusalem miɛ kpiri n nu barasu.

¹⁴ Ye wɔ de yiko afite Nyeme sayoowa dɔnguyofɔ nkpienkpienm dɔ, aba Damasiko fɛn, na i ba tara minem bo bu su u n kere.”

¹⁵ Ama, na Mibiɛ n ase i ka, “Kɔ, dama mini ye ma yi i ka i yo m juma a, na i kɔ bo m duma kere minem bo bu ti má Yudafɔm ni, ni bu nfemem, ni Yisarelifɔm, adena bu si m.

¹⁶ Na m kere i wahara n kere bo wɔ yo daka ka i di i, mini dɛɛ ti ni.”

¹⁷ Nyini ti, na Ananiyasi akɔ Yudasi dika, na wɔ wura Soolu dɔ, na wɔ fa i saa anana i nu, na wɔ se i ka, “M niwa Soolu, ya Mibiɛ ni sunmaari m u dɔ a, yiri Yesu n ye i yiiri i nu kereeri u sanɗa bo a wo atin n nu suba n a. Yiri sunmaari m ka m ba ma a nu asi bekun, na Awiewie Casi n wura u nu a.”

¹⁸ Kpenga na deke be afite Soolu nyumbaa n nu atɔ, i ti ka jombaa bui wɔ. Na wɔ kaaki anu asi bekun. Na wɔ yasu ajina, na Ananiyasi abie i Nyeme nzue,

¹⁹ na wɔ di diire, na wɔ nya fanɗa bekun.

Kabo Soolu kaanri Nyeme jɔrɛ Damasiko miɛ kpiri n nu barasu ni

Na Soolu awo Yesu susufɔm n dɔ lennyɔ Damasiko miɛ kpiri n nu.

²⁰ Na wɔ kaba sukan Nyeme jɔrɛ Yudafɔm tientienbunɔɔ sɔm nu, ka Yesu ti Nyeme Wa n a.

²¹ Na jɔrɛ n amie minem kere bo bu tiiri ka i sukan Nyeme jɔrɛ ni, na ba bisa bu nu nu ka, “Má sɔnɔ n bo i wo Yerusalem miɛ kpiri n nu kun minem bo bu su Yesu su n lɛɛ? Ye kisa wɔ ba fɛn ka i ba tara minem wura bu jɔrɔkɔ, fa bu kpie bu nyi kɔ ma Nyeme sayoowa dɔnguyofɔ nkpienkpienm ni, má sɔ?”

²² Ama, na Soolu anya fanɗa abuka su, na wɔ kan akunma Yudafɔm bo bu wo Damasiko n nu, na wɔ kan ateke bu nyi na wɔ ma ba si ka Yesu ti Kristo n a, Tiidefɔ n bo Nyeme ase ka i súnma i ni.

²³ Na wɔ yo lennyɔ, na Yudafɔm n atien bu nɔɔ afa sɛsɛsu kabo bu yo na bu kun Soolu,

²⁴ ama, na wɔ ti kabo ba sɛsɛsu ka bu kun i ni. Na ba nminda i miɛ ni anɔm n nu, wiesu ni kɔngue, ka nzen i ba sufite na bu kun i.

²⁵ Ama, na cɛɛn n be kɔngue, na Soolu susufɔm afa i awura kandie nu, na ba fa i acɔɔndi miɛ n kobe tukoro nu ase.

Kabo Soolu kɔ juuri Yerusalem miɛ kpiri n nu ni

²⁶ Saŋga bo Soolu kɔ juuri Yerusalem miɛ kpiri n nu ni, na wɔ koro ka i fa i ŋu bo Yesu susufɔm n su, na i ni bere yo kun, na sere ati bu, dama ba yo má yarada ka i ti Yesu susufɔm n be wɔ.

²⁷ Dɔ na Banabasi afa i akɔ Yesu jaramasam n dɔ. Na yiri Banabasi akan akere bu kabo Soolu wo atin n nu sukɔ Damasiko miɛ kpiri n nu, na i ŋuuri Mibiɛ ni, ni kabo Mibiɛ n jɔjɔri i dɔ barasu ni, ni kabo Soolu kaanri Nyeme jɔre Yesu duma nu Damasiko, ni ahoresi ni.

²⁸ Banabasi seeri sɔ ni, na ba soro su, na Soolu awo bu dɔ Yerusalem, na i sujengbe sukan Nyeme jɔre Yesu duma nu, ni ahoresi.

²⁹ Na i ni Yudafoɔm bo bu jɔjɔ Giriki anie ni abo anzama haari na ba se akuruwa ni bu beŋgu. Na ba koro ka bu kun i.

³⁰ Saŋga bo yaradayofɔm n tiiri ahin jɔre n sɔ ni, na ba fa Soolu akɔ aju Sizariya miɛ kpiri n nu, na ba ma wɔ kɔ Tarasu miɛ kpiri n nu.

³¹ Na Kristo jama n anya faŋga abuka su, na bu susoro Mibiɛ n nahore su, na bu suwo ni Awiewie Casi n deɛ ahoresi nu, na bu sunya minem subuka su.

Kabo Petoro yoori abonɔ sam ni

³² Na Petoro ajengbe ka i bara ye awɔre n kere, na cɛen n be sɔ ɔ, na wɔ kɔ ka i kɔ nie Nyeme minem n bo bu wo Luda deɛ miɛ kpiri n nu n busu.

³³ Dɔ na wɔ kɔ anu sɔnɔ be, bu fere i ka Aniyasi, i saam ni i jaam kere awu, i da sɔrɔ ɔ, i afɔ mɔcɛ lɛɛ bo i koro yasu má.

³⁴ Na Petoro ase i ka, “Aniyasi, Yesu Kristo ama u laifie. Yasu na a nyanya u dasu ni.” Kpeŋga na wɔ kaba ayasu.

³⁵ Minem kere bo bu wo Luda miɛ kpiri n nu, ni bo bu wo Saroni awɔre n nu n kere ŋuuri i sɔ ni, na ba kaaki bu wo na ba fa bu ŋu ama Mibiɛ ni.

³⁶ Bara be yo woori miɛ kpiri be bo bu fere i ka Jopa n nu, bu fere i ka Tabita, i ti Yesu susufɔ ɔ, bu fere i duma Giriki anie nu ka Dɔkasi, i bu la ka aja. I yo sakpa wɔ saŋga kere, na i si yaarifɔm anunfo.

³⁷ Ama, na wɔ ba ada tukpaki na wɔ wu, na ba bie i nzue, na ba fa i ada angoro sɔɔ nu.

³⁸ Jopa gusu waari má ni Luda, na saŋga bo Yesu susufɔm bo bu wo Jopa n tiiri ka Petoro wo Luda ni, na ba sunma mine nnyɔ i dɔ ka i yo anie na i bra ndende.

³⁹ Nyini ti, na Petoro ayasu asu bu su na bu kere akɔ. Saŋga bo i kɔ juuri ni, na ba fa i afun akɔ angoro sɔɔ n nu, na nkunafɔm kere atien bu nɔɔ abara aye i, na bu susun, na ba fa tanleem ni tani barasu barasu bo Dɔkasi la ŋɔɔ na i kpa maari bu n akere yiri Petoro.

⁴⁰ Na Petoro afɔn bu kere afite sɔɔ n nu, na wɔ kutu i nanɔgoroma su, na wɔ sere Nyeme, na wɔ kaaki i nyunu awɔ fuin ni, na wɔ se i ka, “Tabita, yasu.” Saŋga bo i tekeeri i nyumbaa ni, na wɔ ŋu Petoro, na wɔ yasu atana.

⁴¹ Na Petoro aso i saa nu abuka i, na wɔ yasu ajina, na wɔ fere Nyeme minem n ni nkunafɔm ni kere, na wɔ fa i akere bu ka wɔ tenge.

⁴² Na nyini labari ni abara aye Jopa miɛ n kere nu, na mine beberebe ayo Mibiɛ n yarada.

⁴³ Na Petoro awo Jopa lennyɔ, i yo woori jereke be dika a, bu fere i ka Simon.

10

Petoro ni Koneliyo deɛ jɔre

¹ Sɔnɔ be yo woori Sizariya miɛ kpiri n nu, bu fere i ka Koneliyo, i ti Romafɔ sojam n kpɛn wɔ, i niɛ soja mbaa yaa su a. Bu fere nyini soja jama mbaa n ka Itali sojam.

² Koneliyo ti sɔnɔ bo i su Nyemɛ atin su wɔ, i ni i dikafɔm kɛrɛ, na bu soro Nyemɛ. Na i suyo sakpa ma Yudafɔm bo bu ti yaarifɔm ni, na i susere Nyemɛ sanɓa kɛrɛ.

³ Na cɛɛn n be wiesu kerefi nsan sanɓa, na wɔ kaba aɗu Nyemɛ mɛrɛke be, na mɛrɛke n aba ase i ka, “Koneliyo.”

⁴ Na wɔ niɛ i gbirim, na sɛrɛ ati i, na wɔ bisa i ka, “M Mibiɛ, nzu a?” Na mɛrɛke n abɔ i nu ka, “Nyemɛ ade u sere, wɔ ɗu sakpa n bo a yo ama yaarifɔm ni, i wara koro fi má nyini sam kɛrɛ.

⁵ Tɔ, kisa, sunma minɛm na bu kɔ Jopa miɛ kpiri n nu na bu kɔ fere sɔnɔ bo bu fere i ka Simon Pɛtoro ni.

⁶ I wo jɛrɛke be dika a, bu fere i gusu ka Simon, i dika n wo fa dodo tieku n wɔ.”

⁷ Mɛrɛke n jɔjɔri i dɔ wieeri ni, na wɔ kɔ, na Koneliyo afere i ngbɛfɛnɛm nnyɔ, ni soja kun be bo i su Nyemɛ atin su na i wo i dika ni.

⁸ Na wɔ kan jɔrɛ n kɛrɛ bo mɛrɛke n seeri i ni akere bu, na wɔ sunma bu Jopa miɛ kpiri n nu.

⁹ Na alecin ɗgarama, na ba de atin na bu kɔ Jopa, bu kɔ sudodo dɔ fa kɔ wiɛ kekete sanɓa, na Pɛtoro gusu ayasu afun sɔɔ su ka i sere Nyemɛ.

¹⁰ Na ahɔɛ ati i, na wɔ koro deke be i di. Sanɓa bo bu wo diire n yo su ni, na deke be aba i dɔ ka alɛɛ nu dɛɛ su.

¹¹ Na wɔ ɗu ka aɗgoro n ateke, na wɔ ɗu deke be i ti ka tani bambaka wɔ, ba cici i bue nna n kɛrɛ, i succɔndi ba asiɛɗgu.

¹² Ajaanna barasu kɛrɛ, ni cinbukunnusufɔm barasu kɛrɛ, ni lanɓkɛtɛfɔm barasu kɛrɛ ka bu wo nu.

¹³ Na wɔ ti akonvi be ɗga, i ɗa, “Pɛtoro, yasu na a kun di.”

¹⁴ Ama, na Pɛtoro ase i ka, “M Mibiɛ, ai. M nya di má deke bo i ti ciire na i la fin.”

¹⁵ Na akonvi n akaaki ase i bekun ka, “Deke kɛrɛ bo Nyemɛ ayo i casi, má a se ka i ti fin.”

¹⁶ Deke n yoori sɔ kɔ juuri kun kun kpe nsan a, na wɔ kaba afun akɔ aɗgoro.

¹⁷ Sanɓa n bo Pɛtoro subirisi fa kɔ deke n bo wɔ ɗu i n su ni, nyini sanɓa, minɛm bo Koneliyo sunmaari bu ni, abisa asi Simon dika, na ba ka ajina awuru n aɗo nu.

¹⁸ Na ba fere sɔnɔ be, abisa i ka, Simon Pɛtoro wo dɔ ɔ?

¹⁹ Pɛtoro toko wo sunsun su, fa kɔ deke bo i baari i dɔ ka alɛɛ nu n bu. Dɔ na Awiewiɛ Casi n ase i ka, “Ti fɛn. Mine nsan nbem wo fɛn sunienie u busu.

²⁰ Nyini ti, yasu na a jura, na u ni bɛrɛ kɔ, má a yo sika, dama mini sunmaari bu a.”

²¹ Na Pɛtoro ajura akɔ minɛm n dɔ, na wɔ se bu ka, “Mini ye am nienie m n a. Am natiiri bu la ka sɛ wɔ?”

²² Na ba bɔ i nu ka, “Sojam kpɛn Koneliyo sunmaari ya u dɔ a. I ti sɔnɔ kpa a, na i soro Nyemɛ, na Yudafɔm kɛrɛ bu i agaya. Nyemɛ mɛrɛke be seeri i ka i fere u, na a ba i dika na a ba kan jɔrɛ bo a la i kere i a.”

²³ Nyini ti, na Pɛtoro ade minɛm n awura, na ba da i dɔ.

Alecin ɗgarama, na Pɛtoro ayasu, na i ni minɛm n akɔ, bu sukɔ ni, na yaradayofɔm nbem bo bu wo Jopa n gusu asu i su akɔ.

²⁴ Na i alecin fɔfɔrɛ, na ba ju Sizariya, bu kɔ ɗu ka Koneliyo atien i lamɔsim, ni i danfo kpam nɔɔ sunminda yiri Pɛtoro.

²⁵ Saŋga bo Petoro kɔ ŋa i wura awuru n nu ni, na Koneliyo akpa i atin akutu i jaa bu haari asienɔ, na wɔ su i.

²⁶ Ama, na Petoro aye i su ajina, na wɔ se i ka, “Mini ni m tii mmɔɔ, ti adamande wɔ.”

²⁷ Petoro ni Koneliyo bitaari anzama sɔɔ haari bu kɔ wuraari awuru n nu, dɔ na wɔ ŋu ka mine beberebe atien bu nɔɔ.

²⁸ Na wɔ se bu ka, “Amberɛ mmɔɔ ni am tii si ka, i ti ciire wɔ ka yere Yudafɔm fa ya ŋu saŋga ni daanfɛ barasu be nu, wara ya wura bu dika. Ama, Nyemɛ akere m ka má m sinndi sɔnɔ be ka i woowa ti fin.

²⁹ Nyini ti, ye a sunma fereeri m ye ma kete má ye ma ba n a. M koro ka m bisa u wɔ, nzu ti ye a sunma fereeri m a?”

³⁰ Na Koneliyo ase i ka, “I nyuma lenna lɛɛ, ka ahin saŋga n sɔ, fa kɔ wiesu kerefi nsan, m wo m dika n nu wo nyemɛsere su, na sɔnɔ be akaba aba ajina m nyunu, i wura sutura fofoe papasi,

³¹ na wɔ se m ka, ‘Koneliyo, Nyemɛ ade u sere, ye wɔ tenge u sakpa bo a yo ama yaarifɔm n su.

³² Nyini ti, sunma na bu kɔ Jopa, na bu kɔ fere Simon Petoro ni. I wo jereke be dika a, bu fere i gusu ka Simon, i dika n wo dodo tieku n wɔ.’

³³ Nyini ti, ye m kaba sunmaari ka bu fere u n a, ye wɔrɔ gusu a yo sakpa ye a ba. Kisa, ya kere gusu atien ya nɔɔ fɛn Nyemɛ nyunu, na ya ti deke n kere bo Mibiɛ n ama u nɔɔ ka a fa ma ya ni.”

Kabo Petoro kaanri Nyemɛ jɔrɛ n Koneliyo dika ni

³⁴ Na Petoro anya ase ka, “Kisa, ma si nahɔrɛ su ka adamande kere ti kun wɔ Nyemɛ dɔ, i tambu má nu.

³⁵ Sɔnɔ kere bo i soro Nyemɛ na i yo sa bo i kɔ atin su i dɔ, i mi koro i ti nzu daanfɛ sɔnɔ, Nyemɛ de i wɔ.

³⁶ Am si labari n bo Nyemɛ fa maari Yisarelifɔm, nyini labari kpa n kere ka minem nya tanalaifɛ Yesu Kristo dɛɛ ti, yiri ti sɔnɔ kere Mibiɛ a.

³⁷ Am kere si sa bo i boori i bu Galili dɛɛ awɔrɛ n nu, saŋga bo Yohane kaanri Nyemɛ nzue bie n jɔrɛ ni, haari na wɔ bara aye Yudiya dɛɛ awɔrɛ n kere nu.

³⁸ Am si Yesu Nazaretifo n jɔrɛ ni, kabo Nyemɛ faari i Awiewie Casi n ni yiko n wuraari i ŋu ni, ni kabo i nati bara yɛeri deke kere suyo sakpa sutuntun minem kere bo Sitana mie bu n na bu nya laifɛ, dama Nyemɛ woori i dɔ a.

³⁹ Yere, ya ŋuuri deke n kere bo i yoori bu Yudafɔm dɛɛ asien su, ni Yerusalem mie kpiri n nu ni. Na ba kpama i baka jaanu n su, na wɔ wu.

⁴⁰ Ama, i lesan cɛɛn, na Nyemɛ atenge i afite i yiwee n nu, na Nyemɛ ama minem aɲu i.

⁴¹ Má sɔnɔ kere ŋuuri i a, ama, yere bo Nyemɛ du mɔ yiiri ya ka ya di i daani ni, yere ŋuuri i a, na ya ni yiri asaŋga adi, na ya nu, saŋga bo i tengeeri ni.

⁴² Na wɔ ma ya nɔɔ ka ya kɔ kan labari kpa n kere minem na ya di daani ka, yiri ye Nyemɛ ayi i ka i bá di ŋɔɔfɔm, ni bo ba wu n kere jɔrɛ a.

⁴³ Nyemɛ nɔanie kanfɔm kere yo jɔjɔri Yesu jɔrɛ, bu ŋa, ‘Sɔnɔ kere bo i yoori i yarada, Nyemɛ fá i mi satie bo wɔ yo i fa ce i, Yesu dɛɛ duma n nu.’ ”

Kabo Awiewie Casi n wuraari minem bo bu ti má Yudafɔm n ŋu ni

⁴⁴ Saŋga bo Petoro toko jina wo jɔjɔ su ni, na Awiewie Casi n aba awura minem kere bo bu jina suti labari n ŋu.

⁴⁵ Na Yudafom bo bu ti yaradayofom na bu suuri Petoro su fiteeri Jopa mie kpiri n nu baari n ayo alekutura, kabo Nyeme afa i Awiewie Casi n awura minem n bo bu ti má Yudafom mmoo ñu ni.

⁴⁶ Na bere Yudafom ni, ati ka minem n sujɔɔ anie barasu barasu sukansi Nyeme. Na Petoro ase ka,

⁴⁷ “Nyeme afa i Awiewie Casi n awura ahin minem n ñu, kabo i fa wuraari ya ñu ni. Ye ñma koro kete ka má ya bie bu Nyeme nzue a?”

⁴⁸ Nyini ti, na Petoro ama noo ka bu bie bu Nyeme nzue, Yesu Kristo duma n nu. Na ba sere i ka i wo bu do lennyo.

11

Kabo Petoro kaanri i sa n bu kereeri Kristo Jama n Yerusalem ni

¹ Na Yesu jaramasam ni, ni yaradayofom n kere bo bu wo Yudiya awore n nu n ati ka, minem bo bu ti má Yudafom n gusu ade Nyeme noanie n ayo i yarada.

² Nyini ti, sangha bo Petoro ko Yerusalem mie kpiri n nu ni, na Yudafom yaradayofom nbem ajaraki i.

³ Bu ña, “Nzu ti ye a ko minem bo bu wura má kenkene n dika ye u ni bere ko sangha di diire a?”

⁴ Do na Petoro abo i bu, na wo kan kabo jore n kere boori i bu kun kun n akere bu.

⁵ I ña, “M wo Jopa mie kpiri n nu, wo nyemesere su ni, na ma ñu deke be, i yo m ka alele dee su wo. M ñuuri deke be, i ti ka tani bambaka wo, ba cici i bue nna n kere, i succondi fite angoro n nu suba asienggu, na wo ba ajina m bi.

⁶ Na ma nie i nu nyunyumi, na ma ñu ajaannam barasu kere, ni cinbukunnusufom barasu kere, ni lan̄kpetefom barasu kere ka bu wo nu.

⁷ Na ma ti akonvi be ñga, i ña, ‘Petoro, yasu na a kun di.’

⁸ Ama, na ma se i ka, ‘M Mibie, ai. M nya di má deke bo i ti ciire na i la fin.’

⁹ Na ma kaaki ati akonvi ni ñga bekun, i fite angoro wo, i ña, ‘Deke kere bo Nyeme ayo i casi, má a se ka i ti fin.’

¹⁰ Deke n yoori so ko juuri kun kun kpe nsan a, na wo kaaki afun ako angoro.

¹¹ Nyini sangha n nu, na mine nsanm n bo bu sunmaari bu m do n afite Sizariya mie kpiri n nu aba aju awuru n bo m wo nu ni.

¹² Na Nyeme Awiewie Casi n ase m ka m yasu na m su bu su ko, má m yo sika. Na ma su bu su, na ya kere ako. Na ahin yaradayofom nsenm n gusu asunma m afite Jopa, na ya kere ako Sizariya, na ya ko awura Koneliyo dika.

¹³ Na wo se ya kabo i ñuuri Nyeme mereke i dika barasu ni, ni kabo mereke n ase i ka i sunma na bu ko Jopa, na bu ko fere sono n bo bu fere i ka Simon Petoro ni,

¹⁴ na i ba kan jore be kere u ni u dikafom kere na am nya tiide.

¹⁵ Na ma bo i bu ka m joo. Sangha bo m wo joo su ni, na Awiewie Casi n ajura awura bu ñu, kabo i yo ba wuraari ya ñu bumboori ni.

¹⁶ Na ma tenge su kabo Mibie n yo seeri ni. I ña, ‘Yohane yo faari nzue bieeri am a, ama, mini fa Awiewie Casi n ba wura am ñu a.’

¹⁷ I ti nahore wo ka Nyeme faari i Awiewie Casi n wuraari yere Yudafom bo ya yo ya Mibie Yesu Kristo yarada n ñu, ye wo fa awura bo bu ti má Yudafom gusu ñu. Mini la ñma bo m koro kanda Nyeme ka má i yo sa bo i koro ka i yo i a?”

¹⁸ Saŋga bo bere Yudafom tiiri so ni, ba se ma jore be kun, na ba kansa Nyeme, bu na, "Nyeme ama minem bo bu ti ma Yudafom n atin ka bere gusu kaaki bu wo na bu nya ngoo."

Kristo jama n bo i wo Antiyoki n jore

¹⁹ Fite saŋga n bo bu kuunri Satefano n dee sin, na ba kere yaradayofom wuwuruwa, nyini ti, na ba sandi abara aye deke kere, na nbem ako Fonisiya awore n nu, ni Sipurusi asien n su, ni Antiyoki mie kpiri n nu, na bu ko sukan Nyeme noanie n sukere Yudafom ngumi.

²⁰ Ama, bu nbem wo nu, bu fite Sipurusi, na nbem gusu fite Sirene mie kpiri n nu, na ba ko Antiyoki, na bu sukan ya Mibie Yesu labari kpa n jore sukere minem bo bu ti ma Yudafom ni.

²¹ Na Mibie n yiko awo bu do nahore su, na mine beberebe ayo yarada, na ba kaaki bu wo, na ba su Mibie n dee atin n su.

²² Nyeme minem bo bu wo Yerusalem mie kpiri n nu n tiiri nyini labari so ni, na ba sunma Banabasi Antiyoki do.

²³ Saŋga bo i juuri na i juuri sakpa bo Nyeme ayo ama minem so ni, na i ahore ajo, na wo tu bu fo ka bu ma bu nyunu boro yarada n bo bu bita i fa ko Mibie n dee atin n su ni, na bu su i su ni bu ahorembaa kun.

²⁴ Banabasi tiiri sono kpa a, na Awiewie Casi n awo i do, na i la yarada agaya. Na mine beberebe aba ayo Mibie n yarada.

²⁵ Na Banabasi ako Tarasu mie kpiri n nu ka i ko nienie Soolu.

²⁶ Saŋga bo Banabasi ko juuri Soolu ni, na wo fa i na ba ko Antiyoki, na bere mine nnyo n kere ako awo do afo kun, na ba tien Kristo jama n noo, na ba kere mine beberebe. Antiyoki do ye bu du mo fereeri yaradayofom n ka Kristofom a.

²⁷ Nyini saŋga n nu, na Nyeme noanie kanfo nbem afite Yerusalem aba Antiyoki do.

²⁸ Bu fere bu nu kun ka Agabusi, do na Awiewie Casi n ama i yiko, na wo yasu ajina ajajo ka, ahoe bambaka be ba to durunya n kere nu. Nyini ahoe n ba toori saŋga bo Romafom feme kpiri bo bu fere i ka Kalodisi n diiri i femeya n a.

²⁹ Na Kristo susufom ni ayo anookun ka bu kun kun n kere yiya nwaa kabo bu faŋga nyaari ti barasu, na bu fa ko buka bu benggu yaradayofom bo bu wo Yudiya awore n nu ni.

³⁰ Na ba yiya nwaa ni, na ba fa nwaa n asunma Banabasi ni Soolu ka bu fa ko ma Kristo jama nkpienkpienm ni.

12

Kabo bu kereeri Kristo jama n wuwuruwa barasu ni

¹ Fa ko nyini saŋga n nu, na Feme Herode abo i bu sukere Kristo jama mine nbem wuwuruwa.

² Na wo ma ba fa takobe akun Yohane goro Yakobo.

³ I yoori saŋga bo Yudafom sudi bu Butara eenkpiri n wo.

⁴ Bu taraari Peto wuraari dansaraka nu ni, na ba fa i awura sojam buru ni nsen saa nu ka bu nie i dika. Na bere gusu akpaaki nu ka mine nna nie i dika ko ju saŋga su, na nyingam nya de. Na Feme Herode asese su ka bu diiri Butara eenkpiri n siinri, i fa Peto jina jama n kere nyunu wo, na i di i jore.

⁵ Nyini ti, na wo ka dansaraka n nu, na Kristo jama n asere Nyeme ni anyumboro ama i.

Kabo Nyeme mereke n yiiri Peto fiteeri dansaraka n nu ni

⁶ Nyini cɛɛn n kɔŋgɛ n bo i alecin na Fɛmɛ Herode má bu yi Petoro fite na bu di i jɔrɛ ni, i da sojam nnyɔ afien wɔ. Na ba wura i jɔrɔkɔ aminda bu i bue nnyɔ n kerɛ, na nbem gusu kaaki jina dansaraka anɔ n nu n̄minda.

⁷ Kpen̄ga na Nyɛmɛ mɛrɛkɛ be aba ajina dansaraka n nu, na sɔɔ n ata wein. Na mɛrɛkɛ n abo Petoro gbɛngbɛn, na wɔ tenge i, na wɔ se i ka, “Yasu ndende.” Na jɔrɔkɔ n bo i wo Petoro saa n afite atɔ.

⁸ Na mɛrɛkɛ n ase i ka, “Bo u dambara ni, na a fa u gbagbaa n wura.” Na Petoro ayo sɔ, na wɔ kaaki ase i ka, “Fa u tanlɛɛ n wura, na a su m su.”

⁹ Na Petoro asu i su afite dansaraka sɔɔ n nu, wɔ si má ka sa n bo mɛrɛkɛ n suyo i n ti nahɔrɛ wɔ, i sunsun ka i yo i ka alelɛ dɛɛ su wɔ.

¹⁰ Na ba kɔ asin sojam ciciri su dɛɛ n n̄u, na ba kɔ asin nnyɔ su dɛɛ n gusu n̄u, na ba kɔ aju bulaari anɔ n bo bu teke i ka na bu sin kɔ mie n kunnu ni. Na anɔ n ni i tii ateke, na ba fite. Bu toori atɛngbere n nu kɔɔri mɔ kaan, na mɛrɛkɛ n akaba ayaki Petoro.

¹¹ Dɔ na Petoro nyunu akoro, na wɔ se ka, “Kisa, ma si ka i ti nahɔrɛ wɔ, ka Micera n ye wɔ sunma i mɛrɛkɛ n ka i yi m fite Fɛmɛ Herode saa nu, ni deke n kerɛ bo Yudafɔm sunsun ka bu yó m ni.”

¹² I faari nyini sa n kerɛ nu sɔ ni, na wɔ kɔ Mariya dika, i wa la Yohane n bo bu kaaki fere i Marako ni, nyini saŋga, jama beberebe atien bu nɔɔ wo nyɛmɛsere su.

¹³ Na Petoro abobo dasin anɔ ni, na afani be, bu fere i ka Roda, na wo ba ka i ba niɛ sɔnɔ n bo i bobo anɔ ni.

¹⁴ Na wɔ si akonvi n ka Petoro lɛɛ, i ahore ajo agaya n dɛɛ ti, wɔ teke má anɔ ni, na wɔ n̄mati akpie i nyi, na wɔ kɔ ase minɛm bo bu wo awuru n nu n ka Petoro jina dasin.

¹⁵ Na ba se i ka, “A bo fie wɔ.” Ama, na wɔ kaaki ajojo ni anyumboro ka i ti nahɔrɛ wɔ. Dɔ na ba se ka, “Kisa, i mɛrɛkɛ a.”

¹⁶ Nyini saŋga n kerɛ Petoro toko jina anɔ n nu wo bobo su. Kasin, na ba ba ateke anɔ ni, na saŋga bo bu n̄uuri ka yiri ni, na ba yo alekutura.

¹⁷ Na Petoro afa i saa ayo bu ka bu yaki nan̄mie. Na wɔ kan akere bu kabo Mibiɛ n yiiri i fiteeri dansaraka sɔɔ n nu barasu ni. Na wɔ se bu ka, “Am kɔ kan ahin jɔrɛ n kere Yakobo ni yaradayofɔ nyingam n kerɛ.” Na wɔ fite bu bi berɛ akɔ deke be.

¹⁸ Ale ba ciinri ni, na jɔrɛ n amie sojam ni, ba si má kabo bu yo. Na ba se ka, “Ye nzu ayo Petoro a?”

¹⁹ Na Fɛmɛ Herode ama nɔɔ ka bu niɛniɛ Petoro busu, ama, ba n̄u má i. Nyini ti, na wɔ bisa sojam bu jɔrɛ ni, na wɔ ma nɔɔ ka bu kun bu. Nyini sin, na Fɛmɛ Herode afite Yudiya awɔrɛ n nu, na wɔ kɔ awo Sizariya mie kpiri n nu fa kɔ saŋga su.

Kabo Fɛmɛ Herode wuuri barasu ni

²⁰ Na Fɛmɛ Herode afa yaa agaya Tiro ni Sidon mie n nufɔm n̄u, nyini ti, na ba fa sesesu, na ba kɔ ka bu n̄u i. Bu du mɔ kɔɔri sɔnɔ be dɔ ɔ ka, bu fere i ka Blasitusi, na bu ni i dɛɛ ayo kun ka. Blasitusi ti Fɛmɛ Herode gisan n niɛfɔ kpiɛn wɔ. Na wɔ nya fa bu akɔ Fɛmɛ Herode dɔ, na ba kɔ asere ka i ma bu ni yiri nya tanalaifɛ. Deke bo i ti na bu yoori sɔ n la ka, dama bu diire kerɛ fite yiri fɛmɛ n dɛɛ asiɛn n su wɔ.

²¹ Cɛɛn n bo bu kpamaari i ba juuri ni, na Fɛmɛ Herode awura i femɛya sutura, na wɔ tana i femɛya bie n su, na wɔ jojo minɛm n dɔ.

²² I jojo wieeri ni, na minɛ kere atien, bu n̄a, “Ahin yiri, nyɛmɛ be ajojo a, má adamande.”

²³ Kpen̄ga na Micera n mɛrɛkɛ akaba abo i aji, dama wɔ ma má Nyɛmɛ jirima n dɛɛ ti. Na wɔ da tukpaki, na kakabam awura i, na wɔ wu.

²⁴ Na Nyeme nɔaniɛ n asandi abara aye deke n kere, na ba nya mine dɔŋgu abuka su.

²⁵ Banabasi ni Sɔɔlu yoori bu juma n Yerusalem miɛ nu wieeri ni, na ba fa Yohane bo bu kaaki fere i ka Marako ni, na ba fite Yerusalem na ba kaaki ako Antiyoki miɛ kpiri n nu.

13

Kabo bu yiiri Sɔɔlu ni Banabasi sunmaari bu ni

¹ Kristo jama n bo i wo Antiyoki miɛ kpiri n nu ni, bu nu nbem ti Nyeme nɔaniɛ kanfɔm wɔ, na nbem gusu ti kerefɔm. Bere la Banabasi, ni Simeyon bo bu kaaki fere i ka Nigeri ni, ni Lukiyosi bo i fite Sirene miɛ kpiri n nu ni, ni Manaye bo bu yo saŋga taari i ni Feme Herode, ni Sɔɔlu ni.

² Saŋga bo bu cici bu nɔɔ na bu wo Mibiɛ n su su ni, na Awiewie Casi n ase bu ka, “Am yi Banabasi ni Sɔɔlu ma m, na bu yo juma n bo ma yi bu ka bu yo i ni.”

³ Bu ciciiri bu nɔɔ, na bu sereeri Nyeme n wieeri ni, na ba fa bu saa anana bu ŋu, na ba ma bu atin na ba kɔ.

Kabo Banabasi ni Sɔɔlu kɔɔri Sipurusi ni

⁴ Na Awiewie Casi n asunma Banabasi ni Sɔɔlu na ba kɔ aju miɛ kpiri be su, bu fere i ka Selusiya, na ba fa lee bambaka dɔ, na ba kɔ miɛ be bo i wo lui bambaka be su, bu fere nyini lui n ka Sipurusi n su.

⁵ Saŋga bo bu kɔ juuri lui n miɛ kpiri n bo bu fere i ka Salamisi n su ni, na ba kan Nyeme jɔre Yudaɔm tientienbunɔɔ sɔɔm nu. Na Yohane bo bu kaaki fere i ka Marako n awo bu dɔ abuka bu juma.

⁶ Na ba fa bere asin ako aju lui bambaka n wie atɔɔri dɛɛ bue ni, miɛ kpiri be su, bu fere i ka Pafɔsi. Na ba kɔ aŋu boboyayafɔ be dɔ, bu fere i ka Baari Yesu, i ti Yudaɔɔ, i yo i ŋu ka i ti Nyeme nɔaniɛ kanfɔɔ, ama, i ti má i.

⁷ I yo wo lui bambaka n su gomina n dɔɔ, bu fere gomina n ka Segosi Pɔɔlu, i ti sifɔɔ. Na wɔ fere Banabasi ni Sɔɔlu, dama i koroori ka i ti Nyeme nɔaniɛ n wɔ.

⁸ Ama, boboyayafɔ ni, bu kaaki fere i duma Giriki anie nu ka Elamasi ni, na wɔ boro i nyi ka i kanda gomina n na má i yo Yesu yarada.

⁹ Ama, na Nyeme Awiewie Casi n awura Sɔɔlu, bo bu kaaki fere i ka Pɔɔlu ŋu, na wɔ nie boboyayafɔ n gbirim, na wɔ se i ka,

¹⁰ “Wɔɔɔ, a ti Sitana dɛɛ wa a. A ti deke kere bo i ti kpa n kpɔfɔɔ. Kore ni satieyo asunnu u ŋu. A ti Mibiɛ n atin kpa n saakifɔɔ. Cɛɛn bɔnɔ ye a yaki i a?”

¹¹ Ti fen, Mibiɛ ni bó u ji kisa, na a yó anyinsin fa kɔ saŋga su, na a ŋú má wie ka i ta kun.” Kpeŋga na i nyunu akaba asi biri, na i suturingi sunienie sɔnɔ bo i kere i atin.

¹² Saŋga bo gomina n ŋuuri nyini n sɔ ni, na i tiiri kabo bu kan Nyeme nɔaniɛ ni, na wɔ yo i alekutura, nyini dɛɛ ti, na wɔ yo Mibiɛ n yarada.

Kabo Pɔɔlu ni Banabasi kɔɔri Pisidiya dɛɛ Antiyoki miɛ n nu ni

¹³ Na Pɔɔlu ni i lamɔkɔm n afa lee bambaka afite Pafɔsi dɛɛ miɛ kpiri n nu ako aju miɛ kpiri n bo bu fere i ka Perɛga na i wo Pamfiliya awɔre n nu ni. Na Yohane bo bu kaaki fere i ka Marako n akpaaki ayaki bu, na wɔ kpie i nyi ako Yerusalem miɛ kpiri n nu.

¹⁴ Na ba fite Perɛga ako aju Antiyoki miɛ kpiri n bo i wo Pisidiya awɔre n nu ni. Na Numiyi cɛɛn, na ba kɔ awura atana bu tientienbunɔɔ sɔɔ n nu.

15 Saɗga bo bu kaanri Nyeme noanie kpamaawa kadasi n bo Moyisi kereeri i ni, ni Nyeme noanie kanfom dee kadasi n wieeri ni, na bu tientienbunoo soo ni nkpienkpienm n asunma ase Poolu ka, "Njam, nzen am la jore be bo am kan kere jama ni, na i ma bu ahoresi, am kan kere bu."

16 Do na Poolu ayasu ajina, na wo ye i saa su, na wo bo i bu na i joo, i na, "M lamoko Yudafom, ni amberere bo am ti ma Yudafom na am su Nyeme ni, am ti fen.

17 Yisarelifom Nyeme ni, yiri yo yiiri ya nam a, na wo ma ba tere abuka su, saɗga bo bu yo ti wofom Ijipiti asien su ni. Na Nyeme afa i dee yiko bambaka n na wo yi bu afite Ijipiti asien n su,

18 na wo mindi abita bu boro kpantain n nu ako aju afo aburana.

19 Na wo butu daanfere barasu nso n bo bu wo Kanana asien n su ni, na wo fa bu asien n ama Yisarelifom ka bu fa yo bu tienju dee.

20 Ahin n kere yoori so ko juuri afo yaa nna ni afo aburunu wo. Nyini sin, na Nyeme ayi mofom ama bu haari fa ko ju saɗga bo i yiiri i noanie kanfo Samuweli maari bu ni.

21 Na ba ba ase Samuweli ka bu koro femere wo, na Nyeme ama Soolu bo i ti Kisi wa n ayo bu femere, i fite Benjamin n dee busu nu wo, na wo bita bu ako aju afo aburana.

22 Na Nyeme ayi Soolu femere n nu, na wo fa Femere Davidi bo i ti Jese wa n ajina i jinaabiri. Na Nyeme adi i nusu daani, i na, 'Yiri Davidi, Jese wa n ti sono bo m ahore atara i a, yiri yo m sa koroowa kere a.'

23 Yiri Femere Davidi dee busu nu ye Nyeme seeri ka Yisarelifom Tiidefo Yesu ni fite n a.

24 Kana Yesu ba ba, Yohane du mo ba kaanri Nyeme jore kereeri Yisarelifom wo, ka bu kaaki bu wo na i bie bu Nyeme nzue.

25 Na saɗga bo Yohane ba sukoro ka i wie i juma n ni, na wo se minem n ka, 'Am sunsun ka mini la nma a? Ai, ma mini la sono n bo am nminda i ka i ba n a. Ama, am ti fen. Yiri bo i wo m sin suba ni, m ti kaan mmoo ni bo m dodo i.'

26 M ninbaam, amberere bo am ti Abraham busu nufom ni, ni amberere bo am ti ma Yudafom na am su Nyeme ni, yere ye Nyeme ma ba fa ahin tiide labari n ama ya a.

27 Dama Yerusalemfom ni bu nkpienkpienm kere asi ma Nyeme noanie kanfom dee kadasi n bu, haari ni bo bu kan i bu Numiyi ceen n kere mmoo ni. Ba kaaki asi ma kabo Yesu ti barasu, na ba ma ba kun i. Nyini ma Nyeme noanie kanfom kadasi n ayo yiiwa a.

28 Haari ni bo ba yo anu ma deke n bo i ti na wo yo daka ka bu kun i ni, bu sereeri Gomina Pilato wo, ka i ma bu kun i.

29 Na saɗga bo bu yoori sa n kere bo ba kere i Nyeme Jore Kadasi n nu fa ko i nusu jore ni, na ba jura i baka jaanu n su, na ba fa i awura yabue bue fanjunma nu.

30 Ama, na Nyeme atenge i yiwee n nu,

31 na wo yi i nu bo i la ma no akere minem kere bo bu suuri i su fiteeri Galili awore n nu koori Yerusalem ni. Bere n bo bu nuuri sam bo bu yoori ni, kisa bere sudi i daani kere ya minem n a.

32 Nyini ti, ya ba ka ya kan labari kpa sam n bo Nyeme seeri ka i fa ma ya nam ni kere am a,

33 ye i ma noanie n ayo yiiwa ama yere bo ya ti bu busu nufom n a, wo tenge Yesu i yiwee n nu, kabo ba kere i Kansu Jue kereewam n nu, i jue nnyo su ni. Nyeme na,

- 'Wɔrɔ ti m Wa a,
nyuma, m káaki u Si.'
- 34 Bekun, kabo i tengeeri i yiwee n nu na i kpɔrɔ má fanƙunma nu ni, Nyeme akaaki ase ka,
'M fá deke kpa n bo i ti casi na i la anyunuyi n ma u,
yiri ye m seeri ka m fa ma Feme Davidi n a.'
- 35 Ba kaaki akere i Kansi Jue kereewam n awɔre be nu, ka,
'A yáki má na u Amusuisufɔ Casi n wu kpɔrɔ.'
- 36 Feme Davidi yo yoori Nyeme kun koroowa haari na wɔ ba awu, na ba se i deke bo bu seeri i nam ni, na i nuniembaa n akpɔrɔ fanƙunma n nu.
- 37 Ama, yiri n bo Nyeme tengeeri i yiwee n nu ni, wɔ kpɔrɔ má.
- 38 Nyini ti, m ninbaam, m koro ka am si ka yiri Yesu dɛɛ ti ye bu kaanri labari kpa n jɔre kereeri am a, ka Nyeme afa am satie ace am.
- 39 Sɔnɔ kere bo i yoori yiri n yarada, Nyeme afa i mi satie kere ace i. Nɔanie kpamaawa n bo Moyisi fa maari ni, wɔ koro afa má minem satie ace má bu.
- 40 Am si am nɔ sa, adena má sam bo Nyeme nɔanie kanfɔm yo seeri n be tu am.
- 41 Bu yo seeri ka,
'Ambere bo am yo Nyeme anzasi ni, am ti fen,
am yo alekutura na am ka ngbɛɛn,
dama m suyo juma be am dɛɛ sanƙa nu,
haari má be kan kereeri am, am dé má i.' "
- 42 Na sanƙa bo Pɔɔlu ni Banabasi sufite tientienbunɔɔ sɔɔ n nu ni, na minem n asere bu ka bu kaaki bra Nɔmiyi cɛɛn n bo i suba ni, na bu ba kan nyini jɔrem bo ba kan akere bu ni, na bu tí bekun.
- 43 Sanƙa bo minem ni ba sandiiri tientienbunɔɔ sɔɔ n ni, na Yudafɔm nbem, ni bo bu ti má Yudafɔm na ba kaaki bu woowa na bu su Yudafɔm atin n su ni, na bu dɔngɔ asu Pɔɔlu ni Banabasi su. Na Pɔɔlu ni Banabasi atu bu fɔ, ka má bu kaaki bu sin bo sakpa n bo Nyeme ayo ama bu ni.
- 44 Nɔmiyi cɛɛn n ba juuri ni, na minem n dɔngɔ bo bu wo mie n nu n aba atien bu nɔɔ tientienbunɔɔ sɔɔ n nu na bu ti Nyeme jɔre ni.
- 45 Sanƙa bo Yudafɔm nkpienkpienm ni nɔuri jama n sɔ ni, na ba si Pɔɔlu kɔre, na bu ni yiri awura akuruwa, na ba kpie i nzukɔ.
- 46 Ama, na Pɔɔlu ni Banabasi ajojo ni ahoresi, bu nɔ, "I ti ye ni ka ya du mɔ kan Nyeme nɔanie n kere ambere wɔ ka. Ama, kabo am akete i na am koro má ka am nya nɔɔ n bo i la má awieeri ni, ya yáki am wɔ, na ya kó kan kere minem bo bu ti má Yudafɔm ni.
- 47 Dama nɔanie maawa bo Mibie n fa maari ya n lɛɛ. I nɔ,
'Ma yi u ka a yo wein ma minem bo bu ti má Yudafɔm ni,
adena durunya n nufɔm kere nya tiide.' "
- 48 Sanƙa bo minem n bo bu ti má Yudafɔm tiiri ahin nɔanie n sɔ ni, na bu ahore ajo, na ba kansi Mibie n nɔanie ni. Na minem bo Nyeme ayi bu ka bu nya nɔɔ n bo i la má awieeri n ayo yarada.
- 49 Na Mibie n nɔanie n asandi abara aye nyini awɔre n kere nu.
- 50 Ama, na Yudafɔm nkpienkpienm n awura minem bu sin, bere la nbaram bo bu la wo na bu su Nyeme ni, ni nbiesɔm bo bu wo mie n nu na bu se na i bi ni. Na ba kere Pɔɔlu ni Banabasi wuwuruwa, na ba fɔn bu afite bu asien n su.
- 51 Na Pɔɔlu ni Banabasi akpɔnkpɔn bu jaa tuturi ago bu nɔ, nyini kere ka ba kete mie n nufɔm lɛɛ, na ba kɔ mie kpiri be bo bu fere i ka Ikoniyom n su.

⁵² Na Yesu susufom bo bu wo Antiyoki do ni, bu ahore ajo agaya, na Awiewie Casi n awo bu do.

14

Kabo Pɔɔlu ni Banabasi kɔri Ikoniom mie kpiri n nu ni

¹ Pɔɔlu ni Banabasi ko juuri Ikoniom mie kpiri n nu ni, bu kaaki yoori so bekun, na ba wura bu tientienbunoo soo n nu, na ba kan Nyeme jore n ni anyumboro haari na mine beberebe ayo yarada, Yudafom, ni bo bu ti ma Yudafom n kere.

² Ama, na Yudafom nbem bo bu yo ma yarada n awura minem bo bu ti ma Yudafom bu sin akpura bu ni yaradayofom n tii.

³ Na Pɔɔlu ni Banabasi awo do ayo lennyo. Na bu sujoko Mibie n jore ni ahoresi, na Mibie n ama bu fanga, na wo ma bu atin na ba yo alekutura sa barasu barasum, adena mine nu bu na bu si ka i ti nahore wo.

⁴ Na kpakpaakinu aba mie n nufom do, na nbem ajina Yudafom n sin, na nbem gusu ajina Yesu jaramasam n sin.

⁵ Na bo bu ti ma Yudafom ni, ni Yudafom ni, fa sangha ni bu mofom n afa seseu atara kabo bu yo Yesu jaramasam ni tie, na bu tu bu yabue.

⁶ Na Yesu jaramasam n afa nu fa ko kabo bu koro ka bu yo ni, na ba nmati ako mie kpiri nbem bo bu fere bu ka Lisitira ni Derebi n su. Bu wo Likawoniya awore n nu wo, na bu nya nati subara ye aheme ahemem.

⁷ Do na ba kan labari kpa n akere minem.

Kabo Pɔɔlu ni Banabasi ko woori Lisitira mie kpiri n nu jore ni

⁸ Sono be woori Lisitira mie kpiri n nu, i jaa awu, kabo bu wuuri i ni, i ti wobuka a, wo nati ma.

⁹ Na wo tana aso i sui ati kabo Pɔɔlu sujoko ni. Na Pɔɔlu afa i nyumbaa akpama i nu, na wo fa nu ka sono n ayo yarada, ka i koro tuntun i na i nya laifie.

¹⁰ Na wo tien kpa ase i ka, "Yasu jina cencen." Na sono n ayasu kungerekun awarakpin sunati bara ye.

¹¹ Sangha bo jama n nuuri sa n bo Pɔɔlu ayo i so ni, na ba tien kpa Likawoniya anie n nu, bu na, "Ya nyemem akaaki ka adamandem wo, ye ba jura aba ya do a."

¹² Na ba fere Banabasi duma ka Ziyosi, bu amoe kpiri duma lee, na ba fere Pɔɔlu ka Heremesi, dama yiri ti amoe n cem a.

¹³ Na amoe n bo bu fere i ka Ziyosi n soo jina mie n aheme, na amoe n fo n ni mie n nufom anyondi tooram ni baka pum afa aba mie n ano nu ka bu fa yo tie ma Pɔɔlu ni Banabasi.

¹⁴ Sangha bo Pɔɔlu ni Banabasi tiiri kabo minem koro ka bu yo ni, na bu ahore asaaki na yaa ati bu, nyini ti, na ba cin ason bu sutura bo bu wura i, na ba nmati awura jama n afien sutien bu nu,

¹⁵ bu na, "Njam o e, nzu ti ye am suyo so a? Yere mmoo ni ya tii, ti adamandem kabo am ti n wo. Ya ba ka ya kan labari kpa n kere am wo, na am yaki nyini deke ngbeenm ni, na am su Nyeme bo i wo bere sangha kere ni. Yiri yiiri angoro, ni asiengu, ni tieku n ni dekem kere bo bu wo nu n a.

¹⁶ Dawa sangha ni, yiri Nyeme yo maari atin wo ka daanfie kere yo kabo i koro.

¹⁷ Ama, haari ni nyini n kere, sangha kere i yo sakpa ma am wo, i ma nzue to ma am wo, na am alembaa bo am do bu n yo nyunyumi, na am di, na am kunnu yi, na i ma am ahorejo. Nyini kere kere am ka i wo bere a."

¹⁸ Haari ni nyini jɔjɔwa n kere n mmɔɔ ni, i yoori kekereke maari Pɔɔlu ni Banabasi ye bu koro kandaari jama n ye ba yo má tie ama bu n a.

¹⁹ Na Yudafɔ nbem afite Antiyoki ni Ikoniom mie kpirim n nu aba Lisitira, na ba ma minem ade bu nɔaniɛ, na ba tutu Pɔɔlu yabuɛ, bu sunsun ka wɔ wu wɔ, na ba cin i afite mie n nu.

²⁰ Ama, na Yesu susufɔm n atien bu nɔɔ abara aye i, na wɔ yasu, na wɔ kpie i nyi awura mie n nu. Na alecin fɔfɔre, na yiri ni Banabasi afite dɔ, na ba kɔ Derebi mie kpiri n nu.

Kabo Pɔɔlu ni Banabasi kaaki kɔɔri Siriya dɛɛ Antiyoki n su ni

²¹ Na Pɔɔlu ni Banabasi akan labari kpa n Derebi mie kpiri n nu, na ba nya susufɔm beberebe dɔ. Na ba kpie bu nyi akɔ Lisitira, ni Ikoniom mie kpirim n nu, na ba nya akɔ Antiyoki mie kpiri n bo i wo Pisidiya awɔre n nu ni.

²² Na ba se yaradayofɔm ni ka, bu ma bu yarada n yo biiwa, na ba ma bu ahoresi. Na ba se bu ka, “Wɔ yo daka ka bu kere ya wuwuruwa beberebe ka, na ya nya koro wura Nyemɛ femeya n nu.”

²³ Mie kere bo bu wɔɔri su, bu yi nkpienkpienm wɔ Kristo jama n nu, na bu cici bu nɔɔ, na bu sere Nyemɛ, na bu fa bu wura yiri Mibiɛ n bo ba yo i yarada n saa nu ka i nie bu dika.

²⁴ Bu fite dɔ ni, na ba fa Pisidiya awɔre n nu akɔ atie Pamfiliya dɛɛ awɔre n nu.

²⁵ Dɔ na ba kan Nyemɛ jɔre Perɛga mie kpiri n nu, na ba nya akɔ Ataliya mie kpiri n nu,

²⁶ na ba fa lee bambaka afite dɔ akpie bu nyi akaaki akɔ Antiyoki mie kpiri n bo i wo Siriya awɔre n nu. Dɔ ye bu du mɔ sereeri Nyemɛ maari bu ka bu di i ahɔroma fa kɔ nyini juma n bo kisa ba yo i awie ni.

²⁷ Sangɔ bo bu kɔ juuri Antiyoki ni, na ba tien Kristo jama n nɔɔ, na ba kan sam n bo Nyemɛ ayo bu ni, ni kabo wɔ teke atin ama bo bu ti má Yudafɔm na ba yo yarada barasu ni.

²⁸ Na ba wo yaradayofɔm n dɔ mie n nu aɛ.

15

Kabo Kristo jama n tiɛnri bu nɔɔ Yerusalem ciciri su ni

¹ Tɔ, na minɛ nbem afite Yudiya awɔre n nu aba Antiyoki mie kpiri n nu, na bu sukere yaradayofɔm ni bu dɛɛ kereewam. Bu ɲa, “Má ka ba wura am kenkenne kabo Moyisi yo kereeri ni, am koro nya má tiide.”

² Na Pɔɔlu, ni Banabasi, ni bere ase akuruwa nyannyan fa kɔ nyini jɔre n bu su. Nyini ti, na ba fa sesesu ka Pɔɔlu, ni Banabasi, ni yaradayofɔm nbem bo bu wo Antiyoki ni, ka bu kɔ Yerusalem mie kpiri n nu na bu kɔ bisa Yesu jaramasam ni, ni Kristo jama nkpienkpienm n nyini jɔre ni.

³ Na Kristo jama n akaari bu na ba kɔ. Bu wo kɔ su ni, na ba fa Fonisiya, ni Samariya awɔrem n nu, na ba kan akere dɔfɔm kabo minem bo bu ti má Yudafɔm n ayo Nyemɛ yarada barasu ni, na nyini labari n ama yaradayofɔm n ahore ajɔ akɔ asin su.

⁴ Sangɔ bo bu kɔ juuri Yerusalem ni, na Kristo jama ni, ni Yesu jaramasam, ni nkpienkpienm n ade bu ni bu saa nnyɔ, na ba kan akere bu fa kɔ deke n kere bo Nyemɛ ma ba koro ayo i ni.

⁵ Ama, na yaradayofɔm nbem bo bu su Farasifɔm atin n su n ayasu ajina, ase ka, “Wɔ yo daka ka minem bo bu ti má Yudafɔm na ba yo Yesu yarada n awura kenkenne ka, na bu nya ma bu nɔɔ ka bu su Nyemɛ nɔaniɛ kpamaa-wa n bo i fa maari Moyisi n su.”

⁶ Na Yesu jaramasam ni nkpienkpienm ni, atien bu nɔɔ, na bu kpokpo jɔre n nu nyunyumi.

⁷ Na ba se nyini jɔre n akuruwa bu njuɔ nu ace, na Peto ayasu ajina, na wɔ se bu ka, “M ninbaam, am si ka mini ye Nyeme du mɔ yiiri m fiteeri am nu, ka m ma minem bo bu ti má Yudafom n ti labari kpa ni, adena bu yo yarada.

⁸ Na Nyeme bo i si kabo adamande ahorembaa ti barasu ni, akere ka ba yo yarada nahore su, dama wɔ fa i Awiewie Casi n ama bu, kabo i yo fa maari yere mmɔɔ ni.

⁹ Nyeme dɔ, yere ni bere la má kpakpaakinu lee, dama yarada n bo ba yo i n dee ti, wɔ nmisi ayi satie kere bo i wo bu ahore su ni.

¹⁰ Kisa, nzu ti ye am koro ka am yo Nyeme na am nie a, ye am suso yaradayofom soori bo ya nam, ni yere ni ya tii akoro aso má i a?

¹¹ Ai. Yere ayo yarada ka ya Mibie Yesu ahorma n dee ti, ye ya nya tiide a, nyini ma bere gusu nya tiide a.”

¹² Na minem kere ato amuna, na bu ti kabo Banabasi ni Pɔɔlu sukan kere bu fa ko alekutura sa barasu barasum bo Nyeme ma bu koro yo maari minem bo bu ti má Yudafom ni.

¹³ Sangha bo bu jɔɔ wieeri ni, na Yakobo gusu ayasu ajoɔ. I ɔa, “M ninbaam, am ti fen.

¹⁴ Simon atenge ya su kabo Nyeme ni i tii adu mɔ akere ka i cee wo minem bo bu ti má Yudafom nu ni, ni kabo wɔ yi bu nbem afa bu ayo i dee minem ni.

¹⁵ Nyeme noanie kanfom dee noanie n bo bu yo seeri n ni ahinm n kere ti kun wɔ, dama bu kereri ka,

¹⁶ Micera n ɔa,

‘Nyini sin, m káaki ba ye Feme Davidi awuru n bo wɔ to n su,
na m tá i bonfo ni, na m yó i dongu.

¹⁷ Adena daanfem n bo ba ka n kere bá kpini Mibie busu,
bere la minem bo bu ti má Yudafom
na ma fere bu ka bu ti m deem ni.

Micera ni seeri so a,

¹⁸ yiri bo i yo seeri dada kere ka i yó i ni.’ ”

¹⁹ Na Yakobo akaaki ase bu ka, “Mini dee sunsunni la ka, minem bo bu ti má Yudafom na bu suba Nyeme dɔ ni, wɔ yo má daka ka ya mie bu.

²⁰ Ama, i ti ye ni ka ya kere kadasi ma bu, na ya se bu ka, má bu di tie nie, na má bu yo sakaraya, na má bu di nie bo ba kpie má i kom, na má bu di nie mbunja.

²¹ Dama ba du mɔ akan Moyisi noanie kpamaawa n jɔre ya nam sangha, haari ni nyuma bu toko kan i kadasi mie n kere su wɔ, na bu sukan i na sonɔ kere ti bu tientienbunɔɔ soom nu Njumiye ceen kere.”

Kabo bu kereri kadasi maari Antiyokifom ni

²² Dɔ na Yesu jaramasam ni, ni nkpienkpienm ni, ni Kristo jama n kere afa sesesu asoro su ka bu yi bu nu nbem, na bu sunma bu ni Pɔɔlu, ni Banabasi Antiyoki mie kpiri n nu, bere la Yudasi bo bu fere i ka Basabasi ni, ni Silasi. Nyini mine nnyom kere ti Kristo jama n mofom wɔ.

²³ Na ba kere kadasi ama bu ka bu fa ko. Kerewa n la ka,

“Yere am ninbaam, ni Kristo jaramasam, ni nkpienkpienm ni subisa am dongu, amere bo am ti má Yudafom na am wo Antiyoki ni, ni bo bu wo Siriya ni Silisiya dee aworem nu ni.

²⁴ Ya ti ka ya nbem afite ya nu fen aba am dɔ, aba akan jɔre nbem akere am bo wo mie am, na wo yo am sunsunni agaya. Yere ni ya tii asunma má bu.

²⁵ Nyini ti, ye ya kere atana asese su, asoro su ayi minem asunma bu ni ya danfo kpam Banabasi ni Pɔɔlu am dɔ.

²⁶ Bere ye ba fa bu ngɔɔ ama ya Mibie Yesu Kristo dɛɛ ti n a.

²⁷ Nyini ti, ya susunma Yudasi ni Silasi am dɔ, na bere ni bu tii bá teke bu nɔɔ, na bu kán jɔre kere bo i wo kadasi n nu kere am.

²⁸ Kabo ya ni Awiewie Casi n dɛɛ ayo kun, na ya soro su lɛɛ, ka ya so má am soori nɔnɔori be, sin ahin dekem bo wo yo daka ka am yo bu ni.

²⁹ Má am di tie nie, má am di nie mbunja, má am di nie bo ba kpie má i kɔm, na má am yo sakaraya. Nzen am tara am ɲu na am ayo má ahin sam ni, i yó kpa ma am. Tɔ, ya ka sanga lɛɛ.”

³⁰ Na minem bo bu sunmaari bu n ako aju Antiyoki. Bu kɔ juuri ni, na ba nya atien yaradayofɔm kere nɔɔ, na ba fa kadasi n ama bu.

³¹ Sanga bo bu kaanri kadasi n wieeri ni, na bu ahore ajo, na wo kaaki ama bu ahoresi.

³² Na Yudasi, ni Silasi bo bere ni bu tii ti Nyeme nɔanie kanfɔm ni, akan Nyeme jɔre beberebe akere bu, na bu ahore asi, na wo buka bu fanga.

³³ Na ba wo dɔ aɛɛ, na yaradayofɔm n akaari bu ni ahoreda, na ba kpie bu nyi ako bere n bo bu sunmaari bu n dɔ. [

³⁴ Ama, Silasi ase ka i ka bu dɔ.]

³⁵ Ama, na Pɔɔlu ni Banabasi aka Antiyoki, na bu ni bu benggu dɔngɔ akan na ba kere minem Mibie n nɔanie ni.

Kabo Pɔɔlu ni Banabasi kpaaki yakiiri bu benggu ni

³⁶ Tɔ, fa kɔ sanga su, na Pɔɔlu ase Banabasi ka, “Ma ya kpie ya nyi kɔ miem kere bo ya kaanri Mibie n jɔre kereeri bu n su, na ya kɔ nie kabo ya ninbaam ti barasu.”

³⁷ Má Banabasi koro ka bu fa Yohane bo bu kaaki fere i ka Marako n na bu kere kɔ ɔ,

³⁸ ama, na Pɔɔlu akete ka i sú má bu su, dama sanga bo bu wo Pamfiliya awɔre n nu ni, i ɲmati yakiiri bu wo, wo su má bu su abuka má bu ni juma ni.

³⁹ Dɔ na akuruwa bambaka aba bu afien, na ba kpaaki ayaki bu benggu, na Banabasi afa Marako abuka i ɲu su, na ba fa lee bambaka ako Sipurusi asien n su,

⁴⁰ na Pɔɔlu gusu afa Silasi ka i su i su, na yaradayofɔm n atien bu nɔɔ asere Nyeme ama bu, ka bu di Mibie n ahɔroma.

⁴¹ Na wo kɔ abara aye Siriya, ni Silisiya awɔrem n nu, na wo ma Kristo jama n ahoresi.

16

Kabo Timoti, ni Pɔɔlu, ni Silasi nati yoori juma ni

¹ Na Pɔɔlu anati haari na wo kɔ aju Derebi, ni Lisitira mie kpirim n nu, sɔnɔ be woori dɔ, i ti Kristo susufɔ ɔ, bu fere i ka Timoti. I ni ti Yudafɔ bara bo wo yo Kristo yarada wo, ama, na i si ti Girikifɔ.

² Na yaradayofɔm bo bu woori Lisitira ni Ikonyom mie kpirim n nu n kere ase ka Timoti ti sɔnɔ kpa a.

³ Pɔɔlu koroori ka i fa Timoti buka i ɲu su wo, na bu sunati, na wo wura i kenkenne. Má deke be dɛɛ ti a, ama, Yudafɔm bo bu woori dɔ n dɛɛ ti, dama bu kere si ka Timoti si ti Girikifɔ ɔ.

⁴ Na ba nati miε miεm su, na ba kan akere yaradayofom fa kɔ jɔrɛ n kere bo Yesu jaramasam, ni nkpienkpienm bo bu wo Yerusalem miε kpiri n nu n asese su asoro su ka bu yo i n su. Na ba se bu ka bu su nyini atinm su nyunyumi.

⁵ Nyini ti, na Kristo jamam n anya fannga, na bu yarada ayo biiwa abuka su, na bu sunya minem subuka su ale kere bo i cin.

Kabo Pɔɔlu ηuuri sɔnɔ be ka alɛɛ nu dɛɛ su ni

⁶ Na ba fa Firigiya, ni Galatiya dɛɛ awɔrɛ n nu asin, dama Awiewiε Casi n ama má bu atin na bu kan Nyeme jɔrɛ n Esiya dɛɛ awɔrɛ n nu.

⁷ Sangá bo bu kɔ juuri Masiya dɛɛ awɔrɛ awieeri ni, má bu koroori ka bu wura Bitiniya dɛɛ awɔrɛ n nu wɔ, ama, Yesu dɛɛ Awiewiε n asoro má bu su ka bu wura dɔ.

⁸ Nyini ti, na ba fa Masiya awɔrɛ n nu, na ba sin akɔ miε kpiri be bo bu fere i ka Tɔrasi n nu.

⁹ Nyini cɛɛn n kɔngue, na Pɔɔlu anu deke be ka alɛɛ nu dɛɛ su, ka sɔnɔ be wo Makɛdoniya awɔrɛ n nu, jina susere i, i ηa, “Jande, bra Makɛdoniya fɛn na a ba buka ya.”

¹⁰ Pɔɔlu ηuuri nyini deke n ka alɛɛ nu n dɛɛ ti, ya kaba yoori siriya a, na ya kɔ Makɛdoniya, dama ya si ka Nyeme ye wɔ se ka ya kɔ dɔ na ya kɔ kan i labari kpa n jɔrɛ kere minem n bo bu wo dɔ n a.

Kabo Lidiya yoori Yesu yarada ni

¹¹ Na ya fa lee bambaka afite Tɔrasi miε kpiri n nu akpiε akɔ aju miε be bo i wo lui bambaka be su, bu fere nyini lui n ka Samotarase. I alecin fɔfɔrɛ na ya kɔ aju miε kpiri n bo bu fere i ka Nɛpolisi n su.

¹² Na ya fite bere akɔ miε kpiri be bo bu fere i ka Filipiya n su, yiri ti Makɛdoniya awɔrɛ n nyini bue n miεm kere tii a. Romafom niε i su a. Na ya yo lennyɔ dɔ.

¹³ Na Njumiyi cɛɛn ni, na ya fite miε n nu akɔ kunma nu, dɔ ye ya sunsun ka ya kɔ ηu ka deke bo Yudafom n tien bu nɔɔ sere Nyeme a. Na ya tana, na ya ni nbaram bo ba tien bu nɔɔ n abo anzama.

¹⁴ Bara be woori bu nu, bu fere i ka Lidiya, i fite miε kpiri be bo bu fere i ka Tiyatira n su wɔ, i tɔ sanvuin kpakpam bo i la gɔ, i ti bara bo i su Nyeme wɔ, na Nyeme ateke i sunsunni, na wɔ so i sui nyunyumi, na wɔ ti kabo Pɔɔlu suse ni.

¹⁵ Na ba biε i ni i dikafom kere Nyeme nzue, na wɔ sere ya jande ka, “Nzen am asoro su ka ma yo Mibiε n yarada nahɔrɛ su, am ba wo m dika.” I yoori ya awaraye n dɛɛ ti, na ya soro su.

Kabo bu nyiiri Pɔɔlu ni Silasi dansaraka nu ni

¹⁶ Cɛɛn n be sɔ ɔ, ya sukɔ deke bo Yudafom n tien bu nɔɔ sere Nyeme ni, na ya ni sunnguru be aye, i ti afani wɔ, ajini wo i ηu, na i nati yi munzue. Nyini dɛɛ ti, na i tofom anya ηwaa beberebe afite i munzue yi n nu.

¹⁷ Na i nati susu ya ni Pɔɔlu su, na i sutien suse ka, “Ahin minem ti Nyeme Kpiri n dɛɛ amusuisufom wɔ. Bere kere am kabo am yo na am nya tiide a.”

¹⁸ I nati yoori sɔ ɔ, cɛɛn n kere cɛɛn, haari na yaa aba ati Pɔɔlu, na wɔ kaaki anie i, na wɔ tien ajini n bo i wo sunnguru n ηu n na wɔ se i ka, “Yesu Kristo dɛɛ duma n dɛɛ yiko nu, fite yaki i.” Kpenga, na ajini n afite ayaki i.

¹⁹ Tɔ, sangá bo afani n tofom ηuuri ka bu koro nya má ηwaa fite má i n dɔ kun ni, na ba tara Pɔɔlu ni Silasi, na ba cin bu akɔ miε n kunnu afa bu awura yikofom saa nu.

²⁰ Bu faari bu kɔ juuri jɔredifɔm nkpienkpienm dɔ, na ba se ka, “Ahin minem ni ti Yudaɔfɔm wɔ, na bu nati sukpini jɔre ya mie n nu.

²¹ Bu nati sukere sayoowam bo ya dɛɛ nɔanie kpamaawa atin n su, wɔ yo má daka ka ya de bu, wara ya su bu su, dama ya ti Romaɔfɔm wɔ.”

²² Na jama n kere atɔ Pɔɔlu ni Silasi ŋu ni jɔre ŋgbɛɛnŋgbɛɛn. Na jɔredifɔ nkpienkpienm ama ba yi Pɔɔlu ni Silasi suturam, na ba ma nɔɔ ka bu fin bu ŋgbere.

²³ Nyini dɛɛ ti, na ba bo bu nyunyumi, na ba kɔ anyi bu dansaraka, na ba ma dansaraka nieɔ n nɔɔ ka i tu anɔ n na i nie bu dika nyunyumi.

²⁴ Dansaraka nieɔ n deerɔ nyini nɔanie n wieeri sɔ ni, na wɔ fa bu akɔ awura dansaraka n sɔɔ n bo i wo mɔ n nu, na wɔ bo bu tobarim.

²⁵ Na fa kɔ kɔŋgue jinanjin saŋga, na Pɔɔlu ni Silasi susere Nyemɛ, na bu sudi jue kansɔ i, na bu bengɔ dansarakam ni suso bu sui suti.

²⁶ Jina n nu berɛ, na asien n akpisi agaya, haari na dansaraka sɔɔ n jaafa bo bu fa boori i bu n kere akpisi, na anɔm n kere ateke, na tobari n kere n bo bu fa boori bu n akporo atɔɔ.

²⁷ Na dansaraka nieɔ n abo nu ayasu, na wɔ ŋu ka dansaraka sɔɔ anɔm n kere ateke, i sunsun ka dansarakam kere anmati asandi wɔ, nyini ti, na wɔ cin awɔɔ i takobe ka i kun i ŋu wɔ.

²⁸ Ama, na Pɔɔlu atien kpa ase ka, “Má a ma u ŋu mandim. Ya kere wo fɛn.”

²⁹ Na dansaraka nieɔ n afere ka bu fa sin bra, na wɔ bereki awura Pɔɔlu ni Silasi sɔɔ n nu, na sere ati i, na i ŋunie subobo i, na wɔ kɔ akutu bu jaa bu.

³⁰ Dɔ na wɔ fa bu afite, na wɔ bisa bu ka, “M mibiɛm, m yo sɛ ye m nya tiide a?”

³¹ Na ba bo i nu ka, “Yo Mibiɛ Yesu yarada, na a nyá tiide, wɔɔ ni u dikafɔm kere.”

³² Na ba kan Mibiɛ n nɔanie n akere i, i ni bo bu wo i dika n kere.

³³ Nyini cɛɛn n kɔŋgue n kere, na dansaraka nieɔ n afa Pɔɔlu ni Silasi akɔ, na wɔ kɔ anmisi bu kani n kere, na ba kaba abie yiri ni i dikafɔm kere Nyemɛ nzue.

³⁴ Dɔ na wɔ fa bu akɔ i dika, na wɔ ma bu diire, na ba di. Na yiri ni i dikafɔm kere ahore ajɔ agaya ka ba yo Nyemɛ yarada n dɛɛ ti.

³⁵ Alecin ŋgarama, na jɔredifɔm n asunma npulisim ka bu kɔ se dansaraka nieɔ n ka i yaki nyini minem nu ji na bu kɔ.

³⁶ Nyini ti, na dansaraka nieɔ n asere Pɔɔlu ka, “Jɔredifɔm n ama nɔɔ ka ya yaki am na am kɔ. Nyini ti, am kɔ ni ahoreda.”

³⁷ Ama, na Pɔɔlu ase npulisim ni ka, “Haari ni bo ya ti Romaɔfɔm ni, ba di má ya jɔre anu má ya ŋgasi be, na ba bo ya jama n kere nyunu, na ba nyi ya dansaraka. Ye kisa bu sukoro ka bu fie yi ya ji benle, nzen se? Nyini koro yo má, má ka berɛ ni bu tii aba na bu ba yi ya ji.”

³⁸ Na npulisim n akɔ ase jɔredifɔm ni. Bu tiiri ka Pɔɔlu ni Silasi ti Romaɔfɔm ni, na sere ati bu.

³⁹ Nyini ti, na ba ba atara Pɔɔlu ni Silasi jaa, na ba nya ayi bu afite dansaraka n nu, na ba sere bu jande ka bu fite mie n nu.

⁴⁰ Na ba fite dansaraka sɔɔ n nu, na ba kaaki akɔ Lidiya dika, na ba kɔ anu yaradayofɔm ni, na ba ma bu ahoresi, na ba nya afite mie n nu akɔ.

17

Kabo Pɔɔlu kɔɔri Tesalonika mie kpiri n nu ni

¹ Na Pɔɔlu ni Silasi afa asin Amfipolisi, ni Apoloniya miɛ kpirim su, na ba kɔ aju Tesalonika miɛ kpiri n nu. Yudafɔm tientienbunɔɔ sɔɔ wo dɔ.

² Nyini ti, kabo i nati yo ni, na Pɔɔlu awura bu tientienbunɔɔ sɔɔ n nu ako aju Njumiyi cɛɛn nsan, na i ni bere subo anzama fa kɔ Nyemɛ Jɔre Kadasi n su,

³ na i sukan, na i suyi i bu kere bu, kabo wɔ yo daka ka Kristo Tiidefɔ n ba di wahara na i tenge i yiwee nu ni. Na wɔ se bu ka, “Yiri Kristo Tiidefɔ n la Yesu n bo m kan i jɔre kere am ni.”

⁴ Na Yudafɔm nbem ade jɔre n bo Pɔɔlu kaanri i ni, ni Girikifɔm beberebe bo bu su Nyemɛ ni, ni nbaram beberebe bo bu la anyunuyi ni, na bu kere afa bu nɔ amata Pɔɔlu ni Silasi.

⁵ Ama, na Yudafɔm n asi bu kɔre agaya, na ba fere minem ngbɛɛnngbɛɛn nbem bo bu la má kperɛ na bu nati tana gɔɔsu ni, na ba tien jama dɔngɔ nɔɔ. Na ba kpisi miɛ ni, na ba kɔ sɔɔ be bo bu fere i ka Jason n dika, ako ajina i dika anɔ nu, deke bo Pɔɔlu ni Silasi wo ni, na bu sutientien ka i yi bu ma bu na bu fa bu kɔ jama n nu.

⁶ Ama, bu kɔ nienieeri na ba nɔ má bu ni, na ba tara Jason ni yaradayofɔ nbem acin bu afa bu ako miɛ n nu yikofɔm dɔ, na bu sutien suse ka, “Ahin minem n bo ba saaki durunya n abara aye ni, aba ya miɛ n nu fɛn,

⁷ haari Jason ade bu awura i dika. Ba kete Romafɔm femɛ kpiri n nɔanie n bo wɔ fa ama ka ya su i su ni, bu nɔ femɛ be wo bere bekun, bo bu fere i ka Yesu.”

⁸ Bu seeri sɔ ni, na wɔ ye yikofɔm ni jama n ahore su.

⁹ Na yikofɔm n akpiɛ Jason ni i benɔm kɔbuka, na ba tɔ kaari, na ba nya ayaki bu aji.

Kabo Pɔɔlu woori Beriya miɛ kpiri n nu ni

¹⁰ Nyini cɛɛn n kɔngue n kere, na yaradayofɔm n ase Pɔɔlu ni Silasi atin nu ako aju miɛ kpiri be bo bu fere i ka Beriya n su. Bu kɔ juuri dɔ n na ba kɔ awura Yudafɔm tientienbunɔɔ sɔɔ n nu.

¹¹ Dɔ dɛɛ Yudafɔm joko n ti kpa tara bere n bo bu wo Tesalonika miɛ kpiri n nu ni. Bu soori bu sui wɔ ni nahɔre su, na ba ti kereewa n bo bu kere bu ni, na ale kere bo i cin, bere ni bu tii kan Nyemɛ Jɔre Kadasi n wɔ, na bu nie ka, deke n bo Pɔɔlu sukere bu n ti nahɔre wɔ, nzen i ti má nahɔre.

¹² Na Yudafɔm ni dɔngɔ ayo yarada, fa sanɔa ni Girikifɔm beberebe, nbaram bo bu la anyunuyi n ni nbiesɔm.

¹³ Ama, sanɔa bo Yudafɔm bo bu wo Tesalonika n tiiri ka Pɔɔlu ako akan Nyemɛ jɔre Beriya dɔ gusu ni, na ba ba dɔ aba awura minem bu sin, na ba ye bu yaa su.

¹⁴ Kpenɔa na yaradayofɔm n ayo ndende afa Pɔɔlu ako ase haari tieku n nɔɔ su, ama, na Silasi ni Timoti yiri aka Beriya dɔ.

¹⁵ Na minem n bo bu seeri Pɔɔlu atin nu ni, afa i ako aju haari miɛ kpiri be bo bu fere i ka Atensi n su. Bu kpieeri bu nyi sukɔ ni, na Pɔɔlu akaari bu ka bu kɔ se Silasi ni Timoti ka bu bra na bu ba tu i dɔ ndende.

Kabo Pɔɔlu kɔɔri Atensi miɛ kpiri n nu ni

¹⁶ Sanɔa bo Pɔɔlu wo Atensi miɛ kpiri n nu sunminda Silasi ni Timoti ni, na i ahore asaaki agaya kabo i juuri ka amɔɛm asunnu miɛ n nu ni.

¹⁷ Nyini dɛɛ ti, na wɔ kɔ awura Yudafɔm tientienbunɔɔ sɔɔ n nu, na i ni bere, ni minem bo bu ti má Yudafɔm na bu su Nyemɛ ni, subo anzama. Na i sukɔ gɔɔsu cɛɛn n kere cɛɛn, na i sukan kere minem bo bu wo dɔ ni.

¹⁸ Sifom asese nbem wo mie n nu, bu fere bu kun ka Epikurifom, na bu fere nyinga n ka Sitowafom, na bu suse akuruwa ni Poolu, na bu nbem abisa ka, "Ye ahin jore beberebefo n na se wo lee?" Na bu nbem abo nu ka, "I jajo fa ko amoe fofore nbem jore wo." Deke bo i ti na bu seeri so n la ka, Poolu sukan Yesu ni yiwee tenge n su jore wo.

¹⁹ Na ba fa Poolu ako awore be bo bu fere i ka Aropagosi na bu tien bu noo di jore n nu. Na ba se i ka, "A koro kere ya na ya ti ahin kereewa fofore n bo a sufa kere n bu?"

²⁰ Ahin kereewa n bo a sukere i ni, ya si ma i, ya koro ka a ma ya ti i bu wo."

²¹ Dama Atensifom ni wofom bo bu wo mie n nu n dee la ka, sangka kere bu sukan na bu suti kereewa foforem wo.

²² Na Poolu ayasu ajina mie n nu tereterefom n afien, na wo se ka, "Ma nu kabo ambere Atensifom su amoem na am yo munzue sam ni anyumboro.

²³ Dama kabo m nati bara ye nie yi koresi ni, ma nu dekem bo am su bu ni, na ma nu bimbidi be bo am akere su ka, 'Nyeme n bo ya si ma i n dee woobiri lee.' To, yiri n bo am su i na am si ma i ni, yiri ye m kan i jore kere am a.

²⁴ Nyeme bo i yiiri durunya n ni deke n kere bo i wo nu ni, yiri ti angoro ni asiengu kere Mibie a, i wura ma amoe soom bo adamande afa i saa ata bu n nu na i da.

²⁵ Sasu bekun, i fun ma deke be bo i se adamande ka i yo ma i, dama yiri ni i tii ma adamande ngoo ni nuni a, ni deke n kere a.

²⁶ Yiri ma adamande n kere fite sono kun busu n nu wo, na wo ma ba tere ade durunya n kere. Na wo nya akpama sangka sangka ama bu kere, na wo kaaki akere bu kabo bu asien nyaari ti.

²⁷ Deke n bo i ti na i yoori so n la ka, bu ba turingi nienie i busu na beni bu nu i. Ama, haari ni nyini mmoo ni, i wo ma dede ni yere kere be.

²⁸ Dama yiri dee ti ye ya la ngoo ye ya wo bere ye ya nati a. Kabo am juedifo nbem gusu ase ni, ka, 'Yere mmoo ti i nbaam wo.'

²⁹ Nyini dee ti, kabo ya nya ti Nyeme nbaam ni, ma ya sunsun ka i woowa ti ka sika, wara jete, wara yabue nyunyumi, wara deke be bo juma sifom afa bu Alecira ayo i.

³⁰ Dawa sangka ni, Nyeme ayo anie ma minem fa ko bu sayoowam su, dama bu yo si ma. Ama, kisa, wo ma noo ka sono kere bo i wo deke kere kaaki i wo na i yaki i satie.

³¹ Dama wo du mo akpama ceen na wo yi sono be ka i ba di durunya n nufom jore ni nahore. Deke bo i kere ya kere ka i ba yo so n la bo i tengeeri i yiwee n nu ni."

³² Sangka bo bu tiiri ka Poolu sukan fa ko yiwee tenge n su n jore ni, na bu nbem ayo i anzasi. Ama, na bu nbem ase ka, "Ya koro ka a kaaki ba kan ahin jore n bekun na ya ti."

³³ Do na Poolu ako ayaki bu.

³⁴ Na bu nbem asu i su na ba yo yarada. Bere la Diyonusiyosi, i ti Aropagosisifom n nu kun wo, ni bara be bo bu fere i ka Damarisi ni, ni minem nbem.

18

Kabo Poolu koori Korinto mie kpiri n nu ni

¹ Nyini sin, na Poolu afite Atensi mie kpiri n nu, na wo ko Korinto mie kpiri n nu.

² Na wɔ kɔ atu Yudafo sɔnɔ be dɔ, bu fere i ka Akuyila, i ti Pontusi asien su fo ɔ, i ni i yi, bu fere i ka Pirisila, bu fiteeri Itali asien su baari a, wɔ nya ce má ye Pɔɔlu ŋuuri bu n a, dama Romafɔm fɛmɛ kpiri n bo bu fere i ka Kalodisi n ama nɔɔ ka Yudafoɔm kere fite i asien n su. Nyini dɛɛ ti, na Pɔɔlu akɔ ka i kɔ nie bu busu,

³ na wɔ kɔ aseke bu wɔfo, na i ni bere asaŋga ayo juma, dama bu kere ti jerekem ni tani wufɔm wɔ.

⁴ Na Ŋumiyi cɛɛn kere, i suwura bu tientienbunɔɔ sɔɔ n nu, na i subo anzama ni bere, ni Girikifɔm kere, adena i kaaki bu sunsunni na bu yo yarada.

⁵ Saŋga bo Silasi ni Timoti fiteeri Makɛdoniya awɔre n nu ba juuri ni, Pɔɔlu nyunu aboro ni labari kpa n jɔre kan su ŋgumi wɔ. Na i sukere Yudafoɔm n ka, Yesu ti Kristo n a, Tiidefo n bo Nyemɛ ase ka i súnma i ni.

⁶ Ama, Yudafoɔm n keteeri i nɔaniɛ n wɔ, na ba kpɛ i nzukɔ. Nyini dɛɛ ti, na wɔ kpɔnkpɔn i sutura wuraawa tuturi agɔ bu ŋu, na wɔ se bu ka, “Amberɛ, nzen am nya má tiide, i ti am dɛɛ jɔre wɔ, má m dɛɛ. Fite kisa fa kɔ, m kó minɛm bo bu ti má Yudafoɔm n dɔ ɔ lɛɛ.”

⁷ Dɔ na Pɔɔlu afite tientienbunɔɔ sɔɔ n nu ayaki bu, na wɔ kɔ sɔnɔ be dika, i ti má Yudafo, ama, i su Nyemɛ wɔ, bu fere i ka, Titosi Jusitosi, i dika n mata tientienbunɔɔ sɔɔ n wɔ.

⁸ Na sɔnɔ n be bo bu fere i ka Kirisipusi na i ti bu tientienbunɔɔ sɔɔ n kpɛn n ayo Mibiɛ n yarada, i ni i dikafɔm kere, na Kɔrintofɔm dɔŋgu bo bu tiiri labari n bo Pɔɔlu kaanri i ni, na bu kere ayo yarada, na ba bie bu Nyemɛ nzue.

⁹ Cɛɛn n be kɔŋgue sɔ ɔ, na Mibiɛ n ajojo Pɔɔlu dɔ ka alele nu dɛɛ su, i ŋa, “Má a soro sere, ama, kɔ su na a sukan labari kpa n kere bu, má a mɔ u nɔɔ,

¹⁰ dama m wo u dɔ. Be koro fa má i saa kan má u na i yo u pui. Nie fen, m la mine beberebe mie n nu fen bo bu ti m dɛɛ.”

¹¹ Na wɔ wo bu dɔ akɔ aju afɔ kun ni kpaaki nu, na i sukere bu Nyemɛ nɔaniɛ ni.

¹² Tɔ, bu wo bere na sɔnɔ n be bo bu fere i ka Galiyo n aba adi Akaya awɔre n nu gomina. Nyini saŋga n na Yudafoɔm kere nɔɔ ayo kun, na ba kete Pɔɔlu ŋu na ba fa i akɔ jɔre diibiri.

¹³ Na ba se ka, “Ahin sɔnɔ ni suboro i nyi sukere minɛm kereewa bo i wo i ŋgumi ni Nyemɛ nɔaniɛ kpamaawa ni.”

¹⁴ Saŋga bo Pɔɔlu tekeeri i nɔɔ ka i jɔjo ni, na Gomina Galiyo ase Yudafoɔm ka, “Nzen má i ti ka wɔ yo satie be, wara wɔ do ŋgasi be, ye am sujaraki i a, má m ti i bu ma am.

¹⁵ Ama, kabo i nya ti bisaawam fa kɔ nɔaniɛm, ni dumam, ni am dɛɛ nɔaniɛ kpamaawam n su ni, amberɛ ni am tii kɔ yo i dɔŋgu. Mini, m koro di má nyini jɔre ni.”

¹⁶ Na wɔ ma ba fon ayi bu afite jɔre diibiri sɔɔ n nu.

¹⁷ Na bu kere akaba atɔ sɔnɔ n bo bu fere i ka Sositeni n ŋu na bu subo i wɔ, jɔre diibiri n nyunu bere, yiri ti tientienbunɔɔ sɔɔ nkpien a. Ama, Gomina Galiyo cɛɛ awo má nyini n be nu.

Kabo Pɔɔlu kpɛeri i nyi kɔɔri Antiyoki mie kpiri n nu ni

¹⁸ Na Pɔɔlu awo Kɔrinto mie kpiri n nu ace, nyini sin na wɔ kaari yaradayofɔm ni na i ni Pirisila ni Akuyila akɔ. Bu kɔ juuri mie kpiri n bo bu fere i ka Kenciriya n su ni, na Pɔɔlu ayi i tii dɔ, dama wɔ du mɔ atan ndie n dɛɛ ti. Na ba wura lee bambaka be nu dɔ, i sukɔ Siriya awɔre n nu.

¹⁹ Bu kɔ juuri Efeso miɛ kpiri n nu ni, na wɔ yaki Pirisila ni Akuyila dɔ, ama, na yiri akɔ awura Yudafɔm tientienbunɔɔ sɔɔ n nu, na i ni bere abo anzama fa kɔ labari kpa n su.

²⁰ Na ba sere i ka i wo bu dɔ lennyɔ, ama, wɔ soro má su.

²¹ Na wɔ sere bu atin na wɔ kaari bu, na wɔ se bu ka, “Nzen Nyeme maari m atin, m kpíe m nyi ba am dɔ.” Na wɔ yasu Efeso dɔ, na wɔ fa lee bambaka akɔ.

²² Sangá bo i kɔ juuri Sizariya miɛ kpiri n nu ni, na wɔ sin akɔ Yerusalem miɛ kpiri n nu akɔ ayo Kristo jama n anse, na wɔ nya kɔ Antiyoki miɛ kpiri n nu.

²³ Na wɔ yo lennyɔ dɔ, na wɔ nya akaaki ayasu dɔ, abara aye miɛ miɛm bo bu wo Galatiya, ni Firigiya dɛɛ awɔrem n nu n kere, na wɔ ma yaradayofɔm n kere ahoresi.

Kabo Apolosi kɔɔri Efeso ni Korinto miɛ kpirim n nu ni

²⁴ Nyini sangá ni, Yudafɔ sɔnɔ be aba Efeso miɛ kpiri n nu, bu fere i ka Apolosi, bu wuuri i Alekizanderiya miɛ kpiri n nu wɔ. I yo la si fa kɔ Nyeme Jɔre Kadasi n su, na i koro jɔɔ nahɔre su.

²⁵ Ba du mɔ akere i kereewam fa kɔ Mibiɛ n dɛɛ atin su, na i ahore abi na i nɔniɛ ti nyakanyaka, na i sukan na i kere minem Yesu jɔre nahɔre su. Ama, i si má nzue biɛɛwa be, má ka Yohane dɛɛ Nyeme nzue biɛɛwa ni ngumi.

²⁶ Na wɔ bo i bu na i sukan i ni ahoresi Yudafɔm tientienbunɔɔ sɔɔ n nu. Sangá bo Pirisila ni Akuyila tiiri i kereewam n sɔ ni, na ba fa i akɔ awuru, na ba kere i Nyeme atin n su jɔre nyunyumi abuka su.

²⁷ Nyini sin, na Apolosi akoro ka i kɔ Akaya awɔre n nu, na yaradayofɔm ni bo bu wo Efeso n ama i ahoresi, na ba kere kadasi ama bu ninbaam bo bu wo Akaya n ka bu de i wɔfɔ nyunyumi. Sangá bo i kɔ juuri dɔ ni, na wɔ buka minem bo Nyeme dɛɛ ahɔrɔma n nu na ba yo yarada ni.

²⁸ Na Yudafɔm seeri akuruwa n dɛɛ ti, na wɔ fa Nyeme Jɔre Kadasi n na wɔ kan ayi bu fieo fieo jama n kere nyunu, ka, Yesu ti Kristo n a, Tiidefɔ n bo Nyeme ase ka i súnma i ni.

19

Kabo Pɔɔlu kɔɔri Efeso miɛ kpiri n nu ni

¹ Sangá bo Apolosi toko wo Korinto miɛ kpiri n nu ni, na Pɔɔlu anati abara aye dɔ dɛɛ aheme miɛ miɛm n kere su, haari na wɔ kɔ aju Efeso miɛ kpiri n nu. Dɔ na wɔ kɔ atu Yesu susufɔ nbem,

² na wɔ bisa bu ka, “Sangá bo am yoori yarada ni, Awiewie Casi n awura am nɔ?” Na ba bɔ i nu ka, “Ai, ya nya ti má ka Awiewie Casi wo bere mmɔɔ.”

³ Dɔ na Pɔɔlu abisa bu ka, “Ye nzu Nyeme nzue ye bu biɛri am a?” Na ba bɔ i nu ka, “Bu biɛri ya Yohane dɛɛ nzue biɛɛwa n wɔ.”

⁴ Na Pɔɔlu ase bu ka, “Yohane nzue biɛɛwa n bu la ka, mine kaaki bu wo na bu yaki bu satie wɔ. Na wɔ se minem n ka bu yo sɔnɔ n bo i wo i sin suba n yarada, yiri la Yesu.”

⁵ Bu tiiri nyini n sɔ wieeri ni, na ba biɛ bu Nyeme nzue ya Mibiɛ Yesu n dɛɛ duma nu.

⁶ Na Pɔɔlu afa i saa anana bu nɔ, na Awiewie Casi n awura bu nɔ. Na ba jɔɔ anie barasu barasu nbem, na ba kan Nyeme nɔaniɛ akere minem.

⁷ Bu kere kɔ yasuri nbiesɔm buru ni nnyɔ ɔ.

⁸ Na wɔ wo dɔ haari sara nsan, na Nɔmiyi cɛɛn kere, na i suwura bu tientienbunɔɔ sɔɔ n nu, na i sukan kere bu fa kɔ Nyeme femeya n su ni

ahoresi, na i ni bere subo anzama, na wo boro i nyi akere bu ka, kabo i kan n ti nahore wo.

⁹ Ama, na bu nbem afa ahorembaa kekereke, na ba kete ka bu yo ma yarada. Na ba joro jore tie fa ko Mibie n dee atin n su, jama n kere nyunu. Nyini ti, na Poolu ayaki bu, na wo fa yaradayofom n afite ako Tiranusi tientienbunoo soo bambaka n nu, na i ni bere sutien bu noo subo anzama, fa ko Yesu dee atin n su ceen n kere ceen.

¹⁰ Poolu bitaari i so o, haari afo nnyo, na minem kere bo bu wo Esiya dee awore n nu n ati Mibie n noanie ni, bo bu ti Yudafom, ni bo bu ti ma Yudafom n kere.

Sikeva nbaabiesom n jore

¹¹ Na Nyeme ama Poolu ayo alekutura sam bo bu la ma nusu.

¹² Haari na sanvunm ni suturam kere bo ba kan i nuni, na bu fa ko nana tukpakifom nu, bu nya laifie wo, na ajinim fite yaki minem bo bu wo bu nu ni.

¹³ Na Yudafom nbem bo bere gusu nati jengbe fon yi ajinim fite minem nu ni, aboro bu nyi ka bu fa Yesu дума n fon yi ajinim. Bu na, "Yesu n bo Poolu kan i jore n dee дума nu, ye m se am ka am fite yaki sono n a."

¹⁴ Yudafom mine nso nbem nati yo nyini sam n a. Bere la Nyeme sayoo-wa donguyofom n kere kpien be bo bu fere i ka Sikeva n dee nbaabiesom ni.

¹⁵ Ama, na ajini n ase bu ka, "M si Yesu, na m kaaki si Poolu, ama, ye ambere la nma n wo?"

¹⁶ Na sono n bo ajini n wo i nu ni, ato bu nu na wo kunma bu kere fanga, na wo bo bu na wo ma bu mandim, na ba nmati afite i dika n nu bu bu ngbeen.

¹⁷ Sanga bo Yudafom ni minem bo bu ti ma Yudafom na bu wo Efeso mie kpiri n nu n kere tiiri nyini sa n so ni, na sere ati bu, na ba kansi Mibie Yesu n дума agaya.

¹⁸ Na mine dongu bo ba yo yarada n afite ajina, na ba kan bu ngasim ni bu satiem kere bo ba yo bu n akere jama ni.

¹⁹ Na mine dongu bo bu nati yo boboyaya juma n afa bu boboyaya kadasim ni, na ba tien bu noo jama n kere nyunu, na ba yara bu kere. Kadasim n kere bo bu yaraari bu ni, i nwaa sunnu agaya, bu buuri i akunta, i kere ko yasuri bu dee jete nwaa akpii aburunu wo.

²⁰ Nyini n dee ti, na mine beberebe ati Mibie n noanie ni, na wo sandi abara ye ni fanga.

Kabo minem tientien yoori nanmie Efeso mie kpiri n nu ni

²¹ Nyini n kere sin, na Poolu afa sunsunni ka i ko Makedoniya ni Akaya dee aworem n nu, na i nya sin ko Yerusalem mie kpiri n nu. Na wo se ka, "Nzen m nya nuuri m natiiri n kere nyaari, wo yo daka ka m ko Roma mie kpiri n nu gusu."

²² Na wo sunma i bukafon nnyom ni, bere la Timoti ni Irasitusi ka bu ko Makedoniya, na yiri aka Esiya dee awore n nu, ayo lennyo.

²³ Nyini sanga n ye Mibie n atin n su su n ayo jore agaya Efeso mie kpiri n nu n a.

²⁴ Jete tunmi be yo wo do, bu fere i ka Demetiroso, i fa jete wo, na i fa yo soo kan kanm, bu ti ka amoe n bo bu fere i ka Atemisi n wo, na i sufa to ma minem. Na minem bo bu yo nyini juma n anya kperere beberebe afite nu.

²⁵ Tɔ, na yiri Demetirɔsi afere minem bo bu yo nyini juma atien bu nɔɔ, na wɔ se bu ka, “Njam, am si ka ya nya ya dɛɛ ajekɛ kere fite ahin juma n bo ya yo i n nu wɔ e.

²⁶ Yiri Pɔɔlu ni, kisa, am aɲu i e, am ati kabo wɔ koro akan ateke mine beberebe nyi ni, má bo bu wo Efeso fen ɲgumi, ama, ni bo bu wo Esiya dɛɛ awɔre n nu kere, i ɲa amɔem bo adandem yo bu n ti má nyeme ni.

²⁷ Nyini n bo i wo su ni, nzen ya yakiiri na i yó sɔ ɔ, ya juma n bo ya yo i ni, i ká ɲgbɛen wɔ. Má nyini ɲgumi, ama, minem fá má ya amɔe kpiri Atemisi sɔɔ n yo má pui, dama yiri Atemisi n ye minem bo bu wo Esiya awɔre n nu ni durunya n nufɔm kere su yiri wɔ. I nya yoori sɔ, Atemisi fún nyini jirima n wɔ lɛɛ.”

²⁸ Jama n tiiri ahin jɔjɔwa n sɔ ni, na yaa ati bu, na ba tien kpa, bu ɲa, “Yere Efesofɔm dɛɛ amɔe Atemisi ni, yiri ti yikofɔ a.”

²⁹ Na miɛ n abo nu, na minem suyo naɲmiɛ. Na jama n akaba akɔ atara Gayosi ni Arisitakusi, bere bo bu suuri Pɔɔlu su fiteeri Makedoniya baari ni. Na ba cin bu akɔ tientienbunɔɔ fofoe paa n nu.

³⁰ Má Pɔɔlu ni i tii koroori ka i kɔ deke bo jama n atien bu nɔɔ n wɔ, na i jɔjɔ bu dɔ, ama, yaradayofɔm n asoro má i su.

³¹ Haari na nyini awɔre n nu yikofɔm bo bu ti i danfom n asunma asere i jande ka má i kɔ tientienbunɔɔ fofoe n nu.

³² Nyini saɲga n kere ni, bu nyunu ata, na jama n sutientien, suyo naɲmiɛ, nbem ɲa sɔ, nbem gusu ɲa ahin, ama, bu dɔɲgu asi má deke n bo i ti na ba ba atien bu nɔɔ ni.

³³ Na Yudafɔm asun sɔɔ be bo bu fere i ka Alekizanda n adu jama n nyunu, nyini dɛɛ ti, mine nbem sunsun ka yiri faari nyini sam n kere baari a. Dɔ na wɔ ye i saa su ka jama n yaki naɲmiɛ, na i sukan na minem si deke bo i wo nu.

³⁴ Ama, saɲga bo bu faari nu ka i ti Yudafɔ ni, na bu kere atien kungerekun, bu ɲa, “Yere Efesofɔm dɛɛ amɔe Atemisi ni, yiri ti yikofɔ a.” Ba tientien sɔ ɔ ace haari saɲga su.

³⁵ Na sɔɔ be bo i ti bu miɛ n nu kadasi kerefɔ n aba bu dɔ, na wɔ se bu ka, “Am yaki naɲmiɛ.” Dɔ na wɔ nya se bu ka, “Amberɛ Efesofɔm, am ti fen, ɲma wo bere bo i si má ka Efesofɔm niɛ Atemisi amɔe kpiri sɔɔ n ni yabue n bo i fiteeri aɲgoro tɔori n su a?”

³⁶ Sɔɔ be wo má bere bo i koro se ka ahin jɔre n ti má nahɔre. Nyini ti, wɔ yo daka ka am tara am ɲu, má am koro nde yo sa be bo i kunma am.

³⁷ Ahin minem bo am afa bu aba fen ni, ba wɔ má puitiripui afite má amɔe sɔɔ n nu, ba kaaki akpie má nzukɔ be ajaraki má ya amɔe ni.

³⁸ Nzen Demetirɔsi ni i beɲgu jumayofɔm ni, la jaraki fa kɔ bu be dɔ, jɔredifɔm ni gomina nkpienkpienm wo bere, bu koro jaraki nyini minem bu dɔ.

³⁹ Ama, nzen sa be wo bere buka su na am koro ka ya yo i dɔɲgu a, am fa bra saɲga bo miɛ n nu jama n kere la bu tientienbunɔɔ ni.

⁴⁰ Naɲmiɛ n bo am ayo i nyuma ni, i la má kpere, i koro fa ya wura jɔre nu, dama ya koro kan má deke n bo i ti na am ayo sɔ ni.

⁴¹ I jɔjɔri sɔ wieeri ni, na wɔ ma jama n asandi.

20

Kabo Pɔɔlu kɔori Makedoniya ni Girikifɔm dɛɛ awɔre n nu ni

¹ Minem ni yoori naɲmiɛ n wieeri ni, na Pɔɔlu afere yaradayofɔm n atien bu nɔɔ, na wɔ ma bu ahoresi, na wɔ kaari bu, na wɔ kɔ Makedoniya awɔre n nu.

² Na wɔ fa nyini awɔre n kere nu, na wɔ jɔjɔ yaradayofɔm kere dɔ, na wɔ ma bu ahoresi, na wɔ fa dɔ akɔ aju Girikifɔm dɛɛ awɔre n nu,

³ na wɔ wo dɔ haari sara nsan. Na sanɔa bo i wo sesesu su ka i kɔ Siriya awɔre n nu ni, na wɔ ti ka Yudafɔm akpa bu ŋu akɔ aŋminda i atin nu, nyini dɛɛ ti, na wɔ yo i sunsunni ka i kpie i nyi fa Makedoniya a.

⁴ Na mine nbem asu i su akɔ, bere la Sopateri bo bu fere i si ka Pirihusi na i fite Beriya mie kpiri n nu ni, ni Arisitakusi, ni Sekundosi bo bu fite Tesalonika mie kpiri n nu ni, ni Gayosi bo i fite Derɛbi mie kpiri n nu ni, ni Tikikusi, ni Torofimosi bo bu fite Esiya dɛɛ awɔre n nu ni, ni Timoti.

⁵ Na bere kere adu mɔ akɔ aŋminda ya Tɔrasi mie kpiri n nu.

⁶ Na yere aka Filipiya mie kpiri n nu, haari na Yudafɔm aba adi bu cɛɛn-kpiri n asin, bo bu di i ni kpɔnɔ na bu gɔ má ayiri nu na i yasu ni, na ya nya afa lee bambaka, na i lennu cɛɛn na ya kɔ atu bu Tɔrasi, na ya wo dɔ akɔ aju lesɔ.

Kabo Pɔɔlu kɔɔri Tɔrasi mie kpiri n nu awieeri su ni

⁷ Na Yudafɔm bakue n bumboori, mɔne cɛɛn, na ya kere atien ya nɔɔ ka ya sanɔa di diire. Na Pɔɔlu ajɔjɔ minem dɔ, haari kɔŋgue jinanjin, dama i koroori ka nyini cɛɛn alecin i kaari bu wɔ, na i kɔ yaki bu.

⁸ Ya tieɛnri ya nɔɔ aŋgoro sɔɔ be nu wɔ, fitanam sunnu nu dɔ.

⁹ Na gbefene be, bu fere i ka Itikusi, na wɔ fun atana sɔɔ aŋgoro nsan n tukoro n su, na daafiri ati i. Pɔɔlu jɔjɔ cɛɛri na wɔ daafi, na wɔ fite aŋgoro aba atɔ asiɛŋgu. Bu jura kɔ maari i su ni, nyini sanɔa wɔ wu.

¹⁰ Na Pɔɔlu ajura akɔ asiɛŋgu, na wɔ fun abutu i ŋu, na wɔ fa i saa abara aye i, na wɔ se bu ka, “Má am ma sere ti am, dama i la ŋɔɔ.”

¹¹ Dɔ na Pɔɔlu akpie i nyi afun akɔ aŋgoro sɔɔ n nu dɔ, na i ni bere kere asanɔa adi diire, na ba bo anzama, haari ale akɔ acin, na wɔ kaari bu na wɔ kɔ.

¹² Na ba nya afa gbefene n akɔ awuru ni laifie, na bu ahore ajɔ akɔ asin su.

Kabo Pɔɔlu fiteeri Tɔrasi kɔɔri Miletosi ni

¹³ Na Pɔɔlu afa sesesu ka yere fa lee bambaka du mɔ ɔ, na yiri nati na ya ni yiri kɔ saa nu Asosi mie kpiri n nu.

¹⁴ Sanɔa bo i ba tuuri ya dɔ ni, na wɔ wura lee n nu, na ya ni yiri kere akɔ mie kpiri n bo bu fere i ka Mitulene n su.

¹⁵ Na ya yasu dɔ, i alecin, na ya kɔ dodo lui bambaka n bo bu fere i ka Kiyosi n su. Na i alecin bekun, na ya kɔ aju lui bambaka nyiŋga n bo bu fere i ka Samosi, na i alecin fɔfɔre, na ya kɔ aju mie kpiri n bo bu fere i ka Miletosi n su.

¹⁶ Na Pɔɔlu aboro i nyi ka i ju Yerusalem mie kpiri n nu ka, na bu di Pentekoti cɛɛnkpiri ni, nyini ti, wɔ koro má ka i ce Esiya dɛɛ awɔre nu, na wɔ san asin Efeso mie kpiri n dɛɛ bue ni.

Kabo Pɔɔlu kaariiri Efeso dɛɛ Kristo jama nkpienkpienm ni

¹⁷ Sanɔa bo Pɔɔlu wo Miletosi mie kpiri n nu ni, na wɔ sunma afere Kristo jama nkpienkpienm bo bu wo Efeso mie kpiri n nu n ka bu ma bu ni yiri ye.

¹⁸ Sanɔa bo bu ba juuri i dɔ ni, na wɔ se bu ka, “Amberɛ ni am tii si kabo m woowa ti barasu, sanɔa kere bo m woori am dɔ ni, fite cɛɛn gbingbin n bo m ba juuri Esiya awɔre n nu ni.

¹⁹ M yoori m ŋu kaan wɔ, na ma yo Mibie n juma n ni nyunvuin. Haari ni bo Yudafɔm sesɛeri su ka bu kere m wuwuruwa barasu n kere ni, m mindi deerɛ i wɔ.

²⁰ Am si ka deke kere bo i ti kpa na i buka am ni, m kaanri i kereeri am wo jama n kere nyunu, ma fa afie ma am su, na m sunati awuru awurum n kere nu na m sukere am.

²¹ M kan kereeri Yudafo m ni bo bu ti ma Yudafo m n kere wo, ka bu kaaki bu wo fa ko Nyeme do, na bu yo ya Mibie Yesu n yarada.

²² To, kisa Awiewie Casi ni ma m suko Yerusalem mie kpiri n nu n a, ama, m gusu si ma deke bo i ko yo m do.

²³ Deke bo m si i n la ka, mie kere bo m ko su ni, Awiewie Casi n se m ka bu kere m wuwuruwa, na bu nyi m dansaraka.

²⁴ Ama, m fa ma m tienngu ngoo yo ma pui. Deke bo i kpie m daafiri n kere la ka, ma ka ma yo juma n bo Mibie Yesu n afa ama m n awie. Yiri la ka, m kan labari kpa n fa ko Nyeme ahoro ma n bo wo fa ama minem ni.

²⁵ Kisa m si ka am be mmoo nu ma m kun, amere bo m yo nati am nu kan Nyeme jore fa ko i femeya n su kere am ni.

²⁶ Nyini dee ti, m suse am wo lee nyuma, ka woro kere bo a kaari ngbeen, i ti ma m jore.

²⁷ Dama deke kere bo Nyeme koroori ka am yo i ni, ma fa afie ma am su, ma kan i akere am.

²⁸ Nyini ti, am bita am nu nyunyumi, na am kaaki nie Kristo jama minem kere su, bere bo Awiewie Casi n afa ama am ka am nie bu dika ni, kabo boesasafu nie i nbom su ni. Nyini minem ye Nyeme faari i tienngu Wa mbunja deeru bu jiiri n a.

²⁹ M si tenle su ka m ko yakiiri am, mine tiem ba wura am nu, kabo bedi wura nbom nu sandi bu n wo.

³⁰ Haari na am dee minem nbem bo bu wo am nu fen ni, bu ba kaaki nahore ni, na bu dadaka yaradayofom nbem na bu su bu dee atin n su.

³¹ Nyini dee ti, am kpa am nu, na am tenge su ka afu nsan lee bo m nati bobo am ni nyunvuin, kongue ni wiesu.

³² Kisa, m sufa am wura Nyeme saa nu wo lee, na i nie am dika, na m kaaki fa am wura i dee noanie n bo i ma am ahoro ma nu, na i buka am na i ma am nya deke n bo Nyeme ase ka i fa ma i tienngu minem kere ni.

³³ M konviki awo ma be nwaa, wara sutura nu.

³⁴ Amere mmoo ni am tii si ka m yo faari m saa yoori m juma a, ye m fa bukaari m nu ni m lamokom n kere a.

³⁵ Kabo ma yo juma n so ni, m sukere am ka am gusu yo i so o lee, na am buka yaarifom, na am tenge su kabo ya Mibie Yesu n ni i tii seeri ni. I na, "Terefie wo sono bo i ce aceeri n do tara sono bo i de aceeri ni." "

³⁶ Sangha bo Poo lu joo wieeri ni, na i ni bere kere akutu bu jaa nangoroma su, na wo sere Nyeme.

³⁷ Na bu kere asun, na ba fa bu saa abara aye i, na ba biti i.

³⁸ Na bu ahore asaaki agaya, dama i seeri bu ka bu nu ma i kun. Na ba se i atin nu, na wo ko awura lee bambaka n nu.

21

Kabo Poo lu koori Yerusalem ni

¹ Na ya kaari bu, na ya fa lee bambaka, na ya wo ya tii cein ako aju mie n bo i wo lui bambaka n su na bu fere i ka Kosi ni. Na i alecin na ya ko aju awore n bo bu fere i ka Rodesi ni, na ya fite do, na ya ko Patara mie kpiri n nu.

² Do na ya nu lee bambaka be ka i suko Fonisiya dee awore n nu, na ya wura i ako.

³ Ya sukɔ ni, na ya ɲu Sipurusi lui bambaka ni, na ya yaki ya saa bie su, na ya sin ako Siriya awɔre n nu. Na ya nya ako ajina Tiro mie kpiri n nu, do ye bu yi bu soori n lee n nu a.

⁴ Na ya ko anienie Yesu susufom busu, na ya wo bu do lesu. Na Awiewie Casi n ama ba se Pɔlu ka ma i ko Yerusalem mie kpiri n nu.

⁵ Ama, ya yasu cɛen n ba juuri ni, na ya fite ka ya ko, na bu ni bu yim, ni bu nbaam ase ya atin nu afite mie n nu ako tieku n noo su. Do na ya ni bere kere akutu ya jaa nanigoroma su, na ya sere Nyeme.

⁶ Nyini sin, na ya kaari ya benggu, na yere awura lee bambaka n nu, na bere gusu akpie bu nyi ako awuru.

⁷ Na ya fite Tiro ako aju mie kpiri n nu, na ya ko anie yaradayofom ni busu, na ya da bu do lekun.

⁸ I alecin fofore na ya fite bere ako aju Sizariya mie kpiri n nu. Do na ya ko awo sonɔ be dika, bu fere i ka Filipu, i ti Nyeme jore kanfo o. Yiri bukaari mine nsom bo bu yo yiiri bu ka bu buka Kristo jama n bo bu wo Yerusalem n a.

⁹ I yo la nbaabaram nna a, bu be nya ja ma. Bere nati yo Nyeme noanie kanfo juma n a.

¹⁰ Ya woori do yoori lennyo, na Nyeme noanie kanfo be aba do, bu fere i ka Agabusi, i fite Yudiya awore n nu wo.

¹¹ Na wo ba ya do, na wo fa Pɔlu dambara, acici i dee jaam ni i saam. Na wo nya ase ka, "Awiewie Casi n ja o, kabo Yudafom bo bu wo Yerusalem ni cici ahin dambara n fo lee, na bu nya fa i ma minem bo bu ti ma Yudafom ni."

¹² Sanga bo ya tiiri nyini jore n so ni, na ya ni minem n bo bu wo do n asere Pɔlu jande ka ma i ko Yerusalem.

¹³ Ama, na wo bisa, "Nzu ti ye am suyo so na am saaki m ahore a? Mini, ma yo siriya na m ko Yerusalem, na bu ko cici m nyama, ma nyini ngumi, ama, haari na bu kun m, ya Mibie Yesu n dee ti."

¹⁴ I seeri so ni, ya koro akanda ma i ka ma i ko, na ya mo ya noo, na ya se i ka, "To, ma Mibie n dee koroowa yo."

¹⁵ Ya diiri lennyo do ni, nyini sin, na ya sese ya ɲu su, na ya nya ako Yerusalem.

¹⁶ Na Yesu susufom nbem bo bu fite Sizariya n asu ya su, na ba fa ya ako ka ya ko wo sonɔ be dika, bu fere i ka Manesoni, i ti Sipurusifo o, wo su Yesu dee atin n su ace.

Kabo Pɔlu ko nieeri Yakobo busu ni

¹⁷ Sanga bo ya ko juuri Yerusalem mie kpiri n nu ni, na ya ninbaam n ade ya ni ahorejo nyunyumi.

¹⁸ I alecin na Pɔlu afa ya ako Yakobo do, na ya ko atu Kristo jama nkpien-kpienm kere ka bu wo i do.

¹⁹ Ya bisaari ahin n wieeri ni, na Pɔlu akan deke n kere kun kun fa ko kabo Nyeme ma wo yo i juma ama minem bo bu ti ma Yudafom ni.

²⁰ Bu tiiri nyini noanie n so ni, na ba kansi Nyeme. Ama, na ba se i ka, "Ya niwa Pɔlu, m ja a ɲu Yudafom akpii beberebe bo bu wo ya nu fen na ba yo Yesu yarada, ye bu gusu nyunu aboro ka bu su Nyeme noanie kpamaawa n su.

²¹ Ba ti ka a kere Yudafom bo bu tana minem bo bu ti ma Yudafom n nu ni, ka ma bu su Nyeme noanie kpamaawa n bo Moyisi fa maari n su, ye a se bu ka ma bu wura bu nbaam kenkenne, na ma bu kaaki su Yudafom nana sayoowam su.

²² Nahore, bu ti ka a ba. Ye ya yo se wo?

²³ Ti fɛn, kabo ya yo n la ka, mine nna nbem wo ya nu fɛn bo ba tan ndie.

²⁴ Su bu su na a kɔ bie fin kabo bu yoowa kere ni, na a tɔ bu tii su kaari, adena bu koro yi bu tii. Nyini ni má sɔnɔ kere si ka jɔre n kere bo bu kan i fa kɔ u dɔ n ti kɔre wɔ, na bu si ka wɔrɔ mmɔɔ ni u tii su Nyeme nɔanie kpamaawa n su wɔ.

²⁵ Ama, minem bo bu ti má Yudafoɔm na ba yo yarada n yiri, ya kere kadasi ama bu, ka má bu se ka bu di tie nie, wara mbunja, wara deke bo wo wu i ngumi na ba kpie má i kɔm, na má bu yo sakaraya.”

²⁶ I alecin, na Pɔɔlu afa minem n akɔ na ba kɔ ayo fin bieɛwa yoowa ni, na wɔ nya awura Nyeme Sereebiri Awuru n nu, na wɔ jɔjɔ akere Nyeme sayoowa dɔnguyofɔm ni, cɛen n bo bu ba bie fin n wie, na bu kun kun n kere yo bu tii su sayoowa ni.

Kabo bu taraari Pɔɔlu Nyeme Sereebiri Awuru n nu ni

²⁷ Saɔga bo wɔ ka kaan na leso cɛen n wie ni, na Yudafoɔ nbem afite Esiya dɛe awɔre n nu aba dɔ, na ba ŋu Pɔɔlu Nyeme Sereebiri Awuru n nu. Na ba ye jama n kere ahore su, na ba tara Pɔɔlu.

²⁸ Na ba tien, bu ŋa, “Yisarelifɔm, am buka ya. Ahin sɔnɔ ni nati jengbe deke n kere kere minem kere ɔ, ka má bu bu Yisarelifɔm, ni Nyeme nɔanie kpamaawa ni, ni Nyeme Sereebiri Awuru ni. Ye wɔ kaaki afa minem bo bu ti má Yudafoɔm aba awura Nyeme Sereebiri Awuru n nu, na wɔ yo ahin woobiri casi n fin.”

²⁹ Deke n bo i ti na bu seeri sɔ n la ka, ba du mɔ aɔu Torofimosi bo i fite Efeso mie kpiri n nu ni, ni Pɔɔlu mie kunnu, nyini dɛe ti ye bu sunsuunri ka Pɔɔlu afa i awura Nyeme Sereebiri Awuru n nu n a.

³⁰ Na mie n abo nu, na minem kere aɔmati atien bu nɔɔ, na ba tara Pɔɔlu acin ayi i afite Nyeme Sereebiri Awuru n nu. Na ba kaba anyi Nyeme Sereebiri Awuru n anɔ ni ndende.

³¹ Má bu koroori ka bu kun Pɔɔlu wɔ. Dɔ na labari n atu Romafoɔm sojam kere kpien n ka Yerusalem mie kpiri n abo nu.

³² Kpenga na wɔ yasu ndende, na wɔ fa sojam ni bu nkpienkpienm, na ba ŋmati aju dɔ. Saɔga bo jama n ŋuuri soja kpien n ni i sojam ni, na ba yaki Pɔɔlu, ba bo má i kun.

³³ Na sojam kpien n akɔ atara Pɔɔlu, na wɔ ma nɔɔ ka bu wura i jɔrɔko nnyɔ. Na wɔ bisa ka, “Ahin sɔnɔ ti nzu sɔnɔ ɔ? Ye wɔ yo nzu wɔ?”

³⁴ Na jama ni nbem sutientien sujɔjɔ, bu jɔjɔɔwa n woori i ngumi ngumi wɔ, ba jɔjɔ má jɔre kun. Bu nanmie dɛe ti, wɔ koro asi má jɔre n bu. Na wɔ ma nɔɔ ka bu fa Pɔɔlu kɔ bere sojam dika bambaka n nu.

³⁵ Bu faari Pɔɔlu kɔ juuri bimbindi bo bu tientien su fun na bu wura gisan nu ni, na i boori i bu ka i fun kɔ sɔɔ n aɔgoro ni, sojam n kukuuri i wɔ, dama jama n bieka n dɛe ti.

³⁶ Na bu sunmati su i su, sutien kpa, bu ŋa, “Am kun i, am kun i.”

Kabo Pɔɔlu kaanri i jɔre n kereeri jama n ni

³⁷ Saɔga bo bu sukoro ka bu fa Pɔɔlu wura sojam dika bambaka n nu ni, na Pɔɔlu ase sojam kere kpien n ka, “Ma m kan jɔre be na a ti.” Na sojam kere kpien n abisa i ka, “A ti Giriki anie?”

³⁸ Nyini yiri, a ti má Ijipiti sɔnɔ n bo i yo duuri mine akpii nna mɔ ka bu tu gomina n ni, na i faari nyini mine akpii nna n kere kɔori boro kpantain n nu ni.”

³⁹ Na Pɔɔlu abɔ i nu ka, “Ai, mini, m ti Yudafo ɔ, m ti miɛbaa a, m fite Tarasu wɔ, miɛ kpiri n bo i la duma na i wo Silisiya awɔre n nu ni. Jande, ma m jɔjɔ minem ni do.”

⁴⁰ Na sojam kere kprien n ama i atin ka i jɔjɔ, na Pɔɔlu ajina bimbindi n bo bu tientien su fun na bu wura gisan nu ni, na wɔ fa i saa ayo minem n ka bu yaki nanmie. Na ba to amuna, na Pɔɔlu ajɔjɔ bu do Hiburu anie nu.

22

¹ I na, “M sim ni m ninbaam, am ti fen, m koro ka m kan m jɔre n na am ti.”

² Saŋga bo bu tiiri ka i sujɔjɔ bu do Hiburu anie nu ni, na ba yaki nanmie na ba mo bu noo surum. Na Pɔɔlu ase ka,

³ “M ti Yudafo ɔ, bu wuuri m Tarasu miɛ kpiri n nu wɔ bo i wo Silisiya awɔre n nu ni, ama, bu taari m Yerusalem miɛ kpiri n nu fen wɔ, Gameli kereeri m kara a, ye m sɔnsɔnri ya nam sayoowa atin n kere ni anyumboro. Na ma fa m ŋu kere ama Nyeme, kabo ambere bo am jina fen nyuma n afa am ŋu ama i ni.

⁴ Na ma kere minem bo bu su ahin atin n su n wuwuruwa, haari na ma kun bu nbem. Na ma tara bu nbiesom ni nbaram anyi bu dansaraka.

⁵ Nzen am bisaari Nyeme sayoowa dongyuyofom n kere kprien ni, ni tereferom ni, bu se am ka noanie n bo m sujɔjɔ i n ti nahore wɔ. Haari na ba ma m kadasi ka m fa ko ma ya minem bo bu wo Damasiko miɛ kpiri n nu ni, adena m koro tara Yesu minem ni, na m wura bu joroko fa bu ba Yerusalem na bu ba cin bu sui.”

Kabo Pɔɔlu kaanri kabo i kaakiiri i wo barasu ni

⁶ Na Pɔɔlu asa su ase bu ka, “Saŋga bo m wo ko su n na m ko dodoori Damasiko miɛ kpiri n ni, wie kekete saŋga lee, na sin be akaba afite angoro ata abara aye m.

⁷ Na ma kpaasi haari asienggu, na ma ti akonvi be nga, i na, ‘Soolu, Soolu e, nzu ti ye a kere m wuwuruwa so a?’

⁸ Na ma bisa i ka, ‘M Mibie, woro nma a?’ Na wo bo m nu ka, ‘Mini Yesu Nazaretifo n a, mini ye a kere m wuwuruwa n a.’

⁹ Na minem bo bu su m su n anu sin ni, ama, ba ti ma akonvi n yiri nga.

¹⁰ Na ma bisa i ka, ‘M Mibie, ye a na m yo nzu wɔ?’ Na wo se m ka, ‘Yasu na a ko Damasiko, do ye bu se u deke n kere bo Nyeme koro ka a yo i ni.’

¹¹ Sin n bo i ta wuraari m nyumbaa nu agaya n dee ti, na ma yo anyinsin, na minem ni bo bu su m su n aso m saa nu afa m awura Damasiko.

¹² To, sɔno be woori miɛ n nu, bu fere i ka Ananiyasi, i su Nyeme wɔ, na i su i noanie kpamaawa n su, i ti sɔno n bo Yudafo bo bu wo miɛ n nu n kere ma i jirima agaya a.

¹³ Na wo ba m do ajina adodo m, na wo se m ka, ‘M niwa Soolu, nie, a nu asi.’ Jina n nu bere na ma nu asi bekun, na ma nie anu i.

¹⁴ Na wo se m ka, ‘Nyeme n bo ya nam su i ni, yiri ye wo yi u a, na a si i sa koroowam, ye wo yi sɔno n bo i yo sa bo i ko atin su n akere u, na a ti yiri ni i tii noanie jɔjɔwa.

¹⁵ Dama deke bo a nu i na a ti i ni, woro kan kere minem kere.

¹⁶ Ye kisa, a nminda nzu wɔ? Yasu na bu bie u Nyeme nzue. Bo fere i duma na i nmisi yi u satie kere.’ ”

Kabo Pɔɔlu kaanri ka Nyeme asunma i minem bo bu ti ma Yudafo m do ni

¹⁷ Na Pɔɔlu asa su ase bu ka, “Nyini ti, na ma kpie m nyi ako Yerusalem mie kpiri n nu, sanɔa bo m wo Nyeme Sereebiri Awuru n nu wo nyemesere su ni, na wo yo m ka alele de su wo,

¹⁸ na ma nu Yesu ka i sujojo m do, i na, ‘Yasu na a fite Yerusalem ndende, dama minem bo bu wo fen ni de ma m jore n bo a kan kere bu ni.’

¹⁹ Na ma bo i nu ka, ‘M Mibie, bere ni bu tii si tenle su ka m yo wuraari bu tientienbunoo soom nu wo, na ma tara minem bo bu yo u yarada ni, na ma nyi bu dansaraka, na ma bo bu.

²⁰ Sasu bekun, sanɔa bo bu sukun Satefano bo i diiri u nusu daani kereeri minem ni, m yo jinaari bere, na ma soro su, mini nieeri minem bo bu kuunri i n suturam su a.’

²¹ Na Mibie n ase m ka, ‘Woro ko, m sunma u dede minem bo bu ti ma Yudafom ni do.’ ”

²² Nyini sanɔa n kere ni, minem ni soori bu sui wo, na ba ti jore n kere bo Pɔɔlu kaanri i ni, ama, i ba kaanri so ni, na ba tien kpa, bu na, “Am yi i fite fen. Am mini i mmoo. Wo ti ma ye ni ka i wo ni ngoo.”

²³ Na bu sutenantien, yaa ati bu n de ti, na bu sufikindi bu suturam tu, na bu susa fa sutu sandi angoro.

²⁴ Na Romafom soja kere kpien n ama noo ka bu fa Pɔɔlu wura bu dika bambaka n nu, na bu bisa i bisaawam na bu fin i ngbere na bu si deke bo i ti na Yudafom ni tientien so ni.

²⁵ Ama, sanɔa bo bu ciciiri Pɔɔlu nyama n ka bu bo i ni, na wo bisa soja kpien n bo i jina dodo i ka, “Atin wo nu ka am bo Roma miebaa na am asi ma satie bo wo yo i?”

²⁶ Sanɔa bo soja kpien n tiiri nyini jore n so ni, na wo ko sojam kere kpien n do, ako abisa i ka, “A koro ka a yo ahin sono n se wo? I ti Roma miebaa a.”

²⁷ Nyini ti, na sojam kpien n ako Pɔɔlu do, ako abisa i ka, “A ti Roma miebaa a, nahore su?” Na wo bo i nu ka, “Een.”

²⁸ Na sojam kpien n ase i ka, “Mini, m tɔori nwaa beberebe wo ye m nya kaakiiri Roma miebaa a.” Na Pɔɔlu ase i ka, “Ama, mini yiri, bu wuuri m miebaa a.”

²⁹ I seeri so ni, kpenɔa na sere ati sojam bo ba yi bu ka bu bisa i bisaawa ni, na ba ko bu sin. Na sere ati soja kpien ni mmoo, dama wo du mo abo Pɔɔlu joroko ka, ye i nya siiri ka i ti Roma miebaa a.

Kabo bu faari Pɔɔlu kɔori Yudafɔ tereterefom do ni

³⁰ Na i alecin, sojam kpien n akoro ka i si sa bo Pɔɔlu ayo i na Yudafom jaraki i ni, na wo yi Pɔɔlu joroko ni, na wo ma noo ka Nyeme sayoowa donɔguyofom nkpienkpienm ni, ni Yudafom tereterefom n kere tien bu noo. Na wo ma Pɔɔlu aba ajina bu nyunu.

23

¹ Na Pɔɔlu afa i nyumbaa akpama Yudafom tereterefom n nu, na wo se ka, “M ninbaam, m sunsunni ti kpa wo Nyeme do, fite m kaan nu haari ni nyuma.”

² Na Ananiyasi bo i ti Nyeme sayoowa donɔguyofom n kere kpien n ama minem bo bu jina dodo Pɔɔlu n noo, ka bu bo i noo dika, fa ko i noanie jooowa n de ti.

³ Na Pɔɔlu ase i ka, “Nyeme bo woro mmoo, woro bo a tana do ka kobe dawa bo ba bo i ngoro fofoe ni. A tana na a di m jore, fa ko Nyeme noanie kpamaawa n de atin su, ama, woro ni u tii asu ma i noanie kpamaawa n su na a tana ma noo ka bu bo m.”

⁴ Na minem bo bu jina dodo Pɔɔlu n ase i ka, “Wɔrɔ la ŋma na a kpɛ i nzuko a, yiri Nyeme sayoowa dɔnguyofɔm n kere kpien ni?”

⁵ Na Pɔɔlu abɔ bu nu ka, “M ninbaam, ma si má ka yiri ti Nyeme sayoowa dɔnguyofɔm n kere kpien n a. Dama ba kere i Nyeme Jɔre Kadasi n nu ka, ‘Má a jɔjɔ sɔnɔ bo i niɛ u minem su jɔre tie.’ ”

⁶ Saŋga bo Pɔɔlu faari nu ka, minem ni nbem ti Sadusifɔm, na bu nbem gusu ti Farasifɔm ni, na wɔ tien kpa jama n nu, i ŋa, “M ninbaam, m ti Farasifɔm. M sim mmɔɔ suuri nyini atin ni su a. Deke n bo i ti na ya tien ya nɔɔ n la ka, m la tama ka minem wu, bu tɛŋge bu yiwee nu wɔ.”

⁷ Pɔɔlu seeri sɔ wieeri na akuruwa aba Sadusifɔm ni Farasifɔm n afien, na bu tientienbunɔɔ n akpaaki nu nnyɔ.

⁸ Sadusifɔm n ŋa, sɔnɔ wu, i tɛŋge má i yiwee nu kun, ye bu kaaki ŋa, Nyeme merkem, wara awiewiem wo má bere. Ama, Farasifɔm bere yo nyinim n kere yarada a.

⁹ Na jama ni sutientien suyo nanmie agaya buka su. Na Nyeme nɔanie kerefɔ nbem bo bu wo Farasifɔm asese n nu n ayasu ajina atien faŋga su, bu ŋa, “Yere aŋu má ahin sɔnɔ ni ŋgasi bo wɔ do i. Beni, awiewie be, wara Nyeme merke aɔjɔ i do a.”

¹⁰ Saŋga bo akuruwa n ba bi boroori agaya ni, na sere ati soja kpien ni, ka minem ni bá cincin titi Pɔɔlu nu. Nyini ti, na wɔ ma sojam nɔɔ ka bu wura jama n nu na bu yi Pɔɔlu fite bu nu, na bu fa i ba wura bu deɛ dika bambaka n nu.

¹¹ Nyini cɛɛn n kɔŋgue, na Mibie n ayi i ŋu akere Pɔɔlu, na wɔ se i ka, “Ma u ahore si, na má a soro sere. Kabo a di m ŋu daani Yerusalem mie kpiri n nu fen ni, sɔ ye i ti ye ni ka a kɔ di i Roma mie kpiri n nu gusu a.”

Kabo mine nbem sɛsɛeri su ka bu kun Pɔɔlu ni

¹² I alecin fɔfɔre, na Yudafɔ nbem atien bu nɔɔ, na ba fa sɛsɛsu na ba tan ndie ka bu di má, bu nu má, má ka ba kun Pɔɔlu.

¹³ Bere n bo bu tana faari nyini sɛsɛsu ni, bu taraari mine aburana.

¹⁴ Na ba kɔ Nyeme sayoowa dɔnguyofɔm nkpienkpienm ni, ni Yudafɔ tere-terefɔm ni do, ako ase bu ka, “Yere, ya tien ya nɔɔ atan ndie ka ya dí má pui, má ka ya kun Pɔɔlu.

¹⁵ Nyini ti, ambere ni tereterefɔm ni, am sunma Romafɔm soja kpien n do kɔ se i ka, i fa Pɔɔlu bra am do ka am koro ka am niɛ i jɔre n nu nyunyumi bekun wɔ. Ama, na ya yó siriya ŋminda i, na ya kún i atin nu na i nya ba ju fen.”

¹⁶ Ama, na Pɔɔlu niwa bara be wa ati sɛsɛsu n bo ba fa i ni, na wɔ kɔ awura sojam sɔɔ bambaka n nu, na wɔ se Pɔɔlu.

¹⁷ Do na Pɔɔlu afere sojam n kun, na wɔ se i ka, “Fa ahin gbefene n kɔ am kpien n do, i la jɔre be bo i kán kere i.”

¹⁸ Na soja n afa i ako bu kpien n do, na wɔ se i ka, “Pɔɔlu bo ba nyi i dansaraka ni fereeri m a, na wɔ se m ka m fa ahin gbefene n ba u do, dama i la jɔre bo i kán kere u.”

¹⁹ Na sojam kere kpien n aso i saa nu, na i ni yiri ŋgumi afite aheme, na wɔ bisa i ka, “A koro ka a kan nzu jɔre kere m a?”

²⁰ Na wɔ se sojam kpien n ka, “Yudafɔm n asese su ye ba soro su ka ahunma bu bá sere u na a fa Pɔɔlu ma bu na bu fa i kɔ bu tereterefɔm ni do, na bu yó bu ŋu ka bu koro ka bu niɛ i jɔre n nu nyunyumi wɔ.

²¹ Ama, má a soro bu su, dama bu nbem ŋa bu kɔ ŋminda i atin nu wɔ, bu tara minem aburana. Ba tan ndie ka bu dí má, bu nú má, má ka ba kun Pɔɔlu. Kisa ba yo siriya su aŋminda na bu ti kabo a sé.”

22 Na sojam kere kpien n abobo i ka, “Má a ma be si ka a kan ahin jore n akere m.” Na wo ma gbefene n atin na wo ko.

Kabo bu faari Pɔɔlu kɔɔri Gomina Felika do ni

23 Na sojam kere kpien ni, afere soja nkpienkpienm ni nnyo, na wo ma bu nɔɔ ka, “Am fa sojam yaa nnyo, ni soja kpɔngɔfunfɔm aburaso, ni soja kpiebitafɔm yaa nnyo, na am yo siriya kɔngue n nu, kerefi ngona sanja, na am ko Sizariya mie kpiri n nu.

24 Na am nya kpɔngɔ ma Pɔɔlu gusu, na am fa i haari na am ko ju Gomina Felika do, na má pui yo i.”

25 Na sojam kpien n akere kadasi ama gomina n ka,

26 “Mini Kalodisi Lisiyasi sukere ahin kadasi n bisa wɔɔ, m si Gomina Jirimafɔ Felika dɔngu a.

27 Yudafɔm taraari ahin sɔɔ n a, má bu koro ka bu kun i wo. Ama, na ma ti ka i ti Roma miebaa a, nyini ti, na ma fa m sojam, na ya ko ade i aji.

28 Na ma koro ka m si deke n bo i ti na bu jarakiiri i ni, nyini ti, na ma fa i ako Yudafɔ tereterefɔm do.

29 Na ma ŋu ka fa ko bu nɔaniɛ kpamaawa n deɛ atin su ye bu jarakiiri i a, ama, wo yo má sa be bo i ti ye ni ka bu kun i, wara bu nyi i dansaraka.

30 M tiiri ka Yudafɔm asese su ako ada anmindanda atin nu ka bu kun i, nyini deɛ ti, ye m ma ba kaba afa i aba u do n a. Ma se minem bo bu jarakiiri i n ka bu fá jore n bra u do.”

31 Na sojam n ayo kabo i kereeri bu ka bu yo ni, na ba fa Pɔɔlu nyini kɔngue n kere, na ba fa i ako aju mie kpiri n bo bu fere i ka Antipatiriso n su.

32 Na i alecin fofore na sojam bo bu nati bu jaa su n akpie bu nyi ako sojam sɔɔ bambaka n nu, na ba ma soja kpɔngɔfunfɔm n afa i ako aju deke bo bu sukɔ ni.

33 Bu ko juuri Sizariya ni, na ba fa kadasi n ama gomina ni, na ba nya afa Pɔɔlu awura i saa nu.

34 Gomina n kaanri kadasi n wieeri ni, na wo bisa Pɔɔlu awore bo i fite nu. I faari nu ka i fite Silisiya awore n nu wo,

35 na wo se i ka, “Minem bo bu jarakiiri u n ba juuri, m tí u nɔaniɛ.” Na wo ma nɔɔ ka bu fa Pɔɔlu wura Feme Herode dika n nu, na bu nie i dika nyunyumi.

24

Kabo Yudafɔm jarakiiri Pɔɔlu Gomina Felika n nyunu ni

1 Na i lennu cɛɛn sin, na Ananiyasi bo i ti Nyeme sayoowa dɔnguyofɔ n kere kpien n aba aju Sizariya mie kpiri n nu, i ni Yudafɔ tereterefɔ nbem, na ba fa joresifɔ be bo bu fere i ka Tetulɔsi n abuka bu ŋu su. Na ba jaraki Pɔɔlu gomina n nyunu.

2-3 Bu faari Pɔɔlu ba juuri n na Tetulɔsi abo i bu na i kan ngasi bo Pɔɔlu ado i. I ŋa, “Ya si Felika jirimafɔ, u ngonle kpa n bo a la i n deɛ ti, nyini ma ya nya tanalaifie ace a, ye kaaki aba ya asien n su a, fa ko nyini sunsunni n bo a la i ni. Deke kere bo ya wo ni sanja kere, ya nyunu ayi u fa ko deke n kere bo a yo ama ya ni, nyini deɛ ti, ya da u asi beberebe.

4 To, m koro má ka m jɔɔ saaki u sanja, ama, m sere u wo, sawore n bo a la i n deɛ ti, ti ya ahin jore kaan ni.

⁵ Ya ɲu ka ahin sɔnɔ n ti miɛbofɔ ɔ, na i nati sukpukpura Yudafoɔm tii durunya n kere nu, na bu sudi aluwa ni bu benɲu. I ti mofo ɔ, fa ko minem bo bu su Nazaretifo n atin n su ni.

⁶ Haari i yo koroori ka i wura Nyeme Sereebiri Awuru n nu wo na i saaki i na i yo i fin, ye ya taraari i a. [Ma ya koroori ka ya fa ya noanie kpamaawa n atin su di i jore wo,

⁷ ama, na sojam kpien Lisiyasi n ade i ya do ni fanga,

⁸ na wo ma noo ka, bo bu ni yiri la jore n kere bra u do.] Na nzen woro mmoo ni u tii niɛeri jore n nu, a si deke n bo i ti na ya jaraki i ni.”

⁹ Na Yudafoɔm n kere ajina su ka, jore n kere bo bu joro i n ti nahore wo.

Kabo Pɔɔlu kaanri i nahore Gomina Felika n nyunu ni

¹⁰ Na Gomina Felika ama Pɔɔlu atin ka i joro, na Pɔɔlu ase ka, “M si ka a di jore ahin asien n su ace, nyini ti, m ahore ti siiwa ka ma ba u do na m kan de m tii.

¹¹ Woro mmoo ni u tii koro bisa na a ti, ka i nyuma leburu lennyo lee, bo m koori Yerusalem mie kpiri n nu ka m ko su Nyeme.

¹² Bere n anu ma ka m ni be suse akuruwa Nyeme Sereebiri Awuru n nu, ba kaaki anu ma ka m ni be suwura minem bu sin na bu yo sa be tientienbunoo soom n nu, wara mie n nu.

¹³ Bere gusu koro kan kere ma u deke n bo i ti na kisa bu sujaraki m ni.

¹⁴ Ama, deke bo m soro i su ka i ti nahore n la ka, m su Nyeme wo, kabo ya nam su i ni, nyini atin n gusu ye bu na i ti ma nahore n a. Ama, m yo deke bo ba kere i noanie kpamaawa n nu n yarada, na m kaaki yo deke bo ba kere i Nyeme noanie kanfoɔm dee kadasi n nu n yarada.

¹⁵ M la tama Nyeme do ka minem bo bu yo sa bo i ko atin su, ni bo bu yo sa bo i ko ma atin su n kere ba teɲge bu yiwee n nu, kabo bere n bo bu jaraki m n gusu la nyini tama ni.

¹⁶ Nyini dee ti, sanɲa kere m boro m nyi wo, na m sunsunni ti casi fa ko Nyeme ni adandem do.

¹⁷ M fiteeri Yerusalem, wo ce, nyini sin, na ma kpie m nyi ako do ka m ko fa ɲwaa ce m minem bo bu ti yaarifom n na m yo m dee yoowa ma Nyeme.

¹⁸ M wo nyini yoowa n yo su ye bu ɲuuri m Nyeme Sereebiri Awuru n nu a. Nyini sanɲa ni, ma yo fin bie yoowa n awie mmoo. Jama be awo ma do, be gusu ayo ma nanmie be.

¹⁹ Ama, Yudafoɔm nbem bo bu fite Esiya awore n nu ni, yo woori do a. Wo yo daka ka ma bere mmoo ni bu tii wo fen, na bu kan m ngasi bo ma do i n kere u.

²⁰ Nzen ma nyini, yaki na ahin minem bo bu jina fen n kan ngasi bo m doori, sanɲa bo m jinaari bu tereterefoɔm nyunu na bu diiri m jore ni.

²¹ Ma ka deke kun n kpein be bo bu yo sudi m jore na m jinaari bu nyunu ni. Yiri la bo m seeri ka minem wu, bu kaaki teɲge bu yiwee nu ni, nyini dee ti, ye a sudi m jore nyuma n a.”

²² Na Gomina Felika si Mibie n atin n sereya n kere nyunyumi n dee ti, na wo se bu ka, “Am ko ka, na sojam kpien Lisiyasi ba baari, na m nya di jore ni.”

²³ Na wo ma noo ka soja kpien n nie Pɔɔlu dika nyunyumi, ama, i ma i atin na i nati i koroyanu, na i ma i danfoɔm gusu atin na bu koro ba buka i.

Kabo bu faari Pɔɔlu jinaari gomina n ni i yi n nyunu ni

²⁴ I yoori lennyo, na Gomina Felika akaaki aba, i ni i yi Durusila, i ti Yudafɔ baa a. Na wo sunma afere Pɔɔlu na i ba kan kabo sɔno yo Yesu Kristo yarada barasu ni. Na wo so i sui ati.

²⁵ Ama, sanɔa bo Pɔɔlu wo jɔjɔ su fa ko sa bo i ko atin su, ni tarabuɔu, ni kabo Nyeme ba di minem n jɔre ni, na sere ati Gomina Felika na wo se ka, "To, kisa, wo se su. A koro ko, na m ba nya sanɔa na m fere u."

²⁶ Nyini sanɔa n kere ni, i sunsunni la ka Pɔɔlu ma i nwaa a, nyini ti ye sanɔa sanɔa i fere Pɔɔlu, na bu subo anzama n a.

²⁷ Na afo nnyo aba asin, na sɔno be bo bu fere i ka Pokiyosi Fesitosi ade Felika jinaabiri ni. Na Gomina Felika akoro ka i jo Yudafom n ahore, nyini dee ti, na wo yaki Pɔɔlu dansaraka n nu, i ma ba yi ma i.

25

Kabo Pɔɔlu sereeri ka bu fa i jɔre n ko Romafom feme kpiri n do ni

¹ Gomina Fesitosi ba juuri nyini awore n nu ni, i lesan, na wo fite Sizariya mie kpiri n nu, na wo fun ako Yerusalem mie kpiri n nu.

² Na Nyeme sayoowa donɔguyofɔ nkpienkpienm, ni Yudafɔ tereterefom n aba akan nɔgasi bo Pɔɔlu ado i n akere Gomina Fesitosi. Na ba sere i jande

³ ka i boro i nyi na i ma bu fa Pɔɔlu ba Yerusalem. Deke n bo i ti na bu seeri so n la ka, ba sese su ka bu ko nminda i atin nu wo na bu kun i.

⁴ Na Gomina Fesitosi abo bu nu ka, "Pɔɔlu wo dansaraka nu Sizariya, mini ni m tii, m kpie m nyi ko do kisa.

⁵ Am ma am nu nbem bo bu la yiko n su m su, na ya ko Sizariya, na nzen wo do nɔgasi be a, na bu koro kan i na bu jaraki i."

⁶ Na Gomina Fesitosi awo bu do, lemocue ni leburu afien, na wo nya aba Sizariya. I alecin na wo ko atana jore diibiri ni, na wo ma noo ka bu fa Pɔɔlu bra.

⁷ Sanɔa bo bu faari Pɔɔlu ba juuri n ni, na Yudafom bo bu fiteeri Yerusalem baari n atien bu noo abara aye i. Na ba kan i nɔgasi tietie beberebe bo bu na wo do i, bu gusu akoro akere ma nɔgasi n bo bu na wo do i n tenle su.

⁸ Na Pɔɔlu ase ka, "Ma do ma nɔgasi be fa ko Yudafom dee noanie kpamaawa n su, ma do ma nɔgasi be fa ko Nyeme Sereebiri Awuru n su, ma kaaki ado ma nɔgasi be fa ko Romafom Feme Kpiri Siza n do."

⁹ Ama, na Gomina Fesitosi akoro ka i buka Yudafom ni, na i da bu ahore, nyini dee ti, na wo bisa Pɔɔlu ka, "A soro su ka ya ko Yerusalem na bu ko di u jore n do m nyunu, fa ko ahin sereyam kere su?"

¹⁰ Ama, na Pɔɔlu abo i nu ka, "M jina Romafom feme kpiri n jore diibiri wo lee, fen ye wo yo daka ka bu di m jore a. Woro mmoo ni u tii si tenle su ka ma do ma Yudafom nɔgasi be.

¹¹ Nzen ma do nɔgasi be bo wo yo daka ka bu kun m, ma kete ma ka ma bu kun m. Ama, nzen jore n kere bo ba kan i n be ti ma nahore, be la ma atin bo i koro fa m wura bu saa nu. Nyini ti, m sere ka a fa m jore n ko Romafom feme kpiri n do."

¹² Na Gomina Fesitosi ni i nkpienkpienm n atana anu bu nu, na ba soro su, na wo se Pɔɔlu ka, "A sere ka ya fa u jore n ko Romafom feme kpiri n do. To, ya fa u ko i do."

Kabo bu faari Pɔɔlu baari Feme Agiripa n nyunu ni

¹³ Na wo yo lennyo, na Feme Agiripa ni i siwa baabara Berenisi aba Sizariya mie kpiri n nu, ka bu ba nie Gomina Fesitosi busu.

¹⁴ Bu woori do cœeri kaan n dœe ti, na Gomina Fesitosi akan Pɔɔlu jɔre n kere n akere femɛ ni. I ŋa, “Felika yo yakiiri sɔno be dansaraka n nu fen.

¹⁵ Saŋga bo m kœori Yerusalem miɛ kpiri n nu ni, na Yudafɔ Nyemɛ sayoowa dɔŋguyofɔ nkpienkpienm, ni Yudafɔ tereterefom n aba m do, na ba kan nyini sɔno n jɔre, ka m boro m nyi di i jɔre n na m se ka wo do ŋgasi.

¹⁶ Ama, na ma se bu ka yere Romafom, ya yo má sɔ, nzen minem ajaraki sɔno, ya ma bu kere tien bu nɔɔ ɔ, na i mi si deke n bo i ti na bu jaraki i ni, na i gusu nya kan i dœe bo i la i ni.

¹⁷ Saŋga bo bu suuri m su ba juuri fen ni, ma wura má nnyɔ nu, i alecin m kaba kɔ tanaari jɔre diibiri n wo, na ma ma nɔɔ ka bu fa sɔno n bra.

¹⁸ Saŋga bo bu yasu jinaari na bu jaraki i ni, ba kan má satie bo má m sunsun ka wo yo i na bu fa jaraki i ni.

¹⁹ Ama, i ti akuruwa ye bu seeri a, fa kɔ bu nyemɛsu atin su, ni sɔno be bo bu fere i ka Yesu n busu, bu ŋa wo wu, ama, Pɔɔlu ŋa i toko la ŋɔɔ.

²⁰ Ma si má kabo m tara ahin jɔre n tii ni i jaa barasu, na ma bisa Pɔɔlu ka, i koro ka ya fa i kɔ Yerusalem na bu kɔ di i jɔre n do, nzen se?

²¹ Ama, na Pɔɔlu asere ka, i koro ka i ka dansaraka n nu haari i ba kɔ Romafom femɛ kpiri n do. Nyini ti, na ma ma nɔɔ ka bu subita i haari m ba nya atin na m ma bu fa i kɔ femɛ kpiri n do.”

²² Na Femɛ Agiripa ase Gomina Fesitosi ka, “M koro ka mini ni m tii ti ahin sɔno n jɔre ni.” Na Gomina Fesitosi ase i ka, “Ahunma a tí i jɔre ni.”

²³ Tɔ, na i alecin, na Femɛ Agiripa, ni Berenisi afite ni bu femeya jirima bambaka, na bu ba wura tientienbunɔɔ sɔɔ bambaka n nu, bu ni soja nkpienkpienm, ni miɛ n nu mine anyunuyifom. Na Gomina Fesitosi ama nɔɔ, na ba fa Pɔɔlu awura.

²⁴ Na Gomina Fesitosi ase ka, “Ya si Femɛ Agiripa, ni amberɛ kere bo am atien am nɔɔ fen ni, am niɛ ahin sɔno ni. Yiri dœe ti ma Yudafom kere bo bu wo Yerusalem, ni bo bu wo fen n yo baari m do a, na bu sutientien ka i ti má ye ni ka i wo ni ŋɔɔ.

²⁵ Ama, m gusu afiiti i jɔre n nu, ma ŋu má i ŋgasi bo wo do i na i ti ye ni ka i wu. Nyini ti, kabo yiri ni i tii asere ka m fa i jɔre n kɔ Romafom femɛ kpiri n do ni, m fá i kɔ do ɔ.

²⁶ Ama, m la má deke be tenle su bo m kere fa ma femɛ kpiri ni, fa kɔ ahin n jɔre n su. Nyini ti ye ma fa i aba wɔɔ Femɛ Agiripa do a, adena m ni amberɛ kere niɛ i jɔre n nu, na m si deke bo m kere kɔ ma femɛ kpiri ni.

²⁷ Dama mini do, wo kɔ má atin su ka m fa sɔno bo ba nyi i dansaraka kɔ ma femɛ kpiri n na m la má jɔre bo m kan kere i fa kɔ deke n bo i ti na bu jaraki i n su.”

26

Kabo Pɔɔlu kaanri i jɔre Femɛ Agiripa nyunu ni

¹ Na Femɛ Agiripa ase Pɔɔlu ka, “Atin wo nu ka wɔɔ ni u tii jɔɔ.” Na Pɔɔlu aye i saa su, na wo bo i jɔre n bu, i ŋa,

² “Femɛ Agiripa, wo yo m fie nyuma ka m jina u nyunu, na m kan m jɔre n nahɔre su fa kɔ deke n kere bo Yudafom jaraki m n su.

³ Dama wɔɔ ni u tii asi kabo Yudafom nana sayoowam n ti, ni kabo ya se bu akuruwam barasu ni. Nyini dœe ti, m sere u wo, ka a fa sawɔre na a ti m jɔre ni.

⁴ Yudafom kere si kabo m woowa yo ti barasu fite m gbefeneya nu, sangha bo m wo m bosufom nu ni, haari ni bo m ko woori Yerusalem mie kpiri n nu ni.

⁵ Bu si m sa kabo m woowa yo ti, ma nyuma. Nzen bu na bu kan nahore, bu se u ka m yo ti Farasifom be wo, na ma su ya dee nyini atin n bo i su ti kekereke n su ni anyumboro.

⁶ Kisa, deke bo i ti na m jina am nu nyuma na am sudi m jore ni, yiri la tama n bo m la i fa ko deke n bo Nyeme seeri ka i yo ma ya nam ni.

⁷ Nyini n ye ya ano buru ni nnyo n bo ya su Nyeme ni anyumboro wiesu ni kongue n nminda ka ya nya i n a. Feme, ti fen, nyini tama n bo m la i n dee ti, ye Yudafom jaraki m n a.

⁸ Nzu ti ye am de ma ka Nyeme koro tenge minem bu yiwee nu a?

⁹ Nahore mini ni m tii yo sunsuunri ka wo yo daka ka m yo sam dongu na m saaki Yesu Nazaretifo n duma.

¹⁰ Kabo m yo yoori Yerusalem lee. Nyeme sayoowa donguyofa nkpienkpienm yo maari m yiko, na ma tara Nyeme minem beberebe anyi bu dansaraka, na sangha bo bu diiri bu jore na bu na bu kun bu ni, mini mmoo jina bu sin wo.

¹¹ Sangha kere sangha, m nati wura ya tientienbunoo soom nu wo, na m sucin bu sui, na m sumie bu ka bu kete Yesu. Na ma fa yaa bu nu agaya, haari na m sukoo mie nyingam su, ko sukere bu wuwuruwa.”

Kabo Pɔɔlu kaanri kabo i kaakiiri i wo ni

¹² Na Pɔɔlu asa su ase ka, “Nyini dee ti, na ma sere atin Nyeme sayoowa donguyofa nkpienkpienm n do, na ba ma m yiko ka m ko Damasiko mie kpiri n nu.

¹³ Feme, ti fen, m wo atin n nu wo ko su ni, fa ko wie kekete sangha, na ma nu sin be ka i fite angoro, i ta tara wie, na i wein ata abara aye m ni minem kere bo bu su m su ni.

¹⁴ Na yere kere akpaasi haari asiengu, na ma ti akonvi be nga, ka i sujoo m do Hiburu dee anie n nu, i na, ‘Soolu, Soolu e, nzu ti ye a kere m wuwuruwa so a? A sukere u nu yaari ngbeen wo, kabo bu fa toora dodoorifo sudo na i kete, na bu fin i baka n wo.’

¹⁵ Na ma bisa ka, ‘M Mibie, woro nma a?’ Na Mibie n abo nu ka, ‘Mini Yesu ye a sukere m wuwuruwa n a.

¹⁶ Ama, yasu jina. Deke n bo i ti na ma yi m nu akere u n la ka, m fa u yo m amuisufo, na a di m daani kere minem fa ko deke bo a nu i nyuma n su, ni dekem bo m ba yi m nu kere u bekun n su.

¹⁷ Na m de u tii fite minem saa nu, Yudafom ni bo bu ti ma Yudafom ni, dama m susunma u bere do a,

¹⁸ na a teke bu nyi, na a yi bu fite awosin nu ba wein nu, na a yi bu fite Sitana saa nu, na a fa bu wura Nyeme saa nu, adena bu yo m yarada na m fa bu satie ce bu, na bu nya jinaabiri Nyeme mine n nu, na bu kere sangha wo.’ ”

Kabo Pɔɔlu kaanri kabo i yoori i juma n ni

¹⁹ Na Pɔɔlu asa su ase ka, “Feme Agiripa, nyini dee ti ni, ma kete ma deke n bo Nyeme yi kereeri m ka alele nu dee su ni.

²⁰ Nyini ti, m du mo boori i bu Damasiko mie kpiri n nu wo, na ma kan akere bu ka bu kaaki bu wo na bu su Nyeme, na bu yo sakpa bo i kere ka ba kaaki bu wo. Na ma ko akan akere Yerusalemfom n gusu, na ma nya ako akan akere Yudiya dee aware n nu fom kere. Nyini sin, na ma ko akan akere minem bo bu ti ma Yudafom n gusu.

²¹ Nyini dɛɛ ti, ye Yudafoɔm taraari m Nyeme Sereebiri Awuru n nu, ka bu kun m na.

²² Ama, Nyeme abuka m dɛɛ ti, ye m toko wo bere haari ni nyuma na, adena m jina fen di daani kere nfangafom ni tarakam kere, ni mine barasum kere. M sukan ma jore fofore be wo, ma ka sam bo Nyeme noanie kanfom ni Moyisi yo seeri ka bu yo ni,

²³ ka, wo yo daka ka Kristo, Tiidfoɔ n bo Nyeme ase ka i sunma i ni ba di wahara. Yiri ti sono bo i wu na i du mo tenge i yiwee n nu a. Na i kan wein n jore kere Yudafoɔm, ni minem bo bu ti ma Yudafoɔm n kere.”

²⁴ Pɔɔlu wo nyini jɔjɔri n su na i kan i nahore ni, na Gomina Fesitosi atien i nu kpa, i na, “Pɔɔlu, a bo fie wo. U kara sonson ni u si agaya n ma u tii yo ma juma.”

²⁵ Na Pɔɔlu abo i nu ka, “Gomina Fesitosi jirimafo, ma bo ma fie, ama, m jɔjɔ anyunkoro ni nahore jore wo.

²⁶ Feme Agiripa si ahin jorem kere, nyini dɛɛ ti, ye m la ahoresi jɔjɔ i nyunu na. M si tenle su ka i si ahin sam n kere bo m sukan kere am ni, dama i be mmoo ayo ma fiɛwa nu.

²⁷ Feme Agiripa, a yo Nyeme noanie kanfom jore n yarada a? M si tenle su ka a yo yarada.”

²⁸ Na Feme Agiripa ase Pɔɔlu ka, “Ahin sangka kaan nu, a sunsun ka a koro jɔjɔ na a ma m kaaki Kristo susufo o, nzen se?”

²⁹ Na Pɔɔlu abo i nu ka, “Nzen i ce o, i ce ma o, mini yiri, m nyemesere la ka, woro ni minem n kere bo m sujɔjɔ am do nyuma ni, am ba kaaki na am yo kabo m ti barasu ni, ama, bu wura ma am joroko kabo ba wura m ni.”

³⁰ I seeri so ni, na feme n ayasu ajina, yiri ni gomina ni, ni Berenisi, ni nyingam n kere bo bu tana bere ni.

³¹ Bu yasuuri na bu wo ko su ni, na ba se bu nuju nu ka, “Ahin sono n ayo ma sa be bo i ti ye ni ka bu kun i, wara bu nyi i dansaraka nu.”

³² Na Feme Agiripa ase Gomina Fesitosi ka, “Nzen ma ahin sono n asere ma ka bu fa i jore n ko Romafom feme kpiri n do, ma ya koro yaki i nu ji.”

27

Kabo bu faari Pɔɔlu sufa ko Roma mie kpiri n nu ni

¹ To, sangka bo bu faari sese su ka ya fa lee bambaka ko Roma mie kpiri n bo i wo Itali n asien n su ni, na ba fa Pɔɔlu ni dansaraka nyinga nbem ama soja kpien be bo bu fere i ka Juliyosi ni, yiri nie soja asese be su a, bu fere i ka Romafom Feme Kpiri Agusito dɛɛm.

² Na ya ko awura lee bambaka be, i fite mie n bo bu fere i ka Adaramuteno n wo. Lee n ayo siriya sukɔ Esiya awore n nu dɛɛ mie nbem su, na ya wura i ako. Yere ni sono be bo bu fere i ka Arisitakusi n koori a, i fite Tesalonika mie kpiri n bo i wo Makedoniya awore n nu wo.

³ Na i alecin, na ya ko aju Sidon mie kpiri n nu, na Juliyosi ayo Pɔɔlu sakpa, i maari i atin wo, na wo ko anie i danfom busu, adena i ko nya deke bo i koro.

⁴ Ya yasuuri Sidon ka ya ko ni, ya faari Sipurusi lui bambaka n dɛɛ bue n wo, ya koro fa ma deke bo ma ya sukoro ka ya fa ni, dama anuma n cin ya ko ya sin wo.

⁵ Ya yasu bere ni, na ya kpie tieku n bo i wo Silisiya, ni Pamfiliya dɛɛ aworem n nu ni, na ya nya ako aju mie kpiri n bo bu fere i ka Mira na i wo Lisiya dɛɛ awore n nu ni.

⁶ Dɔ na soja kpiɛn n aɲu lee bambaka be ka i fite Alekizanderiya mie kpiri n nu sukɔ Itali, na wɔ fa ya awura nu.

⁷ Ya yasuuri bɛɛ ka ya kɔ ni, aɲuma n kpa ya atin wɔ, ya koro ako má ndende. I yoori kekereke ye ya nya kɔ dodoori mie n bo bu fere i ka Kinidosi n a. Aɲuma n dɛɛ ti, ya koro ako má deke bo má ya sukɔ ni. Nyini dɛɛ ti, na ya fa lui bambaka n bo bu fere i ka Kereti dɛɛ bue ni, akpiɛ ako adodo mie n bo bu fere i ka Salamone ni.

⁸ Ya faari bɛɛ ni, i yoori ya kekereke ye ya nya kɔ juuri mie kpiri n bo bu fere i ka Dika Nyunyumi n a, lee ngbingbirim jinaabiri ni, i mata mie kpiri n bo bu fere i ka Lasiya n wɔ.

⁹ Na ya wo dɔ aɛɛ, haari na Yudafoɔm nɔɔ cici n aba asin, bu ɲa nyini sangga ni, tieku n su natiiri ti tie. Nyini dɛɛ ti, na Pɔɔlu abɔɔ bu, i ɲa,

¹⁰ “Njam, ma ɲu ka nzen ya ɲa ya kɔ ya nyunu, i yó kekereke, na deke dɔngɔ sáaki, má lee bambaka n ni nengem ɲgumi, ama, ya ɲgɔɔ mmɔɔ wo nu.”

¹¹ Ama, haari ni nyini mmɔɔ, soja kpiɛn n keteeri Pɔɔlu nɔaniɛ n wɔ, na wɔ de leekanfo n ni lee n fo n dɛɛ nɔaniɛ ni.

¹² Deke bo ya wo ni, i ti má kpa ka ya wo dɔ haari fufuku ba tu ya, nyini dɛɛ ti, na ya dɔngɔ asoro su ka ya yasu dɔ, na ya niɛ, beni, ya koro kɔ ju mie kpiri n bo bu fere i ka Foniki n su na i wo Kereti lui bambaka n su ni. Lee ngbingbirim jinaabiri wo dɔ ɔ, i nɔɔ wɔ wiɛ atɔɔri dɛɛ bue n wɔ, ya koro kɔ wo dɔ, haari na fufuku n ba sin.

Kabo aɲuma bambaka be yasuuri tieku n nu ni

¹³ Na aɲuma fafari be sukpiɛ fite ya nyunu ndiema bie su. Na ba sunsun ka bu koro kɔ deke bo ba fa bu tii awɔ ni. Nyini dɛɛ ti, na ba cin atu bulaari n bo bu fa kpamaari lee ni, na ya san tieku n ahɛmɛ ako adodo Kereti lui bambaka n dɛɛ bue ni.

¹⁴ Ama, wɔ ɛɛ má, na sɔɔ sin aɲuma be bo i nati kpiɛ fite wiɛ afiri saa fɔmbɔɔ su n akpiɛ faɲga su afite Kereti dɔ.

¹⁵ Ya kpa aɲuma n atin wɔ, ya koro ako má deke bo ya fa ya tii awɔ ni. Nyini dɛɛ ti, na ya yaki lee bambaka ni, na wɔ su aɲuma n su.

¹⁶ Na ya kɔ adodo lui be bo bu fere i ka Kawuda ni, na ya fa i sin. Lee kaan be sa lee bambaka n su, i yoori kekereke ye ya nya koro taraari i jinaari a.

¹⁷ Na ba nya acin i afun awura lee bambaka n nu. Na ba fa nyama awura lee bambaka n bu, na ba cici i kenken, na i bu n ayo faɲga. Bu soro sɛɛ ka lee ni kpama tɛtɛkɛ n dika wɔ, mie kaan be wo bɛɛ, bu fere i ka Siritisi. Nyini dɛɛ ti, na ba jura lee tani n bo i bo aɲuma na lee n kɔ ni, na ba nyanya i, na lee n asu aɲuma n su.

¹⁸ Kabo aɲuma n kereeri ya wahara sɔ ni, i alecin, na ba yiɲi nengem bo bu wo lee n nu ni nbem ajiji nzue n nu.

¹⁹ I lesan ɛɛn, na bu kɛɛ afa bu saa ayi lee n dɛɛ nengɛ kɛɛ aji nzue n nu.

²⁰ Na wɔ ɛɛ bo ya ɲu má wiɛ, wara asarambaam, na aɲuma n sukpiɛ agaya sɔ, haari na ya ba ayi tama ka ya fite má nu.

²¹ Tɔ, wɔ ɛɛ bo minem n adi má diire n dɛɛ ti, na Pɔɔlu ayasu ajina bu afiɛn, na wɔ se bu ka, “Njam, nzen má am tiiri m nɔaniɛ ni, má ya yasu má Kereti, má ya nengem ni saaki má, na bu ka ɲgbeɛn sɔ.

²² Ama, kisa, m sutu am fo ɔ, am ma am ahoresi. Am be mmɔɔ ɲgɔɔ ká má nu, má ka lee bambaka ni ɲgumi saaki a.

²³ Dama anuma kɔngue, Nyemɛ n bo m su i na i dɛɛ la m ni, i mɛɛke be ba jinaari m bi,

²⁴ na wɔ se m ka, ‘Pɔɔlu, má a ma sɛɛ ti u. Wɔ yo daka ka a kó jina Romafɔm fɛmɛ kpiri n nyunu wɔ, na i dí u jɔɛ. Ti fɛn, Nyɛmɛ afa minɛm kɛɛ bo u ni bɛɛ saŋga wo lee n nu n ama u.’

²⁵ Nyini ti, njam, am fa ahoresi. Dama m daafi Nyɛmɛ ɲu ka i yó kabo i seeri m n wɔ.

²⁶ Haari ni nyini mmɔɔ, aɲuma ni sún ya kɔ jina lui bambaka be su wɔ.”

²⁷ Tɔ, i bita ya fikindi Adiriya tieku n nu sɔ ɔ, haari i leburu lenna cɛɛn kɔŋgue fa kɔ i jinanjin saŋga, na lee jumayofɔm n afa nu ka bu sudodo asiɛn.

²⁸ Nyini ti, na ba fa nyama bo bu bita sunsun niɛ kabo nzue ɲɔŋɔ ti barasu. Na ba ɲu ka i toko wo ɲɔ. Na ba kɔ mɔ kaan abuka su, na ba sunsun bekun, na ba ɲu ka i wo má ɲɔ kun.

²⁹ Na sɛɛ ati bu, bu sunsun ka lee bambaka ni kó si yabuɛm wɔ, na i sandi nu, nyini dɛɛ ti, na ba cɔɔndi lee n sin bulaari nɔnɔɔri nna asiɛŋgu. Na bu susere Nyɛmɛ ka ale cin bu.

³⁰ Na lee jumayofɔm n akoro ka bu wɔ ɲmati, na ba yi lee kaan n afa ase nzue n su, na ba kpiɛ mbenɛ ka bu suyi bulaari nɔnɔɔri nbem lee bambaka n tii dika a.

³¹ Ama, na Pɔɔlu ase soja kpiɛn n ni i sojam ni ka, “Má ka ahin minɛm n aka lee n nu, am be mmɔɔ fite má nu.”

³² Na sojam n akpiɛ nyamam bo bu bita lee kaan n aji, na wɔ kɔ.

³³ Saŋga bo ale ba sukoro cin ni, na Pɔɔlu asere minɛm kɛɛ ka, bu nya diire be di. I ɲa, “I nyuma leburu lenna lɛɛ, bo am wo ahoresaaki nu, na am adi má pui.

³⁴ Nyini ti, m sere am wɔ, am di diire, adena i buka am na am nya ɲɔɔ. Haari am be mmɔɔ tiɲmie kun n kpein ká má ɲɔbɛɛn.”

³⁵ Pɔɔlu seeri sɔ wieeri ni, na wɔ fa kɔnɔ, na wɔ da Nyɛmɛ asi bu kɛɛ nyunu, na wɔ bu i nu, na wɔ di.

³⁶ Na bu kɛɛ afa ahoresi, na bɛɛ gusu adi diire.

³⁷ Yɛɛ bo ya yo woori lee bambaka n nu ni, ya ti mine yaa nnyɔ ni mine aburaso ni nɛɛn wɔ.

³⁸ Bɛɛ kɛɛ diiri na bu kunnu yiiri ni, na ba sasa diire mbaa n bo wɔ ka n aɲɔ nzue n nu, adena lee bambaka n ka fafaki.

Kabo lee bambaka n sandiiri nu barasu ni

³⁹ Saŋga bo ale ba ciinri ni, lee jumayofɔm ɲuuri asiɛn be, ba si má i, ama, na ba ɲu ka nzue be ati ada bɛɛ, ɲmie abara aye i. Na ba fa sunsunni ka nzen má bu koro yo, na ba boro bu nyi na bu fa lee bambaka n kɔ wura ɲmie n nu na i kpama.

⁴⁰ Na ba nyanɲi lee bambaka n bulaari nɔnɔɔrim n aji nzue n nu, na ba nyanɲi bakam bo bu fa kan lee n dɛɛ nyamam ni, na ba ye tani n bo i wo lee n tii su n aɲɔro ka aɲuma n fa lee n kɔ, na bu sukan sukɔ ahɛmɛ.

⁴¹ Ama, na ba kɔ aju kunma kpiri saŋgaabiri, na ba wura ɲmie be nu, na lee bambaka n tii dika n aka akpama, wɔ koro akɔ má. Na nzue nyama ni subo lee ni, na wɔ paparakɔ i sin dika ni.

⁴² Na sojam n asɛɛ su ka bu kun dansarakam n kɛɛ wɔ, adena má be wie kpiɛ na i ɲmati kɔ.

⁴³ Ama, soja kpiɛn n koroori ka i de Pɔɔlu tii ji n dɛɛ ti, na wɔ kete bu ɲu ka má bu yo sɔ. Na wɔ ma nɔɔ ka, bo bu si nzue wie n kɛɛ, bu du mɔ ti to nu na bu wie kpiɛ kɛɛɛ su,

⁴⁴ na minɛm bo bu kaari n kɛɛ nya so baka sinsinm, ni lee buebuem n nu, na bu wie kɔ ju ahɛmɛ. Kabo i yoori na ya kɛɛ koro fiteeri nu, na pui ayo má be n lɛɛ.

28

Deke bo i yoori Pɔɔlu Malite lui bambaka n su n jɔɛ

¹ Saŋga bo ya fiteeri nzue n nu wieeri ni, na ba se ya ka bu fere lui bambaka n ka Malite.

² Na miɛ n nufɔm ade ya na ba yo ya sakpa agaya. Nzue suto na ayɛɛ wo bɛɛɛ n dɛɛ ti, na ba tɔɔ sin ama ya, na ya kɛɛ atun.

³ Na Pɔɔlu atientien yee nɔɔ agɔ sin n nu, jaa pumpuni wo yee n nu, na sin n waraŋgu awura i, na wɔ fite akan i saa aka asense su.

⁴ Miɛ n nufɔm ni ŋuuri ka woo n akan asense Pɔɔlu saa su sɔ ni, na ba se bu ŋuŋu nu ka, “Ahin sɔnɔ n ti sɔnɔ kunfɔ ɔ nahɔɛ su, haari ni bo wo koro afite n nzue n nu ni, i nyemɛ atin su, wɔ yo má daka ka i nyá ŋɔɔ.”

⁵ Ama, na Pɔɔlu akpisi woo n aji sin n nu, wɔ ŋu má yaari be.

⁶ Na minem n asunsun ka i cé má, i ŋunɛ wúra a, wara i kába kpaasi wu. Ama, bu ŋminda cɛɛri na bu ŋu má ka deke be ayo i ni, na ba kaaki bu sunsunni, na ba se ka, “I ti nyemɛ be wɔ.”

⁷ Deke bo ya sekeeri ni, fie be wo dodo dɔ, i fɔ n ti lui bambaka n su sɔnɔ anyumbaafɔ ɔ, bu fere i ka Pubiliyosi. Na wɔ de ya wɔfɔ nyunyumi, na ya ka ada i dika haari lesan.

⁸ Nyini saŋga Pubiliyosi si gusu la má laifiɛ, i da sɔɔ, i ŋunɛ ado, na i suje tɔtɔkɔ. Na Pɔɔlu awura sɔɔ n bo i da nu ni, na wɔ fa i saa anana i ŋu, na wɔ sere Nyemɛ ama i, na wɔ nya laifiɛ.

⁹ I yoori sɔ n dɛɛ sin, na tukpakifɔm kɛɛ bo bu wo lui bambaka n su n gusu aba Pɔɔlu dɔ, na wɔ tuntun bu, na ba nya laifiɛ.

¹⁰ Na ba wura ya kpiri, na ba ce ya aceerim beberebe. Na saŋga bo ya ba suyasu ka ya fa lee na ya kɔ ni, na ba fa deke kɛɛ bo i ti ya miɛɛwa awura lee bambaka n nu ama ya.

Kabo Pɔɔlu yasu Malite na i kɔ juuri Roma miɛ kpiri n nu ni

¹¹ Ya woori dɔ haari sara nsan, na ya nya fa lee bambaka be bo i fite Alɛkizanderiya dɛɛ miɛ kpiri n nu wɔ. Amɔɛ ndaam anyaari seewa mata i. Fufuku saŋga n dɛɛ ti, wɔ jina dɔ ace.

¹² Na ya kɔ aju miɛ kpiri n bo bu fere i ka Sarakusasi n su, na ya wo dɔ lesan.

¹³ Na ya nya akaaki ayasu bɛɛɛ bekun, akɔ aju miɛ kpiri n bo bu fere i ka Regiyoni n su. Na i alecin, na aŋuma abo i bu sukpiɛ fite ya nyunu ndiema saa biɛ su. Na i lennyɔ cɛɛn n na ya kɔ aju miɛ kpiri n bo bu fere i ka Potiyoli n su.

¹⁴ Na ya ŋu yaradayofɔ nbem dɔ, na ba sere ya ka ya wo bu dɔ lesa. Na ya nya yasu aba Roma miɛ kpiri n nu.

¹⁵ Saŋga bo yaradayofɔm n bo bu wo Roma n tiiri ya ŋga ka ya suba ni, na ba fite akpa ya atin, na ya ni bu nbem akɔ ayɛ miɛ n bue bo bu fere i ka Apiyɔsi Gɔɔ n su, na ya ni bu nbem gusu akɔ ayɛ Wɔfɔm Daabiri Awuru Nsan miɛ n nu. Saŋga bo Pɔɔlu ŋuuri bu ni, na wɔ da Nyemɛ asi, na wɔ nya ahoresi.

Kabo Pɔɔlu kaanri Yesu jɔɛ Roma miɛ kpiri n nu ni

¹⁶ Saŋga bo ya kɔ juuri Roma miɛ kpiri n nu ni, na ba ma Pɔɔlu atin ka i nya awuru be na yiri ni i tii suwo nu, na ba ma i soja kun ka i sunɛ i dika.

¹⁷ I woori dɔ i lesan, nyini sin, na Pɔɔlu afere Yudaɔm bo bu la anyunuyi na bu wo miɛ n nu ni, ka bu tien bu nɔɔ. Bu tien bu nɔɔ wieeri ni, na wɔ se bu ka, “M ninbaam, ma yo má ya minem n sa be, ma bu má ya nana

sayoowa n be ngbɛɛn, ama, haari ni nyini mmɔɔ, bu taraari m Yerusalem miɛ kpiri n nu wɔ, na ba nya afa m awura Romafɔm saa nu.

¹⁸ Bɛrɛ gusu bisaari m bisaawam wieeri ni, má bu ɲa bu fa m ji wɔ, dama ba ɲu má satie bo ma yo i na i ti ye ni ka bu kun m.

¹⁹ Ama, na Yudafɔm n akete ka má Romafɔm n yaki m nu ji, na wɔ yo daka ka m sere ka bu fa m jɔrɛ n kɔ Romafɔm fɛmɛ kpiri n dɔ, haari ni bo m la má jɔrɛ be bo m fa jaraki m tienɲu minɛm ni.

²⁰ Nyini dɛɛ ti, ye m fere am a, na m jɔjɔ am dɔ na am si bo i wo bɛrɛ, ka, sɔnɔ n bo Yisarelifɔm yo i tama n dɛɛ ti, ye m wo ahin jɔrɔkɔ n nu a.”

²¹ Na ba se ka, “Ya nya de má kadasi be Yudiyafɔm dɔ fa kɔ u jɔrɛ su. Ya minɛm bo bu fiteeri dɔ baari n gusu, be nya kan má, wara i jɔjɔ jɔrɛ tie be fa kɔ u dɔ.

²² Ama, ya koro ka ya ti fite u dɔ kabo u sunsunni ti, dama ya si ka nyini atin n bo a bita i ni, deke kɛrɛ bo a kɔ, mine jaraki i wɔ.”

²³ Na ba kpama cɛɛn ka bu tien bu nɔɔ. Nyini cɛɛn n na mine beberebe aba atien bu nɔɔ deke bo Pɔɔlu da ni. Na wɔ kan akere bu kabo Nyɛmɛ fɛmɛya n atin ti barasu. Fite ngarama haari kɔɲɲɛ, na wɔ boro i nyi na i ma bu si kabo Yesu ti barasu, fite kabo ba kɛrɛ i Moyisi dɛɛ nɔɔniɛ kpamaawa kadasi n nu ni, ni kabo ba kɛrɛ i Nyɛmɛ nɔɔniɛ kanfɔm dɛɛ kadasi n nu ni.

²⁴ Na bu nbem ade i nɔɔniɛ ni, ama, na nbem akete, ba yo má yarada.

²⁵ Nyini ti, bu nɔɔ ayo má kun, na ba yasu ka bu kɔ awuru, na Pɔɔlu ase bu jɔrɛ kun be abuka su, i ɲa, “Nahɔrɛ ye Nyɛmɛ Awiewie Casi n jɔjɔri am jɔrɛ n a. I yo maari Nyɛmɛ nɔɔniɛ kanfɔ Esaya seeri am nam ka,

²⁶ ‘Kɔ na a kɔ se nyini minɛm ka, Nyɛmɛ ɲa o,

Am só am sui ni nahɔrɛ su,

ama, am tí má deke bo am so am sui ka am ti i n bu.

Am káaki niɛ ni nahɔrɛ su,

ama, am ɲú má pui.

²⁷ Dama ahin minɛm tii ti kekereke,

ba tɔ bu sui na má bu ti,

ba kata bu nyumbaa na má bu ɲu.

Má nyini, bu nyumbaa ɲú i wɔ,

na bu sui tí,

na bu sí bu ahɔrɛ su,

na bu káaki bu wo,

na m má bu nya laifie.’ ”

²⁸ Na Pɔɔlu akun i jɔjɔwa n nɔɔ, na wɔ se bu ka, “Nyini ti, m koro ka am si ka Nyɛmɛ asunma ya ka ya fa tiide labari kpa n kɔ ma minɛm bo bu ti má Yudafɔm ni. Bɛrɛ dé i a.” [

²⁹ Na Pɔɔlu kaanri sɔ wieeri ni, na Yudafɔm n ayasu afite akɔ ase akuruwa nyannyan bu ɲuɲu nu.]

³⁰ Na Pɔɔlu ade sɔɔ, na i sutɔ kaari, na wɔ wo nu haari afɔ nnyɔ, na i sude minɛm kɛrɛ bo bu ba i dɔ ni,

³¹ na i sukan Nyɛmɛ fɛmɛya n ɲusu jɔrɛ, na i sukere minɛm ya Mibiɛ Yesu Kristo jɔrɛ ni ahoresi, be akanda má i.

Pɔɔlu kadasi bo i kere fa maari ROMAFOM ni

¹ Mini Pɔɔlu sukere ahin kadasi n fa ma am a. M ti Yesu Kristo akɔɔ, ye wɔ fere m ka m kaaki i jaramasa, na wɔ yi m ka m kan labari kpa n bo i fite Nyeme dɔ n jɔre.

² Nyini labari kpa n ye Nyeme yo seeri ka i fá ma ya n a, na wɔ ma i nɔanie kanfom akere i nusu jɔre ase i jɔre kadasi n nu.

³ Nyini labari kpa n kere ya i Wa n jɔre wɔ, nzen ya nie i fa kɔ i adamande dɛ woowa su, bu yo wuuri i fiteeri Feme Davidi dɛ busu n nu n wɔ.

⁴ Ama, kabo Nyeme faari i yiko tengeeri i yiwee nu ni, nyini ma Awiewie Casi n kere ka i ti Nyeme Wa a, yiri la ya Mibie Yesu Kristo ni.

⁵ Yiri dɛ ti, ma di Nyeme ahɔroma, ye wɔ ma ma yo i jaramasa, adena i duma n dɛ ti, na m ma daanfie barasu kere de i nɔanie ni, na bu yo i yarada.

⁶ Ambere Romafom gusu, am wo nyini minem bo Nyeme afere bu n nu wɔ, ka am kaaki Yesu Kristo dɛ minem.

⁷ Tɔ, ambere bo am wo Roma mie kpiri n nu ni, ye m sukere ahin kadasi n ma am a. Ambere bo Nyeme koro am na wɔ fere am na am ayo i dɛ minem ni, ya Si Nyeme ni ya Mibie Yesu Kristo ma am wura bu ahɔroma nu na am nya ahoreda.

Kabo má Pɔɔlu koroori ka i kɔ nie Romafom busu ni

⁸ Ciciri su, Yesu Kristo dɛ ti, m da m Nyeme asi ma am kere, dama durunya n nufom kere ati kabo am ayo Yesu Kristo yarada ni.

⁹ Nyeme bo m su i ni m ahorembaa kun ni, na m kan i Wa n labari kpa n jɔre ni, yiri di m daani a, kabo m nati sere Nyeme ma am ni.

¹⁰ Saŋga kere m sere i wɔ, ka nzen i ti i dɛ koroyanu, i teke atin ma m kisa, na i awieeri su na m koro ba nie am busu.

¹¹ Dama m nyunu aboro ka m bá nɔ am wɔ, adena m fa aceeri n bo i fite Awiewie Casi n dɔ ba ma am na am koro jina faŋga kenken ni nyemesu ni.

¹² Nahɔre, i ti deke bo ya fa ma ya bengɔ na ya nya ahoresi wɔ, m ni ambere kere, kabo ya yo Yesu yarada n dɛ ti.

¹³ M ninbaam, m koro ka am si ka saŋga kere, má m koro ka m bá nie am busu wɔ, ama, m nya má atin. Má m koro ka m ba nya mine am nu ma Nyeme wɔ, kabo ma nya am bengɔ nbem bo bu ti má Yudafom ni.

¹⁴ Dama wɔ yo daka ka m yo sɔ ma mine barasu kere, bo bu nyunu ateke, ni bo bu nyunu ateke má, ni bo ba sɔnsɔn kara, ni bo ba sɔnsɔn má kara.

¹⁵ Nyini dɛ ti, ye m ahore abi ka m ba kan labari kpa n jɔre kere ambere gusu bo am wo Roma mie kpiri n nu n a.

Yiko bo i wo labari kpa n nu ni

¹⁶ Nyinse ti má m fa kɔ labari kpa n su, dama yiri ti Nyeme yiko bo i ma sɔnɔ kere bo i yo yarada n nya tiide a, bo bu ti Yudafom ni du mɔ a, na bo bu ti má Yudafom n nya tɔ su.

¹⁷ Labari kpa n kere kabo Nyeme de sɔnɔ ka i yo sa bo i kɔ atin su i dɔ a. Sɔnɔ kere bo i yo yarada, i fite i yaradayo n dɛ ti ye Nyeme de i mi ka i yo sa bo i kɔ atin su i dɔ a, na nyini ma i yarada n yo biiwa. Kabo ba kere

i Nyeme Jore Kadasi n nu ka, Nyeme na, “Sono bo i yo sa bo i ko atin su m do, i nya ngoo, i yarada n dee ti.”

Kabo adamande kere ayo satie ni

¹⁸ Nyeme wo angoro akere kabo wo fa yaa acin minem sui ni, bere bo bu sunsunni ti tie na bu yo satie ni, bu satie n dee ti, ba kete ka ma minem si Nyeme nahore su.

¹⁹ Deke bo i ti na wo fa yaa n la ka, ba nu deke n kere bo i ma bu si Nyeme ni, dama yiri ni i tii ayi i kpain afite fofoe nu.

²⁰ Fite sangha bo Nyeme yiiri durunya n ba juuri ni kisa, mine anu i woowa, i ti ma ka bu nyumbaa anu i kabo i ti barasu wo, ama, ba nu dekem bo wo yi bu ni. Nyini dekem ni kere ka i ti Nyeme nahore su a, ni kabo i la yiko bo i la ma awieeri ni. Nyini ti, be wo ma bere bo i koro se ka i si ma i.

²¹ Haari ni bo bu si i n kere, ba kete ka bu ma ma i jirima ka i ti Nyeme, na bu kaaki da ma i asi. Nyini dee ti, ye bu sunsunni kere aka ngbeen ye ngonle akpie bu su, ye bu ahorembaa ayo biri n a.

²² Bu bu bu nu ka bu ti ngonlefom wo, ama, bu ti sinnzinm wo.

²³ Jirima bo ma bu fa ma Nyeme bo i wo bere sangha kere ni, ba fa ama amom bo ba yo bu na bu ferema ni adamandem, ni lanjketefom, ni ajaannam, ni cinbukunnusufom wo.

²⁴ Nyini dee ti, ye Nyeme ayaki bu ye bu yo bu kunnu koroowa n a, na bu suyo dangba sam bu nu nu suwura bu nu nyinse.

²⁵ Dama ba kete Nyeme nahorefo ni, na bu nya susu kore su. Na bu su dekem bo Nyeme ayi bu ni, bu su ma yiri bo i yiiri deke n kere ni. Yiri dee la kansi sangha kere a. Ami.

²⁶ Ba kete Nyeme n dee ti, ye wo yaki bu a, na bu suyo nyinse sam kabo bu kunnu koro n a, haari na nbaram yaki nbiesom do daari, na bu sufa bu benghu nbaram da, na bu yo kabo ma wo yo ma daka ka bu yo ni.

²⁷ Na nbiesom n gusu yaki nbaram do daari, na bu la konviki agaya fa ko bu benghu nbiesom do, na bu ni bere sangha da ka bara ni bieso dee su. Nyini nyinse sam dee ti, ye ba nya suicin kabo wo yo daka ka bu nya i n a.

²⁸ Kabo ba kete ka bu si ma Nyeme ni, nyini ma wo yaki bu, ye bu sunsunni tie n ma bu yo sa bo ma wo yo ma daka ka bu yo i n a.

²⁹ Bu ahorembaa ayi ni satie barasu kere ngumi wo, bu konviki wura bu benghu nengem nu wo, na bu suyo bu bengum tie, na bu susi bu bengum kore, na bu sukun bu bengum, na bu sudi aluwa, na bu sudadaka bu bengum, na bu sukpo bu bengum, na bu sukan bu bengum jore,

³⁰ na bu susaaki bu bengum duma, na bu sukpo Nyeme, na bu sukpie bu bengum nzuko, na bu la karambani, na bu sufu, na bu susunsun kabo bu yo na bu yo satiem, na bu sukete bu wufom nanie,

³¹ na bu la ma ngonle, na bu yo ma sa bo ba se ka bu yo i ni, na bu koro ma minem, na bu si ma bu bengum anunfo.

³² Bu si kabo Nyeme akere ka, sono kere bo i nati yo so, wo yo daka ka i mi wu ni, haari ni nyini mmoo, bu toko yo nyini sam wo, ama, bo i ko tara i kere n la ka, bu jina mine bo bu gusu nati yo nyini sam ni sin wo.

2

Kabo Nyeme ba di sono kere jore barasu ni

¹ To, woro kere bo a kan nyini minem jore ni, a la ma kabo a yo na a kan fite nu Nyeme do. Dama jore n bo a kan jaraki u benghu na woro ni u tii yo nyini sam ni, nyini ma a kan jaraki u nu n a.

² Ya si kabo Nyeme di minem kere bo bu yo so n jore, na i jaraki bu ni, i jore diiwa n ti nahore wo.

³ Ye woro kere bo a kan minem n bo bu yo nyini sam n jore jaraki bu, na woro mmoo ni u tii yo so ni, a sunsun ka a koro fite Nyeme jore diiwa n nu, nzen se?

⁴ Kabo Nyeme ayo sakpa bambaka ama u na i la mindi ni sawore ni, nzu ti ye a bu i ngbeen a? A si ma ka deke bo i ti na i yoori nyini sakpa n la ka, i koro ka a kaaki u wo wo, nzen se?

⁵ Ama, kabo a yo u ahorembaa kekereke na a kete ka a kaaki ma u wo ni, a sukpini suicin ma u nu wo lee, ceen n bo Nyeme ba di minem jore nahore su, na i cin bu sui na sono kere nu i ni.

⁶ Na i to sono kere nkatoo kabo i sayoowa ti barasu.

⁷ Mine nbem dee la ka, bu mindi nati yo sakpa, na bu kpini kansi, ni jirima, ni anuniembaa bo i koroo ma n busu ni, bere ye Nyeme ma bu ngoo bo i la ma awieeri n a.

⁸ Ama, minem bo bu nati yo anyii sam, na bu kete deke kere bo i ko atin su Nyeme do, na bu su satie atin su ni, bere ye Nyeme fa yaa bu nu na i cin bu sui n a.

⁹ Minem kere bo bu nati yo satie ni, bu di wahara na bu nu anyumboro, bo bu ti Yudafom ni du mo nu nyini kekereke n a, na bo bu ti ma Yudafom gusu nya to su.

¹⁰ Ama, minem kere bo bu nati yo sakpa ni, Nyeme ma bu nya kansi ni jirima ni ahoreda, bo bu ti Yudafom ni du mo nya nyini deke kpam n a, na bo bu ti ma Yudafom n gusu nya to su.

¹¹ Dama Nyeme tambu ma nu.

¹² Minem kere bo bu la ma Nyeme noanie kpamaawa n na bu yoori satie, bu ka ngbeen, haari ni bo bu la ma Nyeme noanie kpamaawa n ni. Na minem kere bo bu la Nyeme noanie kpamaawa n na bu yoori satie, bere ye Nyeme fa i noanie kpamaawa n di bu jore, na i bo bu asi a.

¹³ Ma minem bo bu sui ti Nyeme noanie kpamaawa ni ye Nyeme de bu ka bu yo sa bo i ko atin su i do a. Ama, bo bu yo kabo Nyeme noanie kpamaawa n kere ni, bere ye Nyeme de bu ka bu yo sa bo i ko atin su i do a.

¹⁴ Minem bo bu ti ma Yudafom na bu la ma Nyeme noanie kpamaawa ni, ama, na bu yo kabo noanie n kere ni, bu sunsunni ni bu ahorembaa kpa n dee ti, bere ni bu tii akpama noanie ama bu nu lee.

¹⁵ Kabo ba de i so ni, nyini kere ka Nyeme noanie kpamaawa n wo bu ahore su a, na bu sunsunni gusu kere ka i ti so o, na i kaaki jaraki bu ka ba yo sa bo i ko ma atin su, wara i koro jina bu sin ka ba yo sa bo i ko atin su.

¹⁶ Nyini kere yo ceen bo Nyeme ma Yesu Kristo ba di adamande kere jore bo i wo asiri nu n wo. M labari kpa n bo m kan i kere mine ni, kabo m kere i lee.

Yudafom ni Nyeme noanie kpamaawa n jore

¹⁷ Amere bo am na am ti Yudafom, na am daafi Nyeme noanie kpamaawa n nu, na am fa fo ka am si Nyeme ni,

¹⁸ na am si kabo Nyeme koroowa ti, na am sunsun nyunyumi, na am yi sa bo i ti kpa, dama am asi Nyeme noanie kpamaawa n kere awie,

¹⁹ am yo am nu ka amere bita anyinsinm kpama a, na am ti wein ma minem bo bu wo awosin nu ni.

²⁰ Am na amere teke minem bo bu la ma ngonle nyi a, na am kaaki kere minem bo bu ti ka nbaatumam ni, dama am na am si Nyeme noanie

kpamaawa n dɛɛ ti, am sunsun ka am si ngɔnlɛ ni nahɔrɛ kɛrɛ bo i wo i nu ni.

²¹ Ambɛrɛ bo am kere minɛm ni, nzu ti ye am kere má am ɲu a? Ye ambɛrɛ bo am se minɛm ka má bu wɔ ni, am wɔ, nzen am wɔ má?

²² Am ɲa má be saaki ajaa ciire ni, ye am saaki i, nzen am saaki má i? Am ɲa am koro má amɔɛ jɔrɛ ni, ye am wɔ nɛngɛm amɔɛ sɔɔm n nu, nzen am wɔ má?

²³ Ambɛrɛ bo am bita Nyɛmɛ nɔaniɛ kpamaawa n fa fɔ ka am si i, na am su má i su ni, ambɛrɛ kaaki wura Nyɛmɛ nyinɛ a.

²⁴ Kabo ba kɛrɛ i Nyɛmɛ Jɔrɛ Kadasi n nu ni, ka, “Ambɛrɛ Yudafoɔm dɛɛ ti, ye minɛm bo bu ti má Yudafoɔm jɔjɔ wura Nyɛmɛ ɲgasi nu a.”

²⁵ Nzen am yo kabo Nyɛmɛ nɔaniɛ kpamaawa n kere ka am yo ni, nyini yiri, am kenkenne n bo am awura i n la kperɛ. Ama, nzen am yo má kabo nɔaniɛ kpamaawa n kere ni, i ti ka am awura má kenkenne lɛɛ.

²⁶ Nzen bo ba wura má kenkenne n yo kabo Nyɛmɛ nɔaniɛ kpamaawa n kere ka bu yo ni, Nyɛmɛ de bu ka ba wura kenkenne wɔ lɛɛ.

²⁷ Nyini ti, i sukere ka, bɛrɛ n bo ba wura má kenkenne na bu yo kabo Nyɛmɛ nɔaniɛ kpamaawa n kere ni, bu dí ambɛrɛ Yudafoɔm jɔrɛ jaraɲi am, dama am awura kenkenne na am la nɔaniɛ kpamaawa ni, ama, am yo má kabo i kere ni.

²⁸ Dama má Yudafoɔm bo ba wura kenkenne aɲuniɛmbaa su ni ɲgumi ti Yudafoɔm nahɔrɛ su a.

²⁹ Ama, sɔɔɔ bo i ti Yudafoɔ nahɔrɛ su la bo wɔ kaaki wo i ahorembaa su ni, na kenkenne wuraawa nahɔrɛ su fite ahorembaa su wɔ, Nyɛmɛ Awiewie ni kaaki sɔɔɔ a, má nɔaniɛ kpamaawa ni. Nyini sɔɔɔ sɔ, Nyɛmɛ kansi i a, má adamande.

3

¹ Tɔ, bo bu ti Yudafoɔm ni, bu la nzu kperɛ wɔ? Ye kenkenne wura buka nzu wɔ?

² Nahɔrɛ, Yudafoɔm tara minɛm bo bu ti má Yudafoɔm ni deke dɔɲgu nu. Cicipi su, Nyɛmɛ du mɔ faari i nɔaniɛm n wuraari bɛrɛ saa nu a, ka bu nie i su.

³ Ye nzen Nyɛmɛ fa wuraari bɛrɛ saa nu a, ye bu nbem ayo má yarada, nyini kere ka Nyɛmɛ la má dabuɲu lɛɛ, nzen sɛ?

⁴ Ai, má sɔ. Haari ni bo sɔɔɔ kɛrɛ ti kɔrɛfoɔm ni, Nyɛmɛ yiri ti i nahɔrɛfoɔ, kabo ba kɛrɛ i Nyɛmɛ Jɔrɛ Kadasi n nu ni, ka,

“Deke bo a kan ni, bu ɲú ka nyini ti nahɔrɛ a,
na nzen bu di u jɔrɛ jaraɲiiri u, a kúnma bu.”

⁵⁻⁶ Ye nzen ya satiem n bo ya yo bu n kere kabo Nyɛmɛ yo sa bo i kɔ atin su, na i cin ya sui, ya koro se ka wɔ yo má sakpa, nzen sɛ? Ai, má sɔ. Adamande sunsunni lɛɛ. Nzen Nyɛmɛ yo má sa bo i kɔ atin su, i yo se koro di durunya n nufɔm jɔrɛ a?

⁷ Be koro se ka nzen m bu kɔrɛ, na i ma minɛm ɲu kabo Nyɛmɛ nahɔrɛ ti barasu, adena bu ma i jirima, ye nzu ti ye i di m jɔrɛ cin m sui ka m ti satieyofɔ a?

⁸ I ti kabo mine nbem nati kan wɔ, bu ɲa, am ma ya yo satie adena Nyɛmɛ ba ma i kaaki sakpa. Bu kpie m nzuko ka mini mmɔɔ se sɔ sɔ. Bu bu kɔrɛ wɔ. Nyɛmɛ dí bu jɔrɛ na i cin bu sui.

Be wo má bɛrɛ bo i yo sa bo i kɔ atin su sanɲa kɛrɛ

⁹ Tɔ, ya se se wɔ? Yere bo ya ti Yudafom ni, ya tara bo bu ti má Yudafom n nzu nu wɔ? Ai, ya tara má bu pui, dama ma du mɔ ase am ka yere Yudafom ni, ni bo bu ti má Yudafom n kere ti satieyofom wɔ.

¹⁰ Kabo ba kere i Nyeme Jore Kadasa n nu ni, ka,
“Be wo má bere bo i yo sa bo i kɔ atin su, haari sɔnɔ kun n kpein mmɔɔ.

¹¹ Be wo má bere bo i la ngɔnle,
be wo má bere bo i nienie Nyeme busu.

¹² Sɔnɔ kere akaaki bu sin abo Nyeme dee atin ni, bu kere aka ngbeen,
be wo má bere bo i yo sakpa,
haari sɔnɔ kun n kpein mmɔɔ wo má bere.”

¹³ Ba kaaki akere ka,
“Bu konvi ti ka fanjunma bo ba teke i su wɔ,
na bu fa bu taferema sudadaka minem.”
“Na jore bo i fite bu nɔɔ nu yo ya ka pumpuni bore wɔ.”

¹⁴ “Nzukolee ni jore tie ngumi fite bu nɔɔ nu a.”

¹⁵ “Bu ce má na bu yi mine ngɔɔ ndende.

¹⁶ Deke kere bu kɔ, bu dee la ka bu yo minem ngbeenngbeen,
na bu saaki bu.

¹⁷ Bu dee la ka bu nati sukpini jore, bu koro má tanalaife.”

¹⁸ “Bu nyunu yi má Nyeme, nyini dee ti, bu soro má i.”

¹⁹ Ya si ka deke n kere bo ba kere i Nyeme noanie kpamaawa n nu ni, i jɔɔ ni Yudafom bo bu su i su n wɔ, adena má be koro teke i nɔɔ kan jore be, ama, durunya n nufom kere bá jina Nyeme nyunu na i dí bu jore na i cín bu sui.

²⁰ Dama be wo má bere bo i koro se ka i su noanie kpamaawa n su dee ti, ye Nyeme de i ka i yo sa bo i kɔ atin su i dɔ a, ama, noanie kpamaawa ni ma minem si ka bu ti satieyofom a.

Kabo Nyeme na sɔnɔ yo sa bo i kɔ atin su i dɔ ni

²¹ Ama, kisa Nyeme ayi akere ya kabo ya yo sa bo i kɔ atin su i dɔ, má yiri la bo ya su noanie kpamaawa n su ni, ama, yiri la bo noanie kpamaawa n ni Nyeme noanie kanfom diiri i nusu daani ka i yó n wɔ.

²² Yiri la ka, sɔnɔ kere bo wɔ yo Yesu Kristo yarada, yiri ye Nyeme na i yo sa bo i kɔ atin su i dɔ a, nyini ti, ya la má kpakpaakinu,

²³ dama sɔnɔ kere ayo satie afun Nyeme jirima woowa ni,

²⁴ ama, Yesu Kristo ade sɔnɔ kere tii aji, nyini dee ti ye Nyeme na sɔnɔ kere ayo sa bo i kɔ atin su i dɔ n a, i ti Nyeme aceeri wɔ.

²⁵⁻²⁶ Yiri Yesu ye Nyeme ma i deeru adamande jinaabiri n a, na wo fa i nu ayo yoowa na wo wu, adena nzen minem yoori i yarada, i mbunja n dee ti, Nyeme fá bu satie ce bu. Deke bo i ti na Nyeme yoori sɔ n la ka, i koro ka i kere kabo yiri ni i tii yo sa bo i kɔ atin su n wɔ, dama dawa sanja Nyeme yo laari sawore fa kɔ minem bo bu yo satie n dɔ. Ama, kisa wɔ kere ka yiri ni i tii yo sa bo i kɔ atin su wɔ, na sɔnɔ kere bo i yoori Yesu yarada, Nyeme de i mi ka yiri yo sa bo i kɔ atin su i dɔ a.

²⁷ Nyini dee ti, nzu deke ye ya koro fa fɔ a? Deke be wo má bere. Noanie kpamaawa ni ma minem yo sa bo i kɔ atin su Nyeme dɔ a, nzen se? Ai, má sɔ. Ama, bo minem yo Yesu yarada n dee ti a.

²⁸ Ya nie ka deke bo i kere ka Nyeme de sɔnɔ ka i yo sa bo i kɔ atin su i dɔ n la kabo wɔ yo Yesu yarada n wɔ, má ka i su noanie kpamaawa n su n dee ti a.

²⁹ I ti nahore wɔ, ka Nyeme ti má Yudafom ngumi Nyeme, i ti bo bu ti má Yudafom n gusu Nyeme wɔ.

³⁰ Nyeme ti kun wo. Yarada n deɛ ti, ye Nyeme ɲa Yudafoɔ bo ba wura kenkenne n yo sa bo i ko atin su i do a, ye minem bo bu ti ma Yudafoɔ na bu wura ma kenkenne ni, bu yarada ma Nyeme de bu ka bu yo sa bo i ko atin su i do a.

³¹ Nyini sukere ma ka ya yo Yesu yarada n deɛ ti, ya fa ma noanie kpamaawa n yo ma juma a. I ti ma so, ama, nyini ma ya bita noanie kpamaawa n kenken a.

4

Kabo Abraham yoori Nyeme yarada barasu ni

¹ To, am ma ya nie ya na Abraham jore. Ya busu nu, yiri ti ya kere na a.

² Nzen ma i sakpa yoowa deɛ ti ye Nyeme ade i ka i yo sa bo i ko atin su i do, ma i koro fa fo yanfoya, ama, Nyeme do, i ti ma so.

³ Dama ba kere i Nyeme Jore Kadasi n nu ka, "Abraham yoori Nyeme yarada, nyini deɛ ti ye Nyeme ade i ka i yo sa bo i ko atin su i do n a."

⁴ Nzen sono yo juma na ba to i kaari, i ti ma ka bu ɲa ba ce i aceeri wo, i ti i juma ni nkato o.

⁵ Ama, sono bo i yoori yarada, ma ka i sakpa bo wo yo i n deɛ ti ye Nyeme ade i ka i yo sa bo i ko atin su i do n a, ama, wo yo yarada ka Nyeme de satieyofa ka i yo sa bo i ko atin su i do n deɛ ti a.

⁶ Feme Davidi mmoo yo kaanri nyini minem ɲusu jore, ka i mi la terefie, dama Nyeme ade i ka i yo sa bo i ko atin su i do, ma ka i sakpa n deɛ ti a. I ɲa,

⁷ "Terefie wo bu do, minem bo Nyeme fa bu ɲgasi ce bu ni.

Terefie wo bu do, minem bo Nyeme kata bu satie su ni.

⁸ Terefiefo la sono bo Micera n ɲa i la ma satie be ni."

⁹ To, minem bo bu wuraari kenkenne n ɲgumi la nyini terefie ni, nzen se a? Ai, minem bo bu wura ma kenkenne ni mmoo la i. Dama ya du mo ase ka, Abraham yarada n deɛ ti ye Nyeme ade i ka i yo sa bo i ko atin su i do n a.

¹⁰ Saɲa bono ye Nyeme seeri so n a? Nyini saɲa Abraham awura kenkenne, nzen wo nya wura ma? Ai, nyini saɲa wo nya wura ma.

¹¹ Nyini saɲa n sin, ye i ba wuraari kenkenne n a. Na i kenkenne wurawa n kere ka i yarada n deɛ ti ye Nyeme deer i ka i yo sa bo i ko atin su i do, saɲa bo i nya wura ma kenkenne ni. I yoori so ni, adena yiri Abraham ba yo minem bo ba yo yarada n kere si, haari ni bo ba wura ma kenkenne ni, ye Nyeme ade bu ka bu yo sa bo i ko atin su i do n a.

¹² Yiri gusu kaaki ti minem bo ba wura kenkenne n si a, ma ka ba wura kenkenne n deɛ ti, ama, bo ba yo yarada kabo i yoori yarada saɲa bo i nya wura ma kenkenne ni.

¹³ Nyeme yo seeri Abraham ni i busu nufom ka i fa durunya n kere ce bu ni, ma ka i su Nyeme noanie kpamaawa n su deɛ ti a, ama, kabo wo yo Nyeme yarada n ti ye Nyeme deer i ka i yo sa bo i ko atin su i do a.

¹⁴ Nzen mine su Nyeme noanie kpamaawa n su ye bu nya deke n bo Nyeme seeri ka i ce bu ni, nyini la ka yaradayo n ti ɲgbɛɛn wo lee, na kabo Nyeme ase n gusu la ma kperɛ.

¹⁵ Nzen minem saaki noanie kpamaawa ni, nyini ma Nyeme fa yaa na i cin bu sui a, ama, nzen ma noanie kpamaawa be wo ma bere, ma deke be wo ma bere bo i kere ka sono ayo satie.

¹⁶ Nyini ti, deke bo Nyeme yo seeri ka i fa ma ni, i baari minem bo bu yo yarada n deɛ ti wo. I yoori so ni, adena deke n bo i yo seeri ka i yo

n yó aceeri kpama ma Abraham busu nufom kere, má bo bu su noanie n kpamaawa n su ngumi, ama, bo ba yo yarada kabo Abraham yoori ni. Yiri ti ya kere si a,

¹⁷ kabo ba kere i Nyeme Jore Kadasi n nu ni, ka, Nyeme na o, “M má a yo mine barasu dongu si.” Nyeme nuuri ka Abraham ayo yarada ka yiri Nyeme tenge minem bo ba wu n yiwee nu, na yiri ma deke n bo i yo wo má bere n wo bere a.

¹⁸ Nyini ti, sanja bo Abraham yoori yarada na i la tama ni, i ti kekereke na i yo tama ka i bá yo mine barasu dongu si, kabo ba kere i Nyeme Jore Kadasi n nu ka, “U busu nufom bá sunnu beberebe ni.”

¹⁹ Haari ni sanja bo wo ju afo yaa, na i si ka wo yo kpian ni, na i yi Saara ti noroka na wo yo buke n kere ni, i nunie ayoroki má i, i yoori yarada a.

²⁰ Wo yo má sika fa ko deke bo Nyeme seeri ka i yó i n su, ama, yarada n bo i yoori i n dee ti, na wo nya fanga na wo kansi Nyeme.

²¹ Na wo si tenle su ka Nyeme koro yo deke n bo i yo seeri ka i yó i ni.

²² Abraham yoori yarada a, nyini dee ti ye Nyeme ade i ka i yo sa bo i ko atin su i do n a.

²³ Kabo ba kere i ka, Nyeme ade i ka i yo sa bo i ko atin su i do ni, má Abraham ngumi dee ti ye bu kereeri i so a,

²⁴ ama, yere gusu dee ti ye bu kereeri so n a, yere bo Nyeme bá de ya ka ya yo sa bo i ko atin su i do n na ya yo i yarada ni, yiri bo i tengeeri ya Mibie Yesu i yiwee n nu ni.

²⁵ Ya satie dee ti ye Yesu wuuri a, na wo tenge i yiwee n nu, adena Nyeme de ya ka ya yo sa bo i ko atin su i do.

5

Kabo Nyeme ade ya ka ya yo sa bo i ko atin su ni

¹ To, ya yo yarada, na Nyeme ade ya ka ya yo sa bo i ko atin su i do ni, ye ya ni yiri afien ayo dongu a, ya Mibie Yesu Kristo dee ti.

² Yesu Kristo dee ti ma ya la atin jina deke bo ya wo kisa n a, yiri la Nyeme ahoroma n bo wo fa ama ya ni, na ya la ahorejo, dama ya la tama ka ya nyá Nyeme dee jirima woowa n be.

³ Na nzen ya gusu la ahorejo sanja bo ya di wahara, ya si ka wahara di ni ma ya mindi a.

⁴ Nzen ya la mindi, nyini ma ya la wo kpa a, nzen ya la wo kpa, nyini ma ya la tama a.

⁵ Na tama n bo ya la i ni, i ma ya di má nyinse, dama Nyeme afa i Awiewie Casi n ama ya, yiri ma ya si ya ahore su kabo Nyeme koro ya agaya barasu a.

⁶ Sanja bo ya la má fanga mmoo ni, nyini sanja n ye Kristo ba wu maari satieyofom n a.

⁷ I ti kekereke ka sono soro su na i to i ngoo na i wu ma sono bo i yo sa bo i ko atin su, ama, beni, be koro fa ahoresi na i soro su na i de sono bo i yo sakpa agaya jinaabiri na i wu ma i.

⁸ Ama, Nyeme yiri akere ya kabo i koro ya barasu, dama sanja bo ya toko yo satiem ni, ye Kristo ba wu maari ya a.

⁹ Nyini dee ti, i yiwee n bo i wu maari ya ni, ye Nyeme ade ya ka ya yo sa bo i ko atin su i do n a, nyini ti, i ti nahore wo ka i de ya fite suicin n bo Nyeme fá cin satieyofom ni.

¹⁰ Saŋga bo ya yo ti Nyeme kpofom ni, ye i wa Yesu wu maari ya n a, na wo yo ya ni Nyeme afien dongu, kisa na ya ni Nyeme afien ayo dongu ni, i de ya tii ji nahore su, dama Yesu la ngoo n dee ti.

¹¹ Ma nyini ngumi a, ama, ya la ahorejo na ya bo tuntun Nyeme ya Mibie Yesu Kristo dee ti, dama wo yo ya ni Nyeme afien dongu.

Adam ni Yesu Kristo jore

¹² Am ma ya tenge ya kere na Adam jore su. Yiri sono kun dee sa bo i yoori i ni faari satie baari durunya n nu a, ye satie n gusu faari yiwee ba kunnri sono kere n a, dama sono kere yo satie wo.

¹³ Satie yo woori durunya n nu ka, ye Nyeme nya ba faari i noanie kpamaawa n maari a, ama, saŋga bo Nyeme nya fa ma i noanie kpamaawa n ma ma ni, minem yo kan ma satie jore, dama noanie kpamaawa be wo ma bere n dee ti.

¹⁴ Ama, haari nyini mmoo, fite Adam saŋga n kere ko ju Moyisi saŋga ni, yiwee la yiko kun minem so o, haari ni bo ba yo ma satie kabo Adam yoori ni. Adam woowa kere ya deke be fa ko yiri n bo i ba ba n jore a.

¹⁵ Ama, aceeri n bo Nyeme afa ama ya ni, i ti ma ka Adam dee satie ni. Sono kun satie dee ti ye mine dongu wuuri a, ama, deke bo i tara i kere n la ka, mine dongu anya ahorama bambaka, i ti aceeri bo i fite Nyeme do o, sono kun ahorama dee ti. Yiri la Yesu Kristo.

¹⁶ Bekun, Nyeme aceeri n ti ma ka sono kun n dee satie ni, dama sono kun n dee satie ni, nyini ma Nyeme di mine jore cin bu sui a, ama, mine dongu satie bo ba yo i n dee sin, ye Nyeme ace bu aceeri a, na wo de bu ka bu yo sa bo i ko atin su i do.

¹⁷ Ya nu ka sono kun dee satie ti, ye yiwee la yiko kun mine so n a, yiri sono kun n satie dee ti. Ama, deke bo i tara i kere n la kabo mine anya ngoo adi femeya n wo, dama ba nya ahorama bambaka n bo i ti Nyeme aceeri ni, Nyeme ade bu ka bu yo sa bo i ko atin su i do a. I kere fite sono kun n dee ti wo, yiri la Yesu Kristo.

¹⁸ Nyini ti, kabo sono kun dee satie ti na Nyeme di minem kere jore cin bu sui ni, so bekun ye sono kun dee sakpayo ni ma Nyeme de minem kere ka bu yo sa bo i ko atin su i do na bu nya ngoo a.

¹⁹ Na kabo sono kun keteeri Nyeme noanie n na minem kere ayo satieyofom ni, so bekun ye sono kun gusu ade Nyeme noanie n a, nyini ye Nyeme de minem kere ka bu yo sa bo i ko atin su i do a.

²⁰ Nyeme faari i noanie kpamaawa n kereeri a, na mine si kabo satieyo asunnu barasu a, ama, deke bo satieyo sunnu, Nyeme ahorama n bo wo fa ama n sunnu tara so.

²¹ Nyini ti, kabo satie la yiko na i ma yiwee kun minem so ni, so ye Nyeme ahorama n dee ti, ye i de minem ka bu yo sa bo i ko atin su i do a, na bu nya ngoo bo i la ma awieeri a, ya Mibie Yesu Kristo dee ti.

6

Yesu Kristo dee ti ya la ngoo

¹ To, ye ya se se wo? Ya koro ko su suyo satie, adena Nyeme ahorama buka su, nzen se?

² Ai. I koro yo ma so. I ti ka ya ti minem bo ba du mo awu wo, fa ko satie su. Ye nzu ti ye ya toko yo satie bekun a?

³ Am si ma Nyeme nzue n bie n bu wo? Yere bo bu bieeri ya Nyeme nzue ni, ya ni Yesu Kristo ayo kun lee, na ya ni yiri asaŋga awu yiwee kun lee.

⁴ Saŋga bo bu biɛeri ya Nyeme nzue ni, i ti ka ya ni Yesu asaŋga awu, na ba kaaki ase ya ni yiri wo lɛɛ. Na kabo ya Si Nyeme Yikofɔ n tengeeri Yesu i yiwee nu ni, so ye i má ya gusu nya nyini ngoo fofore n a.

⁵ Ya ti kabo i ti n wo, saŋga bo i wuuri ni, so ye wo yo daka ka ya bá ti kabo i ti n a, i yiwee tenge n nu.

⁶ Ya si ka, ya woowa dawa ni, ba saŋga akpama i ni Kristo i baka jaanu n su, adena má ya yo akoom fa ko satie su kun, dama anuniembaa n bo i yo satie n wo má bere kun.

⁷ Dama sono kere bo wo wu, wo de i tii afite satie nu lɛɛ.

⁸ To, kabo ya ni Kristo saŋga wuuri ni, so ye ya yo yarada ka ya ni yiri saŋga nya ngoo a.

⁹ Ya si ka Kristo tengeeri i yiwee n nu ni, i wú má kun, dama yiwee la má i nusu yiko kun.

¹⁰ Yiwee n bo i wuuri ni, i wuuri kpekun n kpein wo, na i yi satie, ama, ngoo n bo i la i ni, i wo Nyeme deɛ wo wo.

¹¹ So ye i ti ye ni ka ambere ni am tii si ka am awu fa ko satie su a, na am ni Yesu ayo kun, ye am la ngoo wo Nyeme deɛ wo a.

¹² Nyini ti, má am ma satie la yiko fa ko am nuniembaa n su, na am yo am kunnu koroowa.

¹³ Má am fa am nuniembaa be ma satie, na i kaaki deke bo i yo satie, ama, am fa am nu ma Nyeme ka minem bo ba tenge yiwee nu anya ngoo kisa, na am fa am nuniembaa n kere ma Nyeme na i fa am yo deke bo i yo sa bo i ko atin su.

¹⁴ Satie la má yiko fa ko am do, dama Nyeme noanie kpamaawa n nie má am su kun, ama, Nyeme ahorma ni nie am su a.

Minem bo ba kaaki sa bo i ko atin su akoom

¹⁵ To, nzu bekun a? Kisa, Nyeme noanie kpamaawa n nie má ya su kun, ama, Nyeme ahorma ni nie ya su a. Nyini ti, ya koro yo satie, nzen se? Ai, má so.

¹⁶ Am si ka nzen am faari am nu maari be na am deeri i mi noanie, am ti i mi n akoo o lɛɛ. Kabo i nya ti so ni, nzen am faari am nu maari satie, am ti satie akoo o, na am wú o lɛɛ. Ama, nzen am gusu deeri Nyeme noanie ni, i dé am ka am ayo sa bo i ko atin su i do o lɛɛ.

¹⁷ Saŋga be am yo ti satie akoom wo, ama, kisa ya da Nyeme asi ka Nyeme noanie n bo bu fa kereeri am, na am ade i ni am ahorembaa kere ni,

¹⁸ am ade am tii afite satie nu lɛɛ, am akaaki sa bo i ko atin su n akoom wo.

¹⁹ M fa adamande deɛ woowa, ye m fa kere kabo Nyeme ti a, dama am suti má i bu. Am yo fa am nuniembaa n be yoori dangba sam wo, ni satie barasum wo, nyini ma am saaki noanie kpamaawa n a, so ye kisa am fa am nuniembaam yo sa bo i ko atin su, nyini ma am yo Nyeme mine casim a.

²⁰ Saŋga bo am yo ti satie akoom ni, be mie má am ka am yo sa bo i ko atin su.

²¹ Satiem bo am yo yoori bu ni, nzu kpere ye am nyaari i a? Pui. Kisa, bu ti am nyinse wo, na i awieeri kere la yiwee wo.

²² Ama, kisa na am ade am tii afite satie nu, na am ayo Nyeme akoom ni, kpere bo am anya i ni, yiri la bo am ayo i mine casim ni, na i awieeri, am nya ngoo bo i la má awieeri ni.

²³ Dama satie nkato la yiwee wo, ama, Nyeme aceeri n bo wo fa ama ya n la ngoo bo i la má awieeri na i wo ya Mibie Yesu Kristo nu n wo.

7

Ajaa woowa kere kabo atin fofore n ti barasu a

¹ Tɔ, m ninbaam, m sujɔɔ amberɛ bo am si nɔaniɛ kpamaawa ni dɔ a. Am si má ka nzen sɔnɔ toko la ηɔɔ, ye nɔaniɛ kpamaawa n niɛ i su a? Ama, i nya wu wieeri, i koro niɛ má i su kun.

² Ya fa i ka, nzen bara aja, na i hun toko la ηɔɔ, nɔaniɛ kpamaawa n ma má atin ka i yaki i ajaa, ama, nzen i hun n nya wuuri, i la atin bo i koro kɔ ja biesɔ fofore.

³ Nyini ti, nzen i hun n toko la ηɔɔ na i kɔ jaari biesɔ fofore, bu fére i ka bara bo wɔ saaki ajaa ciire wɔ, ama, nzen i hun n awu ye i kɔ jaari biesɔ fofore, nɔaniɛ kpamaawa n ma i atin wɔ, wɔ saaki má ajaa ciire lɛɛ.

⁴ Tɔ, nyini ti, m ninbaam, i ti sɔ ɔ lɛɛ, amberɛ mmɔɔ dɔ. Kabo am ni Kristo ayo kun na wɔ wu ni, bu sanɔa kuunri am ni yiri wɔ lɛɛ. Nyini ti, nɔaniɛ kpamaawa n niɛ má am su kun, nyini ma am la atin na am kaaki be dɛɛm n a. Nyini la ka, am ti Kristo dɛɛm wɔ lɛɛ, yiri bo i tengeeri i yiwee n nu ni. Deke n bo i ti na i yo sɔ n la ka, ya koro yo sakpa ma Nyɛmɛ.

⁵ Sanɔa bo ya yo su ya adamande woowa su ni, ya koroowa la ka, ya sufa ya ηuniɛmbaam suyo satiem, nɔaniɛ kpamaawa n dɛɛ ti. Nyini satiem n awieeri la yiwee wɔ.

⁶ Ama, kisa, ya nya ya tii afite nɔaniɛ kpamaawa n bo i yo niɛ ya su ni, dama ya wu wɔ. Nyini ti, ya su Nyɛmɛ wɔ, ya su má atin dawa n bo i su nɔaniɛ kpamaawa n bo ba kere ase n su, ama, ya su Nyɛmɛ ni atin fofore n bo Awiewie Casi n afa ama ya ni su a.

Kabo nɔaniɛ kpamaawa n ma mine yo satie barasu ni

⁷ Tɔ, ye ya se se wɔ? Ya koro se ka nɔaniɛ kpamaawa n ti satie, nzen se? Ai, má sɔ. Nzen má nɔaniɛ kpamaawa n awo má bere, má m si má kabo satie ti. Dama nzen má nɔaniɛ kpamaawa n ase má ka, “Má a ma u konviki wura be dɛɛ nenɔe nu,” má m si má ka nzen u konviki wuraari be dɛɛ nenɔe nu, i ti satie wɔ.

⁸ Nɔaniɛ maawa n bo i seeri sɔ n dɛɛ ti, satie anya atin m ahore su, nyini ma m la konviki barasu barasu fa kɔ minɛm nenɔe nu n a. Nyini kere ka nzen nɔaniɛ kpamaawa n wo má bere, satie la má yiko, i ti ka deke bo wɔ wu wɔ.

⁹ Sanɔa be m yo la ηɔɔ ɔ, na m si má nɔaniɛ kpamaawa n jɔre, ama, sanɔa bo nɔaniɛ maawa n baari ni, na wɔ ye satie su m ahore su,

¹⁰ na ma wu. Na ma ηu ka nɔaniɛ maawa n bo má i ma ηɔɔ ni, mini dɔ, i faari yiwee baari a.

¹¹ Nɔaniɛ maawa n dɛɛ ti, ye satie anya atin awura m ahore su adadaka m, ye i kun m a.

¹² Nyini kere kere ka nɔaniɛ kpamaawa n ni i tii, ti deke kpa fite Nyɛmɛ dɔ ɔ, na nɔaniɛ maawa kun kun n kere ti deke kpa a, na i kere sa bo i kɔ atin su.

¹³ Nyini ti, nɔaniɛ kpamaawa n bo i ti kpa ni, wɔ ma ma wu wɔ, nzen se? Ai, má sɔ. Ama, satie fa nyini nɔaniɛ kpa n su wɔ, ye i ma m wu a, adena satie kere kabo i ti barasu nahore su, na nɔaniɛ maawa n ma minɛm si kabo satie ti deke tie agaya ni.

Woowa barasu nnyɔ bo i wo adamande nu ni

¹⁴ Ya si ka nɔaniɛ kpamaawa n ti awiewie jɔre wɔ, ama, mini yiri, m bita adamande dɛɛ woowa a, na m ti satie akɔɔ.

¹⁵ Sam bo m yo bu ni, m koro si má deke n bo i ti na m yo bu ni, dama deke n bo m koro ka m yo bu ni, m yo má nyini, ama, deke n bo m kpo bu ni, m yo nyini wɔ.

¹⁶ Nyini ti, nzen m yoori satie be, na m koro má i, ma soro su ka noanie kpamaawa n ti kpa wɔ lee.

¹⁷ Ma nu ka má m koroyanu ye m yo nyini satiem n a, ama, satie n bo i wo m ahore su ni ma m yo so a.

¹⁸ M si ka woowa n bo m bita i ni, i ti má kpa haari kaan so, i ti adamande woowa a, nyini ti, sakpayo wo m ahore su, ama, m koro yo má i.

¹⁹ M koro ka m yo sakpa, ama, m koro yo má i, satie n bo m koro má ka m yo i ni, m yo nyini wɔ.

²⁰ Satie n bo m yo bu na m koro má ka m yo bu ni, nyini la ka, má mini ni m tii yo bu a, ama, satie n bo i wo m ahore su ni yo bu a.

²¹ Ma nu ka nyini jore n ti nahore wɔ, ka, sanja kere bo m koro ka m yo sakpa, nyini sanja ye m yo satie a.

²² Dama m sunsunni ni m ahore su, m koro Nyeme noanie kpamaawa ni.

²³ Ama, ma nu ka noanie barasu be wo m nuniembaa n kere nu, nyini noanie tie n kun lue ni noanie kpamaawa n bo i wo m sunsunni ni m ahore su n wɔ, na i kunma m nuniembaa n kere nu, na i tara m nyi m.

²⁴ Oi. Mini anunfofo so. Nma de m tii ji a, na i yi m fite ahin adamande anuniembaa n nu a, bo i sucin m ko yiwee n nu, na m ka ngbeen n a?

²⁵ M da Nyeme asi, dama wɔ de m tii aji, ya Mibie Yesu Kristo dee ti.

Tɔ, mini do, m sunsunni ni m ahore su, m su Nyeme noanie kpamaawa n su wɔ, ama, m adamande dee woowa su, m su satie atin su wɔ.

8

Minem bo bu woowa ti kabo Awiewie Casi n koro ni

¹ Nyini ti, kisa, sono kere bo i ni Yesu Kristo ayo kun, Nyeme di má i jore cin má i sui.

² Dama Awiewie Casi n dee noanie kpamaawa n bo i ma ya ngoo, na i fite Yesu Kristo do ni, ade u tii aji, na wɔ yi u afite noanie kpamaawa n bo i ma a yo satie na a wu n nu ni.

³ Nyini noanie kpamaawa n la má fanja, dama adamande anuniembaa woowa n ayorki. Deke bo noanie kpamaawa n akoro ayo má i ni, Nyeme ayo i, yiri la bo i sunmaari i tienju Wa durunya n nu fen, ni anuniembaa bo i ferema ni adamande dee n bo i yo satie ni, na wɔ di satie bo i wo adamande nuni n nu n jore, na wɔ yo i ngbeen.

⁴ Deke bo i ti na Nyeme yoori so n la ka, adena ya yo sa bo i ko atin su kabo noanie kpamaawa n kereeri ni, dama yere, ya su má adamande anuniembaa woowa n atin su kun, ama, ya su awiewie n dee atin ni su a.

⁵ Minem kere bo bu su adamande anuniembaa woowa n atin su ni, bu sunsunni kere wo adamande sa koroowa su wɔ, ama, minem bo bu su Awiewie Casi n dee atin n su ni, bu sunsunni kere wo Awiewie Casi n jore su wɔ.

⁶ Bo i sunsunni wo adamande anuniembaa woowa n su, i mi wu o, ama, bo i sunsunni wo Awiewie Casi n jore su, i mi nya ngoo, na i nya ahoreda.

⁷ Dama sono kere bo i sunsunni kere wo adamande anuniembaa woowa n su ni, i mi ti Nyeme kpofo o, i de má Nyeme noanie kpamaawa ni, i koro de má i wɔ mmoo fieo,

⁸ na bo i su adamande dee anuniembaa woowa n su ni, i koro yo má sa bo i sun Nyeme nu.

⁹ Ama, ambere yiri, am su má adamande anuniembaa woowa n atin n su, am su Awiewie Casi n dɛɛ atin ni su a, dama Awiewie Casi n wo am nu n wɔ. Ama, sonɔ kere bo i la má Kristo Awiewie ni, i mi ti má Kristo dɛɛ.

¹⁰ Ama, ambere bo Kristo wo am dɔ ni, am nuniembaa n bá wu wɔ, satie dɛɛ ti, ama, Awiewie Casi ni ama am ngɔɔ, dama Nyeme dɔ, i de am ka am yo sa bo i kɔ atin su wɔ.

¹¹ Nahore su, Nyeme tengeeri Yesu i yiwee n nu, nyini ti, nzen i Awiewie Casi n wo am nu, haari am nuniembaa wuuri mmɔɔ, i tɛnge i kabo i tengeeri Yesu i yiwee n nu n wɔ, dama i Awiewie n wo am nu n dɛɛ ti.

¹² Nyini dɛɛ ti, m ninbaam, ya di kaari, má yere adamande anuniembaa woowa n su dɛɛ kaari, bo má ya fa su yere adamande anuniembaa woowa n atin su ni.

¹³ Dama nzen am su adamande dɛɛ anuniembaa woowa n atin su, am wú wɔ lɛɛ, ama, nzen am ma Awiewie Casi n bukaari am, na am yakiiri adamande anuniembaa woowa ni, am nyá ngɔɔ.

¹⁴ Minem kere bo bu ma Nyeme Awiewie n kere bu atin, bere ti Nyeme nbaam a.

¹⁵ Dama Awiewie Casi n bo am ade i ni, i yaki má am na am kaaki yo akɔɔm kun na am soro sere, ama, yiri ma am yo Nyeme nbaam a, na yiri ma am koro bo fere Nyeme ka, “*Abba*,” i bu la ka, “*M Si*.”

¹⁶ Awiewie Casi n ni i tii buka ya dɛɛ awiewie n ye i di daani ya ahore su se ka ya ti Nyeme nbaam a.

¹⁷ Kabo ya ti Nyeme nbaam ni, ya nyá deke n bo Nyeme ase ka i fá ma i minem ni, na ya ni Yesu Kristo gusu sanga nya deke n bo Nyeme ase ka i fá ma i minem n a. Nzen ya ni yiri sanga diiri wahara, ya ni yiri gusu sanga nya i jirima woowa ni.

Kabo ya woowa bá ti kabo Nyeme dɛɛ n ti ni

¹⁸ M sunsun ka wahara n bo ya sudi i kisa ni, i ti má pui, ya koro fa má i sunsun má jirima woowa n bo Nyeme bá yi i kere ya ni.

¹⁹ Deke n kere bo Nyeme ayi bu n nminda ni anyumboro wɔ, na bu bá nɔ kabo Nyeme yí i nbaam fite fofoe n nu.

²⁰ Dama deke n kere bo Nyeme ayi bu n wo bere wɔ, bu la má kperɛ, má ka bere koro sɔ a, ama, Nyeme ma bu la má kperɛ a. Deke bo i ti na i yo sɔ n la ka, i la tama

²¹ ka deke n kere bo wɔ yi bu ni, bu nyá bu tii, na má bu yo akɔɔm kun, na bu wu na bu kporɔ, ama, na bu nyá tiide ni jirima woowa kabo Nyeme nbaam kere nya i barasu ni.

²² Ya si ka deke n kere bo Nyeme ayi bu ni, wo waraki ni yaari nu wɔ, haari ni kisa, kabo bara ba suwu baa na i di yaari ni.

²³ Má deke n bo Nyeme ayi bu ni ngumi wo waraki su a, ama, yere mmɔɔ bo ya de i Awiewie bo i ti ciciri su aceeri ni, ya wo waraki su sunminda ni anyumboro wɔ, ka Nyeme bá fa ya yo i nbaam, na i de ya nunie ni.

²⁴ Tiide n bo ya nya i ni, nyini ma ya la tama n a. Nzen a la deke, a se má ka a la tama ka a nya i. Deke bo sonɔ la i, i se má ka i la i tama.

²⁵ Ama, nzen ya la tama ka ya nyá deke be na ya nya nya má i, ya mindi nminda ni anyumboro wɔ, na ya bá nya i.

²⁶ I ti sɔ lɛɛ, sanga kere bo ya yɔrɔki na ya si má kabo ya yo ni, Awiewie Casi n ba buka ya, beni, ya si má kabo ya sere Nyeme barasu, ama, Awiewie Casi n ni i tii waraki sɔ sɔ sere Nyeme ma ya, ni waraki bo adamande koro jɔjɔ má i.

²⁷ Nyeme fiiti adamande ahorembaa su na i si kabo i ti barasu a, yiri si deke bo i wo i Awiewie Casi n sunsunni nu a, dama Awiewie Casi n su kabo Nyeme koro ni su a, na i sere Nyeme ma i minem.

²⁸ Ya si ka Nyeme wo minem bo bu koro i n do, na i buka bu, adena i yo deke kere dongu ma bu, bere la minem bo i du mo seseri su ka i fere bu ni, na wo fere bu.

²⁹ Nyeme du mo siiri nyini minem wo, na wo cici ka bu ba yo kabo i Wa n ti ni, nyini ma i Wa n yoori baakpien, i nbaam kere nu n a.

³⁰ Nyeme du mo ciciiri nyini n kere wo ka, na wo nya fere bu, na bere n bo wo fere bu n ye wo de bu ka bu yo sa bo i ko atin su i do n a, na bere n bo wo de bu ka bu yo sa bo i ko atin su i do ni, ye wo ma bu i jirima woowa n be n a.

Kabo Nyeme akere i koro barasu ni

³¹ To, kisa, ye ya se se wo bekun a, fa ko ahin sam kere su a? Nzen Nyeme wo ya do, nma koro yo ya sa be a?

³² Nyeme akete ma ka i fa ma i tienggu Wa ni mmoo ma ma ya, ama, i faari i maari ya kere wo. Nyini ti, i yo se kete ka i ma ma ya deke n kere bo i ti kpa n a?

³³ Nma koro fa jore fa so Nyeme minem bo wo yi bu n a? Be wo ma bere, dama Nyeme ni i tii ade bu ka bu yo sa bo i ko atin su i do a.

³⁴ Nyini ti, nma koro di ya jore cin ya sui a? Be wo ma bere. Dama Kristo ni i tii wuuri wo, nahore na wo tenge i yiwee n nu, i tana Nyeme saa fomboro su, susere i ma ya.

³⁵ Koro n bo Kristo koro ya ni, nzu deke koro kpaaki ya ni yiri a? Ai. Deke be koro kpaaki ma ya ni yiri n nu. Kekereke o, wahara o, wuwuruwa o, ahoe o, yaari o, anyumboro o, yiwee o. Deke be wo ma bere bo i koro kpaaki ya ni yiri nu.

³⁶ Dama ba kere i Nyeme Jore Kadasi n nu ka,
 “Woro dee ti, ale kere bo i cin, bu kun ya so o,
 ya ti ka nbem wo, ye bu kpie ya kom a.”

³⁷ Haari ni nyini n kere mmoo ni, ya di nasara a, na ya toko di nasara buka su, Kristo bo i koro ya n dee ti.

³⁸⁻³⁹ M si tenle su ka, deke be wo ma bere bo i koro kpaaki ya ni koro n bo Nyeme koro ya, ya Mibie Yesu Kristo dee ti ni, yiwee wara ngoo o, merkem wara Sitana yikofom o, deke n bo bu wo bere o, wara deke n bo bu ba yo o, yiko bo i wo angoro wara asien bu o. Deke n bo Nyeme ayi bu ni, bu be wo ma bere bo i koro kpaaki koro n bo i wo ya ni Kristo afien ni.

9

Minem bo Nyeme afere ayi bu n jore

¹ To, deke bo m sukan kere am ni, i ti nahore wo, m bu ma kore, m ti Kristo dee wo, Awiewie Casi n gusu kere m sunsunni nu a, ye i di daani m ahore su a.

² Yiri la ka, m ahore asaaki agaya, na sanga kere i suyo m yaa

³ fa ko m ninbaa Yisarelifom dee busu. Nzen ma mini ni m tii kaari ngbeen, na m kpaaki yakiiri Kristo, adena i buka m ninbaam, m dee tienggu minem ni, ma m koro.

⁴ Bere la Yisarelifom bo Nyeme maari bu atin ka bu yo i nbaam, na bu nuuri i jirima woowa ni, na i faari sesesum diiri i di ni bere ni, na i faari noanie kpamaawa n maari bu ni, na i kereeri bu kabo bu su i barasu ni, na i seeri ka i yo sakpa beberebe ma bu ni.

⁵ Bu ti ya nam busu nufom wo, haari Kristo Tiidefo n bo Nyeme sunmaari i na i kaaki adamande baari durunya n nu ni, bu wuuri i fite bu dee busu n nu wo. Kristo Tiidefo ni la yiko tara deke n kere, yiri ti Nyeme a, yiri ti ye ni kansa sangha kere a. Ami.

⁶ I ti ma ka Nyeme nonie n ti ma nahore wo, dama ma bu kere bo bu wuuri bu Yisarelifom busu nu ni n ti Yisarelifom nahore su a.

⁷ Nahore, ma nbaam kere bo Abraham wuuri bu ni ti i nbaam nahore su a, ama, Nyeme yo seeri Abraham ka, "U wa Izaki sinfom ngumi yo u busu nufom a."

⁸ Nyini la ka, ma nbaam kere bo Abraham wuuri bu kabo adamande wu nbaam ni ti Nyeme nbaam nahore su a, ama, i nbaam bo Nyeme seeri ka i wu bu ni ngumi, ti i busu nufom nahore su a.

⁹ Dama kabo Nyeme yo seeri i n yaa, i na, "Ti fen, ngoo ceen ka buuso, m kaaki ba na m ba ngu ka u yi Saara bita baabieso."

¹⁰ Ma nyini ngumi a, am tenge su ka ya na Izaki yo maari i yi Rebeka akunnu, ye i wuuri ndaam n a.

¹¹⁻¹² Sangha bo Rebeka nya wu ma i ndaam ni, na bu nya yo ma sakpa wara satie be ni, nyini sangha n ye Nyeme seeri i ka, "Baakpien ni ba su baakan n a." Nyeme dee koroyanu ye i yoori so n a, yiri koro i sono ye i yiiri i a, ma ka bu be sayoowa dee ti a.

¹³ Kabo ba kere i Nyeme Jore Kadasi n nu ni, ka, Nyeme na, "Jakabu, ye m koro i a, ama, Isawu yiri, m kpo i wo."

¹⁴ Ye ya se se wo? Ya koro se ka Nyeme ayo ma sa bo i ko atin su, nzen se? Ai, ya koro se ma so fieo.

¹⁵ Dama Nyeme yo seeri Moyisi ka, "Sono kere bo m koro ka m buka i, m buka i wo, na sono kere bo m koro ka m si i anunfo, m si i anunfo o."

¹⁶ Nyini ti, ma adamande koroyanu, wara deke bo i boro i nyi yo i ni ti jore a, ama, kabo Nyeme si anunfo ni, nyini ti jore a.

¹⁷ Dama ba kere i Nyeme Jore Kadasi n nu ka, Nyeme yo seeri Ijipiti Feme Faaro ka, "Deke n bo i ti na m yiiri u tanaari femeya bie n su n la ka, m kere m yiko u ngoo su, na m duma ta bara ye durunya n kere nu."

¹⁸ Nyini kere kere ka, sono kere bo Nyeme koro ka i si i anunfo, ye i si i mi anunfo a, na minem bo i koro ka i yo bu ahorembaa kekereke ni, na i yo bu.

Nyeme yaafa ni i anunfo si n jore

¹⁹ Nyini ti, beni, be koro bisa m ka, "Nzen i ti so, nzu ti ye Nyeme di minem bo ba kete i n jore na i jaraki bu a? Nma koro kete na i kanda sa bo Nyeme koro i n a?"

²⁰ M na, woro la nma na a se Nyeme akuruwa a? Dundu koro bisa ma yakati tafe n ka, "Nzu ti ye a taari m so a?"

²¹ Yakati tafe n la atin bo i fa i yakati n ta dundu bo i sufa yo juma ceen n kere ceen, na i kaaki la atin bo i fa be ta dundu bo i fa yo juma ceen kpiri ceen.

²² Nyini ti, Nyeme la atin bo i koro fa yaa, na minem ngu kabo i yiko ti barasu. I gusu koro mindi agaya fa ko minem bo bu ma yaa ati i ni, bere bo ma wo yo daka ka bu ka ngbeen ni.

²³ Na i gusu la atin bo i fa i jirima woowa bo i la ma anusu n fa kere minem bo wo si bu anunfo ni, na wo du mo asese su ka bu ba nya i jirima woowa n be ni.

²⁴ Yere la nyini minem bo i si ya anunfo, na ya nya i jirima woowa n be ni, má ka yere Yudafoṃ ṅgumi, ye wɔ fere ya nbem a, ama, wɔ fere bo bu ti má Yudafoṃ ni mmɔɔ nbem abuka su.

²⁵ I ti kabo Nyeme noanie kanfo Hoseya akere i dee kadasi n nu n wɔ ka, Nyeme na,

“Minem bo bu yo ti má m minem ni, m fere bu ka m minem.

Na yiri n bo ma koro má i ni, m fere i ka m sɔnɔ koroowa.

²⁶ Dika n bo i nu na m fereeri bu ka, ‘Am ti má m minem ni,’
do ye bu fere bu ka Nyeme bo i wo bere sangá kere n dee nbaam n a.”

²⁷ To, na Nyeme noanie kanfo Esaya abo awie fa ko Yisarelifom jore su, i na, “Haari ni bo Yisarelifom sunnu beberebe ka nmie ni, bu nu mine kaan so nya tiide a.

²⁸ Dama sa n bo Micera ni yo i durunya n nu ni, i yo i wie ndende.”

²⁹ I ti kabo Esaya du mo seeri n wɔ, i na,

“Nzen má Micera Yikofɔ n ayaki má ya busu nufom nbem,
má i yo ya kabo i yoori Sodomfoṃ ni Gomorafom wɔ,
mie tiem bo Nyeme saaki bu ni.”

Yisarelifom ni labari kpa n jore

³⁰ To, ye ya se se wɔ? Minem bo bu ti má Yudafoṃ ni, akpini má atin kabo bu yo sa bo i ko atin su Nyeme do, ama, kisa, Nyeme ade bu ka bu yo sa bo i ko atin su i do, bu yarada n dee ti.

³¹ Ama, na Yisarelifom bere, akpini atin kabo bu su noanie kpamaawa n su, adena Nyeme de bu ka bu yo sa bo i ko atin su. Ama, haari ni nyini mmɔɔ, ba koro asu má i su nyunyumi, na bu yo sa bo i ko atin su Nyeme do.

³² Nzu ma i yoori so n a? Dama ba kpini má atin kabo bu yo yarada na Nyeme de bu ka bu yo sa bo i ko atin su i do, ama, bu kpiniiri atin ka bu sayoowa ma Nyeme de bu ka bu yo sa bo i ko atin su i do a. Na ba bo bu jaa yabue n su na ba kpaasi.

³³ Kabo ba du mo akere i ase ni, Nyeme na,
“Am ti fen, m sufa yabue be se Siyon mie kpiri n nu lee,
nyini yabue ni, minem bo bu jaa su na bu kpaasi.
Ama, sɔnɔ kere bo i yoori i yarada, i mi dí má nyinse.”

10

¹ M ninbaam, deke bo m koro i m ahore su la ka, m minem Yisarelifom nya tiide, m nyemesere lee sangá kere.

² M si tenle su ka bu nyunu aboro ka bu su Nyeme atin n su nahore su, ama, bu si má kabo bu yo na bu su i su.

³ Dama bu si má atin bo Nyeme de minem ka ba yo sa bo i ko atin su i do ni, ama, bu kpini bu tiengu atin wɔ, na bu su i su. Nyini ti, na ba kete Nyeme atin ni, ba de má kabo Nyeme na bu yo sa bo i ko atin su i do ni.

⁴ I ti nahore wɔ, ka Kristo juma n bo i yoori i ni, yiri kuunri noanie kpamaawa n kere noo a, adena sɔnɔ kere bo i yoori i yarada, Nyeme de i mi ka i yo sa bo i ko atin su i do.

Sɔnɔ kere koro nya tiide

⁵ Moyisi yo kere fa koori kabo mine koro su noanie kpamaawa n su, na bu yo sa bo i ko atin su Nyeme do, i na, “Sɔnɔ kere bo i su noanie kpamaawa n kere su, i mi nya ṅgɔɔ.”

⁶ Ama, fa kɔ kabo yarada dɛɛ ti, na sɔnɔ yo sa bo i kɔ atin su Nyemɛ dɔ ni, i ɲa, “Má a sunsun u ahore su ka, ɲma fún kɔ angoro a?” Nyini la ka, i kó fa Kristo jura ba lɛɛ.

⁷ Wara “Nma júra kunma ɲgɔɲgo n bo i la má awieeri nu a?” Nyini la ka, i kó fa Kristo fun fite bo ba wum n nu ba lɛɛ.

⁸ Deke bo i suse n la ka,
“Nyemɛ nɔɔniɛ n waari má ni wɔɔɔ.

I wo u nɔɔ nu, ni u ahorembaa mmɔɔ su.”

Yiri la labari n bo ya kaanri i n fa kɔ yaradayo su ni.

⁹ Nzen a teke u nɔɔ jɔjɔɔri minem nyunu ka, Yesu ti u Mibiɛ nahɔɔɛ su, na a yoori yarada u ahore su ka Nyemɛ tengeeri i yiwee n nu, a nyá tiide.

¹⁰ Dama sɔnɔ kɛɛ bo i yoori yarada i ahore su, ye Nyemɛ de i ka i yo sa bo i kɔ atin su i dɔ a. Na sɔnɔ kɛɛ bo i teke i nɔɔ jɔjɔɔri minem nyunu ka wɔ yo yarada, nyini ma i nya tiide a.

¹¹ Dama ba kɛɛ i Nyemɛ Jɔɛ Kadasi n nu ka, “Sɔnɔ kɛɛ bo i yoori i yarada, i mi dí má nyinɛ.”

¹² Nyini ti, bo bu ti Yudafom, ni bo bu ti má Yudafom, bu la má kpakpaaki-nu, Mícera kun ni ti bu kɛɛ Mibiɛ a. Yiri ma minem kɛɛ bo bu bo fere i duma deke kpa bo i la má aɲusu n a.

¹³ Dama ba kɛɛ i Nyemɛ Jɔɛ Kadasi n nu ka, “Sɔnɔ kɛɛ bo i bo fereeri Mibiɛ n duma, i mi nyá tiide.”

¹⁴ Tɔ, bu yo sɛ koro bo fere i duma, má ka ba du mɔ ayo i yarada? Ye bu yo sɛ koro yo i yarada, má ka ba du mɔ ati i jɔɛ? Ye bu yo sɛ koro ti i jɔɛ a, má ka be adu mɔ akan i labari kpa n akere bu?

¹⁵ Ye bu yo sɛ koro kan i labari kpa n kɛɛ minem a, má ka be asunma bu minem dɔ? Kabo ba kɛɛ i Nyemɛ Jɔɛ Kadasi n nu, ka, “Bo bu suba kan Nyemɛ labari kpa n ma ya ni, bu natiiri yo fiɛ.”

¹⁶ Ama, má sɔnɔ kɛɛ soroori su deeru labari kpa n a, kabo Nyemɛ nɔɔniɛ kanfɔ Esaya yo seeri ni, ka, “Ya Mibiɛ, ɲma ayo ya labari n yarada? Ai, be ade má i.”

¹⁷ Nyini ti, kana sɔnɔ ba yo Yesu Kristo yarada, má ka wɔ ti i labari kpa n ka, kana sɔnɔ gusu ba ti labari kpa ni, má ka be akan Kristo nɔɔniɛ ni akere i.

¹⁸ Ama, minɛ bo ba de má labari kpa ni, ba ti má jɔɛ n wɔ, nzen sɛ a? Nahɔɔɛ, ba ti i. Dama ba kɛɛ i Nyemɛ Jɔɛ Kadasi n nu ka,

“Ba bo ndoori abara aye durunya n kɛɛ nu,
na bu nɔɔniɛ aju asien n kɛɛ su.”

¹⁹ M koro ka m bisa bekun ka, Yisarelifom ni, ba si má? Ba si. Moyisi du mɔ seeri ka, Nyemɛ ɲa,

“M má am si kɔɛ fa kɔ minem bo bu ti má daanfɛ n nahɔɔɛ su ni,
m má am fa yaa fa kɔ minem bo bu la má ɲgɔɲle n ɲu.”

²⁰ Na Esaya ayo ahoresi, na wɔ se bu ka, Nyemɛ ɲa,

“Haari minem bo bu yo nienɛ má m busu ni, m ma ba ɲu m.

Na minem bo bu yo bisa má m busu ni, ma bɔ bu nu afa m ɲu akere bu.”

²¹ Na Esaya akaaki ase fa kɔ Yisarelifom su ka, Nyemɛ ɲa, “Ale kɛɛ bo i cin, m tenge m saa fere nyini minem n wɔ, ama, bu ti atii kekereke ni ketemafom wɔ.”

11

Kabo Nyemɛ ma Yisarelifɔ nbem diiri i ahɔɔɔma ni

¹ M koro ka m bisa ka, Nyeme akete i minem wo, nzen se a? Ai, wo kete ma bu e. Am ti fen. Mini Poolu ni m tii, m ti Yisarelifom o. M ti Abraham busu nufom o, m fite Benjamin dee lee ano n nu wo.

² Nyeme akete ma i minem bo i du mo yiiri bu ni. Am nya kan ma Nyeme Jore Kadasi n nu fa ko i noanie kanfo Eliya n su, kabo i jarakiiri Yisarelifom Nyeme do n wo, nzen se?

³ Bo i na, "Micera, ba kun u noanie kanfom kere, ba kaaki afufu u yoowa yoobirim n kere, wo ko aka mini ngumi kpein wo, ye bu koro ka bu kun m gusu n a."

⁴ Ama, Nyeme yo seeri i se wo? I na, "Ma yaki Yisarelifom mine akpii nso afa ase Yisareli asien n su. Bere ye bu nya kutu ma amoe Baali n na bu su i a."

⁵ Nyini dee ti, kisa gusu, i ti so o lee. Nyeme ayi Yisarelifom nu mine kaan so o, ye wo fere bu a, fa ko i ahorama n dee ti.

⁶ I ahorama n dee ti, ye wo yi bu a, ma ka bu sayoowa dee ti a. Nzen ma i ti ka bu sayoowa n dee ti, ma ahorama n ti ma aceeri kun.

⁷ Nzu bekun a? Yisarelifom n anya ma deke n bo bu kpiiri i busu ni, ama, minem n bo Nyeme yiiri bu ni, bere nyaari i a, na bo bu kaari n kere ahorembaa ayo kekereke.

⁸ I ti kabo ba kere i Nyeme Jore Kadasi n nu n wo, ka,
 "Nyeme ama bu ahorembaa nononri,
 na i ma bu nyumbaa nu ma asi,
 na i ma bu sui ti ma asui,
 haari ni nyuma."

⁹ Na Feme Davidi ase ka,

"Ma bu ceenkpiri diire diibiri n kaaki toroku ni diendie tara bu.
 Ma bu kpaasi, na bu nya bu satie nkatu.

¹⁰ Ma bu nyunu si biri na bu koro nu ma asi,
 ma bu wi biri sangha kere sangha ka ba so sori nononri wo."

Kabo bo bu ti ma Yudafom n anya tiide ni

¹¹ M koro ka m bisa ka, bo bu boori bu jaa kpaasi ni, bu yasu ma kun wo? Ai, ma so. Ama, nahore, bu kpaasi so n dee ti, ye minem bo bu ti ma Yudafom nyaari tiide a, adena Yudafom nu i na bu si bu kore.

¹² Nyini ti, ba kpaasi n dee ti, ye durunya n nufom anya deke kpa beberebe a, ba fun deke n bo ma bu nya i n dee ti, ye bo bu ti ma Yudafom n anya deke kpa beberebe n a. To, nzen i ti so, na Yudafom bo bu ba yo yarada n buka su, i yo deke kpa tara so.

¹³ Kisa m sujoko ambere bo am ti ma Yudafom ni gusu do a. Juma n bo Nyeme afa ama m ni, i sunmaari m ka m yo i jaramasa ambere bo am ti ma Yudafom do o, nyini ti ye m fa m juma n fa fo a,

¹⁴ na i ma m tienngu minem si kore, adena bu nbem nya tiide.

¹⁵ Dama sangha bo Nyeme keteeri bu ni, ye i ni durunya n nufom kere ayo kun a, ama, nzen i kaaki deeri bu bekun, i ti se wo? I yo ka ba nya ngoo afite yiwee nu wo lee.

¹⁶ Nzen be faari i alembaa fofore be fa yoori yoowa na i fa maari Nyeme, nyini la ka, i alembaa n kere ti Nyeme dee wo lee. Ye nzen baka bunlui n ti Nyeme dee, nyini la ka, i asambaa n kere gusu ti Nyeme dee wo lee.

¹⁷ Nahore, Yisarelifom ti ka baka n bo i su suuwa kpa n wo, ye ba kpie i asambaa ni nbem atu, na ambere ti ka boro baka bo i suuwa la ma fanja, ye ba kpie am asa baka n bo i su suuwa kpa n dee asambaa n su a, nyini

ti, am ni baka n bo i su suuwa kpa n asambaa n kere sangga nya ngoo fite i bunlui n do o.

¹⁸ Nzen i nya ti so, ma am fa fo ka am ti kpa tara baka n bo i su suuwa kpa n ni i tii, dama ma asambaa ni ma bunlui ni ngoo a, ama, bunlui ni ma asambaa ni ngoo a.

¹⁹ Beni, a se ka, "Ba kpie baka n bo i su suuwa n dee asambaa n be, adena mini nya sasuubiri a."

²⁰ To, i ti nahore wo, Yudafom ayo ma yarada n dee ti, ye Nyeme kpieri bu jiiri n a, ye u yarada n dee ti, ye a jina jinaabiri n bo a jina n a. Nyini ti, ma a yo kpirikoro, ama, si u nu sa.

²¹ Dama nzen Nyeme ayaki ma baka kpa n ni i tii dee asambaa ni, beni, i ba yaki ma woro boro baka ni mmoo dee asambaa ni.

²² M na a nu kabo Nyeme yo sakpa barasu ni, ni kabo i di mine jore na i cin bu sui ni anyumboro barasu ni. Minem bo bu yo ma i yarada n ye i di bu jore cin bu sui ni anyumboro n a, ama, woro yiri, i yo sakpa ma u wo, nyini ti, susu i sakpa n bo i yo ma u n su, ma nyini, i kpie woro mmoo ji wo lee.

²³ Nzen Yudafom kaakiiri bu wo, na bu ba yoori Nyeme yarada, i koro fa bu sa bu woobiri dawa n su, dama i la yiko bo i koro yo so.

²⁴ Ti fen. Woro mmoo ni u tii ti ka boro baka asambaa n bo ba kpie i afa asa baka n bo i su suuwa kpa n su wo. Nyini ti, a si ka Nyeme do, i ti ma kekereke na i kaaki ba fa baka n bo i su suuwa kpa n asambaam n ba sa bu woobiri dawa n su bekun.

Kabo Nyeme si sono kere anunfo n jore

²⁵ M ninbaam, asiri nu jore be yaa, ye m koro ka am si i a, adena ma am yo am nu kpiri ka am la si. Yiri la ka, kabo Yisarelifom nbem ayo bu ahorembaa kekereke ni, bu bita i so haari fa ko ju sangga bo minem bo bu ti ma Yudafom kere ba ba Nyeme do.

²⁶ To, i yo so o, na Yisarelifom kere ba nya tiide, kabo ba kere i Nyeme Jore Kadasi n nu ni, ka,

"Tiidefo ni fite Siyon mie kpiri n nu ba,
na i ba yi deke n kere bo i ko ma atin su fa tu,
na i yo Jakobu busu nufom casi.

²⁷ Kabo m fa sese su di i di ni bere lee,
sangga bo m ba yiiri satie n bo i wo bu nu ni."

²⁸ Kabo Yudafom n akete labari kpa n ni, nyini ma ba kaaki Nyeme kprofom kisa n a, ambere bo am ti ma Yudafom n dee ti. Ama, fa ko kabo Nyeme fereeri bu nam na i yiiri bu ni, bu ti i mine koroowam wo.

²⁹ Dama nzen Nyeme faari i aceeri fa ceeri mine nbem, wara nzen wo fere sono, i kaaki ma i sunsunni.

³⁰ Ambere, am yo keteeri Nyeme noanie n wo, ama, kisa, wo si am anunfo, bere bo ba kete i noanie n dee ti.

³¹ To, kisa, i ti so o, bere akete Nyeme noanie ni, dama Nyeme asi am anunfo, adena i awieeri su, na i ba si bere gusu anunfo.

³² Dama Nyeme abo sono kere kun ka bu kere kete i wo, adena i awieeri su na i ba si bu kere anunfo.

Nyeme kansu jore

³³ Nahore, Nyeme Alecira ni i si bo i la i n wo ngo. Kabo i di i jore ni, be koro fiiti ma nu na i ti i bu, i atin n gusu kere, sono koro si ma i bu.

³⁴ Ba kere i Nyeme Jore Kadasi n nu ka,
"Nma nya si deke bo i wo Micera n sunsunni nu a?"

Wara nma nya koro tu i fo a?"

³⁵ "Nma nya ce Nyeme deke be a,
adana Nyeme kaaki to i mi kaari a?"

³⁶ Dama deke kere fite yiri do a, deke kere ti i dee wo, na deke kere ba yo i dee wo. Yiri ti ye ni ka ya kansi i sanja kere sanja. Ami.

12

Minem bo bu yo Nyeme sa koroowa n woowa jore

¹ Nyini ti, m ninbaam, m sere am wo, am nie kabo Nyeme asi am anunfo ayo am sakpa ni, na am fa am nu ma i, kabo ma am yo woowa fa ma i ni, ama, am toko la ngoo, na am kaaki Nyeme minem na am su i ni anyumboro. Nyini ti nyemesu bo i sun i nu a, dama wo yo sakpa ama am.

² Ma am ma am woowa ti kabo durunya n nufom woowa ti barasu ni, ama, am kaaki am sunsunni fofore, na am kaaki am wo, nyini ma am koro si Nyeme koroyanu sa a, bo i ti kpa, na i sun i nu, na i ti kabo i koro ka i ti ni.

³ To, Nyeme aceeri n bo wo fa ama m dee ti, m sutu am kere fo o ka, ma be wura i nu kpiri tara kabo i ti ni, ama, sono kere sunsun na i nie i nu kabo i ti nahore su barasu, na i si kabo Nyeme ama i mi yarada barasu ni.

⁴ Adamande anuniembaa n ti momo kun wo, ama, i la bue bue, i kere ni i juma bo i yo i.

⁵ Ya gusu do i ti so o lee, ya sunnu, ama, ya ni Kristo ayo kun n dee ti, ya ti anuniembaa momo kun wo, na ya kere ti anuniembaa n bue be bo ya buka ya benggu wo.

⁶ Nyini ti, aceeri barasu barasum bo Nyeme ahoroma n dee ti na wo fa ama ya ni, am ma ya fa yo i juma ni. Nzen aceeri n bo Nyeme afa ama be n la ka i sukan Nyeme nanie ni, i ti ye ni ka i mi sufa yo juma, kabo i yarada n ti barasu ni.

⁷ Nzen Nyeme ama be aceeri ka i su amusui, i ti ye ni ka i mi sufa su. Nzen wo ma be aceeri ka i fa kere minem, i ti ye ni ka i mi sufa kere bu.

⁸ Nzen wo ma be aceeri ka i sutu minem fo na i wura bu kpekpeke kekereke, i ti ye ni ka i mi sutu fo yo so. Nzen wo ma be aceeri ka i suyo sakpa na i ce minem aceeri, i ti ye ni ka i mi yo i ni ahorembaa kun. Nzen wo ma be aceeri ka i yo minem mofa, i ti ye ni ka i yo so ni anyumboro. Ye nzen wo ma be aceeri ka i suyo sakpa ma minem bo bu wo ahoresaaki nu ni, i ti ye ni ka i yo so ni ahorejo.

⁹ Am koro minem ni akunnu fofoe, am kpo satie, na am su deke bo i ti kpa su.

¹⁰ Am koro am benggu Kristofom ka am ti nibaam wo, na am bu am bengum ka bu tara am.

¹¹ Am su Mibie n ni anyumboro, ma am yo nviya, am ma am ahorembaa bi ni nyemesu.

¹² Am la ahoresi n dee ti, am ma am ahore jo. Sanja kere bo am sudi wahara, am mindi, na am sere Nyeme sanja kere ni anyumboro.

¹³ Am kpaaki am nengem nu ma Nyeme minem bo bu la ma be ni, na am boro am nyi sude minem wofa.

¹⁴ Am sere deke kpa Nyeme do ma minem bo bu kere am wuwuruwa ni, am sere deke kpa ma bu, ma am sere deke tie ma bu.

¹⁵ Nzen minem wo ahorejo nu, am ma am ni bere kere ahore ti jowa. Nzen minem wo ahoresaaki nu, am ma am ni bere kere wo ahoresaaki nu.

¹⁶ Am ma am ni am bengum san̄ga wo ni sawɔrɛ, má am koro kpiri, ama, am fa am ɲu mata tarakam. Má am se ka amberɛ ɲgumi la ɲɔnɛ a.

¹⁷ Nzen sɔnɔ yo am satie, má am wɔrɔ tie tɔ i kaari. Ama, am boro am nyi na am suyo sa bo i ti kpa, na sɔnɔ kere ɲu i, na bu se ka i ti kpa.

¹⁸ Nzen am koro yo i, am boro am nyi na am ni sɔnɔ kere tana ni laifie.

¹⁹ M danfo kpam, nzen be ayo am satie, má am wɔrɔ tie tɔ i kaari, ama, am yaki i, na Nyeme cín i mi sui, dama ba kere i Nyeme Jɔrɛ Kadasi n nu ka, Micera n ɲa, “Mini cín bu sui a, mini tó bu kaari a.”

²⁰ Ama, am yo kabo ba kere i Nyeme Jɔrɛ Kadasi n nu ni, ka, “Nzen ahɔɛ ati u kpɔfɔ na a la diire, ma i na i di. Nzen nzuehɔɛ ati i, ma i nzue na i nu. Nzen a yoori sɔ, i ti ka a tɔrɔ sinmɔnɛ aɔ i mi tii su wɔ lɛɛ.”

²¹ Má a ma satie yoowa kunma u, ama, ma u kpayo n kunma satie ni.

13

Kabo i ti ye ni ka ya de tereterefom nɔanie barasu ni

¹ I ti ye ni ka sɔnɔ kere de tereterefom nɔanie, bere bo bu la yiko na bu nie am su ni, dama yiko be wo má bere bo i fite má Nyeme dɔ. Bo bu la yiko kisa n kere, Nyeme akpama bu a.

² Nyini ti, sɔnɔ kere bo i keteeri tereterefom nɔanie ni, i mi sukete deke bo Nyeme akpama i n wɔ lɛɛ. Sɔnɔ kere bo i yoori sɔ, i sukpini suicin ma i ɲu wɔ lɛɛ.

³ Dama sɔnɔ kere bo i yo sakpa soro má tereterefom ni sere, ama, sɔnɔ kere bo i yoori satie ni, yiri soro tereterefom n a. Nyini ti, nzen a koro má ka a soro tereterefom ni, yo sakpa, na bu kansu u.

⁴ Nyeme ma tereterefom wo bere yo bu juma a, na bu buka u na a yo sakpa. Ama, nzen a yoori satie, ma sere ti u, dama Nyeme ama bu yiko ka bu yo bu juma ma yiri Nyeme a, na bu cin minem bo bu yo satie n sui. Bu cin má minem sui ɲgbɛɲɲgbɛɲ.

⁵ Nyini dɛɛ ti, i ti ye ni ka am de tereterefom n nɔanie, má ka am soro ka bu cin am sui n ɲgumi dɛɛ ti a, ama, am ahore su, ni am sunsunni kere ka am yo sɔ n dɛɛ ti a.

⁶ Nyini dɛɛ ti, i kaaki ti ye ni ka am tɔ am lampom, dama gominam n yo bu juma ni anyumboro wɔ, Nyeme akere ka bu yo sɔ a.

⁷ Nyini ti, deke bo i ti ye ni ka am yo ma sɔnɔ kere ni, am yo ma bu. Am tɔ am lampom kaari, wara nzen ba kpie am kaari be, am tɔ i, sɔnɔ kere gusu bo i ti ye ni ka am ma i jirima, am ma i.

Kabo i ti ye ni ka ya yo fa kɔ ya bengum n dɔ ni

⁸ Má am ma be deke be kaari su am su. Deke bo wɔ yo daka ka am bita am bengum kaari la ka, am sukoro am bengum. Dama sɔnɔ bo i koro i bengum, i mi su Nyeme nɔanie kpamaawa n kere su wɔ lɛɛ.

⁹ Dama am si Nyeme nɔanie maawam n kere, ka, “Má a saaki ajaa ciire, má a kun sɔnɔ, má a wɔ,” ni bo i ɲa, “Má a ma u konviki wura be dɛɛ nen̄ge nu,” haari ni bo ba ka n kere jina nyini nɔanie kun ni su a, ka, “Koro u bengum kabo a koro u ɲu ni.”

¹⁰ Sɔnɔ kere bo i koro i bengum yo má i mi satie. Nyini kere ka nɔanie kpamaawa n kere jina koro su wɔ lɛɛ.

Minem bo bu wo wein nu n jɔrɛ

¹¹ I ti ye ni ka am yo sɔ, dama am si kabo ahin san̄ga n ti ni. San̄ga n aju, i ti ye ni ka am ten̄ge, má am daafi. Dama san̄ga n bo ya nyá tiide n adodo, i waari má ka san̄ga bo ya du mɔ yoori yarada ni.

¹² Wɔ ka kaan na ya fite kɔngue nu, ale sucin lɛɛ. Nyini ti, am ma ya yaki awosin nu juma kere, na ya yo wein sayoowa, kabo luekunfom sana bu biesoya nengem na bu ko kun lue ni.

¹³ Ya wo wiesu wo lɛɛ, nyini ti, am ma ya woowa ko atin su. Má ya sudi ya tii, sunu nzan subo, suyo ngbɛɛnngbɛɛn, má ya suyo sakaraya, suyo konvikiya ngbɛɛnngbɛɛn, má ya sukpini jɔɛ, na má ya susi kɔɛ.

¹⁴ Ama, am ma ya fa ya Mibiɛ Yesu Kristo n yo deke bo ya fa wura, kabo sɔnɔ fa sutura wura barasu ni, na má ya su ya njuniɛmbaa koroowa n su.

14

Má a jaraki u beɔgu

¹ Am de minem bo bu yarada ti má biiwa n ni am saa nnyɔ, má am se bu akuruwa fa ko deke n bo bu ci bu n su na am tanda bu ahore.

² Ma ya fa i ka, nbem la yarada bo bu koro di deke kere bo bu koro, ama, nbem gusu wo bere, bu yarada ti má biiwa, bu ciire la nie, bu di toro nyawa n ngumi wo.

³ Sɔnɔ bo i di nie kere nie ni, má i mi bu bo i di má nie ni ngbɛɛn. Sɔnɔ kere gusu bo i di nyawa n ngumi ni, má i mi jaraki bo i ci má pui ni, dama Nyeme ade i a.

⁴ Wɔɔ la nma na a jaraki be dɛɛ gbefene? I dɛɛ tiɛngu mibiɛ ni sé ka i jina wara i kpási a. I ti nahore wo ka i jina a, dama i mibiɛ ni koro ma i jina nyunyumi a.

⁵ Bekun, mine nbem do, bu sunsun ka cɛɛn nbem ti kpa tara nbem, ama, nbem gusu sunsun ka cɛɛn n kere ti kun wo, be tara má i beɔgu. I ti ye ni ka sɔnɔ kere su kabo i sunsunni nu kere ka i ti kpa n su.

⁶ Sɔnɔ kere bo i sunsun ka cɛɛn be ti kpa tara cɛɛn nbem ni, i mi koro ka i bu Nyeme dɛɛ ti, ye i yo so a, ye sɔnɔ kere bo i ci má pui n gusu, i mi koro ka i bu Nyeme dɛɛ ti, ye i yo so a, dama i da Nyeme asi fa ko diire n su, ye i nya di a. Sɔnɔ kere gusu bo i di má deke nbem ni, i mi gusu bu Nyeme dɛɛ ti, ye i yo so a, dama i mi gusu da Nyeme asi fa ko diire n su, ye i nya di a.

⁷ Sɔnɔ be wo má bere bo i koro se ka i wo i tii su wo wo, be gusu wo má bere bo i koro se ka i wu i tii su yiwee.

⁸ Ai, nzen ya la ngɔɔ a, Mibiɛ n dɛɛ ti ye ya la ngɔɔ a. Nzen ya wu gusu a, Mibiɛ n dɛɛ ti ye ya wu a. Nyini ti, nzen ya la ngɔɔ wara ya wu wo, Mibiɛ n dɛɛ la ya a.

⁹ Dama nyini dɛɛ ti ma Kristo wuuri, ye i tengeeri i yiwee n nu n a, adena i yó sɔnɔ kere Mibiɛ, bo bu la ngɔɔ n ni bo ba du mo awu n kere.

¹⁰ Wɔɔ la nma, wɔɔ bo a jaraki u beɔgu na a bu i ngbɛɛn ni? A si má ka ya kere bá jina Nyeme nyunu na i dí ya jɔɛ?

¹¹ Kabo ba kere i Nyeme Jɔɛ Kadasi n nu ni, ka, Micera n na,

“Sɔnɔ kere bá kutu m nyunu,

na sɔnɔ kere bá teke i nɔɔ se ka mini ti Nyeme a.

Kabo ma se ni, nyini wo bere a.”

¹² Nyini ti, ya kere bá kan ya sa bo ya yo i n kere kere Nyeme.

Má a yo sa bo i ma u beɔgu Kristofɔ bo i jaa na i kpaasi

¹³ Nyini ti, am ma ya yaki ya beɔgum jɔɛ kan, na má ya jaraki bu kun, ama, am ma ya sunsun kabo ya yo na má ya ma ya beɔgu Kristofom bo bu jaa, wara na bu kpaasi.

¹⁴ Kabo m ni ya Mibiε Yesu ayo kun ni, nyini ma m si ka deke be mmoo ni i tii ti má ciire n a. Ama, nzen sɔnɔ sunsun ka deke be ti ciire i do, má i mi di i.

¹⁵ Nzen diire n bo a di i n dεε ti, na a saaki u benggu Kristofɔ n ahore, nyini yiri, a suyo má koro sa lεε. Kristo yo wuuri i dεε ti wɔ, má a ma i mi ka ngbεen, u diire n bo a di i n dεε ti.

¹⁶ Má am ma be jɔjɔ jɔrε tie fa kɔ deke kpa n bo am si i n su.

¹⁷ Dama kabo Nyemε nie i minem su ni, i ti má di ni nu jɔrε wɔ, ama, i ti aceeri bo Awiewiε Casi n afa ama minem wɔ, yiri la ka, ya yo sa bo i kɔ atin su Nyemε do, ni tanalaifie, ni ahorejɔ.

¹⁸ Sɔnɔ kere bo i suuri nyini atin n su, na i su Kristo sɔ, i mi yo sa bo i sun Nyemε nu a, na adamande kansi i ka i ti sɔnɔ kpa.

¹⁹ Nyini ti, am ma ya boro ya nyi na ya su deke n bo i ma ya tanalaifie n su, na ya buka ya bengum, na ya kɔ mɔ ni ya nyemesu ni.

²⁰ Má am saaki Nyemε juma ni, diire dεε ti. Diire kere ti kpa a. Ama, nzen be di diire be na i ma i benggu bo i jaa na i kpaasi, nyini yiri, i ti má kpa.

²¹ Nzen a di nie, wara a nu nzan, wara a yo nyini n be sɔ, na i ma u benggu Kristofɔ bo i jaa na i kpaasi, i ti má ye ni ka a yo sɔ.

²² Yarada n bo a yo i u ahore su fa kɔ nyini jɔrem su, ma i wo u ni u Nyemε afien. Sɔnɔ kere bo i yo sa bo i kɔ atin su, na i la má sika i ahore su ka wɔ yo satie, i mi la terefie nahore su.

²³ Ama, sɔnɔ kere bo i ba sudi diire barasu nbem na i yo sika, Nyemε adi i mi jɔrε ajaraki i ka wɔ yo satie, dama diire n bo i sudi i ni, wɔ yo má yarada. Deke kere gusu bo sɔnɔ yo i, na i la má yarada, i ti satie wɔ Nyemε do.

15

Ya yo sa bo i jɔ ya bengum ahore

¹ Yere bo ya la fanɔa fa kɔ yarada su ni, wɔ yo daka ka ya yo sawore ni bere n bo bu yarada la má fanɔa ni, na ya buka bu, na ya dada bu ahore, má ya yo sa bo i sun yere ni ya tii nu.

² Sɔnɔ kere yo deke bo i sun i benggu nu, na i yo sakpa, na i kɔ mɔ ni i nyemesu ni.

³ Dama haari Yesu Kristo ni i tii ayo má sa bo i sun yiri ni i tii nu, ama, i ti kabo ba kere i Nyemε Jɔrε Kadasi n nu n wɔ, ka, "Nzukolεε barasu n kere bo minem fa kpiεeri wɔrɔ Nyemε ni, bu fa kpiεeri mini wɔ."

⁴ Deke n kere bo bu du mɔ kereeri i Nyemε Jɔrε Kadasi n nu ni, bu kereeri i ka i kere ya a, adena ya la tama, dama deke bo ba kere i ni, nyini ma ya ahoresi a, na ya koro mindi a.

⁵ Nyemε ma ya mindi ni ahoresi a, yiri ma am la anooεε ni am benggu a, kabo Yesu Kristo kereeri am ni,

⁶ adena am kere tien am nɔɔ fa anooεε, na am kansi Nyemε, ya Mibiε Yesu Kristo Si.

Kabo minem bo bu ti má Yudafom gusu ade Kristo labari kpa n ni

⁷ Nyini dεε ti, am de am bengum, ni am saa nnyɔ kabo Kristo ade am ni, nyini ma mine kansi Nyemε a.

⁸ Dama m suse am ka Kristo baari ka i ba buka Yudafom n wɔ, i yoori sɔ n dεε ti, nyini ma deke n bo Nyemε seeri ka i yo ma Yudafom nam n ayo biiwa nahore su n a.

⁹ Bekun i baari ka i ba buka minem bo bu ti má Yudafom wɔ, na bu gusu kansu Nyeme fa kɔ kabo wɔ si bu anunfo ni. Kabo ba kere i Nyeme Jore Kadasi n nu ni, ka,

“Nyini dee ti, m kansu wɔɔ Nyeme,
m kansu u duma minem bo bu ti má Yudafom nu,
na m dí jue ma u.”

¹⁰ Ba kaaki akere i bekun ka,
“Amberɛ bo am ti má Yudafom ni,
am ma am ahore jo ni Nyeme minem bo wɔ yi bu ni.”

¹¹ Bekun, i na,
“Amberɛ bo am ti má Yudafom ni, am kansu Micera ni,
na am ma daanfiem kere kansu Nyeme.”

¹² Na Nyeme noanie kanfo Esaya gusu ase ka,
“Soɔ be bá fite Jese dee lee anɔ n nu,
i ti kabo baka tie i bunlui su n wɔ,
na i bá yo daanfiem kere femɛ,
yiri má bu nya ahoresi a.”

¹³ Nyeme ma ya tama, m sere i ka i ma am ahorejo ni tanalaifie kɔ sin su, kabo am ayo i yarada n dee ti, adena Awiewie Casi n yiko ma am tama bo i la má anusu.

Deke bo i ti na Pɔɔlu kereeri ahin kadasi n ni

¹⁴ Tɔ, m ninbaam, m si tenle su ka am la wo kpa, na am la si dongu, na am kaaki koro fa tu am beɔgu fo.

¹⁵ Haari ni nyini mmɔɔ, ma fa ahoresi, ye m sukere ahin kadasi n fa ma am a, adena m tenge am ahin sam n su, dama Nyeme ayo sakpa ama m,

¹⁶ ka m yo Yesu Kristo amususufɔ ma minem bo bu ti má Yudafom ni, adena m kan Nyeme labari kpa n kere bere bo bu ti má Yudafom ni, na Awiewie Casi n ma Nyeme de bu ka bu ti i dee mine casim. M yoori so ni, i ti ka Nyeme sayoowa donguyofɔ n bo i yo yoowa bo i sun Nyeme nu ni.

¹⁷ Yesu Kristo dee ti, m la atin bo m koro fo fa kɔ Nyeme juma n bo wo fa ama m su.

¹⁸ Nahore, i la m sere na m kan sam bo nyingam ayo bu ni, má ka sam n bo Kristo ma ma yo bu ni ngumi, yiri la bo wo ma ma kan i noanie n akere minem bo bu ti má Yudafom ni, na ma yo alekutura sam, na ba de i noanie ni.

¹⁹ I ma m faari alekutura sam, ni Awiewie Casi n dee yiko nu fa yoori nyini juma n a. M boori i bu Yerusalem mie kpiri n nu wo, na ma bara aye akɔ aju haari Ilirikum awore n nu, na ma kan Kristo labari kpa n jore n kere akere bu.

²⁰ Deke bo m nyunu boro su agaya n la ka, m kan labari kpa n jore kere minem aworem n kere bo bu nya ti má Kristo duma ni, dama m koro má ka m ta be dee ataari su,

²¹ kabo ba kere i Nyeme Jore Kadasi n nu ni, ka,
“Haari ni bo minem nya kan má labari kpa n kere má bu ni,
bu ní i,
haari ni bo bu nya ti má labari kpa ni,
bu tí i, na bu sí i bu.”

Kabo Pɔɔlu na i koro ka i kɔ nie Romafom busu ni

²² Tɔ, nyini n kere dee ti, sanɔ kere, má m koro ka m ba nie am busu wo, ama, m nya má atin.

²³ Ama, kisa, miε fɔfɔrɛ be wo má berɛ bo m kɔ dɔ na m kɔ yo juma ahin awɔrɛm n nu, nyini ti, kabo má sanɓa kerɛ na m koro ka m ba nie am busu ni,

²⁴ m la tama ka m ba susin kɔ Esipani dɛɛ awɔrɛ n nu, m jína am dɔ na m niε am busu, na m ni amberɛ nya tana, na am buka m na m koro kɔ ju deke bo m sukɔ ni.

²⁵ Ama, kisa yiri, m sukɔ Yerusalem miε kpiri n nu wɔ, m la buka be bo m kɔ fa ma Nyemɛ minɛm bo bu wo dɔ ni.

²⁶ Dama Kristofom bo bu wo Makedoniya ni, ni bo bu wo Akaya dɛɛ awɔrɛm n nu ni, wɔ yo bu fiε ka bu yi yi ηwaa, na m kɔ fa ma Nyemɛ minɛm bo bu wo Yerusalem na bu ti yaarifom ni.

²⁷ Berɛ ni bu tii afa sunsunni kpa anɓu ka Yerusalemfom kaari su bu su, dama Yerusalemfom du mɔ faari Nyemɛ deke kpa maari berɛ n bo bu ti má Yudafom n wɔ, nyini dɛɛ ti, wɔ yo daka ka berɛ gusu nya durunya n nu nenɓe ma Yerusalemfom ni.

²⁸ Tɔ, nyini ti, nzen m koro yoori nyini juma n kerɛ wieeri, na bu nya nyini buka n kerɛ, m bá niε am busu, na m nyá sin kɔ Esipani.

²⁹ M si tenle su ka m baari, m fá deke kpa fite Kristo dɔ ba ma am.

³⁰ M ninbaam, kabo Ya Mibiε Yesu Kristo wo ya dɔ, na Awiewiε Casi n koro ya agaya n dɛɛ ti, m sere am wɔ, ka am buka m na ya sere Nyemɛ ni anyumboro,

³¹ ka i dé m fite Yudiya awɔrɛ n nufɔ nbem bo bu yo má yarada n saa nu, na Nyemɛ minɛm bo bu wo Yerusalem n dé buka n bo m sufa kɔ ma bu ni.

³² Na nzen i ti Nyemɛ koroowa, na m bá am dɔ ni ahorejɔ, na m ni amberɛ kerɛ koro dada ya benɓu ahore.

³³ Nyemɛ bo i ma tanalaifiε n buka ya kerɛ. Ami.

16

Kabo Pɔɔlu yoori Kristo jamam bo bu wo Roma miε kpiri n nu anse ni

¹ Tɔ, m koro ka am si ya niwa baabara n bo bu fere i ka Fibi ni, i yo Nyemɛ juma buka Kristo jama n bo i wo Kenciriya miε kpiri n nu n wɔ.

² Am de i kabo má am de Nyemɛ minɛm barasu ni, Mibiε n dɛɛ ti, na am buka i ni deke kerɛ bo i koro, dama yiri ni i tii abuka mine dɔnɓu, haari ni mini mmɔɔ.

³ Am bisa Pirisila ni Akuyila dɔnɓu ma m. M ni berɛ sanɓa yo juma ma Yesu Kristo wɔ.

⁴ Bu yo tɔɔri bu ηɓɔɔ maari m wɔ, nyini dɛɛ ti ye m da bu asi n a, má mini ηɓumi yo bu anse a, ama, Kristo jamam kerɛ bo bu ti má Yudafom gusu yo bu anse.

⁵ Am bisa Kristo jama n kerɛ dɔnɓu, bo bu tien bu nɔɔ bu dika ni.

Am bisa m danfo kpa Epanetosi n dɔnɓu ma m, yiri du mɔ yoori Kristo yarada Esiya dɛɛ awɔrɛ n kerɛ nu a.

⁶ Am bisa Mariya dɔnɓu, bo wɔ yo juma agaya abuka am ni.

⁷ Am bisa Andɔrɔnikusi ni Juniya dɔnɓu, m lamɔkɔ Yudafom bo m ni berɛ yo woori dansaraka nu ni, bu la dumaye Kristo jaramasam kerɛ nu, berɛ du mɔ yoori Kristo susufom ka, ye m nya ba yoori a.

⁸ Am bisa m danfo Ampiliyatusi dɔnɓu, m Mibiε n dɛɛ ti, m koro i agaya.

⁹ Am bisa Wuribanisi dɔnɓu ma m, bo yiri ni yere sanɓa yo juma ma Kristo ni, na am kaaki bisa m danfo Sitakisi dɔnɓu.

¹⁰ Am bisa Apelesi dɔnɓu, bo wɔ yi i ηu ka i ti Kristo susufɔ nahore su ni, na am bisa Arisitobulosi dikafom kerɛ dɔnɓu.

¹¹ Am bisa m lamoko Yudafo n bo bu fere i ka Herodiyon n dongu, na am bisa Naracisi dikafom bo bu ti Mibie n dee minem n buka su.

¹² Am bisa Tirifena ni Tirifosa dongu, nbara nnyom bo bu yo juma ma Mibie ni, ni m danfo Perisisi, yiri mmoo ayo juma agaya ama Mibie n ni.

¹³ Am bisa Rufusu dongu, yiri bo Nyeme ayi i ka i yo i juma n ni, ni i ni bo i ti mini mmoo ni ni.

¹⁴ Am bisa ahin minem kere dongu ma m, bere la Asinkiritusi, ni Felegon, ni Heremesi, ni Patorobasi, ni Heremasi, ni ya ninbaam kere bo bu wo bu do ni.

¹⁵ Am bisa Filolokusi ni Juliya dongu, ni Nereyusi, ni i niemabara ni, ni Olimpasi, ni Nyeme minem kere bo bu wo bu do ni.

¹⁶ Am bisa am bengi dongu ni koro. Kristo jamam kere bo bu wo fen n bisa am dongu.

Awieeri su dee fottuuwa

¹⁷ M ninbaam, m sere am wo, am si am nu sa ni minem bo bu saaki kereewam bo am adu mo ade i ni, na bu fa kpakpaakinu ba ni, na bu ma minem kpaasi fa ko bu yarada n su ni. Ma am dodo bu.

¹⁸ Dama nyini minem so, bu su ma ya Mibie Yesu Kristo su, ama, bu su bu dee kunnu koroowa su wo, na bu bo minem bo bu si ma pui n anooie, na bu dadaka bu.

¹⁹ Ama, ambere yiri, sono kere ati kabo am ade Kristo noanie nahore, nyini dee ti, m ahore ajo ako asin su. M koro ka am la si fa ko deke n bo i ti kpa n su, ama, m koro ma ka am la si haari kaan so mmoo fa ko deke n bo i ti ma kpa n su.

²⁰ Nyeme bo i ma tanalaifie ni, i ce ma, i ma am yiko na am fun tientien Sitana nu mereki i. Ya Mibie Yesu Kristo buka am.

²¹ Timoti bo m ni yiri sangi yo juma n bisa am dongu, na Lukiyosi, ni Jason, ni Sosipateri, m lamoko Yudafo n gusu bisa am dongu.

²² Mini Teretiyusi gusu bisa am kere dongu, Mibie n dee duma n nu, mini ye Pulu ma m kereri ahin kadasi n sufa ma am n a.

²³ M awurufobie Gayosi bisa am dongu. Kristo jama n kere tien bu noo i dika a. Irasitusi bo i ti mie n nu nwaa bitafo ni, ni ya niwa Kuwatosi kere bisa am dongu. [

²⁴ Ya Mibie Yesu Kristo buka am kere. Ami.]

Pulu dee awieeri su noanie ni

²⁵ Am ma ya kansu Nyeme. Yiri koro ma am jina fanga kenken fa ko Yesu Kristo labari kpa n bo m kaanri i jore na am ati i n su a. I ti jore bo bu yo fa fiere dada kere wo, ama, kisa wo fite fofoe nu.

²⁶ Yiri ye Nyeme noanie kanfom kereri i n a, na Nyeme bo i wo bere sangi kere n ama daanfie kere ati i, na ba de i, na ba yo i yarada.

²⁷ Nyeme ngumi la alecira a, yiri ti ye ni ka ya kansu i a, Yesu Kristo dee ti, sangi kere sangi. Ami.

PƆɔlu kadasi ciciri su bo i kere fa maari KƆRINTOFƆM ni

¹ Mini PƆɔlu bo Nyeme dee koroyanu na wo fere m ka m yo Yesu Kristo jaramasa ni, m ni ya niwa Sositeni ni sukere ahin kadasi ma am a.

² Ya sukere i na ya fa ma ambere Kristo jama n bo am wo Korinto mie kpiri n nu, na Nyeme afere am afa am ayo i dee mine casim ni, na wo ma am ni Yesu Kristo ayo kun ni, fa sangani minem kere bo bu bo fere ya Mibie Yesu Kristo duma n deke kere ni, yiri ti ya ni bere kere Mibie a.

³ Ya Si Nyeme, ni ya Mibie Yesu Kristo buka am, na bu ma am tanalaifie.

Sakpam bo PƆɔlu na Nyeme ayo ama bu ni

⁴ Sangani kere m da Nyeme asi wo, ambere dee ti, fa ko sakpa n bo wo yo ama am na i fite Yesu Kristo do ni.

⁵ Yiri dee ti, am anya deke kpa dongu, haari fa sangani jore jowo, ni si kere.

⁶ Daani n bo ya diiri i fa ko Kristo nusu jore ni, ambere mmoo ni am tii si ka i ti nahore wo.

⁷ Nyini dee ti, am fun ma Nyeme aceeri kpa n haari kun n kpein mmoo, na am nminda fa ko sangani bo ya Mibie Yesu Kristo ba yi i nu fite ni.

⁸ Yiri ma am fanga haari ko ju awieeri a, na am la ma ngasi be ya Mibie Yesu Kristo dee ceen ni.

⁹ Nyeme la dabunu, yiri afere am ka am ni i Wa ya Mibie Yesu Kristo n la wo fie ni am bengua a.

Kpakpaakinu n bo i woori Kristo jama n afien ni

¹⁰ M ninbaam, m sere am wo, Yesu Kristo dee duma n nu, ka am kere fa anose na ma am ma kpakpaakinu be wo am nu, ama, am ma am sunsunni ni am noanie yo kun nahore su.

¹¹ M ninbaam, deke bo i ti na m se so ni, Kolowe dikafom nbem ase m ka am la akuruwa am nunu nu.

¹² Yiri la ka, am nbem na, "Mini su PƆɔlu su a," nbem na, "Mini su Apolosi su a," nbem na, "Mini su Petoro su a," ye nbem gusu na, "Mini su Kristo su a."

¹³ Kristo akpakpaaki i nu nu wo, nzen se? Ye bu kpamaari PƆɔlu baka jaanu n su maari am a? Bu bieeri am Nyeme nzue PƆɔlu dee duma nu wo? Ai.

¹⁴ M da Nyeme asi ka ma bie ma am be Nyeme nzue, ma ka Krisipusi ni Gayosi n ngumi.

¹⁵ Nyini dee ti, be koro se ma ka m bieeri i Nyeme nzue m dee duma nu.

¹⁶ Enehenn, ma tenge su bekun ka m bieeri Satefanasi dikafom n gusu Nyeme nzue. Sin nyini sin, m koro tenge ma su ka m bieeri be Nyeme nzue kun.

¹⁷ Dama Kristo asunma ma m ka m ba bie minem Nyeme nzue wo, ama, i sunmaari m ka m ba kan i labari kpa n jore kere minem wo. Ma fa ma adamande dee alecira, ye m fa kan kereeri minem a, nzen ma m yo so, ma yiwee n bo Kristo wuuri baka jaanu n su n ti ngbeen wo.

Kristo ti Nyeme yiko ni alecira a

¹⁸ Dama nzen ya kan yiwee n bo Kristo wuuri i baka jaanu n su n jɔre kere minem bo bu suka ɲgbɛɛn ni, bere dɔ i ti sinnzinya jɔre wɔ lɛɛ. Ama, yere n bo ya nya tiide ni, i ti Nyeme yiko sa bo wɔ yo ama ya a lɛɛ.

¹⁹ Dama ba kere i Nyeme Jɔre Kadasi n nu ka, Nyeme ɲa,
 “M yó alecirafom alecira ni ɲgbɛɛn,
 na m tó sifom si n atin.”

²⁰ Tɔ, alecirafom wo ni? Ye sifom wo ni? Ye bo bu fiiti na bu si ahin durunya n nu jɔre n wo ni? Durunya n nu alecira ye Nyeme afa akaaki sinnzinya n a.

²¹ Nyeme la alecira, be koro fa má durunya n nu alecira na i fa si Nyeme. Nyeme koroyanu ye i ma ya kan labari kpa n bo i ti ka sinnzinya jɔre n kere minem a, na bo ba yo yarada ni, Nyeme ade bu tii aji.

²² Dama bo bu ti Yudafom ni, bere koro ka bu ɲu alekutura sam wɔ, ye bo bu ti Girikifom n gusu koro ka bu ti alecira jɔre wɔ.

²³ Ama, yere kan Kristo Tiidefɔ labari kpa n jɔre wɔ, kabo bu kpamaari i baka jaanu n su ni. Yudafom dɔ, i ti ciire wɔ, ye bo bu ti má Yudafom n dɔ, i ti sinnzinya jɔre wɔ.

²⁴ Ama, minem bo Nyeme afere bu ni, bo bu ti Yudafom ni, ni bo bu ti Girikifom ni, Kristo ti Nyeme yiko ni alecira a.

²⁵ Dama Nyeme sa bo wɔ yo i na i ti ka sinnzinya sa n tara adamande alecira kere bo i la i, na Nyeme sa bo wɔ yo i na i ti ka i la má fanja ni, i tara adamande fanja kere bo i la i.

²⁶ M ninbaam, am sunsun na am nie kabo am yo ti na Nyeme ba fereeri am ni. Nzen ya ɲa ya nie, durunya n nufom yo bu má ka am dɔɲgu la alecira, am dɔɲgu yo ti má yikofom, na am dɔɲgu gusu yo fite má nfanja-fom n busu nu.

²⁷ Ama, Nyeme ayi dekem bo bu ti sinnzinya sa durunya n nu ni, na wɔ fa awura alecirafom nyinse, na wɔ yi dekem bo bu la má fanja durunya n nu ni, na wɔ fa awura nfanjafom nyinse.

²⁸ Nyeme ayi bo bu ti tarakam durunya n nu fen, na wɔ yi minem bo bu bu má bu ni, ni dekem bo bu ti ɲgbɛɛn ni, na i ma dekem bo bu la fanja n ka ɲgbɛɛn.

²⁹ Deke bo i ti na Nyeme yoori i sɔ n la ka, adena má be koro fɔ yiri Nyeme dɔ.

³⁰ Ama, Nyeme ama am ni Yesu Kristo ayo kun, na wɔ ma wɔ yo ya dɛɛ alecirafɔ. Yesu dɛɛ ti ye Nyeme de ya ka ya yo sa bo i kɔ atin su i dɔ n a, ye wɔ yo ya i mine casim, na wɔ de ya tii aji.

³¹ Nyini dɛɛ ti, kabo ba kere i Nyeme Jɔre Kadasi n nu ni, “Sɔnɔ kere bo i ɲa i fɔ, i ti ye ni ka i fɔ Mibiɛ n ti.”

2

Kabo Pɔɔlu kaanri Yesu Kristo ni i yiwee n jɔre ni

¹ M ninbaam, sanja bo m baari am dɔ na m ba kaanri labari kpa n kereeri am, na am si Nyeme asiri nu n jɔre ni, ma fa má adamande alecira ni si jɔre ajɔɔ akere má am.

² Dama m yo baari ni, ma koro má ka m kan jɔre be am dɔ, má ka Yesu Kristo Tiidefɔ n dɛɛ jɔre, ni kabo i wuuri baka jaanu n su ni.

³ Sanja bo m yo woori am dɔ ni, m ɲunie ti m yɔrɔkiiwa a, na sere ati m agaya, na m ɲunie subobo m.

⁴ M nɔaniɛ jɔjɔwa ni labari kpa n bo m kaanri i ni, i ti má adamande alecira ni si jɔrɛ, ama, Nyɛmɛ Awiewiɛ Casi ni yoori alekutura sam kereeri ka m nɔaniɛ jɔjɔwa n ti nahɔrɛ wɔ.

⁵ Adena má am yo yarada adamande alecira n dɛɛ ti, ama, Nyɛmɛ dɛɛ yiko n dɛɛ ti.

Nyɛmɛ alecira jɔrɛ

⁶ Tɔ, ama, ya jɔjɔ alecira jɔrɛ fa kere minɛm bo ba bi fa kɔ Nyɛmɛ atin n su n a. I ti má durunya n nu fɛn dɛɛ alecira, wara i ti má alecira bo durunya n nu nfanɔafɔm la i ni, berɛ kɛrɛ bá ka nɔgbɛɛn wɔ.

⁷ Ama, yɛrɛ kan Nyɛmɛ alecira asiri nu jɔrɛ n bo i yo fa fiɛri adamande nɔ n wɔ, nyini alecira ni, Nyɛmɛ du mɔ ciciiri i wɔ ka, ye i nya ba yiiri durunya n a. I yoori sɔ ɔ, adena ya nya i jirima woowa ni.

⁸ Durunya n nu nfanɔafɔm be mmɔɔ asi má nyini alecira ni, nzen má bu siiri i, má bu kpama má ya Mibiɛ Jirimafɔ n baka jaanu n su.

⁹ Ama, i ti kabo ba kɛrɛ i Nyɛmɛ Jɔrɛ Kadasi n nu n wɔ, ka,

“Deke bo be nyumbaa nya nɔ má i ni,

wara deke bo be sui nya ti má i ni,

wara deke bo be nya sunsun má i, i ahorembaa su ni,

nyini ye Nyɛmɛ asɛsɛ i su,

na i fá ma bo bu koro i n a.”

¹⁰ Ama, yɛrɛ yiri, Nyɛmɛ ama i Awiewiɛ Casi n ayi nyini n sɔ akere ya, dama Awiewiɛ Casi ni fiiti si deke n kɛrɛ a, haari ni Nyɛmɛ jɔrɛ bo i wo nɔgo ni.

¹¹ Adamande be koro si má sa bo i wo i bɛngu adamande ahore su, má ka i mi ni i tii awiewiɛ ni si deke bo i wo i ahore su a. Sɔ ye be koro si má sa bo i wo Nyɛmɛ ahore su a, má ka Nyɛmɛ Awiewiɛ ni nɔgumi si a.

¹² Awiewiɛ n bo yɛrɛ anya i ni, i ti má durunya n nu fɛn dɛɛ, ama, i fite Nyɛmɛ dɔ ɔ, adena ya si aceerim kɛrɛ bo Nyɛmɛ afa ama ya ni.

¹³ Nyini ye ya fa kere minɛm a. I fite má adamande alecira kereewa n nu, ama, i ti deke bo Awiewiɛ Casi ni kereeri ya a, ye ya fa kere minɛm bo bu la Awiewiɛ Casi n a.

¹⁴ Sɔnɔ bo i la má Nyɛmɛ Awiewiɛ ni, koro de má deke n bo i fite Nyɛmɛ Awiewiɛ n dɔ, dama yiri dɔ, nyini jɔrɛm ti ka sinnzinya jɔrɛ wɔ, na i koro ti má i bu, dama be koro si má i bu, má ka Nyɛmɛ Awiewiɛ ni buka i na i koro fiiti si i bu.

¹⁵ Sɔnɔ bo i la Nyɛmɛ Awiewiɛ ni, i mi koro fiiti deke n kɛrɛ a, ama, be koro fiiti má i mi yiri.

¹⁶ I ti kabo ba kɛrɛ i Nyɛmɛ Jɔrɛ Kadasi n nu barasu n wɔ ka,

“Nma asi sa bo i wo Mícɛra n sunsunni nu,

na i kɛrɛ i kabo i yo a?”

Ama, yɛrɛ yiri, ya si deke bo i wo Kristo sunsunni nu.

3

Nyɛmɛ amusuisufɔm jɔrɛ

¹ M ninbaam, ma koro ajɔjɔ má am dɔ ka am ti minɛm bo bu si Awiewiɛ Casi n jɔrɛ, ama, m jɔjɔori am dɔ ka am ti bo bu bita adamande woowa a, Kristo dɛɛ atin n su, am ti ka nbaatumam wɔ.

² Nbaatumam koro nu nyufini nɔgumi wɔ, bu koro di má diire nɔnɔori, nyini dɛɛ ti ye m kereeri am bumboori su dɛɛ kereewam n a, dama am koro ti má kereewam bo bu ti kekereke n bu. Haari ni kisa, am nya koro ti má i bu.

³ Dama am toko bita adamande woowa n wɔ. Am si am beŋgu kɔrɛ wɔ, na am suse akuruwa am ŋuŋu nu. Kabo am yo sɔ ni, durunya n nu adamande woowa atin lɛɛ, ye am bita i n a.

⁴ Dama nzen am nbem ŋa, “Mini su Pɔɔlu su a,” ye nbem gusu ŋa, “Mini su Apolosi su a,” am ti má ka durunya n nufɔm wɔ lɛɛ, nzen sɛ?

⁵ Apolosi la ŋma? Wara Pɔɔlu la ŋma? Ya kɛrɛ ti Nyɛmɛ amususufɔm bo ya ba abuka am wɔ, ya kɛrɛ ni ya juma bo wɔ fa ama ya na ya yo, ye am ayo yarada a.

⁶ Fa kɔ am yaradayo n su, i ti ka mini Pɔɔlu dɔɔri alɛmbaa n a, ye Apolosi gɔɔri i nzue a, ama, Nyɛmɛ yiko n nu ma wɔ nyi awura mbaa.

⁷ Nyini ti, bo i dɔ mbaa n ni bo i gɔ nzue n be mmɔɔ ti má pui. Deke bo i ti jɔrɛ n la sa bo Nyɛmɛ yo i n wɔ, dama yiri ma i nyi wura mbaa a.

⁸ Bo i dɔ mbaa n ni bo i gɔ nzue n kɛrɛ yo juma kun wɔ. Bu kɛrɛ nyá bu ŋkatɔ kabo bu jumayoowa ti barasu n wɔ.

⁹ Dama ya kɛrɛ saŋga yo juma kun ma Nyɛmɛ wɔ, ye ambɛrɛ gusu ti ka Nyɛmɛ fie ye ya dɔ i a, na am kaaki ti ka Nyɛmɛ awuru ye ya ta i a.

¹⁰ Aceeri n bo Nyɛmɛ afa ama m ti ka sɔnɔ bo i si ataari ta nyunyumi wɔ, ye m se sɔɔ n bumboori fa n a. Ye be gusu dɛɛ la ka i ta taka nyini n su a. Ama, wɔ yo daka ka sɔnɔ kɛrɛ si i ŋu sa kabo i ta taka su barasu.

¹¹ Dama Yesu Kristo ŋgumi ti ka sɔɔ fa bumboori n bo bu fa se sɔɔ n bu n a, be koro se má sɔɔ fa be bekun sin yiri ŋu.

¹² Ama, sɔnɔ kɛrɛ bo i ta taka su, na i ti ka i faari sika, na be gusu faari jɛtɛ, na be gusu faari afere bo i la anyunuyi ta takaari su, na be faari baka, na be faari wura, na be faari kara ta takaari su.

¹³ Ama, jina cɛɛn, sɔnɔ kɛrɛ jumayoowa bá fite fɔfoe nu, na bu ŋú i kabo i ti, dama sin bá yara sɔnɔ kɛrɛ juma, na sin ni yó i na i níɛ kabo i ti.

¹⁴ Sɔnɔ kɛrɛ bo i ta takaari bumboori fa seewa n su, na nzen sin n yaraari i jumayoowa na wɔ di má i, i mi nyá ŋkatɔ.

¹⁵ Ama, sɔnɔ kɛrɛ bo sin n diiri i jumayoowa ni, i nyá má ŋkatɔ, ama, yiri ni i tii nyá tiide, se i ti ka sin n afundi i mi wɔ.

¹⁶ Am si má ka am ti ka awuru bo Nyɛmɛ wo am nu wɔ, nzen sɛ? Am si má ka Nyɛmɛ Awiewie Casi n wo am nu wɔ?

¹⁷ Sɔnɔ kɛrɛ bo i saakiiri Nyɛmɛ awuru ni, Nyɛmɛ sáaki i mi, dama Nyɛmɛ awuru n ti casi wɔ, ye ambɛrɛ ni am tii ti ka nyini awuru n a.

¹⁸ Má be se ka i dadaka i ŋu. Nzen be wo am nu, na i sunsun ka i la durunya n nu alecira, ma i mi yo i ŋu ka i ti sinnzin wɔ, adena i kaaki alecirafo nahɔrɛ su Nyɛmɛ dɔ.

¹⁹ Dama deke bo durunya n nufɔm bu i ka i ti alecira ni, Nyɛmɛ dɔ i ti sinnzinya a. Nyini ti ye ba kɛrɛ i Nyɛmɛ Jɔrɛ Kadasi n nu ka,

“Alecirafo m ye Nyɛmɛ fa bu ŋɔnletie fa tara bu n a.”

²⁰ Ye ba kaaki akɛrɛ i ka,

“Micera ni si deke kɛrɛ bo i wo alecirafo m sunsunni nu a,
i si ka i ti ngbɛɛn wɔ.”

²¹ Nyini ti, má be se ka i fa adamande be fa fɔ, dama deke n kɛrɛ ti am dɛɛ wɔ.

²² Mini Pɔɔlu ti am dɛɛ wɔ, ni Apolosi, ni Petoro gusu, ni durunya, ni ŋgɔɔ, ni yiwee, ni kisa dɛɛ saŋga n bo ya wo nu ni, ni saŋga bo i bá ba ni, deke n kɛrɛ ti am dɛɛ wɔ,

²³ na ambɛrɛ gusu ti Kristo dɛɛm, ye Kristo gusu ti Nyɛmɛ dɛɛ.

4

Kristo jaramasam juma n jɔɔɛ

¹ Tɔ, nyini ti, wɔ yo daka ka am niɛ ya ka ya ti Kristo amusuisufɔm wɔ, ya ti minɛm bo Nyɛmɛ afa i asiri nu jɔɔɛ n awura ya saa nu wɔ.

² Jɔɔɛ n bo i kaaki wo bere la ka, wɔ yo daka ka amusuisufɔ yo i juma ni nahɔɔɛ su ma i mibiɛ.

³ Mini yiri, nzen am di m jɔɔɛ, wara adamande jɔɔɛdifɔm di m jɔɔɛ, m cɛɛ wo má nu, haari mini mmɔɔ ni m tii di má m ɲu jɔɔɛ.

⁴ M sunsunni ni m ahore su, ma yo má satie be, ama, nyini kere má ka m la má ɲgasi be wɔ lɛɛ, má ka Mibiɛ ni ɲgumi ti bo i di m jɔɔɛ a.

⁵ Nyini dɛɛ ti, má sɔnɔ be di i beɲgu jɔɔɛ, dama saɲga nya ju má bo Mibiɛ ni bá. I ba baari, yiri yí deke kere bo i wo awosin nu na i fie n fite fofoe nu a, na i yí deke kere bo i wo adamande ahore su fite fofoe nu. Nyini saɲga ni, ye sɔnɔ kere nyá i kansi Nyɛmɛ dɔ.

⁶ Tɔ, m ninbaam, amberɛ dɛɛ ti ye m kaanri ahin n kere fa kɔ m ni Apolosi jɔɔɛ n a, na am niɛ ya woowa, na am su kabo ba kere i ase ni ɲgumi su, adena má am be yo kpirikoro ka mɔfɔ be tara i lamɔkɔ nyiɲga ni.

⁷ ɲma ase am ka am tara am beɲgu a? Nzu deke ye am la i, ye Nyɛmɛ afa ace má am a? Deke bo am deerɛ i ni, ye nzu ti ye am koro kpiri ka Nyɛmɛ afa ace má am a?

⁸ Am sunsun ka am anya deke n kere bo am koro i n lɛɛ fan. Am ayo neɲgefɔm lɛɛ fan. Am akaaki nfemɛm ayaki ya lɛɛ fan. Nzen má am adi femɛya nahɔɔɛ su, má i yo m fie, adena ya ni amberɛ kere saɲga di femɛya ni.

⁹ Mini dɔ, yere n bo ya ti Kristo jaramasam ni, i ti ka Nyɛmɛ ma ya ka sin wɔ. Ya ti ka minɛm bo ba di ya jɔɔɛ abo ya asi ye ya wu a, na ya di nyini nyinɛ n na sɔnɔ kere nyumbaa ɲu i, mɛɛkɛm ni adamandem kere.

¹⁰ Yere ti sinnzinm wɔ, Kristo dɛɛ ti, ama, amberɛ ti anyunutekefɔm wɔ, Kristo atin n su. Yere ti daburukafɔm wɔ, ye amberɛ ti nfanɲafɔm. Bu bu amberɛ wɔ, ama, yere yiri, bu bu má ya.

¹¹ Haari fa ba ju ni kisa, ahɔɛ ni nzuehɔɛ sukun ya a, ya la má sutura wuraawa kpa, bu bita ya bo wɔ, ya kaaki la má deke bo ya da.

¹² Ya yo ya saa nu juma ni anyumboɔ wɔ, ye ya di a. Nzen minɛm kpie ya nzukɔ, ya sere awieeri kpa ma bu wɔ. Nzen bu kere ya wuwuruwa, ya mindi de i wɔ.

¹³ Nzen bu saaki ya duma, yere jɔjɔ kpa ma bu wɔ. Ya ti ka wura tie bo durunya n nufɔm fa gɔ bonfɔ su n wɔ, haari ni kisa.

¹⁴ I ti má ka m koro ka m wura am nyinɛ dɛɛ ti, ye m sukere ahin jɔɔɛm ma am a, ama, am ti m nbaa koroowam dɛɛ ti, ye m subɔbɔ am a.

¹⁵ Dama nzen haari má am la kerefɔm akpii buru mmɔɔ fa kɔ Kristo dɛɛ atin n su, má am la má sim beberebe, mini ti am si a, Yesu Kristo dɛɛ atin n su, labari kpa n bo m kan kereeri am dɛɛ ti.

¹⁶ Nyini ti, m sere am wɔ, am sɔn m su, na am ma am woowa ti kabo m woowa ti barasu ni.

¹⁷ Nyini dɛɛ ti ye m susunma Timoti am dɔ n a. Yiri ti m wa koroowa nahɔɔɛ su a, na i kaaki la dabuɲu Mibiɛ n atin n su. I tɛɲge am su kabo m woowa ti Kristo atin n su, ni kabo m kere minɛm ka bu wo barasu, deke kere bo m kɔ ni, Kristo jamam n kere nu.

¹⁸ Am nbem sunsun ka m ba má am dɔ kun, nyini ti, ba fa kpirikoro.

¹⁹ Ama, nzen Nyeme soro su, i cé má, m bá nie am busu, na m bá si nyini minem bo bu la kpirikoro ni, má ka bu noanie jɔjɔwa ni ngumi, ama, m nie kabo bu yiko ti barasu.

²⁰ Dama kabo Nyeme nie i minem su ni, i ti má noanie jɔjɔwa n wɔ, ama, i ti yiko wɔ.

²¹ Ahin jɔre nnyom nu, am koro bono o? Am koro ka m bá cin am sui, nzen se? Wara am koro ka m bá am do benle, ni koro wɔ?

5

Dangba sa n bo i wo Kristo jama n nu n jɔre

¹ Ma ti jɔre be, ka dangba sa wo am nu, yiri la ka sono be bita i si yi da a. Haari bo bu su má Nyeme ni mmɔo yo má nyini dangba sa ni.

² Am ayo nyini sa n ye am toko koro kpiri n a fan? Ye am ahore saaki má n a? Wɔ yo daka ka am yi nyini sono n fite am nu.

³⁻⁴ Haari ni bo mini wo má am do ni, m awiewie wo am do, na sono bo i yoori nyini sa ni, ma du mo adi i jɔre ajaraki i ya Mibie Yesu dee duma n nu, kabo má mini ni m tii wo am do na m yo ni. Nzen am ba tieenri am noo, na m awiewie wo am do, na ya Mibie Yesu yiko n wo ya do,

⁵ am fa nyini sono n fa wura Sitana saa nu, na i kere i kekereke fa ko i adamande anuniembaa koroowa n su, adena i awiewie n nya tiide cɛen n bo Mibie ni bá di minem jɔre ni.

⁶ Am yanfoya bo am nati fo i ni, i ti má kpa. Am si má ka ayiri kaan so ma kpɔno n yasu a, nzen se?

⁷ Am sunsun fa ko Butara cɛenkpiri n su, bo bu di kpɔno na bu go má ayiri nu ni, kana bu ba di cɛenkpiri n ni, bu du mo fa ayiri dawa n tu wɔ. Am yi nyini ayiri dawa n fa tu, na am yo ka kpɔno fɔfɔre bo ba fa má ayiri ago má nu. Deke bo m suse n la ka, nzen satie kaan woori am nu, i saaki am kere wɔ. Nyini dee ti, am yi satie kere bo i wo am nu ni. Nahore, am ti mine casim wɔ, am ti ka kpɔno fɔfɔre n wɔ, dama ba fa Kristo ayo yoowa ama ya. Yiri ti ka ya Butara cɛenkpiri bombaa n bo ba kpie i kom n a.

⁸ Nyini ti, am ma ya bita Butara cɛenkpiri nyunyumi, na ya yaki satie bo i ti ka ayiri dawa ni, ama, am ma ya di i ka ya ti minem bo ya ti casi na ya la nahore wɔ, bo i ti ka kpɔno bo ba go má ayiri nu ni.

⁹ Kadasi n bo m yo du mo kere maari am ni, m seeri am ka, má am ni minem bo bu yo dangba sam sanja wo.

¹⁰ To, m sukan má durunya n nufom ni jɔre a, bere bo bu nati yo dangba sam ni, ni bo bu nyunu aboro nenje kpini su ni, ni bo bu fin bu bengum ni, ni bo bu su amɔem ni. Nzen má i ti so yiri, nka má am fite yaki durunya n wɔ.

¹¹ To, bo m sukan n la ka, má am sanja ni minem bo bu yo bu nu ka bu ti am lamoko Kristofom na bu yo dangba sam, wara bu nyunu boro nenje kpini su, wara bo bu su amɔem ni, wara bo bu nati kan minem jɔre, wara bo bu nati nu nzan bo ni, wara bo bu nati fin mine ni. Má am se ka am ni nyini sono n be so mmɔo sanja di diire.

¹²⁻¹³ Má m juma la ka m di bo bu wo má Kristo jama n nu jɔre. Nyeme di bu jɔre a. Bo bu wo Kristo jama n nu ni, ambere ti bo am di bu jɔre a. Nyini dee ti, kabo ba kere i Nyeme Jɔre Kadasi n nu ni, ka, "Am fon yi sono tie n bo i wo am nu ni."

6

Kabo bu fa bu bengu Kristofom ko jɔre diibiri ni

¹ Nzen am be ni i benḡu Kristofɔ be nyaari jɔre be, i ti ye ni ka i mi fa jɔre n kɔ Nyeme minem n dɔ, mǎ i se ka i fa kɔ durunya n nu jɔredifom bo bu si mǎ Nyeme n dɔ fieo.

² Am si mǎ ka Nyeme minem bǎ di durunya n kere jɔre a, nzen se? Ye nzen am bǎ di durunya n kere jɔre, nzu ti ye am koro yo mǎ am nḡu nu jɔre mumukum dɔḡu a?

³ Am si mǎ ka ya bǎ di haari ni mɛrekem jɔre? Ye nzu ti ye am koro di mǎ jɔrem fa kɔ dekem bo bu wo durunya n nu n su a?

⁴ Ambere, nzen am la nyini jɔre n be sɔ, ye nzu ti ye am fa kɔ minem bo Kristo jama n bu mǎ bu n dɔ a?

⁵ Deke bo m sukan i ni, i ti am nyinse wɔ. Alecirafo haari kun n kpein mmɔ wo mǎ am nu bo i koro di am nḡu nu jɔrem, nzen se?

⁶ Ama, ambere, am fa am benḡum kɔ jɔre diibiri wɔ, na am kɔ jina minem bo bu ti mǎ yaradayofom nyunu, na bu di am jɔre.

⁷ Nahɔre, am akpaasi, kabo am nati fa am benḡu kɔ jɔre diibiri ni. Nzen u niwa doori u nḡasi be, i ti ye ni ka a mindi de i. Nzen u niwa be sisiiri u, yaki ce i, i ti ye ni bo a fa i kɔ jɔre diibiri.

⁸ Ama, ambere ni am tii wura am benḡu nḡasi nu wɔ, na am susisi am benḡum, haari ni am benḡu Kristofom kere.

⁹ Am si mǎ ka sɔnɔ kere bo i yo satie koro wura mǎ Nyeme femeya n nu, nzen se? Mǎ am dadaka am nḡu, minem bo bu yo dangba sa koro wura mǎ Nyeme femeya n nu, wara bo bu su amɔem, wara bo bu saaki ajaa ciire, wara nbiesom bo bu fa bu nḡu kaaki ka nbaram na bu ni bu benḡu nbiesom sangda ka bara ni biesɔ dɛe su ni,

¹⁰ wara awiefom, wara bo bu nyunu aboro nenḡe kpini su, wara bo bu nu nzan na bu bo, wara bo bu nati kan minem jɔre, wara bo bu nati fin minem ni, bere be mmɔ koro wura mǎ Nyeme femeya n nu.

¹¹ Am nbem yo ti sɔɔ. Ama, Nyeme anḡmisi ayi am satiem ni, na wɔ fa am ayo i dɛe mine casim, na wɔ de am ka am yo sa bo i kɔ atin su i dɔ, ya Mibie Yesu Kristo duma n dɛe ti, ni ya Si Nyeme Awiewie n dɛe ti.

Am fa am nḡuniembaa yo deke bo i ma Nyeme jirima

¹² Am nbem se ka, “M la atin bo m koro yo deke kere bo m koro ka m yo i,” ama, mǎ deke kere la kperɛ a. Mini mmɔ koro se ka m la atin bo m koro yo deke kere bo m koro ka m yo i, ama, m yaki mǎ na deke be kunma m.

¹³ Nbem gusu nḡa, “Diire ti akunnu dɛe wɔ, na akunnu gusu ti diire dɛe.” I ti nahɔre wɔ, ama, Nyeme bǎ ma akunnu n ni diire n kere ka nḡbɛɛn a. Ama, anḡuniembaa n yiri, i ti mǎ sakaraya dɛe, ama, i ti Mibie n dɛe wɔ, na Mibie n gusu ti anḡuniembaa n dɛe.

¹⁴ Nyeme dɛe yiko n nu ye i tenḡeeri Mibie ni i yiwee nu a. I yiko n nu ye i bǎ tenḡe ya gusu a.

¹⁵ Am si mǎ ka am nḡuniembaa n ti Kristo anḡuniembaa n bue be wɔ, nzen se? Ye m koro fa Kristo anḡuniembaa n bue be yo sakaraya, nzen se? Ai, atin wo mǎ nu.

¹⁶ Am si mǎ ka sɔnɔ kere bo i faari i nḡu mataari bara sakara na bu sangda woori, bere nnyɔ n ayo deke kun wɔ lɛɛ, nzen se? Dama ba kere i Nyeme Jɔre Kadasi n nu fa kɔ biesɔ ni i yi jɔre su, ka, “Bu mine nnyɔ n ayo deke kun lɛɛ.”

¹⁷ Sɔnɔ kere bo i faari i nḡu mataari Mibie n na bu sangda woori ni, i ni yiri dɛe awiewie n ayo kun lɛɛ.

¹⁸ Am ηmati fite sakaraya nu. Má satie kere bo sɔnɔ yo i ye i saaki i ηuniembaa n a. Ama, bo i yo sakaraya ni, i mi saaki i ηuniembaa n wɔ.

¹⁹ Am si má ka am ηuniembaa n ti ka awuru bo Awiewie Casi n wo nu n wɔ, nzen se? Yiri ye Nyeme fa maari am n a, má am dɛɛ la am ηu.

²⁰ Nyeme ato am ato kaari wɔ, nyini ti, am fa am ηuniembaa n fa yo deke bo i ma Nyeme jirima.

7

Kabo i ti ye ni ka biɛsɔ ni bara wo barasu ni

¹ Tɔ, jɔrɛ n bo am kere maari m ni, am ηa, “I ti ye ni ka má biɛsɔ si bara.”

² I ti nahore wɔ, ama, mini dɔ, sakaraya dɛɛ ti, i ti ye ni ka biɛsɔ kere la i tienɔgu yi, na bara kere la i tienɔgu hun.

³ I ti má ye ni ka biɛsɔ kete na má i ni i yi sanɔa, i kaaki ti má ye ni ka bara kete na má i ni i hun sanɔa.

⁴ Má bara n dɛɛ la i ηuniembaa ni, i ti i hun n dɛɛ wɔ, sɔ ye i kaaki ti a, má biɛsɔ n gusu dɛɛ la i ηuniembaa ni, i ti i yi n dɛɛ wɔ.

⁵ Má am kete am beɔgu daari, má ka am ayo anɔɔkun ka am fa nyini sanɔa kaan sere Nyeme, nyini sin, na am kaaki sanɔa bekun, adena má Sitana yo am nie na i nya am, dama am koro tara má am ηu dɛɛ ti.

⁶ I ti má ka m suma am nɔɔ ka am yaki i wɔ, ama, m suma am atin ka am koro yo sɔ sɔ.

⁷ Mini dɔ, nzen má sɔnɔ kere wo kabo m wo ni, i yo m fie, ama, sɔnɔ kere ni i aceeri bo Nyeme afa ama i, be dɛɛ wo i ηgumi, na be gusu dɛɛ wo i ηgumi, i kere ti má kun.

⁸ Kisa m sujɔɔ ambere nbiesɔm ni nbaram bo am nya ja má ni dɔ a, ni nkunafɔm, nzen má am wo kabo m wo ni, na am ja má, i ti kpa.

⁹ Ama, nzen am koro tara má am ηu, am ja. Nzen am yo sɔ, i ti ye ni bo sanɔa kere am la konviki agaya fa kɔ bara ni biɛsɔ dika, na am koro tara má am ηu ni.

¹⁰ Ahin ti nbiesɔm ni nbaram ajaafɔm dɛɛ jɔrɛ ye m sukan i n a, má mini suse a, ama, i ti Nyeme nɔanie maawa a, ka má bara yaki i hun ajaa.

¹¹ Ama, nzen i kɔ yoori ka be afite i hun dika, má i ja kun, i tana sɔ, wara i kaaki kɔ i hun n dika. Má biɛsɔ n gusu se ka i yaki i yi ajaa.

¹² Minɛm bo ba ka ni, m dɛɛ fɔ ye m sufa tu am n a, má Nyeme seeri sɔ a. Nzen Kristofɔ be yi ti má yaradayofɔ, na wɔ soro su ka i tana i hun n ajaa bu, má i yaki i ajaa, i bita i.

¹³ Nzen bara be ti Kristofɔ, na i hun ti má yaradayofɔ, na biɛsɔ n asoro su ka i ni i yi n sanɔa tana, má bara n yaki i ajaa, i tana.

¹⁴ Dama biɛsɔ n bo i yo má yarada ni, Nyeme ade i ayo i dɛɛ sɔnɔ, i yi n bo i ti Kristofɔ n dɛɛ ti, na bara n gusu bo i yo má yarada ni, Nyeme ade i ayo i dɛɛ sɔnɔ, i hun n bo i ti Kristofɔ n dɛɛ ti. Nzen má nyini, Nyeme dɛ má bu nbaam, ama, kabo i ti ni, Nyeme ade bu.

¹⁵ Ama, nzen bo i ti má yaradayofɔ n kete ka i ja má, yaki i na i kɔ, nyini sanɔa, Kristofɔ n la má ηgasi be. Nyeme afere ya ka ya wo ni tanalaifie wɔ.

¹⁶ Wɔrɔ bara ni, beni, wɔrɔ dɛɛ ti, u hun ni nyá tiide, na wɔrɔ biɛsɔ n gusu, beni, wɔrɔ dɛɛ ti, u yi ni nyá tiide.

Kabo ya yo ti na Nyeme fereeri ya ni, ya ti sɔ

¹⁷ Tɔ, am ma sɔnɔ kere wo kabo Mibiɛ n kereeri i sanɔa bo Nyeme fereeri i ni. Deke kere bo m kɔ Kristo jamam n nu, kabo m kere bu ka bu yo lɛɛ.

¹⁸ Nzen be wo bere, na wo du mo awura kenkenne ka, ye Nyeme ba fereeri i, i ti ye ni ka i mi yaki i kenkenne yoowa n so. Nzen be gusu wo bere, na wo wura ma kenkenne, ye Nyeme afere i, i ti ye ni ka i mi wo so, ma i se ka i wura kenkenne.

¹⁹ Bo wo wura kenkenne n ni bo wo wura ma kenkenne ni, i be mmoo ti ma pui, ama, deke bo i ti jore nahore su n la ka, sono bita Nyeme noanie maawam ni.

²⁰ I ti ye ni ka sono kere wo kabo i yo ti barasu na Nyeme nya ba fereeri i ni.

²¹ Nzen a ti akoo, ye Nyeme afere u, ma a ma i yo u yaa, ama, nzen a si ka a koro nya atin na a de u tii, a koro yo so.

²² Dama sono kere bo i ti akoo na Mibie n afere i, i ti Mibie n dee sono bo wo de i tii aji wo, sono kere gusu bo i ti ma akoo na Mibie n afere i, so ye wo kaaki Kristo akoo a.

²³ Nyeme ato am ato kaari wo, nyini dee ti, ma am yo adandem akoom.

²⁴ Nyini ti, m ninbaam, kabo sono kere ti na Nyeme afere i ni, i ti ye ni ka i mi wo so ni Nyeme.

Nbaram ni nbiesom bo bu ja ma n jore

²⁵ Fa ko minem bo ba nya aja ma ajaa n do ni, m la ma kereewa bo i fite Mibie n do fa ko nyini n dika, ama, Mibie n asi m anunfo na m la dabunu n dee ti, ye m koro ka m se am deke bo i wo m sunsunni nu n a.

²⁶ Mie n bo ya wo nu kisa n dee ti, mini do, nzen ma sono kere koro wo i wo, ma i ti kpa.

²⁷ Nzen a du mo aja bara, ma a kpini atin na a yaki ajaa ni. Nzen a nya ja ma gusu, ma a kpini atin na a ja.

²⁸ Nzen a ti bieso ye a ja bara, a yo ma satie, nzen a ti sunguru gusu ye a ja bieso, a yo ma satie. Ama, wahara n bo ajaajafom di i durunya n nu n ye m koro ma ka am di i be a.

²⁹ M ninbaam, deke bo m suse n la ka, sangga n waari ma kun. Nyini ti, fa kisa fa ko, bo bu la nbaram ni, i ti ye ni ka bu wo ka bu la ma be.

³⁰ Na bo bu sun ni, ma bu wo ka bu sun ma, na bo bu ahore ajo ni, ma bu wo ka bu ahore ajo ma, na bo bu to nengem ni, ma bu wo ka ma bu dee la nenge ni.

³¹ Na bo bu fa durunya n nu nengem fa yo bu jumam ni, ma bu wo ka bu cee wo ma bu nu, dama ahin durunya n ni deke kere bo i wo nu n ti siinwa a.

³² M koro ma ka deke be mie am, am sunsunni nu. Sono bo i la ma bara ni, i sunsunni kere wo Mibie n dee juma ni su a, i dee la ka, i yo sa bo i sun Nyeme nu wo.

³³ Ama, sono bo wo ja bara, i sunsunni kere wo durunya n nu dee dekem ni su a, i dee la ka, i yo sa bo i sun i yi nu wo,

³⁴ nyini ti, i sunsunni ti nnyo nnyo o lee. Na bara bo i ja ma, wara sunguru bo i si ma bieso, i sunsunni kere wo Mibie n juma ni su a, adena i wo casi i nuniembaa ni i awiewie nu. Ama, bara bo i la hun, i sunsunni kere wo durunya n nu dee dekem ni su a, i dee la ka, i yo sa bo i sun i hun nu wo.

³⁵ M koro ka m buka am wo, nyini ti ye m se so n a, i ti ma ka m koro ka m kanda am atin wo. Ama, m koro ka am yo sa kere bo i ko atin su wo, na am fa am nu ma Mibie n nahore su, na am su i nyunyumi.

³⁶ Ama, nzen sunguru be wo bere na wo nya si ma bieso, na ba ce i, na i ni bieso n kere ayo bu sunsunni nu ka bu ja ma, ama, kasin na bieso n ba nu ka i koro tara ma i nu, na bara n aju ajaa, i koro ja i, i ti ma satie.

³⁷ Ama, nzen wɔ jina su kekereke i sunsunni nu, na i ti má deke bo bu mié i, na i koro tara i ɲu fa kɔ i kunnu koroowa su, na wɔ yo i sunsunni nu ka i ja má sunguru ni, ama, bu wo ka bu ti danfoya a, bo bu si má bu benggu ka bara ni biesɔ, nyini ti kpa a.

³⁸ Nyini ti, sɔnɔ kere bo i jaari i sunguru ceewa ni, nyini ti kpa, ama, bo i ja má i fieo ni, i mi yo sakpa tara bo i ja i ni.

³⁹ Nzen bara ni i hun wo bere, na biesɔ n nya wu má, bara n la má atin bo i fite i ajaa n bu, ama, nzen i hun wuuri, i la atin bo i kɔ ja sɔnɔ kere bo i koro, ama, wɔ yo daka ka i mi ti Mibié n deé sɔnɔ.

⁴⁰ M deé sunsunni nu, nzen má i wo sɔ na i ja má, má i la terefie agaya tara bo i ja. M nie ka mini mmɔɔ ni m tii la Nyeme Awiewie ni.

8

Amɔe diire diiwam n jɔre

¹ Tɔ, fa kɔ dekem bo bu kpie bu kɔm yo tie fa ma amɔem deé jɔre, ya si ka ya kere la si. Ama, si ka nyini n sɔ ma mine wura bu ɲu kpiri wɔ, ama, koro yiri, i buka sɔnɔ ɔ, na i woowa ti kpa.

² Sɔnɔ kere bo i yo i ɲu ka i si deke be, i mi nya la má si nahɔre su kabo má i sunsun ka i si i ni.

³ Sɔnɔ kere bo i koro Nyeme ni, Nyeme si yiri wɔ.

⁴ Nyini ti, fa kɔ kabo minem di amɔe tie diirem ni, ya si ka amɔe ti má pui durunya n nu, na nyeme be wo má bere sin ya Nyeme ni ɲgumi kpein ɲu.

⁵ Haari nzen dekem bo minem ɲa bu ti amɔem wo angoro ni asienɲu fen, na nzen i ti nahɔre ka amɔem ni mibiém dɔɲgu wo bere mmɔɔ,

⁶ yere dɔ, Nyeme kun n kpein wo bere a, yiri la ya Si Nyeme, yiri yo yiiri deke n kere a, ya wo bere ma yiri wɔ. Ya kaaki la Mibié kun n kpein wɔ, yiri la Yesu Kristo, Nyeme ma yiri yiiri deke n kere a, i deé ti ye ya wo bere a.

⁷ Ama, má sɔnɔ kere la nyini si n a, nbem wo bere bo ba su amɔem ace, nyini ti, haari ni kisa nzen bu diiri nyini diire n be, bu sunsun ka bu toko di amɔe tie nie wɔ, na bu sunsunni suma bu nnyɔ nnyɔ ɔ, ka bu ti má casi.

⁸ Nyeme de má ya diire deé ti, nzen ya diiri i, i buka má ya pui, nzen ya di má i gusu, i kpie má ya su.

⁹ Ama, am si am ɲu sa, ambere bo am ade am tii ni, na má am yo sa be bo i ma am niwa n bo i jaa kpaasi, yiri n bo i yarada ti má biiwa ni.

¹⁰ Nzen sɔnɔ bo i sunsunni n ti nnyɔ nnyɔ n ɲu ka wɔrɔ bo a la nyini si n sɔ wo amɔe awuru n nu sudi amɔe diire be, nyini ma i ahoresi ka i di be na i nie a, má sɔ? Eɛn, i mi dí ɔ.

¹¹ A yoori sɔ, u si n deé ti, a suma u niwa n ka ɲgbɛɛn lee, yiri n bo i yarada ti má biiwa ni. Yiri gusu ti u niwa bo Kristo wuuri i deé ti wɔ.

¹² Nzen am yo sɔ, am suyo am ninbaam satie wɔ lee, na am sufɔndɔ bu sunsunni bo i ti nnyɔ nnyɔ n lee, nyini n sɔ ni, am suyo Kristo gusu satie wɔ lee.

¹³ Nyini ti, nzen diire bo m di i, na i ma m niwa Kristofɔ bo i jaa kpaasi, m dí má nie bekun fieo, adena má m niwa n bo i jaa kpaasi.

9

Atin bo Kristo jaramasam la i fa kɔ bu juma n su ni

¹ M ti má sɔnɔ bo ma de m tii wɔ, nzen sɛ? M ti má Kristo jaramasa a, nzen sɛ? Ma ɲu má ya Mibiɛ Yesu wɔ, nzen sɛ? Kabo am ayo yarada ni, má amɛrɛ ti m jumayoowa, Mibiɛ n dɛɛ ti a, nzen sɛ?

² Haari nzen nyiŋgam de má m ka m ti jaramasa, amɛrɛ si ka m ti i jaramasa a, dama kabɔ am ni Mibiɛ n ayo kun ni, nyini kere am ka m ti i jaramasa a.

³ Nzen mine se m jɔrɛ, ka m ti má Kristo jaramasa, má m bisa bu ka,

⁴ mini ni Banabasi, ya la má atin ka ya de deke bo ya di i, ni deke bo ya nu i, Kristo jama n dɔ ɔ, nzen sɛ?

⁵ Ya la má atin ka nzen ya sukɔ atin, ya koro fa ya yim bo bu ti yaradayoƆm bita nu, kabɔ ya beŋgu Kristo jaramasa nbem yo ni, ni kabɔ ya Mibiɛ niemam, ni Kefasi bo bu kaaki fere i ka Petoro gusu yo ni, nzen sɛ?

⁶ Wara m ni Banabasi ɲgumi ye i ti ye ni ka ya yo ya saa nu juma ka, na ya nya di a?

⁷ Ɔma wo ɛrɛ bo i yo soja juma na i tɔ i tii su kaari a? Ai, bu tɔ bu wɔ. Ɔma wo ɛrɛ bo i ta bakam, na i di má suuwam be a? Ai, bu di wɔ. Wara ɲma wo ɛrɛ bo i sasa neŋgendɔrem na i nu má nɔnɔ a? Ai, bu nu wɔ.

⁸ M sufa má adamande dɛɛ sunsunni nu ye m sufa se sɔ n a, ama, kabɔ nɔaniɛ kpamaawa n kere lɛɛ.

⁹ Ba kɛrɛ i Nyemɛ nɔaniɛ kpamaawa n bo i fa maari Moyisi n nu ka, “Nzen a bita toora subobo ɲgani, má a cici i nɔɔ.” Tɔ, naanim ɲgumi ye Nyemɛ cɛɛ wo bu nu a, nzen sɛ? Ai, má ɛrɛ ɲgumi.

¹⁰ Nahɔrɛ, ya ti ka dɔdɔrifɔm wɔ, yerɛ dɛɛ ti ye bu kɛrɛri sɔ a, adena bo i dɔ ɲgani n ni bo i bobo i n kɛrɛ la tama ka bu nyá be na bu kpáaki nu.

¹¹ Yerɛ kaanri Nyemɛ nɔaniɛ ni kɛrɛri am a, kabɔ dɔdɔrifɔ dɔ alɛmbaa ni, na amɛrɛ ade i. Ye nzen i ti sɔ, yerɛ la má atin bo ya koro nya deke be am dɔ, nzen sɛ?

¹² Nzen nyiŋgam la atin ka bu de neŋgem am dɔ, yerɛ la má atin bo ya de tara sɔ, nzen sɛ?

Ama, yerɛ akere má ya yiko ka ya de nyini n be sɔ, dama ya koro má ka ya kanda minɛm, na má bu de Kristo labari kpa ni.

¹³ Am si má ka, minɛm bo bu yo juma Nyemɛ Sereebiri Awuru n nu ni di nyini nu wɔ, nzen sɛ? Na bo bu nati yo juma Mikun yoowa yoobiri n su ma minɛm gusu di nyini nu wɔ, nzen sɛ?

¹⁴ Sɔ ye Mícɛra n ama nɔɔ a, ka bo bu kan labari kpa n jɔrɛ n nya deke bo bu di i fite labari kpa n kan nu a.

¹⁵ Ama, haari ni bo má m la atin ka m yo sɔ ni, ma yo má nyini n be sɔ, na m sukɛrɛ má ahin kadasi n ka m de deke be am dɔ ɔ, dama nzen m wuuri, má i ti ye tara bo be se ka m fɔ yanfɔya ɲgbɛɛn ni.

¹⁶ Nzen m kan labari kpa n jɔrɛ kere mine, m la má atin bo m fɔ, dama i ti m juma bo Nyemɛ ama m ka m yo i wɔ. Nzen m keteeri ka m yo má i, m nyá suicin.

¹⁷ Nyini ti, nzen m kan labari kpa n jɔrɛ m koroyanu, m nya ɲkatɔ, ama, i ti má m koroyanu, dama Nyemɛ afa nyini juma n ama m ka m yo i a.

¹⁸ M dɛɛ ɲkatɔ la bɔnɔ? Yiri la ka m kan labari kpa n jɔrɛ fa kere minɛm ɲgbɛɛn, m la atin bo m sere deke be bu dɔ, ama, m yo má i.

¹⁹ Haari ni bo ma de m tii na m ti má be dɛɛ akɔɔ ni, m fa m ɲu yo akɔɔ ma sɔnɔ kɛrɛ wɔ, adena m koro nya mine dɔŋgu na bu su Kristo su.

²⁰ Nzen m kɔɔri YudaƆm dɔ, m yo kabɔ bu yo n wɔ, adena m koro nya bu nbem na bu su Kristo su. Nzen m kɔɔri minɛm bo Nyemɛ nɔaniɛ kpamaawa n niɛ bu su n dɔ, haari ni bo nɔaniɛ kpamaawa n niɛ má mini ni m

tii su kun ni, m yo kabo bu yo n wɔ, adena m koro nya minem bo nɔanie kpamaawa n nie bu su ni nbem na bu su Kristo su.

²¹ Nzen m kaaki kɔori minem bo bu la má nɔanie kpamaawa n dɔ, m yo kabo bu yo n wɔ, i ti má ka m su má kabo Nyeme nɔanie kpamaawa n kere n su wɔ, ama, Kristo dɛɛ nɔanie ni nie m su a, adena m koro nya minem bo bu la má nɔanie kpamaawa n na bu nbem su Kristo su.

²² Nzen m kɔori minem bo bu yarada la má fanɔa n dɔ, m yo m ɲu ka mini mmɔɔ la má fanɔa wɔ, adena m koro nya bu nbem na bu su Kristo su. Deke kere bo m kɔ, m yo m ɲu kabo nyini minem yo barasu n wɔ, adena m koro ma bu nbem nya tiide.

²³ M yo nyini n kere sɔ ɔ, labari kpa n dɛɛ ti, adena m ni nyingam kere sanɔa di i kperɛ.

²⁴ Am si ka nzen minem awura akuruwa ka bu ɲmati, na bu nie bo i kunma i benɔum, bu kere ɲmati wɔ, ama, bu nu sɔnɔ kun bo i kɔ kunmaari bu kere ni, yiri nya aceeri n a. Nyini ti, sɔnɔ kere mie i nyi, na i wo woowa kpa fa kɔ Kristo atin n su, kabo ɲmatiirifo n bo i kunma i benɔu n ti ni, adena i nya aceeri ni.

²⁵ Minem bo bu ɲmati ɲmatiiri ni, wara bo bu bo baalo ni, bu kere boro bu nyi wɔ ni anyumbo fa kɔ nyini kɔkɔrɔ n su. Bu yo sɔ ɔ na bu nya aceeri n bo i cɛ má ni, ama, yere yiri, ya nyá aceeri n bo i wie má na i wo bere sanɔa kere n wɔ.

²⁶ Nyini dɛɛ ti, mini, m ɲmati má ɲgbɛɛnɲgbɛɛn ka sɔnɔ bo i si má bo i wo nu ni. M ti má sɔnɔ bo m bo acɔre na m bo fun.

²⁷ Ama, m kere m ɲunie n wahara a, na i yo kabo m koro ni, adena má m yo sɔnɔ bo m kan labari kpa n jɔre kere minem, na mini mmɔɔ fun aceeri ni.

10

Kabo Pɔɔlu bɔbɔri bu ka má bu su amɔem ni

¹ M ninbaam, m koro ka m tenɔge am su ka sanɔa bo ya nam yo suuri Moyisi su fiteeri Ijipiti asien n su ni, yinyingu n yo kataari bu kere ɲu wɔ, na bu kere ayɔ awura kunma nzue bambaka n nu na ba kpiɛ.

² Kabo i yoori sɔ ni, i yo ti ka ba bie bu Nyeme nzue, afa bu ama Moyisi wɔ lɛɛ.

³ Bu kere yo sanɔa diiri diire n bo i ti má durunya n nu fen dɛɛ diire n a,

⁴ na bu kere asanɔa anu deke nuuwa kun n bo i ti má durunya n nu fen dɛɛ ni, dama yabue n bo nzue n songi fiteeri nu na bu nuuri i n na i suuri bu su ni, i fite má durunya n nu fen, nyini yabue n la Kristo Tiidefo ni.

⁵ Ama, haari ni nyini mmɔɔ, bu dɔɲgu sayoowa asun má Nyeme nu, nyini dɛɛ ti na ba wu aka ɲgbɛɛn boro kpantain n nu.

⁶ Tɔ, ahin sam kere bo bu yo yoori ni, bu ti deke bo bu sufa kere ya a, ka má ya sufa konviki, na ya su satiem su, kabo bu yo yoori ni.

⁷ Na má am su amɔem kabo bu nbem yo yoori ni. Kabo ba kere i Nyeme Jɔre Kadasi n nu ni, ka, "Minem n yo tanaari wɔ, na ba di, na ba nu, na ba nya ayasu ago agɔre."

⁸ Má am ma ya yo sakaraya kabo bu nbem yo yoori, na cɛen kun nu na bu minem kɔ akpii aburanyɔ ni akpii nsan wuuri ni.

⁹ Má am ma ya yo Mibie n na ya nie, kabo bu nbem yo yoori i na bu nie, na woom kan kuunri bu ni.

¹⁰ Má am surɲuti kabo bu nbem yo ɲunɲutiiri na mereke saakifo n ba kuunri bu na bu kaari ɲgbɛɛn ni.

¹¹ Ahin sam kere bo bu yo yoori ni, bu ti deke bo bu sufa kere ya wɔ, nyini ma bu kereeri bu seeri n a, na bu fa bobo yere n bo ya wo ahin awieeri su sanƆa n nu ni.

¹² Nyini ti, sɔnɔ kere bo i sunsun ka i jina nyunyumi, i ti ye ni ka i mi si i ŋu sa, na má i kpaasi.

¹³ Gberɛgbere be wo má bere bo wɔ tu am, na i be nya tu má adamande. Nyeme la dabuŋu, i yáki má na gberɛgbere bo i kúnma am bá tu am, ama, haari nzen gberɛgbere be bá tuuri am, i kpíni atin ma am, na i má am koro mindi de i.

¹⁴ Nyini deɛ ti, m ninbaa koroowam, am ŋmati fite amɔɛ su nu.

¹⁵ M sujojo am do ka am ti minem bo bu nyunu ateke wɔ, amberɛ mmɔɔ ni am tii, am si deke n bo m sujojo i n bu.

¹⁶ Nzen ya sudi ya Mibiɛ n diire ni, na ya faari awa n ni nzan n na ya yo kisi go su, na ya kere sanƆa nuuri i, i ti Kristo mbunja wɔ lee, ye ya nu i n a. Kponɔ n gusu bo ya kpiekpie i nu na ya sanƆa di i ni, i ti Kristo ŋuniembaa n wɔ lee, ye ya di i n a.

¹⁷ Kponɔ n bo ya kere sanƆa di i n ti momo kun wɔ, nyini deɛ ti, yere bo ya ti mine beberebe ni, ya ti anuniembaa kun wɔ lee, dama ya kere sanƆa di kponɔ kun n wɔ.

¹⁸ Am nie kabo Yisarelifom yoori ni. Minem bo bu di dekem bo bu fa yo yoowa Mikun yoowa yoobiri n su n ni, bu ni Nyeme la wo fie bo i ma bu yo anɔkun, fa ko bu nyemesu atin n su.

¹⁹ M suse má ka dekem bo bu yo tie n ma bu n wo má bere wɔ, wara amɔɛm ni bu tii wo má bere. Ai, má so.

²⁰ Ama, dekem bo amɔɛsufom yo tie ma bu ni, bu yo ma ajinim wɔ, bu yo ma má Nyeme. M koro má ka am di amɔɛ tie diirem, na am ni ajinim sanƆa.

²¹ Nahore, m koro ka am si ka am koro nu má ya Mibiɛ ni nzan awa n nu, na am kaaki nu ajinim deɛ gusu buka su, nyini koro yo má, na am kaaki koro di má ya Mibiɛ n diire ni, na am kaaki di ajinim deɛ buka su, nyini koro yo má,

²² wara ya koro ka Mibiɛ n si ya kore na i fa yaa ya ŋu wɔ. Ya la fanƆa tara i wɔ, nzen se? Ai, ya lá má fanƆa.

Ya yo sa bo i sun Nyeme nu

²³ Am nbem se ka, “Ya la atin bo ya koro yo deke kere bo ya koro ka ya yo i ni.” I ti nahore wɔ, ama, má deke kere la kperɛ a. Am ŋa, “Ya la atin bo ya koro yo deke kere bo ya koro ka ya yo i ni.” I ti nahore wɔ, ama, má deke kere buka ya a.

²⁴ Má am nie kabo am yo na amberɛ ŋgumi yo ye, ama, am nie kabo am yo na am bengum gusu yo ye.

²⁵ Nie kere bo nanƆosim to i ni, am di i, má am yo sika.

²⁶ Dama ba kere i Nyeme Jore Kadasi n nu ka, “Durunya n ni deke n kere bo i wo nu n ti Micera n deɛ wɔ.”

²⁷ Nzen sɔnɔ bo i yo má yarada baandiiri am ka am ba di diire, na am soro su, am di deke kere bo bu fa ma am ni, má am kere nu, sika deɛ ti.

²⁸ Ama, nzen be se am ka, ahin nie n ti tie nie wɔ, nyini yiri, má am di, yiri n bo wɔ se so ni, i sunsunni suma i nnyo nnyo n deɛ ti, má am di.

²⁹ I mi n deɛ sunsunni nnyo nnyo n deɛ ti, má a di i, má u deɛ ti a. M deɛ la m tii, ye nzu ti ye m ma be deɛ sunsunni nnyo nnyo n di m jore, na má m yo kabo m koro a.

³⁰ Nzen m da Nyeme asi go diire n su na m di i, be yo se koro jaraki m diire n dee ti a? Dama ma du mo ada Nyeme asi ago diire n su.

³¹ Nyini ti, nzen am diiri diire, wara am nuuri deke nuuwa, wara deke kere bo am yoori i, am yo i na i wura Nyeme kpiri.

³² Ma am yo sa bo i ma minem bo bu jaa na bu kpaasi, bo bu ti Yudafo m ni, ni bo bu ti ma Yudafo m, haari ni Kristo jama ni.

³³ So ye mini mmoo ni m tii boro m nyi a, na m yo sa bo i sun sono kere nu, m sunie ma kabo m yo na mini ngumi yo ye wo, ama, m yo deke bo i buka sono kere wo, adena bu nya tiide.

11

¹ Am son m su, na am ma am woowa ti kabo m woowa ti barasu n na m son Kristo su ni.

Tii kata su jore fa ko nyemesere su

² To, m kansi am wo, dama sanga kere am nati tenge m su wo, na am bita kereewam bo m fa kereeri am n ni nahore su ni.

³ Ama, deke bo m koro ka am si i la ka, bieso kere tiifo la Kristo wo, na bara kere tiifo la i hun, na Kristo gusu tiifo la Nyeme.

⁴ Nyini ti, bieso kere bo i susere Nyeme, wara i sukan Nyeme noanie n kere minem, na i kata i tii su, i mi awura i tiifo n nyinse wo lee.

⁵ Na bara kere bo i susere Nyeme, wara i sukan Nyeme noanie n kere minem, na wo kata ma i tii su, nyini bara n suwura i tiifo nyinse wo lee. I ti ka wo yi i tii wo lee.

⁶ Nzen bara kete ka i kata ma i tii su, nyini yiri, i ti ye ni ka i kpiekpie i tii ni, ama, nzen i ti i nyinse ka i kpiekpie i tii, wara i yi i, nyini yiri, i ti ye ni ka i fa deke kata su.

⁷ Nyini ti, i ti ma ye ni ka bieso susere Nyeme na i fa deke be kata i tii su, dama i ferema ni Nyeme wo, i de Nyeme jirima woowa a, ama, bara n yiri, i de bieso n jirima woowa a.

⁸ Dama Nyeme afa ma bara ye i fa yoori bieso a, ama, i du mo yiiri bieso o ka, na wo nya ayi bara afite i nunie nu.

⁹ Ma bara dee ti, ye Nyeme yoori bieso a, ama, bieso dee ti, ye i yoori bara a.

¹⁰ Nyini dee ti, wo yo daka ka bara cin acici, na i kere ka be la i yiko, merkem dee ti.

¹¹ Ama, haari ni nyini n kere ni, fa ko Mibie n dee atin n su, bara wo ma i ngumi, na bieso gusu wo i ngumi.

¹² Dama kabo Nyeme yo yiiri bara fiteeri bieso nunie nu ni, so ye bara gusu wu bieso a, ama, deke n kere fite Nyeme do o.

¹³ Ambere mmoo ni am tii, am sunsun na am nie, i ti kpa ka bara sere Nyeme na ma i cin acici?

¹⁴ Am nie kabo adamande woowa ti a, i kere ka nzen bieso yaki i tiinmie na i yo tintiin jonjondi, minem bu ma i.

¹⁵ Ama, nzen bara la tiinmie tintiin ye i la jirima a, dama Nyeme ama i tiinmie n ka i fa kata i tii su wo.

¹⁶ Nzen be wo am nu na i yo i nu ka i se akuruwa fa ko kabo m suse ni, m koro ka m se am ka, yere, ya su ma nyini yoowa n su, haari ni deke kere bo Kristo jamam tien bu noo ni, be yo ma so.

Ya Mibie n diire n jore

¹⁷ Tɔ, ahin kereewam bo m koro ka m fa kere am ni, m koro kansi má am, dama sanɔa bo am ba tien am nɔɔ, sam bo am yo bu ni, bu buka má am, bu ma am kɔ am sin wɔ.

¹⁸ Ciciri su, ma ti ka sanɔa bo am ba tien am nɔɔ na am su Nyeme ni, am la kpakpaakinu wɔ. Ma yo yarada ka, beni, i ti nahɔre wɔ.

¹⁹ Nahɔre, wɔ yo daka ka am la kpakpaakinu am nu, adena am si bo bu ti yaradayofɔm nahɔre su ni.

²⁰ Am ba tien am nɔɔ ni, má ya Mibiɛ n diire n ye am tien am nɔɔ di i n a.

²¹ Dama sanɔa bo am ba sudi ni, sɔnɔ kere di i tienɔgu diire wɔ, be nɔminda má i beɔgu, na ahɔe suti nbem, na nbem nu nzan subo.

²² Am la má am tienɔgu awurum wɔ, bo am koro di na am nu wɔ, nzen se? Wara am bu Kristo jama ni nɔgbɛɛn wɔ, haari na am suwura bo bu la má pui nyinse? Am nɔa m se am se wɔ? Am nɔa m kansi am wɔ, nzen se? Ai, m koro kansi má am ni nyini yiri.

²³ Dama deke n bo mini ni m tii deeri i fiteeri Mibiɛ n do ni, nyini ye ma fa akere am n a. Kɔnɔgue n bo bu tɔɔri ya Mibiɛ Yesu maari i kpɔfɔm ni, na wɔ fa kpɔnɔ,

²⁴ na wɔ da Nyeme asi, na wɔ bubu i nu, na wɔ se bu ka, “Ahin kpɔnɔ n ti m nɔuniɛmbaa lɛɛ ye m sufa ma am n a. Am yo ahin sɔ adena am fa tenge m su.”

²⁵ Bu diiri diire n wieeri ni, na wɔ kaaki afa awa n ni nzan ni, na wɔ se bu ka, “Ahin nzan n ti sesesu fɔfɔre n bo Nyeme sufa m mbunja n sudi i di wɔ. Sanɔa kere bo am ba sunu nyini nzan ni, am tenge m su.”

²⁶ Nyini la ka, sanɔa kere bo am ba sudi ahin kpɔnɔ n na am sunu ahin nzan ni, am subo Mibiɛ n yiwee ni ndoori wɔ lɛɛ, haari fa kɔ ju sanɔa bo i bá kaaki ba bekun ni.

²⁷ Nyini ti, sɔnɔ kere bo i diiri ya Mibiɛ n kpɔnɔ ni, wara i nuuri i nzan ni, na i bu má i, Nyeme dí i mi jɔre jaraki i, dama wɔ fa má ya Mibiɛ nɔni n ni i mbunja n ayo má juma.

²⁸ Wɔ yo daka ka sɔnɔ kere niɛ i ahorembaa su ka, na i nya di ahin kpɔnɔ ni, na i nya nu nzan ni.

²⁹ Dama sɔnɔ kere bo i diiri kpɔnɔ n na i nuuri nzan n na wɔ si má ka ya Mibiɛ nɔniɛmbaa n lɛɛ, Nyeme bá di i mi jɔre jaraki i.

³⁰ Nyini deɛ ti ye am nu, mine dɔnɔgu ayɔrɔki ada tukpaki, haari nbem awu n a.

³¹ Nzen yere ni ya tii du mɔ fiiti niɛeri kabo ya woowa ti, Nyeme di má ya jɔre cin má ya sui.

³² Ama, nzen Mibiɛ n fiiti ya na i cin ya sui, i yo sɔɔ adena i di má ya jɔre na i yo ya nɔgbɛɛn, cɛɛn n bo i bá di durunya n nufɔm jɔre ni.

³³ Nyini deɛ ti, m ninbaam, sanɔa kere bo am ba tien am nɔɔ, na am di, am kere nɔminda am beɔgu, na am sanɔa di.

³⁴ Nzen ahɔe ati be, i ti ye ni ka i mi di diire awuru ka, na i nya ba, adena nzen am ba tien am nɔɔ, na má Nyeme di am jɔre cin am sui. Jɔre n kere bo wɔ ka ni, nzen m ba baari, m yó i dɔnɔgu.

12

Aceerim bo Awiewie Casi n fa ma minem n jɔre

¹ Tɔ, m ninbaam, m koro ka am si sa bo i wo bere fa kɔ Awiewie Casi n aceerim su.

² Am si ka sanɔa bo am yo su má Nyeme ni, bu yo taari am nyi wɔ, na am susu amɔɛm bo bu koro jɔɔ má ni.

³ Nyini ti, m koro ka am si ka sɔnɔ kere bo Awiewie Casi n wo i dɔ, i mi koro se má ka, “Yesu aka nɔbɛn,” na be gusu koro se má ka “Yesu ti m Mibie,” má ka Awiewie Casi n wo i mi dɔ.

⁴ Aceerim barasu barasu wo bere, ama, Awiewie Casi n ti kun wɔ.

⁵ Amusuim bo ya yo buka minem wo bere barasu barasu, ama, ya su Mibie kun wɔ.

⁶ Sɔnɔ kere la atin barasu barasu kabo i mi koro fa yo i juma, ama, Nyeme kun ni yo nyini n kere a.

⁷ Nyeme ma sɔnɔ kere Awiewie Casi n aceerim n bo i kere ka Awiewie Casi n wo i mi dɔ a, na i fa buka Kristo jama n kere.

⁸ Awiewie Casi ni ma sɔnɔ be jɔjɔ alecira jɔre a, nyini Awiewie ni ma be gusu jɔjɔ si jɔre a.

⁹ Nyini Awiewie ni ma be yarada ye i yo yiko juma n a, nyini Awiewie kun ni ma be yiko ye i mi n koro tuntun tukpakifom na bu nya laifie a.

¹⁰ Nyini Awiewie ni ma be yiko ye i koro yo alekutura sam a, yiri ma be yiko ye i kan Nyeme nɔanie n kere minem a, yiri ma be yiko ye i koro si jɔre n bo i fite Nyeme Awiewie Casi n dɔ a, yiri ma be yiko ye i koro jɔjɔ anie barasu barasu a, yiri gusu ma be yiko ye i koro kere anie barasu barasum bu a.

¹¹ Nyini Awiewie kun ni yo nyinim kere a, yiri ce sɔnɔ kere aceeri barasu barasu n kabo i koro a.

Aɔuniembaa kun n ni i bue barasu n jɔre

¹² Aɔuniembaa n la bue barasu barasu beberebe wɔ, haari ni bo i la bue barasu barasu ni, i ti aɔuniembaa kun wɔ, Kristo gusu ti sɔ ɔ lee, yere ti i bue barasu barasu n a.

¹³ Awiewie kun n ye ba fa abie ya kere Nyeme nzue a, ye ya kere ayo aɔuniembaa kun, bo bu ti Yudafom, ni bo bu ti má Yudafom, bo bu ti akoom, ni bo bu ti má akoom, ya kere ade nyini Awiewie kun ni ya ahore su a.

¹⁴ Tɔ, aɔuniembaa n la bue barasu barasu beberebe wɔ, bu ti má kun.

¹⁵ Nzen má ajaari n seeri ka, “M ti má asaa, nyini ti, m ti má aɔuniembaa n be fieo,” nyini kere má ka i ti má aɔuniembaa n bue be kun wɔ.

¹⁶ Na nzen má asui n gusu seeri ka, “M ti má anyumbaa, nyini ti, m ti má aɔuniembaa n be fieo,” nyini kere má ka i ti má aɔuniembaa n bue be kun wɔ.

¹⁷ Nzen má aɔuniembaa n bue n kere tiiri anyumbaa, má bu yo se koro ti deke nga a? Ye nzen má bu kere tiiri asui, má bu yo se koro de nvan a?

¹⁸ Ama, kabo Nyeme koro n ye wɔ fa ama aɔuniembaa bue barasu n kere a, ye wɔ yo i aɔuniembaa kun a.

¹⁹ Nzen má i kere ti bue barasu kun, má i ti má aɔuniembaa lee.

²⁰ Kabo i ti ni, aɔuniembaa bue barasu n sunnu, ama, i ti aɔuniembaa kun wɔ.

²¹ Nyini ti, anyumbaa n koro se má asaa n ka, “Wɔrɔ, a kun má m kperɛ be, m koro má u.” Wara atii n koro se má ajaari n ka, “Wɔrɔ, a kun má m kperɛ be, m koro má u.”

²² Ama, haari aɔuniembaa bue barasum n bo ya ɔa bu la má fanga ni mmɔɔ kun kperɛ wɔ.

²³ Na aɔuniembaa bue barasu n bo i la má jirima ni, yiri ye ya nie i dika nyunyumi a. Na aɔuniembaa bue barasu n bo ya ɔu i ka i la ya nyinse ni, ya yo yiri dɔngu a, na má ya di nyinse.

²⁴ Na aɲuniɛmbaa n bue n bo bu wo fofoe nu ni, ya niɛ má bu dika nyunyumi. Ama, kabo Nyɛmɛ yoori aɲuniɛmbaa n ni, deke n bo yɛɛ fa má i yo má pui ni, yiri ye wɔ wura i jirima a,

²⁵ adena má i la kpakpaakinu, ama, na bue barasu n kɛɛ cɛɛ wo i bɛngu nu.

²⁶ Nzen aɲuniɛmbaa bue kun diiri yaari, aɲuniɛmbaa bue n kɛɛ sudi yaari n a, ye nzen aɲuniɛmbaa n bue be sunya kansi, aɲuniɛmbaa bue n kɛɛ ahore ti jɔɔwa wɔ lɛɛ.

²⁷ Ambɛɛ kɛɛ ti Kristo aɲuniɛmbaa n wɔ, na am kɛɛ kun kun n ti i bue barasu be wɔ lɛɛ.

²⁸ Na Nyɛmɛ ayi i mine nbem Kristo jamam n nu, na wɔ ma bu kɛɛ ni bu juma. I du mɔ yiiri jaramasam wɔ, nnyɔ su, bo bu kan Nyɛmɛ nɔanie n kɛɛ minɛm ni, nsan su la kɛɛfɔm, bo bu buka su la bo bu yo alekutura sam ni, ni bo bu tuntun tukpakifɔm na bu nya laifɛ ni, ni bo bu buka minɛm ni, ni Nyɛmɛ mine mɔfɔm bo bu kɛɛ nyaari ni, ni bo bu jɔɔ anie barasu barasu ni.

²⁹ Sɔnɔ kɛɛ ti jaramasa a? Ai. Sɔnɔ kɛɛ kan Nyɛmɛ nɔanie n kan kɛɛ minɛm a? Wara sɔnɔ kɛɛ koro kɛɛ a? Ai. Sɔnɔ kɛɛ la yiko koro yo alekutura sam a? Ai, i ti má sɔ.

³⁰ Sɔnɔ kɛɛ la yiko koro tuntun tukpakifɔm na bu nya laifɛ a? Ai. Sɔnɔ kɛɛ koro jɔɔ anie barasu barasu a? Ai. Sɔnɔ kɛɛ koro yi anie jɔɔɔwa barasu barasu n bu a? Ai.

³¹ Ama, am kɛɛ boro am nyi na am nya aceerim n bo bu la má aɲusu ni.

Kisa, m koro ka m kɛɛ am atin n bo i ti kpa tara i kɛɛ ni.

13

Koro jɔɛ

¹ Nzen m jɔɔ adamande anie barasu barasu n kɛɛ, na nzen m jɔɔ mɛɛkɛm anie, na m koro má minɛm, m ti ka adanwore wɔ, wara m ti ka coco bo i bobo i bɛngu na i yo nanɛmɛ ngbɛɛn wɔ.

² Nzen m de Nyɛmɛ nɔanie n Awiewie Casi n dɔ, na m kan kɛɛ minɛm, na m la si kɛɛ na m si deke n kɛɛ bo bu wo asiri nu ni, na nzen m la yarada haari bo m koro se bukam ka bu yasu bu tanaabiri, ama, na m koro má minɛm, m ti ngbɛɛn wɔ lɛɛ.

³ Na nzen m faari m nɛngem kɛɛ fa kpaaki nu maari yaarifɔm, na m faari m ɲuniɛmbaa fa maari, na bu yara m sin, na m koro má minɛm, nyini n kɛɛ bo m yo i n ti ngbɛɛn wɔ lɛɛ.

⁴ Sɔnɔ bo i la koro, i mi la sawɔɛ wɔ, na i yo kpa, i mi si má mine kɔɛ, i mi fɔ má yanfɔya, i mi koro má kpiri.

⁵ Sɔnɔ bo i la koro, i mi la má anyumbaa wuruuwa, i mi yo má sa bo yiri ngumi yo ye, i mi fa má yaa ndende, i mi fa má jɔɛ se má i kunnu na i tenge su.

⁶ Sɔnɔ bo i la koro, i mi ahore ti má jɔɔwa fa kɔ satie su, ama, i mi n ahore ti jɔɔwa fa kɔ deke bo i ti nahɔɛ su a.

⁷ Sɔnɔ bo i la koro mindi de deke kɛɛ wɔ, na i la yarada fa kɔ deke kɛɛ nu, na i la ahoresi fa kɔ deke kɛɛ nu, na i la mindi sanja kɛɛ.

⁸ Koro la má awieeri. Ama, aceerim bo Awiewie Casi n fa ma minɛm na bu koro kan Nyɛmɛ nɔanie n kɛɛ minɛm ni, i la sanja bo i ba sin wɔ, minɛm bo bu jɔɔ anie barasu barasum ni, bu bá mɔ bu nɔɔ, na bo bu la si ni, i la sanja bo i bá sin wɔ.

⁹ Kisa ya si má deke n kere wie má, na Nyeme noanie n bo ya kan kere minem ni, ya si má i kere wie má.

¹⁰ Ama, nzen Kristo ba baari, nyini sanja deke n bo ya si má i kere ni aba i awieeri lee.

¹¹ Sanja bo m yo ti baatuma ni, m yo jɔɔ baatumaya jɔre wɔ, na m sunsun kabo baatuma sunsun ni, ama, m nyunu ba tiiri ni, na ma yaki baatumaya jɔrem n kere.

¹² Kisa dekem bo ya ɲu i ni, i ti ka ya nie ɲu i nieɛnu nu wɔ, ama, ya bá ɲu i fofoe nu, kabo ya ɲu ya ɲu n wɔ. Kisa m si má deke n kere, ama, sanja suba bo m bá si deke n kere, kabo Nyeme si m nahɔre su ni.

¹³ Tɔ, kisa ahin deke nsanm ni wo bere a, bere la yarada, ni tama, ni koro, ama, bo i tara bu kere n la koro wɔ.

14

Awiewie Casi n aceerim bo i buka su n dee jɔre

¹ Tɔ, am bita koro atin na am koro am beɲu ni anyumbo, na am kpini Awiewie Casi n aceerim busu, maala bo i ma am koro kan Nyeme noanie n kere minem ni.

² Dama bo i jɔɔ anie barasu barasu n jɔɔ má adamandem dɔ, ama, i jɔɔ Nyeme dɔ a. Nahɔre, be koro ti má kabo i sujɔɔ n bu, dama Awiewie Casi n dee yiko n nu ye i jɔɔ asiri nu jɔrem a.

³ Ama, sɔnɔ bo i kan Nyeme noanie n kere minem ni, i jɔɔ ma minem wɔ, na i buka bu na bu nya fanja buka su, na i ma bu ahoresi, na i kaaki ma bu ahoreda.

⁴ Sɔnɔ bo i jɔɔ anie barasu barasu n buka má be, i buka yiri ni i tii ɲgumi wɔ. Ama, bo i kan Nyeme noanie n kere minem ni, yiri buka Kristo jama n wɔ, na i nya fanja buka su.

⁵ Tɔ, nzen má am kere koro jɔɔ anie barasu barasu, má i yo m fie. Ama, bo i yo m fie kɔ tara i kere n la ka, am koro kan Nyeme noanie n kere minem. Sɔnɔ bo i kan Nyeme noanie n kere minem n tara bo i jɔɔ anie barasu barasum ni, má ka be akoro akere nyini anie barasu barasum bu, na i buka Kristo jama n na i nya fanja.

⁶ M ninbaam, nzen kisa na m baari am dɔ, na m jɔɔori anie barasu barasum, nzu kperɛ ye am nyá i a? Ai, am nyá má kperɛ be. Má ka ma kan sa bo Nyeme ayi i akere m n ama am, wara m kan si jɔre be kere am, wara m kan Nyeme noanie n kere am, wara m kan kereewa bo i fite Awiewie Casi n dɔ kere am.

⁷ Sɔ ye i ti a, nzen be fitaari tere, wara be bo bieku, na wɔ tɔ má su, bu yo se koro di jue soro su a?

⁸ Bekun nzen be kaanri lue awie, na wɔ sun má kabo lue awie sun ni, bu yo se koro cici lue a?

⁹ I ti sɔ ɔ lee, amberɛ mmɔɔ dɔ, nzen am jɔɔ anie barasu, na i la má bu, mine yo se koro si kabo am suse n a? I ti ka am sujɔɔ gɔ nzue awa sin wo lee.

¹⁰ Daanfie anie barasu barasum sunnu durunya n nu, i gusu be wo má bere bo i la má bu, i kere la bu.

¹¹ Tɔ, nyini ti, nzen be jɔɔ anie be na m ti má i, m ti daanfie barasu be wo lee i mi dɔ, ye i gusu ti daanfie barasu be wo lee m dɔ.

¹² Kabo am nyunu aboro ka am nyá Awiewie Casi n aceerim ni, am boro am nyi ni aceerim bo bu koro buka Kristo jama n na i nya fanja buka su.

¹³ Nyini ti, sɔnɔ kere bo i jɔɔ anie barasu barasum, i ti ye ni ka i sere Nyeme na i ma i aceeri n bo i koro yi i bu kere minem ni.

¹⁴ Dama sanƆa kere bo m sere Nyeme na m sere anie barasu barasu be nu, m awiewie susere Nyeme a, ama, m ti ma i bu m sunsunni nu.

¹⁵ Nyini ti, deke bo i ti ye ni ka m yo la ka, m sere Nyeme fite m awiewie nu wo, na m kaaki sere i fite m sunsunni nu, na m di jue fite m awiewie nu kansi Nyeme, na m kaaki di jue fite m sunsunni nu kansi Nyeme.

¹⁶ Nzen a sukansi Nyeme na i fite u awiewie nu, na be wo u bi bo i nya si ma Nyeme atin ni, i mi yo se koro ti u nyemesere n bu a, na i soro su se ka, "Ami" a?

¹⁷ Haari nzen u nyemesere ti kpa, i buka ma yiri n bo i ti ma i bu ni.

¹⁸ M da Nyeme asi ka m jojo anie barasu barasum tara am kere.

¹⁹ Ama, nzen m ni Kristo jama n aba atien ya noo susu Nyeme, na m jojori jore kaan bo i fite m sunsunni nu, na bu tiiri i bu, i tara bo m jojo jore beberebe anie barasu nu ni.

²⁰ M ninbaam, ma am sunsun kabo nbaatumam sunsun ni, ama, fa ko satieyo dika, am yo kabo nbaatumam yo ni, na am ma am sunsunni ti kabo anyunutihom dee ti ni.

²¹ Dama ba kere i Nyeme noanie kpamaawa n nu ka, Micera n na,
"M fa minem bo bu jojo daanfie anie barasu barasum
na m ma bu jojo m tiengu minem do.

Ama, haari ni nyini n kere mmoo,
bu de ma m noanie ni."

²² Nyini ti, anie barasu barasum jojowa n kere minem bo ba nya yo ma Kristo yarada ni nyaari a, ma bo ba yo yarada ni. Na bo bu kan Nyeme noanie n kere minem ni, bu kere bo ba yo yarada ni nyaari a, ma bo bu yo ma yarada ni.

²³ Nyini ti, nzen ambere Kristo jama n atien am noo, na am kere sujoko anie barasu barasum, na bo bu nya si ma Nyeme atin ni, wara bo bu nya yo ma yarada wuraari am nu, bu se ka am nyunu akan am wo, ma so?

²⁴ Ama, nzen am atien am noo, na am kere sukan Nyeme noanie ni, na bo i nya si ma Nyeme atin ni, wara, bo i ti ma yaradayofa aba awura am nu, na i ti kabo sono kere sujoko ni, i mi n sunsunni nu kere i ka i ti satieyofa o, na Nyeme noanie n di i jore jara i.

²⁵ Nyini ma i mi n kan asiri jore kere bo i wo i ahore su n fite fofoe nu a, na i kutu i jaa su, na i kansi Nyeme, na i se ka, "Nyeme wo am do nahore su."

Kabo i ti ye ni ka sono kere tara i nu Kristo jama n nu barasu ni

²⁶ To, m ninbaam, nzu deke ye i ti ye ni ka am yo i a? Deke bo m koro ka m kan kere am la ka, nzen am ba tien am noo, na be la jue bo i di, wara be la kereewa be bo i kere, wara be la sayikereewa bo i fite Nyeme do, wara be la anie barasu be bo i jojo, wara be yi anie jojowa n bu kere am, deke n kere bo am yo i ni, am yo i na i buka Kristo jama ni, na i nya fanga buka su.

²⁷ Nzen nbem ba sujoko anie barasu barasum, i ni i agaya kere, bu yo mine nnyo, wara mine nsan, ma bu tara so. Bu na bu jojo, bu jojo kun kun, i ti ye ni ka be gusu kaaki yi i bu kere am.

²⁸ Ama, nzen be koro kaaki yi ma i bu kere ma am, i ti ye ni ka i mi n bo i sujoko anie barasu barasum n mo i noo Kristo jamam nu, na i jojo ma i nu ni Nyeme.

²⁹ Minem bo bu kan Nyeme noanie n kere minem ni, i ti ye ni ka bu mine nnyo wara bu mine nsan jojo a, na nyingam bo ba ka n fiiti i nu.

³⁰ Nzen be sujɔɔ, na Nyeme ayi deke be akere sɔnɔ nyinga, i ti ye ni ka sɔnɔ n bo i du mɔ sujɔɔ n mɔ i nɔɔ, na yiri n bo Nyeme ayi deke be akere i n jɔɔ.

³¹ Dama am kere koro kan Nyeme nɔanie n kun kun kere am beɲu wɔ, adena am kere sɔnsɔn deke be nu, na i ma am ahoresi.

³² I ti ye ni ka bo bu kan Nyeme nɔanie n kere minem n kere la tarabuɲu fa kɔ bu Nyeme nɔanie n kan su.

³³ Dama Nyeme ti má bo i fa kpakpaakinu ba i minem dɔ, ama, i ma bu la tanalaifɛ wɔ.

I ti sɔ ɔ lɛɛ, Kristo jama n kere nu,

³⁴ nzen am ba tiɛnri am nɔɔ, i ti ye ni ka nbaram mɔ bu nɔɔ, bu la má atin ka bu jɔɔ. Ama, wɔ yo daka ka bu yo bu ɲu benle, na bu su kabo nɔanie kpamaawa n kere n su.

³⁵ Nzen bu koro ka bu bisa jɔre be, i ti ye ni ka bu bisa bu hunm awuru, dama i ti nyinse wɔ ka bara jɔɔ Kristo jama n nu.

³⁶ Nyeme nɔanie n du mɔ fite ambere dɔ a, nzen se? Wara ambere ɲgumi ade Nyeme nɔanie n a?

³⁷ Nzen be sunsun ka i ti Nyeme nɔanie kanfɔ, wara i sunsun ka i si Awiewie Casi n aceerim jɔre, i ti ye ni ka i mi si tenle su ka ahin nɔanie n bo m sukere ma am ni, i ti Mibiɛ n dɛɛ nɔanie maawa a.

³⁸ Nzen be wo am nu, na i de má ahin jɔre n bo m sukere ma am ni, ambere mmɔɔ bu i mi ɲgbɛɛn.

³⁹ Nyini ti, m ninbaam, i ti ye ni ka am boro am nyi na am sukan Nyeme nɔanie n kere minem, na má am kanda minem ka má bu jɔɔ anie barasu barasum ni.

⁴⁰ Na am yo deke kere nyunyumi na i kɔ atin su.

15

Yesu Kristo yiwee tenge n jɔre

¹ Tɔ, m ninbaam, kisa m koro ka m tenge am su fa kɔ labari kpa n bo m yo kan kereeri am n su. Am yo yoori i yarada a, na am ajina i su kenken.

² Nzen am bitaari labari kpa n bo m kan kereeri am kenken, nyini ma am tiide a, nzen má nyini yiri, am yarada n bo am ayo i n ti ɲgbɛɛn wɔ lɛɛ.

³ Dama labari kpa n bo m deer i na m kan kereeri am ni, i jɔre anyumbaa la ka, Kristo wuuri ya satie ti wɔ, kabo ba kere i Nyeme Jɔre Kadasi n nu lɛɛ,

⁴ ka i wuuri na bu seeri i ni, na Nyeme atenge i yiwee n nu i lesan cɛɛn, kabo Nyeme Jɔre Kadasi n kere lɛɛ.

⁵ I tengeeri ni, na wɔ yi i ɲu akere Kefasi bo bu kaaki fere i ka Petoro ni, na wɔ ba ayi i ɲu akere i susufɔ buru ni nnyɔm ni.

⁶ Nyini sin, na wɔ yi i ɲu akere ya ninbaam nbem, bu tara mine yaa nnu, bu kere sangga wo woobiri kun wɔ. Bu nu, bu dɔɲgu toko la ɲgɔɔ, nbem gusu awu.

⁷ Na wɔ yi i ɲu akere Yakobo, na wɔ ba akaaki ayi i ɲu akere i jaramasam kere.

⁸ Awieeri su, na wɔ yi i ɲu akere mini, bo m ti ka baa bo ba wu i na i sangga nya ju má ni.

⁹ Dama mini ti jaramasam kere nu kaan, haari má wɔ ti má ye ni ka bu fere m jaramasa mmɔɔ, dama m yo kereeri Kristo jama n wuwuruwa wɔ.

¹⁰ Nyeme ahɔrɔma n dɛɛ ti, ye m ti kabo m ti n a. Ahɔrɔma n bo wɔ fa ama m ni, i ti má ɲgbɛɛn, ama, m koro se ka ma yo juma atara nyingam

ƙere mmɔɔ. Má mini ni m tii yoori i a, ama, Nyeme ɗe ahɔrɔma n bo wo fa ama m ni, nyini ma m koro yoori i a.

¹¹ Nyini ti, mini, wara bere o, labari kpa n ye ya kan i a, labari kpa n gusu ɗe ti ye am yoori yarada n a.

Kabo Nyeme minem bá tenge yiwee nu ni

¹² Tɔ, labari kpa n bo ya kan i ni, ya ɗa, “Nyeme atenge Kristo i yiwee n nu.” Ye nzu ti ye am nbem ɗa yiwee tenge wo má bere a?

¹³ Nzen yiwee tenge wo má bere, nyini la ka, Nyeme atenge má Kristo mmɔɔ i yiwee n nu ɗe.

¹⁴ Nzen Nyeme atenge má Kristo i yiwee n nu, nyini la ka, labari kpa n bo ya kan i ni, i ti ngbeen wo ɗe, na yarada n bo am ayo i n gusu ti ngbeen wo ɗe.

¹⁵ Má nyini ngumi, nyini la ka, ya bu ƙere asɔ Nyeme wo ɗe, dama ya ɗa wo tenge Kristo i yiwee n nu, ama, bu ɗa bo ba wu n tenge má yiwee nu.

¹⁶ Na nzen bo ba wu n tenge má bu yiwee nu, nyini la ka, wo tenge má Kristo mmɔɔ i yiwee n nu ɗe.

¹⁷ Na nzen wo tenge má Kristo i yiwee n nu, yarada n bo am ayo i n ti ngbeen wo ɗe, na am toko wo am satiem nu wo ɗe,

¹⁸ na bo bu yo yoori Kristo yarada na ba wu n ƙere aka ngbeen ɗe.

¹⁹ Nzen durunya n nu fen ngumi ye ya la tama n fa ƙɔ Kristo ɗɔ, nyini yiri, ya ti minem bo ya la anunfo tara sɔnɔ ƙere.

²⁰ Ama, nahɔre su, Nyeme atenge Kristo i yiwee n nu. Minem bo ba wu n ƙere nu, yiri tiiri bo i du mo tengeeri i yiwee nu a.

²¹ Adamande kun ɗe ti, ye yiwee kun sɔnɔ ƙere n a, adamande kun gusu ɗe ti, ye mine bá tenge bu yiwee n nu a.

²² Na kabo Adam ɗe ti na adamande ƙere wu ni, so ye Kristo ɗe ti ma adamande ƙere bá tenge bu yiwee nu na bu nyá ngɔɔ a.

²³ Ama, sɔnɔ ƙere ni i sanɗa bo Nyeme bá tenge i. Bo ba wu n ƙere nu, Kristo ti bo Nyeme du mo tengeeri i yiwee nu a, na bo bu ti i minem n gusu bá tenge sanɗa bo i bá kaaki ba ni.

²⁴ Nyini sin na deke n ƙere bá awieeri, na i nyá fa femɗa n wura i Si Nyeme saa nu, nyini sanɗa, wo kunma femɗa ƙere, ni nfanɗafom ƙere, ni yikofom ƙere ɗe.

²⁵ Dama wo yo daka ka i di femɗa ni haari i bá kunma i kpofom, na i nana bu ƙere ɗu.

²⁶ I kpofɔ n bo i bá kunma i awieeri su n la yiwee wo.

²⁷ Dama ba ƙere i Nyeme Jɔre Kadasi nu ka, “Wo fa deke n ƙere awura i saa nu ka i nie bu su.” Bo i ɗa wo fa deke n ƙere awura i saa nu ka i nie bu su ni, nyini ƙere má ka Nyeme bo i faari deke n ƙere wuraari yiri Kristo saa nu afa i tii awura i saa nu ɗe.

²⁸ Na sanɗa bo i ba faari deke n ƙere wuraari i saa nu ni, na yiri Baa n ni i tii nya fa i ɗu wura i Si Nyeme saa nu. Nyini sanɗa Nyeme ɗe la deke n ƙere, na deke n ƙere wo bere yiri ti wo.

²⁹ Tɔ, nzen bu ɗa yiwee tenge wo má bere, ye bo bu de minem bo ba wu n jinaabiri na bu bie bu Nyeme nzue ma bu n di, bu yo se wo? Nzen bo ba wu n tenge má bu yiwee nu, nzu ti ye bu bie Nyeme nzue ma bu a?

³⁰ Ye nzu ti ye yere tɔ ya ngɔɔ sanɗa ƙere n a?

³¹ Ale ƙere bo i cin, m wo yiwee nu wo, i ti sɔ ɔ ɗe, m ninbaam, m fa ambere bo m hoe ye m se sɔ n a, ya Mibie Yesu Kristo ɗe ti.

³² Nzen m ni minem bo bu ti ka boro nengem, kun lue, Efeso mie kpiri n nu, na i kɔ yo ka adamande woowa dɛɛ ti m la tama, nzu kpere ye ma nya i a? Nzen bo ba wu n tenge má bu yiwee nu, nyini yiri, i ti kabo mine nbem n nati se n wɔ, bu ɲa,

“Am ma ya di, na ya nu,
dama ahunma ya wú ɔ.”

³³ Má am ma be dadaka am, kabo minem nati se ni, ka,

“Sɔnɔ tie suuri sɔnɔ kpa su,
i sáaki i woowa kpa n wɔ.”

³⁴ Am kaaki sunsun nyunyumi, na má am yo satie kun, dama am nbem si má Nyeme. Nyini n bo m se sɔ ni, i ti am nyinse wɔ lee.

Bo bu bá tenge bu yiwee n nu n dɛɛ aɲuniembaa n jɔɛ

³⁵ Tɔ, beni, be koro bisa ka, bo ba wu ni, bu tenge bu yiwee nu se wɔ? Aɲuniembaa barasu bɔnɔ ye bu fá ba?

³⁶ Wɔɔ sinnzin ni, a si má ka nzen a dɔ deke mbaa, má ka i wu wɔ ka, ye i nya fi a, nzen se?

³⁷ Deke mbaa n bo a dɔ i ni, beni, ɲgani mbaa wara abuwe ye a dɔ i a, ama, i ba fiiri, i kaaki nyawa a, i ti má ka mbaa n bo a dɔɔri i ni.

³⁸ Nyeme ma i kere aɲuniembaa n kabo i koro a, deke mbaa barasu n kere, ni i tienɲu aɲuniembaa.

³⁹ Aɲuniembaa n kere wo i ɲgumi wɔ, i ti má kun, adamande dɛɛ wo bere i ɲgumi, ajaannam dɛɛ wo bere bu ɲgumi, lanɲkpetefɔm dɛɛ wo bere bu ɲgumi, na jombaam dɛɛ wo bere bu ɲgumi.

⁴⁰ Dekem bo bu wo aɲgoro n wo bere, na a yaki bo bu wo durunya n nu fen ni. Aɲgoro dɛɛm nyumi wo bere bu ɲgumi, na durunya n nu fen n dɛɛm gusu nyumi wo bere bu ɲgumi.

⁴¹ Wie nyumi wo bere i ɲgumi, sara nyumi wo bere i ɲgumi, asarambaam nyumi wo bere bu ɲgumi, ama, bu nbem yo nyumi tara nbem.

⁴² Tɔ, kabo i ti lee fa kɔ yiwee tenge n su. Aɲuniembaa n bo bu se i ni, i kɔɔɔ ɔ, na bo i tenge, i kɔɔɔ má fieo.

⁴³ Deke n bo bu se i ni, i la má anyunuyi, ama, i bá tengeeri, i woowa yo nyumi wɔ. Deke n bo bu se i ni, i la má fanɲa, ama, i bá tengeeri, i la fanɲa wɔ.

⁴⁴ Deke n bo bu se i ni, i ti durunya n nu adamande aɲuniembaa a, i bá tengeeri, i ti aɲuniembaa bo Awiewie Casi n ma i ɲɔɔ n wɔ. Kabo durunya n nu adamande aɲuniembaa wo bere ni, sɔ ye aɲuniembaa n bo Awiewie Casi ma i ɲɔɔ n gusu wo bere a.

⁴⁵ I ti kabo ba kere i Nyeme Jɔɛ Kadasi n nu n wɔ, ka, “Ciciri su dɛɛ adamande ɲɔɔfɔ n la Adam wɔ,” na Adam n bo i ka sin n ti awiewie bo i ma ɲɔɔ ni.

⁴⁶ Bo i ti awiewie ni, má yiri du mɔ baari a, ama, bo i ti adamande ɲɔɔfɔ ni du mɔ baari a, na bo i ti awiewie n anya tɔ su.

⁴⁷ Ciciri su dɛɛ adamande n fite durunya n nu fen wɔ, Nyeme yo faari natie yoori i a, ama, bo i tɔ su nnyɔ su n fite Nyeme dɔ aɲgoro baari a.

⁴⁸ Minem bo bu ti durunya n nufɔm ni, bu ti kabo sɔnɔ n bo Nyeme faari natie yoori i n ti n wɔ. Na bo bu ti Nyeme minem n gusu ti kabo sɔnɔ n bo i fite Nyeme dɔ aɲgoro n ti ni.

⁴⁹ Kabo ya ferema ni sɔnɔ n bo Nyeme faari natie yoori i ni, sɔ ye ya bá ferema ni sɔnɔ n bo i fite aɲgoro n a.

⁵⁰ M ninbaam, m suse am wɔ lɛɛ, ka, ya ɲuniɛmbaa n bo i ti niɛ ni mbunja ni, i koro wura má Nyɛmɛ fɛmɛya n nu, na deke n bo i kpɔrɔ n koro nya má deke n bo i wo bɛrɛ saɲga kɛrɛ ni.

⁵¹ Am ti fɛn, m suse am asiri nu jɔrɛ wɔ lɛɛ, ka, má ya kɛrɛ wú a, ama, ya kɛrɛ ɲuniɛmbaa ni bá kaaki fɔfɔrɛ wɔ.

⁵² I yó kungerekun wɔ, anyumbaa kata ni i teke, saɲga bo bu bá fitaari awieeri su dɛɛ awiɛ ni, na bo ba wu n tɛɲge bu yiwee nu, bu kpɔrɔ má kun, na yɛrɛ gusu ɲuniɛmbaa n káaki fɔfɔrɛ.

⁵³ Dama wɔ yo daka ka ahin aɲuniɛmbaa n bo i kpɔrɔ n kaaki aɲuniɛmbaa n bo i kpɔrɔ má ni, na aɲuniɛmbaa n bo i wu n gusu kaaki aɲuniɛmbaa n bo i wu má.

⁵⁴ Saɲga bo aɲuniɛmbaa n bo i kpɔrɔ n bá kpɔrɔ má kun ni, na aɲuniɛmbaa n bo i wu n gusu bá wu má kun ni, nyini saɲga Nyɛmɛ nɔaniɛ ni yó yiiwa lɛɛ, bo ba kɛrɛ i ka,

“Ba di nasara yiwee ɲu ayo i ɲgbɛɛn ni.”

⁵⁵ “Keto, yiwee, u yiko n bo a fa kan n wo ni?

Keto, u nasara n wo ni?”

⁵⁶ Deke n bo yiwee bita kan n la satie wɔ, ye satie nya i yiko n fite Nyɛmɛ nɔaniɛ kpamaawa n nu wɔ.

⁵⁷ Ama, ya da Nyɛmɛ asi, dama ya Mibiɛ Yesu Kristo dɛɛ ti, i ma ya di nasara.

⁵⁸ Nyini dɛɛ ti, m ninbaa koroowam, am jina kenken na má am fa am ɲu ji, am boro am nyi suyo Mibiɛ n juma n saɲga kɛrɛ, dama am si ka juma n bo am suyo i ma Mibiɛ n ti má ɲgbɛɛn.

16

Nywaa n bo bu yiɛi i na bu fa kɔ ma Nyɛmɛ minɛm ni

¹ Tɔ, fa kɔ ɲwaa n bo am yiɛi i na am fa kɔ buka Nyɛmɛ minɛm ni, am yo kabo m kereeri Kristo jamam n bo bu wo Galatiya awɔrɛ n nu n ka bu yo ni.

² YudaƆm bakue n bumboori, mɔnɛ kɛrɛ mɔnɛ, am niɛ kabo Nyɛmɛ awura am abaraka fa kɔ dekem bo am la bu n su, na am suyiyi ɲwaa be se, adena nzen m bá baari, am yi má ɲwaa kun.

³ Nyini saɲga na m bá juuri, m kɛrɛ kadasi ma minɛm n bo am ayi bu ni, na m fá sunma bu na bu fá am aceerim kɔ Yerusalem miɛ kpiri n nu.

⁴ Na nzen i ti ye ni ka mini mmɔɔ kɔ, na m ni bɛrɛ kɛrɛ kó.

Kabo Pɔɔlu koro ka i kɔ niɛ KɔrintoƆm busu ni

⁵ M koro ka m fa Makedoniya dɛɛ awɔrɛ n nu, na m sin ba niɛ am busu.

⁶ Beni, m yó lennyɔ am dɔ, wara fufuku ni sín ka, ye m nyá ba yasu a, adena am buka m na m kɔ deke kɛrɛ bo m koro ka m kɔ ni.

⁷ Dama m koro má ka m bá jina aɲgoro niɛ am busu na m sin, m la tama ka nzen Mibiɛ n soroori su, m yó lennyɔ am dɔ.

⁸ M wó Efeso miɛ kpiri n nu fɛn haari Butara Cɛɛnkpiri n saɲga.

⁹ Dama atin bambaka ateke ama m, na m yo juma n nahɔrɛ su, ama, m kpɔfɔm gusu asunnu.

¹⁰ Nzen Timoti bá baari am dɔ, am de i ni am saa nnyɔ, má am ma i ahore saaki, yiri mmɔɔ yo Mibiɛ n juma n kabo m yo i n wɔ.

¹¹ Má be se ka i bu i ɲgbɛɛn, ama, am kaari i ni ahoreda na i ba tu m, dama m suniɛ i ni ya ninbaam n atin nu ka bu bá.

¹² Fa kɔ ya niwa Apolosi yiri, ma sere i ni anyumboro ka i yo anie, na i ni ya ninbaam bá na bu bá nie am busu, ama, wɔ soro má su ka i bá kisa, ama, nzen Nyeme ba maari i atin, i bá.

Awieeri su jɔre ni anse

¹³ Má am fa am ɲu ji, am jina kenken ni am yarada ni, na am yo nbiesɔm, na am fa ahoresi.

¹⁴ Deke n kere bo am yo i ni, am yo i ni koro.

¹⁵ M ninbaam, am si Satefanasi ni i dikafɔm jɔre, bere duuri mɔ yoori Kristo yarada Akaya awɔre n kere nu a, na ba fa bu ɲu asu Nyeme minem amusui, nyini ti, m sere am wɔ jande,

¹⁶ ka am bu nyini minem bo bu ti sɔ ni, ni minem kere bo bu buka su, na bu yo bu juma n ni anyumboro ni.

¹⁷ Saɲga bo Satefanasi, ni Fɔtunatusi, ni Akayakusi ba tuuri m ni, na wɔ yo m fie agaya, dama bu deeri am deɛ jinaabiri wɔ, na ba yo deke n bo má am yo i ma m ni.

¹⁸ Dama kabo bu baari ni, bu ma m ni ambere kere anya ahoresi, nyini ti, i ti ye ni ka am bu minem bo bu ti sɔ ni.

¹⁹ Kristo jamam bo bu wo Esiya awɔre n nu n kere bisa am dɔɲgu. Akuyila, ni i yi Pisisila, ni Nyeme minem bo bu tien bu nɔɔ bu dika n kere gusu bisa am dɔɲgu, Mibiɛ n deɛ ti.

²⁰ Ya ninbaam kere bo bu wo fen n bisa am dɔɲgu. Am gusu bisa am bengum dɔɲgu ni koro.

²¹ Mini Pɔɔlu ni m tii sufa m saa sukere ahin kereɛwa n bisa am dɔɲgu a.

²² Sɔnɔ kere bo i koro má Mibiɛ ni, Nyeme yó i mi ɲgbɛɛn. *Marana ta*, i bu la ka, Ya Mibiɛ, bra.

²³ Ya Mibiɛ Yesu buka am kere.

²⁴ M koro am kere Yesu Kristo deɛ ti. Ami.

Pɔɔlu kadasi nnyɔ su bo i kerɛ fa maari KƆRINTOFƆM ni

¹ Mini Pɔɔlu bo m ti Yesu Kristo jaramasa Nyemɛ dɛɛ koroyanu ni, m ni ya niwa Timoti sukɛɛ ahin kadasi n ma am a. Ya sukɛɛ i na ya fa ma amberɛ Kristo jama n bo am wo Kɔrinto miɛ kpiri n nu ni, ni Nyemɛ minem kerɛ bo bu wo Akaya dɛɛ awɔrɛ n nu ni.

² Ya Si Nyemɛ, ni ya Mibiɛ Yesu Kristo buka am, na am nya tanalaifiɛ.

Kabo Pɔɔlu daari Nyemɛ asi ni

³ Am ma ya kansɛ Nyemɛ, yiri bo i ti ya Mibiɛ Yesu Kristo Si ni. Yiri ti ya Si bo i si ya aɲunfo a. Yiri ti Nyemɛ bo i dada ya ahore a.

⁴ Yiri dada ya ahore a, ya wahara kerɛ nu, adena yerɛ gusu koro dada minem ahore, berɛ n bo bu wo wahara n kerɛ nu ni. Kabo Nyemɛ ama yerɛ mmɔɔ ni ya tii anya ahoreda ni, yerɛ ma berɛ n gusu nya nyini ahoreda n a.

⁵ Dama kabo ya ni Kristo susaɲga di i wahara n agaya ni, sɔ ye yiri dɛɛ ti, ye ya nya ahoreda agaya n a.

⁶ Saɲga kerɛ bo ya ɲu kekereke, i ma am nya ahoreda ni tiide wɔ. Na saɲga kerɛ bo ya nya ahoreda ni, i ma am ahoreda a, na am yo sawɔrɛ mindi de nyini wahara n bo ya di i n be.

⁷ Ya la tama fa kɔ am dɔ, ya yo má sika. Dama ya si ka kabo am ni yerɛ kerɛ susaɲga di ya wahara n be ni, sɔ ye ya ni amberɛ kerɛ susaɲga nya ya ahoreda n a.

⁸ M ninbaam, ya koro ka am si kabo ya ɲuuri kekereke Esiya dɛɛ awɔrɛ n nu barasu ni, ya ɲuuri anyumboro bo i la má aɲusu, haari na ya yi tama ka ya wu awie.

⁹ Nahɔrɛ, ya sunsun ka ya wu wɔ. Ama, i yo sɔ na má ya daafi ya ɲu su, ama, na ya daafi Nyemɛ ɲu, dama yiri tenge bo ba wu n a.

¹⁰ Wɔ yi ya afite nyini yiwee n bo i la má aɲusu n nu, na i yí ya fite nu bekun. Ya yo yiri tama ka i toko súyi ya fite nu bekun a,

¹¹ kabo am buka ya ni am nyemɛsere ni. Nyini má mine dɔɲgu bá da Nyemɛ asi, fa kɔ kabo wɔ de mine dɔɲgu nyemɛsere n na wɔ yo sakpam ama ya ni.

Kabo Pɔɔlu kaakiiri i sunsunni ka i kaaki ba má bu dɔ ni

¹² Deke n bo ya fa fo n la ka, ya sunsunni nu kere ya ka ya bo má aɲɔfiɛ, na ya ahorembaa ti casi wɔ Nyemɛ dɔ durunya n nu, maala fa kɔ am dɔ, má ka ya su durunya n nu alecira su n dɛɛ ti a, ama, Nyemɛ yo bukaari ya n dɛɛ ti a.

¹³ Ya kerɛ má jɔrɛ be ma má am, má ka jɔrɛ bo am kan i na am kaaki koro ti i bu ni. M la tama ka am bá si i kerɛ haari ni i awieeri,

¹⁴ dama am adu mɔ asi ya ɲusu jɔrɛ kaan, nyini ma am bá koro fa ya fo n a, kabo ya bá fa am fo, cɛɛn n bo ya Mibiɛ Yesu bá kaaki ba n a.

¹⁵ M la ahoresi fa kɔ nyini n su dɛɛ ti, ma sese su ka m du mɔ ba niɛ am busu, adena má am nya buka kpe nnyɔ.

¹⁶ Deke bo i ti na m se sɔ n la ka, ma sese su ka má m fa am dɔ na m niɛ am busu, na m sin kɔ Makɛdoniya dɛɛ awɔrɛ n nu, na m ba sufite dɔ ba, na má m fa am dɔ bekun, adena am buka m na m koro kɔ ju Yudiya awɔrɛ n nu.

¹⁷ Nyini n bo m seseeri su so ni, m la má jinakunsu wo lee, nzen se? Wara m sese su kabo durunya n nufom n yo n wo, na m se ka “Een,” na m kaaki se ka “Ai,” nzen se?

¹⁸ Nyeme la dabunu ni nahore n dee ti, noaniem bo ya kan kereeri am ni, i ti má “Een,” na i kaaki ti má “Ai”.

¹⁹ Dama Nyeme Wa Yesu Kristo n bo ya kaanri i jore kereeri am ni, mini ni Silivanusi ni Timoti, yiri Yesu dee jore ti má “Een,” na i kaaki ti má “Ai,” ama, i deke kere ti “Een” o.

²⁰ Dama dekem kere bo Nyeme seeri ka i yo bu ni, bu kere ti “Een” o, Yesu dee ti. Nyini ti, i dee ti ye sanja bo ya kansi Nyeme, ya se ka, “Ami” n a.

²¹ To, Nyeme ni i tii ma ya ni ambere kere koro jina kenken a, kabo ya ni Kristo ayo kun ni. Yiri ayi ya ka ya su i n a.

²² Yiri ase ya nyaari ka ya ti i dee minem a, na wo fa i Awiewie Casi n awura ya ahore su na i kere kabo i má ya deke n kere bo i seeri ka i fá ma i minem ni.

²³ Nyeme di m daani m ahore su a, ma koro má ka m kan am ndie, nyini dee ti ye ma kaaki aba má Koro mie kpiri n nu n a.

²⁴ I ti má ka ya sumie am kabo am yo yarada n wo, ama, ya ni ambere kere buka ya bengu wo, na am nya ahorejo, dama yarada n dee ti ye am jina kenken n a.

2

¹ Nyini ti, na ma yo m sunsunni nu ka m ba nie má am busu kun na am ahore saaki.

² Dama nzen m ma am ahore saakiiri, nmam ma m ahore da a? Má ambere bo ma saaki am ahore ni?

³ Deke bo i ti na m kereeri so n la ka, ma koro má ka m ba na má am ma m ahore saaki, ambere bo má i ti ye ni ka am ma m ahore jo ni. M la ahoresi fa ko am do, ka deke n bo i ma m ahore jo ni, nyini má am gusu kere ahore jo n a.

⁴ Dama m woori ahoresaaki, ni ahorembaa yaari, ni nyunvuin agaya nu, ye m kereeri am n a. I ti má ka m koroori ka m saaki am ahore wo, ama, m koroori ka am si kabo m koro am agaya barasu n wo.

Kabo Pɔɔlu ŋa bu fa ce be bo wo do ŋasi ni

⁵ Kabo be ayo ahoresaaki sa ni, má mini ye wo saaki m ahore a, ama, wo saaki am kere ahore a, nzen má nyini, wo saaki am nu be ahore. M gusu koro má ka m jajo jore n na i ko sin su agaya.

⁶ Suicin n bo ambere mine beberebe n kere fa kereeri i mi ni, wo se i su so.

⁷ Ama, kisa, kabo i ti ye ni ka am yo i n la ka, am kaaki de i mi, na am fa i ŋgasi ce i, na am dada i ahore, má so, ahoresaaki agaya ni má i kpaasi wo.

⁸ Nyini ti, m sere am wo, am kaaki de i na am kere i kabo am la koro fa ko i do ni.

⁹ Deke bo i ti na m kereeri am n la ka, m koro ka m yo am na m nie ka am de deke n kere bo m se am ka am yo i ni.

¹⁰ Sono bo am fa i ŋgasi ce i ni, mini mmoo fa ce i mi. Sa bo i ti na ma fa i ŋgasi ace i ni, nzen i la ŋgasi bo i ti ye ni ka m fa ce i mmoo, ma yo so Kristo nyunu, ambere dee ti wo.

¹¹ Ya yo so o, adena má Sitana koro kunma ya. Dama ya si tenle su kabo i la ŋgonletie barasu ni.

Kabo i miɛri Pɔɔlu ka i ti bu jore Titosi do ni

¹² Tɔ, m kɔ juuri Tɔrasi miɛ kpiri n nu ka m kan Kristo labari kpa n jɔrɛ kere bu ni, na ma ɲu ka Mibiɛ n adu mɔ ateke atin ama m.

¹³ Haari ni nyini n kere mmɔɔ, m ahore ada má, dama ma ɲu má ya niwa Titosi dɔ. Nyini dɛɛ ti, na ma kaari bu, na ma sin akɔ Makɛdoniya awɔrɛ n nu.

¹⁴ Ama, ya da Nyɛmɛ asi, dama kabo Kristo adi nasara na ya ni yiri ayo kun ni, sanɔa kere, yiri Nyɛmɛ ma ya nati su Kristo su, i nasara natiiri nu a, na deke kere bo ya kɔ ni, yiri fa ya bara ye a, na ya ma minem si i jɔrɛ, kabo deke nvani bara ye deke kere ni.

¹⁵ Dama ya ti ka ayiri kunkuunwa nvanvani bo Kristo fa ma Nyɛmɛ n wɔ, na i nvanvani n bara ye minem bo bu sunya tiide ni, ni bo bu suka ɲgbɛɛn n dɔ ɔ.

¹⁶ Bo bu suka ɲgbɛɛn ni, bere bu ya ka nvanvani n bo i sufa yiwee ba bu dɔ ɔ, ama, bo bu sunya tiide ni, bere bu ya ka nvanvani n bo i suma bu nya ɲgɔɔ Nyɛmɛ dɔ ɔ. Ahin juma n yiri, ɲma koro fa i tiɛngu fanɔa yo i a?

¹⁷ Ya ti má ka mine dɔɲgu bo bu bita Nyɛmɛ jɔrɛ n yo wata na bu di i kpere ni, ama, yere yiri, ya ti nahɔrɛfɔm wɔ, haari na ya ti mine bo wɔ yi ya asunma ya wɔ, na ya jina i nyunu ye ya kan i jɔrɛ a, kabo ya ni Kristo ayo kun n dɛɛ ti.

3

Sesɛsu fɔfɔrɛ n bo Yesu adi i di n dɛɛ amususufɔm jɔrɛ

¹ Ya sukaaki kan kere am kabo ya ti na am si ya, nzen sɛ? Wɔ yo má daka ka ya yo kabo nbem yo ni, ka ya fa kadasi bo i kere kabo ya ti barasu n bita nu, wara ya de kadasi am dɔ na i kere mine nyingam kabo ya ti barasu, nzen sɛ?

² Ai, ya kadasi n la ambere ni am tii wɔ, kadasi n bo ba kere i awura ya ahore su ni, na mine kere koro kan i na bu si kabo i ti.

³ Na bu koro ɲu ka ambere ti kadasi n bo Kristo akere awura ya saa nu afa asunma ya n a. Wɔ fa má deke kereɛwa nzue fa kereɛri i a. Ama, Nyɛmɛ bo i wo bere sanɔa kere n dɛɛ Awiewie n ye i fa kereɛri i a. Wɔ kere má i agɔ má yabue peperepe su wɔ, kabo Nyɛmɛ yo kereɛri i nɔanie kpamaawa n maari Moyisi ni, ama, i kereɛri i gɔɔri adamandem ahore su wɔ.

⁴ Deke bo i ti na ya koro jɔjɔ sɔ n la ka, ya la ahoresi Nyɛmɛ dɔ, Kristo dɛɛ ti.

⁵ Ya la má deke bo i kere ka yere ni ya tii koro yo juma n a. Deke bo i ma ya koro yo i n fite Nyɛmɛ dɔ ɔ.

⁶ Yiri Nyɛmɛ ama ya koro ayo i amususufɔm a, fa kɔ sesɛsu fɔfɔrɛ n bo wɔ di i di n su a. Nyini sesɛsu n fite má Nyɛmɛ nɔanie kpamaawa n bo wo kere i n dɔ, ama, i fite i Awiewie n dɔ ɔ. Nɔanie kpamaawa kereɛwa n fa yiwee ba, ama, Awiewie n ma ɲgɔɔ ɔ.

⁷ Tɔ, nɔanie kpamaawa n bo Nyɛmɛ yo kereɛri i gɔɔri yabue peperepe n su na i fa maari Moyisi ni, nyini sanɔa, i yoori sɔ ni, i jirima bambaka n taari wɔ, na Yisarelifɔm n akoro anie má Moyisi nyunuawa dika, dama i nyunuawa taari wein agaya, haari ni bo i ba saari wɔ. Kabo nɔanie kpamaawa n bo i fa yiwee ba n ti n na Nyɛmɛ boori i juma n bu ni jirima bambaka n sɔ ni,

⁸ i Awiewie ni yó i dɛɛ juma n ni jirima bambaka bo i tara nyini ni, má sɔ?

⁹ Kabo nɔaniƎ kpamaawa n bo i yo diiri minem jɔrɛ ciinri bu sui n ti n na i juma yo la jirima bambaka sɔ ni, nyini yiri, juma n bo i ma Nyemɛ de minem ka bu yo sa bo i kɔ atin su i dɔ n dɛɛ jirima bambaka tara sɔ.

¹⁰ Nahɔrɛ, deke n bo i yo la jirima bambaka ni, i la má jirima kun, deke n bo i la jirima bambaka tara sɔ n dɛɛ ti.

¹¹ Kabo deke n bo i ti siinwa n ti n na i yo la jirima bambaka sɔ ni, nyini yiri, deke n bo i wo bɛrɛ sanƙa kɛrɛ n dɛɛ jirima bambaka n tara sɔ.

¹² Kabo ya la tama ka i ti sɔ n dɛɛ ti, ye ya la ahoresi agaya koro jɔjɔ sɔ n a.

¹³ Yɛrɛ ti má ka Moyisi bo i yo faari sanvuin kataari na má Yisarelifɔm ɲu i nyunuawa bo i ta wein na i susaari ni.

¹⁴ Ama, haari ni nyini n kɛrɛ mmɔɔ ni, bu sui yo tiiri tantanantan a. Haari ni nyuma, sanƙa kɛrɛ bo bu ti ka be sukan sesesu dawa n dɛɛ kadasim ni, i yoori bu ka nyini sanvuin n toko kata bu sunsunni su wɔ, má ka Kristo ɲgumi koro yi i a.

¹⁵ Haari ni nyuma, sanƙa kɛrɛ bo bu kan kadasim n bo Nyemɛ ma Moyisi kɛrɛeri bu ni, i yoori bu ka sanvuin n toko kata bu sunsunni su wɔ.

¹⁶ Ama, bu koro yi i, kabo ba kɛrɛ i fa kɔ Moyisi jɔrɛ n su ni, ka, “Sanƙa bo i fa i nyunu wɔ Mibiɛ ni, sanvuin n kata má i nyunuawa kun.”

¹⁷ Tɔ, deke n bo bu kɛrɛeri i ka “Mibiɛ n” ni, bu kɛrɛ niiri i Awiewiɛ n wɔ. Deke bo Mibiɛ n Awiewiɛ n wo ni, dɔ ye mine nya bu tii a.

¹⁸ Yɛrɛ yiri, ya la má sanvuin bo i kata ya nyunu. Kabo ya niɛ ɲu deke niɛnu nu ni, sɔ ye ya niɛ ɲu Mibiɛ n jirima woowa n a, na i ma ya woowa kaaki kabo i ti ni, na ya sunya i jirima woowa ni, subuka su sanƙa kɛrɛ. Ahin n fite Mibiɛ n Awiewiɛ n dɔ ɔ.

4

Ajɛke n bo i ti ka i wo dundu nu n jɔrɛ

¹ Nyini ti, kabo Nyemɛ asi ya aɲunfɔ na wɔ fa ahin juma n ama ya ni, ya ɲuniɛ yɔrɔki má ya.

² Yɛrɛ, ya kete deke kɛrɛ bo i ti nyinse sa na bu kata i su asiri nu ni, ya dadaka má be, ya kaaki má Nyemɛ nɔaniɛ ni. Ama, ya kan nahɔrɛ n fofoe nu wɔ, nyini ma ya fa kɛrɛ sɔnɔ kɛrɛ na i si i sunsunni nu kabo ya wo ti Nyemɛ dɔ a.

³ Na haari nzen deke be akata labari kpa n bo ya kan i n su, bɛrɛ n bo bu suka ɲgbɛɛn ni ɲgumi dɔ, ye deke be akata i su a.

⁴ Dama Sitana bo i ti durunya n nu fɛn dɛɛ nyemɛ n ata bu nyi bu sunsunni nu na má bu yo yarada, adena má bu ɲu labari kpa n dɛɛ wein n fa kɔ Kristo jirima woowa n su, yiri bo i ti kabo Nyemɛ ti ni.

⁵ Ya kan má yɛrɛ ni ya tii jɔrɛ wɔ, ama, ya kan Yesu Kristo jɔrɛ a, ka yiri ti sɔnɔ kɛrɛ Mibiɛ a. Yɛrɛ, ya ti am dɛɛ akɔɔm wɔ, yiri Yesu dɛɛ ti.

⁶ Dama Nyemɛ bo i yo seeri ka, “Ma wein ta fite awosin nu” ni, yiri ma i wein ata ya ahore su a, na i ma ya si i jirima woowa n bo i ta fite Yesu Kristo nyunuawa dika ni.

⁷ Ahin jɔrɛ n ti ajɛke bo ya la i Nyemɛ dɔ ɔ, ama, yɛrɛ yiri, ya ti ka dundu bo ba fa yakati ata ya n ye ya la ahin ajɛke n a. I ti sɔ ɔ, adena mine ɲu i na bu si ka nyini yiko n bo i la má aɲusu n ti Nyemɛ dɛɛ wɔ, i fite má ya dɔ.

⁸ Bu miɛ ya sɔ ɔ deke kɛrɛ nu, ama, Nyemɛ yi ya nu wɔ. Ya tanda sɔ ɔ, ama, ya yi má tama.

⁹ Bu kɛrɛ ya wuwuruwa sɔ ɔ, ama, Nyemɛ yaki má ya. Bu bo ya ji asiɛɲgu sɔ ɔ, ama, ya ka má ɲgbɛɛn.

¹⁰ Saŋga kere ya nati ŋu yiwee n bo Yesu wuuri i n be wɔ, adena minem koro ŋu ŋɔɔ n gusu bo Yesu la i n be, ya ŋunie nu.

¹¹ Nahore, yere bo ya la ŋɔɔ ni, saŋga kere bu fa ya wura yiwee woo-biri wɔ, Yesu dɛɛ ti, adena bu koro ŋu ŋɔɔ n gusu bo Yesu la i n ya ŋunie nu.

¹² Tɔ, yere, ya wo yiwee nu wɔ, ama, ambere wo ŋɔɔ nu wɔ, Nyeme dɔ.

¹³ Ya jɔre n ti kabo ba kere i Nyeme Jɔre Kadasi n nu wɔ, ka, “M yo yoori yarada a, nyini dɛɛ ti ye m jɔjɔri sɔ n a.” Tɔ, yere gusu ayo nyini yarada kun n wɔ, nyini dɛɛ ti ye ya jɔjɔ sɔ n a.

¹⁴ Dama ya si tenle su ka Nyeme bo i tengeeri Yesu i yiwee n nu ni, yiri saŋga tenge ya ni Yesu yiwee n nu a, na i fá ya ni ambere kere kɔ i nyunu.

¹⁵ Ahin n kere ma am nya kperɛ a, adena mine dɔŋgu sunya Nyeme ahɔroma ni subuka su, na i la má aŋusu, nyini ma bu suda Nyeme asi subuka su a, na i wura Nyeme kpiri.

Ya la yarada n ye ya nati a

¹⁶ Nyini dɛɛ ti, ya ŋunie yɔrɔki má ya. Haari ni bo ya ŋuniembaa sugbaraki ni, ama, ya ahore su, ya sunya faŋga fɔfɔre Nyeme dɔ ɔ, ale kere bo i cin.

¹⁷ Ahin waharam bo ya sudi bu ni, bu ti má pui, na bu ce má, nyini ni má ya nya jirima woowa bo i la má aŋusu na i wo bere saŋga kere n a.

¹⁸ Ya fa má ya nyumbaa kpama má dekem bo ya ŋu bu n su, ama, dekem bo ya ŋu má bu ni, ya fa ya nyumbaa kpama bere su a, dama bo ya koro ŋu i ni, i ce má, ama, bo ya koro ŋu má i ni, i wo bere wɔ, saŋga kere.

5

¹ Tɔ, ya si durunya n nu fen dɛɛ aŋuniembaa n jɔre, i ti ka nambue wɔ, nzen wɔ saaki, sɔnɔ kere la ataari kpa bo Nyeme ata i afa ase i. Má adamande taari i a, nyini awuru n wo aŋgoro wɔ, i wo bere saŋga kere wɔ.

² Kabo i ti sɔ na ya toko wo fen ni, ya wo waraki su wɔ. Ya ahore su, ya koro ka Nyeme fa ya wura ya awuru n bo i fite aŋgoro n nu wɔ, na i kata ya ŋu.

³ Ya koro i sɔ ɔ, na ya wura i ka sutura na má ya nati ya bu ŋgbɛɛn.

⁴ Yere bo ya toko wo ahin nambue n nu ni, ya waraki wɔ, na ya wo ahore tanda nu sɔ ɔ lɛɛ. I ti má ka ya koro ka ya yi i se wɔ, ama, ya koro ka ya wura aŋgoro dɛɛ n nu wɔ, na i kata ya ŋu, adena Nyeme bá kaaki ahin aŋuniembaa n bo i wu ni, na i ma ya i dɛɛ ŋɔɔ ni.

⁵ Nyeme ni i tii adu mɔ asɛɛ nyini deke n su ase ya a. Na wɔ fa i Awiewie n ama ya, na i kere kabo i má ya deke n kere bo i seeri ka i fá ma i minem ni.

⁶ Tɔ, nyini ma ya la ahoresi saŋga kere n a. Ya si tenle su ka kabo ya toko wo ahin aŋuniembaa n nu ni, ya nya wo má Mibiɛ n dika n nu lɛɛ.

⁷ Kisa ya la yarada ye ya nati a, má ka ya nyumbaa ye ya fa ŋu asi nati a.

⁸ Yere, ya la ahoresi n dɛɛ ti, ye ya ŋa ya yaki ahin aŋuniembaa n a, na ya kɔ awuru Mibiɛ n dɔ.

⁹ Nyini ti, yere yiri, nzen ya wo ya awuru n nu, wara ya wo má nu, ya boro ya nyi ka ya yo sa bo i sun Mibiɛ n nu wɔ.

¹⁰ Dama wɔ yo daka ka sɔnɔ kere bá jina Kristo nyunu, i jɔre diibiri ni, adena i mi nya i ŋkatɔ fa kɔ dekem bo i yoori bu i ŋɔɔ n su ni, bo i ti kpa, ni bo i ti má kpa ni.

Kabo Yesu Kristo dɛɛ ti na ya ni Nyeme aŋen ayo dɔŋgu ni

¹¹ Ya si kabo i ti na ya soro Mibiε n ni, nyini dεε ti, ye ya boro ya nyi na ya ma minem kaaki bu sunsunni fa kɔ i jɔrε n su a. Nyεmε si kabo ya woowa kεrε ti barasu. Na m la tama ka am sunsunni nu, ambεrε mmɔɔ si ya woowa.

¹² Ya sukaaki kan kere má am bekun kabo ya ti wɔ, ama, ya sukere am deke bo i ti na am koro fa ya fɔ n wɔ, adena nzen minem bá koro ka bu fɔ deke bo bu koro ŋu i n su, na i fite má ahorembaa su, dama bu koro ka bu bu am ŋgbεen n dεε ti, tɔ, am koro bɔ bu nu ni jɔrε kpa.

¹³ Nzen bu ŋa ya bo fiε wɔ, Nyεmε dεε ti ye ya bo fiε a, ye nzen ya nyunu ti koroowa gusu a, ambεrε dεε ti ye ya nyunu ti koroowa a.

¹⁴ Koro n bo Kristo fa koro ya ni, yiri niε ya su a, dama ya yo ya sunsunni ka sɔnɔ kun n bo i wu maari sɔnɔ kεrε n dεε ti ni, nyini la ka, sɔnɔ kεrε awu wɔ lεε.

¹⁵ I wu maari sɔnɔ kεrε wɔ, adena bo bu wo ni ŋɔɔ n bita bu ŋɔɔ n ka i ti má bu dεε, ama, i ti i dεε wɔ, yiri n bo i wu maari bu na wɔ kaaki atenge i yiwee n nu bekun ni.

¹⁶ Nyini dεε ti, fa i kisa fa kɔ, kabo durunya n nufɔm n bu sɔnɔ ni, yεrε, ya bu má be sɔ kun, haari ni bo ya yo buuri Kristo mmɔɔ sɔ ni, kisa ya bu má i sɔ kun.

¹⁷ Nyini yiri, nzen be ni Kristo ayo kun, i mi n ayo deke fɔfɔrε wɔ lεε, i woowa dawa n asin, na i deke n kεrε akaaki fɔfɔrε wɔ lεε.

¹⁸ Nyini n kεrε fite Nyεmε dɔ ɔ. Yiri ama Kristo ayo ya ni yiri ni i tii afien dɔŋgu a, ye wɔ ma ya juma n bo i yo i ni minem afien dɔŋgu.

¹⁹ Nyini la ka, Nyεmε ma Kristo yo i ni durunya n nufɔm afien dɔŋgu a, na i tenge má bu satie jɔrε su, haari kaan sɔ, ye wɔ fa nyini afien dɔŋguyo n jɔrε n awura ya saa nu, ka ya kan i.

²⁰ Nyini dεε ti, ya ti sunmafɔm bo ya jina Kristo jaa nu wɔ. I ti ka Nyεmε ni i tii sufa ya susere am jande a. Ya jina Kristo dεε jaa nu susere am wɔ, ka, am ma yiri yo am ni Nyεmε afien dɔŋgu.

²¹ Yiri Kristo n bo i la má satie be ni, yiri ye Nyεmε ma wɔ de satieyofɔm n jinaabiri a, yεrε dεε ti, adena ya kaaki minem bo Nyεmε de bu ka bu yo sa bo i kɔ atin su i dɔ.

6

¹ Yεrε bo ya ni Nyεmε saŋga yo juma ni, ya sere am wɔ, ahɔrɔma n bo am ade i ni, má am ma i ka ŋgbεen.

² Dama Nyεmε ŋa,
“Saŋga kpa n ba juuri ni, ye m deeri am sere a,
na tiide cεen n ye m bukaari am a.”

Am ti fεn, kisa ti saŋga kpa n a. Am ti fεn, kisa ti tiide cεen n a.

³ Ya sukanda má be atin wɔ, adena má be jaraki ya fa kɔ ya juma n bo ya yo i n su.

⁴ Ama, deke n kεrε nu, ya kere ka ya ti Nyεmε amusuisufɔm wɔ. Dama haari nzen ya wo wahara nu, ni kekereke nu, ni anyumboro nu, ya mindi de i wɔ.

⁵ Haari na ba bo ya, na ba nyi ya dansaraka, na ba di aluwa ya busu, na ya yo juma kekereke, na ya kpiε daafiri, na ya da ahɔε,

⁶ nyini n kεrε ni, na ya kere ka ya woowa ti casi wɔ, na ya la si Nyεmε dɔ, na ya mindi, na ya yo kpa, na ya wo ni Awiewie Casi ni, na ya la koro nahɔrε su.

⁷ Ya kan nahɔrε jɔrε wɔ, na ya yo juma n ni Nyεmε dεε yiko n nu. Ya bita biesɔya nenje bo i ti sa bo i kɔ atin su Nyεmε dɔ ɔ, i wo ya saa fɔmbɔrɔ, ni ya saa biε nu wɔ.

⁸ Bu wura ya kpiri wɔ, na bu kaaki yo ya kaan. Bu kansi ya a, na bu kaaki jaraki ya. Bu ɲa ya dadaka minem wɔ, ama, bu kaaki ɲa ya kan nahɔɛ wɔ.

⁹ Ya ti ka minem bo be si má ya wɔ, ama, deke kɛɛ minem si ya sɔ ɔ lɛɛ. Ya ti ka ya wu wɔ, ama, ya la ɲɔɔ sɔ ɔ lɛɛ. Bu bo ya ni anyumboro sɔ ɔ, ama, ya wu má.

¹⁰ Ya wo ahoresaaki nu sɔ ɔ lɛɛ, ama, saɲga kɛɛ ya la ahorejɔ ɔ. Ya wo ka ya ti yaarifɔm wɔ, ama, ya fa ajekɛ ma minem dɔɲgu wɔ. Ya ti ka ya la má pui wɔ, ama, deke n kɛɛ ti ya dɛɛ wɔ.

¹¹ Tɔ, ambɛɛ ya danfo Kɔrintofɔm, ya fa má deke be afiɛ má am su, ya teke ya ahorembaa ama am.

¹² Yɛɛ, ya kpiɛ má am ya koro, ambɛɛ yiri, am akpiɛ ya am koro.

¹³ Am ti ka m nbaam dɛɛ ti ye m suse am sɔ n a, ka am gusu teke am ahorembaa ma ya, kabo ya teke ya dɛɛ ama am ni.

Má am fa am ɲu bo minem bo bu yo má Kristo yarada n su

¹⁴ Má am fa am ɲu bo minem bo bu yo má Kristo yarada n su, dama bo i yo sa bo i kɔ atin su Nyɛmɛ dɔ n ni ketemafɔ ni, i yo sɛ ye bu koro saɲga wo a? Wara wein ni awosin yo sɛ koro saɲga wo a? Ai, i koro yo má.

¹⁵ Nzu anɔɔsɛ wo Kristo ni Sitana afiɛn a? Wara nzu tana wo sɔɲɔ bo wo yo Kristo yarada n ni bo wɔ yo má i yarada n afiɛn a? Ai, bu la má tana.

¹⁶ Nzu anɔɔsɛ wo Nyɛmɛ Sereebiri Awuru n ni amɔɛm afiɛn a? Ai, bu la má anɔɔsɛ be. Yɛɛ ti ka Nyɛmɛ Sereebiri Awuru n a, ye yiri Nyɛmɛ bo i wo bɛɛ saɲga kɛɛ n wo nu n a. Kabo Nyɛmɛ ni i tii ase ni, ka,

“M wó bu dɔ,
na m ni bɛɛ sáɲga nati,
na m yó bu Nyɛmɛ,
na bu yó m minem.”

¹⁷ Nyini ti, Nyɛmɛ akaaki ase ka,

“Am fite yaki bu,
na am kpaaki yaki bu,

Micera ni seeri sɔ a.

Na má am fa am ɲu mata deke bo i ti má casi,
na m dé am.

¹⁸ Na m yó am Si,
na ambɛɛ gusu yó m dɛɛ nbaam.

Kabo Micera Kpiri n ase lɛɛ.”

7

¹ M ninbaa koroowam, ahin deke n kɛɛ bo Nyɛmɛ ase ka i yó ma ya n dɛɛ ti, am ma ya kpakpara ya ɲu fite deke kɛɛ bo i ma ya ɲuniɛmbaa n ni ya awiɛwiɛ n yo fin ni, na am ma ya soro Nyɛmɛ na ya woowa kɛɛ ti kabo Nyɛmɛ koro ka i ti ni.

Kabo bu sayoowa ma Pɔɔlu ahore jɔɔri ni

² Am teke am ahorembaa na am de ya. Ya do má am be ɲgasi, ya saaki má am be, ya sisi má am be.

³ Deke bo i ti na m se ahin sɔ ni, i ti má ka m sujaraki am wɔ, dama ma du mɔ ase am ka am jɔɛ wo ya ahore su, ya ni ambɛɛ ti kun wɔ, haari yiwee nu wara ɲɔɔ nu.

⁴ M la ahoresi agaya fa kɔ am dɔ, na m fa am fɔ agaya, na m la ahoreda agaya ambɛɛ dɛɛ ti, haari ni wahara n bo ya di i n kɛɛ ni, m la ahorejɔ bo i la má aɲusu.

⁵ Dama sanƆa bo ya ba juuri Makedoniya awɔre n nu ni, ya nya mǎ numiyi haari kaan sɔ mmɔɔ, ama, ya ŋuuri kekereke wɔ deke kere nu. Minem fa aluwa kpura ya sɔ ɔ, na sere suti ya, ya ahore su.

⁶ Ama, Nyeme yiri, yiri dada minem bo bu ahore asaaki n ahore a, yiri adada ya ahore a, Titosi baawa n deɛ ti.

⁷ Mǎ ka i baawa ni ŋgumi deɛ ti a, ama, ahoreda n bo am ni yiri kere nyaari i n deɛ ti a. Wɔ se ya kabo am wara ado m na am koro ka am ŋu m barasu ni, ni kabo am ahore asaaki fa kɔ jɔre n su ni, ni kabo am ahore abi m busu barasu ni, nyini ma m ahore ajo akɔ asin su n a.

⁸ Haari nzen kadasi n bo m yo kere maari am n asaaki am ahore, ma yo mǎ m si i n sɔ, fa kɔ nyini n dika. Nzen mǎ m ŋuuri kabo nyini kadasi n ama am ahore asaaki, haari ni bo wɔ ce mǎ ni, mǎ m yoori m si i n sɔ.

⁹ Kisa m ahore ajo, mǎ ka am ahore asaaki n deɛ ti a, ama, am ahoresaaki ni, wɔ ma am akaaki am wo n deɛ ti a. Nyini ahoresaaki ni, yiri ama am akaaki kabo Nyeme koro n a, adena mǎ am kpaasi fieo, yere deɛ ti.

¹⁰ Dama ahoresaaki bo i ti kabo Nyeme koro ni, yiri ma ya kaaki ya wo ye ya nya tiide a, na ya yo mǎ m si i n sɔ a. Ama, durunya n nu deɛ ahoresaaki n fa yiwee ba.

¹¹ Am nie sa bo Nyeme ma am ayo i a, nyini ahoresaaki n deɛ ti, kabo am nyunu aboro ka am yo jɔre n dɔŋgu na mǎ be jaraki am ni, ni kabo yaa ti am fa kɔ yiri n bo wɔ do ŋgasi n su ni, ni kabo jɔre n ama sere ati am ni, ni kabo am wara ado m na am koro ka am ŋu m ni, ni kabo am ahore abi m busu ni, ni kabo am nyunu aboro ka am fa nahɔre cin i sui ni. Deke n kere nu, am akere ka am la mǎ ŋgasi be lee, fa kɔ nyini jɔre n su.

¹² Deke bo i ti na m yo kereeri kadasi n maari am ni, mǎ yiri n bo i doori ŋgasi n deɛ ti a, wara sɔnɔ n bo wɔ do i ŋgasi n deɛ ti a, ama, deke n bo i ti na m yo kereeri i sɔ n la ka, adena Nyeme ma am si kabo am cece wo ya nu ni anyumbo su barasu ni.

¹³ Nyini n kere adada ya ahore a.

Mǎ nyini ahoreda n ŋgumi ye ya la i a, ama, deke bo i ma ya ahore ajo agaya n la kabo Titosi ahore ajo ni, dama amberɛ kere adada i ahore a.

¹⁴ Nyini ma ya ahore ajo sɔ a, dama ma du mɔ afa am afo kabo am ti barasu n akere yiri Titosi, na am ama ma di mǎ nyinse. Kabo jɔre n kere bo ya kan kereeri am n ti nahɔre ni, sɔ ye minem koro ŋu kabo ya fɔri am ŋusu jɔre n kereeri Titosi n gusu n ti nahɔre a.

¹⁵ Deke bo i ma yiri Titosi koro am agaya ni, maala bo i tenge su kabo am kere deer i nɔanie n ni, ni kabo am deer i ni am saa nnyɔ n na sere ti am agaya na am ŋunie subobo am ni.

¹⁶ M ahore ti jɔwa, dama deke n kere nu, m la ahoresi fa kɔ am dɔ.

8

Aceeri n bo bu de kɔ maari Yerusalem deɛ Kristo jama n jɔre

¹ Tɔ, m ninbaam, ya koro ka am si kabo Nyeme ama Kristo jamam bo bu wo Makedoniya deɛ awɔre n nu n adi i ahɔrɔma barasu ni.

² SanƆa bo bu wo wahara ni kekereke nu agaya ni, na ba kere kabo bu ahore ajo akɔ asin su, na ba ce aceerim beberebe ni bu ahorembaa kun, haari ni bo yaari ati bu agaya ni.

³ M koro di daani ka bu maari bu fanƆa nyaari wɔ, haari ba ma atara kabo mǎ bu ma ni mmɔɔ. Bu koroyanu,

⁴ na ba sere ya jande ka ya ma bere mmɔɔ nya atin na bu saa wo nyini juma n nu, bo ya de aceerim fa ma Nyeme minem ni.

⁵ Haari na ba yo akɔ atara kabo má ya sunsun ka bu yo ni. Bu du mɔ faari bu ɲu maari Mibiɛ n wɔ ka, na ba nya fa bu ɲu ama yere gusu, kabo Nyeme koro ni.

⁶ Tɔ, kabo Titosi ti sɔnɔ bo i boori ahin aceeri juma n bu am nu ni, wɔ yo daka ka ya sere i jande na i suyo i sɔ ma am, haari i kɔ wie.

⁷ Amberɛ, am boro am nyi deke n kere nu wɔ, bere la yarada n bo am la i ni, ni kabo am koro jɔjɔ ni, ni kabo am la si ni, ni kabo am cɛcɛ wo deke n kere nu ni, ni kabo am la koro ma ya ni. Kabo i ti sɔ ni, wɔ yo daka ka am boro am nyi yo ahin aceeri juma n gusu.

⁸ I ti má ka m suma am nɔɔ ka am yo sɔ ɔ, ama, m koro ka m kere am kabo nyingam la koro ni anyumboro na bu buka n wɔ, adena m yo am na m niɛ ka am la koro nahɔre su.

⁹ Am si juma kpa n bo ya Mibiɛ Yesu Kristo yoori i ni, i yo ti ajekɛfɔ Nyeme dɔ ɔ, ama, amberɛ dɛɛ ti na wɔ kaaki jaarifo, adena am kaaki ajekɛfɔm Nyeme dɔ, kabo wɔ kaaki jaarifo n dɛɛ ti.

¹⁰ Ahin jɔre n yiri, afara, amberɛ du mɔ boori nyini juma n bu a, má ka am du mɔ boori i bu ni ɲgumi, ama, ni kabo am koroori ka am yo i n gusu ni, nyini ti, fɔ bo m koro ka m fa tu am n la ka,

¹¹ i ti ye ni ka am yo juma n bo am ɲa am yo i n kɔ wie kisa, adena kabo am yo la anyumboro am sunsunni nu, na am koro ka am yo i ni, sɔ ye am kere anyumboro a, na am fa deke n bo am la i n fa yo i wie.

¹² Nzen be la anyumboro na i koro ka i ce aceeri, Nyeme de i aceeri n fa kɔ deke bo i koro ce n su wɔ, má deke bo i koro ce má ni.

¹³ I ti má ka ya koro ka ya yi nbem fie nu, na amberɛ fie wɔ. Ai, ama, ya koro ka i se su ma sɔnɔ kere wɔ.

¹⁴ Tɔ, kisa am la i, na nbem la má i ni, am buka bu. Na nzen bu gusu bá la i, na am la má i, bu gusu buka am. Sɔ ye i se su ma sɔnɔ kere a.

¹⁵ I ti kabo ba kere i Nyeme Jɔre Kadasi n nu wɔ, ka,
 “Bo i tambuuri beberebe ni, wɔ sunnu asin má su,
 ye bo i tambuuri kaan n gusu, wɔ kpɛ má i su.”

Titosi ni i bukafɔm n jɔre

¹⁶ Ya da Nyeme asi, yiri ma Titosi nyunu aboro na i cɛcɛ wo am dɔ a, kabo mini mmɔɔ dɛɛ ti ni.

¹⁷ Ya sere yiri Titosi ka i ba am dɔ, na wɔ soro su, ama, yiri ni i tii dɛɛ koroyanu ye i ɲa i kɔ a, dama i cɛcɛ du mɔ wo am dɔ.

¹⁸ Bo i buka i su, ya susunma ya niwa be gusu am dɔ. I ti sɔnɔ bo i yo labari kpa n juma a, nyini dɛɛ ti, Kristo jama n kere kansɛ i wɔ.

¹⁹ Má nyini ɲgumi, ama, yiri ye Kristo jama n kere ayi i ka i susu ya su buka ya a, na ya niɛ ahin aceeri ceewa juma n su n a. Ahin juma n wura Nyeme kpɛri wɔ, na i kere kabo ya koro ka ya buka minɛm ni anyumboro ni.

²⁰ Ya koro má ka be jaraki ya fa kɔ kabo ya niɛ ahin aceeri beberebe n su ni.

²¹ Nyini ti, ya boro ya nyi wɔ, na ya yo sa bo i kɔ atin su, má Nyeme ɲgumi dɔ, ama, adamande mmɔɔ dɔ.

²² Ya kaaki susunma ya niwa be buka bu su. I ti sɔnɔ bo ya yo i anɛ atin barasu nu, anu ka i la anyumboro fa kɔ deke dɔɲgu su. Kisa ya ɲu ka i la anyumboro tara sɔ, dama i la ahoresi fa kɔ am dɔ.

²³ Titosi yiri, i ti m matafɔ bo m ni yiri sanɲa yo juma ma am wɔ. Ya ninbaa nnyɔm bere yiri, bu ti minɛm bo Kristo jamam n asunma bu wɔ, na bu kaaki wura Kristo kpɛri.

²⁴ Nyini ti, am yi am ɲu fofoe nu, na am kere Kristo jamam ni kabo am la koro ni, na bu si deke n bo i ti na ya fa am Ɔ ni.

9

Kabo ya buka ya beɲgu Kristofom bo ba fun i ni

¹ Tɔ, aceerim bo am fa kɔ buka Nyeme minem ni, mini dɔ, wɔ ti má ye ka m kere i jɔre.

² Dama m si kabo am koro ka am buka barasu ni, haari ma du mɔ afa am aƆ Makedoniya awɔre n nufom dɔ, ka ambere Akaya awɔre n nufom n adu mɔ akpa am ɲu haari afara kere. Kabo am nyunu aboro na am koro ka am ce ni, wɔ yo bu dɔɲgu gusu ɲunie nyanyaka ye bu koro ka bu ce n a.

³ Nyini ye m susunma ahin ya ninbaam am dɔ n a, adena kabo ya fa am aƆ akere bu ni, na má i ka ɲgbɛen, ama, am yo siriya, kabo ma du mɔ ase bu ka am yo siriya ni.

⁴ Má nyini, nzen Makedoniyafom nbem suuri m su baari, na bu ba ɲu ka am nya yo má siriya, i ti ya nyinse wɔ, ya kan má am dɛɛ yiri, kabo ya yo am yarada n dɛɛ ti.

⁵ Nyini dɛɛ ti, ma ɲu ka wɔ yo daka ka m sere ya ninbaam ni, na bu du m mɔ am dɔ, na bu buka am, na am sɛsɛ am aceeri n bo am yo sereeri ka am yi fa ma n su. Nyini ma i yo koro aceeri a, i ti má ka bu miɛ am wɔ.

⁶ Am tenge su, ka sɔnɔ bo i dɔ kaan, i bá kpɛ kaan wɔ. Na sɔnɔ bo i dɔ dɔɲgu, i bá kpɛ dɔɲgu wɔ.

⁷ Sɔnɔ kere ce aceeri n kabo wɔ du mɔ asunsun i ahore su ka i ce barasu ni, má ka bu miɛ i wɔ, ama, i mi ma ni ahorejɔ, dama Nyeme koro bo i ce ni ahorejɔ ɔ.

⁸ Yiri Nyeme ni, yiri koro ma am nya i aceeri barasu kere a, na am nya deke kere bo am koro saɲga kere, na i sɛ am su, na am nya i buka su, adena am koro yo juma kpa kere.

⁹ Kabo ba kere i Nyeme Jɔre Kadasi n nu ni, ka,

“Wɔ sandi i aceerim afa ama yaarifom ni,
na i kpayo n wo bere saɲga kere.”

¹⁰ Nyeme ti bo i ma dɔdɔrifɔ ni aɛmbaa n a, na i kaaki ma minem diire na bu di a, yiri ma am aɛmbaa n a, na i ma i sunnu buka su, na i kaaki ma am kpayo subuka su saɲga kere.

¹¹ Na i ma am sunya beberebe deke n kere nu, adena am koro suyo kpa ma minem saɲga kere, nyini ma minem da Nyeme asi, fa kɔ deke n bo ya yo i n su a.

¹² Ahin aceeri juma n bo am yo i ni, i ti má ka i subuka Nyeme minem bo ba fun i ni ɲgumi wɔ, ama, i kaaki ma minem dɔɲgu da Nyeme asi wɔ.

¹³ Ahin juma n bo am suyo i kɔ wie ni, nyini kere kabo am woowa ti barasu a. Na minem ɲu i, na bu kansɩ Nyeme kabo am ade yiri Nyeme nɔanie n na am kan kere minem nahɔre, ka am su Kristo labari kpa n jɔre n su ni. Bo i buka nyini n su la kabo am yo kpa, na am kpaaki am nenɲem nu ma bere ni nyinɲam kere ni.

¹⁴ Kabo Nyeme ama am anya i ahɔrɔma akɔ asin su ni, bere, bu koro am ni anyumbo na bu sere Nyeme ma am.

¹⁵ Am ma ya da Nyeme asi fa kɔ i aceeri n bo wɔ fa ama ya na i la má aɲusu ni.

10

Kabo Pɔɔlu jɔjɔ fa kɔɔri i jumayoowa nyaari n su ni

¹ Mini Pɔɔlu ni m tii, m susere am wɔ, Kristo sawɔre n ni i benle woowa n dɛɛ ti, mini bo nbem ɲa nzen m wo am dɔ, m san nya ni, ama, nzen m wo má am dɔ yiri, m la ahore wɔ.

² Deke bo i ti na m susere am n bu la ka, m koro má ka am ma m yo ahore, saɲga bo m ba baari am dɔ ni, na m yo ahoresi jɔjɔ am, kabo m sunsun ka wɔ yo daka ka m jɔjɔ bu ni, bere bo bu ɲa ya su durunya n nufɔm woowa n su ni.

³ Haari ni bo ya wo durunya n nu ni, ya kun má lue n kabo durunya n nufɔm kun lue ni.

⁴ Biesɔya nengem bo ya fa kun lue n ti má durunya n nu fen dɛɛ biesɔya nengem. Ama, i fite Nyeme dɛɛ yiko n nu wɔ, na i kunma na i saaki faɲga woobiri kere, na i kunma na i saaki sunsunni kere bo i ti má nahore,

⁵ na i kunma na i saaki deke kere bo i wura i ɲu kpiri na i kanda minem na má bu si Nyeme ni, na i ma ya kunma sunsunni kere bo i ti ka ya kpɔfɔm ni, na bu de Kristo noanie ni.

⁶ Amberɛ, am deeri i noanie n wieeri, ye ya bá cin bu kere sui a, bere bo ba kete ka bu de má i noanie ni.

⁷ Amberɛ, deke bo am nyumbaa ɲu i ni, nyini ye am sunsunni wo i su a. Nzen be la ahoresi ka i ti Kristo dɛɛ sɔnɔ, i ti ye ni ka i mi kaaki sunsun ka yere mmɔɔ ti Kristo minem wɔ, kabo yiri mmɔɔ ti ni.

⁸ Haari nzen m fɔ yanfɔya tara kabo má m fɔ ni, fa kɔ yiko n bo Mibiɛ n afa ama ya n su, i la má m nyinse, nyini yiko n ye Mibiɛ n maari ya, ka ya fa buka am, na am kɔ mɔ ni am nyemesu ni, wɔ ma má ya ka ya fa saaki am ji wɔ.

⁹ M koro má ka i yo ka m sukere am kadasim n na m wura am sere wɔ.

¹⁰ Dama nbem bo bu kan m jɔre ni, bu ɲa, m kadasim wo nɔ na bu la faɲga, ama, saɲga bo mini ni m tii ba wo am dɔ, m ti sɔnɔ yɔrɔkiiwa a, kabo m jɔjɔ ni, be fa yo má pui.

¹¹ I ti ye ni ka nyini minem sɔ n si ka, kabo saɲga bo ya wo má dɔ na ya kere kadasim n nu ni, sɔ ye ya yó a, saɲga bo ya wo am dɔ ni.

¹² Ahin minem ni, bere ni bu tii kan kere minem kabo bu ti wɔ, ama, yere yiri, ya soro sere ni bo ya fa ya ɲu bo bu su, wara na ya fa ya ɲu bu bu. Ama, kabo bu fa bu ɲu bo bu bengum su ni, na bu fa bu ɲu bu bu ni, nyini kere ka bu la má ɲɔnle haari kaan sɔ lee.

¹³ Yere yiri, ya wura má ya ɲu kpiri, na ya fɔ tara kabo i ti ye ni ka ya fɔ ni. Ya yo kɔ jina ya juma yoobiri nyaari wɔ, deke bo Nyeme afa ama ya ka ya yo ni, haari ya yo aba aju amberɛ mmɔɔ dɔ.

¹⁴ Nzen má ya du má mɔ aba má am dɔ, nyini yiri, ya suyo kɔ sin ya juma yoobiri nyaari wɔ lee, fa kɔ ahin jɔre n su. Ama, kabo i ti ni, yere ti minem bo ya duuri mɔ a, haari bo ya ba juuri am dɔ, na ya kan Kristo labari kpa n akere am.

¹⁵ Yere, ya gusu fa má nbem juma fa fɔ má, na má ya fɔ tara ya juma yoobiri nyaari. Ama, ya la tama ka kabo am yarada subuka su ni, ya juma ni sandi bara ye am nu, kabo ya juma yoobiri nyaari ti ni.

¹⁶ Adena ya koro kɔ kan labari kpa n kere minem, bo bu wo asienm bo bu wo am nyunu dɔ ni. Ya koro má ka ya yo wura nbem dɛɛ juma yoobiri bo ba du mɔ ayo i n nu, na ya fa fɔ.

¹⁷ Ama, kabo ba kere i Nyeme Jɔre Kadasi n nu ni, ka, “Sɔnɔ kere bo i ɲa i fɔ, i fɔ Mibiɛ n dɛɛ ti.”

¹⁸ Dama má sɔnɔ bo yiri ni i tii kan kere kabo i ti ni, ye Mibiɛ n de i ka i ti sɔnɔ kpa, ama, bo Mibiɛ n kere ni, yiri ti sɔnɔ kpa.

11

Pɔɔlu ni jaramasa kɔrefɔm n jɔɛ

¹ Tɔ, má am soro su, na am yo sawɔɛ ma m, na m jɔjɔ sinnzin jɔɛ kaan sɔ. Jande, am yo sawɔɛ ma m.

² M si am kɔɛ kabo Nyɛmɛ si am kɔɛ ni, dama am ti m dɛɛ nbaam wɔ, ka baabara bo i nya si má biɛsɔ, ye ma fa am ace biɛsɔ kun, yiri la Kristo.

³ Ama, m soro sɛɛ wɔ, dama nzen m tengeeri Hawa jɔɛ n su, yiri la kabo woo n yo faari ngɔnletɛ dadakaari i na i nyaari i na i kunmaari i ni, nyini ma m soro ka beni, amɛɛ mmɔɔ bá mini fa kɔ am sunsunni nu, na am yaki Kristo dɛɛ atin n bo am su i su, na am ahorembaa ti kun, na am woowa ti casi Kristo dɔ ni.

⁴ Dama nzen be ba baari am dɔ na i ba kaanri Yesu be jɔɛ, na i ti má Yesu n bo ya kan i jɔɛ kereeri am ni, wara nzen am deerɛ awiɛwiɛ be, na i ti má Awiɛwiɛ n bo am du mɔ deerɛ i ya dɔ ni, wara labari kpa barasu be bo i ti má bo am deerɛ i ni, amɛɛ koro yo nyini sawɔɛ na am de nyini n sɔ a.

⁵ Bɛɛ bo bu yo bu ɲu ka bu ti Kristo jaramasam na bu la má aɲusu ni, mini yiri, m sunsun má ka m ti kaan ni bɛɛ fieo.

⁶ Haari ni bo m ti má sɔnɔ bo i koro jɔjɔ kabo bu jɔjɔ ni, m la si yiri, ma du mɔ akere am ka i ti sɔ ɔ, deke n kɛɛ nu ni saɲga kɛɛ.

⁷ Am aɲu má i? Saɲga bo m ba kaanri Nyɛmɛ dɛɛ labari kpa n kereeri am ngbɛɛn, na ma de má deke be ni, m yoori m ɲu kaan wɔ, na m wura am kpɪri, ma do ngasi wɔ lɛɛ, nzen sɛ?

⁸ M koro se ka m yo fiinri Kristo jamam nbem wɔ lɛɛ, dama m yo deerɛ buka bu dɔ ɔ, ye m fa ba bukaari am a.

⁹ Saɲga bo m yo wo am dɔ na m la má pui ni, ma fa má m fie afie má be, dama ya ninbaam bo bu fite Makɛdoniya awɔɛ n nu yo bukaari m ni deke kɛɛ bo wɔ kpɪɛ m su ni. Ma koro má ka m fa m fie fie am be deke be nu. M woori sɔ ɔ, na m toko wo sɔ ɔ lɛɛ.

¹⁰ Kristo dɛɛ nahɔɛ n bo i wo m nu n dɛɛ ti, be wo má bɛɛ bo i koro kanda m na m fɔ má nyini yanfɔya ni, Akaya awɔɛ n kɛɛ nu.

¹¹ Nzu ti a? Ka m koro má am, nzen sɛ? Ai, Nyɛmɛ si ka m koro am.

¹² Nyini ti, deke n bo m yo i ni, m kó su yo i sɔ ɔ, adena m tɔ bu atin, bɛɛ kɔrefɔm ni bo bu koro ka bu nya atin na bu fɔ, na bu se ka ya ni bɛɛ kɛɛ jumayoowa sɛ ni.

¹³ Dama nyini minɛm sɔ ti jaramasa kɔrefɔm wɔ, bu nati bu kɔɛ wɔ, fa kɔ bu jumayoowa su, na bu yo bu ɲu ka bu ti Kristo jaramasam wɔ.

¹⁴ Nyini n sɔ n ti má alekutura, dama haari Sitana ni i tii mmɔɔ yo i ɲu ka i ti mɛɛkɛ bo i ta wein n wɔ.

¹⁵ Nyini ti, i ti má alekutura, ka i amusuisufɔm mmɔɔ yo bu ɲu ka bu su nahɔɛ atin su wɔ. Ama, bu awiɛɛri bá kere kabo bu jumayoowa ti a.

Kabo Pɔɔlu diiri wahara i jumayoowa n dɛɛ ti ni

¹⁶ M koro ka m kaaki se am bekun wɔ, ka má be sunsun ka m ti sinnzin wɔ, ama, nzen am sunsun sɔ yiri, am yo sawɔɛ na am de m ka m ti sinnzin wɔ, adena mini mmɔɔ koro fɔ kaan sɔ.

¹⁷ Ahin ahoresi n bo m fa fɔ sɔ ni, i fite má Mibiɛ n dɔ, ama, m jɔjɔ ka m ti sinnzin wɔ.

¹⁸ Kabo minɛm dɔɲgu fɔ kabo durunya n nufɔm yo ni, sɔ ye mini gusu fɔ n a.

¹⁹ Am aɲu má i? Ambere la alecira a, am mindi de minem bo bu ti sinnzin n wɔ, ni ahoreda a.

²⁰ Nahɔre, haari minem bo bu mie am fa am yo bu akɔm ni, am mindi de bu wɔ, wara nzen be asisi am, am mindi de i wɔ, wara nzen be anya am taraabiri, am mindi de i wɔ, wara nzen be kere i ɲu am dɔ, am mindi de i wɔ, wara nzen be boori am nyɔɔnu, am mindi de i wɔ.

²¹ Yere, ya yo má nyini n be sɔ am nu, i ti m nyinse wɔ, beni, ya yɔrɔki ya ɲu n deɛ ti a.

Ama, kabo nyini minem soro má sere na bu fɔ deke kere ti ni, mini mmɔɔ, kisa m gusu soro má sere na m fɔ fa kɔ nyini dekem n su. Beni, am sunsun ka m jɔjɔ ka m ti sinnzin wɔ.

²² Bu ɲa bu ti Hiburufɔm wɔ? Tɔ, mini mmɔɔ, m ti sɔ ɔ. Bu ɲa bu deɛ la Yisarelifɔ nyemɛsu atin ni? Tɔ, mini mmɔɔ, m su nyini n su a. Bu ɲa bu ti Abraham anumam wɔ? Tɔ, mini mmɔɔ, m ti sɔ ɔ.

²³ Bu ɲa bu ti Kristo amususufɔm wɔ? Tɔ, m tara bu. Am nie, i ti ka m nyunu akan m ye m jɔjɔ sɔ n a. Ama, nahɔre, ma yo juma atara bu, ba nyi m dansaraka bo i la má nɔ, bu boori m haari m ɲɔɔ ba kaari kaan sɔ ɔ, sanɲa dɔɲɲu, kaan sɔ, má ma wu. Nyinim kere nu, m tara bu.

²⁴ Kpe nnu lee bo Yudafɔm n afin m ɲgbere mbaa kun kun aburana kun kpie su.

²⁵ Kpe nsen lee bo ba fin m ni bulaari ɲgbere. Ba tu m yabue kpekun. Kpe nsen lee bo m wo lee bambakam nu tieku n su na ba sandi nu, haari na ma da tieku n nu kpekun, kɔɲɲue ni wiesu.

²⁶ M nati sɔ lee sanɲa kere, m la má tana, ma ɲu anyumboro nzuetinm kpieɛbiri, ma ɲu anyumboro minem bo bu nati fin bu benɲum n saa nu, ma ɲu anyumboro m tienɲu minem saa nu, ma ɲu anyumboro minem bo bu ti má Yudafɔm saa nu, ma ɲu anyumboro mie kpirim su, ma ɲu anyumboro boro kpantainm nu, ma ɲu anyumboro tieku n su, ma ɲu anyumboro ya ninbaa kɔrefɔm n dɔ, bere bo bu yo bu ɲu ka bu ti Kristo minem ni.

²⁷ Ma yo juma nahɔre su adi wahara, ma kpie daafiri sanɲa dɔɲɲu, ma da ahɔe ni nzuehɔe, ma fun diire sanɲa dɔɲɲu, na ayere ati m, na ma nati m ɲunie ɲgbɛɛn.

²⁸ Dekem bo ba ka ni, m kán má bu jɔre, ama, deke bo i kpie m daafiri ale kere bo i cin ni, yiri la kabo m sunsun Kristo jama n kere jɔre n wɔ.

²⁹ Bu nu ɲma agbaraki ye i gbarakiiwa n asa má m a? Bu nu ɲma ye bu ma i yo satie ye i yo má m yaa?

³⁰ Tɔ, sanɲa bo wɔ yo daka ka m fɔ, m fɔ fa kɔ dekem bo bu kere ka m la má fanɲa n su wɔ.

³¹ Nyeme si ka m bu má kɔre, yiri ti ya Mibie Yesu Si a, yiri ti ye ni ka ya kansi i sanɲa kere a.

³² Sanɲa bo m yo woori Damasiko mie kpiri n nu ni, na gomina be wo bere, yiri ye Feme Aretasi yo faari mie n yiko wurari i saa nu, na nyini gomina n ama tintinijinafɔm n akɔ aɲminda mie n ka bu tara m.

³³ Ama, na minem n afa m awura kandie bambaka nu, na ba fa m acoondi kobe n tukoro nu, ajura asienɲu, na ma foro gomina n saa nu.

12

Sayikereewa n ni deke n bo Pɔɔlu ɲuuri i ka alele nu n jɔre

¹ Tɔ, wɔ yo daka ka m fɔ, haari ni bo i la má kperɛ be ni. M la deke nbem bo m kan buka su, bere la kabo Nyeme yiiri deke nbem kereeri m ka alele nu ni, ni kabo i yiiri sayoowam kereeri m ni.

² M si sɔnɔ be jɔrɛ, i ti Kristo sɔnɔ ɔ, yiri ye Nyɛmɛ yo faari i fun kɔɔri angoro woobiri nsan su ni i dɔ n a, i nyuma afɔ buru ni nna lɛɛ. Nzen i kɔɔri ni i nɔuniɛmbaa a, wara i awiɛwiɛ nu, mini, m si má, Nyɛmɛ si a.

³⁻⁴ Nahɔrɛ, m si nyini sɔnɔ n jɔrɛ, yiri ye Nyɛmɛ faari i fun kɔɔri alecɛɛma nu n a, na wɔ ti jɔrɛm bo bu la má kan, na be gusu la má atin ka i jɔjɔ bu, ama, kabo i yoori ni, ma si má, nzen i kɔɔri ni i nɔuniɛmbaa a, wara i awiɛwiɛ nu, mini, m si má, Nyɛmɛ si a.

⁵ Tɔ, nyini sɔnɔ n sɔ, ye m fa fɔ n a, ama, mini ni m tii, m koro fɔ má deke be ti, má ka dekem bo bu kere ka m la má fanɔa n ye m fa fɔ a.

⁶ Haari nzen má m nɔa m fɔ mmɔɔ, má m ti má sinnzin wɔ, dama má m kan nahɔrɛ wɔ. Ama, m yaki i sɔ ɔ, adena má am be wura m kpiri tara dekem bo i nɔu ka m yo bu, ni dekem bo i ti ka m kan bu ni.

⁷ Tɔ, fa kɔ sayikereewa beberebe n bo Nyɛmɛ fa kereeri m su, wɔ koro má ka nyini dɛɛ ti na m wura m nɔu kpiri. Nyini ti, i maari Sitana faari tɔrɛ be wuraari m nɔuniɛmbaa nu, i ti ka buwe ye i wɔwɔ m a, na i sukere m wahara, adena má m wura m nɔu kpiri.

⁸ Kpe nsan lɛɛ bo ma sere Mibiɛ n fa kɔ ahin jɔrɛ n su, ka i ma i fite yaki m.

⁹ Ama, na wɔ se m ka, “M ahɔrɔma n ase u su, dama sanɔa bo a la má fanɔa ni, ye m kere m yiko kabo m koro a.” Kabo i seeri sɔ n dɛɛ ti, nyini ma m la ahoreda na m fɔ fa kɔ kabo m la má fanɔa n a, adena Kristo yiko n wo m dɔ sanɔa kere a.

¹⁰ Nyini ma Kristo dɛɛ ti ye m ahore ti daawa n a, sanɔa bo m la má fanɔa n a, ni sanɔa bo bu kpiɛ m nzukɔ ni, ni sanɔa bo m nɔu kekere ni, ni sanɔa bo bu kere m wuwuruwa ni, ni sanɔa bo m nɔu anyumboro ni. Dama sanɔa bo m la má fanɔa ni, nyini sanɔa n ye m la yiko Nyɛmɛ dɔ a.

Kabo Pɔɔlu kereeri ka bu jɔrɛ kpiɛ i daafiri ni

¹¹ Tɔ, kabo m jɔjɔ ni, ma yo ka sinnzin wɔ lɛɛ, amberɛ miɛ m a, ye m yo sɔ n a. Má amberɛ ti minɛm bo am kan kereeri kabo m ti n a, má i ti ye. Dama bɛrɛ n bo bu yo bu nɔu ka bu ti Kristo jaramasam na bu la má anɔusu ni, mini yiri, haari ni bo m ti má pui ni, m ti má kaan ni bɛrɛ fieo.

¹² Nahɔrɛ, sam bo bu kere ka m ti jaramasa ni, ye m yoori bu am dɔ n a, ni mindi kɛrɛ, ni alekutura sam, ni yiko sam, ni abonɔ sam n a.

¹³ Nzu deke ye m yo maari Kristo jamam bo bu wo miɛ nyinɔam su n ye ma yo ama má am a? Má ka bo ma fa má m fie be afie má am ni. Tɔ, ma dɔ nɔgasi, am fa ce m.

¹⁴ Am ti fɛn, kisa ma sɛsɛ m nɔu su ka m ba niɛ am busu kpe nsan su lɛɛ, ama, m toko koro má ka m ba fa m fie fie am. M suba má ka m koro am nenɔge be wɔ, ama, m koro amberɛ wɔ. Dama má nbaam kpini nenɔgem se bu wufɔm a, ama, bu wufɔm ni kpini se bu nbaam n a.

¹⁵ Mini, deke bo m la i ni, m di i ka a, na m fa buka am, na m fa m nɔu kɛrɛ ma am, nyini ma m ahoreda. Ma si má, m koro am agaya n sɔ n dɛɛ ti, ye amberɛ koro m kaan sɔ n a? Ai, atin wo má nu.

¹⁶ Tɔ, am nbem nɔa ma fa má m fie be afie má am, ama, bu nɔa m fa nɔnɔletie wɔ, na ma dadaka am anya am taraabiri.

¹⁷ Ka sɛ? Minɛm bo m yo sunmaari bu am dɔ ni, m ma bu be sisiiri am be maari m, nzen sɛ? Ai, be asisi má am ama má m.

¹⁸ M yo sereeri Titosi wɔ, na wɔ ba am dɔ, na ma ma ya niwa n asunma i. Titosi yo sisiiri am, nzen sɛ? Ai, wɔ sisi má am. Amberɛ mmɔɔ anɔu ka m ni yiri kɛrɛ sunsunni ti kun wɔ, na ya kɛrɛ su atin kun su a.

¹⁹ Beni, nyini n kere bo ya jɔɔ i sɔ ni, am sunsun ka ya sukan de ya tii wɔ, nzen se? Ai, i ti má sɔ. M ninbaa koroowam, kabo ya ni Kristo ayo kun na ya jina Nyeme nyunu n ye ya se sɔ n a. Deke n kere bo ya yo i ni, i buka am na am kɔ mɔ ni am nyemesu n wɔ.

²⁰ M soro sere wɔ, m koro má ka m ba baari am dɔ, na má m ba tu am kabo m koro ka am ti ni, wara na ambere gusu ɲu m kabo má am koro ka m ti ni. M soro sere ka, beni, m bá ɲu ka, am suse akuruwa, na am susi kɔre, na am sufa yaa, na am suyo anyii sam, na am sukan am beɲgu jɔre susaaki bu, na am sukpara tere, na am suyo kpirikoro, na am la kpakpaakinu.

²¹ M soro sere ka m ba juuri, na má Nyeme ma m yo m ɲu kaan am nyunu, na má m ahore saaki fa ma bu, bere bo ba du mɔ ayo satie, na bu nya kaaki yaki má bu dangba sayoowam, ni sakaraya, ni konvikiya ɲgbɛɛɲgbɛɛnm ni.

13

Awieeri su dɛɛ bɔbɔwa ni anse ni

¹ Tɔ, ahin baawa n bo m sɔba ni, yiri yo m kpe nsan su bo m ba nie am busu a. Kabo ba kere i Nyeme Jɔre Kadasi n nu ni, ka, “Jɔre kere bo ba kan i na i ti nahɔre, má ka mine nnyɔ, wara mine nsan adi i daani.”

² Saɲga bo m yo baari am dɔ ba nieeri am kpe nnyɔ su ni, m yo bɔbɔri am nbem. Kisa na m wo má am dɔ ni, m koro ka m bɔbɔ bu bekun fa kɔ nyini n su, ka nzen m baari, m yáki má bere n bo bu yo yoori satie ni, ni bo bu buka bu su kisa n kere.

³ Dama am ɲa am koro ka am ɲu deke bo i kere ka Kristo fa m su, ye i jɔɔ am dɔ sɔ a. Tɔ, am aɲu ka yiri ti má bo i la má faɲga, ama, i la yiko am nu.

⁴ Nahɔre, saɲga bo bu yo kpamaari i baka jaanu n su ni, i yo la má faɲga, ama, haari ni nyini n kere, kisa i la ɲɔɔ wo bere, Nyeme dɛɛ yiko n dɛɛ ti. Sɔ ye i ti a, yere bo ya ni yiri kere ayo kun ni, yere mmɔ la má faɲga lee, ama, Nyeme yiko n dɛɛ ti, ye ya ni yiri súwo a, na ya yo juma ma am.

⁵ Ambere ni am tii, am fiiti am ɲu na am nie ka am woowa kere ka am ayo yarada nahɔre su, wara am ayo má. Am si má ka Yesu Kristo wo am dɔ ɔ, nzen se? I wo am dɔ yiri, ɲka am woowa kere ka am ayo má yarada nahɔre su wɔ.

⁶ M la tama ka am bá si ka, yere, ya ti má bo bu woowa kere ka ba yo má yarada nahɔre su ni.

⁷ Haari ni nyini mmɔ, ya sere Nyeme ma am wɔ, ka, má am yo sa be bo i kɔ má atin su, má ka ya koro ka mine ɲu ya woowa na i kere ka ya yo yarada nahɔre su, ama, ya koro ka am yo sa bo i ti kpa a, haari nzen má minem ɲu ya woowa na i kere ka ya yo má yarada nahɔre su.

⁸ Yere, ya koro yo má deke bo i jaraki nahɔre ni, ama, ya yo deke bo i su nahɔre ni ɲgumi su a.

⁹ Ya ahore ti jɔwa a, saɲga kere bo ya la má faɲga, na ambere la yiko Nyeme dɔ. Ahin n ye ya sere Nyeme ma am a, ka, i ma am woowa yo kabo i koro ni.

¹⁰ Nyini mmɔ dɛɛ ti, ye m wo má am dɔ ye m sukere am ahin kadasi n sɔ n a, adena m ba baari am dɔ, na má m fa Mibie n yiko n fa yi am anyumboro, nyini yiko n ye i maari m ka m fa buka am, na am kɔ mɔ ni am nyemesu n a, wɔ ma má m ka m fa saaki am ji wɔ.

¹¹ M ninbaam, jɔre bo wɔ ka n la ka, am ma am ahore jɔ, am boro am nyi na am wo wo kpa, am ti kabo m sereeri am ni, am la anɔse ni am

benɔm, am wo ni tanalaife. Nyeme ti tanalaife ni korofɔ a, yiri wɔ am dɔ a.

¹² Am bisa am benɔ dɔngu ni koro. Nyeme minem kere bo bu wo fen n bisa am kere dɔngu.

¹³⁻¹⁴ Ya Mibie Yesu Kristo dɛ ahɔroma ni, ni Nyeme dɛ koro ni, ni Awiewie Casi n dɛ wo fie n wo am kere dɔ.

Pɔɔlu kadasi bo i kere fa maari GALATIYAFOM ni

¹⁻² Mini Pɔɔlu bo m ti Yesu Kristo jaramasa n ni ya ninbaam bo bu wo m do fen n kere, sukere ahin kadasi n ma ambere Kristo jama minem bo am wo Galatiya dee awore n nu n wo. Yesu Kristo ni ya Si Nyeme bo i tengeeri Kristo i yiwee n nu ni, afa m ayo i jaramasa, ma adamande yoori m a, bekun ma minem gusu faari juma n maari m a.

³ Ya Si Nyeme, ni ya Mibie Yesu Kristo buka am, na bu ma am ahoreda.

⁴ Ya Si Nyeme koroyanu n dee ti, na wo ma Yesu ade ya jinaabiri awu ya satie dee ti, adena i de ya fite ahin durunya tie n bo ya wo nu n nu.

⁵ Yiri ti ye ni ka minem kere kansi i sanja kere sanja. Ami.

Labari kpa kun n kpein n wo bere a

⁶ Am jore amie m bo m si ma kabo m kan. Kristo dee anunfo si ti, ye Nyeme afere am ka am ba su i, wo nya ce ma, ye am akaaki am sin abo i ndende, susu labari barasu be bo i wo i ngumi ni labari kpa n ni.

⁷ Labari kpa nyinga be wo ma bere, deke bo i ti na m se so n la ka, minem nbem koro ka bu ta am nyi wo, na bu fa kereewa barasu nbem kaaki Kristo labari kpa ni.

⁸ Ama, haari nzen yere be, wara nzen Nyeme mereke be fiteeri angoro ba kaanri labari barasu be, na i ti ma kabo ya du mo kaanri i ni, Nyeme yo i mi ngbeen.

⁹ Kabo ya du mo ase am ni, nyini ye m kaaki suse am bekun n a, ka, nzen be ba kaanri labari barasu be bo i wo i ngumi ni bo am ade i ni, Nyeme yo i mi ngbeen.

¹⁰ Bu na m suyo m juma n ka mine kansi m wo, ama, i ti ma so, m koro ka m yo bo Nyeme kansi m wo, m suyo ma sa bo mine se ka m ti kpa. Nzen ma m na m yo sa bo i sun mine nu, ma m koro yo ma Kristo akoo.

Kabo Pɔɔlu ba yoori Kristo jaramasa barasu ni

¹¹ M ninbaam, m koro ka am si ka labari kpa n bo m kaanri i jore kereeri am ni, i ti ma deke bo i fite adamande sunsunni nu wo.

¹² I ti ma ka m deer i fiteeri adamande do o, ma be gusu kaaki fa kereeri m a. Ama, Yesu Kristo ni i tii yiiri i kereeri m a.

¹³ Am yo tiiri kabo m woowa yo ti barasu, sanja bo m yo suuri Yudafom dee atin n su ni. M yo kereeri Kristo jama n wuwuruwa agaya, na ma m butu bu.

¹⁴ M yo suuri Yudafom atin n su nahore su taraari m sara sufom dongu bo bu su nyini atin n su ni. M nyunu yo boroori agaya kabo m yo na m su ya nana sayoowam su.

¹⁵ Nyeme ahroma n dee ti, sanja bo bu nya wu ma m ni, ye i yiiri m ka m yo i juma n a. Sanja n bo i suunri Nyeme nu n ba juuri ni,

¹⁶ na wo yi i Wa n akere m, adena m ko kan i labari kpa n jore kere minem bo bu ti ma Yudafom ni, ye ma ko ma be do na i ko kere m kabo m yo n a.

¹⁷ Ma kaaki ako ma Yerusalem mie kpiri n nu na m ko nu minem bo bu du mo ti Kristo jaramasam ni. M kori Arabiya asien n su wo, na ma fite do, na ma nya akaaki ako Damasiko mie kpiri n nu.

¹⁸ I dɛɛ afɔ nsan sin, na ma kɔ Yerusalem ka m kɔ niɛ Kefasi busu, yiri bo bu kaaki fere i ka Petoro ni, na ma kɔ awo i dɔ cɛɛn buru ni nnu.

¹⁹ Saŋga bo m woori dɔ ni, ma ŋu má Kristo jaramasam n be abuka má su, má ka Yakobo, ya Mibiɛ niema ni.

²⁰ Nɔaniɛ n bo m sukɛɛ ma am ni, i ti nahɔɛ wɔ, m bu má kɔɛ. Nyɛmɛ ti m daanifo a.

²¹ Nyini sin na ma fite Yerusalem, na ma kɔ Siriya ni Silisiya dɛɛ awɔɛm n nu.

²² Nyini saŋga Kristo jamam n bo bu wo Yudiya awɔɛ n nu n be nya ŋu má m na bu ba si m,

²³ se ba ti ka mine ŋa, “Ahin sɔnɔ n yo kere ya wuwuruwa a, na i kun mine bo ba de Kristo labari kpa n na i mini bu, kisa i nati kan labari kpa n jɔɛ kere mine wɔ.”

²⁴ Deke n bo Nyɛmɛ ma m koro yoori i n dɛɛ ti, na ba kansɛ Nyɛmɛ.

2

Pɔɔlu ni i beŋgu jaramasa nbem jɔɛ

¹ Saŋga bo ya fite Yerusalem miɛ kpɛri n nu ni, i afɔ buru ni nna sin, na m ni Banabasi akaaki akɔ dɔ bekun, na ya fa Titosi abuka ya ŋu su.

² Deke n bo i ti na m kɔɔri n la ka, Nyɛmɛ kereeri m ka m kɔ a. Na m ni Kristo jama nkpiɛnkpiɛnm n atien ya nɔɔ ya ŋgumi deke be, na ma kan ateke bu nyi, akere bu fa kɔ labari kpa n jɔɛ bo m kan kere minem bo bu ti má Yudafoɛ ni. Dama ma koro má ka juma n bo m suyo i n kere ka ŋgbɛɛn.

³ Tɔ, haari ni bo Titosi yo woori m dɔ na i ti má Yudafoɛ ni, ba miɛ má i ka i wura kenkenne.

⁴ Ama, be abisa má ya i jɔɛ be, se mine nbem ba saŋgaari ya nu, bu yo bu ŋu ka bu ti Kristo dɛɛ minem wɔ. Bere seeri ka wɔ yo daka ka i wura kenkenne n a. Bu faari bu ŋu mataari ya a, adena bu niɛ kabo Yesu Kristo dɛɛ ti na ya nya ya tii ni. Má bu koro ka ya su nɔaniɛ kpamaawa n su wɔ, na ya yo akɔɔm.

⁵ Ama, na ya fa nu, ya ma má bu anyunu fieo, adena má be kaaki i sin bo labari kpa n bo i ti nahɔɛ, na ya kan kere am su.

⁶ Bere n bo mine bu bu ka bu ti nkpiɛnkpiɛnm ni, m cɛɛɛ awo má bu nu ka bu ti nkpiɛnm, dama Nyɛmɛ tambu má nu, nyini nkpiɛnkpiɛnm n gusu ala má kaakiiwa bo bu kaaki m fa kɔ m labari kpa n su.

⁷ Se deke bo bu ŋuuri i n la ka, Nyɛmɛ ye wɔ yi m ka m kan i labari kpa n jɔɛ kere minem bo bu ti má Yudafoɛ n a, kabo wɔ yi Petoro ka i kan i labari kpa n jɔɛ kere Yudafoɛ ni.

⁸ Dama Nyɛmɛ ama m yiko ka m kan i labari kpa n jɔɛ kere minem bo bu ti má Yudafoɛ ni, kabo wɔ ma Petoro yiko ka i kan i labari kpa n jɔɛ kere Yudafoɛ ni.

⁹ Na Yakobo, ni Petoro, ni Yohane bo mine bu bu ka bu ti Kristo jama mɔfoɛm n aŋu ka, Nyɛmɛ ama m nyini juma n ka m yo i a, nyini dɛɛ ti, na ba fa bu saa awura m ni Banabasi saa nu, na ba de ya ni bu saa nnyɔ. Na ya kere asoro su ka m ni Banabasi kɔ yo juma ni minem bo bu ti má Yudafoɛ ni, na bere gusu kɔ yo juma ni Yudafoɛ ni.

¹⁰ Ama, jɔɛ n bo bu seeri ya n la ka, má ya wara fi yaarifom sa. Nyini ye m yo la anyumboro ka m yo i a.

Kabo Pɔɔlu jarakiiri Petoro barasu ni

¹¹ Ama, Petoro ba baari Antiyoki mie kpiri n nu na ma jaraki i, ma fie má i su, dama sa n bo i yoori i ni, wɔ kɔ má atin su.

¹² Saŋga bo i du mɔ ba tuuri ya ni, i ni ya ninbaa Kristofom bo bu ti má Yudafom ni saŋga di diire a. Na mine nbem afite Yakobo dɔ aba ka bu ba nie ya busu. Bu ba juuri ni, na wɔ cin i ɲu afite minem bo bu ti má Yudafom n nu. I ni bere asaŋga adi má diire kun, dama i soro Yudafom n ahore wɔ.

¹³ I yoori sɔ ni, na Yudafo nyingam bo bu wo Antiyoki n gusu ayo kabo i yoori ni. Bu si kabo má bu yo, ama, ba yo má sɔ. Na Banabasi gusu asɔn bu su.

¹⁴ M ɲuuri ka bu su má Yesu labari kpa n bo i ti nahɔre n su ni, na ma se Petoro jama n kere nyunu ka, “Wɔrɔ, a ti Yudafo ɔ, ama, u woowa ti ka bo bu ti má Yudafom wɔ. Ye nzu ti ye a koro ka a mie minem bo bu ti má Yudafom na bu wo kabo Yudafom wo barasu n a?”

Yarada dɛɛ ti ye sɔnɔ kere nya tiide a

¹⁵ Nahɔre, ya fiteebiri, yere ti Yudafom wɔ, ya ti má minem bo bu su má Nyeme na ya fere bu ka satieyofom ni.

¹⁶ Ya si ka na nzen sɔnɔ yo Yesu Kristo yarada, ye Nyeme de i mi ka i yo sa bo i kɔ atin su i dɔ a, ama, i ti má ka i mi su Nyeme noanie kpamaawa n su, ye Nyeme de i ka i yo sa bo i kɔ atin su i dɔ a. Tɔ, ye yere gusu ayo Yesu Kristo yarada, adena Nyeme de ya ka ya yo sa bo i kɔ atin su i dɔ, i ti má ka ya su noanie kpamaawa n su n dɛɛ ti a. Dama be wo má bere bo i su noanie kpamaawa n su na Nyeme de i ka wɔ yo sa bo i kɔ atin su i dɔ.

¹⁷ Kabo ya boro ya nyi na ya su Kristo su na Nyeme de ya ka ya yo sa bo i kɔ atin su i dɔ ni, nyini kere ka yere Yudafom gusu ti satieyofom ka minem bo bu ti má Yudafom ti n wɔ. Ama, nyini n sukere má ka Kristo subuka minem na bu yo satie wɔ lɛɛ. Ai, i ti má sɔ.

¹⁸ M yo su noanie kpamaawa n su wɔ, ama, ma yaki i, nzen kisa na m ɲa m kaaki bo i bu su i su bekun, nyini saŋga, ma fa m ɲu ayo satieyofom lɛɛ nahɔre su.

¹⁹ Mini dɔ, fa kɔ nyini noanie kpamaawa n su, i yo m ka ma wu wɔ, m su má i su kun, adena m nya ɲgɔɔ Nyeme dɔ. I ti ka m ni Yesu Kristo asaŋga awu baka jaanu n su a.

²⁰ Ahin ɲgɔɔ n bo m la i ni, durunya n nu fen ni, yiri Nyeme Wa n koro m dɛɛ ti, na wɔ wu ama m, na ma yo i yarada, nyini dɛɛ ti ye m la ɲgɔɔ n a.

²¹ Ma kete má kabo Nyeme ayo ya sakpa akere i koro barasu ni. Ama, deke bo m suse n la ka, nzen sɔnɔ ɲa i su noanie kpamaawa n su, na nyini kere ka wɔ yo sa bo i kɔ atin su Nyeme dɔ, nyini la ka, yiwee n bo Kristo wuuri i n ti ngbeɛn wɔ lɛɛ.

3

Nɔanie kpamaawa n ni yarada jɔre

¹ Ambere Galatiyafom, am la má ɲgɔnle wɔ. Nma adadaka am a? M yo seeri am, kabo Yesu Kristo wuuri baka jaanu n su barasu ni, ma fie má am su.

² Am ma m bisa am ahin bisaawa ni, am suuri noanie kpamaawa n su n dɛɛ ti, ye am deeri Nyeme Awiewie Casi n a? Wara nzen bo am tiiri Yesu labari kpa n jɔre na am yoori yarada n dɛɛ ti, ye am deeri i a?

³ Nzu ti ye am la má ɲgɔnle sɔ a? Am boori i bu ni Awiewie Casi n wɔ, ye i baari se ye am koro ka am fa am fanga wiewie i a?

⁴ Deke n kere bo Nyeme ayo i na am anu i n ti ngbeen wo lee, nzen se? Mini do, i ti ma ngbeen.

⁵ Bo am ati labari kpa n na am ayo yarada n dee ti, ye Nyeme afa i Awiewie n ama am, ye Nyeme yoori alekutura sam am nu a, nzen bo am su noanie kpamaawa n su n a?

⁶ Nyini ye ba kere i Nyeme Jore Kadasi n nu ka, "Abraham yoori Nyeme yarada n dee ti, ye Nyeme ade i ka i yo sa bo i ko atin su i do n a."

⁷ Nyini kere ya ka, bo ba yo Nyeme yarada ni, bere ti Abraham busu nufom nahore su a.

⁸ Nyeme Jore Kadasi n kere ka, minem bo bu ti ma Yudafom ba yo Nyeme yarada, na i de bu ka ba yo sa bo i ko atin su i do. Nyeme du mo kaanri labari kpa n jore kereeri Abraham wo, na wo se i ka, "Woro dee ti, ye m yo adamande kere kisi a."

⁹ Nyini ti, sono kere bo i yo yarada, Nyeme yo i kisi, kabo Abraham yoori yarada, na Nyeme yoori i kisi barasu ni.

¹⁰ Sono kere bo i su noanie kpamaawa n su na i sunsun ka Nyeme de i ka wo yo sa bo i ko atin su, Nyeme noo di i mi. Dama ba kere i Nyeme Jore Kadasi n nu ka, "Nyeme noo di sono kere bo i na i su noanie kpamaawa n su, na i su ma i kere kpakpati su ko wie ma."

¹¹ Ya si ka, ma ka sono su noanie kpamaawa n su ye Nyeme de i mi ka i yo sa bo i ko atin su i do a. Dama ba kere i Nyeme Jore Kadasi n nu ka, Nyeme na, "Sono bo i yo sa bo i ko atin su m do, i nya ngoo, i yarada n dee ti."

¹² Noanie kpamaawa n wo bere i ngumi, na yarada n bo ya yo Nyeme n gusu wo bere i ngumi. Ba kere i Nyeme Jore Kadasi n nu ka, "Sono kere bo i su noanie kpamaawa n kere su, i mi nya ngoo."

¹³ Ama, sono kere bo i su noanie kpamaawa n su, Nyeme noo di i mi, nyini dee ti ye Kristo kaari ngbeen wuuri baka jaanu n su deeru ya tii jiiri n a. Dama ba kere i Nyeme Jore Kadasi n nu ka, "Nyeme yo sono kere bo ba sense i baka n su ngbeen."

¹⁴ Deke n bo i ti na Yesu Kristo wuuri nyini yiwee n la ka, noanie n bo Nyeme diiri i di ni Abraham ka i yo minem bo bu ti ma Yudafom kisi ni, nyini dee ti, nzen ya yo Kristo yarada, Nyeme na i ma ya Awiewie Casi n bo wo di i di ka i fa ma ya ni.

Sesesu n bo Nyeme diiri i di ni Abraham n jore

¹⁵ M ninbaam, m koro ka m fa adamande woowa na m fa kere kabo Nyeme woowa ti barasu. Nzen mine nnyo afa sesesu adi i di ka bu yo deke be, sono wo ma bere bo i koro kete i, wara i kaaki i.

¹⁶ Nyini ti, Nyeme diiri nyini di n ni Abraham ni i busu nufom n wo, wo se ma ka i busu nufom kere, ama, i na i busu nufom kun, yiri la Kristo.

¹⁷ Deke bo m suse n la ka, Nyeme yo faari sesesu wo, na wo di i di ni Abraham ka i yo i. Na i dee afu yaa nna ni afu aburasan sin, na wo fa i noanie kpamaawa n ama Moyisi, ama, sesesu n bo wo du mo adi i di ni, i koro saaki ma i.

¹⁸ Sesesu n bo Nyeme diiri i di n dee ti, ye Nyeme ceeri Abraham aceeri n a. Ma ka bo i su noanie kpamaawa n su dee ti ye i ce i aceeri n a.

¹⁹ Nzen i ti so, nzu ti ye Nyeme ma Moyisi yo faari i noanie kpamaawa n maari minem a? Nyeme koro ka mine si kabo satie n ti wo, ye i faari i noanie kpamaawa n maari a, fa ko ju sangha bo Abraham busu nufom ni ba ba. Yiri ye Nyeme diiri i di ni Abraham n a. Nyeme yo faari i noanie

kpamaawa n maari i merékem wɔ, na ba kan akere Moyisi bo i wo Nyeme ni i minem afien, na i gusu anya akan akere minem ni.

²⁰ Nyeme yo faari i nɔanie kpamaawa n maari merékem, ni Moyisi wɔ, ye bu kan kereeri minem a, ama, sɛsɛsu n bo Nyeme yo diiri i di ni Abraham ni, be wo má bu afien, se Nyeme ngumi.

Deke n bo i ti na Nyeme faari i nɔanie kpamaawa n maari i ni

²¹ Nɔanie kpamaawa n kete dekem bo Nyeme seeri ka i yó i ni, nzen sɛ? Ai, i kete má. Nzen má nɔanie kpamaawa n be wo bere bo i koro ma ngɔɔ, nyini la ka, nzen sɔnɔ suuri nɔanie kpamaawa n su, ye Nyeme de i ka i yo sa bo i kɔ atin su i dɔ a.

²² Ama, ba kere i Nyeme Jɔre Kadasi n nu ka, sɔnɔ kere ti satieyofɔ ɔ, adena minem bo bu yoori Yesu yarada ni, bere nyá deke n bo Nyeme seeri ka i fá ma yaradayofom n a.

²³ Saŋga bo Yesu nya ba má na ya yo i yarada ni, ya yo su nɔanie kpamaawa n su a, nyini nɔanie kpamaawa ni, i kere ya kabo ya yo, ye i nie ya su a, haari ba fa juuri saŋga n bo Yesu baari na ya yo i yarada ni.

²⁴ Nyini ti, kana Yesu bá ba ni, nɔanie kpamaawa n ti ka sɔnɔ bo i bita ya a, haari na Yesu aba aba, adena Nyeme de ya ka ya yo sa bo i kɔ atin su i dɔ, ya yarada n dɛɛ ti.

²⁵ Ama, ahin saŋga n bo ya yo Yesu yarada ni, nɔanie kpamaawa n bita má ya kun.

²⁶ Amberɛ kere bo am ayo Yesu Kristo yarada ni, nyini dɛɛ ti ye am ayo Nyeme nbaam a.

²⁷ Amberɛ kere bo bu biɛeri am Nyeme nzue ni, am ni Kristo ayo kun lɛɛ, nyini kere ka am ade i dɛɛ woowa n wɔ lɛɛ.

²⁸ Nyini ti, kabo am ni Kristo ayo kun ni, am kere ti deke kun wɔ lɛɛ. Bo bu ti Yudafoɔm ni bo bu ti má Yudafoɔm, bo bu ti akɔɔnbaam ni bo bu ti má akɔɔnbaam, nbiesom ni nbaram kere akaaki deke kun wɔ lɛɛ.

²⁹ Kisa am ti Kristo dɛɛ minem wɔ, nyini la ka, am ti Abraham busu nufom wɔ, bo am nyá deke n bo Nyeme seeri ka i fá ma i minem ni.

4

¹ Deke n bo m suse am la ka, awurubaa bo i bá di i si nenje n kere aja, na i nyunu nya ti má ni, i ni akɔɔbaa ti kun wɔ, haari bo i si aja n kere ti i dɛɛ ni.

² Saŋga bo i toko ti kaan ni, i wo i minem saa nu wɔ, ye bu nie i su a, haari fa kɔ ju saŋga bo i si seeri ka i di aja ni.

³ Ya gusu yo ti sɔ ɔ lɛɛ, dama saŋga bo ya yo si má Yesu jɔre ni, ya yo ti akɔɔm wɔ, fa kɔ durunya n nu satie yoowam su.

⁴ Ama, saŋga n ba juuri ni, na Nyeme asunma i Wa, na ba wu i kabo bu wu adamande ni, nɔanie kpamaawa ni bita i a,

⁵ adena i koro de minem bo nɔanie kpamaawa n bita bu n tii ji, na bu yo Nyeme nbaam nahɔre su.

⁶ Ya ti Nyeme nbaam dɛɛ ti ye i sunmaari i Wa n dɛɛ Awiewie n ka i ba wura ya ahorembaa su. Nyini ti, ye ya koro bo fere Nyeme ka, “Abba,” i bu la ka, “M Si.”

⁷ Nyini ti, a ti má akɔɔ kun, a ti Nyeme wa a. Nzen a nya ti Nyeme wa, nyini la ka, i má u deke n kere bo i fa ma i nbaam ni.

Kabo Pɔɔlu cɛcɛ woori Galatiyafom nu ni

⁸ Saŋga bo am nya si má Nyeme ni, am yo suuri dekem bo bu ti má Nyeme n wɔ, ye am ayo bu akɔɔm a.

⁹ Ama, kisa, am asi Nyeme, wara yiri Nyeme asi am. Nzu ti ye am koro ka am kaaki am sin bo Nyeme a, na am su durunya n nu satie yoowam, bo bu la má fanja n su a? Nzu ti ye am koro ka am yo bu akoom na am kaaki su bu bekun a?

¹⁰ Am nyunu aboro ceenkpirim ni yoowam n su a, bere la yoowa n bo am bu lemocue kere ni, ni bo am yo i sara kere ni, ni bo afo ba ye na am yo bu ni.

¹¹ M koro má ka juma n kere bo ma yo i ama am n ka ngbeen, nyini ti ye am sayoowa kpie m daafiri ceen kere n a.

¹² M ninbaam, m susere am wo, am ma am woowa ti kabo m woowa ti barasu ni, dama m woowa ti kabo am woowa ti n wo. Am ado má mini ngasi be.

¹³ Am si ka sangga bo m du mo ba kaanri labari kpa n jore kereeri am ni, m yo la má laifie n dee ti, ye m koro nyaari atin a.

¹⁴ Haari ni bo m yo la má laifie n kere ni, na i yoori kekereke ma am ni, am akete má m, abu má m ngbeen, ama, am deeri m ni am saa nnyo o, kabo má am de Nyeme mereke wara Yesu Kristo barasu n wo.

¹⁵ Nzu ti ye kisa am ahore ti má jowa kabo i yo ti dawa n a? Nyini sangga ni, mini mmoo ni m tii si ka, nzen má m yo seeri ka am lokoti yi am nyumbaa fa ma m, na má am koro yo i, má am yo i wo.

¹⁶ Bo m tu am fo seeri am nahore n dee ti, ye kisa ma kaaki am kpofa a?

¹⁷ Nyini minem bo bu boro bu nyi na bu cece wo am nu ni, bu sunsunni ti má kpa. Bu koro ka am kaaki yaki Kristo atin n wo, na am boro am nyi su bu dee atin n su.

¹⁸ Nzen má am nyunu aboro nahore su ka am yo sakpa sangga kere, má i ti kpa, nzen haari m wo má am do mmoo.

¹⁹ M nbaam, am jore yo m yaa, kabo bara ba suwu baa na i yo i yaa barasu n wo, i suyo m yaa so o, má ka Kristo aba awo am nu, na am woowa ti kabo Kristo woowa ti barasu ni.

²⁰ M ahore su, má m koro ka m wo am do kisa, na m da m boe na ya bo anzama, dama ma tanda fa ko am do.

Saara ni Haga woowa n dee jore

²¹ Amberé bo am koro ka am su Nyeme noanie kpamaawa n su ni, am si má kabo i noanie kpamaawa n kere n wo, nzen se?

²² Ba kere i Nyeme Jore Kadasi n nu ka, Abraham yo la nbaa nbiesom nnyo o, baa n bo afani n wuuri i ni, ni baa n bo awurubara wuuri i ni.

²³ Baa n bo afani n wuuri i ni, kabo bara kere nyinse, na bu wu baa ni, i nyinse wuuri i so o. Ama, awurubara n dee wa n bo i wuuri i ni, kabo Nyeme yo seeri Abraham n ye i wuuri i a.

²⁴ Kabo nbara nnyom woowa n ti má kun na bu woowa wo i ngumi ni, i la bu wo. Bu ti ka sesesu nnyom bo Nyeme diiri i di n wo. Kun la Haga, afani n bo i dee busu nufom ti akoom ni. I kere kabo Nyeme noanie kpamaawa n bo i yo fa maari Moyisi Sinayi Buka n su n maari minem yoori akoom barasu n wo.

²⁵ Haga ade Sinayi Buka n bo i wo Arabiya asien n dee jinaabiri wo, i ti ka Yerusalem mie kpiri n bo i wo durunya n nu fen kisa n wo, i ni i busu nufom kere ti akoom wo.

²⁶ Ama, Yerusalem n bo i wo angoro n dee minem anya bu tii, bere ti awurubara Saara dee nbaam a, yiri ti ya ni a.

²⁷ Dama ba kere i Nyeme Jore Kadasi n nu ka,
 “Woro bara noroka ni, bo a wu má baa ni,
 ma u ahore jo ko sin su.

Tien, na a siri ni ahorejo,
 wɔɔɔ bara n bo a si má baawu yaari ni,
 dama bara n bo i hun akete i n la nbaam
 tara bara n bo i la hun ni.”

²⁸ M ninbaam, kisa amberɛ ti ka Izaki bo i ti awurubaa n a, dama yiri ye Nyemɛ seeri Abraham ka bu wu i n a, ye amberɛ gusu ti Nyemɛ nbaam n a.

²⁹ Kabo nyini sangɔ na afani n wa n yo kereeri awurubara n wa Izaki n wahara ni, yiri ye bu wuuri i ni Awiewie Casi n dɛɛ yiko nu a. Minem bo bu su Moyisi noaniɛ kpamaawa n su ni, sumie yere n bo Nyemɛ Awiewie n yiko nu na ya kaaki Nyemɛ nbaam n so lɛɛ.

³⁰ Nyemɛ Jɔre Kadasi n se se wɔ? I ɲa, “Fɔn yi ahin afani n ni i wa n fite fɛn. Wɔ ti má ye ni ka ahin bara n wa n nya aja nenje n be. Ama, i ti ye ni ka awurubara n wa ni fá i kere a.”

³¹ Nyini ti, m ninbaam, ya ti má afani n dɛɛ nbaam, ama, ya ti awurubara n dɛɛ nbaam wɔ.

5

Kabo ya bita ya tiide n bo ya nya i n kenken

¹ Kristo ade ya tii aji, nyini ti, am wo ni nyini tiide n bo am anya i n nu, am bita i kenken na má am wo ka am ti akɔɔm kun.

² Am ti kabo mini Pɔɔlu suse am ni. Nzen am soro su na be wuraari am kenkenne, nyini la ka, deke n bo Kristo ayo ama am n ti ɲgbɛɛn wɔ lɛɛ.

³ M koro ka m bɔbɔ am wɔ lɛɛ bekun, ka sɔnɔ kere bo i soro su na bu wuraari i kenkenne, wɔ yo daka ka i mi su noaniɛ kpamaawa n kere su, má i yaki kun n kpein mmɔɔ.

⁴ Amberɛ bo am sunsun ka am su noaniɛ kpamaawa n su, na am ɲa nyini ma Nyemɛ de am ka am yo sa bo i kɔ atin su i dɔ ni, am ni Kristo akpaaki lɛɛ, am di má Nyemɛ ahɔrɔma n kun.

⁵ Ama, yere yiri, Awiewie Casi n ama ya yo yarada, ye ya la ahoresi ɲminda ka Nyemɛ bá de ya ka ya yo sa bo i kɔ atin su i dɔ.

⁶ Nzen ya ni Kristo ayo kun, na ya wura kenkenne, i ti má pui, nzen ya wura má kenkenne gusu, i ti má pui. Ama, nzen ya yo Yesu Kristo yarada, na ya koro ya bengum na ya yo sakpa, nyini ti jɔre n a.

⁷ Kabo am yo su Kristo atin n su ni, am yo boro am nyi wɔ nahɔre su. Kisa ɲma adaka am ye am akaaki am sunsunni ka má am de nahɔre n a?

⁸ Nyini noaniɛ n bo ba fa akaaki am sunsunni n fite má Nyemɛ bo wɔ fere am ka am ba su i n dɔ.

⁹ Bu ɲa, ayiri n bo bu fa gɔ kɔnɔ nu n ti kaan sɔ ɔ, ama, yiri ma i yasu yo dɔɲgu a.

¹⁰ Ama, m la ahoresi fa kɔ am dɔ, kabo ya ni ya Mibiɛ Yesu Kristo ayo kun ni, ka, am káaki má am sunsunni na am yaki atin n bo ya bita i ni. Sɔnɔ kere bo i koro ka am kaaki am sunsunni ni, Nyemɛ cín i mi sui.

¹¹ M ninbaam, nbem ɲa m toko nati kan i ka i ti ye ni ka Kristo minem kere wura kenkenne. Nzen má i ti nahɔre ka m kan i sɔ ɔ, ye nzu ti ye Yudafom kere m wuwuruwa n a? Nzen má m kan i sɔ, ye haari nzen m kan fa kɔ yiwee n bo Yesu wuuri i baka jaanu n su ni, má i ti má jɔre.

¹² Minem bo bu mie am ka am wura kenkenne ni, má i yo m fie ka bu sa bu ɲu na má bu biɛsɔ dika yo juma.

¹³ M ninbaam, Nyemɛ afere am ka i de am tii ji wɔ. Ama, má am nie ka am anya am tii n dɛɛ ti, na am yo am kunnu koroowa, ama, am koro am bengum nahɔre su, na am buka am bengum.

¹⁴ Dama Nyeme noanie kpamaawa n kere jina noanie maawa kun su a, yiri la ka, “Koro u beṅgu kabo a koro u ṅu ni.”

¹⁵ Ama, nzen saṅga kere na am sudi aluwa na am ṅumi sukpi am beṅgu ṅu, na am asi má am ṅu sa, am sáaki am ṅuṅu nu wɔ lee.

Nyeme Awiewie n ni adamande woowa

¹⁶ M suse am wɔ, am wo kabo Awiewie Casi n kere am ka am wo ni, adena má am yo am kunnu koroowa kabo dawa na am yo yoori barasu ni.

¹⁷ Dama deke bo yere adamande kunnu koro i ni, Awiewie Casi n koro má i, ye deke bo Awiewie Casi n koro i ni, yere adamande de woowa n koro má i. Nyini ti, saṅga kere yere adamande de woowa n ni Awiewie Casi n se akuruwa ni i beṅgu wɔ. Nyini ye ya koro yo má kabo ya koro ka ya yo n a.

¹⁸ Nzen am yo kabo Awiewie Casi n koro ka am yo ni, noanie kpamaawa n nie má am su kun.

¹⁹ Sono kere si kabo minem bo bu su adamande woowa su n ti barasu. Yiri la sakaraya, ni danḡba sayoowam, ni konvikiya ṅbɛɛṅḡbɛɛm.

²⁰ Na bu su amɔɛ, ni ayiri di ṅbɛɛṅḡbɛɛn, na bu sukpo mine, na bu sukpini jore, na bu susi kore, na bu sufa yaa, na bu suyo anyii sam, na bu suse akuruwa kpakpaaki bu ṅuṅu nu,

²¹ na bu susi bu beṅgum kore, [na bu sukun mine,] na bu sunu nzan bo, na bu suyo ṅbɛɛṅḡbɛɛn kabo nzan nufom yo barasu ni, na bu suyo sa barasu nbem. Kabo ma du mɔ ase am ni, m toko bɔbɔ am wɔ lee, ka, sono kere bo bu yo nyini sam ni koro wura má Nyeme femeya n nu.

²² Ama, deke bo Awiewie Casi n ma mine yo i la ka, bu koro bu beṅgu, na bu la ahorejo, na bu ahorembaa ti daawa, na bu la mindi, na bu buka mine, na bu yo sakpa, na bu la dabuṅu,

²³ na bu yo bu ṅu tarakam, na bu la tarabuṅu. Noanie kpamaawa be wo má bere bo i jaraki minem bo bu bita nyini woowa atin ni.

²⁴ Minem bo bu ti Yesu Kristo deem ni, ba yaki bu dawa de koroowa ni i sayoowam n kere, bu ti ka ba kpama bu baka jaanu n su ye ba wu a.

²⁵ Awiewie Casi n ama ya ṅɔɔ. Nyini ti, am ma ya wo kabo i kere ya ka ya wo ni.

²⁶ Má am ma ya wura ya ṅu kpiri, na má am ma ya yo sa bo i ye mine ahore su, na má ya si kore.

6

Kabo ya buka ya lamɔkɔ Kristofom barasu ni

¹ M ninbaam, nzen am ṅu ka am nu be suyo satie, amberɛ bo am wo kabo Awiewie Casi n kere ka am wo barasu ni, am tara am ṅu benle, na am buka i mi na i yo sa bo i ti kpa. Na am si am ṅu sa, na má am gusu yo satie be.

² Nzen am ṅu ka am beṅgu wo kekereke nu, am buka i. Nzen am yo so, nyini kere ka am ade Kristo kereewam n bo wɔ fa ama ya n nahore su lee.

³ Wɔɔ kere bo a ti má pui, na a sunsun ka a ti be ni, a dadaka u ṅu wɔ lee.

⁴ Sono kere nie i sayoowa, nzen i mi ṅu ka i sayoowa ti kpa, nyini saṅga, i mi koro kansu i ṅu. Ama, má i nie ka i sayoowa tara i beṅgum de ti, na i fa fo.

⁵ Dama sono kere la i tiṅgu sayoowa.

⁶ Amberɛ bo bu sukere am Nyeme noanie n ni, am buka bere n bo bu kere am ni, ni deke kere bo am la i.

⁷ Má am dadaka am nu, na am sunsun ka be koro dadaka Nyeme, dama deke kere bo sono yoori, Nyeme fá nyini to i mi kaari a.

⁸ Nzen sono yo kabo adamande woowa koro barasu ni, nyini má i mi wu a na i ka ngbeen. Nzen i yo kabo Awiewie Casi n koro ka i yo ni, nyini má i mi bá nya ngoo bo i la má awieeri a.

⁹ Nyini ti, má am ma ya fie ni sakpayo, dama nzen ya fie má, na sanja n ba juuri, Nyeme to ya nkato.

¹⁰ Nyini ti, nzen ya la deke ya saa nu bo ya fa yo sakpa, ya yo buka sono kere, maala ya lamoko Kristofom ni, bere yiri, i ti ye ni ka ya buka bu sanja kere.

Awieeri su dee noanie bo Poolu fa kaari bu ni

¹¹ Am nie, mini ni m tii sufa m saa sukere ahin kereewa n ngbingbiri n kere ma am a.

¹² Minem bo bu mie am ka am wura kenkenne ni, bu koro ka mine kansi bu wo. Deke n bo i ti na bu yo so n la ka, bu koro má ka mine kere bu wuwuruwa fa ko yiwee n bo Kristo wuuri i baka jaanu n su ni.

¹³ Bere bo ba wura kenkenne ni, bere mmoo ni bu tii su má Nyeme noanie kpamaawa n su. Ama, deke bo i ti na bu koro ka am wura kenkenne n la ka, bu koro ka bu fa fo o, ka, ba ma am asu bu dee yoowa n su.

¹⁴ Ama, mini yiri, m fo má yanfoya fa ko deke be su, má ka fa ko yiwee n bo ya Mibie Yesu Kristo wuuri baka jaanu n su ni. Nyini yiwee n bo i wuuri i n dee ti, mini do, m bu durunya n ka i ti ngbeen wo, na durunya n gusu bu m ka m ti ngbeen wo.

¹⁵ Dama nzen sono su Kristo atin n su na wo wura kenkenne, i ti má pui, wo kaaki awura má kenkenne gusu, i ti má pui. Deke bo i ti jore nahore su n la ka, i ti ye ni ka mine nya wo fofore bo i fite Nyeme do ni.

¹⁶ Nyeme ma sono kere bo i su ahin atin n bo m kere n su ahoreda, na i si bu anjuno, dama bere ti Nyeme minem bo bu ti Yisarelifom nahore su a.

¹⁷ Kisa m koro má ka be kpini jore be ma m kun, dama m la deke bo i wo m njunie su sukere ka m ti Yesu dee wo.

¹⁸ M ninbaam, ya Mibie Yesu Kristo buka am kere. Ami.

Pɔɔlu kadasi bo i kerε fa maari EFESOFOM ni

¹ Mini Pɔɔlu bo Nyεmε dεε koroyanu na m ti Yesu Kristo jaramasa ni, sukere ahin kadasi n ma ambere Nyεmε minem bo am wo Efeso mie kpiri n nu, na am bita Yesu Kristo atin n nahore su, na am ni yiri ayo kun ni.

² Ya si Nyεmε, ni ya Mibiε Yesu Kristo buka am na bu ma am ahoreda.

Kabo Nyεmε ayo ya kisi ni

³ I ti ye ni ka minem kerε kansu Nyεmε, yiri bo i ti ya Mibiε Yesu Kristo Si, kabo i ma ya ni Kristo ayo kun ni, nyini dεε ti, wo fa deke kpa kerε bo i wo angoro na i fite i Awiewie n do ni ayo ya kisi.

⁴ Dama sanja bo Nyεmε nya yi ma durunya ni, ye i yiiri ya ka ya yo i minem a, na ya ni Kristo yo kun, adena ya yo casi, na ma be koro jaraki ya Nyεmε do. Koro n bo i koro ya n dεε ti,

⁵ wo du mo acici ka i fa ya yo i kunnu nbaam Yesu Kristo dεε ti. Deke bo i koro ka i yo i ni, i koroowa lεε.

⁶ I Wa koroowa n dεε ti wo ma ya ahorma ace ya nyini aceeri n bo i la ma anusu n a. Nyini dεε ti, i ti ye ni ka minem kerε kansu i fa ko sakpa n bo wo yo i ama ya n su.

⁷⁻⁸ Kabo ya ni Yesu Kristo ayo kun ni, i mbunja n bo i fiteeri i njunie nu sanja bo i wuuri n dεε ti, ye Nyεmε ade ya tii aji, afa ya satie kerε ace ya. Wo buka ya agaya, ama ya ahorma bo i la ma anusu, wo ma ya alecira ni si barasu kerε.

⁹ Nyεmε ayi deke bo i du mo koori ka i yo i, na i wo i ahorembaa su na be si ma i n akere ya, Yesu Kristo ama wo yo yiwa. I koroowa lεε.

¹⁰ Nyini deke n bo Nyεmε koori ka i yo i n la ka, nzen sanja n ba juuri, i bo deke kerε kun, bo bu wo angoro, ni bo bu wo asiengu n kerε, na i ma Yesu Kristo yo i kerε tii.

¹¹ Deke n kerε bo Nyεmε adu mo acici ka i yo i ni, kabo yiri Nyεmε koro n lεε ye wo yo i n a. Ye wo yi ya ka ya yo i dεε minem, na ya ni Kristo yo kun.

¹² Adena minem nu ya woowa, yere bo ya du mo afa ahoresi ni Kristo ni, na bu kansu Nyεmε na bu wura i kpiri.

¹³ I ti so o lεε am gusu do. Am tiiri labari kpa n bo i ti nahore na i ma am nya tiide n jore ni, ye am yoori Kristo yarada a, ye Nyεmε afa i Awiewie Casi n ase am nyaari, kabo i yo seeri ni, yiri kere ka am ti i dεε minem a.

¹⁴ Kabo wo du mo ama ya Awiewie Casi ni, nyini kere ka Nyεmε ma ya deke n kerε bo i seeri ka i fa ma i minem n a. Yiri ma ya yo yarada, na ya la ahoresi haari fa ko ju cen n bo ya nya tiide nahore su a. Nyini dεε ti, minem nu kabo ya ti barasu na bu kansu Nyεmε jirima woowa n bo i la ma anusu ni, na bu wura i kpiri.

Kabo Pɔɔlu sereeri Nyεmε maari Efesofom ni

¹⁵ Nyini dεε ti, fite sanja bo m tiiri ka am ayo Kristo yarada ni, ni kabo am koro Nyεmε minem kerε barasu ni,

¹⁶ am woowa dεε ti, sanja kerε m da Nyεmε asi, na m susere i ma am.

¹⁷ M sere ya Si Nyεmε, i jirima woowa la ma anusu. Yiri ti ya Mibiε Yesu Kristo Nyεmε a. M sereeri i ka i ma i Awiewie Casi n buka am, na am nya alecira, na i teke am nyi, bo am si Nyεmε nahore su.

¹⁸ M kaaki sere i ka i teke am nyi na am nu i wein ni, adena am si deke n bo i ti na wo fere am n na am la ahoresi fa ko i busu ni, na am kaaki si deke n bo i ti kpa na i la jirima agaya, bo wo se ka i fa ma i minem ni.

¹⁹ Na am si kabo i yiko n la ma anusu barasu ni, na i koro yo juma ma yere n bo ya yo i yarada ni. Nyini yiko ni ti bambaka la fanga a,

²⁰ yiri ye Nyeme fa tengeeri Kristo i yiwee n nu, afa i atana angoro i saa fomboro su n a.

²¹ Deke bo i wo lee, i la yiko tara yikofom kere, amoe o, ayiri o, biefoya o, mereke o, jina o, numi o, ni ajini o, na i duma n tara duma kere bo i wo ahin durunya n bo ya wo nu ni, ni durunya n bo i suba ni.

²² Nyeme afa deke n kere awura Kristo saa nu ka i nie bu su, na wo ma yiri Kristo bo i nie deke n kere su n ayo Kristo jama n kere tii a.

²³ Kristo jama n kere ti i nunie n a, ye i wo bu nu, ye i woowa ade deke n kere a.

2

Kabo ya fite yiwee nu na ya nya ngoo fofore barasu ni

¹ Sanga bo am yo keteeri Nyeme noanie na am yo satie ni, am ti ka am awu wo.

² Nyini sanga ni, am yo satie kabo kisa durunya n nufom yo n wo. Na am sude Sitana bo i bita asien ni angoro afien n yiko na am de i noanie. Yiri bita minem kere bo ba kete Nyeme noanie n a.

³ Nahore, yere mmoo yo ti so lee, na ya suyo dekem bo ya konviki wo bu nu, na ya suyo deke kere bo i ti ma kpa na ya nu i, na ya koro i ya sunsunni nu ni. Ma ya kere gusu di nyini wahara n bo Nyeme afa yaa ka i fa cin minem sui, bere bo ba kete i noanie n wo.

⁴ Ama, Nyeme si anunfo agaya, na i kaaki koro ya agaya,

⁵ ya yo ti ka ya wuuri wo, fa ko i noanie n bo ya keteeri n su ni, haari ni nyini mmoo, i koro n dee ti, wo sanga ama ya ni Kristo ngoo. I dee ahorama ni ma am nyaari tiide a.

⁶ Ya ni Yesu Kristo ayo kun n dee ti, Nyeme atenge ya yiwee nu kabo i tengeeri Kristo i yiwee n nu ni, na ya ni yiri kere sanga tana Nyeme femeya n nu.

⁷ Deke bo i ti na Nyeme yoori so n la ka, fa i kisa fa ko, i kere i ahorama n bo i la ma anusu ni, yiri la kabo i ma Yesu Kristo ayo sakpa abuka ya barasu ni.

⁸⁻⁹ Am yarada n bo am ayo i n dee ti, Nyeme ahorama ni ma am nyaari tiide a, ma am sakpa dee ti a, ama, Nyeme aceeri a. Nyini ti, ma be se ka i fa fo.

¹⁰ Kabo ya ti kisa ni, Nyeme yiiri ya so a. Ya ni Kristo ayo kun n dee ti, ye wo ma ya ngoo fofore a, ka ya fa yo sakpa n bo Nyeme yo fa seeri ya ka ya yo i n a.

Kristo ni i minem kere ayo kun

¹¹ Nyini ti, amere bo am ti ma Yudafom ni, am tenge su kabo am woowa yo ti barasu ni. Yudafom fere am ka tokurukum wo, na bu fere bu nu ka minem n bo ba wura kenkenne, nyini n so ti adamande anuniembaa su yoowa a.

¹² Am tenge su ka sanga bo am yo si ma Kristo ni, am wo dede ni yiri wo, na am ti ma mine n bo Nyeme ayi bu n be. Sesesu n bo Nyeme yo diiri i di seeri ka i buka i minem ni, am wo ma nu. Am yo wo durunya n nu wo, ama, am yo la ma ahoresi be, na am kaaki si ma Nyeme.

¹³ Ama, kisa, na am ni Yesu Kristo ayo kun ni, ambere bo má am yo wo dede ni Nyeme ni, Kristo mbunja n bo i fiteeri i njunie n nu, sanja bo i wuuri ni, acin am adodo Nyeme a.

¹⁴ Dama Kristo ti sono bo wo ma ya sesesu ni tanalaifie a. Yiri yo faari i nu yoori yoowa yiiri kpo bo i ti ka kobe na i wo Yudafom, ni bo bu ti má Yudafom n afien a, na wo yo bu kun.

¹⁵ I yiwee n bo i wuuri i n dee ti, wo ma Nyeme noanie kpamaawa n yo má juma kun, i ni i noanie maawam, ni i atinm kere. I yoori so o, adena i fa yere Yudafom, ni bo bu ti má Yudafom n yo ya daanfie kun. Ya ni yiri ayo kun n dee ti, ye wo sese ya su ama ya tanalaifie n a.

¹⁶ I yiwee n bo i wuuri baka jaanu n su n dee ti, wo yi kpo bo má i wo ya afien ni, ayo ya mine kunm akaaki ya aba Nyeme do.

¹⁷ Kristo ba kaanri labari kpa n bo i yo minem afien dongu n maari ambere bo am ti má Yudafom, na am wo dede ni Nyeme n wo, ni Yudafom bo bu dodo i ni.

¹⁸ Kristo dee ti, ye Awiewie Casi n ama ya ni bere kere atin ka ya koro ba ya Si Nyeme do a.

¹⁹ Nyini ti, ambere bo am ti má Yudafom ni, kisa am ti má wofom kun Nyeme minem do, ama, am anya atin abo Nyeme dee minem su, ye am ayo i dikafom.

²⁰ Am kaaki ti ka soo n bo Nyeme suta i n wo, wo ta am ataka ataari fa bumboori seewa n su, yiri la bo Kristo jaramasam, ni Nyeme noanie kanfom du mo fa seeri soo n bu ni. Nyini fa seewa n la Nyeme noanie n bo bu yo kaanri i n wo. Ye Yesu Kristo ti ka soo n jantarakana n a.

²¹ Soo n deke n kere wo yiri su a, ye i maari i yo woobiri casi ma Nyeme a.

²² Am ni yiri kere ayo kun n dee ti, ambere mmoo ti Nyeme Sereebiri Awuru n wo lee, bo i Awiewie Casi n wo nu ni.

3

Deke bo i yo wo fiεwa n nu na Nyeme yi kereeri Poolu ni

¹ Mini Poolu, m woori dansaraka nu, Yesu Kristo ni ambere bo am ti má Yudafom n dee ti wo.

² Nahore, m nie ka am ati kabo Nyeme asi m anunfo ka m yo ahin juma n ma am ni.

³ Nyeme yo yiiri deke bo i wo i ahorembaa su n akere m, bo i koro ka i yo i na be si má i ni. Ma du mo akere i jore kaan akere am.

⁴ Nzen am kaanri kadasi n bo ma kere i ni, am nu kabo m koro siiri Kristo nusu jore kere bo i wo asiri nu ni.

⁵ Dawa sanja ni, Nyeme ayo ayi má nyini asiri nu jore n akere má adamande be. Ama, kisa, Nyeme ma i Awiewie Casi n ayi i akere minem bo wo yi bu ka bu yo i jaramasam, ni i noanie kanfom n a.

⁶ Asiri bo i wo bere n la ka, ya de labari kpa n na ya ni Yesu Kristo ayo kun n dee ti, bo bu ti Yudafom, ni bo ti má Yudafom, ya kere sanja nya deke n bo Nyeme fá ma i minem, na ya sanja yo i minem, na ya sanja nya deke n bo Nyeme seeri ka i fá ma i minem ni.

⁷ Nyeme ahroma n dee ti, wo ce m aceeri ayi m ka m yo i labari kpa n amususufo, ye wo ma m yiko ka m fa yo i juma ni.

⁸ Nyeme minem n nu, mini ti bu kere kaan, ama, haari ni nyini n kere ni, Nyeme ayi m ama m ahin atin n ka m ko kan i labari kpa n jore kere minem bo bu ti má Yudafom ni, na bu si sakpa bo Kristo ayo i, na be koro si má i kere bu ni.

⁹ Na wɔ kaaki ama m atin ka m ma sɔnɔ kɛrɛ ɲu sa bo minɛm si má i, na Nyɛmɛ koro ka i yo i na i yo yiiwa. Nyɛmɛ yiiri deke n kɛrɛ a, na wɔ bita nyini asiri nu sam n bo i koro ka i yo i, i ahore su dawa ni.

¹⁰ Deke n bo i ti na i yoori sɔ n la ka, nzen nfanɲafom ni yikofom bo bu wo angoro n ɲu ka minɛm bo bu ti Yudafom, ni bo bu ti má Yudafom n abo kun ayo Kristo jama ni, ka kisa bu sí alecira barasu barasu bo Nyɛmɛ la i na i la má anusu ni.

¹¹ Nyɛmɛ yoori nyini kɛrɛ, kabo dawa na i sunsun ka i yo i ni, ya Mibiɛ Yesu Kristo dɛɛ ti, ye i ma i kɛrɛ yoori yiiwa a.

¹² Kabo ya yo Kristo yarada na ya ni yiri ayo kun ni, nyini ma ya la ahoresi koro ba Nyɛmɛ nyunu na ya soro má sere n a.

¹³ Nyini ti, m sere am wɔ, má am ma am ɲunɛ yɔrɔki am, fa kɔ wahara n bo m sudi i ambɛrɛ dɛɛ ti ni, i ti deke bo i wura am kpiri wɔ.

Koro bo Kristo fa koro i minɛm barasu ni

¹⁴ Nyini kɛrɛ dɛɛ ti ye mini Pɔɔlu kutu sere ya Si Nyɛmɛ ma am n a.

¹⁵ Yiri ti lamɔsi kɛrɛ bo i wo angoro ni asiɲgu n kɛrɛ Si a.

¹⁶ M nyɛmɛsere la ka, i la jirima woowa bo i la má anusu n dɛɛ ti, i Awiewie Casi n ma am nya yiko bambaka am ahore su,

¹⁷ na kabo am yo Kristo yarada ni, i wo am ahore su, na m kaaki sere i ka am la koro nahore su, na am jina kenken, fa kɔ koro n bo am la i n su.

¹⁸ Adena am ni Nyɛmɛ minɛm kɛrɛ sanɲa fiti ni anyumbo, na am si kabo Kristo koro am agaya, ni kabo i koro la má anusu ni.

¹⁹ M nyɛmɛsere bekun la ka, i ma am kaaki si kabo Kristo koro am ni, haari ni bo adamande koro si má nyini koro n bo i la má anusu ni, na m sere i ka i ma am woowa kɛrɛ ti kabo yiri Nyɛmɛ woowa ti barasu ni.

²⁰ Nyɛmɛ yiko n bo i wo ya ahore su suyo juma n dɛɛ ti, i koro yo deke n kɛrɛ ma ya tara kabo má ya sunsun ka ya sere i barasu ni.

²¹ Nyɛmɛ ti ye ni ka ya kansu i sanɲa kɛrɛ sanɲa, yɛrɛ kɛrɛ bo ya ti Kristo jama n na ya ni Kristo ayo deke kun ni. Ami.

4

Kristo jama n kɛrɛ ti deke kun wɔ

¹ Nyini ti, mini Pɔɔlu bo m su Mibiɛ n dɛɛ ti na m wo dansaraka nu ni, m susere am jande ka, am wo wo bo i kɔ atin su, kabo Nyɛmɛ fereeri am na i kereeri am ka am wo barasu ni.

² Am yo am ɲu kaan na am yo benle, na am yo sawɔrɛ, na am la mindi de am beɲgu ni koro, sanɲa kɛrɛ.

³ Anɔɔsɛ n bo Awiewie Casi n afa ama am na am ayo kun n dɛɛ ti, am boro am nyi na am tana laifɛ na am bita nyini anɔɔsɛ n ni am beɲgu.

⁴ Yɛrɛ kɛrɛ bo ya ti Kristo minɛm ni ayo ka anuniɛmbaa kun wɔ. Na Awiewie Casi kun ni wo ya kɛrɛ dɔ a, na ya kɛrɛ kaaki la ahoresi fa kɔ deke kun n bo i ti na wɔ fere ya ni.

⁵ Ya la Mibiɛ kun wɔ, deke kun ye ya yo i yarada. Mibiɛ kun n duma nu ye bu fa bie ya kɛrɛ Nyɛmɛ nzue a.

⁶ Nyɛmɛ kun wo bɛrɛ a, yiri ti ya kɛrɛ Si a, yiri kaaki ti ya kɛrɛ Mibiɛ a, i ma ya kɛrɛ yo i juma a, na i wo ya kɛrɛ dɔ.

⁷ Ama, Kristo akpaaki i aceeri n ama ya kun kun n kɛrɛ kabo i koro ni.

⁸ Nyini ti, ye ba kɛrɛ i Nyɛmɛ Jɔrɛ Kadasi n nu ka, “Sanɲa bo i fun kɔori angoro ni, na wɔ fa domuɛm akɔ, na wɔ ce mine aceerim.”

⁹ Bo ba kere i ka wo fun ako angoro n la ka, i du mo wo angoro do ye i jura baari asienngu fen a, ye wo kaaki ako angoro do bekun a.

¹⁰ Yiri n bo i jura baari asienngu n la bo wo fun ako angoro dede n wo, ye i woowa ade deke n kere a.

¹¹ Yiri faari i aceerim ceeri i minem n a, yiri la bo wo yi nbem ka bu yo i jaramasam, na wo yi nbem ka bu yo Nyeme noanie kanfom, ye wo yi nbem ka bu kan Nyeme labari kpa n jore kere minem, ye wo yi nbem ka bu yo sasafom, ni kerefom.

¹² Kristo faari nyini aceeri maari a, na bu sese Nyeme minem su, adena bu buka bu bengum na bu yo i juma ni, na Kristo jama n nya fanga buka su.

¹³ Na ya kere fa anose fa ko kabo ya yo Nyeme Wa n yarada ni, na ya si i nahore su subuka su, na ya yarada yo biiwa, na ya ko ya nyunu buka su, na ya woowa kere ti kabo Kristo wo ti barasu ni.

¹⁴ Na ma ya yo ka nbaatumam, adena ma korefom ba fa bu ngonletie kere ya na bu dadaka ya, na ya mini.

¹⁵ Ama, am ma ya koro ya benggu, na ya sujjo nahore, na ya ko ya nyunu buka su, na ya woowa kere ti kabo Kristo woowa ti barasu ni, dama yiri ti ya tii a.

¹⁶ Na yere bo ya ti i minem ni ti ka i nuniembaa a. Kristo ti bo i bita anuniembaa bue barasu n kere a, na ya kere bo kun, na ya kere suyo juma n bo wo fa ama ya ni, subuka ya benggu, na ya koro ya benggu, na anuniembaa n kere nya fanga buka su.

Kabo ya kaaki wo fofore barasu ni

¹⁷ Nyini ti, m koro ka m fa yiko n bo Mibie n afa ama m ni, na m bobo am, ka, ma am ma am woowa ti kabo minem bo bu su ma Nyeme woowa n ti barasu ni, dama bu sunsunni kere ti ngbeen wo.

¹⁸ Bu wo awosin nu n dee ti, bu la ma ngoo n bo Nyeme ma i minem ni, dama bu si ma be, na bu ahorembaa kaaki ti kekereke n dee ti.

¹⁹ Nyinse ti ma bu fa ko deke be su kun, sanga kere bu dee la ka, bu suyo sa ngbeenngbeenm wo, na bu suyo dangba sam, bu tara ma bu nu, na bu suyo anyii sam barasu kere.

²⁰ Ama, ambere yiri, sanga bo bu kereeri am fa ko Kristo nusu jore ni, ma kabo bu kereeri am lee.

²¹ M nie ka am adu mo asonsan i nusu jore kere, am nya ti i susufom ni, ba kere am ka Yesu ti bo i la nahore n a.

²² Nyini dee ti, am yaki am woowa dawa n bo i ti ma kpa n ji. Am woowa dawa n koro ka i daka am na i saaki am a, dama i ma am yo dekem bo bu ti ma kpa a, na bu mini am.

²³ Am ma Nyeme kaaki am sunsunni ni am ahorembaa fofore.

²⁴ Na am fa wo fofore n bo Nyeme afa ama am na i ferema ni yiri Nyeme dee woowa ni. Nyini woowa ni ko atin su a, na i kaaki ti casi nahore su a.

²⁵ Nyini ti, ma am bu kore, am kan nahore ma am benggu, dama ya kere ti anuniembaa kun n bue barasu be wo.

²⁶ Nzen am be fa yaa, ma i yo satie, ma i fa yaa haari wie ko to.

²⁷ Ma am ma Sitana atin haari kaan so, na i ma am yo satie.

²⁸ Sono kere bo i yo wo, i ti ye ni ka i mi yaki awie, na i yo i tienngu juma ni anyumboro su, na i nya i koroowa, adena i koro buka yaarifom.

²⁹ Ma am ma jore tie fite am noo nu, ama, am ma am noo fite kpa, na i buka minem, na bu ko bu nyunu buka su, na sono kere bo i tiiri i, i mi koro su Nyeme atin n su nyunyumi.

³⁰ Má am saaki Nyeme Awiewie Casi n ahore, dama yiri ye Nyeme afa i ase am nyaari a, ka i bá de am tii ji cɛɛn be a.

³¹ Má am ma am kunnu yo wiwi, má am ma yaa ti am, má am kan am beɲgu ndie, má am se akuruwa, má am kpɛ am beɲgu nzuko, má am kpo am beɲgu deke be ti.

³² Ama, am yo am beɲgu kpa, na am si am beɲgu aɲunfo, na am fa am beɲgum ɲgasi ce bu kabo Nyeme afa ace am Kristo dɛɛ ti ni.

5

Nyeme minem woowa a

¹ Nyini ti, kabo am nya ti Nyeme nbaa koroowam ni, am boro am nyi, na am ma am woowa ti kabo i woowa ti barasu ni.

² I ti ye ni ka am ma koro wo am do, kabo Kristo koro ya barasu na i faari i ɲu yoori yoowa maari ya na i suunri Nyeme nu ni.

³ Kabo am ti Nyeme minem ni, má am yo sakaraya, má am yo dangba sam, má am se ka am nyunu boro nenɲe kpini su, má am bo nyini sereyam n be mmoo anzama am nu.

⁴ Na má am ma jore ɲgbɛɛnɲgbɛɛn fite am noo nu, má am joo jore bo ɲgonle wo má nu, má am yo kəkoro tie. Ama, i ti ye ni ka am da Nyeme asi saɲga kere.

⁵ Am si tenle su ka soɲo kere bo i yo sakaraya, ni dangba sam, ni bo i nyunu boro nenɲe kpini su, soɲo kere bo i yo so, i mi su má Nyeme, i su nenɲem wo. Kristo ni Nyeme bá nie má i su, na i nya má deke n bo Nyeme ase ka i fá ma i minem ni.

⁶ Má am ma be fa i jore ɲgbɛɛn be dadaka am, dama nyinim so dɛɛ ti, ye Nyeme fá yaa cin minem bo ba kete ka bu de má i noaniɛ n sui n a.

⁷ Nyini ti, má am ni nyini minem so saɲga wo.

⁸ Saɲga be, amɛɛre mmoo ni am tii yo woori awosin nu yo satie wo, ama, kisa, na am akaaki ya Mibie Yesu minem ni, am ti wein nufom wo lee. Nyini ti, am ma am woowa kere ka am ti wein nufom wo.

⁹ Má pui ti ye m se so a, dama minem bo bu wo wein nu ni, bere la wo kpa a, ye bu yo sa bo i ti kpa kere a, na bu yo sa bo i ko atin su Nyeme do, na bu bita nahore.

¹⁰ Nyini ti, am boro am nyi, na am si deke bo i sun Nyeme nu.

¹¹ Má am fa am ɲu bo minem bo bu wo awosin nu n su, na am yo sa ɲgbɛɛnɲgbɛɛn n bo bu yo i ni, ama, am yi bu nyini sayoowam fite fofoe nu.

¹² I ti nyinse wo mmoo, ka ya bo su fa ko bu nyini sam bo bu yo bu asiri nu ni.

¹³ Ama, deke kere bo i wo fieɛwa nu, na i nya fiteeri fofoe nu, nyini saɲga, kabo i ti kere, i nyunu da casi wo lee, dama i wo wein nu wo.

¹⁴ Dama deke kere bo i nya fiteeri fofoe nu ti wein wo. Nyini ti ye ba se ka,

“Woro daafirifo ni, yasu
na a tenɲe u yiwee nu,
na Kristo dɛɛ wein n ta go u ɲu.”

¹⁵ Nyini ti, am si am ɲu sa na am si wo, má am wo kabo bo bu si má be n wo barasu ni, ama, am wo kabo minem bo bu la ɲgonle n wo barasu ni.

¹⁶ Saɲga kere am boro am nyi na am suyo Nyeme juma, na má am tana ɲgbɛɛn, dama ahin saɲga n bo ya wo nu ni, satieyo asunnu agaya.

¹⁷ Nyini ti, má am yo ka sinnzinm, ama, am boro am nyi, na am si deke bo Mibie n koro ka am yo i.

¹⁸ Má am nu nzan bo, dama nzan saaki sɔnɔ tii wɔ, ama, am ma Awiewie Casi n wo am dɔ sanɔa kere.

¹⁹ Am fa Nyeme noaniem bo bu wo kansii jue kerewam n nu n fa di jue ma am beɔgu, na am di jue n bo Awiewie Casi n kere am, na am di jue kansii Nyeme am ahore su.

²⁰ Am da ya Si Nyeme asi sanɔa kere, fa kɔ deke kere su, ya Mibie Yesu Kristo deɛ ti.

Nbaram ni bu hunm jɔre

²¹ Am soro Kristo n deɛ ti, am de am beɔgu noanie.

²² Nbaram, am de am hunm noanie kabo am de Mibie n noanie barasu ni.

²³ Dama biesɔ la yiko nie i yi su, kabo Kristo la yiko nie i jama n su barasu ni. Kristo jama n ti i niembaa a, yiri ni i tii, ti bu Tiidefo a.

²⁴ Kabo Kristo jama de i noanie barasu ni, sɔ ye i ti ye ni ka nbaram de bu hunm noanie deke kere nu n a.

²⁵ Nbiesom, am koro am yim kabo Kristo koro i jama n na i toori i ngɔɔ wu maari bu barasu ni,

²⁶ adena i yo bu casi wɔ. Nyeme noanie n bo bu tiiri i ni, ye bu bieeri bu Nyeme nzue yiiri satie kere bo i wo bu ahore su a,

²⁷ adena i fa bu bo i ni su na bu wo i dɔ, na bu yo nyumi agaya, na bu yo casi na bu la ma fin be wara bu la ma ngasi be, na be koro jaraki ma bu.

²⁸ Sɔ ye i ti ye ni ka nbiesom koro bu yim kabo bu koro bu ni barasu n a. Dama biesɔ kere bo i koro i yi koro i ni wɔ lee.

²⁹ Sɔnɔ be wo ma bere bo i koro ma i ni, ama, sɔnɔ kere nie i ni su wo nyunyumi, kabo Kristo nie i jama su barasu ni,

³⁰ dama ya kere ti Kristo niembaa n wɔ lee.

³¹ Ba kere i Nyeme Jore Kadasi n nu ka, “Nyini deɛ ti, biesɔ yaki i si, ni i ni, na i fa i ni mata i yi, nyini sanɔa bu mine nnyɔ n ayo deke kun lee.”

³² Asiri nu jore bambaka be wo ahin noanie n nu, na ma ni i la ka, i sukan fa kɔ Kristo ni i jama n jore wɔ.

³³ Ama, jore n bo m koro ka m se am n la ka, i ti ye ni ka biesɔ kere koro i yi, kabo i koro i ni, na bara kere bu i hun.

6

Nbaatumam ni bu wufom jore

¹ Nbaatumam, am de am wufom noanie, Mibie n deɛ ti, dama nyini ti kpa a.

² Ka, “Bu u si ni u ni.” Ahin n ti Nyeme noanie maawa ciciri su bo Nyeme bukaari su seeri ka nzen a yoori sɔ, i ma u deke kpa,

³ ka, “Nyini ma a ni u ni fie a, na u ngɔɔ kɔ tintiin durunya n nu fen a.”

⁴ Nbaasim, ma am yo sa bo i ye am nbaam yaa su. Ama, am ta bu ataari bo i ti kpa, na am tu bu fo fa kɔ Mibie n deɛ atin n su.

Akoom ni bu mibiem jore

⁵ Ambere bo am ti akoom ni, am de am mibiem bo bu wo durunya n nu fen n noanie, na am soro bu ahore, na am yo deke kere bo bu na am yo i ni am ahorembaa kun, kabo am yo ma Kristo barasu ni.

⁶ Má am yo ka bu nie am deɛ ti, na am koro ka am yo na bu kunnu jo am ni, ama, am yo bo i sun Nyeme nu, ni am ahorembaa kun, ka am ti Kristo deɛ akoom ti.

⁷ Am yo am juma kere ma am mibiem ni ahorejo, ka am suyo ma ya Mibie Yesu wo, ama, ma ka am suyo ma adamande wo.

⁸ Nahore, ye m na am si ka, sono kere bo i yoori i juma nahore su, Mibie ni to i mi nkato, nzen i ti akoo o, wara i ti ma akoo o.

⁹ Ambere gusu bo am ti bu mibiem ni, am bita bu nyunyumi, ma am suwura bu sere. Ma am ma am wara fi ka am ni bere kere Mibie n bo i wo angoro n ti kun wo. I tambu ma nu.

Biesoya nenje bo Nyeme afa ama ya n jore

¹⁰ Jore n bo wo ka n la ka, am ma Mibie n ma am fanga fa ko i yiko bambaka n bo i la i n su.

¹¹ Am fa biesoya nenje n kere bo Nyeme afa ama am n sana, adena am ba koro jina kenken na am kunma Sitana ngonletie kere bo i fa dadaka am ni.

¹² Dama ma ya ni adamande kun lue n a, ama, ya kun lue n ni Sitana ni yikofom barasu barasum kere bo bu wo angoro ni, ni bo bu la yiko bita minem bo bu wo awosin nu durunya n nu fen n wo.

¹³ Nyini ti, am fa biesoya nengem bo Nyeme afa ama am sana, adena sanja kere bo Sitana ba kun am lue, am koro kete i na am kunma i nahore su, na am jina kenken.

¹⁴ Nyini ti, am kpa am nu, na am jina kenken, na am fa nahore fa yo ka dambara bo am wii nu, na am yo sa bo i ko atin su sanja kere, nyini kanda am a, ka bulaari peperepe bo am fa kanda am hoe su.

¹⁵ Na am ma labari kpa n bo i ma ahoreda n yo ka gbagbaa bo am koro fa wura jina kenken.

¹⁶ Am yoori nyini wieeri na am nya fa yarada yo deke bo am fa kanda de Sitana awiem kere bo i tu bu na bu je ka sin ni.

¹⁷ Am fa tiide n bo Nyeme afa ama am n yo ka bulaari kere bo am fa butu kanda am tii, na am fa Nyeme noanie n yo ka takobe bo Awiewie Casi n afa ama am.

¹⁸ Am yoori nyinim kere ni, am sere Nyeme ka i jina am sin buka am, na am susere i sanja kere, kabo Awiewie Casi n kere am ka am sere i barasu ni. Nyini dee ti, sanja kere am sere i so, ma am daafi, na ma am fa am nu ji, na am susere Nyeme ma i minem kere.

¹⁹ Am sere Nyeme ma m, na sanja kere bo m na m jajo, na Nyeme ma m noanie bo m jajo, adena m koro jajo ni ahoresi, na m koro teke m noo kan labari kpa n bo minem si ma i n jore n kere minem.

²⁰ Dama Yesu Kristo ayi m ka m yo i jaramasa na m kan nyini labari kpa n jore dee ti, ye m wo dansaraka nu n a. Nyini ti, am sere Nyeme na i ma m ahoresi, na m kan labari kpa n jore kere minem, kabo ma i ti ye ni ka m kan kere bu ni.

Awieeri su dee anse yoowa ni

²¹ Ya niwa Tikikusi bo ya koro i agaya na i la dabunu na i yo Mibie n juma n ni, yiri ba kan m nusu jore kere kere am, na am si kabo m woowa ti barasu.

²² Nyini dee ti, ye m susunma i am do a, adena am si kabo ya kere woowa ti barasu, na i ma am ahoresi.

²³ M sere ya Si Nyeme ni ya Mibie Yesu Kristo ka bu ma ya ninbaam kere ahoreda, ni koro, ni yarada.

²⁴ Nyeme buka ambere kere bo am koro ya Mibie Yesu Kristo n ni koro bo i la ma awieeri ni.

Pɔɔlu kadasi bo i kɛrɛ fa maari FILIPIYAFOM ni

¹ Mini Pɔɔlu ni Timoti bo ya ti Yesu Kristo akɔɔm ni, yɛrɛ sukɛrɛ ahin kadasi n ma Nyɛmɛ minɛm bo bu wo Filipiya miɛ kpiri n nu ni, na ba de Yesu Kristo na bu ni yiri ayo kun ni, fa kɔ tu Kristo jama mɔfɔm, ni bu bukafɔm kɛrɛ.

² Ya Si Nyɛmɛ, ni ya Mibiɛ Yesu Kristo buka am kɛrɛ na bu ma am ahoreda.

Kabo Pɔɔlu sereeri Nyɛmɛ maari Filipyafom ni

³ Saɗga kɛrɛ bo m ba tenge am jɔrɛ su, m da Nyɛmɛ asi ma am wɔ.

⁴ Na saɗga kɛrɛ gusu bo m sere Nyɛmɛ ma am, m sere i ni ahorejɔ ɔ,

⁵ dama fite cɛɛn n bo am deeri Kristo labari kpa haari ba ju ni nyuma ni, am abuka m bo ma koro akan Kristo labari kpa n jɔrɛ akere minɛm.

⁶ Nyini ti, m la ahoresi ka Nyɛmɛ wo am dɔ, yiri boori i bu yoori nyini sakpa ni am nu a, yiri sɔyo i sɔ a, haari kɔ ju cɛɛn n bo Yesu Kristo bá kaaki ba ni.

⁷ Saɗga kɛrɛ am jɔrɛ wo m ahore su wɔ, nyini ti, kabo m sunsun fa kɔ am dɔ ni, wɔ yo daka ka m yo sɔ. Dama am kɛrɛ abuka m fa kɔ juma n bo Nyɛmɛ afa ama m ka m yo i ni. Haari ni bo kisa m wo dansaraka nu ni, wara saɗga bo m nati m koroyanu ni, am bukaari m wɔ, na ma kan akere mine ka labari kpa n ti nahɔrɛ wɔ, adena bu yo yarada nahɔrɛ su.

⁸ Nyɛmɛ di m daani ka am sa wo m ahore su saɗga kɛrɛ a, ka m koro am ni koro bo Yesu Kristo fa koro ya ni.

⁹ M nyɛmesere la ka, am sukoro am beɗgu buka su saɗga kɛrɛ, na am susi Nyɛmɛ atin n kɛrɛ, na am si nahɔrɛ atin,

¹⁰ adena am si na am koro tambu yi deke bo i ti kpa nahɔrɛ su, na am yo casi na am la má ɗgasi be fa kɔ cɛɛn bo Kristo ba kaaki ba ni.

¹¹ Na m susere Nyɛmɛ ka Yesu Kristo buka am, na am wo wo kpa, na am suyo sakpa saɗga kɛrɛ, na mine ɗu i na bu kansu Nyɛmɛ na bu wura i kpiri.

Yesu Kristo dɛɛ ti ye m la ɗgɔɔ a

¹² M ninbaam, m koro ka am si ka sa bo wɔ tu m na m wo dansaraka n nu ti má tiɛ, nyini ma labari kpa n akoro abara aye a.

¹³ Nyini dɛɛ ti, tintinijinafom ni minɛm kɛrɛ bo bu wo fɛn n asi ka, m ti Kristo dɛɛ amususufɔ dɛɛ ti ye m wo dansaraka nu a.

¹⁴ M dansaraka n nu woowa n awura ya ninbaam dɔɗgu kperɛ kekereke Mibiɛ n dɛɛ ti, wɔ ma ba nya ahoresi abuka su bo bu korɔ sukan labari kpa n jɔrɛ saɗga kɛrɛ na bu soro má sere.

¹⁵ Nahɔrɛ, kɔrɛsi ni akuruwa se ti, ye bu nbem kan Kristo labari kpa n jɔrɛ n a, ama, nbem gusu kan i ni akunnu fofoe wɔ.

¹⁶ Bɛrɛ n bo bu yo i ni akunnu fofoe ni, Nyɛmɛ koro ti ye bu yo sɔ n a, dama bu si ka Nyɛmɛ ma m wo fɛn a, na m tu ɗgoni fa kɔ Kristo labari kpa n jɔrɛ su.

¹⁷ Nyiɗgam ni, bu kan má Kristo labari kpa n jɔrɛ ni bu sunsunni kpa, ama bu bita anyii sunsunni wɔ, adena bu má m di wahara dansaraka n nu.

¹⁸ Nyini n kere bo bu suyo i ni, i be mmoo kpie ma m daafiri. Ama, deke bo i yo m fie n la ka, bu ma Kristo labari kpa ni susandi bara ye buka su wo. Nzen bu kan ma i ni bu sunsunni kpa, wara bu kan i ni bu akunnu fofoe, m dee la ka, sanja kere m ahore ti jooa.

¹⁹ Dama m si ka nyemesere bo am sere Nyeme ma m sanja kere n ni buka bo m nya i fite Yesu Kristo Awiewie Casi n do ni, nyini ma m nya m tii a.

²⁰ M fa ahoresi ni tama yo m juma ni anyumboro sanja kere, na ma nyinse ti m, adena nzen m wuuri, ni bo ma wu ma kere, m woowa koro ma mine kansu Kristo dee duma.

²¹ Mini do, nzen m la ngoo, Kristo dee ti a, nzen ma wu, i ti m kperere wo.

²² Ama, nzen m toko la ngoo ahin durunya n nu fen na m koro yo sa bo i kun kperere Nyeme do, nyini yiri, m si ma bo m yi ahin deke nnyom nu.

²³ Ma ka afien ni afien wo, dama m koro ka ma m wu wo na m ko wo Kristo do, m nu ka nyini n ti ye tara durunya n nu fen bo m wo ni.

²⁴ Ama, nzen m kaaki nie bekun a, ambere dee ti, i ti ye ni ka ma m wu, ama, m wo ni m ngoo durunya n nu fen.

²⁵ To. Nyini dee ti, m si tenle su ka m wu ma kisa, m wo bere wo, na m buka am na am koro yo Kristo yarada ni nahore, na am ahore jo.

²⁶ Adena nzen m ba kaaki ba nierei am busu bekun, nyini sanja, am la deke bo am koro fa kansu Yesu Kristo, fa ko sa n bo wo yo ama m ni.

²⁷ To, kisa, jore kere bo i wo bere la ka, am ma am woowa ti kabo Kristo labari kpa n kere ka am wo barasu ni, na nzen m ba koro ba nierei am busu, wara ma koro aba ma n kere, na m ti am jore ka Awiewie Casi n ma am la jinakunsu, na am la sunsunni kun ni anooe, suboro am nyi sutu ngoni kan Kristo labari kpa n jore kere minem na bu yo yarada.

²⁸ Na ma am soro sere fa ko am kpofom do, am ma am ahore ti siiwa sanja kere, nyini ma bu nu na bu si ka bu ka ngbeen a, ama, ambere yiri, am nya tiide, dama Nyeme ma am nya tiide a.

²⁹ Dama Nyeme ace am aceeri Kristo dee ti, ka am yo Kristo yarada, ma nyini ngumi, ama, am kaaki di wahara ma i.

³⁰ Nyini ti, kisa am koro buka m na ya kere kun nyini lue ni. Yiri ye am yo nuuri ka m tu i ngoni n a, ye kisa am ti ka m toko tu i ngoni n a.

2

Kabo Yesu Kristo yikofa n yoori i nu kaan barasu ni

¹ Kristo wo am nu n dee ti, yiri ma am ahore si a, na i dee koro bo i fa koro am ni, da am ahore. Am ni Awiewie Casi n la wo fie, am yo sakpa na am si am bengum anunfo.

² Nyini dee ti, m sere am wo, jande, am kere fa sunsunni kun, na am koro am bengum, na am fa anooe, na m ahorejo ko sin su.

³ Ma am sunsun kabo am yo na ambere ngumi nya i, ma am wura am nu kpiri, ama, am yo am nu kaan, am bu am bengum ka bu tara am.

⁴ Ma am nie kabo am yo na ambere ngumi yo ye, ama, am nie kabo am yo na am bengum gusu yo ye.

⁵ Am ma am sunsunni ti kabo Yesu Kristo dee ti barasu ni.

⁶ I woowa ti kabo Nyeme woowa ti n wo sanja kere, ama, wo se ma ceen be ka i tu ngoni wura i nu kpiri na i ni Nyeme se,

⁷ ama, i keteeri nyini n kere bo ma i ti i dee n wo, na wo fa i nu ayo akoo, na wo kaaki adamande. I woowa ti kabo adamande woowa ti barasu n wo,

⁸ i yoori i ŋu kaan wɔ, na wɔ de Nyeme nɔanie ni, haari na wɔ wu yiwee tie, yiri la bo bu kpamaari i baka jaanu n su ni.

⁹ Nyini dɛɛ ti, ye Nyeme awura i kpiri agaya ayɛ i su angoro ama i duma bo i tara duma kɛɛ n a,

¹⁰ adena mine ni deke kɛɛ bo bu wo angoro, ni bo bu wo durunya n nu fɛn, ni bo bu wo asien bu n tiiri Yesu duma ni, bu kɔtu i na bu sɔ i.

¹¹ Na sɔnɔ kɛɛ teke i nɔɔ kan ka Yesu Kristo ti deke n kɛɛ Mibiɛ a, nyini wura ya Si Nyeme kpiri a.

Am ma ya woowa ta wein durunya n nu

¹² Nyini dɛɛ ti, m ninbaa koroowam, am yo deeru m nɔanie n wɔ sanɔa kɛɛ, kisa bo m wo mɔ am dɔ ni, nyini ti ye ni ka am de m nɔanie n tara kabo m yo wo am dɔ n a. Tiide n bo am anya i n dɛɛ ti, am yo Nyeme juma n ni anyumboro, bo i kere ka am anya tiide, na am soro Nyeme.

¹³ Dama Nyeme suyo i juma am ahore su a, na i ma am de i nɔanie ni, na am yo i koroowa.

¹⁴ Deke kɛɛ bo am yo i ni, mɔ am ŋuŋuti na am se akuruwa,

¹⁵ adena am yo mine casim bo be koro jaraki mɔ am, na am yo Nyeme nbaam bo am la mɔ ŋgasi be na am ma am woowa ti wein, na am wo nyumafɔ satieyofɔ ŋgbɛɛn m n nu, na am ta ka asarambaam.

¹⁶ Na am bita Nyeme nɔanie ni, yiri ma minem ŋɔɔ a. Nzen am yo sɔ, nyini ma m koro bo m hoe fa kɔ am woowa n su a, cɛɛn n bo Kristo bɔ kaaki ba ni, na m si ka juma n bo m yiiri anyumboro yoori am nu ni, aka mɔ ŋgbɛɛn.

¹⁷ Kabo am ayo Kristo yarada, na am sukun am ŋu yo i juma n ni nahore su ni, na haari nzen m wuuri mmɔɔ na am yarada buka su, m ahore ti jɔwa, na i yo m ni ambere kere fie,

¹⁸ am gusu ma am ahore jɔ kabo m ahore ti jɔwa barasu ni.

Timoti ni Ipaforoditosi jɔɛ

¹⁹ Nzen ya Mibiɛ Yesu soro su, m la ahoresi ka i cɛ mɔ, m sɔnma Timoti am dɔ na i ba niɛ am busu, na i ba kaaki baari, na m gusu ti kabo am wo ti na m ahore da.

²⁰ Deke bo i ti na m sunma i am dɔ n la ka, be cɛɛ wo mɔ am nu, yiri ŋgumi ti bo i buka m su bo i cɛɛ wo am nu a.

²¹ Bo ba ka n kɛɛ, bu cɛɛ wo mɔ Kristo juma n nu, se bu cɛɛ wo bu sa koroowam nu a.

²² Ambere mmɔɔ ni am tii si ka Timoti woowa kere kabo i su Nyeme atin n su ni nahore su, na am si ka m ni yiri sanɔa yo juma kabo baa ni i si bo su yo juma n wɔ, adena mine dɔŋgu de labari kpa ni na bu yo yarada.

²³ Nyini ti, nzen m ŋuuri m jɔɛ n kere nyaari, m sɔnma i kisa bere na i ba niɛ am busu.

²⁴ Nzen Mibiɛ n soro su, m la ahoresi ka i cɛ mɔ, mini mmɔɔ ni m tii bɔ niɛ am busu.

²⁵ Ma ŋu ka, i ti ye ni ka m sɔnma ya niwa Ipaforoditosi am dɔ. M ni yiri sanɔa yo juma na ya ti ka sojam bo bu buka bu beŋgu lue n nu wɔ, ya Mibiɛ Yesu dɛɛ atin su. Na ambere ni am tii sunmaari i m dɔ, na wɔ ba abuka m ni deke kɛɛ bo m koro ni.

²⁶ I wara ado am, ka i ba niɛ am busu, i ahore akaaki asaaki, dama am yo tiiri ka wɔ da tukpaki.

²⁷ Nahore, i tukpaki n wuraari i, kaan sɔ, mɔ wɔ wu. Ama, na Nyeme asi i anunfɔ, mɔ yiri ŋgumi, m ni yiri kɛɛ, adena mɔ m ahore saaki buka su.

²⁸ Nyini dɛɛ ti, ye m koro ka i ba am dɔ ndende, na am ɲu i na am ahore kaaki jɔ bekun, na má m ahore saaki kun.

²⁹ Am de i ni am saa nnyɔ ni ahorejɔ, Mibiɛ n dɛɛ ti. Na am bu minɛm kɛrɛ bo bu woowa ti kabo i woowa ti barasu ni.

³⁰ Dama Yesu Kristo dɛɛ juma n dɛɛ ti, i yo tɔɔri i ɲgɔɔ ɔ, má wɔ ka kaan sɔ na i wu. I yoori sɔ ni, adena i buka m na i yo deke n bo am akoro ayo má i ni.

3

Sɔnɔ bo i yo sa bo i kɔ atin su Nyɛmɛ dɔ nahɔrɛ su

¹ M ninbaam, jɔrɛ bo i wo bɛrɛ la ka, am ma am ahore jɔ kabo am ni Mibiɛ n ayo kun ni. I ti ye ni ka m kaaki kɛrɛ na m tɛɲge am su fa kɔ kabo m yo kɛrɛ seeri am ni, dama i ti deke bo i buka am wɔ, na má am wura kekereke nu.

² Am si am ɲu sa, ni minɛm bo bu ti satieyofom na bu ti ka caam ni, na bu ɲa nzen sɔnɔ awura má kenkenne, i nya má tiide ni.

³ Yɛrɛ ti Nyɛmɛ minɛm bo ba wura kenkenne nahɔrɛ su a, má bɛrɛ, dama Nyɛmɛ Awiewiɛ Casi ni buka ya ye ya koro su Nyɛmɛ na ya la ahorejɔ a, fa kɔ kabo ya ni Yesu Kristo ayo kun ni. Nyini ti, ya daafi má sayoowa be ɲu fa kɔ aɲuniɛmbaa su.

⁴ Mini ni m tii, má m la atin bo m koro se ka m daafi m ɲu fa kɔ sayoowam su. Nzen be ɲa i la atin, na i daafi i ɲu fa kɔ nyini sayoowam su, má m koro se ka, m la atin tara i mi fieo.

⁵ Bu wuuri m ni, m lemɔcɔɛ cɛɛn bu wuraari m kenkenne wɔ. M ti Yisarelifo baa a, na m fite Benjamin dɛɛ lɛɛ anɔ n nu wɔ, na m ti Hiburufom anuma a nahɔrɛ su. M yo ti Farasifom kun wɔ, na m su Nyɛmɛ nɔaniɛ kpamaawa n su kabo i ti ye ni ka bu su i su barasu ni.

⁶ M yo bita i ni anyumboro wɔ, kabo m yo na m kere Kristo jama n wuwuruwa ni. Fa kɔ kabo sɔnɔ de Nyɛmɛ nɔaniɛ kpamaawa n na i su i su nahɔrɛ su, mini la má ɲgasi be.

⁷ Ama, nyini deke n kere bo m yo buuri bu ka bu la kpɛrɛ ma m ni, Kristo dɛɛ ti, ma ɲu ka bu kere ti ɲgbɛɛn wɔ kisa.

⁸ I ti nahɔrɛ wɔ ka, ma ɲu ka deke n kere ti ɲgbɛɛn wɔ, adena m koro si m Mibiɛ Yesu Kristo, yiri tara deke n kere a. Yiri dɛɛ ti, ma yaki deke n kere bo m yo yoori bu n ka bu ti ɲgbɛɛn wɔ. M niɛ bu kere ka wura a, adena m koro de Kristo ni m saa nnyɔ,

⁹ na m ni yiri yo deke kun nahɔrɛ su. Kisa m koro se má ka m yo sa bo i kɔ atin su Nyɛmɛ dɔ, kabo Nyɛmɛ nɔaniɛ kpamaawa n kere ni, ama, kisa, kabo ma yo Kristo yarada n dɛɛ ti, ye Nyɛmɛ de m ka m yo sa bo i kɔ atin su i dɔ a. Deke n bo i ma i de m ka m yo sa bo i kɔ atin su i dɔ n la bo ma yo i yarada n wɔ.

¹⁰ Deke bo m koro i n kere la ka, m sí Kristo, na m nyá i yiko n bo i koro tɛɲgeeri i yiwee n nu ni, na m dí i dɛɛ wahara n bo i diiri n be, na m wú i dɛɛ yiwee n be.

¹¹ Nyini ma m la tama ka mini gusu tɛɲge m yiwee nu a.

Kabo ya boro ya nyi na ya nya Kristo aceeri ni

¹² M suse má ka ma du mɔ aju su na m ti kabo Nyɛmɛ koro ka m ti ni, wara ma du mɔ ayo casi wɔ, ama, m toko boro m nyi wɔ, adena m nya deke n bo i ti na Yesu Kristo afa m ayo i dɛɛ sɔnɔ ni.

¹³ M ninbaam, mini ni m tii suse má ka ma ju su kabo i koro ka m woowa ti barasu n wɔ, se deke kun ye m nyunu aboro i su a, m wara afi dekem

kere bo m yo yoori bu n sa, ama, m sukoro ka m boro m nyi wo, na m saa kan deke n bo i wo m nyunu ni.

¹⁴ Nyini ti, m mie m nyi wo na m ko m nyunu, adena m ko nu i awieeri, na m nya aceeri n bo Nyeme afere m ama m ngoo i do ni, Yesu Kristo dee ti.

¹⁵ I ti ye ni ka yere kere bo ya yarada ti biiwa ni, ya nyunu boro fa ko nyini dika. Na nzen am sunsunni ba woori i ngungumi, fa ko i noanie n su, Nyeme yi i nyi kere am, na am ti i bu.

¹⁶ Ama, bo i wo bere la ka, kabo ya bita Nyeme atin ba ju haari ni nyuma ni, am ma ya toko bita i so.

¹⁷ M ninbaam, am ma am woowa ti kabo m dee n ti barasu ni. Woowa kpa n bo ya du mo afa akere am ni, am nie minem bo bu bita nyini woowa kpa n ni, na am son bu su.

¹⁸ Dama sanja kere m nati se am ka, nbem woowa kere ka bu ti Kristo kpofom wo, fa ko i yiwee n bo i wuuri i baka jaanu n su ni. Ye kisa m kaaki suse am bekun ni nyunvuin n a.

¹⁹ Nyini minem so, bu nyeme la bu kunnu wo, na deke bo ma i ti bu nyinse ni, bu fa nyini fa yo yanfoya. Bu sunsunni kere wo durunya n nu fen nengem ngumi so a, nyini ti, bu awieeri, bu ka ngbeen wo.

²⁰ Ama, yere yiri, ya ti Nyeme dika n bo i wo angoro n nu nbaam wo, ye ya sunminda ya Mibie Yesu Kristo, ya Tiidefo ni, ni anyumboro, ka i fite Nyeme dika n bo i wo angoro n nu ba.

²¹ Na i ba kaaki ya ahin anunie n bo i wu ni, na i ma i yo anunie fofore barasu be bo i ti kabo i dee anunie woowa n bo i la jirima n ti barasu ni. I fa i yiko n bo i fa nie deke n kere su ni fa yo nyini kere a.

4

Kabo Poo lu tuuri bu fo ni

¹ M ninbaam, m koro am agaya, na m ahore abi ka m nu am ni, ambere ti, ye m ahore ti joo wa sanja kere a, ambere ti m kpere bo ma di i m jumayoowa n nu a. Nyini ti, am bita Mibie n dee atin n ni nahore su.

² Yuwodiya, ni Sintiki, m sere am wo jande, ka, am fa anoo se, dama am ti nibaam wo, Mibie n dee ti.

³ To, woro gusu bo a ti m matafo nahore su ni, m sere u wo, ka, a buka nyini nbara nnyom ni, dama bere yiiri anyumboro bukaari m, ye ya kaanri labari kpa n jore n a, fa sanja ni Kerementi, ni nyingam bo m ni bere sanja yo juma ni. Nyeme akere bu kere duma awura ngoo kadasi n nu.

⁴ Ya Mibie n dee ti, am ma am ahore jo sanja kere, m kaaki suse am bekun wo ka, am ma am ahore jo.

⁵ Am ma sono kere nu ka am ti benle, dama Mibie ni kaaki ba kisa.

⁶ Ma am koko fa ko deke be su, ama, am kan am sa bo i ti am mieewa kere fa kere Nyeme sanja kere, na am sere i, na am da i asi am ahore su.

⁷ Am yoori so, Nyeme ma am ahoreda bo i la ma anusu, na i sunie am dika fa ko am ahore su ni am sunsunni nu, dama am ni Yesu Kristo ayo kun n dee ti.

⁸ M ninbaam, jore n bo wo ka n la ka, am ma am sunsunni kere wo dekem bo bu ti kpa, na bu la kansu n su. Bere la deke bo i ti nahore, ni bo i la anyunuyi, ni sa bo i ko atin su, ni bo i ti casi, ni bo i ti koro sa, ni bo i la jirima.

⁹ Dekem bo am sonson bu fiteeri m do ni, ni bo am deeri m do ni, bere la m noanie ni, ni m sayoowa ni, am su bu su na am fa yo juma. Nyeme la ahoreda, yiri wo am do a.

Kabo Pɔɔlu yoori bu anse fa kɔ bu buka n su ni

¹⁰ Ya Mibiɛ n dɛɛ ti, m ahore ajo ako asin su, dama wɔ cɛ bo m ti má am n̄ga, ama, kisa am akaaki akere ka am cɛcɛ wo m nu. M si ka saŋga kere am cɛcɛ wo m dɔ, se kabo am yo na am buka m n ye am anya má atin a.

¹¹ Bo m suse sɔ ni, i ti má ka deke be miɛ m wɔ ye m sukan sɔ n a, dama nzen m la i, ni bo m la má i kere, m si kabo m tara m n̄u na m wo barasu.

¹² M si kabo yaari ti sɔnɔ na i ti barasu, na m kaaki si kabo sɔnɔ nya i agaya na i ti barasu. Deke kere bo m wo, na sa be atu m, nzen m di na m kunnu yi o, wara nzen m da ahɔɛ o, nzen m la nenje beberebe o, wara i ti kaan o, m si kabo m tara m n̄u barasu na m nyunu yi i.

¹³ Yesu Kristo maari m faŋga n dɛɛ ti ye m koro yo deke n kere a.

¹⁴ Ama, am ayo sakpa, kabo miɛ tuuri m na m ni ambere kere saŋga di wahara ni.

¹⁵ Ambere Filipiyafom si ka fite saŋga bo m boori i bu ba kaanri labari kpa n jɔre kereeri am ni, nyini sin, na m ba fiteeri Makedoniya awɔre n nu ni, Kristo jama kun n kpein be mmɔɔ ace má m aceeri be, má ka ambere n̄gumi ceeri m aceeri a.

¹⁶ Saŋga bo m toko wo Tesalonika miɛ kpiri n nu ni, na miɛ tuuri m ni, am yo sunmaari m dɔ ni aceeri kpe nnyɔ.

¹⁷ I ti má ka m koro ka saŋga kere m sude aceeri fite am dɔ ɔ, ama, m koro ka am yo sɔ, na Nyeme yo am kisi.

¹⁸ Deke n kere bo am fa sunmaari m dɔ ni, m saa akan i, am ace m atara kabo má m koro ni mmɔɔ. Kisa m koro má pui kun, dama Ipaforoditosi afa am aceeri n kere aba ama m. I ti ka yoowa bo ba yo i ama Nyeme na wɔ sun i nu ade i ni akunnujo wɔ.

¹⁹ M Nyeme Feme ni, yiri la nenje ni ajɛke kere a, i kere wo Yesu Kristo dɛɛ jirima nu wɔ, i má am deke kere bo am fun i.

²⁰ Ya Si Nyeme ni, yiri ti ye ni ka ya kansu i saŋga kere saŋga. Ami.

Kabo Pɔɔlu yoori bu anse awieeri su ni

²¹ Am bisa Nyeme minem kere dɔŋgu ma m. Bere ti Yesu Kristo dɛɛm a. Ya ninbaam bo bu wo m dɔ fɛn n bisa am kere dɔŋgu.

²² Nyeme minem kere bisa am dɔŋgu, maala bo bu yo juma Romafom Feme Kpisi Siza dika ni.

²³ Ya Mibiɛ Yesu Kristo buka am kere.

Pɔɔlu kadasi bo i kere fa maari KOLOSIYAFOM ni

¹ Mini Pɔɔlu bo Nyeme dɛɛ koroyanu na m ti Yesu Kristo jaramasa ni, m ni ya niwa Timoti

² sukere ahin kadasi n ma Nyeme minem bo wo yi bu Kolosiya mie kpiri n nu n a, na bu ti ya ninbaam bo bu su Kristo su nahore su ni. Ya Si Nyeme buka am na i ma am ahoreda.

Kabo Pɔɔlu sereeri Nyeme na i daari i asi ni

³ Saŋga kere ya sere Nyeme ma am wo, yiri ti ya Mibie Yesu Kristo Si a, na ya da i asi fa ko kabo am woowa ti barasu n wo,

⁴ dama ya ti kabo am ayo Yesu Kristo yarada, ni kabo am koro Nyeme minem kere barasu ni.

⁵⁻⁶ Deke n bo i ti na am yoori so n la ka, am la ahoresi ka am nya deke n bo Nyeme afa ase angoro ka i fa ma am ni. Am du mo tiiri nyini ahoresi n jore saŋga bo minem ba kaanri labari kpa n bo i ti nahore n jore kereeri am n wo. Labari kpa n bo am deer i ni, wo tereki abara aye durunya n kere, mine ade i, bu suyo sakpa durunya n kere nu. Fite saŋga bo am tiiri i ni, am deer i ye am siiri sakpa n bo Nyeme ayo ama am ni nahore su n a.

⁷ Ya lamoko akoo Ipafarasi bo ya koro i ni, yiri du mo kereeri am ahin labari kpa n a. Yiri ti Kristo amusuisufo bo i la dabunu na i yo i juma buka am a,

⁸ yiri seeri ya kabo Nyeme Awiewie Casi n abuka am na am koro minem barasu n a.

⁹ Nyini ti, fite cen bo ya tiiri kabo Nyeme ayo sakpa n ama am ni, saŋga kere ya sere Nyeme ma am wo, ka i ma am si nahore su kabo i koro ka am yo barasu ni, na i kaaki ma Awiewie Casi ma am nya si ni alecira barasu kere.

¹⁰ Nyini ma am koro wo kabo i ti ye ni ka Ya Mibie minem wo barasu n a, na am yo kabo i koro n kere, na am yo sakpa barasu barasu kere, na am si Nyeme nahore su buka su.

¹¹ Ya kaaki sere Nyeme ka i ma i jirima ni i yiko n bo i la ma anusu n ma am faŋga barasu kere, na am koro mindi, na am la sawore fa ko kekereke kere bo i tu am, ni ahorejo.

¹² Na am da ya Si Nyeme asi, dama yiri ama am ayo minem bo am aju su ka am saŋga nya deke n bo i fa ma i minem bo bu wo wein n nu ni.

¹³ Yiri ye wo yi ya afite awosin dɛɛ femeya yiko n kere nu, ye wo fa ya awura i Wa koroowa n dɛɛ femeya n nu a.

¹⁴ Yiri Kristo dɛɛ ti, ya nya tiide, ye wo fa ya satie ace ya.

Kabo Kristo woowa ni i juma ti barasu ni

¹⁵ Kabo Nyeme bo ya nu ma i n woowa ti ni, yiri Kristo woowa ti so o, yiri ti Nyeme Wa kpien n bo i ti deke kere bo Nyeme ayi bu n tii a.

¹⁶ Yiri ye Nyeme maari i yiiri deke kere bo i wo angoro ni asiengu n a, ni dekem bo ya nu bu, ni bo ya nu ma bu ni, ni yikofom kere, ni nfaŋgafom, ni nfemem kere. Nyeme maari yiri yiiri deke n kere a, adena deke n kere wura i kpiri.

¹⁷ Yiri du mo woori bere wo ka, ye Nyeme nya ba yiiri deke n kere a. Yiri ma deke n kere toko wo bere a.

¹⁸ Yiri ti i jama n kere tii a, ye i jama n ti i ḡuniɛmbaa ni, yiri ti i jama n bumboori a, yiri ye Nyeme adu mo atenge i yiwee nu a, adena i yo deke n kere bo Nyeme ayi bu n mofo.

¹⁹ Dama wo sun Nyeme nu ka, i dee woowa kere wo i Wa n nu.

²⁰ Na Baa n dee ti ma Nyeme akoro akaaki deke n kere bo bu wo angoro ni asienḡu ama bu ni Nyeme ayo kun, i mbunja n bo i fiteeri i ḡunie nu baka jaanu n su ni, ayo bu ni Nyeme afien doḡu a.

²¹ Amberɛ, sanḡa be, am yo woori dede ni Nyeme wo, am yo ti i kpofo wo, dama am yo yo satiem wo, na am sunsunni ti ma kpa,

²² ama, kisa i Wa n woori ka adamande wo, na i wuuri baka jaanu n su ni, nyini ma am ni yiri ayo kun a, adena i yo am casi, na ma be koro jaraki am, na am la ma ngasi be Nyeme do.

²³ Ama, i ti ye ni ka am subita yarada n bo am la i kenken sanḡa kere, na ma am yaki i, ma am ma deke be kanda am fa ko kabo am tiiri labari kpa n bo i maari am yoori i tama n jore ni. Nyini labari n ye bu kaanri i jore durunya n kere nu n a, ye mini Poolu mmoo ti i amususifo, ye m kan i jore n a.

Kabo Poolu yo juma ma Kristo jama n barasu ni

²⁴ Ama, kisa wo yo m fie kabo m sudi wahara amberɛ dee ti ni, na wahara n bo m di i m ḡunie n nu ni, m sudi i so haari m ko wie i, kabo Kristo gusu diiri wahara ni, m di i ma i jamam bo bu ti i ḡuniɛmbaa n wo.

²⁵ Nyeme ayi m ka m yo Kristo jama n amususifo a, ye wo ma m ahin juma n ka m yo buka am a. Nyini la bo i ḡa m kan i noanie n kere pepere kere am ni.

²⁶ I ti jore bo Nyeme yo fa fiɛri dawafom kere su wo, ama, kisa wo fa i akere i minem bo wo yi bu ni.

²⁷ Bere ye Nyeme koro ka i kere bu jore bo i wo fiɛwa nu n a, yiri la alekutura sa bo i la ma anusu na i koro ka i yo ma amberɛ bo am ti ma Yudafom ni. Yiri la ka, Kristo wo am nu, na am la ahoresi ka am nya i dee jirima woowa n be.

²⁸ Ya kan Kristo jore kere sono kere wo, na ya kere bu na ya bobo bu, ni Alecira bo wo fa ama ya ni, na bu ba i do ba su i ka minem bo bu nyunu ati Kristo dee atin su.

²⁹ Nyini dee ti, ye m yo ahin juma n ni anyumboro n a. I dee yiko n bo i la ma anusu ni ma m fanḡa ye m koro yo juma n a.

2

¹ M koro ka am si kabo m tu ḡoni yo juma n ni anyumboro ma amberɛ, ni Lawodikayafom, ni minem bo bu nya si ma m ni.

² M koro ka m yo so na i wura am kperɛ kekereke, na am la anose, na am koro am benḡu ni nahore su, na am si Nyeme nahore su, na am de i noanie ni, na i ma am ahorejo, na am si jore n bo Nyeme yo fa fiɛri ni. Yiri la Yesu Kristo.

³ Yiri ḡumi ti bo i koro ma ya Alecira ni si kere fa ko Nyeme jore n bo i wo fiɛwa nu wo i do ni.

⁴ M koro ma ka be fa anofiefie daka am, nyini dee ti, ye m se am so n a.

⁵ Haari ni bo m wo ma am do ni, m sunsunni yiri wo am do, kabo am ayo Kristo yarada nahore su na am la anose bita i atin kenken ni, nyini ayo m fiɛfiɛ agaya.

Am ma am woowa ti kabo Kristo dee ti ni

⁶ Kabo am asoro su ade Yesu Kristo ka am Mibiε ni, am ma am woowa ti ka minem bo bu ni yiri ayo kun ni.

⁷ Am bita i kekereke, na am subuka su fa kɔ Nyemε atin su, na am ma am yarada yo biiwa nahɔre su kabo ba kere am ni. Na am suda i asi agaya.

⁸ Am si am ηu sa, na má be fa adamande ηgɔnlε, ni sa ηgbεen be dadaka am na am su bu su. Bere la adamande kereewam, ni durunya n nu satie yoowam bo bu fa kere minem na i ti má Kristo dεε kereewa ni.

⁹ Dama Nyemε dεε woowa kere wo Kristo dεε ηunie n nu wɔ.

¹⁰ Kabo am ni yiri ayo kun ni, nyini ma am anya deke kere pepere a. Yiri ti yikofɔm, ni nfanɔafɔm kere tii a.

¹¹ Kabo am ni Kristo ayo kun ni, nyini kere ka am awura kenkenne nahɔre su a, má anuniembaa su yoowa bo adamande yo i ni, ama, yiri la bo Kristo ayi am satie n kere ni.

¹² Saɔga bo bu biεeri am Nyemε nzue ni, i kere ka ba saɔga ase am ni Kristo wɔ lεε, na am ni yiri asaɔga atenge i yiwee n nu lεε, dama am la yarada ka Nyemε dεε yiko n nu ye wɔ tenge Kristo i yiwee n nu a.

¹³ Saɔga be, am yo ti fuinm wɔ, dama am ti satieyofɔm wɔ, na am ayo awura má kenkenne na am su má Nyemε. Ama, kisa Nyemε ama am ni Kristo asaɔga anya ηgɔɔ fɔfɔre. Wɔ fa ya satie kere ace ya.

¹⁴ Satie kere bo ya yo yoori na ba kere i ka i ti ηgasi jɔre ni, Yesu yiwee n bo i wuuri baka jaanu n su n dεε ti, wɔ ηmisi ayi nyini ηgasi sa n kere,

¹⁵ na wɔ kunma yikofɔm ni nfanɔafɔm kere, awura bu nyinε fofoe nu.

¹⁶ Nyini ti, má am ma be jaraki am fa kɔ sayoowa be su, kabo am yo fa kɔ diire diiwam ni bu ciirem, wara deke nuuwam ni bu ciirem, wara cεenkpiri ciirem, wara sara fɔfɔre ciire yoowam, wara Njumiyi cεen n ciirem.

¹⁷ Nyini yoowam kere ferema ni deke n bo i suba n wɔ, yiri la Kristo.

¹⁸ Am si am ηu sa ni minem bo bu ηa ba ηu deke yikereewa nbem, na bu yo bu ηu ka bu ti tarakam, na bu su merεkem ni. Adamande dεε sunsunni nu kpirikoro la nyini n kere bo bu yo sɔ ni. Má am ma bu ηu am ηgasi be.

¹⁹ Nyini minem sɔ da má Kristo bo i ti i jama n tii n ηu. I jama n ti i ηuniembaa a. Yiri nie i ηuniembaa barasu barasu n kere suyo i kun a, na i ma i wura i beɔgu nu, na i sasa suyo faɔga, na i buka nyemesu atin su, kabo Nyemε koro ni.

²⁰ Kabo am ni Kristo asaɔga awu ni, am anya am tii afite durunya n nu satie yoowam kere nu. Nzu ti ye am su bu nyini ciirem su a?

²¹ Bo bu ηa, má am tara ahin, má am di ahin, ni bo bu ηa má am fa am saa kan ahin dekem ni.

²² Nyini ciirem kere ti adamande dεε kereewam wɔ, nzen sɔnɔ suuri bu su, bu kere kaari ηgbεen wɔ.

²³ Nyini ciirem ni, mine sunsun ka bere n bo bu su nyini n kere su n ti alecirafɔm wɔ, ama, bu ti má alecirafɔm, bu su dekem bo bu ahorembaa koro ni su a, na bu yo bu ηu taraka, na bu sukere bu ηu wahara, ama, nyini n kere bo bu yo i ni, bu koro tara má bu ηu fa kɔ adamande konviki dika.

3

Woowa dawa n ni woowa fɔfɔre n jɔre

¹ Nyini ti, kabo am ni Kristo asaɔga atenge i yiwee n nu ni, am ma am ahorembaa kere wo dekem bo bu wo angoro n su, dika n bo Kristo tana Nyemε saa fɔmbɔro su ni.

² Am ma am sunsunni kere wo dekem bo bu wo angoro n su, ama, má dekem bo bu wo durunya n nu fen ni.

³ Dama am ni Kristo asaŋga awu wɔ, ye am ni yiri ayo kun a, ye Nyeme afa am ni yiri ŋɔɔ afe yiri ni i tii dɔ a.

⁴ Kristo ti am ŋɔɔ nahɔre su a, i ba baari, am ni yiri kere sánŋa fite a, na am nyá i jirima woowa ni.

⁵ Nyini dɛɛ ti, am yaki am ŋuniembaa sa koroowa kere, má am yo sakaraya, am yaki dangba sayoowam, am yaki konviki ŋgbɛɛnŋgbɛɛn, má am ma am nyunu boro satieyo su. Má am ma am nyunu boro neŋge kpini su, sɔnɔ kere bo i yo sɔ, i mi su má Nyeme, i su neŋgem wɔ.

⁶ Nyini dɛɛ ti, ye Nyeme fá yaa cin minem sui a, bere bo ba kete ka bu de má i nɔanie na bu yo nyini sam ni.

⁷ Saŋga be, amberɛ mmɔɔ ni am tii yo yo nyini sam wɔ, dama kabo am woowa yo ti lɛɛ.

⁸ Ama, kisa, am yaki nyini kere fieo, yaafa ni anjunkturini, na má am ma nzuko kpie ni jɔre ŋgbɛɛnŋgbɛɛn fite am nɔɔ nu,

⁹ má am bu kɔre sɔ am beŋgu, dama am ayaki am dawa dɛɛ yoowa n kere fieo fieo,

¹⁰ am afa wo fɔfɔre. Nyeme suma am nyini woowa fɔfɔre n a, adena i má am woowa ti kabo i dɛɛ woowa ti barasu ni, na am koro si i nahɔre su.

¹¹ Nyini woowa fɔfɔre n bo Nyeme ayo i n dɛɛ ti, Yudafoŋm ni minem bo bu ti má Yudafoŋm ti kun wɔ, minem bo ba wura kenkenne o, ni bo ba wura má kere ti kun wɔ, ni minem bo bu jɔjɔ anie barasu nbem, ni minem bo bu nyunu nya teke má, ni akɔɔm ni awurunbaam, bu kere ti kun wɔ. Ama, bo i kɔ tara bu kere n la Kristo, yiri wo bu kere ahore su a.

¹² Am ti minem bo Nyeme koro am, na wɔ yi am afa ayo i dɛɛm wɔ. Nyini ti, i ti ye ni ka am si anjunkturini na am buka minem, na am yo am ŋu kaan, na am yo benle, na am la mindi,

¹³ na am yo sawɔre de am beŋgum. Nzen be ni i beŋgu anya jɔre, am fa ce am beŋgu. Kabo Kristo afa am ŋgasi ace am ni, amberɛ gusu fa am beŋgum ŋgasi ce bu.

¹⁴ Bo i tara i kere n la ka, am koro am beŋgu, dama koro ma am yo kun a, na am yo anɔɔse nahɔre su.

¹⁵ Kristo afere am ayo am deke kun ama am ahoreda, nyini dɛɛ ti, am ma nyini ahoreda n wo am dɔ saŋga kere, na am suda Nyeme asi.

¹⁶ Am ma Kristo jɔre n wo am ahore su ni nahɔre su. Am fa Nyeme nɔanie na am fa kere am beŋgu, ni alecira kere bo am la i ni, na am fa tu am beŋgu fɔ. Am fa Nyeme nɔaniem bo bu wo kansu jue kereewam n nu n fa di jue kansu Nyeme, na am di jue n bo Awiewie Casi n kere am, na am di jue da Nyeme asi am ahore su.

¹⁷ Am sayoowa, ni am jɔjɔowa kere nu, am yo i ya Mibie Yesu dɛɛ duma n nu, na am da ya Si Nyeme asi Kristo dɛɛ ti.

Kabo i ti ye ni ka Kristo susufɔm bita bu awuru barasu ni

¹⁸ Nbaram, am de am hunm nɔanie kabo i ti ye ni ka Mibie n susufɔm yo ni.

¹⁹ Nbiesɔm, am koro am yim, má am bita bu ni joko tie.

²⁰ Nbaatumam, am de am sim ni am nim nɔanie fa kɔ deke kere su. Nzen am yo sɔ, nyini yo Mibie n fie a.

²¹ Nbaasim, má am yo sa bo i ye am nbaam yaa su, na bu ahore saaki.

²² Amberɛ bo am ti akɔɔm ni, am de am mibiem bo bu wo durunya n nu fen n nɔanie deke kere nu, má am yo ka bu nie am dɛɛ ti, na am koro ka

am yo na bu ahore jɔ am ɲu, ama, am yo deke kere bo bu ɲa am yo i n ni am ahorembaa kun, ka am su Mibiɛ n dɛɛ ti.

²³ Am yo am juma kere ni am ahorembaa kun, ka am suyo ma Mibiɛ n wɔ, ama, má ka am suyo ma adamande wɔ.

²⁴ Am si ka am nyá ɲkatɔ bo Nyemɛ ase ka i fá ma i minɛm ni. Dama am Mibiɛ n bo am su i ni, yiri la Kristo wɔ.

²⁵ Sɔnɔ kere bo i yoori sa bo i ti má kpa, Nyemɛ tó i mi kaari, dama Nyemɛ tantambu má nu.

4

¹ Ambere gusu bo am ti mibiɛm ni, am yo am akɔɔm kpa, na am yo deke bo i ti ye ni ka am yo ma bu ni, dama am si ka am gusu la am Mibiɛ n bo i wo angoro.

Nyemɛsere ni fɔtu jɔre

² Am susere Nyemɛ sanɲa kere ni anyumboro, má am fa am ɲu ji, am suda i asi.

³ Nzen am sere Nyemɛ, am sere ma ya gusu, na Nyemɛ teke atin ma ya na ya kan labari kpa n fa kɔ Kristo jɔre n bo i yo wo fiɛwa nu n kere minɛm. Dama labari kpa n dɛɛ jɔre ti, ye m wo dansaraka nu n a.

⁴ Am sere Nyemɛ ma m, na i jina m sin na m koro kan labari kpa n kabo i ti ye ni ka m yi i bu nyunyumi kere minɛm na bu ti i bu.

⁵ Am fa ɲɔnɛ na am si kabo am wo fa kɔ minɛm bo bu ti má Kristofɔm dɔ. Sanɲa kere bo am nya atin, am fa yo sakpa, kabo i ti ye ni ka am yo ni. Má am saaki am sanɲa n bo am la i ni.

⁶ Sanɲa kere bo am ɲa am jɔjɔ minɛm dɔ, am ma am nɔaniɛ fite kpa na i yo bu fiɛfiɛ, na am si kabo am bɔ sɔnɔ kere nu barasu.

Kabo Pɔɔlu yoori bu anse awieeri su ni

⁷ Ya niwa Tikikusi bá kan m ɲusu jɔre kere kere am. Yiri ye ya koro i agaya, i bita nahɔre fa kɔ i juma su, i ti ya lamɔkɔ akɔɔ ɔ, fa kɔ Mibiɛ n juma n su.

⁸ Nyini ti, ye m susunma i am dɔ n a, ka i ba kan kere am kabo ya kere ti barasu, na am ahore si.

⁹ I ni Onisimɔ suba a. Yiri mmɔɔ ti ya niwa bo ya koro i wɔ, i bita nahɔre fa kɔ i juma su, i ti am be wɔ. Bu bá kan deke kere bo i suyo fɛn kere am.

¹⁰ Arisitakusi bo m ni yiri kere wo dansaraka nu fɛn ni, bisa am kere dɔɲgu. Banabasi niɛma Marako gusu bisa am kere dɔɲgu. Ma du mɔ ase am kabo am yo barasu, ka i baari, am de i ni am saa nnyɔ.

¹¹ Yesu n bo bu kaaki fere i ka Jusitosi n gusu bisa am kere dɔɲgu. Bere mine nsan n ɲgumi ti m lamɔkɔ Yudaɔm bo ba yo yarada, na m ni bere sanɲa yo Nyemɛ femɛya n nu juma n a. Bu ti minɛm bo bu ma m ahoresi.

¹² Ipafarasi gusu bo i ti am be na i ti Kristo akɔɔ n bisa am dɔɲgu. Sanɲa kere i sere Nyemɛ ni anyumboro ma am wɔ, adena am la jinakunsu na am su Nyemɛ ni nahɔre, na am yarada yo biiwa, na am de i nɔaniɛ ni kabo Nyemɛ koro n kere.

¹³ Mini mmɔɔ ni m tii koro di i daani, kabo i yi anyumboro yo juma ma ambere, ni Lawodikayafɔm, ni Herapolisifɔm barasu.

¹⁴ Luka bo ya koro i na i ti dɔkɔtiɛ ni, i ni Demasi kere bisa am dɔɲgu.

¹⁵ Am bisa ya ninbaam kere bo bu wo Lawodikaya ni, ni Nimfa, ni Kristo jama n kere bo bu nati tien bu nɔɔ i dika n dɔɲgu.

¹⁶ Nzen am kaanri ahin kadasi n wieeri, am yo anie na am fa ma Lawodikayafom na bu gusu kan i. Na am boro am nyi na am gusu kan m kadasi n bo bere Lawodikayafom fa ma am ni.

¹⁷ Am se Akipusi ka i boro i nyi, na i yo juma n bo Mibie n fa maari i ni, na i wie i.

¹⁸ Mini Poolu ni m tii sufa m saa sukere ahin kerewa n bisa am dongu a. Ma am ma am wara fi ka m wo dansaraka nu wo. Nyeme buka am kere.

Pɔɔlu kadasi ciciri su bo i kerɛ fa maari TESALONIKAFOM ni

¹ Mini Pɔɔlu, ni Silivanusi, ni Timoti sukere ahin kadasi n ma ambere Kristo jama n bo am wo Tesalonika mie kpiri n nu na am ti ya Si Nyeme ni ya Mibie Yesu Kristo dee minem ni. Nyeme buka am, na i ma am ahoreda.

Kabo Tesalonikafom woowa ni bu yarada tiiri barasu ni

² Saŋga kere ya da Nyeme asi ambere kere dee ti wo, na ya susere Nyeme ma am,

³ na ya sutenge am su ya Si Nyeme do, kabo am fa am yarada fa yo juma barasu ni, ni kabo am la koro, na am fa yo juma barasu ni, ni kabo am bita am tama n kenken fa ko ya Mibie Yesu Kristo do ni.

⁴ Ya ninbaam, Nyeme koro am, na ya si ka wo yi am ka am yo i tienngu dee minem, ya si ka i ti so o,

⁵ dama saŋga bo ya kaanri labari kpa n kereeri am ni, wo ti ma noanie jɔjɔwa ngumi wo, ama, i fite Awiewie Casi n dee yiko n nu wo, ye am siiri tenle su ka i ti nahore a. Saŋga bo ya woori am do ni, am nuuri kabo ya wo tiiri barasu, i fiteeri ka ambere dee ti ye ya woori so a, adena i buka am.

⁶ Na am ason ya ni Mibie n dee wo n su, haari ni bo am diiri wahara agaya n kere ni, am deeru labari kpa n wo, ni ahorejo n bo i fite Awiewie Casi n do ni.

⁷ Am nyini wo n ti, yaradayofom kere bo bu wo Makedoniya ni Akaya aworem n nu anu ka i ti ye ni ka bu son am su.

⁸ Ma ka Makedoniya ni Akayafom tiiri Mibie n labari n fiteeri am do n ngumi, ama, yarada n bo am yoori Nyeme ni, i jore abara aye deke kere. Nyini ti, ya la ma jore be bo ya kan kun.

⁹ Nyini minem n kere kan kabo am deeru ya barasu, saŋga bo ya baari am do ni, ni kabo am kaakiiri am sin boori amem na am su Nyeme bo i ti nahorefo na i wo bere saŋga kere ni,

¹⁰ na am nminda i Wa Yesu, yiri fite Nyeme do angoro ba a, yiri ye Nyeme atenge i yiwee n nu n a, yiri yi ya fite jina een dee kekereke n nu a.

2

Kabo Pɔɔlu yoori i juma Tesalonika mie kpiri n nu barasu ni

¹ Ya ninbaam, ambere mmoo ni am tii si ka, ba n bo ya baari am do ni, wo ka ma ngbeen.

² Am si kabo bu boori ya, na bu wuraari ya nyinse Filipiya mie kpiri n nu ka, ye ya nya baari am do Tesalonika a. Ama, na Nyeme ama ya ahoresi na ya koro akan i labari kpa n akere am, haari ni bo mine dongu asoro ma ya su mmoo ni.

³ Noanie n bo ya kan kereeri am ni, i ti ma ka ya mini atin wo, wara i ti ma ka ya la sunsunni tie be wo, i sa su ti ma ka ya koro ka ya dadaka be wo.

⁴ Ama, saŋga kere ya jɔjɔri kabo Nyeme koro n wo, dama yiri jina ya sin a, ye wo fa labari kpa n ama ya ka ya kan i. Ya yo ma ka i sun adamande nu wo, ya yo ka i sun Nyeme nu a, dama yiri fiiti si deke bo i wo ya ahore su a.

⁵ Am si tenle su ka ya ba abo má am anɔɔfie wɔ, na ya ba akan má labari kpa n ka ya nyunu aboro nenje kpini su wɔ. Nyeme wo ya daani,

⁶ ya yo akoro má kansi am dɔ, wara be dɔ.

⁷ Má kabo ya ti Kristo jaramasam ni, má ya koro se am ka am yo deke kere ma ya. Ama, sanja bo ya woori am dɔ ni, ya woori benle wɔ, kabo bara baawufɔ nie i nbaam dika n wɔ.

⁸ Koro bo ya fa koro am n dɛɛ ti, ye ya kaanri Nyeme labari kpa n maari am a, na ya gusu akun ya ɲu ama am, dama ya koroori am agaya n dɛɛ ti.

⁹ Nahɔre, ya ninbaam, am tenje su kabo ya boroori ya nyi yoori juma nahɔre su, ya yoori juma wiesu, ni kɔŋgue, adena má ya fa ya fie fie be, sanja bo ya kaanri Nyeme labari kpa n maari am ni.

¹⁰ Ambere yaradayofom ni, am ni Nyeme mmɔɔ kere wo ya daani, kabo ya wo tiiri, sanja bo ya woori am dɔ ni. Ya woori am dɔ ni akunnu fofoe wɔ, na ya sa kere ako atin n su, ya yo má sa be bo i fa jaraki ba.

¹¹ Am si ka sanja bo ya woori ni ambere ni, ya bitaari am kabo sɔnɔ bita i nbaam n wɔ.

¹² Ya maari am ahoresi, na ya dada am ahore, na ya ye am nyi ka am wo kabo i ti ye ni ka Nyeme minem wo barasu n a. Yiri fereeri am a, ka, am ba yo i dɛɛ minem bo i nie am dika, na am bá nya i dɛɛ jirima ni.

¹³ Na ya gusu da Nyeme asi sanja kere, dama sanja bo am deeri Nyeme nɔanie n bo ya kan kereeri am ni, am ade má i ka i fite adamande dɔ ɔ, ama, am ade i ka i ti Nyeme nɔanie wɔ, na i ti sɔ ɔ nahɔre su, ye i wo ambere yaradayofom ahore su yo juma a.

¹⁴ Ya ninbaam, sam bo bu yo tuuri Kristo jamam bo bu wo Yudiya asien n su ni, nyini sam ye ba tu ambere gusu n a. Kabo am tienju minem akere am wahara barasu ni, sɔ ye Yudafom yo fa kereeri Kristo jamam n a.

¹⁵ Bere kuunri Nyeme nɔanie kanfom ye bu kaaki kuunri ya Mibie Yesu, na ba kere ya wuwuruwa, na ba yo sa bo i sun má Nyeme nu, na ba yo adamande kere kpɔfom.

¹⁶ Na ba koro ka bu kanda ya ka má ya kan Nyeme nɔanie n kere minem bo bu ti má Yudafom ni, adena má bu nya tiide. Na nyini satie n aba abuka bu satie n kere su ako asin su. Ama, kisa, Nyeme afa yaa bu ɲu, i sudi bu jɔre.

Kabo má Pɔɔlu koroori ka i kɔ nie Tesalonikafom busu ni

¹⁷ Ya ninbaam, sanja bo ya kpaaki yakiiri am kaan sɔ ni, ya sunsunni yiri woori am dɔ ɔ, na ya wara ado am agaya, na ya boro ya nyi ka ya ba nie am busu.

¹⁸ Má ya koroori ka ya kpie ya nyi ba am dɔ. Haari na mini Pɔɔlu ni m tii akoro ka m kpie m nyi ba am dɔ, kpe nyenye kere, ama, Sitana akanda ya.

¹⁹ Ya koro ka ya kpie ya nyi ba am dɔ, dama sanja bo ya Mibie Yesu bá kpie i nyi ba ni, ya lá ahoresi ambere dɛɛ ti, na ya lá ahorejo, na ya káaki koro fɔ ka ya nya teremasu i dɔ.

²⁰ Nahɔre, ambere ti, ye ya la ahorejo koro bo ya hoe n a.

3

¹ Kabo ya ni ambere akpaaki ace n dɛɛ ti, ya wara ado am agaya, nyini ti, ya ɲa yere ka Atensi mie kpiri n nu.

² Na ya sunma ya niwa Timoti ka i ba nie am busu. Ya ni yiri sanja yo juma fa kɔ Kristo labari kpa n kan su, ye ya sunmaari i ka i ma am nya ahoresi, na i ma am jina kenken fa kɔ am yarada n su.

³ Adena má am be nyeni yoroki i fa ko ahin wuwuruwam bo bu sukere am n ti. Amberé mmoo ni am tii si ka, nyini sam bo bu tú yere yaradayofom ni, Nyeme koroowa lee.

⁴ Dama sanja bo ya toko wo am do ni, ya yo seeri am ka bu ba kere ya wuwuruwa. Kabo am si ni, nyini lee ye wo tu ya na.

⁵ Nyini ti, ma koro amindi má, ye m sunmaari Timoti na i ba nie ka am toko bita am yarada n kenken na. Beni, kisa Sitana akoro anya atin adadaka am, wo ma ya juma n bo ya yo i am do n kere aka ngbeen.

⁶ Ye kisa, Timoti akpie i nyi afa labari aba ama ya fa ko kabo am yarada, ni am koro n ti barasu. Wo se ya ka am la sunsunni kpa fa ma ya sanja kere, na am koro ka am nu ya kabo ya gusu koro ka ya nu am ni.

⁷ Nyini ti, ya ninbaam, haari ni bo ya wo kekereke nu na ya sudi wahara n kere ni, am yarada n ama ya ahoresi.

⁸ Na nzen am jinaari kun su, fa ko Mibie n dee atin n su, ya koro da na ya daafi.

⁹ Kisa ya si má kabo ya da Nyeme asi fa ma am mmoo, fa ko ahorejo bambaka n bo wo fa ama ya, am dee ti.

¹⁰ Kongue ni wiesu kere ya sereeri Nyeme nahore su wo, ka, i ma ya ba nu ya nu, na ya kere am dekem bo i kpie am su fa ko am yarada n su.

¹¹ Ya sere ya Si Nyeme, ni ya Mibie Yesu ka bu teke atin ma ya, na ya koro ba am do.

¹² Na ya sere Mibie ni, ka, i ma am la koro buka su, na am fa koro am bengi ni minem kere ko sin su, kabo ya gusu koro am ni.

¹³ Na i ma am nya ahoresi, na am jina kenken, na am ba yo mine casim bo be koro jaraki má am, ya Si Nyeme do, sanja bo ya Mibie Yesu ba baari ni i tienju minem kere ni.

4

Kabo ya wo wo bo i sun Nyeme nu barasu ni

¹ Ya ninbaam, ya yo kereeri am kabo i ti ye ni ka am wo barasu na i yo Nyeme fie. Ya si ka am wo nyini wo n wo nahore su. Ama, ya sere am jande wo, ya Mibie Yesu duma n nu, ka, am wo wo bo i ko tara so.

² Dama am si nanie n bo ya Mibie Yesu fa maari ya na ya gusu fa maari am ni.

³ Nyeme koro ka am wo wo casi wo, na má be yo sakaraya.

⁴ I ti ye ni ka bieso kere ni i yi tara bu nu, na bu wo wo bo i ti casi na i la kansu.

⁵ Má am ma am konviki wo sakaraya sereya nu kabo minem bo bu su má Nyeme n yo ni.

⁶ Kabo i nya ti so ni, má Kristo susufo be se ka i bu i niwa Kristo susufo ngbeen fa ko nyini sam su. Ya yo seeri am wo ni nahore kekereke, ka, sono kere bo i yoori so, Mibie ni cin i mi sui.

⁷ Nyeme fereeri ya ka ya wo wo bo i ti casi wo, i koro má ka ya fa ya nu wura sakaraya sereya n nu.

⁸ Nyini ti, sono kere bo i keteeri ahin kereewa ni, i ti má ka i sukete adamande wo, ama, i sukete Nyeme wo, yiri ma am i Awiewie Casi na.

⁹ To, fa ko kabo am koro am ninbaam ni, ya la má jore be bo i ti ye ni ka ya kere ma am, dama Nyeme akere amberé ni am tii kabo am koro am bengi barasu.

¹⁰ I ti nahore wo, ka, am koro ya ninbaam kere bo bu wo Makedoniya awore n nu ni. Haari ni nyini mmoo, ya susere am wo, am koro bu koro bo i ko tara so.

¹¹ Am yo anie na am wo benle, na am nie am tiengu juma bo am yo i, na am fien anuye na am di, kabo ya du mo seeri am ni.

¹² Nzen am yoori so, nyini ma minem bo bu nya yo ma Yesu yarada n bu am a, na am nie ma be anyumbaa fa ko am sa koroowa su.

Kabo Mibie ni ba kpie i nyi ba n jore

¹³ To, ya ninbaam, ya koro ka am si deke bo i ti nahore fa ko minem bo ba wu n do, adena ma am ahore saaki ka minem bo bu la ma tama be ni.

¹⁴ Ya yo yarada ka Yesu wuuri wo na wo tenge bekun, nyini ti, ya kaaki la yarada ka Nyeme tenge minem bo bu yoori Yesu yarada na ba wu ni, na i ma bu su Yesu su ba.

¹⁵ Kereewa bo ya sufa kere am kisa n fite Mibie n do o, ka, yere bo ya toko la ngoo ni, ceen n bo Mibie n ba baari ni, yere, ya du ma bere n bo ba wu n mo.

¹⁶ Dama Mibie n ni i tii ba fite angoro n nu jura na i ma noo, na Nyeme mereke kpien n tien, na bu kan Nyeme awie ni. Na minem bo bu yoori Yesu yarada na ba wu n du mo tenge bu yiwee n nu.

¹⁷ Nyini sangha, na Nyeme fa bere, ni yere bo ya toko la ngoo ni, na ya kpa Mibie n atin angoro yinyingu n nu. Na ya ko wo Mibie n do sangha kere.

¹⁸ Nyini ti, am fa ahin noaniem fa si am bengum ahore.

5

¹ Ya ninbaam, fa ko sangha n bo Mibie ni ba ba ni, ya la ma jore be bo i ti ye ni ka ya kere ma am fa ko nyini sangha n su kun.

² Dama amberere mmoo ni am tii si tenle su ka ceen n bo Mibie ni ba kaaki ba ni, i yo kabo awiefi ba kongue ba wo n wo.

³ Sangha bo minem ba suse ka tanalaifie ni ahoreda wo bere ni, nyini sangha n nu ye kekereke kaba ba tu bu a, kabo bara ba kutu ka i wu baa na i ti barasu ni. Nyini kekereke ni, sono be koro fite ma nu.

⁴ Ama, amberere, ya ninbaam ni, am wo ma awosin nu bo Mibie n ba ceen ni ba fura am nu, kabo awiefi ba fura sono nu na i wo n wo.

⁵ Amberere kere ti minem bo am wo wein n nu wo, kabo wiesu ti ni. Ya wo ma kongue nu, wara awosin nu.

⁶ Nyini ti, ma am ma ya daafi kabo nyingam daafi ni, am ma ya nyunu wo su na ya tara ya nu.

⁷ Kongue ye minem daafi a, kongue gusu ye minem nu nzan bo a.

⁸ Ama, yere wo wein nu wo, nyini ti, am ma ya tara ya nu, na ya fa yarada ni koro fa kanda ya nu ka bulaari peperepe bo ya fa kanda ya hoe su, na ya fa ahoresi ka ya nya tiide yo ka bulaari kere bo ya fa butu kanda ya tii.

⁹ Dama Nyeme ayi ma ya ka i fa yaa na i cin ya sui wo, ama, i yiiri ya ka ya nya tiide, ya Mibie Yesu Kristo dee ti wo.

¹⁰ I wuuri yere dee ti wo, na sangha bo i ba ba ni, nzen ya la ngoo o, wara nzen ya wu wo o, ya ni yiri sangha wo a.

¹¹ Nyini ti, am ma am bengum ahoresi, na am buka am bengum na am ko mo ni am nyemesu ni, kabo kisa na am suyo ni.

Fotu jore

¹² Ya ninbaam, ya sere am wɔ, ka, am bu mɔfom ni, bere bo bu yo Nyeme juma ni anyumboro ma am ni, na bu nie am su, na bu kere am Nyeme atin ni.

¹³ Am ma bu jirima nahore su, ni koro, fa ko bu juma n bo bu yo i n dee ti. Am ma tanalaife wo am ni am bengum do.

¹⁴ Ya ninbaam, ya kaaki sere am wɔ, ka, am bobo nviyafom ni, na am ma serefom n ahoresi, na am buka daburukafom ni, na am fa sawore ni sono kere.

¹⁵ Ma be se ka i fa i bengum satie bo i yo i fa to i mi kaari, ama, sangha kere am ma am sunsunni la ka, am yo sakpa ma am bengum ni sono kere.

¹⁶ Am ma am ahore jo, sangha kere,

¹⁷ na ma am se ka am yaki am nyemesere,

¹⁸ na am da Nyeme asi, haari fa ko sa kere bo i tu am. Kabo Nyeme koro ka am yo lee, dama am ni Yesu Kristo ayo kun n ti.

¹⁹ Ma am kanda Awiewie Casi ni, am ma i yo i juma.

²⁰ Nɔanie bo minem deeri i Awiewie Casi n do kan kereeri am ni, ma am bu i ngbeen,

²¹ ama, am fiiti i kere nu na am nie, na am de bo i ti kpa ni, na am su i su,

²² na am kete sa ngbeenngbeen kere pepere.

Awieeri su dee anse yoowa

²³ Ya sere Nyeme, yiri n bo i ma ahoreda n ka, i nmisi am ahorembaa, ni am njunie, ni am sunsunni kere casi, adena am wo wo bo fin be mata ma am, haari fa ko ju sangha bo ya Mibie Yesu Kristo ba kpie i nyi ba ni.

²⁴ Yiri bo wɔ fere am ni, yiri la dabuɔ, i yo nyini sam n kere.

²⁵ Ya ninbaam, am sere Nyeme ma ya gusu,

²⁶ na am bisa ya ninbaam kere dongu ni koro.

²⁷ M susere am wɔ, am nie Mibie n ti, na am kan ahin kadasi n kere ya ninbaa yaradayofom n kere na bu ti.

²⁸ Ya Mibie Yesu Kristo buka am.

Pɔɔlu kadasi nnyɔ su bo i kerɛ fa maari TESALONIKAFOM ni

¹ Mini Pɔɔlu, ni Silivanusi, ni Timoti sukere ahin kadasi n ma ambere Kristo jama n bo am wo Tesalonika miɛ kpiri n nu na am ti ya Si Nyeme, ni ya Mibiɛ Yesu Kristo dɛɛ minem n a.

² Ya Si Nyeme ni ya Mibiɛ Yesu Kristo buka am, na bu ma am ahoreda.

Kabo Yesu bá di minem jɔɛ barasu ni

³ Ya ninbaam, wɔ yo daka ka ya da Nyeme asi, ambere ti, sanɔa kerɛ. Atin wo nu ka ya yo sɔ, dama am yarada n buka su wɔ nahɔɛ su, na koro bo am koro am beɔgu n gusu subuka su sɔ ɔ.

⁴ Nyini dɛɛ ti, ya fa am fɔ sɔ ɔ, deke bo Kristo jamam wo kerɛ. Ya fɔ fa kɔ kabo am ayo yarada na am la mindi fa kɔ wuwuruwa n kerɛ bo minem sukere am, ni wahara n kerɛ bo am wo i nu ni.

⁵ Nyini kere ka Nyeme di minem jɔɛ ni i nahɔɛ atin su a, na i se ka ambere ti ye ni ka am wura i femeya n nu a, wahara n bo am adi i n dɛɛ ti.

⁶ Nahɔɛ, Nyeme yo sa bo i kɔ atin su wɔ, i má minem bo bu sukere am wahara n gusu di wahara,

⁷ na i má ambere bo am sudi wahara n ni yere kerɛ nya ya ɔu. Nyini sam kerɛ bá yo sɔ sanɔa bo ya Mibiɛ Yesu bá fite aɔgoro ba ni i merɛkem, ni bu yiko bambaka ni,

⁸ ni sin, na i bá cin minem bo ba kete Nyeme n sui, ni bo ba de má ya Mibiɛ Yesu labari kpa ni.

⁹ Nyeme cín bu sui haari bu duma bá bo má, na bu ɔú má Mibiɛ ni, ni i yiko bambaka ni.

¹⁰ Nyini cɛɛn n bo i ba baari n ye i minem kere wúra i kpiri a, na nyini minem kere bo bu yo i yarada n má i jirima. Ambere mmɔ wo nyini minem n nu, dama am ayo labari n bo ya fa maari am n yarada.

¹¹ Nyini dɛɛ ti, ye ya sere Nyeme ma am sanɔa kerɛ n a. Ya sere i ka i ma am wo wo bo i ti ye ni ka i dɛɛ minem bo wɔ fere bu n wo ni. Na ya kaaki sere i ka i fa i yiko n buka am, na am yo am kunnu koroowa, ni juma kere bo i ti kpa kɔ wie.

¹² Nzen am nya yoori sɔ, nyini má minem ma ya Mibiɛ Yesu duma n jirima a, am dɛɛ ti, na i gusu má am nya jirima. Nyeme ni ya Mibiɛ Yesu Kristo dɛɛ ahɔɔma n má i yo sɔ a.

2

Sɔnɔtie n jɔɛ

¹ Tɔ, ya ninbaam, m sujɔɔ am dɔ fa kɔ ya Mibiɛ Yesu Kristo ba n su wɔ, ni kabo ya tɛn ya nɔɔ na ya ni yiri kó ye n wɔ. Ya sere am wɔ,

² ka, má am kaaki am sunsunni wara am birisi, dama nbem ɔa Mibiɛ n adu mɔ aba asin n dɛɛ ti. Haari nzen be ɔa wɔ de nɔanie Nyeme Awiewie Casi n dɔ, wara nzen be jɔɔɔri nyini jɔɛ n sɔ, wara nzen be seeri ka yere akere i kadasi n nu ase sɔ a, má am de i.

³ Má am ma be dadaka am fa kɔ deke be su fieo, dama nyini cɛɛn ni bá má, má ka sanɔa n bo minem dɔɔgu bá kete ka bu su má Nyeme ni, na

sɔnɔtiɛ n bo i bu má ka pui wo bɛrɛ n nyá yi i ɲu fite fofoe nu, yiri n bo Nyɛmɛ fá i ji cɛɛma sin n nu ni.

⁴ I kéte deke kɛrɛ bo bu fere i ka Nyɛmɛ, ni deke kɛrɛ bo adamande kutu su i, na i kére i ɲu ka i tara bɛrɛ kɛrɛ pepere. Haari na i kó wura tana Nyɛmɛ Sereebiri Awuru n nu, na i sé ka yiri ti Nyɛmɛ a.

⁵ Am tenge má su ka sanɲa bo m woori am do ni, m yo seeri am ahin jɔrɛm kɛrɛ, nzen sɛ?

⁶ Kisa, am si deke bo i kanda i na wɔ nya ba má ni, má ka sanɲa n aju bo i yí i ɲu fite fofoe nu.

⁷ Ama, sɔnɔtiɛ n bo i bu má ka pui wo bɛrɛ ni, yiri suyo i asiri nu juma wɔ kisa, má ka yiri n bo i kanda i ni, aba acin ayaki atin ni.

⁸ Do na sɔnɔtiɛ n nyá yi i ɲu fite fofoe nu, ama, sanɲa n bo ya Mibiɛ Yesu bá ni, na i fita kun i, na i baawa n dɛɛ wein n gusu yó i ɲgbɛɛn.

⁹ To, kabo sɔnɔtiɛ ni bá ba n yaa. I bá ni Sitana dɛɛ yiko n na i bá yo alekutura sam beberebe fa dadaka minɛm ka nyini sam fite Nyɛmɛ do ɔ,

¹⁰ na i bá bu kɔrɛ ɲgbɛɛnɲgbɛɛn barasu barasu dadaka minɛm bo bu ɲɔɔ ka ɲgbɛɛn ni. Bu ɲɔɔ ka ɲgbɛɛn, dama ba koro má ka bu su atin n bo i ti nahɔrɛ n su na bu nya tiide.

¹¹ Nyini ti, na Nyɛmɛ tá bu nyi, adena bu yódeke kɛrɛ bo i ti kɔrɛ n yarada.

¹² Nyini minɛm sɔ, bo ba yo má nahɔrɛ n yarada ni, ama, na ba fa satieyo acici bu tii ni, Nyɛmɛ dí bu jɔrɛ na i cín bu sui.

Kabo Nyɛmɛ ayi am ka am nya tiide ni

¹³ Ya ninbaam, amberɛ bo Mibiɛ n koro am ni, wɔ yo daka ka ya da Nyɛmɛ asi amberɛ dɛɛ ti sanɲa kɛrɛ, dama fite bumboori n ye Nyɛmɛ yiiri am ka am nya tiide a. Deke bo i ma am nya tiide n la ka, Awiewie Casi ni ma am yo Nyɛmɛ minɛ casim a, na am bita nahɔrɛ atin, na am yo yarada.

¹⁴ Labari kpa n bo ya kan kereeri am na am deerɛ n dɛɛ ti, ye Nyɛmɛ fereeri am ka am nya tiide a, na am nyá ya Mibiɛ Yesu Kristo dɛɛ jirima woowa n be.

¹⁵ Nyini ti, ya ninbaam, am bita nahɔrɛ atin n kenken, bo ya kaanri i na ya kerɛeri i maari am ni, má am kaaki am sin bo i.

¹⁶ Ya sere ya Mibiɛ Yesu Kristo ni i tii, ni ya Si Nyɛmɛ, yiri bo i koro ya, na i dɛɛ ahɔrɔma n nu, na wɔ ma ya ahoresi sanɲa kɛrɛ, ni tama kpiri ni,

¹⁷ ya sere bu ka bu ma am ahoresi buka su, na bu ma am fanɲa, na am yo sakpa, na am jɔjɔ jɔrɛ bo i kɔ atin su sanɲa kɛrɛ.

3

Am sere Nyɛmɛ ma ya

¹ Ya ninbaam, jɔrɛ bo wɔ ka n la ka, am sere Nyɛmɛ ma ya, na Mibiɛ n labari kpa n sandi bara ye ndende na bu de i ni jirima, kabo am deerɛ i ni.

² Am kaaki sere Nyɛmɛ, na i yí ya fite minɛ tiɛm saa nu, dama má sɔnɔ kɛrɛ yo labari kpa n yarada a.

³ Ama, Mibiɛ n la dabuɲu, yiri má am fanɲa, na i yó am kanda bo Sitana koro yo má am pui.

⁴ Ya Mibiɛ n ama ya ahoresi ka am suyo deke n kɛrɛ bo ya ma am nɔɔ ka am yo i ni, am kɔ su suyo i sanɲa kɛrɛ.

⁵ Ya sere Mibiɛ n ka i ma am si kabo Nyɛmɛ koro am barasu, ni kabo Kristo mindiiri barasu ni.

Wɔ yo daka ka sɔnɔ kɛrɛ yo juma

⁶ Ya ninbaam, ya maari am nɔɔ ya Mibiɛ Yesu Kristo dɛɛ duma n nu ka, má am fa am ɲu gɔ ya ninbaam bo bu koro má ka bu yo juma, na bu ti nviɛyafom n ɲu, ba kete ka bu su má nɔaniɛ n bo ya fa maari am n su lɛɛ.

⁷ Ambɛɛ ni am tii si tenle su ka, i ti ye ni ka am yo kabo ya yo ni. Am si ka sanɣa bo ya woori am dɔ ni, ya yo ti má nviɛyafom.

⁸ Ya di má sɔnɔ be diire ɲgbɛɛn. Ama, ya yoori juma wɔ nahɔɛ su, wiesu ni kɔɲɣɛ, adena má ya bo be kaari.

⁹ Ya yoori sɔ ni, i ti má ka ya la má atin bo ya se ka am buka ya a, ama, ya yoori sɔ, adena am ɲu i na am gusu sɔn ya su wɔ.

¹⁰ Sanɣa bo ya woori am dɔ ni, ya maari am ahin nɔɔ ni, ka, sɔnɔ kɛɛ bo i kete ka i yo má juma, má am ma i na i di.

¹¹ Má pui ti ye ya se sɔ a, dama ya ti labari ka am nbem wo bɛɛ bo bu ti nviɛyafom wɔ, bu yo má juma be, se bu nati ɲgbɛɛnɲgbɛɛn wɔ, na bu sufa bu nɔɔ bɔ minɛm jɔɛ nu.

¹² Nyini ti, ye ya sutu bu fɔ ni anyumboro su ya Mibiɛ Yesu Kristo dɛɛ duma n nu n a, ka, bu yo anie tara bu ɲu, na bu yo juma na bu koro bita bu ɲu.

¹³ Ama, ya ninbaam, ambɛɛ yiri, má am ma am ɲuniɛ yɔɔɔki am ni sakpayo.

¹⁴ Sɔnɔ kɛɛ bo i keteeri nɔaniɛ n bo ya kɛɛ i ahin kadasi n nu afa ama am ni, am yi kɔɛsi na am si i mi. Má am dodo i mi, adena nyinɛ ti i.

¹⁵ Ama, má am fa i mi yo am kpɔfɔ, am tu i fɔ ka am niwa a.

Awieeri su dɛɛ anɛ yoowa

¹⁶ Ya sere Mibiɛ n ni i tii, yiri bo i ma ahoreda ni, ka, i ma am ahoreda sanɣa kɛɛ fa kɔ deke kɛɛ nu, na i wo am kɛɛ dɔ.

¹⁷ Mini Pɔɔlu ni m tii sufa m saa sukɛɛ ahin kɛɛɛwa n bisa am dɔɲɣu a. Kabo sanɣa kɛɛ na m kɛɛ lɛɛ.

¹⁸ Ya Mibiɛ Yesu Kristo buka am kɛɛ.

Pɔɔlu kadasi ciciri su bo i kerε fa maari TIMOTI ni

¹ Mini Pɔɔlu sukere ahin kadasi n a. M ti Yesu Kristo jaramasa a, Nyeme bo i ti ya Tiidefɔ ni, yiri ama m nɔɔ ka m yo nyini juma n a, i ni Yesu Kristo bo i ma ya tama ni.

² M sukere ahin kadasi n ma wɔɔ Timoti wɔ, a ti ka m wa a nahɔre su, dama mini ni wɔɔ yo yarada kun wɔ. Ya Si Nyeme, ni ya Mibie Yesu Kristo buka u, na bu si u aɲunfɔ, na bu ma u ahoreda.

Am si am ɲu sa ni minem bo bu kereewa kɔ má atin su ni

³ M koro ka a wo Efeso mie kpiri n nu, kabo sanɲa bo m sukɔ Makedoniya dɛɛ awɔre n nu na m seeri u ni. Mine nbem wo dɔ bo bu kereewa kɔ má atin su, i ti ye ni ka a ma bu nɔɔ ka bu yaki nyini kereewa ni.

⁴ Se bu na bu yaki kɔre jɔrem, ni nana dumam beberebe ni. Nyini jɔrem fa akuruwa ba a. Bu koro buka má sɔnɔ na i yo deke n bo Nyeme koroori ka i yo i. Be koro yo má kabo Nyeme koro, má ka i mi ayo i yarada.

⁵ Deke n bo i ti na m maari u ahin nɔanie n la ka, i fa koro ba a, nyini koro n fite ahorembaa fofoe wɔ, ni sunsunni kpa, ni yarada nahɔre su.

⁶ Nyini mine n nbem amini ahin kereewam ni, na bu subo anzama ɲgbɛɛɲgbɛɛn.

⁷ Bu koro ka bu yo Nyeme nɔanie kerefɔm, bu kan i ni ahoresi wɔ, ama, bere ni bu tii si má bu tieɲgu nɔanie jɔjɔwa n bu.

⁸ Ya si ka Nyeme nɔanie kpamaawa ni ti kpa a, nzen ya bitaari i kabo i ti ye ni ka ya bita i ni.

⁹ Ya kaaki si nu ka, ba fa má nɔanie kpamaawa n ase má sakpayofɔm n ti wɔ, ama, ba fa ase ama minem bo bu ma má Nyeme nɔanie kpamaawa n jirima n wɔ, ni bo bu kete i ni, ni bo bu soro má Nyeme ni, ni bo bu nati yo satie ni, ni bo bu woowa ti má casi ni, ni bo bu bu Nyeme ɲgbɛɛn ni, ni bo bu nati kun mine ni, ni bo bu kun bu nim ni bu sim mmɔɔ ni.

¹⁰ Fa kɔ bo bu nati yo sakaraya ni, ni bo bu nati fa bu ɲu kaaki ka nbaram na bu ni bu beɲgu nbiesɔm sanɲa da ka bara ni biesɔ dɛɛ su ni, ni bo bu tara minem fanɲa tɔ bu ni, ni bo bu bu kɔre ni, ni bo bu di kɔre daani ni, ni sa kerε bo i kɔ má kereewa kpa atin su ni, bere kerε dɛɛ ti, ye ba fa nɔanie kpamaawa n ase n a.

¹¹ Nyini kereewa n fite Nyeme labari kpa n nu wɔ, bo Nyeme afa ama m ka m kan kere minem ni. Labari kpa n ti Nyeme kpiri n dɛɛ wɔ, yiri ti ye ni ka minem kansi i a.

Pɔɔlu daari Nyeme asi fa kɔ kabo Nyeme siiri i aɲunfɔ ni

¹² M da ya Mibie Yesu Kristo asi ka, yiri ye wɔ ma m fanɲa, na m koro yo m juma n a. M da i asi ni kabo wɔ bu m ka m la dabuɲu, na wɔ yi m ka m su i ni,

¹³ haari ni bo m yo jɔjɔ wuraari i ɲgasi nu, na m kpiɛeri i nzukɔ, na m kereeri i wuwuruwa ni, ama, nyini n kerε ni, Nyeme siiri m aɲunfɔ ɔ, dama m yo nya yo má i yarada, nyini ti, m yo si má sa bo m yo i ni.

¹⁴ Na yiri Mibie n ama ma di i ahɔrɔma akɔ asin su, na wɔ ma ma yo i yarada na m koro minem, kabo ya ni Yesu Kristo ayo kun n dɛɛ ti.

¹⁵ Ahin nɔaniɛ n ti nahɔrɛ wɔ, i ti ye ni ka sɔnɔ kɛrɛ de i ni bu saa nnyɔ, yiri la ka, Yesu Kristo baari durunya n nu ka i ba de satieyofɔm tii ji wɔ. Mini ti sɔnɔ bo m satie taraari sɔnɔ kɛrɛ dɛɛ a.

¹⁶ Ama, Nyemɛ siiri m aɗunfo. I yoori sɔ ɔ, adena Yesu Kristo koro kere kabo i la sawɔrɛ beberebe ni mini bo m satie sunnu taraari sɔnɔ kɛrɛ dɛɛ ni. I yoori nyini sɔ ɔ, adena i fa m fa kere minɛm bo bu ba ka sin ni, na bu yo i yarada nya ngɔɔ bo i la má awieeri ni.

¹⁷ Yiri ti Fɛmɛ Kpiri a, na i fɛmɛya n la má awieeri, i wo bɛrɛ wɔ sanɗa kɛrɛ, na be gusu koro ɗu má i, yiri ngumi kpein ti Nyemɛ a, i ti ye ni ka minɛm kɛrɛ kansi i na bu ma i jirima. Ami.

¹⁸ M wa Timoti, m sufa ahin nɔaniɛ n fa wura u saa n nu wɔ lɛɛ, i su kabo Nyemɛ nɔaniɛ kanfɔm du mɔ jɔjɔri i fa kɔ u dɔ n su wɔ. Fa nyini nɔaniɛm ni yo ka u biesɔya nɛngem na a fa kun lue nyunyumi,

¹⁹ na a bita u yarada ni sunsunni kpa. Nbem akete ka bu fa má sunsunni kpa na bu yo sa bo i kɔ atin su, nyini ti, bu yarada bo bu yo yoori i ni aka ngbɛɛn.

²⁰ Bɛrɛ nbem la Himenasi ni Alekizanda, bɛrɛ ye ma fa bu awura Sitana saa nu ka i kere bu ngɔnlɛ, adena bu sɔnsɔn kabo má bu wura Nyemɛ ngasi nu kun.

2

Kabo i ti ye ni ka ya su Nyemɛ barasu ni

¹ Deke bo i du mɔ la ka, m susere am ni anyumboro wɔ, ka, am sere Nyemɛ ma minɛm kɛrɛ, fa kɔ deke bo i ti bu miɛɛwa su, na am da i asi fa ma sɔnɔ kɛrɛ.

² Sere Nyemɛ ma nfɛmɛm, ni bo bu wo yiko woobiri n kɛrɛ, na ya koro wo ni tanalaifɛ, na ya woowa kere ka ya su Nyemɛ atin n su ni nahɔrɛ, na ya wo jirima wo ni ya beɗgu.

³ Nyini nyemɛsere n ti kpa a, na i sun Nyemɛ nu, yiri ti ya Tiidefo a.

⁴ Yiri koro ka sɔnɔ kɛrɛ nya tiide a, na bu si nahɔrɛ atin ni.

⁵ Dama ya kɛrɛ si ka

Nyemɛ kun n kpein wo bɛrɛ a,

na sɔnɔ kun be gusu wo bɛrɛ

bo i yo adamande ni Nyemɛ afien dɔɗgu a,

yiri la Yesu Kristo,

⁶ i wu maari adamande na i de bu kɛrɛ tii ji.

Kabo i yoori sɔ n kere ka, sanɗa bo Nyemɛ koro ka i de adamande kɛrɛ tii ji lɛɛ.

⁷ Nyini ti ye Nyemɛ yiiri m ka m ba yo Yesu jaramasa, na m kan i labari kpa n kere minɛm bo bu ti má Yudafɔm ni, na m kere bu kereewam bo bu ti nahɔrɛ ni. M sukan nahɔrɛ wɔ, m bu má kɔrɛ.

⁸ Deke kɛrɛ bo Kristo jamam tien bu nɔɔ, m koro ka nbiesɔm ye bu saa su sere Nyemɛ. Nyini nbiesɔm ni, i ti ye ni ka bu nyemɛsu kɔ atin n su, na má yaafa wara akuruwa be wo bu ahore su.

⁹ M koro ka nbaram gusu di sunɗuruya nyunyumi, bo i sɛ su. I ti má ye ni ka bu di bu tiɗmie sunɗuruya kɔ sin su, na má bu wura sika, wara aferem bo bu la gɔ agaya, wara suturam bo bu la gɔ agaya.

¹⁰ Ama, bu nyumi kɛrɛ fite bu sakpa yoowa a, kabo i ti ye ni ka nbaram bo bu se ka bu su Nyemɛ atin n su n yo ni.

¹¹ I ti ye ni ka nbaram mɔ bu nɔɔ na bu yo bu ɗu benlɛ, na bu so bu sui ti kereewam bo i ti ye ni ka bu sɔnsɔn i ni.

¹² M soro má su na bu kere nbiɛsɔm kereewam, wara bu la yiko nie nbiɛsɔm su. Bu dɛɛ la ka, bu mɔ bu nɔɔ.

¹³ Dama Nyemɛ du mɔ yiiri Adam wɔ ka, ye i nya ba yiiri Awa.

¹⁴ Má Adam ye woo dadakaari i a, ama, i dakaari Awa wɔ, na wɔ kete Nyemɛ nɔaniɛ ni.

¹⁵ Ama, nzen nbaram laari yarada, ni koro, ni wo casi, na bu bita bu ɲu nyunyumi sanɲa kɛɛ, bu nyá bu tiide fite bu baawu nu.

3

Kristo jama n mɔfɔm ni bukafɔm jɔɛ

¹ Ahin nɔaniɛ jɔjɔwa n ti nahɔɛ wɔ, ka, sɔnɔ kɛɛ bo i boro i nyi na i yo Kristo jama n mɔfɔ, i mi koro juma kpa lɛɛ.

² Kristo jama n mɔfɔ ni, wɔ yo daka ka má i la ɲgasi be, na i ja bara kun n kpein, na i bita i ɲu, na i la tarabuɲu, na i yo sa bo i la anyunuyi. I ti ye ni ka i de wɔfɔm, na i koro kere minɛm Nyemɛ nɔaniɛ nyunyumi.

³ I ti má ye ni ka i nu nzan agaya, wara i ti aluwa korofɔ, ama, i yo i ɲu benlɛ, na i koro tanalaifɛ. I kaaki ti má ye ni ka i koro ɲwaa agaya.

⁴ Wɔ yo daka ka i koro bita i awurufɔm nyunyumi, na i ma i nbaam de i nɔaniɛ na bu ma i jirima deke kɛɛ nu.

⁵ Dama nzen sɔnɔ koro bita má i awurufɔm, i mi yo sɛ koro bita Kristo jama n a?

⁶ I ti má ye ni ka i mi ti Yesu susufɔ fɔfɔɛ, adena má i wura i ɲu kpiri na Nyemɛ di i jɔɛ yo i ɲgbɛɛn kabo i yoori Sitana ni.

⁷ Wɔ kaaki ayo daka ka i mi ti sɔnɔ bo minɛm bo bu ti má Kristo jama n nufɔm ma i jirima, adena, má Sitana nya i taraabiri na i yo sa be bo i di nyinse.

⁸ I ti sɔ ɔ fa kɔ Kristo jama n bukafɔm gusu dɔ. Wɔ yo daka ka bu ti minɛm bo bu la anyunuyi, na má bu yo anɔɔ nnyɔ nnyɔfɔm, na má bu nu nzan agaya, na má bu nyunu boro ɲwaa kpini su.

⁹ Wɔ yo daka ka bu subita Kristo jama n kereewa n bo Nyemɛ ayi akere n kenken, na bu la má ɲgasi be bu sunsunni nu.

¹⁰ I ti ye ni ka bu du mɔ fiiti bɛɛ Kristo jama n bukafɔm ni na bu niɛ. Na nzen bu la má ɲgasi be, am ma bu yo bukafɔm n juma ni.

¹¹ I ti sɔ ɔ nbaram gusu dɔ. Wɔ yo daka ka bu ti minɛm bo bu la anyunuyi, na má bu susaaki mine duma. Wɔ yo daka ka bu bita bu ɲu, na bu la dabuɲu deke n kɛɛ nu.

¹² Kristo jama n bukafɔ, i ti ye ni ka i ja bara kun n kpein, na i koro bita i nbaam, ni i dikafɔm nyunyumi.

¹³ Nyini bukafɔm bo bu yo bu juma na i kɔ atin su ni, bu kpini duma kpa ma bu ɲu wɔ, na bu kaaki koro jɔjɔ ni ahoresi kabo bu yo Yesu Kristo yarada ni.

Kereewa n bo Nyemɛ ayi akere Kristo jamam ni

¹⁴ Kabo m sukɛɛ ahin kadasi n ma u ni, m la tama ka m bá u dɔ kisa.

¹⁵ Ama, nzen haari ma ba aba má nde, ahin kadasi ni má a si kabo wɔ yo daka ka Nyemɛ minɛm wo ti barasu a. Bɛɛ ti Kristo jama n a, yiri n bo i wo bɛɛ sanɲa kɛɛ n dɛɛm a, bɛɛ bita i kereewa n bo i ti nahɔɛ n kenken a, kabo sɔɔ fa seewa n ni i jantaraka n bita i kenken ni.

¹⁶ Be koro kete má ka ya nyemesu atin n bo i wo asiri nu la má anusu, ka o,

“Na wɔ kaaki adamande ayi i ɲu fofoe nu.

Na Nyemɛ Awiewiɛ Casi n akere ka wɔ yo sa bo i sun Nyemɛ nu.

Na Nyeme merɛkem anu i.

Na i susufom n ako ajojo i jore durunya n kere nu.

Na durunya n nufom dongu ayo i yarada.

Na Nyeme afa i ako awo i bi angoro, jirima kere woobiri ni.”

4

Nɔaniɛ barasu barasu bo Pɔɔlu fa maari Timoti ni

¹ Awiewie Casi n ajojo wein ka, ahin awieeri su sanɔa n bo ya wo nu ni, mine nbem yaki bu yarada atin ni, na bu su ajinim bo bu dadaka minem su, ni bu kereewam ni.

² Nyini kereewam so fite minem bo bu ti dadakafom na bu nati bu kore n do o, bo bu sunsunni akaaki haari na bu yo satie mmoo, na bu sunsunni ma ma bu ka ba yo satie.

³ Nyini minem so kere minem wo, ka, ma bu ja ajaa, na ma bu kaaki di diire barasu nbem. Ama, Nyeme ayi nyini diirem n ka ya di bu wo, nyini ti, yere bo ya yo i yarada na ya si kabo nahore atin n ti barasu ni, i ti ye ni ka ya sere Nyeme, na ya da i asi ka, na ya nya di bu.

⁴ Deke kere bo Nyeme ayi i ti kpa a, deke be wo ma bere bo ya kete i, ama, i ti ye ni ka ya de i na ya da Nyeme asi,

⁵ dama Nyeme nɔaniɛ n ni nyemesere ma nyini diire n yo casi wo Nyeme do.

⁶ Nzen a faari ahin kereewam kere ya ninbaam ni, nyini kere ka a ti Yesu Kristo amususufo kpa. Nyini kereewam bo a du mo ade bu ni, na a yo bu yarada, na a si ka bu ti nahore, na a su bu su ni, bu ti ka diire bo i ma u fanga n wo.

⁷ Ama, kete jore ngbeenngbeen bo bu ko ma Nyeme atin su ni, na a boro u nyi na a sonson sa bo i ko Nyeme atin n su nahore su.

⁸ Dama sa bo a boro u nyi yo i na i buka anuniembaa n fanga n la kperɛ kaan, ama, nzen a boro u nyi yo Nyeme dee atin n su sa, i la kperɛ beberebe, nyini ma a si ka a nya deke kpa kisa, na a kaaki nya deke kpa buka su fa ko fa ba.

⁹ Nyini nɔaniɛ n ti nahore wo, bo i ti ye ni ka ya de i na ya yo i yarada.

¹⁰ Nyini dee ti, ye ya boro ya nyi, na ya yo juma ni nahore su, dama ya daafi Nyeme nu, yiri wo bere sanɔa kere a, yiri ti mine kere Tiidefo a, maala bo bu yo i yarada ni.

¹¹ Fa ahin kereewam n fa kere bu, na a ma bu su bu su.

¹² Ma a ma be bu u ngbeen ka a ti gbefene n dee ti, ama, ma yaradayofom ni nu u sayoowam na bu son u su. Bere la u nɔaniɛ jooowa, ni deke bo a yo i, ni kabo a koro minem ni, ni u yarada n bo a la i ni, ni u woowa casi ni.

¹³ Yo anie na a sukan Nyeme Jore Kadasi n na Kristo jama n ti, na a sukan Nyeme jore, na a sukere minem Nyeme atin ni, na m nya ba.

¹⁴ Ma a ma u wara fi aceeri n bo Awiewie Casi n fa maari u ni, sanɔa bo i nɔaniɛ kanfom jooori na Kristo jama nkpienkpienm faari bu saa nanaari u nu sereeri Nyeme maari u ni, ma u cee wo i nu, na a fa i yo juma.

¹⁵ Yo ahin juma ni anyumbo na a fa u nu ma nyinim kere, adena minem kere nu kabo u nyemesu n ko atin su barasu.

¹⁶ Si u nu sa ni u kereewam ni. Ko su suyo ahin sam ni, dama nzen a nya yoori so, woro ni minem kere bo bu ti u nɔaniɛ ni nya tiide.

5

Kabo i ti ye ni ka Kristo jama n mɔfɔ n bita i jama n barasu ni

¹ Má a tien kpien ɲu, ama, jɔjɔ i dɔ kabo a jɔjɔ u si dɔ ni, na a tu ngbefenem fɔ ka u ninbaam,

² na a fa nbara nkpienm yo ka u nim, na a fa tarawam ni nsungurum yo ka u ninbaam, na u ni bere wo ni ahorembaa casi.

³ Bita nkunafɔm bo bu la má bukafɔ be n ni jirima.

⁴ Ama, nzen kunafɔ la nbaam, wara anumam, i ti ye ni ka bu sunie i dika kabo Nyeme koro ni. Nyini kere ka, bu sufa bu wufɔm ɲkatɔ tɔ bu kaari wɔ lɛɛ. Dama nyini n sɔ yo Nyeme fie a.

⁵ Nzen kunafɔ wo i ɲgumi na i la má bukafɔ be, wɔ fa i tama kere awura Nyeme saa nu lɛɛ. Na i susere Nyeme jande wiesu ni kɔɲgue ka i buka i.

⁶ Ama, kunafɔ kere bo i nati yo i kunnu koroowa, haari ni bo i la ɲɔɔ mmɔɔ ni, i ti ka wɔ wu wɔ lɛɛ.

⁷ Fa ahin kereewam kere kere nkunafɔm, ni bu dikafɔm, adena má be ɲu bu ɲgasi.

⁸ Ama, nzen be cɛcɛ wo má nu ka i nie i lamɔsim dika, maala i dikafɔm, i ti ka i mi akete Kristo atin n lɛɛ. Nyini sanɲa ni, sɔnɔ bo wɔ yo má yarada tara i mi co lɛɛ.

⁹ Kunafɔ kere bo wɔ nya ju má afɔ aburasen, má a kere i duma buka Kristo jama nkunafɔm su. Bekun, na i ti bo wɔ du mɔ aja biesɔ kun wɔ,

¹⁰ na minem di i daani ka i yo sakpa a, má pui ti, i ti bo wɔ ta nbaam ataari kpa, na wɔ de wɔfɔm i dika, na wɔ yo i ɲu kaan ka i su Nyeme minem, na wɔ buka minem bo bu woori kekereke nu, na wɔ su amusui kpa.

¹¹⁻¹² Ama, nkunafɔm bo bu nyunu nya ti má ni, má a kere bu duma buka nkunafɔm n su, dama nzen ajaa konvi ba wuraari bu na bu koro ka bu kaaki ja ajaa, nyini sanɲa, sesesu bo bu faari i na bu diiri i di ni Kristo ni, bu koro su má i su ni nahɔre su lɛɛ, bu yaki i wɔ, na bu kaaki bu sin bo Kristo lɛɛ. Nyini ti ye Nyeme dí bu jɔre cin bu sui a.

¹³ Bekun, nyini ma bu koro ba yo nviɛyafɔm na bu ba sunati awuru awurum nu, i ti má ka bu yo nviɛyafɔm ɲgumi wɔ, ama, na bu sukpara tere, na bu sufa bu nɔɔ suwura minem jɔre nu, na bu sujɔjɔ jɔrem bo wɔ ti má ye ni ka bu jɔjɔ bu.

¹⁴ Nyini ti, mini dɔ, nzen nkunafɔm toko ti tarawam, i ti ye ni ka bu ja na bu wu nbaam, na bu bita bu awurum, na má ya kpɔfɔm koro ɲu ɲgasi be bo bu koro nya atin jɔjɔ ya ɲgbɛɛɲgbɛɛn kabo bu koro.

¹⁵ Dama nkunafɔm nbem adu mɔ akete Kristo atin n asu Sitana su.

¹⁶ Ama, Kristo susufɔ bara kere bo nkunafɔm wo i dika, i ti ye ni ka yiri ni i tii nie bu dika, na má bu fa bu fie fie Kristo jama n ni, adena Kristo jama n koro nie nkunafɔm bo bu la má bukafɔ be fieo n su.

¹⁷ Kristo jama ni nkpienkpienm bo bu yo mɔfɔ juma nyunyumi ni, i ti ye ni ka bu nya bu ɲkatɔ busu nnyɔ, maala bere bo bu yo bu juma ni anyumboro ka bu kan Nyeme jɔre na bu kaaki kere minem Nyeme atin n ni.

¹⁸ Dama ba kere i Nyeme Jɔre Kadasi n nu ka, “Nzen a bita toora subobo ɲgani, má a cici i nɔɔ.” Na ba kaaki akere ka, “I ti ye ni ka jumayofɔ nya i ɲkatɔ.”

¹⁹ Má a se ka a de jɔre be bo ba kpie asɔ Kristo jama n bukafɔ n kpien be, má ka mine nnyɔ, wara nsan adi jɔre n daani ka i ti nahɔre.

²⁰ Ama, bo bu yo satie ni, se bu nahɔre jama n kere nyunu, adena nyingam kere soro sere.

²¹ M suma u nɔaniɛ lɛɛ, Nyɛmɛ ni Yesu Kristo ni mɛrɛkɛm kɛrɛ nyunu, ka, a de ahin kereewam ni, na mǎ a fa tantambunu, wara mǎ a koro be tara be fa kɔ deke kɛrɛ bo a yo i n su.

²² Mǎ a koro nde na a fa u saa nana sɔnɔ be ɲu, na a sere Nyɛmɛ ma i mi ka i yo Nyɛmɛ juma, mǎ a ma u saa n wo be dɛɛ satie yoowa n nu. Ma u woowa yo casi.

²³ A la mǎ laifie sanɣa sanɣa n dɛɛ ti, mǎ a nu nzue ɲgumi, ama, nu nzan mmɔɔ kaan, na i buka u fa kɔ akunnuyaari n bo i yaki mǎ u ni.

²⁴ Mine nbem satie yoowa kɛrɛ kaba da fofoe nu wɔ, na sɔnɔ kɛrɛ ɲu i, nyini satiem ye Nyɛmɛ fá di bu jɔrɛ a, ama, na nbem gusu dɛɛ satie bo bu yo i bá fite fofoe nu kasin.

²⁵ I ti sɔ ɔ lɛɛ bekun, sakpa ti deke bo sɔnɔ kɛrɛ ɲu i fofoe nu wɔ, na nzen haari sakpa bo i wo mǎ fofoe nu ni mmɔɔ, i ti deke bo bu koro fie mǎ i.

6

¹ Kristo jama nbaam bo bu ti akɔɔm ni, i ti ye ni ka bu ma bu mibiɛm jirima nyunyumi, adena be koro saaki mǎ Nyɛmɛ duma, wara ya kereewam ni.

² Akɔɔm bo bu mibiɛm gusu ti yaradayofɔm ni, i ti mǎ ye ni ka bu bu bu mibiɛm ɲgbɛɛn ka bu kɛrɛ ti yaradayofɔm n ti, ama, i ti ye ni ka bu su bu tara mibiɛm bo bu ti mǎ yaradayofɔm ni, dama bɛrɛ n bo bu sudi bu amusui n kperɛ n ti bu ninbaam bo bu koro bu wɔ.

Kereewa bo i kɔ mǎ atin su ni ɲwaa koro awaraye jɔrɛ

Fa ahin kereewam n kan kere u jama n na a se ka bu yo bu.

³ Mine nbem wo bɛrɛ bo bu kere kereewa nbem bo bu ni ya dɛɛ n ti mǎ kun, na bu sunsun ka ya Mibiɛ Yesu Kristo dɛɛ nɔaniɛ kereewam n ti kɔrɛ wɔ, na bu kereewam kaaki su mǎ Kristo dɛɛ atin n su.

⁴ Nyini minɛm n ti kpirikorofɔm wɔ, na bu kaaki si mǎ pui. Na bu la sunsunni tie, na bu se akuruwa ni minɛm fa kɔ nɔaniɛ kereewam bu. Nyini ma bu si kɔrɛ a, na bu di aluwa, na bu kpie bu benɣu nzukɔ, na bu la sunsunmase fa kɔ bu benɣu dɔ,

⁵ na bu nati suse akuruwa. Bu la mǎ sunsunni kpa, na nahɔrɛ wo mǎ bu dɔ. Na bu sunsun ka nzen sɔnɔ su Nyɛmɛ atin su, i nyá kperɛ wɔ.

⁶ I ti nahɔrɛ wɔ, sɔnɔ kɛrɛ bo i nyunu yi deke bo i la i, na i su Nyɛmɛ atin su, i mi nyá kperɛ Nyɛmɛ dɔ.

⁷ Dama ya fa mǎ pui aba mǎ durunya n nu fɛn. Ya kaaki koro fa mǎ pui fite mǎ fɛn.

⁸ Nyini ti, nzen ya la diirem ni suturam, i ti ye ni ka ya nyunu yi bu.

⁹ Ama, minɛm bo bu nyunu aboro nenɣe kpini su agaya, na bu koro ka bu nya ajɛke beberebe ni, bu nyini nenɣe koro n sɔ bu ɲɣɛɛ wɔ, na i nya bu taraabiri fa kɔ bu konvikiya sunsunni ɲgbɛɛnɲgbɛɛn n su. Nyini ma bu kpaasi a, na bu ka ɲgbɛɛn.

¹⁰ Dama ɲwaa koro awaraye ti satie kɛrɛ bunlui a. Nbem wo bɛrɛ bo bu koro ɲwaa agaya, nyini sɔ ma bu kaaki bu sin bo Kristo atin n wɔ, na i fa bu wura ahoresaaki bambaka nu.

Kabo Pɔɔlu maari Timoti nɔɔ ka i yo i juma barasu ni

¹¹ Ama, wɔrɔ Timoti, a ti Nyɛmɛ sɔnɔ ɔ, nyini ti, i ti ye ni ka mǎ a dodo nyini sam kɛrɛ be. Boro u nyi na a yo sa bo i kɔ atin su, na a su nyɛmɛsu atin n su, na a yo i yarada, na a koro minɛm, na a la mindi, na a wo benle.

¹² Boro u nyi na a tu ɲgoni kpa bita u yarada n kenken. Nyini mǎ a di nasara, na a nyá ɲɔɔ n bo i la mǎ awieeri ni, ahin ɲɔɔ n ye Nyɛmɛ

fereeri u ka i fá ma u a, na wɔɔ ni u tii diiri i daani mine beberebe nyunu ni.

¹³ Nyeme ma deke n kere ngɔɔ a, na Yesu Kristo gusu jinaari Gomina Pɔntiyo Pilato nyunu diiri daani kpa, nyini dɛɛ ti ye m suma u nɔɔ Nyeme ni Yesu Kristo nyunu n a,

¹⁴ ka, a yo u juma n bo Nyeme afa ama u n ni nahɔre su, na u woowa ti casi na má be koro ɲu u ngasi be, haari fa kɔ ju cɛɛn n bo ya Mibiɛ Yesu Kristo bá kpie i nyi ba ni.

¹⁵ Nyeme afa nyini saɲga n bo i koro ka Yesu ba n afa ase, nyini saɲga n juuri, ye Nyeme má i ba a. Yiri ngumi niɛ deke n kere su ye kansu wo i do a. Yiri ti nfeme ngbingbirim kere Feme a, na i ti mibiɛm kere Mibiɛ.

¹⁶ Yiri ngumi kpein wo bere saɲga kere a, na i woobiri n bo i wo n ti wein wɔ, na be koro dodo má nyini wein ni. Be nya ɲu má i cɛɛn be da, be gusu koro ɲu má i wɔ mmɔɔ cɛɛn be cɛɛn be. I dɛɛ la jirima ni faɲga, saɲga kere. Ami.

¹⁷ Se bo bu la ajɛke durunya n nu fen n ka má bu fo, na má bu fa bu tama gɔ nyini ajɛkem bo bu ce má n ɲu, ama, bu fa gɔ Nyeme ɲu, yiri bo i ce ya deke n kere kɔ sin su n na ya fa yo ya koroowa ni.

¹⁸ Se bu ka bu yo sakpa dɔɲgu, na bu ce aceerim, na deke kere bo bu la i, na bu sukpaaki nu ma nyiɲgam.

¹⁹ Nzen bu nya yoori sɔ, i ti ka ba tien ajɛke nɔɔ abo i bu afa ase fa kɔ fa ba lɛɛ, adena bu nya ngɔɔ n bo i ti ngɔɔ nahɔre su ni.

²⁰ Timoti, niɛ deke bo Nyeme afa ama u ka a niɛ i dika n su nyunyumi. Cin u ɲu yaki minem bo bu jɔjɔ jɔjɔowa ngbɛɛnngbɛɛn na bu bu má Nyeme, na bu sunsun ka bu si wɔ, ama, bu si má pui.

²¹ Dama nbem afun ajina su ka bu la si, nyini dɛɛ ti, ba mini Kristo atin ni.

Nyeme buka am kere.

Ɖɔɔlu kadasi nnyɔ su bo i kɛɛ fa maari TIMOTI ni

¹ Mini Ɖɔɔlu sukɛɛ ahin kadasi n a. M ti Yesu Kristo jamarasa a, Nyɛmɛ dɛɛ koroyanu, yiri Nyɛmɛ asunma m ka m kɔ kan kere minɛm kabo i yo seeri ka minɛm bo bu ni Yesu Kristo yo kun ni, bu nyá ngɔɔ.

² M sukɛɛ ahin kadasi n ma wɔɔ Timoti bo a ti ka m wa koroowa n wɔ. Ya Si Nyɛmɛ, ni ya Mibiɛ Yesu Kristo buka u, na bu si u aɗunfɔ, na bu ma u ahoreda.

Kabo Ɖɔɔlu maari Timoti ahoresi ka i yo juma barasu ni

³ M da Nyɛmɛ asi, yiri ye m su i ni sunsunni kpa, kabo m nam yo suuri i ni. M sere Nyɛmɛ sɔ ɔ, kɔngue ni wiesu, na m nati suda i asi ma u.

⁴ M tenge su kabo a yo suunri ni nyunvuin ni, m wara ado u, m koro ka m ɗu u, adena m ahore jɔ.

⁵ M wara fi má u yarada n bo a yo i nahɔɛ su n sa, nyini yarada n gusu ye u nabara Loyisi, ni u ni Yunisi laari i a. Ma yo yarada ka wɔɔ mmɔɔ la i sɔ ɔ.

⁶ Nyini dɛɛ ti, aceeri n bo Nyɛmɛ Awiewiɛ Casi n fa ceeri u ni, sanɗa bo m faari m saa nanaari u ɗu, na m sereeri Nyɛmɛ maari u ni, m koro ka m tenge u su ka a kaaki ye i su fa yo juma.

⁷ Dama Awiewiɛ Casi n bo i fa maari ya ni, wɔ fa ama má ya ka ya yo sɛɛfɔm wɔ, ama, i fa maari ya ka i buka ya faɗa na ya koro minɛm na ya la tarabuɗu wɔ.

⁸ Nyini ti, má a ma nyinse ti u ka a kan Mibiɛ n jɔɛ n kere minɛm, wara má a ma nyinse ti u ka m wo dansaraka nu, Kristo dɛɛ ti. Ama, wɔɔ mmɔɔ di wahara fa kɔ labari kpa n kan su, kabo m diiri i ni, na Nyɛmɛ ma u faɗa na a koro mindi de i.

⁹ I deeru ya tii ji wɔ, na wɔ fere ya ka ya yo i dɛɛ tienɗu minɛm, má ka ya sakpa bo ya yo i n dɛɛ ti, ama, i dɛɛ kunnu koroowa ni i ahɔɔma n dɛɛ ti a. Sanɗa bo i nya yi má durunya ni, ye i yoori ya nyini sakpa n a, Yesu Kristo dɛɛ ti.

¹⁰ Ama, kisa na Yesu Kristo, yiri bo i ti ya Tiidefɔ n aba durunya n nu ni, ya ɗu Nyɛmɛ koro ni. Labari kpa n dɛɛ ti, ya si ka Kristo akunma yiwee faɗa, na ya koro nya ngɔɔ n bo i la má awieeri ni.

¹¹ Nyɛmɛ ayi m ka m yo Yesu jaramasa na m kan Nyɛmɛ labari kpa n kere minɛm,

¹² nyini dɛɛ ti ye m di ahin waharam n kɛɛ n a. Ama, nyinse ti má m, dama m si sɔɔ bo ma daafi i ɗu ni, na labari kpa n bo wɔ fa ama m ni, m si tenle su ka i koro niɛ i su fa kɔ ju haari jina cɛɛn.

¹³ Bitu nɔaniɛ n kɛɛ bo ma kan akere u na i ti nahɔɛ n kenken, na a yo yarada na a koro minɛm, kabo ya ni Yesu Kristo ayo kun n dɛɛ ti.

¹⁴ Bitu labari kpa n nyunyumi. I ti aceeri kpiri wɔ, ye Nyɛmɛ afa awura u saa nu a. Awiewiɛ Casi n bo i wo ya dɔ n buka u, na a bitu i nyunyumi.

¹⁵ A si ka yaradayofɔm kɛɛ bo bu wo Esiya dɛɛ awɔɛ n nu ni, fa sanɗa ni Figelosi ni Hemogenesi n kɛɛ, aɗmati ayaki m.

¹⁶ M sere Nyɛmɛ ka i si Onesifɔɔsi dikafɔm kɛɛ aɗunfɔ, dama sanɗa kɛɛ yiri titi m nyunu a. Nyinse ati má i ka m wo dansaraka nu,

¹⁷ ama, i ba juuri Roma miε kpiri n nu fen ni, i nienieeri m busu wɔ ni anyumboro, haari na wɔ ba aɲu m.

¹⁸ M sere Nyeme ka i si Onesiforosi aɲunfo, jina ceen. Wɔɔ ni u tii kaaki si buka bo i fa bukaari m barasu, sanɔa bo m wo Efeso miε kpiri n nu ni.

2

¹ Nyini dεε ti, wɔɔ m wa, ahɔɔma n bo Yesu Kristo ma a diiri i n dεε ti, mǎ a yɔɔki u ɲu, yo u ɲu kenken.

² Jɔɔ n bo a tiiri i m dɔ, na minε beberebe woori dɔ tiiri i ni, fa wura minem bo bu la dabuɲu n saa nu, na bere gusu koro fa kere nyingam.

³ Kabo a ti Yesu Kristo dεε soja kpa ni, yo siriya na wɔɔ mmɔɔ di wahara n kabo nyingam di i barasu ni.

⁴ Sɔɔ bo i yo soja juma, i cece wo mǎ juma bo i ti mǎ soja juma nu, se i dεε la ka i yo i soja juma a, na i yo i kpien fie.

⁵ Bekun, sɔɔ bo i ɲmati ɲmatiiri ka i nya teremasu na i nya aceeri, mǎ ka i mi asu atin bo bu fa kere nyini dεε ɲmatiirifɔm n su, i koro nya mǎ aceeri ni.

⁶ Dɔdɔɔrifɔ bo i yo juma nahɔɔre su ni, wɔ yo daka ka yiri du mɔ nya diire fɔfɔre n be di a.

⁷ Sunsun fa kɔ deke bo m suse u n su, na Mibiε n buka u na a ti i kere bu.

⁸ Tenɔe su fa kɔ Yesu Kristo jɔɔ n su, ka i fiteeri Feme Davidi dεε busu n nu wɔ, ye i wuuri a, na wɔ tenɔe i yiwee n nu, m labari kpa n lee, sɔ ye m kan i a.

⁹ Labari kpa n dεε ti, ye m di wahara n a, haari ba wura m jɔɔkɔ ase ka m ti satieyofɔ ɔ, ama, Nyeme dεε nɔanie n yiri, i wo mǎ jɔɔkɔ nu.

¹⁰ Nyini ti, minem bo Nyeme ayi bu ka bu ti i dεε minem n dεε ti, ma mindi ade deke n kere, adena bere mmɔɔ nyǎ tiide n bo i fite Yesu Kristo dɔ ni, na i mǎ bu jirima n bo i la mǎ awieeri Nyeme dɔ ni.

¹¹ Ahin jɔɔɔwa n ti nahɔɔre wɔ, bo i ɲa,

“Nzen ya ni yiri sanɔa wuuri,
ya ni yiri bǎ sanɔa nya ɲɔɔ.

¹² Nzen ya mindi suuri i,
ya ni yiri bǎ sanɔa di i femeya n a.

Nzen ya keteeri i,
yiri gusu bǎ kete ya.

¹³ Nzen yere la mǎ dabuɲu,
yiri la dabuɲu wɔ sanɔa kere,
dama i koro kete mǎ i ɲu.”

Kristo jama n mɔfo bo Nyeme da i ɲu ni

¹⁴ Tenɔe u minem su fa kɔ nyini jɔɔem n su, na a se bu ka Nyeme wo u daani, ka mǎ bu se akuruwa fa kɔ nɔanie kereewam bo i la mǎ kperε, i saaki minem bo bu so bu sui ti nyini nɔanie n wɔ.

¹⁵ Boro u nyi na a fa u ɲu ma Nyeme juma na i sun i nu. Na a yo u juma nyunyumi na mǎ nyinse ti u, na a kere kereewa bo i ti nahɔɔre na i kɔ atin su nyunyumi.

¹⁶ Mǎ a so u sui ti jɔɔe ɲgbεenɲgbεenm bo bu kɔ mǎ nyemesu atin su ni, dama i ma minem wo dede ni Nyeme wɔ, na bu yo satie kɔ sin su.

¹⁷ Nyini kereewam sɔ ti ka kambue bo i wie mǎ na i tereki sanɔa kere wɔ. Minε nnyɔm bo bu kere nyini kereewam n la Himenasi, ni Filetosi,

¹⁸ Bere kere ka sangá bo minem wu na bu tenge bu yiwee nu asin n a. Ahin kereewam n ti kore wó, nyini kereewa n so ma mine nbem njunie ayoroki bu fa ko bu yarada bo bu la i n su wó.

¹⁹ Ama, deke bo Nyeme ayi akere i jama ni, i ti ka fa bumboori see-wa a, pui koro kankan má i. Nyini fa bumboori seewa ni, ye ba kere ahin nɔaniem n ago su n a, ka, "Micera n si minem bo bu ti i de minem ni," na "Bo bu na bu ti Micera n de n kere, i ti ye ni ka bu yaki satieyo."

²⁰ Ya si ka awuru kpiri nu la taale ni ayaba barasu barasu kere, bu faari jete ni sika yoori nbem a, na nbem gusu ti baka ni yakati de. Bu fa nbem fa yo juma cɛenkpiri cɛen, na bu fa nbem gusu yo juma cɛen n kere cɛen.

²¹ Nzen sɔno kere bo i yi i nu fiteeri nyini kore kereewam n nu, Nyeme fá i mi yo ka cɛenkpiri ayaba a, dama wó fa i nu ama Mibie ni, na i yo juma kpa bo i kun kperere ma i, má pui ti, wó sese i nu su ka i yo juma kpa ma i Mibie ni.

²² Tara u nu fa ko ngbefenem konviki tie sam su. Boro u nyi, na a yo sa bo i ko atin su, na a yo Nyeme yarada, na a koro minem, na a la tanalaifie, nyini má a buka minem bo bu su Nyeme ni ahore casi n su a.

²³ Ama, má a fa u no bo sinnzinya jorem n nu, ni bisaawa ngbeen-ngbeenm. A si ka nyini n so kpura mine tii wó.

²⁴ Wó yo daka ka má Mibie n akoo n suse akuruwa. I ti ye ni ka i yo aye ma sɔno kere, na i koro fa sawore kere minem Nyeme jore n nyunyumi.

²⁵ Haari minem bo bu se i akuruwa ni mmoo, i ti ye ni ka i fa sawore ni bere, na i kere bu atin bo bu fa i, beni, a nu ka Nyeme má bu kaaki bu wo na bu si nahore atin ni.

²⁶ Nyini ma bu kaaki fa sunsunni kpa na bu nmati fite toroku n nu a, bo Sitana n aso atara bu na i ma bu yo i koroowa ni.

3

Fa ko durunya n awieeri su de jore

¹ M koro ka a si ka, fa ko durunya n awieeri, i yo kekereke.

² Mine yo anyii sam, na bu koro nwaa agaya, na bu fo, na bu sunsun ka bere ngumi wo bere a, na bu kpie mine nzuko, na bu de má bu wufom nɔanie, na bu si má aye, na bu kete Nyeme woowa casi n jore,

³ na bu koro má minem, na bu si má anunfo, na bu saaki minem duma, na bu lá má tarabuɔ, na bu yo wi, na bu kpo deke kere bo i ti kpa.

⁴ Na bu lá má dabuɔ, na bu yo sa bo bu sunsun má bu, na bu lá karambani agaya, na bu koro bu tii di tara nyemesu,

⁵ na bu yo bu nu ka bu su Nyeme atin n su wó, ama, na bu kete Nyeme yiko ni. Má a dodo nyini minem so.

⁶ Bu nbem nati wura awuru awurum nu wó, na bu bo nbaram bo bu la má tarabuɔ n anɔfie na bu su bu su. Nyini nbaram so satieyo akunma bu, na bu yo bu kunnu koroowam.

⁷ Sangá kere bu ti kereewam wó, ama, bu koro si má nahore atin n fieo.

⁸ Kobo Janesi ni Jambaresi yo keteeri jore kere bo Moyisi yo jooori ni, so ye ahin kore kerefom n gusu akete Nyeme nɔanie n a. Bu sunsunni yo má juma, na ba kete yarada atin n su su ni.

⁹ Ama, bu juma koro ko má i nyunu, dama sɔno kere ba si ka bu ti sinnzinm wó, bu si má pui. Kobo mine yo siiri ka Janesi, ni Jambaresi yo ti sinnzinm ni.

Poolu awieeri su de nɔanie bo i fa maari Timoti ni

¹⁰ Ama, wɔɔ yiri, a ɲu m kereewa, ni m woowa, ni m sunsunni bo m taraari i ni, ni m yarada ni, ni m sawɔɔ ni, ni m koro, ni m mindi ni,

¹¹ ni m wuwuruwa bo bu kereeri m ni, ni wahara bo m diiri i n su. A si sam bo bu tuuri m, miε kpirim n bo bu fere bu ka Antiyoki, ni Ikoniyom, ni Lisitira ni, má wuwuruwa lɛɛ ye minem kereeri m a. Ama, na Mibiε n ayi m afite nyinim kɛɛ nu.

¹² Sɔɔ kɛɛ bo i koro ka i su Nyemε atin su na i ni Yesu Kristo yo kun, i mi ɲú wuwuruwa,

¹³ na minε tiem ni kerefɔ kɔɛfɔm yo satie kɔ sin su, bu dadaka minε, na minε dadaka bɛɛ gusu.

¹⁴ Ama, wɔɔ yiri, nahɔɔ atin n bo bu fa kereeri u, na a yoori i yarada nahɔɔ su ni, su i su sɔ, dama a si minem bo bu kereeri u nyini atin ni.

¹⁵ A si ka fite u kaan nu kɛɛ, ye a sɔnsɔnri Nyemε Jɔɔ Kadasi n kɛɛ n ye a siiri i a. Nyini koro ma u alecira a, na a yo Yesu Kristo yarada na a nya tiide.

¹⁶ Nyemε Jɔɔ Kadasi n bo ba kɛɛ i n kɛɛ fite yiri dɔ a, na i la kpɛɛ bo a koro fa kere minem nahɔɔ atin ni, na a fa kan sɔɔ bo i yo satie ndie, na a fa kere sɔɔ atin fa kɔ deke bo i kɔ má atin su, na a fa kere sɔɔ na i yo sa bo i ti kpa.

¹⁷ Nyini n kɛɛ koro ma sɔɔ kɛɛ bo i su Nyemε kpama bi a, na i koro yo juma kpa barasu kɛɛ.

4

¹ M suma u nɔanie lɛɛ, Nyemε ni Yesu Kristo n nyunu, yiri bá di ɲgɔfɔm ni yiweefɔm n jɔɔ a, na i bá di fɛmε na i niε i minem su.

² Boro u nyi kan Nyemε nɔanie ni, sukan i saɲga kɛɛ. Tenge yaradayɔfɔm su fa kɔ kereewa bo i kɔ atin su. Jaraki bu na bu yaki satieyo. Jɔɔ bu dɔ na bu yo sakpa buka su. Na a yo sawɔɔ ni nyini n kɛɛ na a kere bu nyunyumi.

³ Dama fa kɔ fa ba, minem kóro má ka bu so bu sui, na bu ti Kristo kereewa n bo i kɔ atin su ni. Ama, bu súde bu dɛɛ koroowam su wɔ, na bu tɛn kerefɔm dɔɲgu nɔɔ bo bu kere bu dekem bo bu koro ka bu ti i ni.

⁴ Bu káaki bu sin bo nahɔɔ atin ni, na bu só bu sui ti kɔɛ jɔɛm.

⁵ Ama, wɔɔ yiri, tara u ɲu saɲga kɛɛ, na a mindi ni wahara di, na a boro u nyi kan Yesu labari kpa n jɔɔ, na a yo u juma n kɛɛ kabo Nyemε koro ka a yo i ni.

⁶ Mini yiri, saɲga n aju bo bu yí m ɲgɔɔ ni, Yesu Kristo dɛɛ ti, saɲga n aju bo m fite durunya n nu fɛn.

⁷ Ma boro m nyi atu ɲgoni Nyemε atin n su, ma yo m juma awie, ma kan labari kpa n ni m yarada kun.

⁸ Kisa Nyemε bita teremasu aceeri ɲminda m, dama wɔ de m ka m yo sa bo i kɔ atin su i dɔɔ. Ya Mibiε Yesu Kristo, yiri di minem jɔɔ ye i kɔ atin su a, yiri fá nyini teremasu aceeri n ce m jina cɛɛn a, má mini ɲgumi, ama, sɔɔ kɛɛ bo i koro Yesu na i tana ɲminda ka i ba n a.

Pɔɔlu ni i tii jɔɔ lɛɛ

⁹ Yo anie na a bra m dɔ kisa kisa.

¹⁰ Dama Keresensi akɔ Galatiya awɔɔ n nu, ye Titosi akɔ Dalamatiya awɔɔ n nu. Demasi anmati ayaki m, wɔ kɔ Tesalonika miε kpiri n nu, kisa i koro ka i wo kabo durunya n nufɔm wo n wɔ.

¹¹ Luka ɲgumi wo m dɔ a. Fa Marako na u ni yiri bra, dama i koro buka m ni juma ni.

¹² Ma sunma Tikikusi Efeso miɛ kpiri n nu.

¹³ A ɲa a ba, bita m ayere tanɛɛ n ba ma m, bo m yakiiri i Tɔrasi miɛ kpiri n nu, Kapusi dika ni. Fa m kadasim n gusu bita m nu, maala bo ba fa nengendɔre ɲuma ayo bu ni.

¹⁴ Alekizanda bo i ti tunmi n ayo m satie agaya, Mibiɛ ni tɔ i kaari fa ko sa bo wo yo i n su a.

¹⁵ Si u ɲu sa ni yiri, dama wo jina su kekereke akete noanie n bo ya kan i ni.

¹⁶ Ciciri su bo m sukan na m de m tii jɔre diibiri ni, be ajina ma m sin, bu kere ɲmati yakiiri m wo. M sere Nyeme ka i fa bu ɲgasi ce bu.

¹⁷ Ama, na Mibiɛ n ajina m sin a, na wo ma m faɲga, na ma koro akan labari kpa n akere minem, na bo bu ti ma Yudafom n kere akoro ati. Na wo de m afite minem bo bu koro ka bu kun m n saa nu.

¹⁸ Yiri Mibiɛ ni yi m fite jɔre tie kere nu a, na i fa m ko wura i femeya n nu aɲgoro ni laifie a. Jirima bambaka ti i deɛ saɲga kere. Ami.

Awieeri su deɛ anse yoowa ni

¹⁹ Bisa Pirisila ni i hun Akuyila fa tu Onesiforosi dikafom kere doɲgu ma m.

²⁰ Irasitusi kaari Korinto miɛ kpiri n nu wo, na ma yaki Torofimosi gusu Miletosi miɛ kpiri n nu, dama wo la ma i ɲu.

²¹ Yo anie na a bra ka, na fufuku nya ju. Ya ninbaam bisa u doɲgu, bere la Eyabulusi, ni Pudensi, ni Linosi, ni ya niemabara Kalodiya, ni ya ninbaam nyiɲgam kere.

²² Ma Mibiɛ n wo ni woro. Nyeme buka am kere.

Pɔɔlu kadasi bo i kere fa maari TITOSI ni

¹ Mini Pɔɔlu sukere ahin kadasi n a. M ti Nyeme akoo o, na m kaaki ti Yesu Kristo jaramasa. Nyeme ayi m na wo sunma m ka m ko buka minem bo wo yi bu n na bu yarada yo biiwa, na bu si nahore fa ko Nyeme atin n su.

² Kana Nyeme ba yiiri durunya n ni, i yo seeri ka i ma ya ngoo n bo i la ma awieeri ni. Nyeme bu ma kore. Nyini ngoo n tama dee ti, ye ya la yarada ni si jina kun su n a.

³ Na sangha n ba juuri ni, na wo yi i noanie n afite fofoe nu, na wo fa ama m ka m ko kan i kere minem. Nyeme ni i tii, yiri bo i ti ya Tiidefo ni, maari m noo ka m ko kan i noanie n a.

⁴ Mini Pɔɔlu sukere ahin kadasi n ma woro Titosi a. A ti m wa a, nahore su, dama m ni woro kere asanga ayo Yesu Kristo yarada. Ya Si Nyeme ni ya Tiidefo Yesu Kristo buka u, na bu ma u ahoreda.

Juma bo Pɔɔlu na Titosi yo i Kereti asien n su ni

⁵ Deke bo i ti na m yakiiri u Kereti asien n su n la ka, m koro ka a yo juma n bo wo wie ma n wie, na a sese i su, na a yi Kristo jama nkpienkpienm se miem kere su, kabo m seeri u ni.

⁶ Nyini nkpienkpienm n kere bo a yi bu ni, i ti ye ni ka bu be la ma ngasi be. I ti ye ni ka bu ja bara kun n kpein. I ti ye ni ka bu nbaam yo Kristo yarada, na be koro jaraki ma nbaam ka bu nati yo sa ngbennngbenn na bu de ma bu wufom noanie.

⁷ Nyeme afa i juma n awura nkpienkpienm saa nu n dee ti, wo yo daka ka, ma bu la ngasi be. I ti ma ye ni ka bu ti anukerefom, wara bu fa yaa ndende, wara bu nu nzan agaya, wara bu ti aluwa korofom, wara bu koro nwaa agaya.

⁸ Ama, i ti ye ni ka nkpienkpienm kere ti minem bo bu de wofom, na bu ti minem bo bu koro sakpayo, na bu la tarabu, na bu yo sa bo i ko atin n su, na bu ti casi, na bu bita bu nu.

⁹ I kaaki ti ye ni ka bu ti minem bo bu bita Nyeme noanie n bo i la dabunu n kenken, kabo ya kereeri bu ni, adena bu koro fa kereewa n bo i ti nahore n fa kere minem na bu nya ahoresi, na bu kaaki koro kan kere minem bo ba kete nyini kereewa n kabo ba mini barasu ni.

¹⁰ Dama minem dogu wo bere bo ba kete kereewa bo i ti kpa ni, na bu sujoo jore ngbennngbenn na bu sudadaka minem, maala yaradayofom bo bu toko bita Yudafo sayoowa ni.

¹¹ Ma bu mo bu noo, dama bu sufa nyini kereewa n bo i ti ma ye ni ka bu fa kere ni, sufa saaki awurukpa lee. Nwaa dee ti ye bu yo so a.

¹² Haari bere Keretifom mmoo dee tiengu sifo be yo seeri ka, "Bere Keretifom ti korefom wo dada kere, na bu ti ka boro nenge tiem, na bu ti nviyafom, ni ayaa kpirifom wo."

¹³ Kabo i yo seeri n ti nahore wo. Nyini dee ti, jaraki bu, na bu yarada yo fanga,

¹⁴ na ma bu su Yudafo nana jorem su, na ma bu su deke bo minem bo ba kete nahore n akpama i n su.

¹⁵ Minem bo bu woowa ti casi ni, deke kere ti casi wo bu do, ama, minem bo bu woowa ti ma casi na bu yo ma Yesu Kristo yarada ni, deke be mmoo

ti má casi bu dɔ. Bu sunsunni, ni bu ahore kere ti fin wɔ, na nzen haari bu yo satie mmɔɔ, bu si má ka i ti satie.

¹⁶ Bu ɲa bu si Nyeme, ama, bu sayoowa kere ka bu si má i, dama bu sayoowa kere ti ciire wɔ Nyeme dɔ, na bu de má Nyeme nɔanie ni, na bu koro yo má sakpa be.

2

Kereewa n bo i ti kpa n dɛɛ jɔɛ

¹ Ama, wɔɔ yiri, i ti ye ni ka a fa kereewa bo i ti nahɔɛ na i kɔ atin su, na a sufa kere yaradayofɔm ni.

² Se nbiɛsɔ anyunutihɔm ka, bu bita bu ɲu, na bu yo sa bo i la anyunuyi, na bu la tarabuɲu. Kaaki se bu ka, bu ma bu yarada yo fanɲa, na bu koro minem nahɔɛ su, na bu la mindi nahɔɛ su.

³ Se nbara anyunutihɔm gusu ka, bu ma bu woowa kere ka bu soro Nyeme. Nyini la ka, má bu susaaki mine duma, na má bu ma nzan ja bu. Kaaki se bu ka, bu kere kereewa kpa,

⁴ na bu tu tarawam fɔ ka, bu koro bu hunm ni bu nbaam,

⁵ na bu la tarabuɲu, na bu ma bu woowa ti casi, na bu bita bu awurum nyunyumi, na bu yo sakpa, na bu de bu hunm nɔanie, adena má be koro bu Nyeme nɔanie ni ɲgbɛɛn.

⁶ Tu ɲgbɛfenem gusu fɔ ka, bu tara bu ɲu,

⁷ ni deke kere. Wɔɔ mmɔɔ ni u tii, ma u sayoowa kere kɔ atin su, na minem ɲu i, na bu sɔn u su. Fa sunsunni kpa ni atin bo i la jirima fa kere minem

⁸ kereewa kpa, na be koro kan má jɔɛ be. Kere bu sɔ, adena minem bo bu kete ya kereewa n di nyinse, dama bu ɲu má ɲgasi be bo bu fa saaki ya.

⁹ Se akɔɔm gusu ka, bu de bu mibiɛm nɔanie, na bu yo sa kere bo bu mibiɛm koro, na má bu se jɔɛ be.

¹⁰ Kaaki se bu ka, má bu wɔ awie mumuku, ama, bu kere ka bu la dabuɲu deke kere nu. Nzen bu yoori sɔ, bu woowa kpa ni kere minem ka, Nyeme, yiri bo i ti ya Tiidefɔ ni, i dɛɛ kereewa n ti nahɔɛ wɔ.

¹¹ Dama Nyeme ayi i ahɔɔma afite fofoe nu, na sɔnɔ kere nya tiide.

¹² I ahɔɔma ni kere ya ka ya yaki sam bo bu kɔ má nyemesu atin n su a, ni dekem bo bu wura ya konvi durunya n nu ni, na ya tara ya ɲu, na ya yo sa bo i kɔ atin su, na ya bita nyemesu atin, ahin durunya n bo ya wo nu ni.

¹³ Ya yo ahin na ya ɲminda deke n bo ya la i tama bambaka ka i fite fofoe nu, yiri la ya Mibiɛ Yesu Kristo, kabo i fite fofoe nu ni i jirima woowa ni. Yiri ti ya Nyeme kpiri, ni ya Tiidefɔ a.

¹⁴ Yiri wu maari ya, adena i ma ya nya ya tii, na i yi ya fite ya satie nu, na i kpakpara yi ya fin kere, na i yo ya casi, na ya yo i dɛɛ minem bo bu nyunu aboro sakpayo su.

¹⁵ Ahin kereewam kere, fa kere yaradayofɔm, na a ma bu ahoresi, na a kan bu ndie. Fa yiko n bo Nyeme afa ama u n yo sɔ, na má a ma be bu u ɲgbɛɛn.

3

Kabo yaradayofɔm wo ti barasu ni

¹ Tenge yaradayofom su ka, bu yo bu ñu benle ma nfemem ni gomina nkpienkpienm, na bu de bu ñoanië, na bu kpa bu ñu na bu yo sa kere bo i ti kpa,

² na má bu saaki minem duma, na má bu se akuruwa ni minem, ama, bu yo bu ñu kaan, na bu yo bu ñu benle ma sɔnɔ kere.

³ Má pui ti, yere mmɔɔ ni ya tii yo ti sinnzinm wɔ, ya si má Nyeme jɔre, na ya kaaki de má i ñoanië, na ya mini i atin ni, ya yo ti minem bo ya yo deke kere bo i wura ya konvi wɔ, na ya suyo ya sa koroowa, na ya la aɗunkpini, na ya si kɔre, na ya yo ti minem bo minem kpɔ ya a, na ya gusu kpɔ ya benɗu.

⁴ Ama, haari ni nyini mmɔɔ, Nyeme bo i ti ya Tiidefɔ ni, yo faari i sakpa, ni i koro kereeri ya,

⁵ na wɔ nya ade ya tii aji. Má ka ya sakpa yoowa dɛɛ ti, ye i deeri ya tii jiiri a, ama, i aɗunfɔ si dɛɛ ti. Kabo i deeri ya tii n la ka, i Awiewie Casi ni ñmisiiri ya a, na wɔ ma ya wo fɔfɔre, ni ñgɔɔ fɔfɔre.

⁶ Na Nyeme ama ya Tiidefɔ Yesu Kristo afa Awiewie Casi n ama ya ako asin su.

⁷ Nyeme yoori sɔ ni, adena ya yó i nbaam, na ya yó tama ka ya nyá ñgɔɔ n bo i la má awieeri. Nyeme ahɔroma n dɛɛ ti, wɔ de ya ka ya la má ñgasi be i dɔ, nyini ti ye wɔ fa ya ayo i nbaam n a.

⁸ Ahin jɔre n ti nahɔre wɔ.

M koro ka a kere ahin dekem ni anyumboro, adena bo bu yo Nyeme yarada ni, bu fa bu sunsunni kere yo sa bo i ti kpa. Ahin kereewam n la kperɛ, na bu kaaki ti kpa ma sɔnɔ kere.

⁹ Ama, má a fa u ñu wura akuruwa ñgbɛɛnñgbɛɛn barasu kere nu, ni ya nana Yudafom dumam, ni aluwa ñgbɛɛnñgbɛɛnm fa kɔ Nyeme ñoanië kpamaawa n su. Ahinm kere ti ñgbɛɛn wɔ, bu kunma kperɛ be.

¹⁰ Sɔnɔ kere bo i fa kpakpaakinu ba, i ti ye ni ka a tu i mi fɔ kpe nnyɔ ɔ, na nzen wɔ nya de má i, má a bu i wura am nu.

¹¹ Si ka nyini sɔnɔ n sɔ akete kereewa kpa n lɛɛ, na i yo satie bo yiri mmɔɔ ni i tii si ka i ti satie wɔ.

Pɔɔlu dɛɛ awieeri su ñoanië bo i fa maari Titosi ni

¹² M súnma Aratema, wara Tikikusi u dɔ, nzen bu be baari, boro u nyi na m ni wɔrɔ sa nu Nikopoli mie kpiri n nu. M koro ka m wo dɔ fufuku sangga a.

¹³ Zena bo i ti jɔredifɔ ni, i ni Apolosi, bu ba ña bu yasu, boro u nyi na a buka bu, na má deke be kpie bu su.

¹⁴ I ti ye ni ka a ma ya minem gusu sɔnsɔn kabo bu boro bu nyi suyo sa bo i ti kpa, na bu buka minem ni deke bo i ti bu miɛewam ni, adena má ya minem ni wo wo ñgbɛɛn.

¹⁵ M labari n kere lɛɛ. Minem bo bu wo m dɔ n kere bisa u. Bisa ya danfom kere bo bu yo Yesu yarada ni. Nyeme buka am kere.

Pɔɔlu kadasi bo i kɛrɛ fa maari FILEMON ni

¹ Mini Pɔɔlu bo Yesu Kristo dɛɛ ti na kisa m wo dansaraka nu ni, ni ya niwa Timoti sukɛrɛ ahin kadasi n a. Wɔrɔ Filemon bo ya koro u na ya ni wɔrɔ sanɔa yo juma ni, ya bisa u dɔŋgu.

² Ya kaaki bisa Kristo jama n bo bu tien bu nɔɔ u dika ni, ni ya niwa baabara Afiya, ni ya niwa Akipusi bo ya ni yiri kɛrɛ ti ka soja ni, Yesu dɛɛ atin n su ni.

³ Ya Si Nyɛmɛ ni ya Mibiɛ Yesu Kristo buka am, na bu ma am ahoreda.

Filemon koro ni i yarada n jɔrɛ

⁴ M niwa Filemon, sanɔa kɛrɛ bo m sere Nyɛmɛ, m wara fi má u sa, m da i asi ma u wɔ.

⁵ Dama ma ti kabo a yo ya Mibiɛ Yesu yarada ni, ni kabo a koro Nyɛmɛ minɛm kɛrɛ ni.

⁶ M kaaki sere Nyɛmɛ ka i ma wɔrɔ ni bo ba yo yarada na am sanɔa su Nyɛmɛ ni la wo fiɛ, nyini ma a si nahɔrɛ su kabo Nyɛmɛ afa deke kpa ama ya, Kristo dɛɛ ti.

⁷ M niwa, koro n bo a bita i ni, wɔ ma m ahore ajɔ agaya, na wɔ kaaki ama m ahoresi, dama wɔrɔ dɛɛ ti, Nyɛmɛ minɛm anya ahoresi.

Kabo Pɔɔlu taraari Filemon jaa maari Onisimɔ barasu ni

⁸ Tɔ, kabo Kristo dɛɛ ti na a ti m niwa ni, m la ahoresi, na m la atin bo m koro se u ka a yo deke bo i ti ye ni ka a yo i.

⁹ Ama, m koro u n dɛɛ ti, ye m susere u a, ka a buka m, haari ni bo m jina Yesu Kristo dɛɛ jaa nu n ni, na i dɛɛ ti na m kaaki ti dansaraka kisa ni.

¹⁰ Deke bo i ti na m susere u n la ka, m susere u ma m wa Onisimɔ n wɔ, bo Yesu Kristo dɛɛ ti na wɔ kaaki m wa dansaraka nu n ni.

¹¹ Sanɔa be, i yo kun má kperɛ be ma má u, ama, kisa, i kun kperɛ ma wɔrɔ ni mini kɛrɛ wɔ.

¹² Yiri bo m koro i ni m ahorembaa kun ni, ye m suma i ba u dɔ n a.

¹³ Kabo Nyɛmɛ jɔrɛ kaanwa n dɛɛ ti na m wo dansaraka n nu ni, má m koro ka i wo m dɔ fɛn na i buka m, kabo má wɔrɔ wo fɛn na a buka m ni.

¹⁴ Ama, m koro má ka m yo deke be bo a soro má su, ama, m koro ka wɔrɔ mmɔɔ ni u tii buka m u koroyanu, má ka i yo ka m miɛ u wɔ.

¹⁵ Beni, Onisimɔ fiteeri u saa nu ni, wɔ cɛ kaan, adena i ba kaaki ba wo u dɔ sanɔa kɛrɛ.

¹⁶ Kisa, i ti má u akɔɔ ŋgumi kun, ama, i tara akɔɔ ɔ. I ti ya niwa koroo-wa a. Koro bo m fa koro i ni, wɔrɔ koro i tara sɔ. I ti u akɔɔ ɔ, ama, Mibiɛ n dɛɛ ti, i kaaki ti u niwa a.

¹⁷ Nyini ti, nzen a fa i ka m ti u matafo, de i kabo má a de m ni.

¹⁸ Nzen wɔ do u ŋgasi be, wara i bita u kaari, ma nyini kaari n yo m dɛɛ kaari.

¹⁹ Mini Pɔɔlu ni m tii sufa m saa sukɛrɛ ahin jɔrɛ n a, ka m tɔ kaari n kɛrɛ bo i bita i n ma u. M kaaki koro se u ka, m kaari su u su, fa kɔ u ŋɔɔ bo a nyaari i Yesu dɔ ni.

²⁰ Nyini ti, m niwa, m koro ka a yo ahin sakpa n ma m, Mibiɛ n dɛɛ ti. Kabo ya kɛrɛ ti nibaa Kristo dɛɛ ti ni, da m ahore.

²¹ M la ahoresi ka a dé m nɔɔniɛ ni, nyini ti ye m sukɛrɛ ahin kadasi n a. Na kabo ma se ni, m si ka a yó i kɔ tara sɔ.

²² Bo i buka su la ka, m koro ka a yo sɔɔ dɔŋgu se m, dama m la tama ka Nyeme bá de am sere, na i má m kaaki ba am dɔ.

Pɔɔlu awieeri su dɛɛ anse yoowa ni

²³ M lamɔkɔ Ipafarasi bo m ni yiri wo dansaraka nu, Yesu Kristo dɛɛ ti ni, i ɲa m bisa u dɔŋgu.

²⁴ Marako, ni Arisitakusi, ni Demasi, ni Luka kere gusu ɲa m bisa u dɔŋgu, m ni bere sanga yo juma.

²⁵ Ya Mibiɛ Yesu Kristo buka am kere.

Kadasi n bo bu kere fa maari HIBURUFOM ni

Nyeme n'ani n bo i j'j' fiteeri i Wa n do ni

¹ Dawa san'ga Nyeme yo faari i n'ani maari i n'ani kanfom wo, san'ga barasu ni atin barasu barasum, na bu sukan i kere ya nam.

² Ama, ahin awieeri su san'ga n bo ya wo nu ni, Nyeme afa i Wa n su ye i fa i n'ani n j'j' ya so a. Nyeme maari yiri yiiri durunya n a. Na wo se ka, awieeri su, deke n kere ba yo i dee wo.

³ I jirima woowa wein ni kere kabo Nyeme ti a. Kabo Nyeme ti ni, i woowa ti so o. I n'ani n bo i la yiko ni, i fa nyini bita durunya n kere a. I faari i nu fa yoori yoowa, adena Nyeme fa adamande satie ce i. Nyini dee sin, na wo nya ako atana angoro, Micera Kpiri n saa fomboro su.

⁴ Nyeme maari i jinaabiri bambaka bo i tara i merkem dee, na wo kaaki ama i duma bo i tara bu dee ni.

Kabo Nyeme Wa n tara i merkem barasu ni

⁵ Dama kabo Nyeme seeri i Wa n ni, ka,

“Woro ti m Wa a,
nyuma, m kaaki u Si,”

wo se ma i merke n be so. Bekun, i na

“M yo u Si,

na u gusu yo m Wa.”

⁶ Sasu bekun, san'ga bo Nyeme yo na i sunma i Wa kun n kpein n durunya n nu ni, na wo se ka,

“Ma Nyeme merkem kere su i.”

⁷ Fa ko kabo Nyeme j'j'ori i merkem jore ni, i na,

“Mini, m ma m merkem yo bu juma

kabo anuma, ni sin yo bu juma barasu n wo.”

⁸ Ama, kabo Nyeme j'j'ori i Wa n do ni, i na,

“Woro ti Nyeme a, u femeya bie n la ma awieeri.

A bita u femeya n ni nahore atin su wo.

⁹ A koro sa bo i ko atin su wo,

na a koro ma sa bo i ko ma atin su a.

Nyini dee ti ye Nyeme ayi u a,

ye wo ma u ahoreda bo i tara u bengum kere n a.”

¹⁰ Na Nyeme akaaki ase i Wa n ka,

“Ya Mibie, bumoori ni, woro yiiri asien'gu a.

U sa bo a yoori i dee ti, ye angoro wo bere a.

¹¹ I kere ba ka ngbeen wo,

ama, woro wo bere wo san'ga kere.

Angoro n ni asien'gu kere yo dawa

kabo sutura yo dawa barasu n wo.

¹² A p'ondi bu ka sanvuiin bo wo do wo,

na a ba kaaki i fofore.

Ama, woro kaaki ma fieo,

na u afo la ma awieeri.”

¹³ Na Nyeme akaaki ase i Wa n ka,

“Ba tana m saa fomboro su fen,

haari m ba ma a kunma u kpofom na a nana bu kere nu.”

Kabo i seeri so ni, wo nya ase ma i mereke n be so.

¹⁴ Ye i merkem ti nzum wo? Bu ti awiewiem bo bu su Nyeme wo, na i sunma bu na bu ko buka minem bo bu ba nya tiide ni.

2

Tiide bambaka n jore

¹ Nyini dee ti, wo yo daka ka ya bita Nyeme noanie n bo ya du mo ati i nyunyumi, adena ma ya mini.

² Ya si ka noanie n bo Nyeme yo fa maari i merkem, na bu kan kereeri ya nam ni, i ti nahore wo, na minem bo bu tiiri i na bu keteeri, na ba de ma i ni, bere nyaari suicin n a.

³ Nzen yere gusu keteeri nyini noanie kpiri n bo i kere kabo Nyeme de ya tii ji ni, ya yo se koro fite nu na ya nya ma suicin a? Ahin tiide n bo ya kan i jore ni, Mibie n ni i tii du mo kan kereeri minem a, na bo bu tiiri i n adi i daani, ase ya ka i ti nahore wo.

⁴ Nyini sangga n na Nyeme mmoo adi i daani abuka su, yiri la bo i yoori alekutura sa barasu barasum kereeri i yiko, na i maari minem nyaari i Awiewie Casi n aceerim kabo i koro barasu ni.

Yesu ti adamandem goro o

⁵ Nahore, Nyeme afa ma durunya fofore n bo ya kan i jore, na i suba ni, awura ma i merkem saa nu.

⁶ Ama, be akere i Nyeme Jore Kadasi n aware be nu, ka,
 “Ya Micera Nyeme, adamande gusu ti nzu wo,
 ye u cee wo i nu a?
 Adamande wa ti nzu wo,
 ye a nie i dika?”

⁷ Kabo a yoori i ni, a ma i jinaabiri kpieri su sangga kaan afien ni u merkem dee,
 na a nya awura i kpiri na a ma i jirima bambaka,

⁸ na a fa deke kere awura i saa nu.”
 Ba kere i Nyeme Jore Kadasi n nu kabo Nyeme afa deke n kere awura adamande saa nu ka i nie i dika ni, nyini kere ka deke be wo ma bere bo i ti ma i dee. Ama, kisa, kabo i ti ni, ya nya nu ma i so.

⁹ Ama, ya nu Yesu kabo Nyeme yoori i ni, i ma i jinaabiri kpieri su sangga kaan afien ni i merkem dee wo. Na i dee ahorama n nu na wo wu sono kere dee ti. Kisa, wahara n bo i diiri i na i wu n dee ti, Nyeme awura i kpiri, na wo ma i jirima bambaka.

¹⁰ Nyeme yiiri deke n kere a, yiri la deke n kere yiko a. I tiiri ye ni ka Nyeme kpini atin bo i mine beberebe ba nya i jirima woowa n be. Nyini dee ti, ye i ma Yesu ba diiri wahara n a, adena i yo minem mofa bo i ti kabo Nyeme koro ka i ti ni, dama yiri ma bu nya tiide a.

¹¹ Yiri Yesu bo i yo minem casi ni, i ni minem kere bo wo yo bu casi n sangga Si wo. Nyini dee ti, i la ma i nyinse na i fere bu ka i ninbaam n a.

¹² Na wo se Nyeme ka,
 “M bo u дума kere m ninbaam.
 Na sangga kere bo bu tierenri bu noo,
 m di jue kansi u дума.”

¹³ Na wo kaaki ase ka,
 “Mini, m daafi Nyeme nu,”
 Na wo kaaki ase bekun ka,
 “Mini ni nbaam bo Nyeme afa ama m ni, yere yaa.”

¹⁴ Kabo nbaam n ti adamande ni, nyini dɛɛ ti ye yiri mmɔɔ kaakiiri adamande a, adena i wu na i yo sɔnɔ bo i la yiwee yiko ni ɲgbɛɛn, yiri la Sitana a,

¹⁵ na i de minem tii ji, bɛrɛ kɛrɛ bo bu ɲɔɔ su na bu soro yiwee n dɛɛ ti, na ba kaaki akɔɔm ni.

¹⁶ I ti nahɔrɛ wɔ ka, má mɛrɛkɛm ye i buka deeri bu tii a, ama, Abraham busu nufɔm ye i buka deeri bu tii a.

¹⁷ Nyini kere ka, wɔ yo daka ka i woowa ti ka i ninbaam i deke n kere nu wɔ, adena i yo Nyɛmɛ sayoowa dɔɲguyofɔm kpɛn bo i la dabuɲu na i si aɲunfɔ fa kɔ i nyɛmɛsu n nu, na i fa i ɲu yo yoowa ma minem na Nyɛmɛ fa bu satɛ ce bu.

¹⁸ Yiri ni i tii yo diiri wahara, na ba sɔ i ɲgɛɛ na bu niɛ ni. Nyini dɛɛ ti, ye i koro buka minem bo bu sɔ bu ɲgɛɛ na bu niɛ n a.

3

Kabo Yesu tara Moyisi barasu ni

¹ M ninbaam, ambɛrɛ bo Nyɛmɛ ayi am ni yɛrɛ ka matafɔ casim ni, am fa am sunsunni se Yesu ɲu, yiri bo Nyɛmɛ asunma i na i ti ya sayoowa dɔɲguyofɔm kpɛn n ni. Ya su yiri su a, ye ya di i daani kere minem a.

² I yoori i juma n bo Nyɛmɛ yiiri i ka i yo i n ni nahɔrɛ su wɔ, kabo Moyisi mmɔɔ yo yoori i juma kɛrɛ Nyɛmɛ awuru n nu, bukaari Nyɛmɛ minem ni nahɔrɛ su n wɔ.

³ Kabo sɔnɔ bo i ta awuru n la jirima tara awuru n ni i tii ni, sɔ ye Yesu la jirima tara Moyisi a.

⁴ Awuru kɛrɛ la i tafɔ, ama, Nyɛmɛ ti deke n kɛrɛ tii a.

⁵ Moyisi yo laari dabuɲu yoori i juma kɛrɛ Nyɛmɛ awuru n nu, bukaari Nyɛmɛ minem n ka amusuisufɔ ɔ, na wɔ kere bu deke bo Nyɛmɛ koroori ka i bá se bu ni.

⁶ Ama, Kristo yiri ti Nyɛmɛ Wa a, yiri la dabuɲu Nyɛmɛ awuru n nu koro bita Nyɛmɛ minem a. Nzen ya bita ya tama n ni ahoresi, yɛrɛ ti i awuru n nufɔm a.

Nyɛmɛ minem ɲumiya n dɛɛ jɔrɛ

⁷ Nyini dɛɛ ti, kabo Awɛwɛ Casi n se ni,

“Nyuma, nzen am tiiri kabo Nyɛmɛ suse,

⁸ má am ma am sui yo tantanantan,

kabo am nam yo yoori bu sui tantanantan na bu yoori Nyɛmɛ na bu niɛ ni,

sanɲa bo bu wo boro kpantain n nu na bu keteeri i nɔaniɛ ni.

⁹ Na Nyɛmɛ ase ka,

‘Dɔ ye am nam yo yoori m na bu niɛ a,

haari ni bo bu ɲuuri sam bo m yoori bu,

nyini afɔ aburana n kɛrɛ nu ni,

bu yoori m wɔ na ba niɛ.

¹⁰ Nyini dɛɛ ti ye m faari yaa bu ɲu a,

ye m seeri ka, ba mini atin n a,

dama ba yo má m sa koroowam ni.

¹¹ Na yaa ati m, na ma tan ndiɛ ka,

bu ny má atin wura má asien n bo má m ma bu nya ɲumiya n nu ni.’ ”

¹² M ninbaam, am si am ɲu sa na má am be ahorembaa yo kekereke, na i kaaki i sin bo Nyɛmɛ, yiri bo i wo bɛrɛ sanɲa kɛrɛ n dɛɛ atin ni.

¹³ Ceen kere bo ale acin na bu fere i ka, “Nyuma,” am sutu am benggu fo, na má am ma be dadaka am na am yo satie na am sui yo tantanantan.

¹⁴ Nzen ya koro bitaari bumboori su noanie n kenken haari ko juuri i awieeri, nyini n kere ka ya ni Kristo sanga yo juma kun wo lee.

¹⁵ Kabo ba kere i Nyeme Jore Kadasi n nu ni, ka,
“Nyuma, nzen am tiiri kabo Nyeme suse,
má am yo am sui tantanantan,
kabo am nam yo yoori bu sui tantanantan.”

¹⁶ Nmam yo tiiri Nyeme noanie n ye bu yoori bu sui tantanantan n a? Má minem kere bo Moyisi yo yiiri bu fiteeri Ijipiti asien n su ni, nzen se?

¹⁷ Ye nmam ye Nyeme yo faari yaa bu nu afo aburana n a? Má bo bu yo yoori satie na bu wuuri boro kpantain n nu ni?

¹⁸ Nmam ye Nyeme yo taanri ndie ka, “Bu nya má atin wura má asien n bo má m ma bu nya numiyi n nu n a?” Má bere n bo bu yo keteeri i noanie ni, nzen se?

¹⁹ Deke bo i ti na ya nu ka ba wura má asien n su na bu nya numiyi n la ka, ba yo má i yarada.

4

¹ Nyini ti, am ma ya si ya nu sa, na má be fun nyini numiyi n bo Nyeme ase ka i fá ma ya na atin toko wo bere ka ya nya i ni.

² Dama yere mmoo ati labari kpa n kabo bere mmoo yo tiiri i ni, ama, bere ayo má i yarada, nyini dee ti, ye wo kun má kperere ama má bu n a.

³ Ama, yere bo ya yo Yesu yarada ni, ya nya nyini numiyi n bo Nyeme seeri ka i fá ma i minem ni. I ti kabo Nyeme seeri n wo, i na,
“Na yaa ati m, na ma tan ndie ka,

bu nya má atin wura má asien n bo má m ma bu nya numiyi n nu ni.”
Fite sanga bo Nyeme yiiri durunya n kere wieeri ni, i juma awieeri lee.

⁴ Dama ba kere lesu ceen n jore, Nyeme Jore Kadasi n awore be nu, ka,
“Nyeme yo yiiri i numi, i jumayoowa kere nu wo lesu ceen ni.”

⁵ Ya kaaki anu ka wo joo nyini jore n so ka, bu nya má atin wura má asien n bo m ma bu nya numiyi n nu.

⁶ Bo bu du mo tiiri labari kpa n ni, ba wura má nyini numiyi n nu, dama ba yo má Nyeme yarada. Ama, atin toko wo bere bo nbem nya nyini numiyi ni.

⁷ Nyini dee ti, na Nyeme ma wo ce ka, na wo kpama ceen fofore be, na wo fere i ka nyuma, na wo ma Feme Davidi ajoo nyini ceen n jore, kabo ba kere i Nyeme Jore Kadasi n nu ka,

“Nyuma, nzen am tiiri kabo Nyeme suse,
má am ma am sui yo tantanantan.”

⁸ Nzen má Yosuwu koro maari Yisarelifom nyaari atin wuraari asien n bo Nyeme ma bu nya numiyi n nu, má Nyeme ayo akaaki ase má ka ceen n be wo bere bo i ma i minem nya numiyi kun.

⁹ Ama, kabo i ti ni, numiyi ceen wo bere bo Nyeme ba fa ma i minem.

¹⁰ Dama sono kere bo i nya numiyi Nyeme do, i mi yi i numi fa ko i juma su, kabo Nyeme yo yoori i juma wieeri na i yiiri i numi n wo.

¹¹ Nyini dee ti, am ma ya boro ya nyi, na ya nya numiyi n bo Nyeme ba fa ma ya ni. Ama, má am ma ya be kete Nyeme noanie ni, adena má ya fun numiyi ni, kabo Yisarelifom nbem yo keteeri na bu fuunri i ni.

¹² Nyeme noanie n la ngoo na i la fanga. I kaaki wo na tara takobe, i kpie wura sono ahorembaa su wo, ni i numi, ni i awiewie nu, na i kpie

kpaaki buwe sasuubiri, na i kɔ kpura bɔrɔkɔ nu, na i fiiti sɔnɔ sunsunni nu, na i si deke bo i ahorembaa koro, deke bo i ti kpa, ni bo i ti má kpa.

¹³ Deke be wo má bɛrɛ bo i koro fiɛ Nyɛmɛ, dama deke be wo má bɛrɛ bo Nyɛmɛ ayi i na i nyumbaa ɲu má i. Yiri ye ya kɛrɛ bá kan ya sayoowa kere i a.

Yesu ti Nyɛmɛ sayoowa dɔɲguyofɔm kɛrɛ kpiɛn n a

¹⁴ Kisa, na ya la Nyɛmɛ sayoowa dɔɲguyofɔ kpiɛn bo i la má aɲusu, na wɔ kɔ aɲgoro, na wɔ wura Nyɛmɛ dika n nu ni, yiri la Nyɛmɛ Wa Yesu, nyini dɛɛ ti, ye am ma ya bita i dɛɛ atin n bo ya ɲa ya yo i yarada n kenken.

¹⁵ Ya dɛɛ Nyɛmɛ sayoowa dɔɲguyofɔ kpiɛn n ti má be bo i koro si má ya aɲunfɔ ɔ. I koro si ya aɲunfɔ fa kɔ saɲga bo ya faɲga akpiɛ su, ni i dɛɛ atin su, dama ɲgɛɛ barasu barasu kɛrɛ bo bu fa sɔ ya ni, bu yo fa sɔɔri yiri mmɔɔ sɔ ɔ, ama, haari ni nyini n kɛrɛ ni, wɔ yo má satie be.

¹⁶ Nyini dɛɛ ti, am ma ya fa ahoresi, na ya cin dodo Nyɛmɛ fɛmɛya tanaabiri ni, yiri ti ahɔrɔmafɔ a, adena i si ya aɲunfɔ, na saɲga kɛrɛ bo ya ba koro buka, na i buka ya.

5

¹ Nyɛmɛ sayoowa dɔɲguyofɔ kpiɛn kɛrɛ, bo Nyɛmɛ yo yiiri i minɛm n nu ka i yo juma ni, i dɛɛ la ka, i jina minɛm dɛɛ jinaabiri Nyɛmɛ dɔ, na i de bu aceerim ni yoowam na i fa ma Nyɛmɛ fa kɔ minɛm satie bo ba yo i n dɛɛ ti.

² Yiri mmɔɔ ni i tii koro si minɛm aɲunfɔ bo ba si má na ba mini atin ayo satie ni, dama yiri mmɔɔ faɲga akpiɛ su Nyɛmɛ dɔ.

³ Nyini dɛɛ ti, wɔ yo daka ka i du mɔ yo yoowa ma i ɲu fa kɔ i ɲgasi bo wɔ do i ka, ye i nya koro yo yoowa ma minɛm kɛrɛ ɲgasi n a.

⁴ Be koro wura má i ɲu kpiri na i se ka i ti Nyɛmɛ sayoowa dɔɲguyofɔm kpiɛn, má ka Nyɛmɛ ni i tii ayi i mi, kabo i yo yiiri Aaron ni.

⁵ Nyini dɛɛ ti, Kristo gusu awura má i ɲu kpiri ayo má i ɲu Nyɛmɛ sayoowa dɔɲguyofɔ kpiɛn, se Nyɛmɛ yiiri i a, na wɔ se i ka,

“Wɔrɔ ti m Wa a,
nyuma, m káaki u Si.”

⁶ Ba kaaki akɛrɛ i Nyɛmɛ Jɔrɛ Kadasi n awɔrɛ be nu ka, Nyɛmɛ ɲa,

“Wɔrɔ ti Nyɛmɛ sayoowa dɔɲguyofɔ,
kabo Mɛlɛkisiɔɔki busu nu ti n a,
a wo bɛrɛ sɔ ɔ saɲga kɛrɛ, be de má u.”

⁷ Saɲga bo Yesu wo durunya n nu fɛn ni, i yo sereeri Nyɛmɛ ni anyum-boro su, na wɔ bo afere Nyɛmɛ na wɔ sun, ka, i de i fite yiwee n nu. I yo yoori i ɲu kaan, na i soro Nyɛmɛ n dɛɛ ti, na Nyɛmɛ ade i sere.

⁸ Haari ni bo i ti Nyɛmɛ Wa ni, Nyɛmɛ maari i diiri wahara, adena i si kabo i deeri Nyɛmɛ nɔaniɛ ni.

⁹ Saɲga bo Nyɛmɛ ma i tiiri kabo i koro ka i ti ni, ye wɔ ma sɔnɔ kɛrɛ bo i deeri i nɔaniɛ n nya tiide bo i la má awieeri n a.

¹⁰ Dama Nyɛmɛ yiiri i ka i yo Nyɛmɛ sayoowa dɔɲguyofɔ kpiɛn, kabo Mɛlɛkisiɔɔki yo ti barasu n a.

Fɔtu fa kɔ kabo má ya fa ya yarada n ji ni

¹¹ Má ya la deke dɔɲgu bo ya kan kere am fa kɔ jɔrɛ bo ya jɔjɔ i n su, ama, i ti kekereke kabo ya kan teke am nyi, dama am koro ti má i bu ndende.

¹² Saɲga bo am boori i bu ka am su Nyɛmɛ ni, am ace nu, má am aju bo am sukere minɛm Nyɛmɛ nɔaniɛ ni, ama, am toko tana koro ka bu kere

am dekem bo ba du mɔ afa akere am, fa kɔ Nyemɛ nɔaniɛ n su. Am toko nu nyufini wɔ, am nya koro di má diire nɔnɔri.

¹³ Dama sɔnɔ kere bo i nu nyufini toko ti baakan wɔ lɛɛ, i nya koro si má deke bo i kɔ atin su Nyemɛ dɔ.

¹⁴ Minɛm bo bu nyunu ati Nyemɛ dɛɛ atin n su, bere di diire nɔnɔri a. Ba sɔnsɔn Nyemɛ nɔaniɛ ni, na bu su i su kabo i kere ni. Nyini ti ye bu la alecira koro si deke bo i ti kpa, ni bo i ti má kpa n a.

6

¹ Nyini ti, má am ma ya ka Kristo ciciri su nɔaniɛ kereewam ngumi su, ama, am ma ya boro ya nyi na ya kɔ mɔ. I ti má ye ni ka ya sukan nyini jɔrɛm ni saŋga kere. Nyini jɔrɛm ni la kaaki bu wo, fa kɔ bu satie su na bu yo Nyemɛ yarada ni,

² ni kabo bu bie bu Nyemɛ nzue barasu, na bu fa bu sa nana yaradayofom ŋu ka Nyemɛ yo bu kisi, ni kabo mine ba wu na bu tenge bu yiwee nu ni, ni kabo Nyemɛ ba di mine jɔrɛ na be koro kaaki má i kun ni.

³ Nzen Nyemɛ soroori su, ya koro kɔ mɔ bo i tara sɔ.

⁴ Minɛm bo ba yo asi ka Nyemɛ atin n ti wein, na ba kaaki bu sin abo i ni, bu yo sɛ koro kaaki ba Nyemɛ dɔ bekun a? Dama bu yo nyaari Nyemɛ aceerim wɔ, na ba de Awiewie Casi ni.

⁵ Ba yo asi kabo Nyemɛ nɔaniɛ n ti kpa barasu, ni kabo durunya n bo i suba n yiko ti.

⁶ Ama, na ba kaaki bu sin abo i, i ti kekereke bo nyini minɛm nusu koro kaaki ba i dɔ bekun, dama bu sayoowa kere ka bu sukaaki kpama Nyemɛ Wa n baka jaanu n su bekun wɔ lɛɛ, na bu suwura i nyinse minɛm nyunu.

⁷ Asien kere bo nzue tɔ saŋga kere na mine dɔ su, na i yo diire nyunyumi, Nyemɛ wura nyini asien n abaraka beberebe.

⁸ Ama, asien bo buwe ni wura ngbɛɛnngbɛɛnm fi su na i kunma kperɛ, i cɛ má, Nyemɛ yó i ngbɛɛn, na i awieeri su, sin bá yara i kere.

⁹ Ama, m ninbaam, haari ni bo ya kan sɔ n kere ni, ya la ahoresi fa kɔ ambere dɔ, dama am bita atin kpa n wɔ, yiri la tiide n bo am anya i ni.

¹⁰ Nyemɛ ti kpa, i wara fi má sakpa n bo am yo i ni, kabo am abuka i minɛm, na am toko buka bu ni. Nyini kere ka am koro i a.

¹¹ Ya koro ka am kere boro am nyi haari kɔ ju awieeri, adena deke n bo am la i tama n yo yiiwa.

¹² Má am ma nvisya ti am, ama, minɛm bo bu yo yarada na bu la sawɔrɛ, na bu nya deke n bo Nyemɛ seeri ka i fá ma bu ni, am su bu dɛɛ sayoowam su.

Deke bo Nyemɛ seeri ka i yó i ni, i kaaki má

¹³ Saŋga bo Nyemɛ seeri Abraham ka i bá yo i kisi ni, be wo má bere bo i tara yiri Nyemɛ. Nyini dɛɛ ti, ye i faari i duma taanri ndie maari i a.

¹⁴ Na wɔ se i ka, “M yó u kisi, na u busu nufom bá sunnu beberebe.”

¹⁵ Na Abraham amindi haari na wɔ ba anya deke n bo Nyemɛ seeri ka i má i ni.

¹⁶ Nzen sɔnɔ ŋa i tan ndie, i tan deke bo i tara i mi n wɔ. Deke bo akuruwa nya yoori na bu taanri ndie, wɔ kun akuruwa n kere nɔɔ lɛɛ.

¹⁷ Nyemɛ yo koroori ka i kere i minɛm ka deke bo i bá ma bu ni, i wɔrɔ má i nɔɔ i busu, nyini ti ye i kaaki taanri ndie n a.

¹⁸ Deke bo i seeri ka i yó i ni, ni i ndie taanwa n ti deke nnyɔ lɛɛ, bo bu kaaki má. Nyini kere ka Nyemɛ koro bu má kɔrɛ a. Nyini ti ye yere bo ya ba i dɔ ka ya nya tiide n la ahoresi bita ya tama n bo ya la i ni anyumboro n a.

¹⁹ Tama n bo ya la i ni, i ti kabo ba kpama lee barasu n wɔ. Nyini ma ya ahorembaa abi kekereke, ye ya kaaki yaki má atin n bo ya bita i n a. Nyini tama n ti bo wɔ sin tani bambaka n bo i kanda n ɲu awura Sɔɔ Casi n nu a. Yiri bita ya a.

²⁰ Dɔ ye Yesu adu ya mɔ awura, ade ya dɛɛ jinaabiri a. Yiri ti ya Nyemɛ sayoowa dɔɲguyofɔ kpien n bo i la má defɔ fieo, kabo Melekisideki busu nu n ti n a.

7

Nyemɛ sayoowa dɔɲguyofɔ Melekisideki n jɔrɛ

¹ Melekisideki ni, yiri yo ti miɛ n bo bu fere i ka Salem dɛɛ fɛmɛ a, na i kaaki ti Micera Kpiri sayoowa dɔɲguyofɔ. Saɲga bo Abraham kɔ kuunri lue ni nfemɛ nna nbem na i kunmaari bu na i sukaaki kɔ awuru ni, yiri Melekisideki ni kpaari Abraham atin ye i yoori kisi gɔɔri i ɲu n a.

² Na Abraham ayi dekem kɛrɛ bo i kun lue n na i deeri i ni, deke buru kɛrɛ nu, na wɔ yi i kun kun ama Melekisideki. I duma Melekisideki n bu la ka, fɛmɛ bo i sayoowa kɔ atin su. I kaaki ti Salem fɛmɛ wɔ, i bu la ka, fɛmɛ bo i fa tanalaifɛ ba.

³ Melekisideki ni, be si má i si, wara i ni, wara i busu nufɔm, wara kabo bu wuuri i, wara kabo i wuuri. I yo ti Nyemɛ sayoowa dɔɲguyofɔ bo wɔ la má defɔ, kabo Nyemɛ Wa n ti n wɔ.

⁴ Am niɛ kabo i yo ti sɔnɔ bambaka barasu a. Dama ya kɛrɛ na Abraham yo yiiri deke n kɛrɛ bo i kɔ kuunri lue n na i deeri i ni, deke buru kɛrɛ nu, i yiiri kun kun maari yiri Melekisideki n wɔ.

⁵ Nyemɛ nɔaniɛ maawa n kun bo i wo i nɔaniɛ kpamaawa n nu n kere ka, deke buru kɛrɛ nu, bu yi kun kun fa ma Levifɔm, bu ti Nyemɛ sayoowa dɔɲguyofɔm n dɛɛ ti, haari ni bo bu kɛrɛ ti mine kunm na bu ti Abraham busu nufɔm ni.

⁶ Melekisideki yo fite má Levifɔm dɛɛ busu n nu, ama, Abraham yo yiiri deke n kɛrɛ buru nu kun kun maari i wɔ, na wɔ yo kisi ago Abraham ɲu, yiri Abraham ye Nyemɛ yo seeri ka i bá yo i kisi n a.

⁷ Sɔnɔ kɛrɛ si ka, sɔnɔ bo i yo kisi gɔ minɛm ɲu n tara bo bu de kisi ni.

⁸ Levifɔm bo bu ti Nyemɛ sayoowa dɔɲguyofɔm na minɛm yo yiiri bu deke kɛrɛ buru nu kun kun maari bu ni, bu ti yiweefɔm wɔ. Ama, Melekisideki bo Abraham yiiri i deke kɛrɛ buru nu kun kun maari i ni, Nyemɛ Jɔrɛ Kadasi n kere ka i toko wo bɛrɛ wɔ lɛɛ.

⁹ Nyini ti, saɲga bo Abraham yiiri deke n kɛrɛ nu buru kun kun maari Melekisideki ni, ya koro se ka i wa Levi bo i ni i busu nufɔ yo deeri nyini n sɔ ni, bu minɛm gusu mmɔɔ atɔ lɛɛ.

¹⁰ Dama saɲga bo Melekisideki ni Abraham yɛeri ni, na Abraham nya wu má Levi bo i fite i busu nu ni, nyini ti, ya koro se ka Abraham deeri i wa Levi dɛɛ jinaabiri, ye i yi maari Melekisideki n a.

Nyemɛ sayoowa dɔɲguyofɔ be bo i ti ka Melekisideki ni

¹¹ Nyemɛ nɔaniɛ kpamaawa ni, i yo wo Levifɔm bo bu ti i sayoowa dɔɲguyofɔm n saa nu a. Ama, nzen má Levi busu nufɔm dɛɛ sayoowa dɔɲguyofɔm dɛɛ juma n koro yoori deke n kɛrɛ bo má i ti ye ni ka bu yo i ni, má Nyemɛ ayi má i sayoowa dɔɲguyofɔ bo i ti ka Melekisideki. Má i kaaki yi i sayoowa dɔɲguyofɔ bo i fite Aaron dɛɛ Levifɔm busu n nu ba.

¹² I ti nahɔrɛ wɔ ka, nzen Nyemɛ akaaki anɔ fɔfɔrɛ fa kɔ i sayoowa dɔɲguyofɔm dɛɛ atin n su, wɔ yo daka ka i kaaki i nɔaniɛ kpamaawa n gusu.

¹³ Kabo bu kereri Mibiε n ηusu jore ni, i fite anɔ barasu be nu a, nyini anɔ n nufɔ be ayo má Nyeme sayoowa dɔnguyofɔ juma be fieo.

¹⁴ Sɔnɔ kere si ka i fite Yuda dεε anɔ n nu wɔ, ama, fa kɔ Yuda dεε anɔ n nu, ya ti má ka Moyisi kereri ka bu be ba yo Nyeme sayoowa dɔnguyofɔ.

¹⁵ Deke bo i ma ya ti jore n bu nyunyumi n tara nyini su n la ka, Nyeme ayi i sayoowa dɔnguyofɔ bo i ti ka Melekisideki ama ya.

¹⁶ Má i nam busu dεε ti ye i la atin ka i yo Nyeme sayoowa dɔnguyofɔ a, se i la ηgɔɔ bo i la má awieeri n dεε ti, ye i la atin a.

¹⁷ Dama ba kere i Nyeme Jore Kadasi n nu ka,
“Wɔrɔ ti Nyeme sayoowa dɔnguyofɔ bo a la má defɔ fieo,
kabo Melekisideki busu n nu ti n a.”

¹⁸⁻¹⁹ Nyeme nɔanie maawa dawa n la má kpere ni fanɔa, dama wɔ ma má deke n ati má kabo má Nyeme koro ka i ti n a. Nyini dεε ti, ye Nyeme ace i ase, ye wɔ ma ya tama n bo i tara nyini n a. Nyini tama n dεε ti, ye ya koro cin dodo Nyeme n a.

²⁰ Nyini sin, na Nyeme atan ndie. Ama, sanɔa bo Nyeme yo yiiri Levifom n ka bu yo i sayoowa dɔnguyofom ni, wɔ yo atan má ndie.

²¹ Sanɔa bo Nyeme yiiri Yesu ka i yo Nyeme sayoowa dɔnguyofɔ ni, i taanri ndie wɔ, ka,

“Mini Micera Nyeme n atan ndie,
m wɔrɔ má m nɔɔ,
wɔrɔ ti Nyeme sayoowa dɔnguyofɔ bo a la má defɔ fieo a.”

²² Nyeme taanri nyini ndie n dεε ti, nyini ma ya si ka Yesu jina sesesu fofore n sin ka i ti kpa tara dawa n a.

²³ Deke bo i ma i kaaki wo i ηgumi n la ka, Levifom dεε Nyeme sayoowa dɔnguyofom yo wu wɔ, na bu nbem de bu jinaabiri, nyini dεε ti ye bu yo sunnu n a.

²⁴ Ama, Yesu yiri, i ti Nyeme sayoowa dɔnguyofɔ bo i wo bere sanɔa kere n dεε ti, be wo má bere bo i koro de i jinaabiri na i yo yoowa.

²⁵ Nyini dεε ti ye i koro de minem tii ji fieo n a, bere bo i ma bu cin dodo Nyeme ni, dama yiri wo bere sanɔa kere de bu nyemesere, fa kɔ Nyeme dɔ a.

²⁶ Nyini ti, Yesu ti Nyeme sayoowa dɔnguyofɔ kprien bo i koro yo deke n kere bo wɔ yo daka ka i yo ma ya nahɔre su a, yiri ti bo i ti casi na i la má ηgasi be a, i la má satie be, i woowa wo bere i ηgumi ni satieyofom, ye Nyeme awura i kpiri atara sɔnɔ kere bo i wo angoro n a.

²⁷ Kabo Nyeme sayoowa dɔnguyofɔ nkpien nyingam yo ti ni, yiri ti má sɔ. Bere dɔ, ale kere bo i cin, bu du mɔ yo yoowa ma bu ηu fa kɔ satie bo ba yo i wɔ ka, na bu nya ba yo ma minem satie bo ba yo i. Ama, yiri yiri, yoowa kpekun n kpein ye i yoori i a, yiri la bo i faari i ηu yoori i ni.

²⁸ Kabo Nyeme nɔanie kpamaawa n kere ni, haari ni bo minem bo bu yiiri bu ka bu yo Nyeme sayoowa dɔnguyofɔ nkpienm n akoro ayo má deke n kere bo má wɔ yo daka ka bu yo i ni, bu yiiri bu wɔ. Ama, nyini nɔanie kpamaawa n dεε sin, na Nyeme afa i tienɔgu duma atan ndie, na wo yi i Wa n ka i yo i sayoowa dɔnguyofɔ kprien. Yiri ti bo Nyeme ma i tiiri kabo i koro ka i ti sanɔa kere n a.

8

Yesu ti ya Nyeme sayoowa dɔnguyofɔ kprien n a

¹ Deke n bo m koro ka m se n kere la ka, ya la ahin Nyeme sayoowa dɔnguyofɔ kprien n bo i tana angoro, Micera Kpiri n saa fɔmbɔrɔ su.

² I yo i Nyeme sayoowa dɔnguyofɔ kpien juma n dika n nu wɔ, bo i ti Nyeme sereebiri nahore su, Nyeme ni i tii taari nyini dika n a, má adamande taari i a.

³ Nyeme sayoowa dɔnguyofɔ kpien kere bo Nyeme yo yiiri i, i deɛ la ka, i de minem aceerim, ni bu yoowam na i fa ma Nyeme. Nyini deɛ ti ye wo yo daka ka ahin Nyeme sayoowa dɔnguyofɔ kpien n gusu la yoowa be bo i yo ma Nyeme n a.

⁴ Nzen má Yesu wo durunya n nu, má i yo má Nyeme sayoowa dɔnguyofɔ fieo, dama minem bo Nyeme adu mɔ ayi bu ka bu yo sayoowa n wo bere wɔ, kabo Nyeme noaniɛ kpamaawa n kere lɛɛ.

⁵ Juma n bo Nyeme sayoowa dɔnguyofom yo i ni, i ti kabo i wo angoro n wɔ, ama, i ti má kun. Moyisi deɛ n gusu yo ti sɔɔ, nyini ti ye sangá bo i na i bo Nyeme Sereebiri Nambue n ye Nyeme seeri i ka, “Si nu, na a yo deke n kere kabo m kereeri u buka n su ka a yo i ni.”

⁶ Ama, kisa, Yesu deɛ Nyeme sayoowa dɔnguyofɔ juma n tara nyingam deɛ ni. Sɔ ye sesesu fɔfɔre n bo Yesu afa aba na i yo Nyeme ni minem afien dɔngu n tara dawa deɛ n a. Dama sesesu fɔfɔre n deɛ ti, ye Nyeme na i fa deke n bo i ti kpa na i la má anusu n fa ma ya n a.

⁷ Nzen má sesesu n bo Nyeme du mɔ diiri i di n koro yoori deke n kere bo wo yo daka ka i yo ni, má i kaaki fa má sesesu fɔfɔre na i di i di kun.

⁸ Ama, na Nyeme anu i minem ni ngasi, na wo se bu ka,
“Micera n na o,

sangá suba bo m fá sesesu fɔfɔre
na m dí i di ni Yisarelifom ni Yudafom.

⁹ I ti má ka dawa deɛ sesesu ni,
bo m yo faari i na m diiri i di ni am nam ni,
sangá bo m yiiri bu fiteeri Ijipiti asien n su ni.

Ba yo abita má i kabo m yo seeri bu ni,
nyini deɛ ti, ye m cece awo má bu nu n a.

Kabo Micera n seeri lɛɛ.

¹⁰ Sesesu n bo m bá di i di ni Yisarelifom la ka,
fa kɔ fa ba,

m fá m noaniɛ n wura bu sunsunni nu,
na bu bita i bu ahore su,

mini yó bu Nyeme a,
na bu yó m minem.

Kabo Nyeme seeri lɛɛ.

¹¹ Be wo má bere bo i bá kere i lamokɔ
ka i si Micera ni.

Dama sɔnɔ kere bá si m,
fa i tarakam kɔ tu i nfangafom kere.

¹² M sí bu anunfo, na m fá bu satie bo ba yo i n fa ce bu,
na m tɛnge má i su fieo.”

¹³ Deke bo i ti na Nyeme yo kaanri sesesu fɔfɔre be jɔre ni, i bu la ka, ciciri su deɛ n ayo dawa. Deke kere bo i nya yoori dawa wieeri, i ce má, i busu míni wɔ.

9

Ciciri su sesesu n ni sesesu fɔfɔre n deɛ nyemesu jɔre

¹ Kabo i ti n la ka, ciciri su deɛ sesesu n bo Nyeme diiri i di ni, yo la atin kereewa kereewam bo bu fa su Nyeme, na i kaaki la dika bo ba ta i ase durunya n nu fen na bu wo nu su Nyeme.

² Bu yo boori nambue be wɔ, na ba fa sanvuin ati i nu nnyɔ. Anɔ nu dɛɛ sɔɔ ni, fitana takaabiri, ni teebiri, ni kponɔ bo bu fa ma Nyemɛ n wo dɔ, bu fere bɛrɛ n ka Sɔɔ Casi.

³ Mɔ dɛɛ sɔɔ ni, bu fere i ka Casi Kɛrɛ Casi Sɔɔ.

⁴ Mikun yoowa yoobiri n bo ba mata i sika n wo dɔ, nyini yoobiri n su ye bu kunkun tulaalɛ nvanvani fa ma Nyemɛ a. Alaka n bo ba mata i sika n gusu wo dɔ, nyini alaka n kere kabo Nyemɛ faari sɛsɛsu diiri i di n a. Deke bo bu wo alaka n nu n la sika torosɛ n bo ba fa diire n bo bu fere i ka *mana* n awura nu ni, ni Aarɔn kpama n bo i fiɛfiɛri nyawa ni, ni yabue pɛpɛrɛpɛ nnyɔm bo Nyemɛ akɛrɛ i nɔaniɛ maawa burum n aɔ su ni.

⁵ Na ba yo deke nnyɔ nbem bo bu la lan̄kpɛtɛ ase alaka n tii su, nyini dekem ni kere kabo Nyemɛ wo i minɛm dɔ barasu a, bu fere bu ka *Cerubim*, ba fa bu lan̄kpɛtɛm akata dika n bo Nyemɛ si i minɛm aɔnɔfɔ n su. Kisa, ya koro kere má deke n kɛrɛ kun kun kabo bu ti barasu.

⁶ Kabo i ti ni, bu nya sɛsɛ nyini nɛngɛm kɛrɛ su wieeri, nyini saɔga, Nyemɛ sayoowa dɔnguyofɔm suwura sɔɔ n bo i wo anɔ nu n wɔ, na bu suyo bu Nyemɛ juma saɔga kɛrɛ.

⁷ Ama, Nyemɛ sayoowa dɔnguyofɔ kpiɛn ni ɔgumi koro wura sɔɔ n bo i wo mɔ n nu a. Afɔ kɛrɛ afɔ, i wura dɔ kpekun wɔ, nzen i ɔa i wura dɔ gusu, i bita nɛngɛndɔrɛm mbunja a, na i du mɔ yo yoowa ma i ɔu ka, na i nya yo ma minɛm dɛɛ satie bo ba yo i na bu si má ni.

⁸ Deke bo i ti na Awiewie Casi n fa nyini atin n sɔ ni, na i kere ya ka, saɔga bo bu yo boori nyini nambue na bu sɛsɛ deke n kɛrɛ su ni, Nyemɛ nya teke má atin na minɛm kɛrɛ koro wura Casi Kɛrɛ Casi Sɔɔ n nu.

⁹ Nyini n kɛrɛ bo bu yo yoori i ni, i la bu ma ya kisa. I bu la ka, aceerim ni nɛngɛm kɛrɛ bo bu yo fa yoori yoowa suuri Nyemɛ ni, ba koro ama má bu sunsunni ati má kabo má i ti ye ni ka i ti ni.

¹⁰ Dama nyini yoowa atin n kere diire diiwam, ni deke nuuwam, ni bu yoowam kabo bu ɔmisi bu ɔu na bu yo bu ɔu casi ɔgumi wɔ. Nyini n kere la i saɔga nyaari wɔ, yiri la bo bu suyo i sɔ ɔ, haari kɔ ju saɔga bo Nyemɛ bá yo deke n kɛrɛ dɔngu.

¹¹ Ama, kisa, Kristo aba, yiri ti Nyemɛ sayoowa dɔnguyofɔ kpiɛn n a, yiri bita atin kpa n bo bu yo seeri ka i fa ba n a. Nyemɛ Sereebiri Nambue n bo wɔ wura nu, na i suyo i Nyemɛ sayoowa dɔnguyofɔ kpiɛn juma ni, nyini nambue n la má aɔusu durunya n nu fɛn, i ti kabo Nyemɛ koro ka i ti n wɔ, dama i ti má deke bo adamande taari i ni bu saa a, wara dekem bo Nyemɛ yiiri bu durunya n nu fɛn n be wɔ.

¹² Má naanim ni sirim dɛɛ mbunja ye i fa wuraari nambue n nu a, ama, i faari i tien̄gu mbunja a, na wɔ fa awura Casi Kɛrɛ Casi Sɔɔ n nu kpekun n kpein, na wɔ fa ayo yoowa ama ya, adena ya koro nya tiide n bo i la má awieeri ni.

¹³ Minɛm bo fin yo wo bu ɔu, na bu koro cin dodo má Nyemɛ ni, bu fa sirim ni tooram mbunja ye bu fa yɔyɔkɔti gɔ bu ɔu a, na bu yara nambaa, na bu fa nzuin n gɔ bu ɔu. Nyini saɔga, ba kpakpara bu fin ayo bu casi lɛɛ.

¹⁴ Nzen nyini yoowam bo bu yo bu n ma minɛ yo casi, nyini yiri, Kristo dɛɛ mbunja ni koro yo bo i tara sɔ ɔ. Awiewie Casi ni, yiri bo i wo bere saɔga kɛrɛ n dɛɛ yiko n nu ma Kristo koro faari i ɔu yoori yoowa bo i la má gela be maari Nyemɛ n a. I dɛɛ mbunja ni koro kpakpara yi satiem bo bu ma ya ka ɔgbɛɛn ya ahore su, ni ya sunsunni nu n a, nyini ma ya koro su Nyemɛ bo i wo bere saɔga kɛrɛ n a.

¹⁵ Kristo yoori so n dɛɛ ti, yiri ti afien dɔnguyofɔ n bo wɔ fa sɛsɛsu fɔfɔrɛ n aba, adena minɛm kɛrɛ bo Nyɛmɛ afere bu n nya deke n bo i diiri i di ka i ma bu ni. Nyini deke n la aja n bo bu di i na i la má awieeri ni. Yiwee n bo Kristo wuuri ni, nyini de minɛm tii ji fa kɔ bu satie ti, na ba do Nyɛmɛ ngasi, ni ciciri su sɛsɛsu dɛɛ atin n su.

¹⁶ Sɛsɛsu fɔfɔrɛ n bo Nyɛmɛ diiri i di ni, i ti kabo sɔnɔ toko la ngɔɔ na i kere kabo bu ba kpaaki i aja nu barasu n wɔ, má ka wɔ wu ka, ye bu koro di i aja n a.

¹⁷ Saŋga bo i toko la ngɔɔ ni, be koro di má i aja ni, má ka wɔ wu ka.

¹⁸ Nyini dɛɛ ti, ye haari kana ciciri su sɛsɛsu n bo Nyɛmɛ diiri i di n bá yo juma, má ka ba yi nɛngɛndɔrɛ mbunja.

¹⁹ Nyini saŋga, Moyisi du mɔ kaanri Nyɛmɛ nɔanie maawam n kere kereeri minɛm n wɔ, kabo bu wo Nyɛmɛ nɔanie kpamaawa n nu n ka, na i nya fa tooram ni sirim mbunja na i saŋga nzue nu, na i fa nyawa ni bɔɛ ndɔrɛ kɔkɔrɛ bo ba wu i tani, na i fa bo nu, na i fa yɔkɔti gɔ Nyɛmɛ nɔanie kpamaawa kadasi n su ka, na i nya yɔkɔti gɔ minɛm kɛrɛ ɲu,

²⁰ na i nya se bu ka, “Ahin mbunja ni ti deke bo i kere sɛsɛsu n bo Nyɛmɛ adi i di ase am ka am bita i nɔanie n a.”

²¹ So ye Moyisi yo fa mbunja n yɔkɔti gɔ nambue n su a, ni nɛnge n kere bo bu bita yo juma ma Nyɛmɛ n gusu.

²² Nahɔrɛ, kabo Nyɛmɛ nɔanie kpamaawa n kere ni, i ti ka deke kɛrɛ bo bu ɲa bu yo i casi, má ka ba fa mbunja ayɔkɔti su ka. Nyɛmɛ fa má bu ngasi ce má bu, má ka ba yi deke mbunja.

Kabo Yesu faari i ɲu yoori yoowa na i deeri mine dɔngu fiteeri bu satie nu ni

²³ Nyini dɛɛ ti, Nyɛmɛ Sereebiri Nambue ni, ni dekem n kɛrɛ bo bu wo nu ni na bu ferema ni angoro dɛɛm ni, wɔ yo daka ka bu fa nɛngɛndɔrɛ mbunja yo bu casi. Ama, nɛngem n bo bu wo angoro n yiri, wɔ yo daka ka bu fa deke bo i mbunja tara nɛngɛndɔrɛm dɛɛ fa yo bu casi a.

²⁴ Kristo awura má dika casi n bo i ferema ni angoro dɛɛ n nu a, bo minɛm taari i ni, ama, i wuraari angoro dɛɛ n ni i tii nu a, ye kisa, wɔ de ya jinaabiri Nyɛmɛ dɔ.

²⁵ Afɔ kɛrɛ afɔ Nyɛmɛ sayoowa dɔnguyofɔm kpiɛn ni yo wura Casi Kɛrɛ Casi Sɔɔ n nu wɔ, na i fa nɛngɛndɔrɛ mbunja n yo yoowa. Ama, Kristo yiri awura má angoro dɛɛ dika n nu ka i sufa i ɲu yo yoowa saŋga kɛrɛ saŋga.

²⁶ Nzen má i ɲa i sufa i ɲu yo yoowa saŋga kɛrɛ saŋga, má i sudi wahara a saŋga kɛrɛ, fite kabo Nyɛmɛ yiiri durunya n ba ju ni nyuma. Ama, kabo i ti n la ka, ahin saŋga n bo deke n kɛrɛ aba awieeri su ni, na wɔ ba kpekun n kpein, afa i ɲu ayo yoowa, adena Nyɛmɛ fa adamande satie ce i.

²⁷ Nyɛmɛ akpama i ka adamande kɛrɛ wu kpekun wɔ, nyini sin, na Nyɛmɛ dí i jɔrɛ.

²⁸ Kabo Kristo gusu yoori lɛɛ. Kpekun n kpein ye i faari i ɲu yoori yoowa, adena i de mine dɔngu satie bo ba yo i ni. Nyini sin, i káaki ba bekun. Má mine satie bo ba yo i n dɛɛ ti ye i bá, ama, i bá de minɛm bo bu niɛ i atin nu n tii ji wɔ.

10

Kabo Yesu yoori yoowa kpekun n kpein ni

¹ Nyeme nɔani kpamaawa ni, i ferema ni deke kpa n bo Nyeme ɲa i fá ba n wɔ, ama, má yiri læ. Nyini ti, yoowa n bo bu yo bu sanɲa kere akoro ama má bere bo bu cin dodo Nyeme ni, ati má kabo má i koro ka bu ti ni.

² Nzen má nyini yoowam n kere koro yiiri minem n bo bu su Nyeme n fiteeri bu satiem nu, má bu sunsunni ma má bu cɛen be ka ba yo satie, má bu yaki nyini yoowam wɔ.

³ Ama, kabo i ti n la ka, nyini yoowa n bo bu yo i afɔ kere afɔ n tenge bu su fa kɔ bu satiem bo ba yo bu n su wɔ.

⁴ Dama tooram ni sirim mbunja koro yi má satie bo i wo adamande ahore su ni, cɛen be.

⁵ Nyini dɛe ti, sanɲa bo Yesu koro ka i ba durunya n nu fen ni, na wɔ se Nyeme ka,

“A koro má ka mine fa aceerim
ni nengendɔrem n yo yoowa ma u,
ama, adamande ɲuniɛmbaa ye a fa ama m
ka m fa yo yoowa n a.

⁶ U nyunu ayi má yoowam
bo bu yo bu na bu kpie nengendɔrem kɔm,
na bu yara bu sayoowa yoobiri n su ni,
ni yoowam n bo bu yo satie na bu yo bu ni.”

⁷ Na wɔ kaaki ase Nyeme ka,

“Mini yaa, ma ba ka m ba yo u koroowa n wɔ,
kabo ba kere m ɲusu jɔre u nɔani kpamaawa n dɛe kadasi n nu ni.”

⁸ I du mɔ seeri Nyeme ka, “A koro má ka mine fa aceerim ni nengendɔrem n fa yo yoowa ma u, u nyunu ayi má yoowam bo bu yo na bu kpie nengendɔrem kɔm, na bu yara bu sayoowa yoobiri n su ni, ni yoowam n bo bu yo satie na bu yo bu ni.” I seeri sɔ ɔ, haari ni bo Nyeme nɔani kpamaawa n kere sɔ ni.

⁹ Na wɔ se Nyeme ka, “Mini yaa, ma ba ka m ba yo u koroowa n wɔ.” Nyini la ka, Nyeme akun ciciri su dɛe yoowam kere nɔɔ læ, ye wɔ fa fɔfɔre aba.

¹⁰ Nyeme koroowa n læ ye i yoori n a. Kpekun n kpein ye i faari i ɲu yoori yoowa. Nyini ti ye wɔ kpakpara ya kere fin ayo ya casi n a.

¹¹ Yudaɔm Nyeme sayoowa dɔɲguyofɔ kere yo i Nyeme juma cɛen n kere wɔ, na i suyo nyini yoowa kun n sanɲa kere. Haari ni nyini yoowam n kere, bu be koro yi má minem satie bo i wo bu sunsunni nu ni.

¹² Ama, Yesu yiri yoori yoowa kpekun n kpein wɔ, bo i yo juma sanɲa kere, fa kɔ mine satie bo bu yo i su. Na wɔ nya akɔ atana angoro Nyeme saa fɔmbɔɔ su.

¹³ Fite nyini sanɲa ni, i ɲminda kabo Nyeme ba ma i kunma i kpɔɔm na i nana bu kere ɲu.

¹⁴ Nyini yoowa kun n dɛe ti, wɔ kpakpara minem fin kere na wɔ ma ba ti kabo Nyeme koro ka bu ti ni, sanɲa kere.

¹⁵ Awiewie Casi n gusu kaanri i sɔ kereeri ya. Wɔ du mɔ ase ka,

¹⁶ “Micera ɲa, sesesu n bo m ni bere adi i di
fa kɔ sanɲa bo i suba n la ka,
m fá m nɔani kpamaawa n wura bu sunsunni nu,
na m kere i gɔ bu ahore su.”

¹⁷ Na wɔ kaaki ase ka,

“M tɛnge má bu satiem bo ba yo bu n su,
kabo bu keteeri na ba su má m nɔani kpamaawa n su kun.”

18 Tɔ, Nyeme afa satie bo minem ayo i ace bu, nyini la ka, yoowa be wo má bere bo be yo i fa kɔ satie su kun.

Am ma ya cin dodo Nyeme

19 M ninbaam, Yesu dee mbunja n ti ye ya la ahoresi kere ka ya koro cin dodo Nyeme a, na ya koro wura Casi Kere Casi Soɔ n nu a.

20 Yesu ateke atin fɔfɔre bo i ma ngɔɔ nahore su ama ya. Kabo i faari i ɲu yoori yoowa ni, i ti ka wɔ teke atin ama ya na ya koro sin tani bambaka n bo bu fa kanda n ɲu, na ya wura Casi Kere Casi Soɔ n nu.

21 Tɔ, kisa na ya la Nyeme sayoowa dɔnguyofɔ bambaka bo i nie yere n bo ya ti Nyeme minem n su ni.

22 Nyini dee ti, am ma ya cin dodo Nyeme ni ya ahorembaa kun, na má ya yo sika be. Yesu mbunja n akpakpara ayi satie kere bo i wo ya ahore su a, na má ya sunsunni nu suma ya sangá kere ka ya yo satie. Nyeme nzue n gusu bo ba fa abie ya ni ama ya ɲunie ayo casi a.

23 Tama n bo ya ɲa ya la i ni, am ma ya bita i ni ya saa nnyɔ, má am ma ya fa sika wura nu, dama ya si ka Nyeme yo deke n bo wɔ fa sesesu adi i di ka i yo i ni.

24 Am ma ya sutu ya bengum fɔ, na ya buka ya bengu, na koro wo ya afien na ya yo sakpa.

25 Kabo i ti ye ni ka ya sutien ya nɔɔ na ya su Nyeme sangá kere ni, má am ma ya yaki i kabo nbem suyo barasu ni, ama, am ma ya sutu ya bengu fɔ na bu nya ahoresi buka su, dama ya kere ɲu ka Micera n dee ceen n adodo lee.

26 Tɔ, kisa na ya si kereewa n bo i ti nahore ni, na nzen ya toko kete i yo satie ni, yoowa be wo má bere bo ya yo i na Nyeme fa ya satie ce ya kun,

27 má ka ya ɲminda ni sere fa kɔ ceen n bo i suba na Nyeme bá di minem jɔre, na i fa bo ba kete i nɔanie n wura sin n bo i ti kekere agaya n nu, na bu ka ngbeen ni.

28 Nyeme nɔanie kpamaawa n bo i yo fa maari Moyisi ni, nzen sɔnɔ be keteeri na i yoori satie, na mine nnyɔ wara nsan diiri daani ka i ti sɔ, nkpienkpienm si má i mi aɲunfɔ, bu kun i wɔ.

29 Ye nzen i nya ti sɔ, sɔnɔ kere bo i buuri Nyeme Wa ni ngbeen na i sunsun ka Yesu mbunja n bo i yo ya casi n ti ngbeen, na i jɔɔ wura Awiewie Casi n bo i si ya aɲunfɔ ni ngasi nu, suicin barasu bɔnɔ ye am sunsun ka Nyeme fá cin i a?

30 Dama ya si ka Micera n ase ka, “Mini cín bu sui a. Mini tó bu kaari a,” na wɔ kaaki ase ka, “Mini dí m minem jɔre a.”

31 Wɔrɔ kere bo a to Nyeme saa nu, yiri bo i wo bere sangá kere ni, i la sere agaya.

32 Am tenge su, na am nie sangá bo am du mɔ nyaari anyunuteke fa kɔ labari kpa n su ni, haari ni bo am yo diiri wahara agaya ni, am afa ahoresi ade nyini kekereke n kere.

33 Sangá be bu yo kpie am nzuko, na bu kere am wuwuruwa jama nu. Na sangá be gusu na am asangá adi wahara ni am bengum bo bu kere bu wuwuruwa ni.

34 I ti nahore wɔ ka, am asi dansarakam aɲunfɔ. Bekun, haari nzen mine fiinri am nengem kere bo am la i ni, am ahore ti jɔɔwa a, dama am si ka am la deke bo i tara nyinim bo ba de am dɔ ni, nyini deke n yiri wo bere wɔ sangá kere.

35 Nyini dee ti, má am ma am ɲunie yoroki am, dama ahoresi n bo am la i ni, nyini ma am nya aceeri bambaka Nyeme dɔ a.

³⁶ Kisa, wɔ yo daka ka am la mindi, adena am yo Nyeme koroowa, na am nyá deke n bo Nyeme afa sɛsɛsu adi i di ka i ma am ni.

³⁷ Dama ba kere i Nyeme Jɔre Kadasi n nu ka,
“Wɔ ka kaan, i cé má,
yiri n bo i suba ni, i bá.

³⁸ M sɔnɔ bo i yo sa bo i kɔ atin su m dɔ,
i nyá ngɔɔ, i yarada n dɛɛ ti,
ama, sɔnɔ kere bo i kaakiiri i sin boori m,
m ahore jɔ má i mi ɲu.”

³⁹ Yere yiri, ya ti má minem bo bu kaaki bu sin, na bu ka ngbɛɛn ni, ama, ya ti minem bo ya yo Nyeme yarada na ya nya tiide wɔ.

11

Yaradayo jɔre

¹ Nzen ya yo Nyeme yarada, ya la ahoresi ka deke n bo ya yo i tama ni, ya nya i, na ya kaaki la ahoresi ka deke n bo ya nyumbaa ɲu má i n wo bere nahɔre su.

² Dawafom yoori Nyeme yarada n dɛɛ ti, ye i se ka i nyunu ayi bu sayoowa n a.

³ Ya yo Nyeme yarada n dɛɛ ti, ye ya koro fa si ka Nyeme yo jɔjɔri nɔɔnie wɔ, ye i fa yiiri durunya n a. Nyini ma ya si ka, dekem bo ya nyumbaa koro ɲu bu ni, Nyeme afa deke bo ya koro ɲu má i ayi bu n a.

⁴ Abeli yo yoori Nyeme yarada n dɛɛ ti, ye i koro yoori yoowa bo i ti kpa tara i gɔrɔ Keen dɛɛ n bo i yo maari Nyeme n a. I yarada n dɛɛ ti, ye Nyeme nyunu yiiri i aceeri n ye i seeri ka i ti sɔnɔ bo i yo sa bo i kɔ atin su i dɔ n a. Abeli ti sɔnɔ bo wɔ wu wɔ, ama, haari ni kisa, i yarada sayoowa toko yo juma ya dɔ.

⁵ Henoki yo yoori Nyeme yarada n dɛɛ ti, wɔ wu má, na Nyeme afa i ako i bi angoro, nyini ti ye be anu má i n a, dama Nyeme afa i ako i bi. Ba kere i Nyeme Jɔre Kadasi n nu ka, sanɔga bo Nyeme nya fa má i kɔ má i bi angoro ni, Nyeme nyunu yiiri i sayoowa a.

⁶ Nzen sɔnɔ ayo má Nyeme yarada, i mi koro yo má sa bo i yi Nyeme nyi, dama sɔnɔ kere bo i ba Nyeme dɔ, wɔ yo daka ka i mi yo yarada ka Nyeme wo bere, na i tɔ mine n bo bu nienie i busu ni ɲkatɔ nahɔre su.

⁷ Nowa yo yoori Nyeme yarada n dɛɛ ti, ye i yo deeri kabo Nyeme bɔbɔri i fa kɔ sam bo bu bá yo n su n a. I deeri Nyeme nɔɔnie n kpaari lee bambaka n ye i ni i dikafom wuraari nu ye ba wu má n a. I yoori sɔ n dɛɛ ti, nyini kere ka minem bo bu kaari durunya n nu n ti satieyofom a, ama, Nowa yiri, i yarada n dɛɛ ti, Nyeme ade i ka i yo sa bo i kɔ atin su i dɔ ɔ.

⁸ Abraham yo yoori Nyeme yarada n dɛɛ ti, sanɔga bo Nyeme fereeri i, na i seeri i ka i kɔ asien be bo i seeri ka i fá ma i n su ni, haari ni bo i si má deke bo i sukɔ ni, yarada n dɛɛ ti, ye i yo deeri Nyeme nɔɔnie n ye i fiteeri i nam asien su kɔri nyini asien n su a.

⁹ Yarada n dɛɛ ti, ye i kɔ juuri asien n bo Nyeme ase ka i fá ma i n su n a, dɔ ye i tanaari ka i ti wɔfɔ n a. I ni i wa Izaki, ni i anuma Jakɔbu yo boori nambue woori dɔ sanɔga be su wɔ. Haari ni bo bere yo ti minem bo bu nyaari deke n bo Nyeme ase ka i fá ma bu n a.

¹⁰ Abraham boroori i nyi nienieeri mie kpiri n bo Nyeme ni i tii ata i na i la má awieeri n a.

¹¹ Abraham yi Saara mmɔɔ yo yoori Nyeme yarada n dɛɛ ti, haari ni bo wɔ yo buke na i ti ɲɔrɔka ni, yarada n dɛɛ ti, ye i koro wuuri baa n a. I yo yarada ka Nyeme yó deke n bo i seeri ka i yó i ni.

¹² Haari ni bo má Abraham ti ka sɔnɔ bo wɔ wu ni, yiri nyini sɔnɔ kun n ye i busu nufom asunnu ka asarambaam bo bu wo angoro n a, ni kabo kunma nmie sunnu na i la má nɔ n a.

¹³ Nyini minem kere yoori Nyeme yarada a, haari bu ba wuuri. Ba nya má deke n bo Nyeme seeri ka i yó ma bu, bu ngɔɔ su ni. Ama, yarada dɛɛ n ti, bu njuuri deke n ka i wo dede wɔ, na ba de i ni ahorejɔ, na ba soro su ase ka bu ti wɔfom wɔ, wara nanatiirifom wɔ, durunya n nu fen.

¹⁴ Nyini minem kere bo bu seeri sɔ ni, i kere ka, bu boro bu nyi nienie bu tienngu asien busu wɔ.

¹⁵ Nzen má bu faari bu ahorembaa seeri asien n bo ba yo ayaki i n su ni anyumboro, má bu koro nya atin bo bu kaaki kɔ nyini asien n su bekun.

¹⁶ Ama, bu yo koroori asien be bo i tara bo bu yo yakiiri i n wɔ, yiri la Nyeme dɛɛ woobiri n bo i wo angoro ni, nyini dɛɛ ti, ye i ti má nyinse Nyeme dɔ ka bu fereeri i ka bu Nyeme n a, dama yiri ye wɔ sese mie kpiri be su ase bu a.

¹⁷ Abraham yo yoori Nyeme yarada n dɛɛ ti, ye i yo faari i wa Izaki ka i fa yo yoowa, sanga bo Nyeme yo koroori ka i yo i na i nie n a. Yiri bo Nyeme yo seeri i ka i yó sakpa ma i ni, i soroori su wɔ, ka i fa i wa kun n kpein n yo yoowa ma Nyeme,

¹⁸ haari ni bo Nyeme yo seeri i ka, “Izaki dɛɛ ti, ye a nyá busu nufom a.”

¹⁹ Abraham siiri ka Nyeme koro tenge Izaki fite yiwee nu. Nahore, i yarada n dɛɛ ti, na Nyeme atenge Izaki yiwee nu, dama Abraham dɔ, Izaki ti ka sɔnɔ bo wɔ wu ye wɔ tenge a.

²⁰ Izaki yoori Nyeme yarada n dɛɛ ti, ye i yo seeri i nbaa nnyom ni Jakɔbu ni Esawu ka, fa kɔ fa ba, Nyeme yo bu kisi n a.

²¹ Jakɔbu yoori Nyeme yarada n dɛɛ ti, sanga bo i ba sudodo ka i wu ni, na wɔ sere Nyeme ayo Yosefu nbaam nnyɔ ni kisi, na wɔ mie i kpama su ayasu asu Nyeme.

²² Yosefu yoori Nyeme yarada n dɛɛ ti, sanga bo i ba suwu ni, ye i jɔjɔri ka, Yisarelifom bá fite Ijipiti asien n su n a, na wɔ kere kabo bu yo i fuin n barasu.

²³ Moyisi si, ni i ni yo yoori Nyeme yarada n dɛɛ ti, bu wuuri i ni, ba soro má nɔanie n bo Ijipitifom feme n fa maari ni, na ba fa i afie sara nsan, dama bu njuuri ka i yo nyumi agaya.

²⁴ Moyisi yo yoori Nyeme yarada n dɛɛ ti, ye sanga bo i ba biiri biesɔ, i keteeri ka má bu fere i ka feme wa baabara n dɛɛ wa n a.

²⁵ I koroori kabo i ni Nyeme minem sanga di wahara n tara bo i di fiefie n bo i ce má na i do Nyeme ngasi ni.

²⁶ Yiri dɔ, nzen bu kpieeri i nzuko kabo bu kpie Kristo Tiidefo n ni, nyini la kperɛ tara deke kere bo má i nya i Ijipiti asien n su ni, dama i nyunu yo boroori aceeri n bo i bá nya i Nyeme dɔ ni su a.

²⁷ I yoori Nyeme yarada n dɛɛ ti, ye i fiteeri Ijipiti asien n su n a, haari ni bo feme n faari yaa i nju ni, wɔ soro má sere. I ti ka i nie njuuri Nyeme wɔ, yiri bo be koro nju má i ni, nyini dɛɛ ti ye i koro mindi jinaari ni nahore su n a.

²⁸ I yoori Nyeme yarada n dɛɛ ti, ye i yo kpamaari Butara cɛenkpiri n a, na wɔ kaaki ase Yisarelifom ka, bu kun nbombaam, na bu fa mbunja boroki bu sɔɔ anom su, adena Nyeme mereke n bo i kun n ba baari, na má i kun Yisarelifom nbaabiesɔ nkpienm n a.

²⁹ Yisarelifom yo yoori Nyeme yarada n dɛɛ ti, ye sanga bo bu na bu kpie kunma kpiri n bo bu fere i ka Kunma Kɔkɔre ni, ye i tiiri nu nnyɔ na atin

ada afien, na ba nati asien wuruuwa su asin n a. Ama, sanja bo Ijipitifom koroori ka bu kpie ni, nzue n diiri bu kere wo.

³⁰ Yisarelifom yo yoori Nyeme yarada n dee ti, sanja bo bu bara yeeri Yeriko mie kpiri n lesu ni, na kobe n bo ba ta abara aye mie n kere ato.

³¹ Bara sakara n bo bu fere i ka Rahabu yo yoori Nyeme yarada n dee ti, sanja bo Yisarelifom kuunri i minem bo bu keteeri na ba de ma Nyeme noanie n ni, ba kun ma i, dama yiri yo deeri Yisarelifom koresiyifom wofa faari bu fiere a.

³² To kisa, m si ma kabo m se kun, m la ma sanja bo m kan fa ko Gedeyon, ni Balaki, ni Samson, ni Yefeta, ni Feme Davidi, ni Samuweli, ni Nyeme noanie kanfom n jore n su.

³³ Bu yoori Nyeme yarada n dee ti, bu nbem kunmaari bu kpofa nfangafom lue nu wo, na nbem ayo sa bo bu ko atin su, na nbem anya deke n bo Nyeme seeri ka i yo ma bu ni, na nbem gusu akata jaram noo bo ba koro ayo ma pui.

³⁴ Na ba fa nbem awura sin bambaka nu ka bu yara bu, ama, na sin n ano, wo koro ayo ma bu pui. Na ba koro ka bu kpie nbem takobe ka bu kun bu, ama, na ba fite nu. Haari ni bo nbem ti daburukafom ni, bu nyaari fanga a, na ba tu lue ni asien nbem su sojam, na ba kunma bu.

³⁵ Nbara nbem yo yoori Nyeme yarada n dee ti, na Nyeme atenge bu lamokom bo ba wu n yiwee nu ama bu. Ama, na ba kere nbem wahara akun bu. Ba saaki ma bu noo na bu yaki bu nu ji, dama bu si ka bu ba tenge bu yiwee nu, na bu nya ngoo bo i la ma anusu.

³⁶ Na ba yo bu nbem anzasi afin bu ngbere, na ba cici bu nbem joroko, na ba fa bu awura dansaraka nu.

³⁷ Na ba tu nbem yabue abo akun bu, na ba kpie ati nbem nu nnyo, na ba fa takobe akun bu, na yaari ati nbem na bu sufa nbom ni sirim numa sufa yo bu suturam kata bu nu, na minem akere bu wahara ayo bu ngbeengbeeng kere.

³⁸ Bu ti mine kpam bo bu woowa tara durunya n nufom woowa, bu wo ma woobiri kun, bu nati yerengi boro kpantain n nu wo, ni bukam su, na bu suwura yabue buem, ni asienngu kunma n nu suda.

³⁹ Nyeme nyunu yo yiiri nyini minem kere sayoowa, bu yarada n dee ti, ama, ba nya ma deke n bo Nyeme seeri ka i yo ma bu ni.

⁴⁰ Dama Nyeme koro ka i ma yere deke kpa nahore su, kana deke n bo i koro ka i yo n yo yiwa, ma ka ya ni bere abo kun na i ma ya kere ti kabo i koro ka ya ti ni.

12

Kabo Nyeme cin i nbaam sui barasu ni

¹ Nyini minem bo bu yo yoori Nyeme yarada n sunnu, ba bara aye ya, na bu nie kabo ya su Nyeme atin n su. Nyini ti, am ma yere gusu yaki deke kere bo i kanda ya na ya koro su ma Nyeme ni, na ya yaki satie n bo ya koro i agaya ni, na am ma ya fa anyumboro na ya su atin n bo i ti ye ni ka ya su i n su.

² Am ma ya sunie Yesu. Yiri ti ya mofa a, na i ma ya yo Nyeme yarada kabo wo yo daka ka ya yo ni. I yo diiri wahara baka jaanu n su, na ba wura i nyinse, ama, haari ni nyini n kere, i cece awo ma nu, dama i nie nuuri fiemie n bo i ba di i ni, nyini ti, ye kisa, i tana Nyeme saa fomboro su i femeya n nu n a.

³ Am nie kabo i yo diiri wahara satieyofom saa nu, na ba koro má i jore, na i laari mindi barasu a. Am su i su, adena má am nunié yoroki am.

⁴ Kabo satieyofom kere am wuwuruwa na am mindi ni, am nya mindi ju má juubiri bo bu yi am ngoo.

⁵ Kabo am ti Nyeme nbaam na wo tu am fo asi am ahore ni, má am ma am wara afi nyini ni, bo i na,

“M wa, nzen Nyeme tu u fo, má a kete,

nzen i cin u sui gusu a, má a ma u nunié yoroki u.

⁶ Dama minem bo i koro bu n ye i tu bu fo a,

na minem kere bo wo fa bu ayo i nbaam ye i cin bu sui a.”

⁷ Wahara n bo am sudi i ni, am mindi na am fa i ka am si sucin am sui a. Nyini sukere am ka am ti i nbaam wo lee, dama baa be wo má bere bo i si cin má i sui.

⁸ Nzen Nyeme acin má am sui kabo i cin bo bu ti i nbaam kere sui ni, nyini la ka, am ti má i nbaam nahore su, am ti ka soma nbaam wo lee.

⁹ Ya sim bo bu wuuri ya ni, bu ba yo, bu cin ya sui wo, na ya ma bu jirima. Nzen i nya ti so yiri, wo yo daka ya de ya Si Nyeme noanie tara bu dee, adena ya nya ngoo.

¹⁰ Sangha bo ya yo ti nbaatumam ni, ya sim yo cin ya sui sangha kaan wo, kabo i ti ye ni ka bu yo ni, ama, Nyeme yiri cin ya sui, i yo i ni kpa dee ti wo, i koro ka ya nya i dee woowa n be wo.

¹¹ Sangha kere bo bu cin ya sui ni, i ti ka ya ahore ti saakiiwa a, i yo má ya fie, ama, nyini n kere sin, minem kere bo Nyeme cin bu sui na bu si ka ba yo sa bo i ko má atin su, bu nya ahoreda na bu wo wo kpa.

¹² Nyini ti, má am ma am nunié yoroki am, ama, am ma am kpekperere yo kenken.

¹³ Am susu Nyeme atin n su, na am nya fanga, adena má am gbaraki buka su.

Fotu kabo wo yo daka ka má ya kete Nyeme noanie n ni

¹⁴ Am kere boro am nyi na am tana laifie ni sono kere, na am wo wo bo i ti casi, dama woro kere bo a ti má casi, a nu má Nyeme.

¹⁵ Am si am nu sa, na má be fun Nyeme ahorma ni. Am kaaki si am nu sa, na má be fa sunsunni tie be ba saaki mine dongu na bu kaaki bu sin bo Nyeme.

¹⁶ Am si am nu sa, na má be sukpini nbaram, na má be gusu yo i nu ngbeen na i cece wo má Nyeme su nu, ka Esawu, bo diire dee ti na i toori i tienggu baawu kpien jinaabiri maari i niema ni.

¹⁷ I toori i baawu kpien jinaabiri n dee sin, sangha bo i seeri i si ka, i yo nyini kisi go i nu ni, na i si akete, haari ni bo i sun ni nyunvuin ni, wo koro akaaki má deke n bo wo yo i n kun.

¹⁸ Juubiri n bo am aba aju ni, i ti má deke bo am koro nu i, i ti má ka buka n bo Yisarelifom yo ko juuri su na bu fere i ka Sinayi ni. Bu ko juuri su ni, na ba nu ka i suje sin fofoe, na awosin awura dika n nu, na wo kata liim, na anjuma akpisi dika ni.

¹⁹ Na ba ti awie nga ka i fita ni fanga su, na ba ti akonvi nga ka i sujjo fanga su. Bu tiiri akonvi ni nga so ni, na bu seeri ni anyumbo ka bu koro má ka bu ti nyini jooowa n kun.

²⁰ Dama ba koro ade má noanie n bo Nyeme fa maari bu ni, i na, haari nzen nengdore be faari i nu kaanri buka ni, bu tu i yabue bo kun i.

²¹ Dekem bo bu nuuri bu buka n su n laari sere agaya n dee ti, na Moyisi mmoo ase ka, “Sere ati m agaya, na m nunié subobo m.”

²² Ama, deke bo am aba aju ni, am aba aju buka n bo bu fere i ka Siyon ni su a, ni Nyeme bo i wo bere sanja kere n dee mie kpiri ni, yiri la mie kpiri n bo bu fere i ka Yerusalem na i wo angoro ni, do ye Nyeme mereke akpiim atien bu noo ni ahorejo n a.

²³ Am aba jama n bo bu ti ka Nyeme nbaakpienm, na ba kere bu dama Nyeme dika n nu ni do a. Am aba Nyeme do, yiri bo i di sono kere jore ni. Am aba dawafom woobiri ni, bere bo bu yoori sa bo i ko atin su Nyeme do na wo ma ba ti kabo i koro ka bu ti n wo.

²⁴ Am aba Yesu do o, yiri ti afien donguyofa a, yiri ye wo fa seseesu fofore n aba. I mbunja n bo wo fite ago ni, ayo ya casi a, i la kperere tara Abeli dee.

²⁵ Am si am nu sa, Nyeme sujoko am do, ma am kete i, dama sanja bo i yo jokori Yisarelifom do durunya n nu fen na bu keteeri ni, wo yaki ma bu. Nyini ti, nzen i wo angoro sujoko ya do, na ya keteeri, ya yo se koro fite nu a?

²⁶ Nyini sanja, i konvi ngumi mmoo ma asien kpisi wo. Ama, kisa, wo se ka, "M kpisi asien n ni angoro n kere kpekun buka su."

²⁷ Kabo i seeri ka i kpisi i kpekun buka su n kere ka, deke n kere bo wo yi bu ni, i ba kpisi yi bu, adena dekem bo be koro kpisi ma bu n ba ka.

²⁸ Nyini ti, kabo Nyeme ama ya atin ka ya ni yiri sanja di i femeya n bo be koro kpisi ma i ni, am ma ya da i asi. Am ma ya kaaki da i asi, na ya bu i, na ya soro i ahore, na ya su i, kabo wo yo daka ka ya su i ni.

²⁹ Dama Nyeme bo ya su i n ti ka sin bo i di deke kere bo i ti ma kpa n wo.

13

Kabo ya yo na i sun Nyeme nu ni

¹ To, kabo Kristo dee ti na am ayo ka nibaa kun ni, am sukoro am benggu.

² Am tenge su na am sude wofom. Nbem yo yoori so o haari na ba de merdekem wofa, ama, ba si ma ka bu ti merdekem.

³ Ma am ma am wara fi minem bo bu wo dansaraka nu n sa, am fa i ka am ni bere ye ba sanja anyi am a. Na ma am ma am wara fi minem bo bu sudi wahara n gusu sa, am fa i ka ambere sudi wahara n a.

⁴ Am ma jirima wo am ajaam nu, na bieso n ni bara n kere bita bu nu, na ma be yo ngbeenngbeen, dama Nyeme ba di minem kere jore bo bu kpini nbaram, ni bo bu ko somaya ngbeenngbeen n kere.

⁵ Ma am ma am nyunu boro njwaa koro su agaya, ama, am ma am nyunu yi deke n bo am la i ni, dama Nyeme ase ka, "M yaki ma am ngbeen, m kaaki fa ma am ji ma."

⁶ Nyini ti, am ma ya fa ahoresi, na ya se ka,
"Micera ni ti m bukafa,
m soro ma sere.

Adamande koro yo m nzu wo?"

⁷ Am nie am mafom bo bu kan Nyeme jore n kereeri am ni. Am nie kabo bu woori wo kpa barasu, na am son bu yarada bo bu yoori i n su.

⁸ Yesu Kristo kaaki ma, kabo i yo ti ni, i toko ti so o, na i ti so o sanja kere.

⁹ Ma am su kereewa fofore barasu nbem su, na bu ma am mini atin kpa ni. I ti ye ni ka ya de Nyeme dee ahorama n bo i ma ya ahoresi ni, na ma ya de atin bo bu ciirem kere fa ko diire diiwam su, bo bu su nyini ciirem su ni, i buka ma bu.

¹⁰ Sa bo Yesu ayo ama ya n dɛɛ ti, ya fa i ka ya la Nyemɛ sayoowa yoobiri n dɛɛ diire bo Yudafom Nyemɛ sayoowa dɔnguyofom bo bu yo juma Nyemɛ Sereebiri Nambue n nu n la má atin na bu di be.

¹¹ Afɔ kere afɔ, Nyemɛ sayoowa dɔnguyofɔ kpien n fa nengendorem mbunja a, na i fa wura Casi Kere Casi Sɔɔ n nu. Na i fa yo yoowa ma Nyemɛ, fa kɔ minem satie bo ba yo i n su, na i ma bu nya fa nie n kere fite mie n aheme, na bu yara i sin.

¹² Nyini dɛɛ ti, ye Yesu gusu wuuri mie n aheme n a, adena i koro fa i mbunja n yo minem casi.

¹³ Sa n bo wɔ yo ama ya n dɛɛ ti, am ma ya kɔ i dɔ mie n aheme, na ya su i atin su, na ya ni yiri kere sanja di nyinse n bo i diiri n be.

¹⁴ Dama durunya n nu fen, ya la má mie be bo ya suwo nu sanja kere, ama, ya boro ya nyi sunienie mie kpiri n bo i bá ba n wɔ.

¹⁵ Nyini ti, buka n bo Yesu ayo ama ya n dɛɛ ti, am ma ya fa kansi fa ma Nyemɛ sanja kere. Ya saraka yoowa n bo ya fa ma Nyemɛ n la ka, ya teke ya nɔɔ, na ya kan kere minem ka Yesu ti Mibie n a.

¹⁶ Má am yaki kpayo, am buka am bengum sanja kere, dama nyini saraka yoowam sɔ, ye Nyemɛ koro a.

¹⁷ Am de am mɔfom nɔanie, na am su atin n bo bu fa kere am su, dama bere sukpie daafiri am busu n dɛɛ ti, ye Nyemɛ bá bisa bu kabo bu yoori bu juma n barasu n a. Nzen am deeri bu nɔanie, bu yó bu juma ni ahoreda a, ama, nzen am ade má bu nɔanie, nyini ma bu yo bu juma ni ahoresaaki a, na nyini sɔ gusu buka má am.

¹⁸ Am susere Nyemɛ ma ya sanja kere. Yere dɔ, i ti nahore wɔ ka ya yo sa bo i kɔ atin su wɔ, na ya sunsunni nu ma ya ka ya yo sa bo i kɔ atin su wɔ sanja kere.

¹⁹ M sere am wɔ, am boro am nyi sere Nyemɛ ma m, na i buka m, adena i ce má, na m kaaki ba am dɔ bekun.

Awieeri su dɛɛ nyemesere ni

²⁰ Nyemɛ ahoredafɔ n atenge ya Mibie Yesu Kristo i yiwee n nu. Nyemɛ faari Yesu mbunja n faari sesesu diiri i di n ti ye Yesu yoori ya sasafɔ kpiri n a. Nyini sesesu n la má awieeri.

²¹ Nyini ti, m sereeri Nyemɛ ka i ma am deke kpa n kere bo i ti ye ni ka am nya i, na am yo i sa koroowa, na i kaaki ya wo, na ya yo mine n bo i ahore jɔ ya ɲu. Yesu Kristo dɛɛ ti, ye i yo nyini n kere a. Yiri ti ye ni ka ya kansi i sanja kere sanja. Ami.

²² M ninbaam, m sere am wɔ, am yo sawore, na am so am sui, na am de ahin jore n bo i wo ahin kadasi n nu, na m sufa tu am fɔ ni. Dama jore n bo m sukere ma am n sunnu má.

²³ M koro ka am si ka, ya niwa Timoti wo má dansaraka nu kun, ba yaki i, nzen i ba tuuri m nde, na m ba suba, m ni yiri kere bá nie am busu.

²⁴ Am bisa am mɔfom kere ni Nyemɛ minem kere dɔngu ma ya. Ya ninbaa yaradayofom bo bu wo Itali asien n su n kere bisa am dɔngu.

²⁵ Nyemɛ buka am kere.

Kadasi n bo YAKOBO akerε i ni

¹ Mini Yakobo bo m ti Nyεmε ni ya Mibiε Yesu Kristo dεε akoo ni, m bisa Kristo jamam n kerε dɔngu, berε bo ba sandi abara aye durunya n kerε nu ni.

Yaradayo ni alecira jɔrε

² M ninbaam, nzen gberεgbere be tu am, am ma am ahore jɔ.

³ Dama am si ka am yarada bo am ayo Nyεmε n dεε ti, ye nyini gberεgbere n tu am a, na am mindi ɲuuri i awieeri, am koro mindi ɲu gberεgberεm bo bu tara nyini n mmoo awieeri.

⁴ Am ma am mindi n sun am nu, adena am woowa kerε ti kabo Nyεmε koro ka i ti ni na má pui kpiε am su.

⁵ Ama, nzen alecira akpiε am nu be su, i ti ye ni ka i mi sere i Nyεmε dɔ, yiri bo i ce sɔnɔ kerε aceeri ni i kunnu kun ni, na i wura má be nyinse ka i mi asere i n dεε ti. Nyini ti, nzen be sere Nyεmε, yiri má i mi alecira n a.

⁶ Ama, nzen be sere Nyεmε, i ti ye ni ka i mi yo yarada ka deke bo i sere i ni, Nyεmε má i wɔ, na má i mi yo sika, dama sɔnɔ kerε bo i yo sika, i ti ka nzue bo aɲuma bo i kɔ i sin ba i nyunu wɔ.

⁷⁻⁸ Nyini sɔnɔ n bo i yo sika sɔ ni, i sunsunni ti nnyɔ nnyɔ ɔ, fa kɔ Nyεmε dɔ, i si má i jinaabiri. Má i mi n sunsun ka i nya pui fite Mibiε n dɔ.

Fɔtu fa kɔ Kristo jama n yaarifɔm ni nengefɔm dɔ

⁹ Tɔ, ya niwa bo i ti yaarifɔ, na Nyεmε awura i kpiri, i ti ye ni ka i mi ma i ahore da.

¹⁰ Na ya niwa bo i ti nengefɔ gusu, na Nyεmε ayo i kaan, i ti ye ni ka i mi ma i ahore da. Dama i ce má na i ni i nenge n kerε bá wo má berε, kabo wura pum ce má, na i ni i nyumi n kerε kpɔnkpɔn barasu ni.

¹¹ I ti sɔ ɔ, kabo wiε ba bi, na i kekere n bo kpɔnkpɔn wura pum na i wu, na i nyumi wie ni. Kabo nengefɔ n gusu ni i nenge n ti lεε. Sanga bo i nyunu aba aboro i juma su ni, i ni i nenge n kerε bá wo má berε kun.

Fɔtu fa kɔ sanga bo am wo gberεgbere nu ni

¹² Terefiε wo sɔnɔ kerε bo gberεgbere tu i, na i mi saaki má i nɔɔ n dɔ. Nyini sɔnɔ n koro mindi ɲuuri nyini gberεgbere n awieeri, i nyá ɲɔɔ Nyεmε dɔ, nyini la aceeri n bo i yo seeri ka i fá ma berε bo bu koro i ni.

¹³ Nzen gberεgbere n sɔ n atu be na i ma i wura satie nu, má i mi se ka, “Nyεmε ayo m ye m wura satie nu a.” Dama pui koro yo má Nyεmε na i wura satie nu, na i gusu yo má be na i mi wura satie nu.

¹⁴ Ama, deke bo i ma sɔnɔ wura satie nu n la i mi ni i tii dεε konvikiya a, nyini ma i cin dodo satieyo a,

¹⁵ na nyini konvikiya n nya cin i wura satie nu na i mi yo satie be, na nyini satieyo n nya ba bi wieeri, i fa yiwee ba a.

¹⁶ M ninbaa koroowam, má am daka am ɲu.

¹⁷ Aceeri kerε bo i ti kpa na i ti kabo Nyεmε koro ka i ti ni, i kerε fite aɲgoro ya Si Nyεmε dɔ ɔ, yiri yiiri deke n kerε bo i ta aɲgoro n a. I wo ti i wo wɔ, na i ma má awosin yo má na i kaaki deke be.

¹⁸ I dεε koroyanu, na wɔ fa i nɔanie n bo i ti nahore n ama ya, ye ya yo i nbaam. I yoori sɔ ɔ, adena ya yo deke n kerε bo wɔ yi bu n tii.

Am de Nyeme nɔ́aniɛ n na am yo kabo i kere ni

¹⁹ M ninbaa koroowam, i ti ye ni ka am ti ahin sereya n bu, ka, sɔ́nɔ kere so i sui ndende na i ti, má i mi koro nde jɔ́jɔ, má i kaaki fa yaa ndende.

²⁰ Dama yaa kere má sɔ́nɔ na i yo sa bo i kɔ́ atin su Nyeme dɔ́.

²¹ Nyini ti, am yaki sa ngbɛɛnngbɛɛn, ni satie kere yo. Am yo am ɲu kaan fa ma Nyeme, na am de i nɔ́aniɛ n bo wɔ́ fa awura am ahorembaa su ni. Dama nyini nɔ́aniɛ ni koro de am tii ji a.

²² Am yo kabo Nyeme nɔ́aniɛ n kere ni. Má am dadaka am ɲu ka am ati i na am yo má kabo i kere ni.

²³ Dama nzen be tiiri nɔ́aniɛ n na i yo má kabo i kere ni, i mi ti ka sɔ́nɔ bo i fa niɛɛnu nie, na i ɲu i ɲu wɔ́,

²⁴ ama, na i nya faari niɛɛnu n seeri, na i kɔ́ wieeri, a ɲu ka i wara afi kabo i nyunuawa ti barasu.

²⁵ Ama, sɔ́nɔ kere gusu bo i fiitiiri Nyeme nɔ́aniɛ kpamaawa n nu, nɔ́aniɛ kpamaawa n bo i ti kabo Nyeme koro ka i ti n na i ma minem nyaari bu tii ni, na nzen i mi boro i nyi su nɔ́aniɛ n su, na i mi ti má sɔ́nɔ bo i ti nɔ́aniɛ n na i wara afi i, ama, na i ti sɔ́nɔ bo i yo kabo nɔ́aniɛ n kere ka i yo ni, i mi yiri, Nyeme yó i kisi fa kɔ́ i sayoowa kere nu.

²⁶ Sasu bekun, sɔ́nɔ kere bo i ɲa i su Nyeme atin su, na i koro tara má i nɔ́, i mi daka i ɲu wɔ́ lɛɛ, na i nyemesu atin n ti ngbɛɛn wɔ́.

²⁷ Nyemesu atin bo be su i su n na i la má gela be ya Si Nyeme dɔ́ n la ahin, ka, i mi nie ayikam ni nkunafɔ́m su, bere bo bu di yaari ni, na i mi kaaki tara i ɲu na má durunya n nufɔ́m ma i yo fin be Nyeme dɔ́ ɔ́.

2

Fɔ́tu fa kɔ́ tantambunu

¹ M ninbaam, kabo am yo Yesu Kristo yarada ni, yiri bo i ti ya Mibie Jirimafɔ́ ni, má am fa tantambunu ni am beɲgu.

² Ma m fa i ka, nzen mine nnyɔ́ nbem ba wuraari am tientienbunɔ́ sɔ́ n nu, na kun wura sutura kpakpa ni sika ɲgaa, na nyinga n ti yaarifɔ́ na i wura sutura titiiwa,

³ na nzen am nu kun se bo i wura sutura kpakpa n ka, “Jande, ba tana ahin tanaabiri nyunyumi n su,” na i nya se yaarifɔ́ n ka, “Wɔ́rɔ, ka jina dɔ́, nzen má nyini, ba tana m jaa bu fɛn,”

⁴ nyini kere ka am sufa tantambunu atin lɛɛ, na am sunsunni tie ma am sufa kpakpaakinu ba lɛɛ, má sɔ́?

⁵ M ninbaa koroowam, am ti fɛn. Má Nyeme yiiri yaarifɔ́m bo bu wo durunya n nu n ka bu ti ajekɛfɔ́m i dɔ́, bu yarada n dɛɛ ti a, na bu nyá femeya n bo wɔ́ se ka i fa ma minem bo bu koro i n a, nzen sɛ?

⁶ Ama, amɛɛ bu yaarifɔ́m ngbɛɛn wɔ́. Nɲmam kere am wahara n a? Nɲmam kaaki cin am kɔ́ jɔ́ɛ diibirim n a? Má nengefɔ́m n a?

⁷ Má bere jɔ́jɔ wura duma n bo i la anyunuyi ni ɲgasi nu n a? Yiri ye Nyeme afa ama am na i kere ka am ti i dɛɛm ni.

⁸ Ba kere i Nyeme Jɔ́ɛ Kadasi n nu ka, “Koro u beɲgu kabo a koro u ɲu ni.” Nyeme femeya n nu nɔ́aniɛ kpamaawa bambaka n lɛɛ. Nzen am yo sɔ́, nyini ti kpa a.

⁹ Ama, nzen am laari tantambunu, am ayo satie, na Nyeme nɔ́aniɛ kpamaawa n kere ka am ti ketemafɔ́m wɔ́ lɛɛ.

¹⁰ Wɔ́rɔ kere bo a suuri Nyeme nɔ́aniɛ kpamaawa n kere su, ama, na a saakiiri i kun n kpein mmɔ́, a saaki nɔ́aniɛ kpamaawa n kere lɛɛ.

¹¹ Nyeme bo wo se ka, “Má a kpini u beɗgu yi” ni, yiri akaaki ase ka, “Má a kun sɔnɔ” n a. Ama, nzen haari a kpini má u beɗgu yi, ye a kuunri sɔnɔ, a yo ketemafo fa ko noaniɛ kpamaawa n su lee.

¹² Am ma am jɔjɔwa ni am sayoowa kere ka am ti minem bo Nyeme bá fa i noaniɛ kpamaawa ni fá di am jɔre a, nyini noaniɛ kpamaawa n bo i ma minem nya bu tii ni.

¹³ Dama jɔredi cɛen, minem bo bu si má bu beɗgum aɗunfo ni, Nyeme si má bere mmɔɔ aɗunfo. Ama, aɗunfo sifom ni, bere dí nasara, jɔredi cɛen ni.

Fotu fa ko yarada ni i sayoowa

¹⁴ M ninbaam, nzen sɔnɔ ɗa i yo Nyeme yarada, na i sayoowa kere má ka i la yarada, nyini yarada ni koro de i tii ji, nzen se? Ai, nyini ti ɗgbɛen wo lee.

¹⁵ Ma m fa i ka, nzen am ninbaa Kristo jama nbem wo bere bo bu la má diire, na bu la má sutura,

¹⁶ na nzen am nu kun seeri i ka, “Ko ni ahoreda. Nyeme ma u na a di, na i ma a nya sutura.” Nzen a seeri so, na a ma má i mi koroowa ni, i kpa la boɔɔ?

¹⁷ Nyini ti, nzen a la yarada n ɗgumi, na u sayoowa kere má ka a la yarada, i ti yarada ɗgbɛen wo lee.

¹⁸ Be koro se ka, “Ahin sɔnɔ n yiri yo Nyeme yarada wo, ama, ahin n yiri yo sakpa a.” To, ye sɔnɔ yo se kere ka i yo Nyeme yarada, bo i yo má sakpa a? Mini yo sakpa a, nyini kere ka m yo Nyeme yarada.

¹⁹ A ɗa a yo yarada ka Nyeme ɗgumi wo bere a. Nfan. Haari ajinim mmɔɔ si i so o, na bu ɗuniɛ subobo bu ni sere.

²⁰ Woro sinnzin ɗgbɛen ni, a koro ka m kere u ka yarada yoowa bo i kere má sakpa n ti yarada ɗgbɛen wo, nzen se?

²¹ I yo se ye Nyeme deeru ya na Abraham ka i yo sa bo i ko atin su i do a? Abraham sayoowa n dee ti ye Nyeme deeru i so a, dama Abraham yo faari i wa Izaki fa seeri Mikun n yoowa yoobiri n ka i fa i yo yoowa ma Nyeme ni.

²² A ɗu má i? I yarada yoowa fa sanɗa ni i sakpa yoowa kere yoori kun wo. Na i sayoowa n akere ka i yarada n ti kabo Nyeme koro ka i ti n wo.

²³ So ye deke n bo bu kerɛeri i Nyeme Jɔre Kadasi n nu n ayo yiiwa a, ka, “Abraham yoori Nyeme yarada n dee ti, na Nyeme ade i ka i yo sa bo i ko atin su i do.” Nyini ti, ye bu fereeri i ka Nyeme danfo n a.

²⁴ To, m ɗa am aɗu i e, ka sɔnɔ sayoowa ma Nyeme de i ka i yo sa bo i ko atin su i do a, má ka i mi yarada ɗgumi ti.

²⁵ I ti so o lee, fa ko bara sakara be bo bu fere i ka Rahabu n do. Dama dawa sanɗa, yiri yo bukaari Yisarelifom dee koresiyifom n a, na wo kere bu atin na ba foro bu kpofom saa nu. Nyini sayoowa n dee ti, na Nyeme ade i ka i yo sa bo i ko atin su i do o.

²⁶ To, kabo ɗumi awo má aɗuniɛmbaa n nu na i ti fuin ni, so ye i ti a, nzen a la yarada na u sayoowa kere má ka a la yarada, yarada ɗgbɛen lee.

3

Fotu fa ko kabo ya bita ya taferema

¹ M ninbaam, má am donɗu yo am ɗu kerefom. Dama am si ka yere bo ya ti kerefom ni, ya jɔre diiwa bá yo kekereke agaya a.

² Ya kere ba yo, ya yo sam bo bu ko má atin su wo. Ama, nzen sono kere bo i jójowa kere ko atin su, i mi woowa n ayo kabo Nyeme koro ka i yo n wo lee. I kere ka i mi n la tarabuŋu sa kere nu lee.

³ Am ma ya nie kpɔŋɔ. Ya fa karafi wura kpɔŋɔm nɔɔ ɔ, na ya kunma bu fanja na bu yo deke kere bo ya koro ka bu yo i ni.

⁴ Am ma ya nie lee bambaka gusu, i ni i bambaka n kere ni, haari nzen aŋuma bambaka subo i ko deke be, lee kanfo n koro fa napoku baka n bo i ti kaan ni lee ni, na i kan i ko deke kere bo i koro.

⁵ I ti so lee ni taferema n gusu, i ni bo i ti kaan aŋuniembaa n nu n kere ni, i koro saaki deke dɔŋgu.

Nie kabo sin ti barasu a, haari i ti kaan se, i koro je boo bambaka.

⁶ Taferema n ti ka sin wo lee. Bekun, ya ŋuniembaa n nu, i kaaki ti ka satiem bo ba yi durunya n nu n wo, i satie n sa aŋuniembaa n kere wo. I yo juma ka sin wo, na i saaki sono ŋuniembaa n fite ceen n bo bu wuuri i n fa ko ju haari i yiwee ceen. Yiko bo taferema n la i na i yo so n fite ceema sin n nu wo.

⁷ Adamande kunma deke n kere fanja, i ajaannam o, i lanƙpetefom o, i cinbukunnusufom o, ni jombaam o. Na wo koro ata bu kere.

⁸ Ama, taferema yiri, sono be nya koro kunma má i fanja. I ti deke tie wo, bo be koro tara má i. I ti ka wo yi ni bore bo i kun wo.

⁹ Ya fa yiri fa kansi Micera n bo i ti ya Si n a. Na ya kaaki fa yiri saaki minem bo Nyeme ayi bu ka bu ferema ni yiri n a.

¹⁰ Nyini anɔɔ kun n ye kansi ni saaki fite nu a. M ninbaam, wo yo má daka ka i ti so.

¹¹ Bura kun koro tie nzue kpa, ni nzue tie, nzen se? Ai, i koro yo má.

¹² M ninbaam, am si ka damba baka koro su má ŋuinmbaa. Cumi baka gusu koro su má damba. I ti so ɔ lee, bura bo i nzue ti lalaraki, i koro tie má nzue bo i yo fie.

Fotu fa ko alecira bo i fite Nyeme do ni

¹³ Nma wo am nu bo i la alecira ni si a? I ti ye ni ka i mi kere ka i ti so ɔ, fa ko i woowa kpa su, na i yo sakpa, na i wo benle, nyini kere ka i la alecira.

¹⁴ Ama, nzen am susi kore ahorembaa su, na am suyo wi, na am bita anyii sunsunni, má am bita fo ka am la alecira, na má am bu kore jaraki nahore n so.

¹⁵ Nyini alecira n so fite má Nyeme do, ama, i fite durunya n nu fen wo, i nati má Nyeme atin su, i ti Sitana dee wo.

¹⁶ Deke bo koresi, ni anyii wo, kpakpaakinu ni satie yoowa barasu kere wo do ɔ.

¹⁷ Ama, sono bo i la alecira n bo i fite Nyeme do n la ka, i woowa ti casi. Bo i to su n la ka, i koro tanalaifie, na i la wo benle, na i de fotu, na i si aŋunfo agaya, na i yo sakpa beberebe, na i la má tantambunu, na i kaaki la má burukɔnu.

¹⁸ Tanalaiefom bo bu yo tanalaifie juma ni, bu ŋkatɔ n la sam bo bu ko atin su Nyeme do n wo.

4

Fotu fa ko kabo ya da ya ŋu asienɔgu fa ma Nyeme ni

¹ Nzu ti ma am di aluwa, na am suse akuruwa am ŋuŋu nu a? I fite ka am sunsunni ti tie, fa ko am ahorembaa koroowa beberebe n bo i wo am ŋuniembaa nu, na i kpie am daafiri n dee ti a, má so?

² Am koro deke nbem, na am nya má bu n ti, ye am koro ka am kun am bengum n a. Am konviki wura minem nenje nu, na am nya má i n ti, ye am se akuruwam, na am di aluwa n a. Am sere má Nyeme n de ti, ye am nya má am koroowa n a.

³ Deke bo i ti na am sere Nyeme na am nya má i n la ka, am sere ni sunsunni tie wɔ. Am sere dekem ka am fa yo am kunnu koroowa a.

⁴ Ambere bo am su má Nyeme ni, am si má ka sɔnɔ kere bo i koro durunya n nu nenjem agaya, ti Nyeme kpɔfɔ ɔ, nzen se? Nyini ti, sɔnɔ bo i fa i ahorembaa se durunya n nu nenjem su, i mi ti Nyeme kpɔfɔ ɔ lee.

⁵ Má am sunsun ka deke bo ba kere i Nyeme Jɔre Kadasi n nu n ti ngbeen wɔ, ka, “Sɔnɔ kere bo i fa i awiewie n bo Nyeme afa ama i n suuri deke be sin Nyeme ɲu, Nyeme si i kore agaya.”

⁶ Ama, ahɔroma n bo Nyeme afa ama ya n sunnu. Nyini ti, ye ba kere i Nyeme Jɔre Kadasi n nu ka,

“Nyeme kete kpirikorofɔm wɔ,

ama, na i fa i ahɔroma n ma tarakam.”

⁷ Nyini ti, am fa am ɲu ma Nyeme. Am kete Sitana, na i ɲmáti yaki am.

⁸ Am cin dodo Nyeme, na i gusu cín dodo am. Ambere satieyofɔm, am yi am saa fite satie nu. Ambere anɔɔ nnyɔ nnyɔfɔm, am yo am ahorembaa casi.

⁹ Am satie de ti, am ma am ahore saaki, na am sun. Am fa am siri fa kaaki sun, na am fa am ahorejɔ fa kaaki ahoresaaki.

¹⁰ Am da am ɲu asienɲu ma Nyeme, na yiri bá wura am kpiri.

Fɔtu fa kɔ kabo má ya jaraki ya bengum ni

¹¹ M ninbaam, má am jɔjɔ tie ma am bengum. Wɔrɔ bo a jɔjɔ tie ma u lamɔkɔ, wara a jaraki i, a jɔjɔ tie afa ako Nyeme nɔanie kpamaawa n su ajaraki i lee. Nzen a nya yoori sɔ, a nya ti má sɔnɔ bo i de Nyeme nɔanie kpamaawa n lee, ama, a yo u ɲu ka jɔredifɔ lee.

¹² Nyeme ɲgumi ti i nɔanie n kpamafɔ a, na yiri ɲgumi kaaki ti i jɔredifɔ a, yiri bo i koro de minem tii ji na i kaaki koro ma bu ka ngbeen ni. Wɔrɔ la ɲma na a jaraki u bengum a?

Fɔtu fa kɔ yanfɔya atin su

¹³ Am ti fen, ambere bo am se ka, “Nyuma, wara ahunma, ya kó ahin mie n su, na ya kó yo afɔ kun dɔ, na ya yó juma, na ya nyá ɲwaa beberebe ni.”

¹⁴ Ambere, haari am si má sa bo i bá yo am ahunma mmɔɔ. Am ni am ɲgɔɔ ti ka se? Am ti ka bore wɔ, bo i tɔ na i ce má, na wie ba tie, a ɲu ka wɔ kpɔnkpɔn ni.

¹⁵ Deke bo i ti ye ni ka am se n la ka, “Nzen Nyeme diiri su, ya wó bere, na ya yó ahin ni ahin.”

¹⁶ Ama, kabo i ti ni, ambere koro kpiri wɔ, na am sufɔ. Nyini yanfɔya sɔ n kere ti má kpa.

¹⁷ Tɔ, nyini ti, sɔnɔ kere bo i si sakpa bo i yo i, na i yo má i, i mi yo satie wɔ lee.

5

Fɔtu fa kɔ nenjefɔm dɔ

¹ Ambere nenjefɔm, am ti fen. Sa ngbeenngbeenm bo bu bá tu am n de ti, am sun na am subo awie.

² Am ajeki n kere susaaki, na nvɔrem sumuka am suturam n kere.

³ Am sika ni am jete kere suwura ngambulaari, na bu ngambulaari wuraaawa ni bá ma Nyeme jaraki am, na i káaki ba yara am ka sin, am nuniembaa nu. Am atien ajeké nɔɔ afa ase fa kɔ durunya n awieeri wo lɛɛ.

⁴ Sasu bekun, am akete ka am tɔ má jumayofom nkato, bere bo bu tambu am fiesu nenje mbaa ni. Am ti kabo bu kan am ndie a, bu awie bo n kere ato Micera Yikofɔ n sui nu.

⁵ Kabo am wo durunya n nu fen ni, am adi fie, na am ayo am kunnu koroowa. Am adi ayo ngbingbiri ka toora dɔdɔɔrifom bo bu sukɔ ka bu kpie bu kom ni.

⁶ Minem bo bu la má ngasi be ni, bere n ye am ama ba di bu jɔre acin bu sui akun bu a. Bu kete má am wɔ.

Awieeri su dɛɛ fɔtu jɔrem ni

⁷ Nyini ti, m ninbaam, am yo sawɔre nminda fa kɔ cɛɛn n bo Mibie ni bá ni. Am nie kabo dɔdɔɔrifɔ yo sawɔre nminda, haari kabo bu fiesu diire bá yo kpakpa barasu. I yo sawɔre nminda kpanyini nzue kɔ tu takoku wɔ.

⁸ Am gusu yo sawɔre. Am ma am ahore si, dama Mibie n ba sanga n adodo.

⁹ M ninbaam, má am wo waraki su, sukan am benju ndie, adena má Nyeme bá di am jɔre. Am ti fen, yiri Jɔredifɔ n lɛɛ, yiri jina anɔ n nu n a.

¹⁰ M ninbaam, am ma ya tenge su, fa kɔ Nyeme nɔanie kanfom n bo bu yo jɔjɔri Micera n duma n nu ni. Am su bu jaa yiiwa su, kabo bu yo yoori sawɔre mindi diiri wahara ni.

¹¹ Nahɔre, minem bo sa tu bu, na bu la mindi kɔ nju i awieeri ni, bere ye ya fere bu ka terefiefom a. Am tiiri kabo sɔnɔ be bo bu fere i ka Yobo n yo laari mindi barasu, fa kɔ ni wahara n kere bo i yo diiri i ni. Am si kabo kasin na Micera n abuka i ni. Dama Micera n si anunfo na i la koro agaya.

¹² M ninbaam, jɔre bo i buka i kere su n la ka, má am tan deke be ndie fieo. Má am se ka am tan asienju, wara am tan angoro. Nzen u jɔjɔwa n bu la ka ɛɛn, am se ka, “ɛɛn.” Na nzen u jɔjɔwa n bu la ka ai, am se ka, “Ai.” Adena, má Nyeme di am jɔre na i yo am ngbeen.

¹³ Nzen be wo am nu bo sa be atu i, i ti ye ni ka i mi sere Nyeme. Na nzen be wo am nu bo i ahore ajɔ, i ti ye ni ka i mi di jue kansu Nyeme.

¹⁴ Nzen be wo am nu bo i la má laifie, i ti ye ni ka i mi fere Kristo jama nkpienkpienm na bu ba sere Nyeme ma i, na bu nunuka i nguin, Mibie n duma n nu.

¹⁵ Nyini nyemesere n bo bu sere i ni yarada ni, i má tukpakifɔ n nya laifie, na Mibie ni má i yasus. Na nzen haari wɔ yo satie mmɔɔ, Nyeme fá i satie n ce.

¹⁶ Nyini dɛɛ ti, am kan am satie bo am ayo i kere am benju, na am sere Nyeme ma am benju, adena am nya laifie. Sɔnɔ bo i yo sa bo i kɔ atin su Nyeme dɔ ni, i nyemesere la fanga, na i yo juma nahɔre su.

¹⁷ Nyeme nɔanie kanfo n bo bu fere i ka Eliya ni, i yo tiiri adamande ka yere wɔ, na wɔ sere Nyeme ni anyumboro su, ka, má nzue tɔ, na nzue n ato má asien n su afo nsan ni sara nsen.

¹⁸ Na wɔ kaaki asere Nyeme, ka, i ma nzue n tɔ, na wɔ tɔ, na asien n diire mbaa kere akaaki ayo.

¹⁹ M ninbaam, nzen am nu kun miniiri nahɔre atin ni, na am nu kun be faari i kpieeri i nyi baari atin n su,

²⁰ i ti ye ni ka i mi n si nu ka, sɔnɔ kere bo i yiiri satieyofɔ fiteeri i satie atin n su, i mi de nyini sɔnɔ n tii fite yiwee nu, na i ma Nyeme fa i mi satie beberebe n fa ce i.

Kadasi ciciri su bo **PETORO** akere i ni

¹ Mini Petoro bo m ti Yesu Kristo jaramasa ni, sukere ahin kadasi n na m fa ma ambere Nyeme minem bo wo yi am na am ti wofom na am asandi abara aye, na am wo Pontusi, ni Galatiya, ni Kapadosiya, ni Esiya, ni Bitiniya aworem n nu ni.

² Nyeme koroyanu dee ti, ye wo du mo ayi am ye i Awiewie Casi n ama am ayo i dee minem a, adena am de Yesu Kristo noanie ni, na i mbunja n nmisi am na i yo am casi. Nyeme buka am na i ma am ahoreda ko sin su.

Deke bo ya la i tama ni

³ Am ma ya kansi Nyeme, yiri bo i ti ya Mibie Yesu Kristo Si. Wo si ya anunfo agaya n dee ti, ye wo ma ya yo mine fofore, ye ya la tama wo ni ngoo a, dama i tengeeri Yesu Kristo i yiwee n nu wo.

⁴ Na am nya aceerim bo Nyeme afa ase angoro anminda ka i fa ma am ni. I ti aceeri bo i saaki ma, i yo ma fin, na i kaaki wie ma.

⁵ Am ayo Kristo yarada n dee ti, Nyeme la yiko bo i sasa am haari ni bo am ba nya tiide n bo wo sese i su ka am ba nya i awieeri su sangani.

⁶ Nyini kere dee ti, ye am la ahorejo n a, haari nzen wo yo daka ka am ahore saaki kaan fa ko kekereke barasu barasu n bo kisa am sunu i ni.

⁷ Nzen am koro mindi deeru nyini kekereke barasu n kere, nyini kere ka am ayo Kristo yarada nahore su a. Kabo am ayo Kristo yarada ni, i la anyunuyi tara sika bo i ka ngbeen ni. Sika yiri, bu fa i wura sin nu wo, na bu nie kabo i ti barasu, so ye Nyeme ma am di nyini waharam n a, na i nie kabo am ayo Kristo yarada n barasu ni. Nzen am ayo i yarada ni nahore su, een n bo Yesu Kristo ba yi i nu fite fofoe nu ni, am nya kansi, na bu wura am kpri, na bu ma am jirima.

⁸ Am nyumbaa nya nu ma yiri Yesu ni, ama, am koro i, haari ni bo am nyumbaa koro nu ma i kisa ni, am yo i yarada a, na am ahore ajo ako asin su, na am si ma kabo am se barasu,

⁹ dama am anya am yarada n kpere, yiri la tiide n bo am anya i ni.

¹⁰ Nyini tiide n jore ye dawa dee Nyeme noanie kanfom fiitiri i nu na bu si i n a, ye bu kan kereeri minem fa ko sakpa n bo Nyeme ba yo ma am n su n a.

¹¹ Na Kristo Awiewie n bo i wo bu do n adu mo akere bu kabo Kristo, Tiidefo n bo Nyeme ase ka i sunma i n ba diiri wahara ni, ni kabo i woowa ti kpri barasu ni, i wahara di n sin. Na ba boro bu nyi na bu si kabo yiri Kristo Tiidefo n ti barasu, ni sangani bo nyini sam ni ba yo ni.

¹² Na Nyeme ama bu asi nu ka jore n bo ba kan i ni, i ti ma ka i buka bere ni bu ti wo, ama, i ti deke bo i buka ambere wo. Yiri ye kisa am ati i afite minem bo bu kan labari kpa n kereeri am do n a. Nyeme maari i Awiewie Casi n fiteeri angoro ba maari bu yiko ye bu kaanri i jore n kereeri mine a. Nyini jorem ye Nyeme merkem mmoo koro ka bu nie nu na bu si i bu n a.

Kabo i ti ye ni ka ya woowa ti casi barasu ni

¹³ Nyini dee ti, am sese am sunsunni su, na am tara am nu, na am fa am tama kere wura sakpa n bo Nyeme ba yo ma am n nu, sangani bo Yesu Kristo ba yi i nu fite fofoe nu ni.

¹⁴ Am de Nyeme nɔanie n ka nbaatumam bo bu de bu si nɔanie ni, má am yo am kunnu koroowa, na am suyo satiem n bo am yo bu sanɔa bo am yo si má Nyeme atin ni.

¹⁵ Ama, am ma am woowa kere ti casi, kabo yiri Nyeme woowa ti casi ni, yiri bo wɔ yi am ka i deem ni,

¹⁶ dama ba kere i Nyeme Jɔre Kadasi n nu ka, “Mini, m ti casi wɔ, nyini ti, wɔ yo daka ka ambere gusu ti casi.”

¹⁷ Kabo am sere Nyeme, na am fere i ka am Si ni, am tara am ŋu na am bu i fa kɔ deke kere bo am yo i am ŋɔɔ su ni, ahin durunya n bo i ti má am woobiri n nu ni, dama kabo i di minem jɔre fa kɔ bu kere sayoowa su ni, i tambu má nu.

¹⁸ Am si kabo Nyeme ade am tii aji afite am sayoowa ŋgbɛɛnŋgbɛɛnm n bo am nam yo fa maari am n nu ni. Deke n bo wɔ fa ade am tii aji n ti má ka sika wara jete bo bu koro ka ŋgbɛɛn ni,

¹⁹ ama, wɔ fa Yesu Kristo deɛ mbunja n bo i la má aɔusu na i ti ka bɔmbaa bo i la laifie na i la má fin be n deɛ n wɔ.

²⁰ Nyeme du mɔ yiiri i ka i ba yo sɔ ka, ye i nya ba yiiri durunya n a. Ama, ahin awieeri su sanɔa n bo ya wo nu n ye Nyeme ma wɔ fite fofoe nu, ambere deɛ ti a.

²¹ Yiri deɛ ti ye am ayo Nyeme yarada n a. Nyeme tengeeri i yiwee n nu, na wɔ wura i kpiri, nyini deɛ ti ye am yo yarada na am la tama fa kɔ Nyeme dɔ n a.

²² Kabo am ade Nyeme nɔanie n bo i ti nahɔre, na wɔ yo am casi ni, nyini ma am koro am beɔgu bo dadaka wo má nu a. Nyini ti, am sukoro am beɔgu ni am ahorembaa fofoe ni nahɔre su.

²³ Am akaaki mine fɔfɔrem, i ti má kabo adamande wu baa na i wu ni, ama, bo i wuuri am ni, i wu má. Nyeme faari i nɔanie n bo i la ŋɔɔ na i la má awieeri n ye i ma am akaaki mine fɔfɔrem n a.

²⁴ Dama ba kere i Nyeme Jɔre Kadasi n nu ka,
“Adamande kere ti ka wura a,
i ce má na i wu.

Na bu nyumi kere ti kabo wura pum yo nyumi barasu n wɔ,
i ce má na i yɔrɔki na i kpɔnkpɔn.

²⁵ Ama, Micera n deɛ nɔanie n wo bere wɔ sanɔa kere.”
Nyini nɔanie n ti labari kpa n bo ba kan akere am n a.

2

Nyeme mine n bo wɔ yi bu n jɔre

¹ Nyini deɛ ti, am yaki sa kere bo i ti má kpa, má am kpɔ am beɔgum, má am sisi am beɔgum, má am yo am beɔgum burukɔɔnu sa, má am si am beɔgum kɔre, má am kan am beɔgum jɔre saaki bu.

² Kabo baakan koro nyufini ni, am gusu, am koro Nyeme nɔanie n bo i ti ka nɔɔ casi ni, nyini buka am ye am koro nyi na am nya tiide a,

³ dama ambere ni am tii si kabo Micera n ti kpa barasu.

⁴ Am bra Kristo dɔ, yiri ti ka yabue n bo i la ŋɔɔ n a. Yiri ye fatafɔm ayi i atu n a. Ama, Nyeme ayi i ka i la anyunuyi.

⁵ Ambere gusu, am ti ka yabuem n bo bu la ŋɔɔ n wɔ, na Nyeme sufa am ta awuru n bo i Awiewie Casi n wo nu, na am yo i sayoowa dɔnguyofɔ casim, na Awiewie Casi buka am na am yo yoowa bo i sun Nyeme nu, Yesu Kristo deɛ ti.

⁶ Dama ba kere i Nyeme Jɔre Kadasi n nu ka, Nyeme ŋa,
“Am ti fen, m sufa yabue bo i la anyunuyi

sufa bo Siyon mie kpiri n bu,
sono kere bo i yoori i yarada,
i mi dí má nyinse.”

⁷ To, ambere bo am ayo i yarada ni, am anya deke bo i la anyunuyi ni, ama, minem bo bu yo má i yarada ni, ba kere i Nyeme Jore Kadasi n nu ka,
“Yabue n bo bondo tafom n faari i tuuri ni,
yiri ye wo kaaki bondo n jaa yabuem n kere tii a.”

⁸ Na ba kaaki akere i Nyeme Jore Kadasi n nu ka,
“Nyini yabue ni, minem bo bu jaa su,
na bu kpaasi.”

Deke n bo i ti na bu kpaasi n la ka, ba de má Nyeme noanie ni, kabo wo yo daka ka i yo lee.

⁹ Ama, ambere, am ti daanfie n bo Nyeme ayi am wo, am ti sayoowa donguyofom bo am su Nyeme bo i ti am feme n wo, am ti Nyeme dee mine casim wo, am ti Nyeme dee awurunbaam wo. Yiri ye wo yi am ka am kan i sakpam kere minem a, dama wo yi am afite awosin nu, afa am awura i dee wein n bo i la má anusu n nu.

¹⁰ Ba kere i Nyeme Jore Kadasi n nu ka,
“Sanja be, am yo ti má i dee minem,
ama, kisa, am ti Nyeme deem wo.
Nyini sanja, Nyeme yo si má am anunfo,
ama, kisa, wo si am anunfo.”

Kabo Nyeme akoom woowa ti barasu ni

¹¹ M danfo kparam, am ti wofom wo, ni minem bo bu la má woobiri durunya n nu fen, nyini dee ti, m sere am ni anyumboro wo, má am ma am nyunu boro am anuniembaa koroowa su, dama am anuniembaa koroowam sukoro ka bu kunma am wo.

¹² Am ma am woowa ti kpa, na nzen minem bo bu su má Nyeme n jaraki am fa ko satie be su, bu ba nu am sakpa n bo am yo i ni, na bu kansu Nyeme, ceen n bo i ba nie i minem su ni.

¹³ Ya Mibie n dee ti, am de nfangafom kere noanie, feme bo i nie adamande kere su ni,

¹⁴ ni nkpienkpienm bo wo yi bu ka bu sunie am su ni, am de bu noanie, dama ba fa bu ase ka bu cin minem bo bu yo satie n sui wo, na bu kansu minem bo bu yo sakpa ni.

¹⁵ Nyeme koro ka am yo sakpa a, na minem bo bu ti sinnzinm na bu si má be ni, na bu si má kabo bu kan.

¹⁶ Am ti minem bo am ade am tii wo, má am nie ka am anya am tii n dee ti, na am sufie yo satie. Ama, am ma am woowa ti kabo Nyeme akoom woowa ti barasu ni.

¹⁷ Am bu sono kere sono, am koro am ninbaam kere, am soro Nyeme, na am bu Romafom feme kpiri ni.

Kabo ya son Kristo wahara diiwa n su ni

¹⁸ Ambere bo am ti akoom ni, am de am mibiem noanie, na am bu bu nahore su, má ka bo bu ti benle na bu yo am sakpa ni ngumi, ama, haari bo bu ti tie ni mmoo, am bu bu.

¹⁹ Nzen am ayo má satie be, na bu kere am wahara na am mindi deeru i, ka am soro Nyeme n dee ti, nyini ti kpa a.

²⁰ Nzu kperere ye am nya i a, nzen am yoori satie na bu boori am na am mindi deeru i? Ama, nzen am yoori sakpa, na bu kere am wahara, na am mindi deeru i, nyini ti kpa Nyeme do a.

²¹ Nyini dɛɛ ti, ye Nyɛmɛ afere am a, dama Kristo ni i tii adi wahara ama am, nyini kere am ka i ti ye ni ka am sɔn i su di i wahara n be.

²² Bu ɲa, yiri,
“Wɔ yo má satie be,
wɔ kaaki abu má kɔrɛ be.”

²³ Bu kpɛɛri i nzukɔ ni, wɔ wɔrɔ má nzukɔ ama má bu. Bu kereeri i wahara ni, wɔ se má bu ka bu ɲú i. Ama, yiri faari i deke kɛrɛ maari Nyɛmɛ wɔ, yiri bo i di jɔrɛ bo i kɔ atin su ni.

²⁴ Ya satie dɛɛ ti, ye Kristo deerɛ ya jinaabiri diiri wahara wuuri baka jaanu n su a. I yoori sɔ, adena i kere ka ya wu wɔ, fa kɔ ya satie su, na ya la ɲɔɔ bo ya koro yo sakpa. Wahara n bo Kristo diiri i ɲunie nu n dɛɛ ti, ye am anya laifɛ a.

²⁵ Am yo ti ka nbɔɛm bo ba mini wɔ, ama, kisa, am akaaki aba yiri bo i ti am sasafɔ na i niɛ am dika n dɔ.

3

Kabo i ti ye ni ka nbaram ni bu hunm wo barasu ni

¹ Tɔ, ambɛrɛ nbaram gusu, am de am hunm nɔaniɛ. Na nzen bu nbem nya yo má Nyɛmɛ nɔaniɛ n yarada, na am woowa ti kpa, nyini ma bu yo yarada, má ka am nɔaniɛ jɔjɔwa n dɛɛ ti,

² ama, nzen bu ɲuuri ka am woowa ti casi, na am ma bu jirima, nyini ma bu kaaki bu wo na bu su Nyɛmɛ a.

³ Deke bo i kere ka am yo nyumi ni, i ti má kabo am yo am ɲu di am tiɲmie sunɲuruya ni, ni kabo am wura sikam, ni kabo am kara sutura kpakpam n barasu ni,

⁴ ama, deke bo i kere ka am yo nyumi n la wo kpa bo i fite am ahorembaa su, na i saari má ni. I ti ye ni ka am yo am ɲu kaan, na am wo benle, nyini ti deke bo i la anyunuyi nahɔrɛ su Nyɛmɛ dɔ a.

⁵ Dama kabo dawa saɲga, nbaram nbem bo bu ti casi na bu la tama ni Nyɛmɛ n yo yoori bu ɲu nyumi lɛɛ, bu deerɛ bu hunm nɔaniɛ wɔ,

⁶ kabo Saara gusu yo yoori lɛɛ, i deerɛ i hun Abraham nɔaniɛ wɔ, na wɔ fere i ka “M awurufɔbiɛ.” Nzen am yoori sa bo i ti kpa na am soro má sɛrɛ, am akaaki Saara nbaam wɔ lɛɛ.

⁷ Ambɛrɛ nbiesɔm, i ti ye ni ka am gusu yo sɔ. Am si kabo am fa ɲɔnle bita am yim barasu. Am si ka nbaram faɲga ni am dɛɛ sɛ má, nyini ti, am bu am yim. Dama am ni bɛrɛ kɛrɛ saɲga nya Nyɛmɛ aceeri n a, yiri la ɲɔɔ bo i la má awieeri ni. Am bita bu nyunyumi, adena má deke be kanda am nyɛmɛsere.

Kabo yaradayofɔm diiri wahara fa kɔ sakpa dɛɛ ti

⁸ Tɔ, deke bo m koro ka m fa kun jɔrɛ n kɛrɛ nɔɔ n la ka, am kɛrɛ fa anɔɔsɛ, na am cɛɛ wo am beɲgu nu, na am koro am beɲgu ka am ti nibaam wɔ, na am si am beɲgu aɲunfɔ, na am yo am ɲu kaan ma am beɲgu.

⁹ Nzen be yo am satie, má am yo tie tɔ i kaari, na nzen be kpɛɛri am nzukɔ, má am wɔrɔ nzukɔ ma i, ama, kabo am yo la ka, am yo bu kisi, dama deke n bo i ti na Nyɛmɛ afere am la ka, i yó am kisi wɔ.

¹⁰ Dama ba kɛrɛ i Nyɛmɛ Jɔrɛ Kadasi n nu ka,
“Sɔnɔ kɛrɛ bo i koro ka i ɲu i ɲu fiɛ,
na i wo wo bo i yo fiɛ,
i mi tara i taferema na má i sujɔjɔ jɔrɛ tie,
na má i sudadaka minɛm.”

¹¹ I mi yaki satieyo,
na i yo sa bo i ti kpa,

i mi boro i nyi
na i sukpini tanalaifie busu.

¹² Dama Nyeme nyumbaa ta minem bo bu yo sa bo i ko atin su ni,
na i so i sui ti bu nyemesere,

ama, i koro ma ka i nyumbaa nu bo bu yo satie ni.”

¹³ Nzen am nyunu aboro ka am yo sa bo i ti kpa, nma koro yo am pui a?

¹⁴ Ama, nzen am yo sa bo i ko atin su n dee ti, ye am sudi wahara, am terefie lee, ma am soro bu, ma am ma am ahore saaki.

¹⁵ Ama, am ma Kristo yo am Mibie n na am bu i am ahore su. Na am kpa am nu nminda sanja kere, na nzen be ba bisa am fa ko deke n bo i ti na am la tama ni, na am si kabo am bo i nu barasu,

¹⁶ ama, am joro benle, na am bu i mi, na am si am sunsunni nu ka am ayo sakpa, adena nzen minem joro am ngbeenngbeen fa ko am wo kpa n su ka am su Kristo dee ti, na bu di nyinse.

¹⁷ Dama nzen am yo sakpa na am di wahara na i ti Nyeme koroyanu, i ti ye ni bo am yo satie na bu kere am wahara.

¹⁸ Ya satie dee ti ye Kristo gusu diiri wahara kpekun n kpein a, na yiri bo i yo sa bo i ko atin su n awu, yere bo ya ti satieyofom dee ti, na i yo ya ni Nyeme afien dogu. Bu kuunri i ni, na Nyeme ama i ngoo awiewie n nu,

¹⁹ na wo nya ako akan jore akere awiewiem bo bu wo dansaraka n nu ni.

²⁰ Dawa sanja, bere yo keteeri Nyeme nonie n a, na Nyeme ayo sawore anminda, sanja bo Nowa sukpa lee bambaka n ni. Nyini lee ni, mine kaan so wuraari nu n a, bu mocue nyaari tiide, ye nzue n adi ma bu a.

²¹ Nyini nzue n ti deke bo i kere fa ko Nyeme nzue bieewa bo i ma am anya tiide nyuma n wo. Nyeme nzue bie ti ma deke bo i yi am nunie su fin, ama, i kere ka am si am sunsunni nu ka, am la ma ngasi be Nyeme do, dama Yesu Kristo tengeeri i yiwee n nu n dee ti.

²² Yiri ye wo ko angoro ako atana Nyeme saa fomboro su n a, ye i la yiko nie merkem kere su a, ni yikofom, ni nfangafom barasu kere.

4

Kabo i ti ye ni ka yaradayofom wo ni

¹ To, kabo Kristo diiri wahara i nunie n nu ni, i ti ye ni ka am gusu kpa am nu bita nyini sunsunni ni, dama sono kere bo i diiri wahara i nuniembaa nu yo ma satie kun.

² Nyini dee ti, ma am yo am kunnu koroowa, ama, am yo kabo Nyeme koro ni, haari am ngoo awieeri.

³ Sanja be am yo yoori am kunnu koroowa, deke bo minem bo bu si ma Nyeme n yo i ni, wo se su so. Am yo tara ma am nu, na am yo su konvikiya ngbeenngbeenm, na am nu nzan bo, na am nu nzan yo sa ngbeenngbeen kabo nzan nufom yo ni, na am susu amom, deke bo Nyeme koro ma i ni.

⁴ Kisa na am ni bere sanja wo ma nyini wo ngbeen ni, jore n amie bu wo, nyini dee ti ye bu kpie am nzuko n a.

⁵ Ama, bere ni bu tii, bu ba jina Nyeme nyunu, na bu kan deke kere bo ba yo i. Yiri ye wo yo siriya ka i di minem bo bu la ngoo ni bo ba wu n jore a.

⁶ Nyini dɛɛ ti, ye bo ba wu n gusu tiiri labari kpa n jɔrɛ kaanwa n a, adena haari ni bo bu wuuri kabo adamande kere wu ni, bu nyá ngɔɔ awiewie n nu kabo Nyeme la ngɔɔ ni.

Nyeme amusuisufɔm kpam jɔrɛ

⁷ Deke n kere sukɔ awieeri lɛɛ. Nyini dɛɛ ti, má am fa am ɲu ji, am tara am ɲu na am koro sere Nyeme.

⁸ Sa n bo i tara deke n kere n la ka, am koro am beɲgu ni nahɔrɛ su, dama koro kata satie dɔɲgu su wɔ.

⁹ Nzen am beɲgum aseke am wɔfɔ, am de bu, má am ɲuɲuti.

¹⁰ Nyeme ama am kere aceeri barasu barasu, nyini ti, i ti ye ni ka am fa nyini aceerim buka am beɲgu. Sɔnɔ kere suyo i juma nyunyumi kabo Nyeme afa ama am ni.

¹¹ Wɔrɔ kere bo Nyeme ama u aceeri ka a kan i jɔrɛ, si ka Nyeme jɔrɛ ye a sukan i a, wɔrɔ kere bo Nyeme ama u aceeri ka a fa buka minem, buka bu ni fanɲa n bo Nyeme afa ama u ni, adena am sayoowa kere nu na Nyeme nya kansi, Yesu Kristo dɛɛ ti. Yiri la yiko ni jirima sanɲa kere sanɲa. Ami.

Kabo i ti ye ni ka Kristo susufɔm di wahara barasu ni

¹² M danfo kpam, má am ma wahara kekereke n bo am sudi i n yo am fura nu, dama Nyeme suyo am na i nie a. Má am sunsun ka i ti sa bo wɔ nya tu má be wɔ.

¹³ Ama, kabo am sudi Kristo dɛɛ wahara n bo i diiri i n be ni, am ma am ahore jɔ, adena cɛen n bo Kristo jirima woowa bo i la má aɲusu n bá fite fofoe nu, am ahore jɔ na i yó am fie.

¹⁴ Nzen bu kpiɛeri am nzukɔ, ka am ti Kristo dɛem ti, nyini la ka am terefie lɛɛ, dama Nyeme Awiewie Casi n wo am dɔ lɛɛ, yiri bo i la jirima woowa n na i la má aɲusu ni.

¹⁵ Ama, nzen am be diiri wahara, má i yo ka i mi akun sɔnɔ, wara wɔ wɔ, wara wɔ yo sa ngbɛɛnngbɛɛn be, wara wɔ wura minem jɔrɛ nu, nyini n sɔ ti má kpa.

¹⁶ Ama, nzen sɔnɔ sudi wahara ka i ti Kristo susufɔ n dɛɛ ti, má i mi ma nyinse ti i, ama, i mi kansi Nyeme, ka i ti Kristo dɛɛ ti.

¹⁷ Dama sanɲa n aju bo Nyeme dí minem jɔrɛ. I dú mɔ bo i bu di i tienɲu minem jɔrɛ wɔ ka. Ye nzen i nya du mɔ diiri yere jɔrɛ, minem n bo ba ka na ba de má i labari kpa ni, bu wíe se wɔ lɛɛ?

¹⁸ Dama ba kere i Nyeme Jɔrɛ Kadasi n nu ka,
 “Nzen i ti kekere ka minem bo bu ti kpam nya tiide,
 ye satieyofɔm, ni bo bu bu má Nyeme ni,
 i yó bu se wɔ?”

¹⁹ Nyini ti, minem bo bu sudi wahara Nyeme koroyanu n dɛɛ ti ni, i ti ye ni ka bu boro bu nyi na bu suyo sakpa, na bu fa bu ɲu wura Nyeme saa nu, dama yiri bo wɔ yi bu ni, i yáki má bu cɛen n be da.

5

Kristo jama n woowa jɔrɛ

¹ Ambere bo am wo Kristo jama n nu, na am ti nkpienm ni, mini mmɔɔ ti Kristo jama n kpien kun wɔ, ma ɲu kabo Kristo diiri wahara barasu ni, na m bá nya i dɛɛ jirima woowa n be, sanɲa bo i bá fite fofoe nu. Nyini ti, m susere am jande wɔ,

² am niε Nyeme minem bo bu wo am dɔ n su, kabo bɔsasafɔ niε i nbɔem su barasu ni. Am niε bu dika nyunyumi, má ka bu miε am wɔ, ama, am koroyanu, dama Nyeme koro ka am yo i a, má am yo i ka ηwaa kpini dεε ti, ama, am yo i ka am nyunu aboro ka am yo i wɔ.

³ Bere n bo Nyeme afa bu ama am ka am niε bu su ni, má am miε bu ka am ti bu mibiεm wɔ. Ama, am ma am sayoowa kɔ atin su, na bu ηu i na bu sɔn am su.

⁴ Nzen am yoori sɔ, cεen bo bɔsasafɔ kpien n bá fiteeri fofoe nu, am nyá aceeri bo i la má aηusu na i wie má fieo ni.

⁵ Ambere gusu bo am nyunu nya ti má ni, am bu nkpienm ni, na am de bu nɔaniε. Am kere yo am ηu kaan na am buka am benɔu, dama ba kere i Nyeme Jɔre Kadasi n nu ka,
“Nyeme kete kpirikorofɔm wɔ,
ama, na i fa i ahɔrɔma n ma tarakam.”

⁶ Nyini ti, am da am ηu asiηgu fa ma Nyeme yikofɔ ni, na saηga n ba juuri, yiri wúra am kpiri a.

⁷ Deke kere bo i miε am, am fa tu Nyeme nyunu, dama yiri cεε wo am nu a.

⁸ Am tara am ηu saηga kere, má am fa am ηu ji. Dama am kpɔfɔ Sitana ni, i sansan am kabo jara sansan ηuundi koro sɔnɔ na i kpese i n wɔ.

⁹ Am yo Nyeme yarada jina kenken na am kete Sitana, dama am si ka am ninbaam bo bu wo durunya n kere nu n gusu sudi wahara n bo am sudi i n be n wɔ.

¹⁰ Nzen am diiri wahara saηga kaan su, Nyeme sése am su yo am dɔηgu a, yiri má am jina kun su a, na i wúra am faηga, na i kpáma am. Buka kere fite yiri Nyeme dɔ a, Kristo dεε ti ye wɔ fere am ka am bá nya i dεε jirima woowa n bo i la má awieeri n be a.

¹¹ Yiri la yiko saηga kere a. Ami.

Awieeri su dεε nɔaniε ni

¹² Ya niwa Silivanusi, m si i ka i la dabuηu am dɔ, yiri bukaari m ye ma kere ahin kadasi kaan n sufa ma am n a, na am ahore si, na m ma am si ka jɔre n bo ma kere ama am ti Nyeme aceeri wɔ nahɔre su, na am jina kenken.

¹³ Kristo jamam bo Nyeme asaηga ayi am ni bere kere, na bu wo Babilɔn miε kpiri n nu ni, ni m wa Marako kere bisa am dɔηgu.

¹⁴ Am bisa am benɔu dɔηgu ni koro. Nyeme ma ambere kere bo am ti Kristo dεem ni ahoreda.

Kadasi nnyo su bo PETORO akere i ni

¹ Mini Simon Petoro bo m ti Yesu Kristo akoo na m kaaki ti i jaramasa ni, mini sukere ahin kadasi n ma ambere bo Nyeme ama am ayo Kristo yarada n a, kabo wo ma yere mmoo ayo i yarada ni. Yesu Kristo bo i ti ya Nyeme ni ya Tiidefo ni, i sakpa yoowa n dee ti, ye ya kere ayo i yarada.

² Am Si Nyeme ni ya Mibie Yesu n dee ti, Nyeme buka am agaya, na i ma am ahoreda buka su.

Minem bo Nyeme afere bu, na wo yi bu n jore

³ Nyeme la yiko, nyini yiko n nu, wo ce ya deke kere bo wo yo daka ka ya la i na ya nya ngoo na ya su i nahore su. Ya si i n dee ti, ye wo yo nyini n kere ama ya n a. Yiri ye wo yi ya ka ya nya i woowa kpa ni i jirima n a.

⁴ Nyini n dee ti, wo se ka i ce ya aceerim bambaka bo bu la ma anusu, adena i yi ya fite durunya n nu satie kere bo i wura mine konviki na i saaki bu n nu, na ya nya Nyeme dee woowa n be.

⁵ Nyini dee ti, kabo am ayo Kristo yarada ni, wo yo daka ka am boro am nyi, na am yo yarada buka su. Ma am yo yarada ngumi, ama, am yo sakpa gusu. Ma am yo sakpa ngumi, ama, am kpini si.

⁶ Ma am kpini si ngumi, ama, am la tarabuju. Ma am la tarabuju ngumi, ama, am la mindi. Ma am la mindi ngumi, ama, am ma am woowa ko Nyeme atin su.

⁷ Ma am ma am woowa ko Nyeme atin su ngumi, ama, am yo am benju kpa. Ma am yo am benju kpa ngumi, ama, am koro minem kere.

⁸ Nzen am la nyini woowam ni, na am woowa ti so nahore su sanga kere, nyini kere ka, kabo am asi ya Mibie Yesu Kristo ni, am woowa la kperere, i ti ma ngbeen.

⁹ Ama, sono kere bo i la ma nyini woowam ni, i mi ti ka sono bo i koro nu ma nyunyumi, wara i ti ka anyinsin wo, na i kaaki ti ka sono bo i wara afi ka Nyeme akpakpara ayi i afite i satie dawam nu ayo i casi.

¹⁰ Nyini dee ti, m ninbaam, kabo Nyeme afere am na wo yi am ni, am boro am nyi, adena am woowa kere ka am ti i dee minem. Nzen am yoori nyinim so, am kpasi ma fieo.

¹¹ Nyini ma am nya aceeri bambaka bo am la atin, na am wura Yesu Kristo dee femeya woobiri n nu a, yiri bo i ti ya Mibie ni ya Tiidefo na i femeya n wo bere sanga kere ni.

¹² Nyini dee ti, ye i wo m ahore su ka m sutenge am ahin jorem su sanga kere n a, haari ni bo am si bu na am ade kereewam bo bu ti nahore n na am bita bu kenken n ni.

¹³ Mini do, wo yo daka ka m sutenge am su so, sanga bo m toko la ngoo ni.

¹⁴ Dama m si ka i ce ma, m ba wo ma bere, kabo ya Mibie Yesu Kristo yi kereeri m ni.

¹⁵ Nyini ma m boro m nyi yo deke kere bo m koro yo i n a, adena sanga bo m ba wo ma bere, na am koro tenge nyini jorem su sanga kere.

¹⁶ Ya yo kan kereeri am ka, kabo ya Mibie Yesu Kristo la yiko na i kaaki ba barasu ni, bo ya kan so ni, i ti ma ka ya faari ngonle boori ya tieenu kaanri i a, ama, yere mmoo ni ya tii nyumbaa juuri kabo i la yiko bambaka barasu ni.

¹⁷ Saɗga bo ya Si Nyeme yo wuraari i kpiri na i maari i woowa taari wein ni, Nyeme konvi yo fiteeri aɗgoro dika n nu na i jɔjɔri i do ni, na yiri bo i woowa la má aɗusu n ase ka, “M de Wa bo m koro i n lee, m ahore ajo i nu.”

¹⁸ Yere ni ya tii tiiri kabo akonvi n fite aɗgoro ni, saɗga bo ya woori i do, Nyeme buka n su ni.

¹⁹ Nyini n kere ma ya la ahoresi buka su, ka jorem bo Nyeme noanie kanfom yo kaanri bu n ti nahore wo. Nyini ti, am boro am nyi na am de kabo bu yo seeri ni, na am su i su. Noanie n bo bu jɔjɔri i n ti ka fitana bo i taari awosin nu n ti n wo, i teke am nyi ko ju ceen bo Kristo kaaki ba ni, na i fa wein n ba teke am nyi nahore su, kabo alecin na asaakojo tie fa wein ba ni.

²⁰ Jore bo i tara bu kere na am si i n la ka, noanie n kere bo Nyeme fa maari i noanie kanfom na bu kereeri i Nyeme Jore Kadasi n nu ni, be wo má bere bo i koro fa adamande si ngumi na i fa kere nyini noanie n bu.

²¹ Dama má adamande koroyanu ye bu kaanri Nyeme noanie n a, ama, Nyeme Awiewie Casi ni maari bu noo ye bu kaanri noanie n bo Nyeme koro ka bu kan i n a.

2

Korefom bo bu yo bu nu ka bu kere Nyeme noanie n jore

¹ Kabo mine korefom woori Nyeme minem nu dawa saɗga ni, bere bo bu yo bu nu ka bu ti Nyeme noanie kanfom ni, so ye kerefom korefom ba wo am gusu nu a. Bu fie wo, na bu fa bu de kereewam kere am, kereewa bo bu ma am mini Nyeme atin ni, haari na bu kaaki bu sin bo Mibie ni, yiri bo wo to bu tii su njato ni. Nyini ti, bu sayoowam má Nyeme yo bu ngbeen anyumbaa kata ni i teke.

² Na mine dangu son bu sayoowa ngbeenngbeenm su. Bere de ti, mine ba bu atin n bo i ti nahore ni ngbeen.

³ Nyini kerefom korefom ni, bu nyunu aboro nenge su de ti, bu bo bu tieenu jore kan ma am a, na bu fa am kpini. Ama, Nyeme daafi má, wo du mo adi bu jore, i ba yo bu ngbeen wo.

⁴ Ya si ka Nyeme merkem bo bu yo yoori satie ni, Nyeme ayaki má bu. I faari bu tuuri cema sin n nu wo, na wo bo bu tobari ase awosin n nu, ka bu suwo do haari jina ceen n bo i ba cin bu sui ni.

⁵ Ya si ka, dawa saɗga, minem bo bu soro má Nyeme ni, wo yaki má bu, i cin bu sui wo, na wo ma wambu bambaka adi bu kere, ama, na wo de Nowa tii aji, i ni mine nso nbem, yiri kan kereeri minem deke bo i ti sakpa na i ko atin su n a.

⁶ Ya si ka Nyeme yo saakiiri Sodom ni Gomora miem ni, i faari sin jiiri su yaraari bu wo, na i kere aje ato nzuin. I yoori so ni, i kere kabo i ba yo minem n bo bu soro má Nyeme n wo lee.

⁷ Ya si kabo i yo deeru Loti tii jiiri ni, i yo ti son bo i yo sa bo i ko atin su Nyeme do, na i ahore yo ti saakiwa fa ko minem bo bu bu má deke be na bu nati yo sa ngbeenngbeenm ni.

⁸ Nyini son n bo i yo sa bo i ko atin su ni, yiri ni nyini minem ni yo saɗga wo a, ceen kere ceen, na i sunu sa ngbeenngbeenm bo bu yo bu ni, na i sui suti jore ngbeenngbeen bo bu jojo bu ni, nyini de ti, na wo di wahara ahoresaaki nu, yiri bo i ahore ti fofoe ni.

⁹ To, nyini n kere kere ka Nyeme si kabo i yo na i de minem bo bu su i atin su n fite kekereke nu a. Na i si kabo i sucin minem bo bu su má i atin su n sui, ko ju saɗga bo i ba di bu jore ni.

¹⁰ Bere n bo i cín bu sui tara minem kere n la bo bu su anuniembaa koroowa ni dangba sam su, na bu kete ka má Nyeme nie bu su ni.

Nyini minem ni, bu tii ti kekereke, bu soro má be. Haari ngoofoom bo bu wo angoro na bu la jirima woowa ni, bu kpie bu nzuko o, bu soro má sere.

¹¹ Haari Nyeme merkem bo bu la yiko ni fanga tara nyini minem ni, bu kpie má nyini ngoofoom ni nzuko na bu jaraki má bu kere má Mikun ni.

¹² Nyini minem so, kabo bu koro, ye bu yo a, bu ti ka boro nenje tiem bo mine tara bu na bu kpie bu kom n wo. Bu kpie nzuko fa ko dekem n bo bu si má bu n su wo. Kabo mine ma boro nenje tiem ka ngbeen ni, so ye Nyeme má bu gusu bá ka ngbeen a.

¹³ Kabo bu ma minem di wahara ni, bere gusu bá di wahara so o. Bu konvikiya sam bo bu yo bu ni, i yo bu fie wo, bu yo bu wiesu wo, bu fie má su. Bu ti dangbafom wo, na bu wura am nyinse sangga bo am ni bere tien am noo sudi diire ni, bu sunsunni kere la ka bu daka am.

¹⁴ Bu nyunu boro mine yim kpini su wo, na bu kunnu yi má bu satieyo. Bu dadaka minem bo bu nya si má Nyeme atin n nyunyumi n wo, na bu yaki i, adena bu su bu dee kereewam n su. Bu ahorembaa abi nenje kpini su wo. Nyeme ayo bu ngbeen awie lee.

¹⁵ Ba yaki atin n bo i ti kpa ni, ba mini. Atin n bo Baalam bo i si la Beori n yo bitaari i ni, ba son i su lee. I yo koroori nwaa bo minem ma i n wo, na i yo satie.

¹⁶ Ama, na Nyeme akan i ndie, i satie yoowa n dee ti. Ya si ka kaako koro joko má, ama, Nyeme ama kaako ajoko Baalam do, kabo adamande joko ni. Na Baalam bo i ti Nyeme noanie kanfo ni, na wo yaki sa n bo má i suyo i na i ti ka i nyunu ti má koroowa ni.

¹⁷ Nyini minem ti ka bura bo i tie má nzue wo, na bu kaaki ti ka nzue munaawa bo anuma fa i sin n wo. Bere ye Nyeme asese awosin n bo i la má anusu ase bu n a.

¹⁸ Bu fo yanfoya a, na bu sujoko ngbeenngbeen, na bu fa anunie koroowa na bu fa dadaka minem bo ba kaba afite kore jorem nu na ba nya ace má ni.

¹⁹ Bu se minem ka bu má bu nya bu tii wo. Ama, bere ni bu tii bo bu kan so ni, bu ti ka akoom wo, satie bo i ma bu ka ngbeen ni aja bu, dama deke bo wo kunma sono ni, i mi n ti nyini deke n akoo lee.

²⁰ Minem bo bu si Yesu Kristo ni, yiri bo i ti ya Mibie ni ya Tiidefo ni, na i ma ba yaki durunya n nu dee dangba sam ni, na ba kaaki akpie bu nyi ama nyini sam atara bu akunma bu bekun ni, bu awieeri ti tie tara bumboori ni.

²¹ Nzen má ba si má woowa bo i ko atin su ni, má i ti ye tara bo ba kaaki bu sin abo Nyeme noanie maawa n bo ba du mo ade i ni.

²² Kabo bu yoori so ni, nyini kere ka ahin anyunderem ni ti nahore wo, bo bu na,

“Caa kaaki fa deke n bo wo fi i n di bekun wo,”

na bekun,

“Nzen a taraari afa bieeri i nzue,

i kaaki ko wura natie nu wo bekun.”

3

Ya Mibie n ba n jore

¹ M danfo kpa, ahin kadasi ni ti kadasi nnyo su bo m sukere ma am a. Ahin kadasi nnyo n kere, m koro ka m tenje am su na am bita sunsunni kpa.

² M koro ka am tenge su fa kɔ nɔaniɛm bo Nyɛmɛ nɔaniɛ kanfɔm yo seeri bu dawa sanɔa ni, na am kaaki tenge su fa kɔ nɔaniɛ maawa n bo Mibiɛ n bo i ti ya Tiidefɔ n kaanri i, na i jaramasam seeri am ni.

³ Jɔrɛ bo i tara bu kerɛ na am si i n la ka, fa kɔ durunya n awieeri su, mine nbem bá ba, na bu susu anjuniɛmbaa koroowa su, na bu yó am anzasi fa kɔ am yarada n su,

⁴ na bu sé ka, “I seeri ka i káaki ba bekun, ye i wo ni? Ya nam wo má berɛ kun, ama, deke n kerɛ toko ti i tii wɔ, kabo Nyɛmɛ yiiri durunya n ba ju ni nyuma.”

⁵ Bu si tenle su, ama, ba kete ka bu tenge má su ka, dada sanɔa, Nyɛmɛ yo faari i nɔɔ jɔjɔri ye angoro wo berɛ a, na wɔ jɔjɔ na wɔ kpaaki nzue n ni asien n nu, na asien n afite nzue n nu.

⁶ Nyini nzue n ye i fa saakiiri durunya n a dawa sanɔa, sanɔa bo wɔmbu nzue n diiri deke n kerɛ ni.

⁷ Ama, angoro ni asienɔu n bo i wo berɛ ni, Nyɛmɛ yo jɔjɔri i nɔaniɛ bekun wɔ, ka, i bita bu wɔ, na bu wó berɛ haari sanɔa bo i bá fa sin saaki i kerɛ. I má i kerɛ wo berɛ wɔ, kɔ ju sanɔa bo i bá di minem jɔrɛ, berɛ bo bu soro má i ni, na bu ká nɔbɛɛn.

⁸ M danfo kpam, am si tenle na má am wara fi ahin jɔrɛ kun ni, yiri la ka, cɛɛn kun ti ka afɔ akpii wɔ Nyɛmɛ dɔ, na afɔ akpii gusu ti ka cɛɛn kun wɔ i dɔ.

⁹ Kabo Micɛra n seeri ka i yo ni, mine nbem bita kan ka i ti niniki. I ti má ka i ti niniki wɔ, ama, i la mindi ni amberɛ wɔ, i koro má ka be ka nɔbɛɛn, ama, i koro ka sɔnɔ kerɛ kaaki i wo wɔ.

¹⁰ Ama, Micɛra n cɛɛn ni, i bá kabo awiefɔ ba fura nu na i wɔ n wɔ. Nyini cɛɛn ni, angoro ni yó nanɔmɛ fanɔa su, na i busu míni, na sin yára deke kerɛ bo i wo angoro ni, na i ká nɔbɛɛn. Na asien n ni deke kerɛ bo i wo asien n su n bá wo má berɛ.

¹¹ Kabo nyini deke n kerɛ bá ka nɔbɛɛn sɔ ni, wɔ yo daka ka am ti nzu mine barasum wɔ? Wɔ yo daka ka am woowa ti casi, na am fa am nɔu ma Nyɛmɛ nɔgumi,

¹² na am nɔminda fa kɔ Nyɛmɛ cɛɛn ni, na am boro am nyi yo sa bo i ma i ba ndende. Nyini cɛɛn n ye sin yára angoro n kerɛ na i ká nɔbɛɛn n a, na i kekereke má deke n kerɛ bo i wo angoro n koro.

¹³ Ama, ya nɔminda sa bo Nyɛmɛ yo seeri ka i bá yo ni, ka, i yí angoro ni asien fɔfɔrɛ, dɔ ye bu nati yo sa bo i kɔ atin su nɔgumi a.

¹⁴ Tɔ, m danfo kpam, kabo am nɔminda fa kɔ nyini cɛɛn n ni, am boro am nyi, adena Nyɛmɛ bá nɔu ka am ni yiri nɔɔ ayo kun, na am woowa ti casi na am la má nɔgasi be i dɔ.

¹⁵ Am tenge su ka ya Mibiɛ mindi n dɛɛ ti, ye mine nyá tiide a. Sɔ ye ya niwa koroowa Pɔɔlu yo kerɛ maari am a, Nyɛmɛ ceeri i alecira n a.

¹⁶ Wɔ kerɛ ahin n be sɔ i kadasi n kerɛ n nu, ama, jɔrɛ nbem wo nu, bo i ti kekereke na sɔnɔ ti i bu. Nyini ye minem bo bu si má be na bu nya bi má Nyɛmɛ su atin su ni, nbem fa bu dɛɛ nɔɔnle kaaki i, ye i kɔ má atin su n a, kabo bu kaaki kerɛɛwa nyingam bo bu wo Nyɛmɛ Jɔrɛ Kadasi n nu n lɛɛ. Kabo bu yo sɔ ni, nyini ma bu ka nɔbɛɛn a.

¹⁷ M danfo kpam, amberɛ, am du mɔ si nyini ni. Nyini ti, am si am nɔu sa, adena má am sɔn minem bo bu má be n su, na am mini atin n bo am su i su ni.

¹⁸ Ama, am kɔ su, na am subita Yesu Kristo dɛɛ atin ni, yiri bo i ti ya Mibiɛ ni ya Tiidefɔ ni, adena am koro di i ahɔrɔma, na am si i buka su.

Yiri Yesu Kristo ni, i ti ye ni ka minem kere wura i kpiri, kisa ni sanga kere.
Ami.

Kadasi ciciri su bo YOHANE akere i ni

Nɔ́aniɛ n bo i ma ɲɔɔ n dɛɛ jɔrɛ

¹ Ya sukere ma am fa ko nɔ́aniɛ n bo i ma ɲɔɔ n su wɔ. Kana Nyeme ba yi durunya n ni, nyini nɔ́aniɛ n bo i ma ɲɔɔ n woori bere wɔ. Deke bo ya ti i, na ya nyumbaa aɲu i, na ya nie aɲu i kabo i ti barasu, na ya fa ya saa akan i, ye ya sukere fa ma am n a.

² Nyini nɔ́aniɛ n la Yesu bo i ma ɲɔɔ ni, i yo fiteeri fofoe nu wɔ, na ya nyumbaa aɲu i, nyini ti ye ya di ɲɔɔ n bo i la má awieeri n daani kan i kere am n a. Yiri bo i ma ɲɔɔ n bo i la má awieeri n yo woori i Si Nyeme do ɔ, ye wɔ yi i ɲu akere ya a.

³ Deke n bo ya ɲu i, na ya ti i ni, ye ya sukan i kere am n a, adena ya ni ambere la wo fie ni ya beɲgu, na ya kere la wo fie ni ya Si Nyeme ni i Wa Yesu Kristo ni.

⁴ Deke n bo i ti na ya sukere ahin dekem ma am n la ka, adena ya nya ahorejo nahore su.

Kabo i ti ye ni ka ya bita wein atin ni

⁵ Ahin labari n bo ya yo tiiri i Nyeme Wa n do n lee, ye ya sukan kere am n a, ka Nyeme ti wein wɔ, na awosin haari kaan so wo má i do.

⁶ Nzen ya ɲa ya ni yiri la wo fie ni ya beɲgu, ama, na ya toko wo awosin nu yo satie, ya ti korefom wo lee, ya bita má nahore.

⁷ Ama, nzen ya bita wein atin kabo yiri Nyeme atin n ti wein ni, ya ni yiri la wo fie ni ya beɲgu lee, na i Wa Yesu mbunja ni kpakpara yi ya satie kere bo i wo ya ɲu ni. Nyini ti, am ma ya bita wein n atin ni.

⁸ Nzen ya ɲa ya ti má satieyofom, ya dadaka ya ɲu wo lee, na nahore wo má ya ahore su.

⁹ Ama, nzen ya kan ya satie kereeri Nyeme, i fá ya satie n ce ya a, na i kpakpara yi ya fite ya sa kere bo i ko má atin su nu, dama i la dabuɲu, na i yo sa bo i ko atin n su. Nyini ti, am ma ya kan ya satie kere kere Nyeme.

¹⁰ Nzen ya ɲa ya yo má satie, ya yi Nyeme korefo lee, na i nɔ́aniɛ n wo má ya ahore su lee.

2

Yesu Kristo ti ya bukafɔ a

¹ M nbaam, m koro má ka am yo satie, nyini dɛɛ ti ye m sukere ahin jore n ma am n a, ama, nzen am be yoori satie, ya la sɔno be bo i yo ya ni ya Si Nyeme afien donɲu, yiri la Yesu Kristo bo i yo sa bo i ko atin su sanɲa kere ni.

² Ya satie ti, na yiri Yesu ade ya jinaabiri, na wɔ fa i ɲu ayo tie afa ama Nyeme, adena Nyeme fá ya satie ce ya, má yere ɲgumi dɛɛ satie, ama, durunya n nufom kere dɛɛ satie.

³ Am ma ya de Nyeme nɔ́aniɛ maawam ni, nyini kere ka ya si yiri Nyeme lee.

⁴ Sɔno kere bo i ɲa, i si Nyeme, na i de má i nɔ́aniɛ maawam ni, i mi ti korefo ɔ, na nahore wo má i ahore su.

⁵⁻⁶ Ama, sɔnɔ kɛrɛ bo i deerɪ Nyemɛ nɔaniɛ ni, i mi ti sɔnɔ bo i koro Nyemɛ nahɔrɛ su a. Na sɔnɔ kɛrɛ bo i ŋa i wo ni Nyemɛ, wɔ yo daka ka i mi wo kabo Yesu wo ti ni. Nyini ye ya fa si ka ya wo ni Nyemɛ a.

⁷ M ninbaa koroowam, má nɔaniɛ maawa fɔfɔrɛ ye m sukɛrɛ ma am n a, ama, nɔaniɛ maawa dawa n bo am du mɔ tiiri i n a. Nyini nɔaniɛ maawa dawa n la jɔrɛ n bo am yo tiiri i sanɔa bo am boori i bu suuri Yesu su ni.

⁸ Tɔ, ama, nɔaniɛ maawa n bo m sukɛrɛ ma am ni, i kaaki ti nɔaniɛ maawa fɔfɔrɛ wɔ bekun, na ya ŋu ka i ti nahɔrɛ wɔ, fite kabo Yesu Kristo wo ti ni, ni kabo am wo ti ni, dama awosin n susin, ye wein nahɔrɛ su wo ta su.

⁹ Sɔnɔ kɛrɛ bo i ŋa i wo wein n nu, na i kpɔ i niwa, i mi toko wo awosin nu wɔ lɛɛ.

¹⁰ Sɔnɔ kɛrɛ bo i koro i niwa wo wein n nu wɔ, i yo má sa be bo i ma i niwa bo i jaa kpaasi.

¹¹ Sɔnɔ kɛrɛ bo i kpɔ i niwa, i mi wo awosin nu wɔ, na i suyo satiem, dama awosin n ata i nyi, nyini ti, ye i si má dekem bo i yo bu n a.

Sɔnɔ bo i ŋa i si Nyemɛ, i ti má ye ni ka i koro durunya ni

¹² M nbaam, deke bo i ti na m sukɛrɛ ahin kadasi n ma am n la ka, Nyemɛ afa am satie ace am, Yesu Kristo dɛɛ ti.

¹³ Sim, deke bo i ti na m sukɛrɛ ma amberɛ n la ka, am si Yesu,

yiri bo i wo bɛrɛ kana Nyemɛ ba yiiri durunya n kɛrɛ ni.

Ngbɛfɛnɛm, deke bo i ti na m sukɛrɛ ma amberɛ n la ka, am akunma Sitana n dɛɛ ti.

¹⁴ M nbaam, deke bo i ti na m toko kɛrɛ ma am n la ka, am si ya Si Nyemɛ n dɛɛ ti.

Sim, deke bo i ti na m toko kɛrɛ ma am n la ka, am si Yesu bo i wo bɛrɛ durunya n bumboori n kɛrɛ ti.

Ngbɛfɛnɛm, deke bo i ti na m toko kɛrɛ ma am n la ka, am yarada n ti fanɔa,

na Nyemɛ nɔaniɛ n wo am ahore su, na am akunma Sitana n dɛɛ ti.

¹⁵ Tɔ, má am koro durunya n ni, ni deke n kɛrɛ bo bu wo nu ni. Sɔnɔ kɛrɛ bo i koro durunya ni, i mi koro má ya Si Nyemɛ lɛɛ.

¹⁶ Dama deke n kɛrɛ bo i wo durunya n nu fɛn na i wura sɔnɔ konvi, ni deke bo sɔnɔ nyumbaa ŋu i na i koro i, ni deke bo sɔnɔ nya i na i fa fɔ, i fite má ya Si Nyemɛ dɔ, ama, i kɛrɛ fite durunya n nu fɛn wɔ.

¹⁷ Durunya n ni deke kɛrɛ bo i wura mine konvi kɛrɛ la awieeri, ama, sɔnɔ kɛrɛ bo i yo Nyemɛ sa koroowa, i nyá ŋgɔɔ bo i la má awieeri.

Kabo ya si ya ŋu sa ni Kristo kpɔfɔ n ni

¹⁸ M nbaam, durunya ni sukɔ awieeri lɛɛ. Am yo tiiri ka nzen durunya n ba sukɔ awieeri, Kristo kpɔfɔ ni bá, ama, kisa Kristo kpɔfɔm dɔŋgu ayi bu ŋu fofoe nu. Nyini ti, ya si ka durunya ni sukɔ awieeri lɛɛ.

¹⁹ Nyini minɛm n bo bu ti Kristo kpɔfɔm na ba fite ya nu ni, nahɔrɛ su, bu ti má ya minɛm. Nzen má bu ti ya minɛm, má bu ka ya dɔ ɔ. Ama, ba fite ya nu, nyini ye ya si ka, bu be mmɔɔ ti má ya minɛm a.

²⁰ Ama, amberɛ yiri, Kristo n afa i Awiewie Casi n awura am ahore su, na am si deke bo i ti nahɔrɛ ni.

²¹ Má ka am si má nahɔrɛ n dɛɛ ti, ye m sukɛrɛ ma am n a, ama, am si i, na am si ka kɔrɛ koro yo má nahɔrɛ.

²² Nma ti kɔrɛfɔm kɛrɛ tii n a? Kɔrɛfɔ n la sɔnɔ kɛrɛ bo i nja Yesu ti má Kristo Tiidefɔ n bo Nyɛmɛ sunmaari i ni, yiri n bo i yo sɔ n akete ya Si Nyɛmɛ, ni i Wa n lɛɛ, i mi ni ti Kristo kpɔfɔ n a.

²³ Dama sɔnɔ kɛrɛ bo i keteeri Nyɛmɛ Wa ni, akete i Si Nyɛmɛ mmɔɔ lɛɛ. Ama, sɔnɔ kɛrɛ bo i nja Kristo ti Nyɛmɛ Wa ni, i mi n ade i Si Nyɛmɛ mmɔɔ lɛɛ.

²⁴ Nyini ti, nɔaniɛ n bo am tiiri i sangga bo am boori i bu suuri Kristo su ni, am ma i wo am ahore su. Nzen am bita nyini nɔaniɛ ni am ahore su, nyini ma am ni Nyɛmɛ Wa ni, ni i Si n yo deke kun a.

²⁵ Deke bo Kristo seeri ka i fá ma ya n la nɔɔ bo i la má awieeri ni.

²⁶ M sukɛrɛ ahin nɔaniɛ n ma am, na am si am nju sa fa kɔ minɛm bo bu koro ka bu dadaka am ni.

²⁷ Ama, ambɛrɛ yiri, Awiewiɛ Casi n bo Kristo afa ama am wo am dɔ. Nyini ti, i ti má ye ni ka be fa kereewa be kere am kun, dama Awiewiɛ Casi ni kere am deke kɛrɛ a, na deke kɛrɛ bo i kere am ti nahɔrɛ wɔ, kɔrɛ wo má nu. Nyini dɛɛ ti, am wo ni Kristo kabo Awiewiɛ Casi n akere am ni.

²⁸ M nbaam, kisa am wo ni Kristo, na cɛɛn n bo i ba yiiri i nju fiteeri fofoe nu n na ya la ahoresi, na má nyinɛ ti ya.

²⁹ Am si ka Yesu yo sa bo i kɔ atin n su, nyini ti, am si ka sɔnɔ kɛrɛ bo i yo sa bo i kɔ atin n su, i ti Nyɛmɛ wa a.

3

Bo bu ti Nyɛmɛ nbaam ni

¹ Am niɛ koro bo ya Si Nyɛmɛ fa koro ya barasu a. Nyini dɛɛ ti, ye i fere ya ka i nbaam n a, i ti nahɔrɛ ka ya ti i nbaam wɔ. Durunya n nufɔm si má ya Si Nyɛmɛ, nyini dɛɛ ti, ye bu si má ka ya ti i nbaam n a.

² M ninbaa koroowam, kisa ya ti Nyɛmɛ nbaam wɔ, na Nyɛmɛ nya yi kere má ya kabo ya bá ti barasu, ama, ya si ka Yesu bá baari, ya tí kabo i ti n wɔ, dama ya nju i kabo i ti barasu.

³ Nyini ti, sɔnɔ kɛrɛ bo i la tama ka i bá yo kabo Yesu ti ni, i bita i nju casi, kabo Yesu ti casi ni.

⁴ Sɔnɔ kɛrɛ bo i yo satie, i mi ti Nyɛmɛ nɔaniɛ kpamaawa n ketefɔ ɔ, dama satieyo ti Nyɛmɛ nɔaniɛ kpamaawa n kete wɔ.

⁵ Am si ka Yesu baari durunya n nu, ka i ba yi satie bo i wo ya nju n wɔ, ama, yiri ni i tii la má satie be.

⁶ Nyini ti, sɔnɔ kɛrɛ bo i wo ni Yesu, koro suyo má satie, ama, sɔnɔ kɛrɛ bo i toko yo satie, nyini kere ka, wɔ nya nju má i lɛɛ, na i mi kaaki si má i.

⁷ M nbaam, má am ma be dadaka am. Sɔnɔ kɛrɛ bo i yo sakpa, Nyɛmɛ de i ka i mi yo sa bo i kɔ atin su i dɔ, kabo Yesu ti ni.

⁸ Sɔnɔ kɛrɛ bo i yo satie, i mi ti Sitana dɛɛ sɔnɔ ɔ, dama fite durunya n bumboori n kɛrɛ ye Sitana n yoori satie a. Deke bo i ti na Nyɛmɛ Wa ni baari durunya n nu la ka, i ba yo Sitana n juma nɔɔn wɔ.

⁹ Sɔnɔ kɛrɛ bo i ti Nyɛmɛ wa koro suyo má satie, dama Nyɛmɛ woowa n wo i mi dɔ, na Nyɛmɛ ti i Si n dɛɛ ti, i koro suyo má satie.

¹⁰ Deke bo ya fa si minɛm bo bu ti Nyɛmɛ nbaam, ni bo bu ti Sitana n nbaam n la ka, sɔnɔ kɛrɛ bo i yo má sakpa, wara sɔnɔ kɛrɛ bo i koro má i niwa, i mi ti má Nyɛmɛ wa.

Kabo ya koro ya benggu barasu ni

¹¹ Jɔrɛ n bo am tiiri i sangga bo am boori i bu suuri Yesu su n la ka, am ma ya koro ya bengum.

¹² Má am ma ya yo ka Keen, bo i yo ti Sitana dɛɛ wa ni, na i kuunri i niema ni. Nzu ti ye i kuunri i niema n a? I sayoowa ti má kpa n dɛɛ ti, na i niema n dɛɛ n ti kpa n ti.

¹³ Nyini ti, m ninbaam, nzen durunya n nufɔm kpɔ am ka am yo sakpa n dɛɛ ti, má am ma i yo am alekutura.

¹⁴ Kabo yere koro ya ninbaam n ti, nyini ma ya si ka ya fite yiwee n nu anya ɲɔɔ nahɔre su a. Sɔnɔ kere bo i koro má i niwa toko wo yiwee nu wɔ lɛɛ.

¹⁵ Sɔnɔ kere bo i kpɔ i niwa ti sɔnɔ kunfɔ ɔ Nyeme dɔ. Am si ka sɔnɔ kere bo i kun sɔnɔ la má ɲɔɔ bo i la má awieeri ni.

¹⁶ Yesu deeri ya dɛɛ jinaabiri wɔ, na wɔ tɔ i ɲɔɔ awu ama ya, nyini ma ya fa si kabo koro ti barasu a. Nyini ti, wɔ yo daka ka ya gusu tɔ ya ɲɔɔ ma ya ninbaam, haari nzen i yo yiwee mmɔɔ.

¹⁷ Sɔnɔ kere bo i la nenge, na i ɲu ka i niwa wo yaari nu, na i si má i aɲunfɔ ka i buka i, Nyeme koro wo má i mi n ahore su lɛɛ.

¹⁸ M nbaam, má am ma ya jɔjɔwa n ɲgumi kere ka ya la koro, ama, am ma ya sayoowa kere ka ya koro ya ninbaam nahɔre su.

¹⁹ Nyini ma ya fa si ka ya su nahɔre n su a, na i ma ya la ahoresi Nyeme dɔ a,

²⁰ na nzen ya sunsunni maari ya ka ya yo satie, ya si ka Nyeme tara ya sunsunni ni, na i kaaki si deke n kere.

²¹ Nyini ti, m ninbaa koroowam, nzen ya sunsunni ase má ya ka ya yo satie, ya la ahoresi Nyeme dɔ lɛɛ.

²² Na deke kere bo ya sereeri i, ya nya i wɔ, dama ya de nɔanie maawa n bo Nyeme fa maari ya ni, na ya yo sa bo i sun i nu.

²³ Nɔanie maawa n bo Nyeme fa maari ya n la ka, ya yo i Wa Yesu Kristo yarada, na ya koro ya ninbaam ni, kabo wɔ se ya ni.

²⁴ Sɔnɔ kere bo i deeri Nyeme nɔanie maawam n wo ni Nyeme, na Nyeme mmɔɔ wo ni i mi ni. Awiewie Casi n bo wɔ fa ama ya ni, ma ya si ka Nyeme wo ni yere a.

4

Awiewie n bo i ti nahɔre ni bo i ti kɔre n jɔre

¹ M ninbaa koroowam, má am yo minem kere bo bu ɲa Nyeme Awiewie n wo bu dɔ n yarada, ama, am yo bu na am nie ka bu kereewa n fite Awiewie Casi n dɔ, nzen i fite má. Dama kɔrefɔm dɔɲgu bo bu yo bu ɲu ka bu ti Nyeme nɔanie kanfɔm n asandi abara aye durunya n nu.

² Nyeme nɔanie kanfɔ kere bo i se ka Yesu Kristo kaakiiri adamande baari durunya n nu fen, yiri ye Nyeme Awiewie n wo i dɔ a. Nyini ye am fa si bo Awiewie Casi n wo bu dɔ, ni bo i wo má bu dɔ a.

³ Ama, sɔnɔ kere bo i keteeri ka, Yesu akaaki má adamande ni, Nyeme Awiewie n wo má i mi dɔ, ama, i dɛɛ kereewa n fite Kristo kpɔfɔ n dɔ ɔ. Yiri ye am yo tiiri ka i bá durunya n nu, ye kisa wɔ ba n a.

⁴ M nbaam, am ti Nyeme dɛɛ minem wɔ, ye am akunma nyini kɔrefɔm bo bu yo bu ɲu ka bu ti Nyeme nɔanie n kanfɔm ni, dama Awiewie Casi n bo i wo am nu n la yiko tara Sitana n bo i wo durunya n nufɔm nu ni.

⁵ Nyini kɔrefɔm bo bu yo bu ɲu ka bu ti Nyeme nɔanie kanfɔm ni, bu kan durunya n nu jɔre kere minem a, na durunya n nufɔm de kabo bu kere ni, dama bu ti durunya n nufɔm wɔ.

⁶ Ama, yere yiri, ya ti Nyeme dɛɛ minem wɔ, sɔnɔ kere bo i si Nyeme de kabo ya kere n wɔ, ama, sɔnɔ kere bo i ti má Nyeme dɛɛ de má kabo

ya kere ni. Nyini ye ya fa si minem bo bu la Nyeme Awiewie n bo i kere nahore n a, ni bo bu bu kore n fite Sitana do n a.

Ya koro ya benju kabo Nyeme koro ya ni

⁷ M ninbaa koroowam, am ma ya koro ya niwa, dama koro fite Nyeme do o, na sono kere bo i koro i benju ti Nyeme wa a, na i mi si Nyeme a.

⁸ Nyeme ti koro wo, nyini ti, sono kere bo i koro ma i benju si ma Nyeme.

⁹ Kabo Nyeme kereeri i koro fa ko ya do n la ka o, wo sunma i kunnu Wa kun n kpein durunya n nu, adena yiri dee ti na ya nya ngoo.

¹⁰ Kabo koro ti lee, ma ka yere koroori Nyeme a, ama, yiri koroori ya a, na wo sunma i Wa, na wo de ya jinaabiri na wo fa i nu ayo tie afa ama Nyeme, adena Nyeme fa ya satie ce ya.

¹¹ M ninbaa koroowam, kabo Nyeme koro ya so ni, wo yo daka ka ya gusu koro ya benju.

¹² Be nya nu ma Nyeme, ama, nzen ya koroori ya benju, Nyeme wo ya do lee, na nyini ma i dee koro n wo ya do na i ti kabo i koro ka i ti n a.

¹³ Awiewie Casi n bo Nyeme afa ama ya ni, nyini ma ya si ka ya wo ni yiri a, na i gusu wo ni yere a.

¹⁴ Na yere anu kabo ya Si Nyeme n asunma i Wa n ka i ba yo durunya n nufom Tiidefo, ye ya di i daani a.

¹⁵ Sono kere bo i tekeeri i noo seeri ka Yesu ti Nyeme Wa, Nyeme wo i mi n do, na i mi n gusu wo ni Nyeme lee.

¹⁶ Yere mmoo ni ya tii si kabo Nyeme koro ya barasu, ye ya yo yarada ka i koro ya.

Nyeme ti koro wo, nyini dee ti, sono kere bo i koro i benju ni, i mi wo ni Nyeme, na Nyeme wo ni yiri.

¹⁷ Nyeme koro wo ya do, i ti kabo i koro ka i ti n wo, nyini ti ye ya ba koro jina i nyunu ni ahoresi, ceen n bo Nyeme ba di durunya n nufom kere jore ni, ma pui ti, kabo Kristo ti ni, ya gusu wo ti so o, durunya n nu.

¹⁸ Sono kere bo Nyeme koro wo i do soro ma sere, dama koro bo i ti kabo Nyeme koro ka i ti ni, i fon yi sere wo, nyini ti, sono kere bo i soro sere, Nyeme koro wo ma i do kabo ma Nyeme koro ka i ti ni, dama sere ni suicin nati a.

¹⁹ Nyeme du mo koroori ya, nyini dee ti ye ya gusu la koro n a.

²⁰ Sono kere bo i na i koro Nyeme, na i koro ma i ninbaam ni, i mi ti korofoo. Nzen i koro ma i niwa bo i nyumbaa nu i ni, i yo se koro Nyeme bo i nyumbaa nu ma i n a?

²¹ Noanie maawa n bo Yesu afa ama ya n la ka, sono kere bo i koro Nyeme, wo yo daka ka i mi koro i ninbaam gusu.

5

Kabo ya kunma durunya n ni

¹ Sono kere bo i yo yarada ka Yesu ti Kristo Tiidefo n bo Nyeme asunma i ni, i mi ti Nyeme wa a, na sono kere bo i koroori baa n wufo ni, i koro baa n gusu.

² Deke bo ya fa si ka ya koro minem bo bu ti Nyeme nbaam n la ka, ya koro Nyeme, na ya de noanie maawam n bo wo fa ama ya ni.

³ Nzen ya deeru Nyeme noanie maawam ni, nyini kere ka ya koro i a. I noanie maawam n gusu ti ma kekereke,

⁴ dama sono kere bo i ti Nyeme wa kunma durunya n wo. Deke bo ya fa kunma durunya n la kabo ya yo Yesu yarada n wo.

⁵ Njma koro kunma durunya n a? Bo i koro kunma durunya n la sɔnɔ bo wɔ yo yarada ka Yesu ti Nyeme Wa ni.

Daani diiwa fa kɔ kabo Yesu Kristo ti Nyeme Wa ni

⁶ Yiri Yesu Kristo yo baari durunya n nu n a, na ba bie i Nyeme nzue, nyini sin, na wɔ ba awu, na i mbunja afite agɔ. I baari ni, má ka bu bieeri i Nyeme nzue n ngumi wɔ, ama, i wuuri wɔ, na i mbunja afite agɔ. Awiewie Casi ni di i daani a, dama Awiewie Casi n ti nahɔrefɔ ɔ.

⁷ Deke nsan di i daani a.

⁸ Bu daani diiwa n ti kun wɔ. Bere la Awiewie Casi ni, ni kabo bu bieeri i Nyeme nzue ni, ni kabo i wuuri na i mbunja fite gɔɔri ni.

⁹ Sɔ ye Nyeme ni i tii adi i tienngu Wa n daani a. Ya de minem daani diiwa, nyini ti, i ti ye ni ka ya de Nyeme daani diiwa, dama i daani diiwa n la fanga tara minem dɛɛ.

¹⁰ Nyini ti, sɔnɔ kere bo i yoori Nyeme Wa n yarada, i mi la daani difɔ, yiri la Awiewie Casi n bo i wo i ahore su ni, na sɔnɔ kere bo wɔ yo má i yarada ayi Nyeme kɔrefɔ lɛɛ, dama wɔ yo má daani n bo Nyeme adi i fa kɔ i Wa n su yarada.

¹¹ Nyeme daani diiwa n la ka o, wɔ ma ya ngɔɔ n bo i la má awieeri ni, nyini ngɔɔ n wo i Wa n dɔ ɔ.

¹² Sɔnɔ kere bo i ni Nyeme Wa n ayo kun, i mi la nyini ngɔɔ ni, na sɔnɔ kere bo i de má Nyeme Wa ni, i la má ngɔɔ.

Ngɔɔ bo i la má awieeri n jɔɛ

¹³ M koro ka amɛɛ bo am ayo Nyeme Wa n yarada n si ka am la ngɔɔ bo i la má awieeri ni, nyini dɛɛ ti ye ma kere ahin kadasi n ama am n a.

¹⁴ Ya la ahoresi ni Nyeme, ka, deke kere bo ya sereeri i, na i ti i dɛɛ koroowa, i de ya sere wɔ.

¹⁵ Ya si ka deke kere bo ya sereeri i, na i de ya sere, ya si ka wɔ yo i ama ya lɛɛ.

¹⁶ Nyini ti, nzen sɔnɔ ɲu ka i niwa be ayo satie be bo i kpaaki má i ni Nyeme afien fieo, i mi sére Nyeme ma yiri n bo wɔ yo satie ni, na Nyeme má i ngɔɔ. Ama, satie be wo bere bo i kpaaki sɔnɔ ni Nyeme afien fieo, m suse má ka am sere Nyeme ma minem bo bu yo nyini satie n wɔ.

¹⁷ Sa kere bo minem yo i na i ti má kpa ti satie wɔ Nyeme dɔ, ama, satieyo nbem wo bere bo i kpaaki má sɔnɔ ni Nyeme afien fieo.

¹⁸ Ya si ka minem kere bo bu ti Nyeme nbaam koro suyo má satie, dama Nyeme Wa ni ɲminda i a, na Sitana koro yo má i mi pui.

¹⁹ Ya si ka durunya n nufɔm kere wo Sitana n saa nu wɔ, ama, yere ti Nyeme dɛɛm wɔ.

²⁰ Ye ya kaaki si ka Nyeme Wa n aba na wɔ ba ateke ya nyi wɔ, adena ya si yiri n bo i ti Nyeme nahɔɛ su ni. Ye ya wo ni Nyeme n bo i ti nahɔɛ n ni i wa Yesu Kristo ni. Yiri ti Nyeme nahɔɛ su n a, na i ma ngɔɔ bo i la má awieeri n a.

²¹ Tɔ, m nbaam, am tara am ɲu, na má am su amɔɛm.

Kadasi nnyo su bo YOHANE akerε i ni

¹ Mini bo m ti am kpien ni, sukere ahin jore n fa ma woro bara bo Nyeme ayi u, ni u nbaam n a. M koro am nahore su, ma mini ngumi koro am a, ama, bo bu si nahore atin n kere koro am wo,

² dama nahore n wo ya do o, na i ba wo ya do o, sangga kere bo i la ma awieeri.

³ Ya Si Nyeme, ni i Wa Yesu Kristo buka ya, na bu si ya anunfo, na bu ma ya ahoreda, na ya su nahore atin su ni koro.

Am koro am bengu na am si am nu sa ni dadakafom ni

⁴ Ma nu ka am nbaam nbem bita nahore n kabo ya Si Nyeme afa i noanie n ama ya ni, nyini dee ti, wo yo m fie agaya.

⁵ Kisa, bara, m susere am wo, ka am ma ya koro ya bengu. Ahin ti ma noanie maawa fofore ye m sukere ma am n a, ama, i ti noanie maawa kun n bo ya tiiri i sangga bo ya boori i bu suuri Yesu su n wo.

⁶ Koro n bo m sujoko i jore n la ka, ya wo kabo Nyeme noanie maawa n kere ni. Noanie maawa n bo am du mo tiiri i n la ka, am koro am bengu.

⁷ Dadakafom beberebe asandi abara aye durunya n nu, bu na Yesu Kristo akaaki ma adamande aba ma durunya n nu. Bere ti dadakafom wo, na bu ti Kristo kpofom.

⁸ Nyini ti, am si am nu sa, na ma deke n bo ya yi anyumboro afa akere am n ka ngbeen, ama, na am ba nya i kere nkato.

⁹ Sono kere bo i su ma Kristo dee kereewa n su, na i kere i dee kereewa ko sin nyini nu, Nyeme wo ma i mi do, ama, sono kere bo i su Kristo dee kereewa n su, ya Si Nyeme, ni i Wa n wo i mi n do lee.

¹⁰ Nyini ti, sono kere bo i baari am do, na i bita ma Kristo dee kereewa ni, ma am ma i mi wura am dika, ma am yo i anse ni ba mmoo.

¹¹ Dama woro kere bo a yoori nyinim be so anse, a jina i mi sin fa ko i satiem n bo i yo bu n su wo lee.

Awieeri su dee jore ni

¹² Ma m la jore beberebe bo ma m se am, ama, m koro ma ka m kere i kere wura ahin kadasi n nu, ama, m la tama ka m ba nie am busu, na ya nu ya nu, na ya bo anzama, bo ya ahore jo ni nahore su.

¹³ U niemabara n bo Nyeme ayi i ni i nbaam kere bo bu wo fen n bisa am kere dongu.

Kadasi nsan su bo YOHANE akerε i ni

¹ Mini bo m ti u kpien ni, sukere ahin jore n fa ma woro m don Gayosi bo m koro u nahore su n a.

² M don koroowa, m nyemesere la ka, Nyeme ma u anuniembaa nu laifie, na u deke kere ko atin su nyunyumi, kabo u nyemesu ni sukō atin su ni.

³ Dama ya ninbaa nbem baari fen, na ba se m kabo a bita nahore ni, na wo yo m fie agaya. M si ka a su nahore atin n su wo.

⁴ Deke be wo má bere bo i yo m fie agaya tara bo m ti kabo m nbaam su nahore atin n su ni.

Boro u nyi na a sude u ninbaa Kristo susufom wofō

⁵ M don koroowa, a bita nahore kabo a nati yo sakpa ma u ninbaam bo bu ba u do wofō ni, haari ni bo a si má bu ni mmō.

⁶ Bere bo a buka bu ni, ba kan kabo a koro bu n akere Kristo jama n bo bu wo fen ni. Boro u nyi na a buka bu kabo Nyeme koro ni, na bu koro ko deke bo bu sukō ni.

⁷ Kristo dee ti, bu nati kan i noanie n kere minem wo, na bu koro má pui minem n bo bu su má Nyeme n do.

⁸ Nyini ti, yere bo ya ti Kristo susufom ni, wo yo daka ka ya buka bu ni juma n bo bu yo i ni. Nzen ya bukaari bu, nyini la ka, ya ni bere abo kun sukan Kristo noanie n bo i ti nahore n kere minem wo lee.

⁹ M yo kereri jore be maari Kristo jama ni, ama, Diyoterefesi bo i koro ka i kere ka yiri ti mofō n atana su, wo bo má jore be nu.

¹⁰ Nyini ti, nzen m baari, m yi i sayoowa fite fofoe nu, dama wo joro jore ngbennngbenn abu kore aso ya, má nyini ngumi, wo kete ka i de má Kristo minem wofō, na nzen nbem koro ka bu de minem wofō mmō, i soro má su, na i koro ka i fon yi bere bo bu koro ka bu de wofom n fite Kristo jamam n nu ni.

¹¹ M don koroowa, má a son satieyo su, ama, son sakpayo su. Sono kere bo i yo sakpa ti Nyeme dee wo, ama, sono kere bo i yo satie si má Nyeme.

¹² Sono kere di daani kpa fa ko kabo Demetirosi bita nahore n wo, na i woowa gusu kere ka i bita nahore wo. Yere mmō di i daani wo, ye a si ka kabo ya se n ti nahore wo.

Kasin dee anse yoowa ni

¹³ Má m la jore beberebe bo má m se u, ama, m koro má ka m kere i kere wura kadasi n nu.

¹⁴ M la tama ka m bá nie u busu kisa, na ya nu ya nu, na ya bó anzama.

¹⁵ Nyeme ma u ahoreda. U danfom kere bo bu wo fen bisa u dongu. Woro gusu bisa ya danfom kere dongu ma ya.

Kadasi n bo JUDA akerε i ni

¹ Mini Juda bo m ti Yakobo niεma na m ti Yesu Kristo akɔɔ ni, sukere ahin kadasi n ma ambere kere bo ya Si Nyeme koro am na wɔ fere am, na Yesu Kristo bita am ni.

² Nyeme si am aɲunfo agaya, na i ma am ahoreda buka su, na i koro am kɔ sin su.

Kɔrefom bo bu yo bu ηu ka bu kere Nyeme noanie n dεε jɔre

³ M ninbaa koroowam, má m suboro m nyi wɔ, na m kere kadasi ma am fa kɔ tiide n bo m ni ambere kere anya i n su ni. Ama, wɔ yo daka ka m du mɔ kere am, na m sere am jande ka am boro am nyi tu ηgoni bita am yarada n kenken, nyini yarada ni, yiri ye Nyeme afa ama i minem kpekun n kpein n a.

⁴ Dama minem nbem awɔ awura am nu benle, nyini minem ni, bu soro má Nyeme, bu kaaki Nyeme ahɔroma n bo wɔ fa ama ya n wɔ, na bu su bu dεε konviki koroowa atin n su, na bu kete Kristo. Yiri ηgumi ti ya Tiidefo ni ya Mibiε a. Dawa dεε Nyeme noanie kanfom kereeri bu jɔre, ka, Nyeme dí bu jɔre na i yo bu ηgbεen.

⁵ Haari ni bo am adu mɔ asi ahin jɔre n kere ni, m koro ka m tenge am su wɔ, fa kɔ kabo Micera n yo yiiri Yisarelifom fiteeri Ijipiti asien su ni, ama, kasin na wɔ ma bo ba yo má i yarada n kere aka ηgbεen.

⁶ Na Nyeme merεkem nbem bo bu keteeri ka bu wo má bu yiko woobiri ni, na bu yakiiri bu jinaabiri ni, bere ye Nyeme awura bu jɔrɔkɔ bo bu fite má nu kun, afa bu ase awosin liim nu n a, ka bu wó dɔ, haari fa kɔ ju jɔredi bambaka n cεen.

⁷ Sɔ ye Sodom ni Gomorafom, ni miem bo bu bara ye bu n mmɔɔ yoori a, bu faari bu ηu wuraari sakaraya sereyam nu wɔ, na bu suyo konviki sam bo bu kɔ má atin su. Nyini dεε ti, na Nyeme acin bu sui, afa bu awura sin n bo i je sanɔa kere n nu. Nyeme yoori sɔ ɔ, na mine ηu i, na bu fa tu bu ηu fo.

⁸ Sɔ ye nyini minem nati cin alele ηgbεenηgbεen a, na bu suyo dangba sam, na bu kete Nyeme yiko ni, na bu kpie ηgɔɔfom nzukɔ, bere bo bu wo angoro na bu woowa la jirima ni.

⁹ Haari Mikali bo i ti Nyeme merεkem n kere tii ni mmɔɔ, wɔ yo abo má su ka i jaraki Sitana kpie i nzukɔ, sanɔa bo Moyisi wuuri na bu seeri akuruwa fa kɔ i ηuniembaa n busu ni. Ama, kabo i seeri i n la ka, “Nyeme bisa u.”

¹⁰ Ama, ahin minem ni, bere yiri, deke bo bu si má i ni, nyini ye bu kpie i nzukɔ a. Haari nzen bu ηa ba ti deke bu, bu sunsunni ti ka nenggendɔrem dεε wɔ. Bu nyini sunsunni n bo bu bita i na i ti má kpa ni, nyini ma bu ka ηgbεen a.

¹¹ Keto, keto, bu ηú kekereke. Dama ba fa satie atin n bo Keen faari i ni, na ηwaa dεε ti, bu su Baalam dεε dadaka atin n su wɔ, na ba kete nahore atin kabo Kora yo keteeri ni. Nyini ti, kabo i kaari ηgbεen ni, bere gusu ka ηgbεen sɔ ɔ.

¹² Nzen am ba tien am nɔɔ sudi anɔɔse diire, bu sata am afien kabo fin ta sutura n wɔ, dama bu ni ambere sanɔa di a, na bu san má nya, bu koro

ka bere ngumi kunnu yi a, bu la má kperε be. Bu ti ka nzue bo i muna na anjuma fa i sin n wɔ. Na bu kaaki ti ka baka bo i su má suuwa bakam su sanja, na i wu kporɔ na i bu tɔ n wɔ.

¹³ Bu nyinse sam bo bu yo bu ni, bu ti kabo tieku nzue bo na i yasu fufuku n wɔ. Bu kaaki ti ka asarambaa bo bu jengbe bara ye n wɔ. Nyeme asese awosin liim su anjinda bu ka bu kó wo dɔ sanja kere.

¹⁴ Sɔnɔ be bo bu fere i ka Henoki, na i tɔ ya na Adama su nso su ni, Nyeme yo faari i nɔanie n maari i wɔ, na wɔ yo ajojo nyini jɔre n ka, “Am ti fen, Micera ni suba ni i merεkem akpii akpii buru,

¹⁵ na i bá di sɔnɔ kere jɔre, na i cín bu sui fa kɔ bu satiem bo ba yo bu n su, ni kabo bu jɔjɔri ngbεenngbεen na bu keteeri Nyeme ni. Bu ti satieyofɔm wɔ, nyini ti, ye bu keteeri Nyeme nɔanie n a.”

¹⁶ Nyini minem ni sɔ, bu njujuti wɔ sanja kere, na bu sujaraki bu benggu, na bu susu bu konvikiya sa ngbεenngbεen bo bu bita i n su, na bu sufo yanfoya, na bu subo minem anɔɔfiε, adena bu nya bu dεε sa koroowam.

Jɔre bɔbɔwam ni atin kereewam ni

¹⁷ Ama, amberε, m danfo kɔm, wɔ yo daka ka am tenge su fa kɔ jɔre n bo ya Mibiε Yesu Kristo jaramasam yo seeri am ni.

¹⁸ Bu seeri am ka, “Sanja bo durunya n ba sukɔ awieeri su ni, mine nbem bá ba, na bu yó am anzasi, fa kɔ am yarada n su, na bu sú bu dεε tienngu anjuniεmbaa sa koroowam n su bo bu kɔ má Nyeme atin su ni.”

¹⁹ Ahin minem sɔ, bu sutiti am nu wɔ lee, bu su adamande dεε ngɔnle su a, Nyeme Awiewie Casi n wo má bu dɔ.

²⁰ Ama, amberε, m danfo kɔm, am boro am nyi na am ma am yarada casi n buka su, na am sere Nyeme, Awiewie Casi n dεε yiko nu,

²¹ na am ma Nyeme dεε koro n wo am dɔ. Na am njinda fa kɔ sanja bo ya Mibiε Yesu Kristo bá si am anjunfo, na am nya ngɔɔ bo i la má awieeri ni.

²² Nbem wo am nu bo bu la sika bu sunsunni nu, am si bu anjunfo,

²³ nbem gusu, am cin yi bu fite sin nu, na am de bu tii ji, na nyingam gusu, am si bu anjunfo, ama, am si am nju sa haari na má am ma bu sutura fin mmɔɔ ta am.

Awieeri su dεε nyemesere

²⁴⁻²⁵ Nyeme ngumi ti ya Tiidefo a, ya Mibiε Yesu Kristo dεε ti. Yiri koro bita am na am kpaasi má a, yiri koro fa am ba jina i jirima bie n nyunu a, na am la má ngasi be na i ma am ahorejo a. Yiri ye i ti ye ni ka ya kansi i na ya wura i kpiri a, yiri ti yikofɔ a, yiri ti fanɔgafɔ a, yiri yo woori bere a, yiri toko wo bere kisa ni sanja kere a. Ami.

SAYIKEREWA bo Yesu yi kereeri YOHANE ni

¹ Ahin jøre n ye Nyeme seeri Yesu Kristo ka i yi kere i akoom fa ko sam bo i ce ma na bu ba yo n a. Na Yesu asunma i mereke i akoo Yohane do, na i ko se i jore ni.

² Jore n bo Nyeme ni Yesu Kristo yi kereeri Yohane na i nuuri i ni, nyini ye wo di i daani akere i n a.

³ Sono kere bo i kaanri ahin kadasi ni, terefie wo i do. Na minem kere bo bu tiiri i jore na bu deeri i, terefie wo bu do, dama sangha n adodo bo nyini sam kere ba yo.

Kabo Yohane kereri kadasi yori Kristo jama n anse ni

⁴⁻⁵ Mini Yohane akere ahin kadasi n na m fa ma Kristo jama asese nso n bo bu wo Esiya awore n nu n a. Nyeme bo i wo bere, na i yo woori bere, na i ba wo bere sangha kere ni, ni i awiewie busu nsom n bo bu wo yiri Nyeme kpiri n nyunu ni ma am ahoreda, na am di bu ahorama. Bekun, Yesu Kristo, yiri bo i di i daani na i la dabunu ni, na yiri ti bo i du mo tengeeri yiwee nu ni, na i kaaki ti durunya n nu nfemem kere tii ni, ma am ahoreda, na am di i ahorama. Yiri koro ya, na wo fa i mbunja ade ya afite ya satie kere nu,

⁶ na wo yo ya i femeya n nu minem na ya yo i sayoowa donguyofom, na ya su i Si Nyeme. Yiri Yesu Kristo ni, yiri ti ye ni ka ya wura i kpiri a, i dee la yiko sangha kere. Ami.

⁷ Am nie, i fite angoro yinyingu n nu ba,
na sono kere nyumbaa ba nu i,
fa sangha ni minem bo bu woori i kpie n kere.
Yiri ti, durunya n nufom kere sun.

I ti so o. Ami.

⁸ Ya Mi Nyeme Feme Kpiri bo i wo bere ni, na i yo woori bere, na i ba wo bere sangha kere n ase ka, "Mini ti mofa a, na m kaaki ti kasinfo."

Kabo Yohane nuuri Kristo ka alele nu ni

⁹ Mini Yohane ti am niwa bo m ni amberere kere sangha di wahara ni mindi Yesu dee ti, na ya ti i femeya n nu minem ni. Nyeme noanie n bo ma kan i ni, ni Yesu daani n bo ma di i n dee ti, na ba fa m ako aji mie be bo i wo lui bambaka n bo i wo tieku n nu na bu fere i ka Patamosi n su.

¹⁰ Ya Mibie n dee ceen ni, na Nyeme Awiewie Casi n awura m nu, na ma ti akonvi bambaka be nga m sin, ka awie dee su.

¹¹ Na wo se m ka, "Kere deke n kere bo a nu i n wura kadasi n nu, na a fa ma Kristo jama asese nsom bo bu wo ahin mie kpirim n su ni, bere la Efeso, ni Samirina, ni Peragamon, ni Tiyatira, ni Saradisa, ni Filadelfiya, ni Lawodikaya."

¹² Na ma ce anie m sin ka m nu sono n bo i joko m do ni, m ce nieeri ni, na ma nu fitana takaabiri nsom bo bu ti sika ni.

¹³ Na ma nu be ka adamande wa ni, i wo bu afien, i wura tanlee tintiin yorom, na wo fa sika dambara abo i hoe su.

¹⁴ I tiinmie kere ti fofoe papasi ka gise wo, na i nyumbaa kere je ka sin fofoe.

¹⁵ Na i jaa gbagbaa kere boro ka jawii bo ba fa awura sin nu na wo boro sonsoen, na i konvi bo awie kabo nzue beberebe songi na i bo awie barasu ni.

¹⁶ I bita asarambaam nso i saa fomboro nu, na takobe nana afite i noo nu. I nyunu je kabo wie ba bi na i je n wo.

¹⁷ M nuuri i so ni, na ma kaba ada i jaa bu asienngu ka ma wu dee su wo, na wo fa i saa fomboro anana m nu, na wo se m ka, "Ma a soro sere. Mini ti deke kere bumboori ni i awieeri a.

¹⁸ Mini ti bo i wo bere sangha kere n a. Nie fen. M yo wuuri wo, ama, kisa, ma tenge yiwee nu. M la ngoo bo i la ma awieeri. Mini bita yiwee ni Yiweefom Woobiri kadombaa a.

¹⁹ Nyini ti, kere sam bo a nu bu ni, ni bo bu suyo kisa ni, ni bo bu ba yo ahin dee sin ni.

²⁰ Asarambaa nsom bo a nu bu m saa fomboro n bu la ka, Kristo jama asese nsom n merkem. Na fitana takaabiri nsom bo bu ti sika ni gusu bu la ka, Kristo jama asese nsom ni."

2

Nɔaniɛ n bo bu fa maari Kristo jama n bo i wo Efeso ni

¹ Na wo se m ka, "Kere kadasi fa ma merke n bo i nie Kristo jama n bo i wo Efeso mie kpiri n nu ni, na a se bu ka, 'Ahin nɔaniɛ n fite mini bo m bita asarambaa nsom m saa fomboro nu ni, na m kaaki nati fitana takaabiri nsom bo bu ti sika n afien n do o.

² M si am sayoowam, m si kabo am ayo am juma ni anyumboro barasu, ni kabo am la mindi barasu ni, na m si kabo am de ma satieyofom ni. Na m kaaki si kabo am ayi koresi anu minem bo bu na bu ti m jaramasam, ama, bu woowa kere ka bu ti ma so, na am anu ka bu ti korefom ni.

³ Mini dee ti, am ayo sawore amindi am wahara nu, am nya fie ma, am toko su m su.

⁴ Ama, jore kun bo m fa jaraki am la ka, kisa am koro ma m kabo am yo koro m ni.

⁵ Nyini ti, am bu am tii nu fo na am si deke bo am akpaasi ni, na am kaaki am wo, na am yo sam bo am yoori bu bumboori ni. Nzen am akaaki ma am wo, m ba cin yi am fitana takaabiri n deke bo i taka ni.

⁶ Ama, am sa kun bo i yo m fie n la kabo am koro ma Nikolaitafom sayoowam ni, mini mmoo koro ma bu sayoowam ni.'

⁷ Sono kere bo i koro ka i ti ahin jore n bu, i ti ye ni ka i mi so i sui na i ti kabo Awiewie Casi ni suse Kristo jamam barasu ni. Sono kere bo i di nasara, m ma i atin na i di baka n bo i ma ngoo n dee suuwa na i wo Nyeme dika n nu ni."

Nɔaniɛ n bo bu fa maari Kristo jama n bo i wo Samirina ni

⁸ Na wo se m ka, "Kere kadasi fa ma merke n bo i nie Kristo jama n bo i wo Samirina mie kpiri n nu ni, na a se bu ka, 'Ahin nɔaniɛ n fite mini bo m ti deke kere bumboori ni i awieeri ni, na m yo wuuri na ma tenge yiwee nu ni do o.

⁹ M si kabo am adi wahara agaya barasu, ni kabo am ti jaarifom ni, ama, am ti nengefom wo Nyeme do. Na m si kabo minem kpie am nzuko ni, bo bu yo bu nu ka bu ti Yudafom, ama, bu ti ma Yudafom ngba, bu ti Sitana dee jama n wo.

¹⁰ Am di wahara kisa, ama, ma am soro sere. Am ti fen, Sitana wura am nbem saraka na i yo am na i nie na am nu kekereke leburu. Ama, am su

m ni nahore haari am bá wu, na m tó am nkato, yiri la ngoo bo i la má awieeri n a.'

¹¹ Sono kere bo i koro ka i ti ahin jore n bu, i ti ye ni ka i mi so i sui na i ti kabo Awiewie Casi ni suse Kristo jamam barasu ni. Sono kere bo i di nasara nu má yiwee kpe nnyo su n kun."

Nɔaniɛ n bo bu fa maari Kristo jama n bo i wo Peregamon ni

¹² Na wo se m ka, "Kere kadasi fa ma mereke n bo i nie Kristo jama n bo i wo Peregamon mie kpiri n nu ni, na a se bu ka, 'Ahin nɔaniɛ n fite mini bo m la takobe nana n do o.

¹³ M si deke bo am woori ni, am woobiri n ti Sitana femeya tanaabiri wo, ama, am toko su m ni nahore wo, am ayaki má m yaradayo, haari ni sanja bo bu kuunri Antipasi bo i diiri m daani nahore su am mie n nu, deke bo Sitana wo ni.

¹⁴ Ama, m la jore nbem bo m fa jaraki am, am nbem bita Baalam kereewa atin n wo. Yiri yo kereeri Feme Balaki, ye i maari Yisarelifom yoori satie diiri tie nie, na ba yo sakaraya.

¹⁵ Am nbem gusu ti so o, bu su Nikolaitafom dee atin kereewa n su wo.

¹⁶ Nyini ti, am kaaki am wo, má nyini, m bá am do kisa, na m fá takobe n bo i wo m noo nu kun lue ni minem bo bu yo so ni.'

¹⁷ Sono kere bo i koro ka i ti ahin jore n bu, i ti ye ni ka i mi so i sui na i ti kabo Awiewie Casi ni suse Kristo jamam barasu ni. Sono kere bo i di nasara, m má i mi diire n bo bu fere i ka *mana* * ni, na i wo fieewa nu ni. Na m kaaki ma i mi yabue fofoe be, ba kere duma fofore su, be koro si má duma n bo i wo su ni, má ka yiri n bo i de i ni si i a."

Nɔaniɛ n bo bu fa maari Kristo jama n bo i wo Tiyatira ni

¹⁸ Na wo se m ka, "Kere kadasi fa ma mereke n bo i nie Kristo jama n bo i wo Tiyatira mie kpiri n nu ni, na a se bu ka, 'Ahin nɔaniɛ n fite mini Nyeme Wa n do o, mini bo m nyumbaa je ka sin fofoe, na m jaa gbagbaa kere boro ka jawii dee su ni.

¹⁹ M si am sayoowam, m si kabo am la koro barasu, ni kabo am su m ni nahore su ni, ni amusui bo am su i ni, na m kaaki si kabo am la mindi, na m si kabo kisa am boro am nyi tara bumboori ni.

²⁰ Ama, jore bo m fa jaraki am la ka, am amo am noo ye am nie Yezebeli, bara n bo i yo i nu ka i ti Nyeme nɔaniɛ kanfo ni. I kere m akoom wo na i daka bu, na bu suyo sakaraya, na i ma m minem di tie nie.

²¹ Ma se i ka i kaaki i wo na i yaki somaya ko ni, wo kete ka i kaaki má.

²² Nyini ti, m má i da tukpaki kekereke, na i ni minem bo bu yo sakaraya n di wahara agaya, nzen ba kaaki má bu wo ayaki má sam bo bu ni yiri yo bu ni.

²³ Na m kún i nbaam, na Kristo jama asese n kere si ka, mini fiti si deke bo i wo sono kere ahore su, ni i sunsunni nu. Na m fá sono kere sayoowa to i kaari.

²⁴ Ama, ambere Tiyatirafom nbem bo am aka, na am su má i kereewa atin n su ni, ambere asonson má deke bo nbem fere i ka Sitana asiri nu sa bambaka ni. M suse am wo lee, m só má am soori nonoori buka má su.

²⁵ Ama, atin bo am bita i ni, am bita i kenken haari sanja bo m bá kaaki ba.

²⁶⁻²⁸ Sono kere bo i di nasara na i yo m sa koroowa ko juuri awieeri, m má i yiko kabo m Si ama m yiko ni, na i nie daanfie daanfie kere su. Na i bita bu kekereke kabo nanjasi fa bulaari koroma tu bo i naanim barasu ni, na i fufu bu kabo bu fufu yakatise barasu ni. Na m má i asaakojo.'

²⁹ Sɔnɔ kere bo i koro ka i ti ahin jɔre n bu, i ti ye ni ka i mi so i sui na i ti kabo Awiewie Casi ni suse Kristo jamam barasu ni.”

3

Nɔanie n bo bu fa maari Kristo jama n bo i wo Saradisa ni

¹ Na wɔ se m ka, “Kere kadasi fa ma merere n bo i nie Kristo jama n bo i wo Saradisa mie kpiri n nu ni, na a se bu ka, ‘Ahin nɔanie n fite mini bo m la Nyeme awiewie busu nso n na m bita asarambaam nso m saa nu do o. M si am sayoowam, am wo ka am la ngoo, ama, am ti fuinm wɔ.

² Nyini ti, am yasu na am bita deke n bo am toko la i n kenken, má nyini, i wú wɔ. Dama ma ŋu ka am sayoowam n akpie su Nyeme do.

³ Am tenge su, kabo am yo tiiri Nyeme nɔanie n na am deeri i ni, am kaaki am wo na am bita i, nzen am ayasu má, am si má sanɔa bo m bá ni, dama m bá fura am nu ka awiefɔ deɛ su wɔ.

⁴ Ama, m la mine nbem bo bu wo Saradisa Kristo jama n nu, bo ba saaki má bu sutura ayo má bu fin, bu sayoowam nu. Bere bá wura tanlee fofoe na m ni bere sanɔa nati a, dama bu ti ye ni so o.

⁵ Sɔnɔ kere bo i di nasara, i wúra nyini tanlee fofoe n be so o. Na m yí má i mi duma fite má ngoo kadasi n nu, ama, m bá jina m Si ni i merkem nyunu, na m sé bu ka i ti m deɛ sɔnɔ o.’

⁶ Sɔnɔ kere bo i koro ka i ti ahin jɔre n bu, i ti ye ni ka i mi so i sui na i ti kabo Awiewie Casi ni suse Kristo jamam barasu ni.”

Nɔanie n bo bu fa maari Kristo jama n bo i wo Filadelfiya ni

⁷ Na wɔ se m ka, “Kere kadasi fa ma merere n bo i nie Kristo jama n bo i wo Filadelfiya mie kpiri n nu ni, na a se bu ka, ‘Ahin nɔanie n fite mini bo m ti casi na m ti nahorefo, na m bita Feme Davidi kadombaa n bo i kere ka m la i deɛ yiko n be wɔ, na nzen m tekeeri anɔ, be koro tu má i, na nzen m tuuri i gusu, be koro teke má i.

⁸ M si am sayoowam, am nie, ma teke anɔ ama am bo be wo má bere bo i koro tu i. M si ka am la má fanɔa agaya, ama, haari ni nyini mmoo, am fite má m sin, am toko bita m nɔanie n ni nahore wɔ.

⁹ Am yaki bo bu su Sitana n na bu yo bu ŋu ka bu ti Yudafom ni, bu ti korefom wɔ, bu ti má Yudafom ngba. M má bu ba kutu am nyunu na bu si ka m koro am.

¹⁰ Am ade m nɔanie ni, na am amindi n deɛ ti, m yí am fite kekereke n bo Nyeme bá fa yo durunya n nufom kere na i nie ni.

¹¹ M cé má, m káaki ba kisa. Atin n bo am bita i ni, am bita i kenken na má be fin am ŋkato ni.

¹² Sɔnɔ kere bo i di nasara, m fá i yo jantaraká Nyeme Sereebiri Awuru n nu na i wó nu do sanɔa kere. Na m kere Nyeme duma mata i, na m kere Nyeme mie n duma, mie n bo i fite angoro Nyeme do na bu fere i ka Yerusalem fofore, na m káaki kere m duma fofore n gusu mata i mi ŋu.’

¹³ Sɔnɔ kere bo i koro ka i ti ahin jɔre n bu, i ti ye ni ka i mi so i sui na i ti kabo Awiewie Casi ni suse Kristo jamam barasu ni.”

Nɔanie n bo bu fa maari Kristo jama n bo i wo Lawodikaya ni

¹⁴ Na wɔ se m ka, “Kere kadasi fa ma merere n bo i nie Kristo jama n bo i wo Lawodikaya mie kpiri n nu ni, na a se bu ka, ‘Ahin nɔanie n fite mini bo m ti Ami na m la dabuŋu, na m di daani ni nahore su n do o. Mini ni Nyeme du mo yo woori bere a, ye ya yiiri deke n kere a.

¹⁵ M si am sayoowam, am ti má niniki, am kaaki ti má kekere, nzen má am ti niniki wara kekere, má m koro.

¹⁶ Ama, am ti boboroki n dæ ti, m púuti am m nɔɔ nu butu.

¹⁷ Am ɲa am ti nenɲefom wɔ, deke be kpɛ má am su, ama, am si má ka am la anunfo, na am si má ka am ti yaarifom, na am kaaki si má ka am ti anyinsinm, na am kaaki si má ka am nati am ɲunie ɲgbɛɛn wɔ.

¹⁸ Nyini ti, m koro ka m tu am fɔ, na am bra m dɔ ba to sika kpa bo ba fa awura sin nu na wɔ fite casi ni, adena am yo nenɲefom nahɔre su, na am ba to sutura fofoe m dɔ, na am fa kata am ɲu, na má mine ɲu ka am nati am ɲunie ɲgbɛɛn na i la nyinse. Na am ba to anyumbaa ayiri m dɔ, na am fa wura am nyumbaa nu na am koro ɲu asi nyunyumi.

¹⁹ Bo m koro bu ni, bere ye m jaraki bu na m cin bu sui a, nyini ti, am boro am nyi na am kaaki am wo.

²⁰ Am ti fen, m jina sɔɔ anɔ n sin subobo, sɔnɔ kere bo i ti m konvi ɲga na i tekeeri anɔ ni, m bá wura i mi dɔ, na m ni yiri sánɲa di diire.

²¹ Sɔnɔ kere bo i di nasara, m má i atin na i bá tana m bi m femeya bie n su, kabo ma di nasara na m ni m Si sangga tana i femeya bie n su ni.'

²² Sɔnɔ kere bo i koro ka i ti ahin jɔre n bu, i ti ye ni ka i mi so i sui na i ti kabo Awiewie Casi ni suse Kristo jamam barasu ni."

4

Kabo bu su Nyeme i femeya n nu barasu ni

¹ Nyini sin, na wɔ yo m ka alele dæ su, na ma ɲu ka anɔ be ateke angoro. Na ma ti akonvi ɲga ka awie dæ su sujɔɔ m dɔ, i ti akonvi n bo i du mɔ jɔjɔri m dɔ n wɔ. I ɲa, "Fun bra angoro fen, na m kere u sam bo bu bá yo ahin sin."

² Jina nu n bere na Awiewie Casi n aba awura m ɲu na ma ɲu ka femeya bie wo angoro, be tana su.

³ Bo i tana femeya bie n su je piɛpiɛu kabo cenceeri nbem je barasu wɔ, nbem je fofoe na nbem je kɔkɔre, na i femeya bie ni, deke be je piɛpiɛu angoro kabo nzue ba muna na ayi kpɛ nu ni.

⁴ Femeya bie aburanyɔ ni nna nbem taka bara ye i femeya bie ni, na nkpienkpienm aburanyɔ ni nna tana biem su, bu wura tanlee fofoem na bu butu sika kere.

⁵ Na femeya bie ni sukɛse ka nzue dæ su, na i sutenantien, na i suyo nanmie. Fitana nso taka femeya bie n nyunu wo je su, bere la Nyeme awiewie busu nsom ni.

⁶ Deke be gusu da femeya bie n nyunu ka nzue bambaka dæ su, i nyunu da cain ka niɛnu wɔ.

Deke ɲɔɔfo nna nbem gusu abara aye femeya bie ni, bu la anyumbaa beberebe, bu nyunu ni bu sin n kere.

⁷ Ciciri su dæ n ti ka jara a, nnyɔ su n ti ka toora, nsan su n nyunuawa ti ka adamande wɔ, na nna su n ti ka kajiri bo i sutu landi.

⁸ Bu kun kun kere la lanɲpete nsen nsen wɔ, bu la anyumbaam bu ɲunie-mbaa nu, ni bu ɲunie kere su. Na bu sudi jue kɔɲgue ni wiesu kere, ka, "Casi, casi, casi la ya Mi Nyeme Feme Kpiri,

i yo woori bere, na i toko wo bere, na i bá wo bere sangga kere ni."

⁹ Nzen bu nya sudi jue na bu fa kansi, ni jirima, ni anse ma yiri n bo i tana femeya bie n su ni, na i wo bere sangga bo i la má awieeri ni,

¹⁰ nyini sangha, a ɲu ka nkpienkpienm aburanyɔ ni nna n sukutu i nyunu, na bu su i, yiri bo i wo bere na i la má awieeri na i tana femeya bie n su ni. Na bu yi bu kere, sufa se femeya bie n nyunu, na bu sudi jue, ka,

¹¹ “Ya Micera ni ya Nyeme, wɔɔ ti ye ni ka
a de kansi a, ni jirima, ni yiko.

Dama wɔɔ yiiri deke n kere a,
u koroyanu ye a maari deke n kere la ɲɔɔ a.”

5

Kadasi n ni Bɔmbaa n jɔre

¹ Na ma ɲu ka kadasi nyanyaawa be wo yiri n bo i tana femeya bie n su n saa fɔmbɔɔ n nu, kereewa wo i kunnu ni i sin kere su, ba fa wie mene amie amata i busu nso.

² Na ma ɲu Nyeme mereke fangafɔ be ka i subo ndoori fanga su ka, “Nma ti ye ni bo i koro cin ɲmanɲi wie mene n na i teke kadasi n a?”

³ Ama, aɲgoro, ni asienɲu, ni bo bu wo asien bu, be awo má bere bo i koro teke kadasi ni, na a ba kan ka i koro nie nu.

⁴ Be awo má bere bo i ti ye ni bo i koro teke kadasi ni, na a ba kan ka i koro nie nu n deɛ ti, na ma sun ni nyunvuin ɲgba.

⁵ Na nkpienkpienm n nu kun, ase m ka, “Má a sun. Nie fen, Feme Davidi anuma kpiri ni, bo bu fere i ka Yudaɔm busu nu jara n adi nasara, i koro cin ɲmanɲi wie mene nso n na i teke kadasi ni.”

⁶ Na ma ɲu bɔmbaa be, i ti ka ba kpie i kɔm wɔ, i jina femeya bie n afien. Deke ɲɔɔɔɔ nnam, ni nkpienkpienm n abara aye i. I la mbie nso wɔ, i nyumbaa gusu ti nso wɔ. Bere la Nyeme awiewie busu nsom bo wɔ sunma bu durunya n kere nu ni.

⁷ Na wɔ kɔ yiri n bo i tana femeya bie n su n dɔ, na wɔ de kadasi n afite i saa fɔmbɔɔ nu.

⁸ I kɔ deeri kadasi n ni, na deke ɲɔɔɔɔ nnam, ni nkpienkpienm aburanyɔ ni nnam n akutu i nyunu. Bu kere la bieku, na bu kere bita sika ayaba bo wɔ yi ni ayiri kunkuunwa nvanvani ɲgumi wɔ. Ayiri kunkuunwa nvanvani n ti nyemesere bo Nyeme deɛ mine sere i wɔ.

⁹ Na ba di jue fɔfɔre ama yiri Bɔmbaa n ka,

“Wɔɔ ti ye ni ka a de kadasi ni,
na a ɲmanɲi wie mene n a,

dama wɔɔ ye bu kpieeri u kɔm, ye a fa u mbunja ade minem tii aji a.

Adamande kere, ni daanfie kere, ni aniem kere,
ni asien barasu barasu kere bo bu wo durunya n nu ni,
bu nbem ayo Nyeme deɛ minem.

¹⁰ A fa bu ayo u femeya n nu minem,
na bu yo u sayoowa dɔɲguyofɔm,
na bu nie durunya n kere su.”

¹¹ Na ma nie aɲu Nyeme merkem beberebe, akpii akpii buru nɔ, ka, ba bara aye femeya bie ni, ni deke ɲɔɔɔɔ nnam, ni nkpienkpienm ni. Na ma ti ka

¹² ba ye bu konvi su sudi jue, ka,

“Bɔmbaa n bo bu yo kpieeri i kɔm ni,

yiri ti ye ni ka i de yiko a, ni nenɲe, ni alecira, ni fanga,
ni jirima, ni kpiri, ni kansi a.”

¹³ Na ma ti ka deke kere bo bu wo aɲgoro, ni asienɲu, ni bo bu wo asien bu, ni bo bu wo nzue nu, ni deke kere bo Nyeme ayi bu, ka bu sudi jue, ka, “Yiri n bo i tana femeya bie n su n ni Bɔmbaa ni,

berε ti ye ni ka bu de kansi a, ni jirima, ni kpiri, ni yiko, sanƙa kerε sanƙa.”

¹⁴ Na deke ηƙooƙo nnam n ase ka, “Ami.”

Na nkpienkpienm n akutu asu Nyeme ni Bombaa ni.

6

Wie mene bo bu fa mata kadasi n jore

¹ Na ma ηu ka Bombaa n aba acin anmangi wie mene nso n bo bu fa mataari kadasi n nu kun. Na ma ti deke ηƙooƙo nnam n nu kun konvi ηga, kabo nzue tientien barasu ni, ka, “Fite.”

² M niεeri na ma ηu ka, kpηηƙo fofoe lεε. Bo i fun i n bita taa ni awie, na ba butu i femeya kere, na wε kε ka luekunfo na i di nasara.

³ Na Bombaa n acin anmangi wie mene nnyo su ni, na ma ti ka deke ηƙooƙo nnyo su ni suse ka, “Fite.”

⁴ Na kpηηƙo kεkεre afite, na ba ma i funfo n takobe tintiin, na ba ma i yiko ka i yi tanalaifie fite durunya n nu, na minem kun bu bengum.

⁵ Na Bombaa n acin anmangi wie mene nsan su ni, na ma ti ka deke ηƙooƙo nsan su n suse ka, “Fite.”

M niεeri na ma ηu ka, kpηηƙo biri lεε. I funfo n bita deke bo bu bita sunsun diire ni i saa nu.

⁶ Na ma ti akonvi be ηga deke ηƙooƙo nnam n nu, i ηa, “Nɔani ayaba ηgboroko kun ti jumayofε lekun ηkatε ε. Na abuwe ayaba ηgboroko nsan ti jumayofε lekun ηkatε. Ama, mǎ am saaki ηguin ni nzan ni.”

⁷ Na Bombaa n acin anmangi wie mene nna su ni, na ma ti ka deke ηƙooƙo nna su n suse ka, “Fite.”

⁸ M niεeri na ma ηu kpηηƙo nzuin faa, i funfo n duma la Yiwee, na bo bu fere i ka Yiweefom Woobiri n gusu su i su. Na Nyeme ama bu durunya kpaaki nu nna buekun yiko ka bu fa lue, ni ahεε, ni tukpaki, ni boro nenƙendεre tiem, na bu kun bu.

⁹ Na Bombaa n acin anmangi wie mene nnu su ni, na ma ηu minem awiewie Mikun yoowa yoobiri n bu, berε la minem bo bu yo kuunri bu fa kε bu Nyeme jore kaanwa, ni bu daani diiwa n dεε ti.

¹⁰ Na bu sutien fanƙa su ka, “Ya Mi Nyeme Feme casi, nahεrefo, cεen nzu ye a dǐ minem bo bu yo kuunri ya n jore na a cǐn bu sui ma ya?”

¹¹ Na Nyeme awura bu kun kun kerε sutura fofoe, na wε se bu ka, “Am yi am ηumi kaan ka, na bu bǎ kun am bengu akεom, ni am bengu Kristofom kerε kε wie ka, kabo bu yo kuunri am barasu ni, na m dǐ bu jore.”

¹² Na ma ηu ka Bombaa n acin anmangi wie mene nsen su ni, na asien akpisi fanƙa su, na wie akaaki biri didiki ka nambiri ηuma, na sara n akaaki kεkεre ka mbunja dεε su.

¹³ Na asarambaam afite angoro ati atεto kabo anuma ba kpisi damba baka na i poorim titi tεto barasu ni.

¹⁴ Na angoro n kerε anyanya kabo bu nyanya bie ni, na wε mini, na bukam, ni nzue nu lui bambakam kerε ayasu bu tanaabiri.

¹⁵ Na durunya n nu nfemem, ni tereterefom, ni soja nkpienkpienm, ni nenƙefom, ni nfanƙafom, ni akεom, ni sεnε kerε akε afie yabue ηgbingbirim buem nu, ni yabue bambakam bu, bukam su.

¹⁶ Na ba se ka, “Mǎ bukam bereki gε ya ηu, na mǎ yabue ηgbingbirim kata ya ηu, mǎ i ti ye, adena mǎ sεnε n bo i tana femeya bie n su n ηu ya, na mǎ Bombaa n gusu cin ya sui.

¹⁷ Dama cɛɛn bo Nyɛmɛ ni Bɔmbaa ni cin sɔnɔ kere sui n aju, ye n̄ma koro jina bu nyunu a?”

7

Yisarelifɔm minɛ akpii yaa ni akpii aburana ni nna n jɔrɛ

¹ Nyini sin na ma n̄u mɛrɛkɛm nna, ka bu jina durunya n awɔrɛ nna n kere nu na bu kanda aɲuma, na m̄a i kpɛɛ asien n su, ni tieku nu, wara i kpɛɛ gɔ baka su.

² Na ma n̄u mɛrɛkɛ be ka i fite wiɛ afiiri, i bita deke be bo Nyɛmɛ bo i wo bɛrɛ saɲga kere n fa se i minɛm nyaari. Na wɔ tien faɲga su aɲɔɲɔ mɛrɛkɛ nnam bo Nyɛmɛ ama bu yiko ka bu saaki asien n ni tieku n dɔ,

³ na wɔ se bu ka, “M̄a am se ka am saaki asien n ni tieku n ni bakam ni, m̄a ka ya ba ase Nyɛmɛ minɛm kere n̄uma su nyaari awie ka.”

⁴ Na wɔ kan minɛm bo ba se bu nyaari bu n̄uma su ni, na wɔ kere m bu nɔ, bu kere kɔ yasuri minɛ akpii yaa ni akpii aburana ni nna a, bu fite Yisarelifɔm dɛɛ busu n kere nu wɔ.

⁵ Yuda dɛɛ busu nufɔm ti minɛ akpii buru ni akpii nnyɔ bo ba se bu nyaari, na Ruben dɛɛ busu nufɔm ti minɛ akpii buru ni akpii nnyɔ, na Gadi dɛɛ busu nufɔm ti minɛ akpii buru ni akpii nnyɔ.

⁶ Na Aseri dɛɛ busu nufɔm ti minɛ akpii buru ni akpii nnyɔ, na Nafatali dɛɛ busu nufɔm ti minɛ akpii buru ni akpii nnyɔ, na Manase dɛɛ busu nufɔm ti minɛ akpii buru ni akpii nnyɔ.

⁷ Na Simeyon dɛɛ busu nufɔm ti minɛ akpii buru ni akpii nnyɔ, na Levi dɛɛ busu nufɔm ti minɛ akpii buru ni akpii nnyɔ. Na Izaki dɛɛ busu nufɔm ti akpii buru ni akpii nnyɔ.

⁸ Na Zabulon dɛɛ busu nufɔm ti minɛ akpii buru ni akpii nnyɔ, na Yosefu dɛɛ busu nufɔm ti minɛ akpii buru ni akpii nnyɔ, na Benjamin dɛɛ busu nufɔm ti minɛ akpii buru ni akpii nnyɔ.

Jama beberebe bo ba nya tiide n jɔrɛ

⁹ Nyini sin na ma n̄u jama beberebe, bu la m̄a nɔ, bu fite durunya asien n kere su, ni adamande kere nu, ni durunya daanfɛ n kere nu, ni durunya aniɛm kere nu, ka, bu jina yiri n bo i tana femɛya biɛ n su n ni Bɔmbaa n nyunu. Bu wura tanlɛɛ fofoe yorom, bu bita kpakpa nyawam bu saa nu.

¹⁰ Na ba bo afere faɲga su ase ka,
“Nyɛmɛ bo i tana femɛya biɛ n su n ni Bɔmbaa n ama ya nya ya tii a.”

¹¹ Na mɛrɛkɛm n kere aɲina abara aye femɛya biɛ, ni nkpiɛnkpiɛnm, ni deke n̄gɔɔfɔ nnam ni, na ba dada bu nyunu su asien̄gu Nyɛmɛ bo i tana femɛya biɛ n su n nyunu, na ba su i.

¹² Na bu suse ka,
“Ami. Kansi, ni kp̄iri, ni alecira,
ni anɛɛ, ni jirima,
ni yiko, ni faɲga
ti ya Nyɛmɛ dɛɛ wɔ saɲga kere saɲga. Ami.”

¹³ Na nkpiɛnkpiɛnm n nu kun abisa m ka, “N̄mam ye a n̄u ka bu wura tanlɛɛ fofoe yorom n a, ye bu fite ni wɔ?”

¹⁴ Na ma se i ka, “M̄ mibiɛ, wɔrɔ si a, mini si m̄a.” Na wɔ se m ka, “Bɛrɛ ti minɛm bo ba fite anyumboro kekereke nu n a, bɛrɛ ye ba n̄misi bu sutura Bɔmbaa ni mbunja n nu ayo bu fofoe n a.

¹⁵ Nyini dɛɛ ti, ye bu jina Nyɛmɛ Sereebiri Awuru n nu,
i femɛya biɛ n nyunu ye bu su i kɔɲgue ni wiesu n a,
na Nyɛmɛ bo i tana i femɛya biɛ n su n wɔ bu dɔ na i yɔ bu kanda.

- 16 Ahɔɛ ni nzuehɔɛ tí má bu kun cɛɛn be,
 wiɛ bó má bu,
 na i kekɛɛ gusu wúra má bu.
- 17 Dama Bɔmbaa n bo i wo femɛya biɛ n afiɛn ni yó bu sasafɔ a,
 na yiri fá bu kɔ bura nzue bo i tiɛ
 na i ma ɲɔɔ bo i la má awieeri n a.
 Na Nyɛmɛ núnuka bu nyunvuin kɛɛ bu nyunu.”

8

Wiɛ mɛnɛ nso su n jɔɛ

1 Sangá bo Bɔmbaa n cin ɲmanɲiiri wiɛ mɛnɛ nso su n ni, na deke kɛɛ atɔ amuna anɲoro n nu, haari míti aburasan.

2 Na ma ɲu mɛɛkɛ nsom bo bu jina Nyɛmɛ nyunu ni, na ba fa awie fitaawa nso ama bu.

3 Na ma ɲu mɛɛkɛ nyiɲga ka i bita sika ayaba, bo bu fa ayiri kunkuunwa nvanvani gɔ nu na bu kunkun i ni, na wɔ kɔ ajina Mikun n yoowa yoobiri n bi. Na ba ma i ayiri kunkuunwa nvanvani beberebe ka i fa buka Nyɛmɛ minɛm nyɛmɛsere su, na i fa kunkun Mikun yoowa yoobiri n bo bu fa sika mata su, na i wo femɛya biɛ n nyunu ni.

4 Na ayiri kunkuunwa nvanvani n ɲmisini n ni Nyɛmɛ minɛm nyɛmɛsere n ayasu mɛɛkɛ n saa nu afun akɔ Nyɛmɛ nyunu.

5 Na mɛɛkɛ n ayi sin Mikun n yoowa yoobiri n su, na wɔ fa awura ayaba n nu, na wɔ yi, na wɔ fa atu asandi durunya n nu. Na nzue sukpara sutientien, na i sujeje, na i sukɛkɛpɛsɛ, na asien n akpisi.

Awie nso n bo bu kan i n jɔɛ

6 Na mɛɛkɛ nsom n bo bu bita awie fitaawam n asɛsɛ bu ɲu su ka bu kan awiem ni.

7 Na mɛɛkɛ n bo i du mɔ n akan i dɛɛ awie ni. Na nzue yabuɛ, ni sin, sangá ni mbunja atɔ durunya n nu, na sin aje durunya n kpaaki nu nsan buekun, ni bakam kɛɛ bo bu wo durunya n nu kpaaki nu nsan buekun, ni wura mɔnɛ kɛɛ.

8 Na mɛɛkɛ n bo i tɔ su nnyɔ su n akan i awie ni, na deke be, i ti ka buka bambaka wɔ, ye wɔ so sin su a, na ba fa i atu tieku n nu, na tieku n kpaaki nu nsan buekun akaaki mbunja.

9 Na deke ɲɔɔɔfɔm kɛɛ bo bu wo tieku n nu kpaaki nu nsan buekun awu, na lee bambakam bo bu wo tieku n nu kpaaki nu nsan buekun gusu asaaki.

10 Na mɛɛkɛ n bo i tɔ su nsan su n akan i awie ni, na asarambaa bambaka bo i je sin ka wura sin afite anɲoro aba atɔ kunmam ni nzuɛtinm bo bu wo durunya n nu kpaaki nu nsan buekun nu.

11 Asarambaa n duma la Wiwi, na nzue n bo i wo durunya n nu n kpaaki nu nsan akaaki wiwi, nzue n ti wiwi n dɛɛ ti, na minɛm dɔɲgu bo bu nuuri nyini nzue n awu.

12 Na mɛɛkɛ n bo i tɔ su nna su n akan i awie ni, na deke be aba atɔ wiɛ, ni sara, ni asarambaam kɛɛ kpaaki nu nsan buekun su asaaki bu, na ba kaaki biri tuum. Wiesu ni kɔɲguɛ n kpaaki nu nsan buekun, ayo má wein.

13 Na ma niɛ, na ma ɲu ka kajiri be sulaandi tu anɲoro, na ma ti kabo i tien barasu ni, i ɲa, “Oi, keto, keto, keto wo sɔnɔ kɛɛ bo i wo durunya n nu n ɲu, kabo mɛɛkɛ nsanm bo ba ka n koro ka bu kan bu awiem ni, na bu tiiri.”

9

¹ Na mereke nnu su n akan i awie ni, na ma ŋu ka asarambaa be afite aŋgoro n aba atɔ asiɛŋgu. Na ba ma i kadombaa ka i teke kunma n bo i kɔ ŋgoŋgo na i la má awieeri ni.

² Na wɔ teke nyini kunma n ni. I tekeeri i ni, na ŋmisini afite kunma n nu, i ti ka sin bambaka tɔrɔɔwa ŋmisini wɔ. Na ŋmisini n bo i fite kunma n nu n ama wie ni aŋgoro n kere asi biri didiki.

³ Na lalom afite ŋmisini n nu asandi ade asien n su, na Nyeme ama bu yiko, ka bundaanim dɛɛ su.

⁴ Na wɔ se bu ka má bu di wura ni diire mbaa wara bakam, ama, bu kan minem n bo bu la má Nyeme anyaari seewa bu ŋuma su ni.

⁵ Wɔ ma má bu yiko ka bu kun minem wɔ, ama, bu kere bu wahara sara nnu. Wahara ni ti kabo bundaani kan sɔnɔ na i yo ya n wɔ.

⁶ Nyini saŋga ni, adamande sún kpini yiwee busu na bu wú, ama, bu nyá má i.

⁷ Lalom n ti ka kpɔŋgom bo ba cici bu ka bu kɔ lue dɛɛ su wɔ, deke be wo bu tii su, ka sika kere dɛɛ su, na bu nyunuawa ti ka adamande dɛɛ su.

⁸ Bu ndɔre ti tintiin kabo bara bo i la tiɛmɛ tintiin ti n wɔ, na bu jee ti ka jara dɛɛ.

⁹ Deke be kata bu hoe su pɛpɛrɛpɛ ka bulaari dɛɛ su, na bu lan̄kpetem suyo nan̄mie kabo kpɔŋgom ni bu torokum n beberebe sun̄mati kɔ lue na bu yo nan̄mie n wɔ.

¹⁰ Bu lɔ, bo bu fa kan n ti ka bundaani dɛɛ su wɔ. Bu la yiko bu lɔ n nu, bo bu fa kere mine wahara sara nnu.

¹¹ Bu femɛ n la mereke n bo i niɛ kunma ŋgoŋgo n bo i la má awieeri n su ni. Hiburu anie nu bu fere i ka, Abadon, ye Giriki anie nu bu fere i ka, Apolin, i bu la ka, saakifo.

¹² Tɔ. Ciciri su dɛɛ ahoresaaki n asin, nnyɔ wo sin suba.

¹³ Na mereke nsen su n akan i awie n na ma ti akonvi be ŋga ka i fite Mikun yoowa yoobiri n bue nna n kere, ba fa sika amata su na i wo Nyeme nyunu ni.

¹⁴ Na akonvi n ajojo mereke nsen su n bo i bita awie n dɔ, i ŋa, “Kɔ mereke nnam bo bu wo kunma kpiri n bo bu fere i ka, Yufarati n dɔ, na a nyan̄gi bu ji.”

¹⁵ Na wɔ nyan̄gi mereke nnam bo ba du mɔ akpa bu ŋu an̄minda nyini cɛen n gbingbin na bu kun mine bo bu wo durunya n nu kpaaki nu nsan buekun ni.

¹⁶ Na ma ti kabo bu sojam bo bu fun kpɔŋgo nɔ ti, bu nɔ kɔ yasuuri akpii akpii busu yaa nnyɔ ɔ.

¹⁷ Deke n bo i yo m ka alele ni, m ŋuuri kpɔŋgom, ni bo bu fun bu ni, ka bulaari pɛpɛrɛpɛ be kata bu hoe su, nbem boro kɔkɔre ka sin wɔ, na nbem ti biri ka bura nzue, na nbem ti ka ndere nzue, kpɔŋgom tii dika ti ka jara tii wɔ. Na sin, ni ŋmisini, ni ferewita sufite bu nɔɔ nu.

¹⁸ Ahin deke kekereke nsanm ni kuunri mine n bo bu wo durunya n nu kpaaki nu nsan buekun n a, bere la sin, ni ŋmisini, ni ferewita n bo i fite bu nɔɔ nu ni.

¹⁹ Dama kpɔŋgom n yiko kere wo bu nɔɔ, ni bu lom nu wɔ. Bu lom ti ka woom wɔ, bu la atiiim, ye bu fa kere mine wahara a.

²⁰ Minem bo ahin wahara n akun má bu na bu kaari ni, ba kaaki má bu wo, ba yaki má amɔem su, ni dekem bo ba fa sikam, ni jetem, ni jawiim, ni yabuem, ni bakam ayo bu ka bu amɔem, nyini dekem koro ŋu má asi, na bu koro ti má asui, na bu koro nati má ni, ba yaki má bu su.

²¹ Ba kaaki má bu wo fa kɔ kabo bu kun minem ni, ni kabo bu di ayiri ni, ni kabo bu yo sakaraya ni, ni kabo bu wɔ awie ni.

10

Mereke ni kadasi kaan n jɔre

¹ Na ma ɲu mereke fanɲafo be bekun ka i fite angoro sujura ba. Na yinyingu akata i ɲu ka tani dɛɛ su. Na ayi bo i kpie angoro n abara aye i tii, i nyunu ti ka wie wɔ, na i jaam ti ka sin taferema.

² I bita kadasi kaan be i saa nu, i ti tekeewa a. Na wɔ fa i jaa fombɔro atien tieku n su, na wɔ fa i jaa bie atien asien n su.

³ Na wɔ tien fanɲa su kabo jara ɲuundi ni, na nzue tiɛnwa nso n abɔ i nu.

⁴ Nzue n tiɛnri kpe nso ni, má m ɲa m kere wɔ, na ma ti akonvi be ɲga angoro. I ɲa, “Má a kere jɔjɔwa n bo nzue tiɛnwa nso n ase ni. Má a kan kere be.”

⁵ Na mereke n bo m ɲuuri i ka i jina tieku n ni asien n su, n aye i saa fombɔro su akere angoro,

⁶ na wɔ tan Nyeme bo i la ɲgɔɔ na i wo bere sanɲa kere ni, yiri bo i yiiri angoro, ni asien, ni tieku, ni deke kere bo bu wo nu ni, na wɔ se ka, “Nyeme ɲminda má kun.

⁷ Ama, sanɲa n bo mereke nso su n ba sukan i awie n ye Nyeme asiri nu jɔre ni yó yiiwa, kabo i yo seeri i akɔɔm bo bu ti i nɔanie kanfɔm ni.”

⁸ Na akonvi n bo i jɔjɔri m dɔ angoro n nu n ajɔjɔ m dɔ bekun, i ɲa, “Kɔ de kadasi kaan n bo wɔ teke na i wo mereke n bo i jina tieku n ni asien n su n saa nu.”

⁹ Na ma kɔ mereke n dɔ, na ma se i ka, “Fa kadasi kaan n ma m.” Na wɔ se m ka, “De na a kpɛɛ i, i yó u nɔɔ nu mamari ka wie wɔ, ama, i to u kunnu, i yó wiwi wɔ.”

¹⁰ Na ma de kadasi kaan n mereke n dɔ, na ma kpɛɛ i. I ti mamari m nɔɔ nu ka wie wɔ, m miiri na wɔ yo wiwi m kunnu.

¹¹ Na wɔ se m ka, “Kaaki jɔjɔ sam bo Nyeme ase ka bu bá tu mine barasu dɔɲgu, ni daanfie barasu dɔɲgu, ni nfemem dɔɲgu.”

11

Daanidifo nnyɔm jɔre

¹ Na ba fa deke be bo bu bita sunsun ama m, i ti ka kpama a, na ba se m ka, “Kɔ sunsun Nyeme Sereebiri Awuru n ni Mikun n yoowa yoobiri ni, na a kan minem bo bu wo nu dɔ su Nyeme ni.

² Ama, má a sunsun awɔre n bo i bara yeeri Nyeme Sereebiri Awuru n kere na ba ta kobe abara aye i n buka su, dama ba fa nyini fofoe n ama minem bo bu su má Nyeme ni, na bu náti saaki Nyeme mie casi ni, sara aburana ni nnyɔ afien.

³ M súnma m daanidifo nnyɔm ni, na bu fá bɔtɔ kara ka tani dɛɛ su, bo i kere ka bu wo ahoresaaki nu, na bu kán m nɔanie n kere minem, nyini cɛɛn akpii kun ni yaa nnyɔ ni aburasen n nu.”

⁴ Daanidifo nnyɔm ni, bere la ɲguinmbaa baka nnyɔm, ni fitana takaabiri nnyɔm bo bu jina Nyeme bo i dɛɛ la asien nyunu ni.

⁵ Sɔnɔ kere bo i koro ka i yo bu sa be, sin fite bu nɔɔ nu ba yara bu kpɔfɔm. Nyini ti, nzen be ɲa i yo bu sa be, kabo i ti ye ni ka i wu lɛɛ.

⁶ Bu la yiko bo bu koro kanda nzue angoro na má nzue tɔ, sanɲa bo bu wo Nyeme nɔanie n kan su ni, na bu la yiko bo bu koro ma nzuem kaaki

mbunja, na bu kaaki la yiko bo bu koro ma alɔɔba tɔ durunya n nu, sanɔa kere bo bu koro.

⁷ Nzen bu ba diiri bu daani kaanri Nyeme jɔre n wieeri, na boro nenɔe-ndɔre n bo i fite kunma n bo i kɔ ɔngɔngɔ na i la má awieeri ni kún lue ni bere, na i kúnma bu, na i kún bu.

⁸ Na bu fuin ká da miɛ bambaka n atin afien. Nyini miɛ n nufɔm sayoowa ti tie wɔ, nyini ti ye bu fa bu sunsun Sodomfɔm wara Ijipitifɔm n a. Nyini miɛ n nu ye minem kpamaari bu Mibiɛ baka jaanu n su n a.

⁹ Bu fuin ni ká da bere lesan ni wie sin, na minem, ni daanfien, ni aniem, ni asienm kere bo bu wo durunya n nu, bu nu nbem sín na bu nie bu, na bu dú má su na be se bu.

¹⁰ Bu yiwee n dɛɛ ti, durunya n nufɔm síri taari, na bu gó agɔre, na bu cé bu beɔgum aceerim, dama nyini Nyeme nɔanie kanfɔ nnyɔm bo ba wu n akere bu kere wuwuruwa.

¹¹ Lesan ni wie sin n dɛɛ sin, na Nyeme ayi i ɔumi bo i ma ɔgɔɔ n ago bu ɔu, na ba yasu ajina, na sere ati sɔnɔ kere bo bu ɔuuri bu ni.

¹² Na bere Nyeme nɔanie kanfɔ nnyɔm n ati akonvi bambaka be ka i jɔjɔ aɔgoro nu, i ɔa, “Am fun bra aɔgoro fen.” Na ba wura yinyingu n nu ako aɔgoro, bu kpɔfɔm jina sunie bu.

¹³ Jina n nu bere na asien akpisi fanɔa su, na miɛ bambaka n kpaaki nu buru buekun afufu, na wɔ kun mine akpii nso, na sere ati minem bo bu kaari ni, na bu sukansi Nyeme bo i wo aɔgoro ni.

¹⁴ Tɔ. Na nnyɔ su dɛɛ ahoresaaki n gusu asin, bo i tɔ su nsan su ni suba kisa.

Awie nso su n jɔre

¹⁵ Na mereke nso su n akan i awie ni, na akonvim atien fanɔa su aɔgoro n nu, bu ɔa,

“Durunya n nu femeya kere fanɔa ti ya Micera
ni Kristo Tiidefɔ n dɛɛ wɔ.
I dɛɛ femeya ni wó bere sanɔa kere a.”

¹⁶ Na nkpienkpien aburanyɔ ni nnam n bo bu tana bu femeya biem su Nyeme nyunu n ada bu nyunu su asiɔngu na bu subo tuntun Nyeme.

¹⁷ Bu ɔa,
“Ya Mi Nyeme Kpiri bo a la má aɔusu ni,
wɔrɔ bo a wo bere na a yo woori bere ni,
ya da u asi, dama a de u yiko bambaka n
ye a sunie durunya n kere su a.

¹⁸ Durunya n nufɔm kere afa yaa,
ye sanɔa aju bo u gusu ahore ayasu,
na a dí minem bo ba wu n jɔre.
Na sanɔa n akaaki aju bo a tó u akɔɔm ɔkatɔ,
bere bo bu ti Nyeme nɔanie kanfɔm ni,
ni u minem kere bo bu su u ni,
nfanɔafɔm ni tarakam kere.

Ye sanɔa n akaaki aju bo a sáaki bere n bo bu saaki durunya ni.”

¹⁹ Na Nyeme Sereebiri Awuru n bo i wo aɔgoro n ateke, na ma ɔu Nyeme alaka n bo i kereeri ka wɔ fa sɛsɛ su adi i di n ka i wo dɔ, na nzue sukpeɛ na i sutiɛn, na i suyo nanmie, na asien sukpisi, na nzue yabue ɔgbiɔgbiri sutɔtɔ.

12

Bara ni Sitana n dɛɛ jɔre

¹ Na alekutura sa be ayo angoro do. Bara be awo do, wo fa wie akara ka tani dee su, na sara gusu awo i jaa bu, asarambaa buru ni nnyo butu i tii ka femeya kere dee su.

² I bita akunnu, na baawu yaari afa i na i subo awie.

³ Na alekutura sa be gusu ayo angoro do, m nyuri woo tie kokore bambaka be, i tii ti nso wo, na i la mbie buru, femeya kere nso butu atii nso kun kun n kere su.

⁴ Na wo fa i lo abaandi asarambaam kpaaki nu nsan buekun aji asienngu. Na wo ba ajina bara n nyunu, adena i wuuri baa n na i kaba fa baa n mi.

⁵ Na bara n awu baabieso, bo i ba nie daanfie daanfiam kere su, na i bita bu kekereke kabo nan'kasi fa bulaari koroma tu bo i naanim barasu ni. Na ba fa baa n ako yiri Nyeme ni, i femeya tanaabiri n do.

⁶ Na bara n anmati ako boro kpantain awore be nu, bo Nyeme asese i su ama i na bu sunie i dika haari ko ju ceen akpii kun ni yaa nnyo ni aburasen.

⁷ To, na Nyeme mereke Mikali ni i jamam, ni woo tie ni i dee jamam sukun lue ni bu benggu angoro.

⁸⁻⁹ Ama, na Mikali ni i dee jamam n akunma woo tie n ni i dee jamam ni, na ba fon bu afite angoro, ba nya ma woobiri do kun. Na ba fa woo tie bambaka n ni i dee jamam n kere aji asienngu. Yiri ti dada dee woo tie n a, yiri la Sitana, bu kaaki fere i ka Dadakafu, yiri dadaka durunya n nufom kere n a.

¹⁰ Na ma ti akonvi bambaka be nga ka i sutien fanga su angoro. I na,
"Kisa, ya ny kabo ya Nyeme n la fanga na i de i minem tii ji,
na i di i femeya ni.

Kisa, ye Kristo Tiidefu n akere i yiko a,
dama ba fon ayi Sitana angoro aji durunya n nu fen,
yiri bo i ti saakifu na i jina Nyeme nyunu
na i jaraki ya ninbaam kongue ni wiesu ni.

¹¹ Bombaa n dee mbunja, ni bu daani diiwa
ye bu fa kunmaari i a,

ba soro ma bu yiwee,
bu soroori su wo, ka bu wu.

¹² Nyini ti, angoro ni ambere kere
bo am wo angoro ni,

am ma am ahore jo,
dama Sitana la ma am fanga kun.

Ama, ahoresaaki ba to asien n ni tieku n su,
dama Sitana ajura am do.

Yaa ti i agaya,
dama i si ka i sanga sunnu ma kun."

¹³ Sanga bo woo tie n nyu ka ba yi i angoro aji asienngu ni, na wo nya nmati afon bara n bo i wuuri baabieso n ka i tara i.

¹⁴ Ama, na Nyeme ama bara n kajiri bambaka lan'kpete nnyo, adena i tu ko boro kpantain n awore n bo wo sese su ama i ni, na i nie i dika afon nsan ni kpaaki nu, na ma woo tie n tu i.

¹⁵ Na woo tie n apuuti nzue afite i noo nu ka wombu nzue dee su, na ma i so bara n ko.

¹⁶ Ama, na asien n ade bara n aji, i kpaaki nu nnyo o, na nzue n bo i songi fiteeri woo tie n noo nu n awura asien bu, nyini ti, nzue n atu ma bara ni.

¹⁷ Woo tie n atu má bara n dɛɛ ti, na yaa ati i agaya, na wɔ kaaki ka i kɔ kun lue ni bara n busu nufɔm, bo ba de Nyeme noaniɛ maawam n na bu di daani ni Yesu labari kpa n ni.

¹⁸ Na woo tie n akɔ ajina tieku n nɔɔ su.

13

Boro nenɔɔndɔre nnyɔm jɔre

¹ Na ma ɲu boro nenɔɔndɔre be ka i sufite tieku n nu, i la atii nso wɔ, na i mbiɛ ti buru, mbiɛ n kere butu femɛya kere, ye duma kerɛɛwa be bo i kpiɛ Nyeme nzukɔ n wo atii kun kun n kere su.

² Boro nenɔɔndɔre n bo m ɲuuri i n ti ka awɔba a, ama, i jaa ti bambaka, na i la faɔga, na i nɔɔ ti ka jara dɛɛ. Woo tie n afa i dɛɛ yiko, ni i femɛya, ni i faɔga afa ama i.

³ Na ma ɲu ka ba kpiɛ boro nenɔɔndɔre n kun tii, i ti ka ba kpiɛ i kɔm wɔ, ama, kani n awie, na wɔ yo durunya n nufɔm kere alekutura na bu susu i su.

⁴ Na bu kere sukutu na bu su woo tie ni, dama wɔ fa i yiko ama boro nenɔɔndɔre ni, na bu sukutu na bu su boro nenɔɔndɔre n gusu, na bu suse ka, “Nɲma ti ka boro nenɔɔndɔre n a? Nɲma ni yiri koro kun lue na i kunma i a?”

⁵ Na ba ma boro nenɔɔndɔre n atin ka i jɔjɔ kpiri koroya jɔjɔori, na i jɔjɔ wura Nyeme ɲgasi nu, na ba ma i atin ka i la yiko haari sara aburana ni nnyɔ.

⁶ Na i jɔjɔ sukpiɛ Nyeme nzukɔ, na i susaaki i duma ni i dika ni, ni bo bu wo Nyeme dika n nu aɲgoro n kere.

⁷ Na wɔ nya yiko ka i kun lue ni Nyeme minem na i kunma bu, na wo kaaki anya yiko na i niɛ adamande kere, ni daanfie kere, ni aniem kere, ni asien barasu kere bo bu wo durunya n nu.

⁸ Minem kere bo bu wo durunya n nu ni su i wɔ, má ka minem n bo ba du mɔ akere bu duma aɲo ɲgɔɔ kadasi n nu, na durunya n boori i bu ni. Kadasi n ti Bɔmbaa n bo ba kpiɛ i kɔm n dɛɛ wɔ.

⁹ Sɔnɔ kere bo i koro ka i ti ahin jɔre n bu, i ti ye ni ka i mi so i sui na i ti.

¹⁰ “Sɔnɔ kere bo Nyeme ase ka bu wura i dansaraka,

bu wúra i wɔ,

na sɔnɔ kere bo Nyeme ase ka bu kun i ni takobe,

bu kún i wɔ.”

Nyini dɛɛ ti, i ti ye ni ka Nyeme minem fa sawɔre ni mindi ni yarada na bu fa su Nyeme.

¹¹ Na ma ɲu boro nenɔɔndɔre n be bekun ka i fite asien n nu, i la mbiem nnyɔ, bu ti kabo Bɔmbaa dɛɛ ti n wɔ, ama, i jɔjɔ kabo woo tie n jɔjɔ n wɔ.

¹² I jina bumboori dɛɛ boro nenɔɔndɔre n jinaabiri wɔ, na i la i yiko n kere, na i sumie durunya n nufɔm kere ka bu su bumboori dɛɛ boro nenɔɔndɔre bo ba kpiɛ i tii ni, i ti ka ba kpiɛ i kɔm wɔ, ama, kani n awie.

¹³ Na boro nenɔɔndɔre nnyɔ su n ayo alekutura sam beberebe, na i ma sin fiteeri aɲgoro ba tɔori asiɲgu wɔ, na minem aɲu i.

¹⁴ Alekutura sam n bo i nya yiko yoori bu bumboori dɛɛ boro nenɔɔndɔre n nyunu n dɛɛ ti, na wɔ dadaka durunya n nufɔm. Na wɔ se bu ka bu ta amɔɛ na i ferema ni boro nenɔɔndɔre n bo bu faari takobe fɔndɔori i ni, ama, i toko la ɲgɔɔ.

¹⁵ Na boro nenɓendɔre nnyɔ su n anya atin, na wɔ ma amɔɛ nɓumi, na wɔ nya nɓɔɔ na i koro jɔjɔ na i koro kun minem kere bo ba kete ka bu su má i ni.

¹⁶ Na i sumie mine barasu kere, nfanɓafom ni tarakam, nenɓefom ni yaarifom, minem bo ba de bu tii, ni akɔɔm, na wɔ ma ba se bu nyaari bu saa fɔmbɔɔ wara bu nɓuma su.

¹⁷ Sɔnɔ kere bo i la má nyini nyaari seewa n be, koro tɔ má deke be na i kaaki koro to má deke be gusu, dama nyini nyaari seewa n ti boro nenɓendɔre n duma, wara i duma lamba.

¹⁸ Sɔnɔ koro si má boro nenɓendɔre lamba n bu, má ka i mi la alecira, i ti adamande duma a. I lamba n ti yaa nsen ni aburasen ni nsen wɔ.

14

Bɔmbaa n ni minem bo wɔ de bu tii aji n jɔre

¹ Na ma nie aɓu Bɔmbaa n ka i jina Siyon Buka n su. Mine akpii yaa ni akpii aburana ni nnam wo i dɔ. Bere ye ba kere Bɔmbaa n ni i Si Nyeme duma ago bu nɓuma su n a.

² Na ma ti ka mine nbem sudi jue angoro, i yo nanmie kabo nzue songi na i yo nanmie n wɔ, na i yo kabo nzue tientien na i yo nanmie ni, na i sun kabo bu bo bieku na i sun barasu ni.

³ Na mine akpii yaa ni akpii aburana ni nnam n jina femeya bie n nyunu, ni nenɓe nɓɔɔfɔ nnam ni, ni nkpienkpienm n nyunu, na bu sudi jue fɔfɔre. Be wo má bere bo i koro sɔnsɔn i, má ka bere nɓumi bo Nyeme ade bu afite durunya n nufom n nu ni.

⁴ Bere la minem n bo bu ni bara be ada má, na bu ti casi ni. Bere la bo deke kere bo Bɔmbaa n kɔ na bu su i su ni. Bere ye Nyeme ade bu tii aji afite durunya n nufom nu n a, na ba yo i ni Bɔmbaa n deɛ ciciri su minem.

⁵ Kɔre be mmɔɔ wo má bu nɔɔ nu. Na bu kaaki la má nɓasi be.

Mereke nsanm jɔre

⁶ Na ma nɓu mereke be bekun ka i wo tu su angoro, na i sukan labari kpa n bo i la má awieeri n jɔre kere adamande kere, ni daanfie kere, ni aniem kere, ni asien barasu kere bo bu wo durunya n nu ni.

⁷ Na mereke n aye i konvi su atien fanɓa su agaya ase ka, “Am soro Nyeme na am wura i kpiri, dama sanɓa n aju bo i dí minem jɔre. Am su Nyeme bo i yiiri angoro ni asien, ni tieku ni nzue ni.”

⁸ Na mereke nnyɔ su n afite asu ciciri deɛ n su, na i suse ka, “Wɔ kpaasi, Babilɔn mie kpiri n akpaasi, yiri bo i maari durunya n nufom kere nuuri i nzan n na bu yoori sa nɓɓeenɓɓeen ni.”

⁹ Na mereke nsan su n afite ago ciciri deɛm su. Na i sujɔjɔ fanɓa su suse ka, “Sɔnɔ kere bo i suuri boro nenɓendɔre n ni i amɔɛ ni, na wɔ se bu nɓuma su wara bu saa fɔmbɔɔ su n nyaari,

¹⁰ Nyeme fá yaa bu nɓu, na i cín bu sui agaya, na i má sin ni ferewita to bu nɓu na bu dí wahara agaya, i mereke casim n ni Bɔmbaa n nyunu.

¹¹ Na nɓisini sufite nyini sin n bo i kere bu wahara n nu kɔ angoro sanɓa kere, i la má awieeri. Minem kere bo bu suuri boro nenɓendɔre n ni i amɔɛ n na wɔ se bu nyaari ni, bu nya má nɓumi, kɔnɓue ni wiesu kere.”

¹² Nyini ti, i ti ye ni ka Nyeme minem la mindi, bere bo bu de i nɔanie maawam ni, na bu bita bu yarada n kenken fa kɔ Yesu dɔ ni.

¹³ Na ma ti ka akonvi be sujɔjɔ angoro suse m ka m kere ka, “Terefie wo minem n bo bu suuri Mibie n na bu wuuri n dɔ fite kisa fa kɔ.”

Na Nyeme Awiewie Casi n asoro su ka, “I ti nahore wo, bo ba wu ni, bu yi bu nuni, bu nkato ye bu sudi i n a, dama bu sakpayo su bu su a.”

Kabo Nyeme di durunya n nufom kere jore ni

¹⁴ Na ma nie anu yinyingu fofoe be angoro n su, be tana su, i ferema ni adamande wo, i butu sika femeya kere, i bita goroku nana i saa nu.

¹⁵ Na Nyeme merere n be bekun afite Nyeme Sereebiri Awuru bo i wo angoro n nu, na i sutien fanga su suse yiri n bo i tana yinyingu n su ka, “Durunya n nu alembaa n abi, fa u goroku n fa wura nu na a kpie i, dama sangha n a ju.”

¹⁶ Na yiri n bo i tana yinyingu n su n afa i goroku n ada awura durunya n nu na wo kpie alembaa ni.

¹⁷ Na merere n be bekun afite Nyeme Sereebiri Awuru bo i wo angoro n nu, i gusu bita goroku nana be.

¹⁸ Na merere n be bekun bo i nie sin su afite Mikun yoowa yoobiri n dika, na wo tien fanga su ase nyini merere n bo i bita goroku n ka, “Fa u goroku n fa kpie durunya n nu baka suuwam go, dama baka suuwa n aboro.”

¹⁹ Na merere n afa i goroku n ada awura durunya n nu akpie baka suuwam n kere atien bu no ago kunma bambaka n bo bu miemie yiiri baka suuwa nzue n nu ni. Nyini kere kabo Nyeme ahorembaa ayasu na i cin minem sui.

²⁰ Na ba tientien baka suuwa n su, kunma bambaka n bo i wo mie n aheme n nu, na mbunja asongji afite kunma n nu. Nzen kpogwo wura nu, na i ko se ka wo dodo ngonggo dika, i tii nyaari ngumi ko ka. I tintiin gusu waari agaya.

15

Merem bo bu bita awieeri su kekereke ayaba nsom jore

¹ Na ma nu alekutura sa bambaka be angoro, ka Nyeme merere nso nbem bita kekereke barasu nso n bo bu ti awieeri su dee ni. Nyini kekereke n dee sin, Nyeme fa ma yaa kun.

² Na ma nu deke be, i ti ka nzue bambaka a, i je ka nieenu wo, wo sangha ni sin. Na ma nu minem bo ba kunma boro nenjendore n ni, ba ko ayaki i ni i amoe n ni i duma lamba. Bu jina tieku n bo i je ka nieenu n su, bu bita biikum n bo Nyeme afa ama bu ni.

³ Na ba di Nyeme akoo Moyisi ni Bombaa n dee jue, ka,
“Ya Mi Nyeme Feme Kpiri,
woro ti adamande kere feme durunya n nu a.

U sayoowa ti bambaka na i ti alekutura.

U sayoowa kere ko atin su wo, na i ti nahore.

⁴ Micera, nma wo bere bo i soro ma u a,
na i wura ma u kpiri a?

Dama woro ngumi ti casi a.

Adamande kere bo bu wo durunya n nu,
bu ba kutu u na bu kansu u,
dama u nahore sam n afite fofoe nu.”

⁵ Nyini sin, na ma nu Casi Kere Casi Soo n bo i wo Nyeme Sereebiri Nambue n nu, na i wo angoro n ka bu suteke i.

⁶ Na merere nsom n bo bu bita kekereke nsom n afite Nyeme Sereebiri Awuru n nu, bu wura sutura fofoe papasi, ba fa sika dambara abo bu hoe su.

⁷ Na deke ɲɔɔfɔ nnam nu kun, afa sika ayabam n nso afa ama Nyeme mereke nsom n ni. Ayabam n ayi ni Nyeme ahorembaa yasu, bo i kere ka Nyeme bo i la ɲɔɔ na i la má awieeri n afa yaa agaya.

⁸ Na Nyeme yiko ni i jirima woowa n ama Nyeme Sereebiri Awuru n ayi ni ɲmisini, bo be akoro awura má awuru n nu, fa kɔ ju saɲga bo mereke nsom fa kekereke nsom n fa jiiri durunya n nu n kɔ wieeri.

16

Ayabam bo bu kere ka Nyeme afa yaa n jɔɛ

¹ Na ma ti akonvi bambaka be ɲga Nyeme Sereebiri Awuru n nu, i sujɔɔ mereke nsom dɔ, i ɲa, “Am kɔ na am kɔ kaaki Nyeme ahore yasu ayaba nsom n ɔɔ durunya n nu.”

² Na mereke ciciri su n akɔ akaaki i ayaba n aɔɔ durunya n nu, na kani tiem, bo bu yo ya agaya, akpɛ minem bo bu la boro neɲgendɔɛ n nyaari seewa n na bu su i amɔɛ n ni.

³ Na mereke nnyɔ su n akaaki i ayaba n aɔɔ tieku nzue n nu, na tieku nzue n akaaki ka sɔɔ bo wɔ wu mbunja. Na deke ɲɔɔfɔ kere bo bu wo tieku n nu awu.

⁴ Na mereke nsan su n akaaki i ayaba n aɔɔ kunmam nzue ni buram nzue nu, na i kere akaaki mbunja.

⁵ Na ma ti ka mereke n bo i nie nzue n su n ase ka,
“Nyeme, wɔɔ ti casi a,

wɔɔ bo a wo bere na a yo woori bere ni,
kabo a cin minem sui sɔ ni,
u sayoowa akɔ atin su.

⁶ Dama ba kun u dɛɛ minem, ni u nɔaniɛ kanfɔm
na bu mbunja afite,

ye u gusu ama bu nzuem n akaaki mbunja na bu nu.
I ti ye ni ka a yo bu sɔ ɔ.”

⁷ Na ma ti akonvi be ɲga ka i fite Mikun yoowa yoobiri n bi, i ɲa,
“Ya Mi Nyeme Feme Kpiri,

kabo a di bu jɔɛ ni, i ti nahɔɛ wɔ, na i kɔ atin su.”

⁸ Na mereke nna su n akaaki i ayaba, n aɔɔ wie n ɲu, na Nyeme ama i kekere agaya suyara minem ka sin dɛɛ su.

⁹ Na sin n kekere ayara minem, na ba kpɛ Nyeme nzukɔ, yiri bo i la yiko na i ma bu di nyini wahara ni, na ba kete ka bu kaaki má bu wo na bu ma i jirima.

¹⁰ Na mereke nnu su n akaaki i ayaba n aɔɔ boro neɲgendɔɛ n femɛya biɛ n su, na i femɛya asien n kere asi biri didiki. Na minem sukan bu saa, yaari n ti.

¹¹ Kambue n ni yaari n bo i wo bu ɲu n dɛɛ ti, ye bu sukpɛ Nyeme bo i wo aɲgoro ni nzukɔ a, haari ni nyini mmɔɔ, ba kaaki má bu wo na bu yaki bu satie ni.

¹² Na mereke nsen su n akaaki i ayaba n aɔɔ kunma kpiri n bo bu fere i ka Yufarati n su, na nzue n kere anu, na wɔ kpɛ atin ama nfemem bo bu fite wie afiri ni.

¹³ Na ma ɲu awiewie tie nsan nbem, bu ti ka pɔntirim wɔ, kun sufite woo tie n nɔɔ nu, kun sufite boro neɲgendɔɛ n nɔɔ nu, na kun gusu sufite sɔɔ bo wɔ yi i ɲu ka i ti Nyeme nɔaniɛ kanfɔ n nɔɔ nu.

¹⁴ Bu ti Sitana dɛɛ awiewie barasu nbem wɔ, na bu suyo alekutura sam, na bu kɔ durunya n nu nfemem kere dɔ kɔ tien bu nɔɔ, na bu cici lue ɲminda ya Mi Nyeme Feme Kpiri n jina cɛɛn.

15 Ya Mi Nyeme ña o, “Am ti fen, m ba ni yó am fura nu ka awiefó ðee su wó, terefie wo sɔnɔ kere bo i ñminda fa kɔ m ba n ðee su, i fa má i ñu ti má, na i wura i sutura, adena má i nati i bu ñgbɛɛn, na má mine ñu i, na nyinse ti i.”

16 Na Sitana awiewiem n atien nfemem nɔɔ dika n bo bu fere i Hiburu anie nu ka, *Amagedon* n ni.

17 Na merেকে nso su n akaaki i ayaba n ago aɲuma n nu. Na akonvi bambaka be ajɔɔ afite femeya bie n nu, Nyeme Sereebiri Awuru n nu, i ña, “Wó yo awie.”

18 Na nzue sukpekpese, na i sutenantien, na i suyo nanmie, na asien sukpisi fanja su. Kabo Nyeme yiiri adamande ni, be nya ñu má nyini asien kpisi-wa n ñusu sɔ.

19 Na mie kpiri n ati nu nsan, na miem kere bo bu wo durunya n nu n atoto, dama Nyeme atenge Babilon mie kpiri n jore su, nyini ti ye wó fa yaa i ñu, sucin i sui n a.

20 Na lui bambakam kere bo bu da nzue afien, ni bukam kere amini.

21 Na nzue yabuem sutoto minem ñu, i kun kun nonɔori la ñma. Na minem sukpie Nyeme nzuko, dama nzue yabue n bo i toto ni sukere bu wahara agaya.

17

Bara sakara n jore

1 Na Nyeme merেকে nsom n nu kun, bo i bita ayaba nsom n nu kun, aba m do, aba ase m ka, “Bra fen, na m kere u kabo Nyeme cin bara sakara tie n sui ni, yiri bo i tana kunma nzue beberebem n su ni.

2 Yiri ye durunya n nu nfemem akpini i afa ayo bu soma, na wó fa i sakaraya asa durunya n nufom kere, na bu gusu akpini i afa ayo bu soma.”

3 Na Awiewie Casi n ðee yiko nu, na merেকে n afa m ako boro kpantain nu. Na ma ñu bara be ka i tana boro nenɲendore kɔkore be su, duma kerewa nbem bo bu kpie Nyeme nzuko n wo boro nenɲendore n ñunie kere su. I la atii nso, na i mbie ti buru.

4 Bara n adi sunɲuruya anyɔnyɔndi i ñu, i wura sutura kɔkore nyunyumi, na wó wura i kom, ni i saam, ni i suim jorokom, ni lalankundim, ni afere nyunyumim, ni sikam, ni afere fofiem bo bu la go agaya. I bita sika kopu i saa nu, wó yi ni dangba ni i sayoowa ñgbɛɛnñgbɛɛn n wó.

5 Ba kere i asiri nu duma i ñuma su, nyini duma n bu la ka, Babilon mie kpiri, bo i ti sakaram kere ni, na i kaaki ti saa ñgbɛɛnñgbɛɛn yofom kere bo bu wo durunya n nu n ni.

6 Na ma ñu ka bara n anu Nyeme minem mbunja abo, ni minem bo bu di Yesu daani n ðee ti na ba kun bu ni gusu mbunja abo.

M ñuuri i sɔ ni, na wó yo m alekutura.

7 Na merেকে n abisa m ka, “Nzu ti ye a ma wó yo u alekutura? M kere u asiri nu jore bo i wo bere fa kɔ bara n ni boro nenɲendore n bo bara n tana su, na i la atii nso ni mbiem buru ni.

8 Boro nenɲendore n bo a ñuuri i ni, ti deke bo i yo woori bere wó, ama, kisa i wo má bere kun. Wó ka kaan na i fite kunma ñgonɲo n bo i la má awieeri n nu, na i kó di wahara na i ká ñgbɛɛn. Na durunya n nufom bo bu duma wo má ñgɔɔ kadasi n nu, fite sanja bo Nyeme nya yi má durunya ni, bu ba ñuuri i, i yó bu alekutura, dama i yo woori bere, ye kisa, i wo má bere kun, na i bá kaaki ba cɛen be.

⁹ Nyini dɛɛ ti, sɔnɔ kɛrɛ fa i alecira ni sunsunni na i ti ahin jɔrɛ n bu. Boro nɛngɛndɔrɛ n tii nso n ti buka nso bo bara n afun atana su wɔ. Bu gusu kaaki ti nfɛmɛm nso wɔ.

¹⁰ Bu nu nnu akpaasi, nsen su n toko wo bɛrɛ, nso su n nya ba mǎ, ama, i ba baari, i cɛ mǎ, i fɛmɛya ni kpǎasi wɔ.

¹¹ Boro nɛngɛndɔrɛ n bo i yo woori bɛrɛ, ama, kisa i wo mǎ bɛrɛ kun ni, yiri ti fɛmɛ n bo i buka su mɔcɛ su n a, ama, i ti nfɛmɛ nsom nu kun wɔ, na i kɔ di wahara na i kǎ ngbɛɛn.

¹² Mbiɛ burum bo a ŋuuri bu n ti nfɛmɛ burum bo bu nya di mǎ fɛmɛya, ama, bu nyǎ yiko na bu dǐ fɛmɛ buka boro nɛngɛndɔrɛ n su saŋga kaan sɔ.

¹³ Nyini nfɛmɛ burum n yɔ bu nɔɔkun, na bu fǎ bu faŋga ni bu yiko kɛrɛ na bu fǎ ma boro nɛngɛndɔrɛ ni.

¹⁴ Bu kún lue ni Nyɛmɛ Bɔmbaa ni, ama, i ni i minɛm ni kúnma bu, dama yiri ti mibiɛm kɛrɛ Mibiɛ, na i ti nfɛmɛm kɛrɛ Fɛmɛ. I minɛm bo bu wo i dɔ n la bo wɔ fɛrɛ bu ni, ni bo wɔ yi bu na bu jina i sin nahɔrɛ su ni.”

¹⁵ Na mɛrɛkɛ n ase m ka, “Kunmam nzue n bo a ŋuuri i ni, na bara sakara n tana su ni, ti durunya n nu minɛm, ni durunya n nu asien barasu kɛrɛ, ni daanfɛ kɛrɛ wɔ lɛɛ.

¹⁶ Mbiɛ burum bo a ŋuuri bu ni, ni boro nɛngɛndɔrɛ ni, bu bá kpɔ bara sakara ni, bu dé i nɛŋgɛ kɛrɛ na i kǎ i bu ngbɛɛn, na bu dǐ i ŋuniɛmbaa kɛrɛ, na bu yǎra bo wɔ ka n sin.

¹⁷ Dama Nyɛmɛ maari bu yoori kabo i koro a. I maari bu yoori bu nɔɔkun na bu fa bu fɛmɛya n kɛrɛ buka boro nɛngɛndɔrɛ, na i dǐ fɛmɛya n kɔ ju saŋga bo Nyɛmɛ nɔɔniɛ ni bá yo yiiwa ni.

¹⁸ Bara n bo a ŋuuri i n la miɛ kpiri n bo i ti durunya n nu nfɛmɛm kɛrɛ tii n a.”

18

Kabo Babilɔn miɛ kpiri n kpaasi barasu ni

¹ Nyini sin, na ma kaaki aŋu mɛrɛkɛ be ka i fite aŋgoro sujura, i la yiko agaya, na i woowa n ata wein abara ayɛ durunya n kɛrɛ.

² Na wɔ yɛ i konvi su atien faŋga su ka,
“Wɔ kpaasi. Babilɔn miɛ kpiri n akpaasi.

Wɔ kaaki awiewiɛ tiɛm, ni ajinim,
ni deke ngbɛɛnngbɛɛnm,
ni anuma tiɛm woobiri wɔ.

³ Dama durunya n nufɔm kɛrɛ nuuri i nzan
ye bu kɔori somaya yiri dɔ a.

Na durunya n nu nfɛmɛm kɛrɛ kɔ kpiniiri yiri yoori bu soma.

Na kabo i la ajɛkɛ na i koro tara mǎ i ŋu ni,
durunya n nu watafɔm gusu nya bu ajɛkɛ fite i dɔ ɔ.”

⁴ Na ma kaaki ati akonvi be ŋga bekun, ka i sujɔɔ aŋgoro n nu, i ŋa,
“M minɛm, am fite miɛ n nu,

na mǎ am yo bu satɛ yoowa n be,
na mǎ wahara n bo i suba bu dɔ n tu am.

⁵ Dama miɛ n nufɔm satɛ yoowa n aju Nyɛmɛ dɔ aŋgoro,
na i wara koro fi mǎ bu satɛ yoowa n sa.

⁶ Sam bo bara n yoori bu ni, yo i gusu sɔ,
tɔ i kaari i ŋusu nnyɔ.

Ma i ŋu kekereke tara kabo i yo ma minɛm ŋuuri kekereke ni.

⁷ Kabo i yo wuraari i ŋu kpiri na i diiri i tii barasu ni,

kere i kekereke na i ahore gusu saaki so.
 Dama i ŋa, 'Ma di femε, m ti má kunafo,
 m ahore sáaki má cεen be.'

⁸ Nyini dεε ti, lekun ye kekereke bá to i ŋu a.
 Yiri la tukpaki, ni ahoresaaki, ni ahε.

Na sin yára i,
 dama Micεra Nyεmε n bo i cin i sui n la yiko agaya."

⁹ Na durunya n nu nfεmεm bo bu kɔ kpiniiri i na bu ni yiri diiri bu tii ni, bu ŋu kabo sin je i, na bu ŋu kabo ŋmisini yasu kɔ angoro barasu, na bu sún, na bu bó awie.

¹⁰ Kekereke n bo wɔ tu i n dεε ti, i ma bu sεε wɔ, na bu jina dede, na bu nya suse ka,

"Keto, keto, am niε ahin miε bambaka ni.

Babilɔn bo i ti miε kpiri n lεε

ye ba kaba acin i sui, ye i kεε aka ŋgbεen,
 anyumbaa kata ni i teke n nu bεε n a."

¹¹ Na watafɔm bo bu wo durunya n nu ni susun, na bu sukoko miε ni, dama be to má bu gɔori n kun.

¹² Be to má bu sika, ni jεε, ni afere barasu nbem bo bu yo nyumi na bu la gɔ ni. Be to má bu suturam barasu barasu bo bu yo nyumi na bu la gɔ ni. Be to má bu bakam bo bu fa yo biε kpakpam ni, ni bu ayaba barasu kεε bo bu fa sui jee yo bu ni, ni deke kεε bo bu fa baka fa sense bu, ni deke kεε bo bu fa jawii bulaari, ni yabue fa yo bu na bu la gɔ agaya.

¹³ Be kaaki to má bu toro neŋge barasum bo bu la nvanvani, ni ayiri kunkuunwa nvanvani, ni baka nyunvuin nvanvanifo, ni nzan, ni ŋguin, ni kpɔnɔ samεε, ni diire, ni naanim, ni nbɔεm, ni kpɔŋgɔm, ni kpɔŋgɔ torokum, ni akɔɔm, ni domuεm.

¹⁴ Na watafɔm n ase i ka,

"Dekem bo a yo koro bu agaya n kεε

aŋmati ayaki u,

u ajekem, ni u neŋge kpakpam kεε bo a la bu

akɔ ayaki u,

a nyá má i be kun."

¹⁵ Watafɔm bo bu yoori neŋgefɔm nyini miε n dεε ti ni, bu kó jina dede wɔ, dama sεε ti bu fa kɔ kekereke n bo wɔ to miε n nu ni, na bu ahore saaki agaya na bu sun.

¹⁶ Na bu se ka,

"Keto, keto, am niε ahin miε bambaka ni.

I yo kara sutura barasu barasu nyunyumi,

na i la sika jɔrɔkɔm,

ni aferem barasu barasu

bo bu yo nyumi na bu la gɔ agaya ni.

¹⁷ Nyini neŋge n kεε akaba aka ŋgbεen,
 anyumbaa kata ni i teke n nu bεε n a."

Na lee bambaka kanfɔm, ni leefɔm, ni lee wurafɔm, ni bo bu juma nati tieku nzue n su n kεε akɔ ajina dede.

¹⁸ Na bu jina niε kabo miε ni suje sin barasu na ŋmisini yasu kɔ angoro ni, na bu bo awie se ka, "Miε bɔnɔ wo bεε bo i ju ahin miε bambaka n a?"

¹⁹ Na bu susasa tuturi gɔ bu tii su na bu kere ka bu ahore asaaki agaya, na bu susun, na bu suse ka,

"Keto, keto, am niε ahin miε bambaka n ni.

Dama minεm kεε bo bu la lee bambakam na bu juma nati tieku nzue n su n

nya bu nengem fite nyini mie n deɛ ajɛke n nu wɔ.
Ye wɔ kaba aka ɲgbɛɛn,

anyumbaa kata ni i teke n nu bere n a.

²⁰ Ambere bo am wo aɲgoro nu,

ni Nyeme minem, ni Yesu jaramasam, ni Nyeme noaniɛ kanfɔm,
am ma am ahore jɔ

fa kɔ kabo mie kpiri n aka ɲgbɛɛn barasu bere ni,

dama Nyeme subisa i nɔɔ nu ma am a.”

²¹ Na Nyeme merɛke faɲgafɔ be n afa yabue bambaka, na wɔ fa atu aji
tieku nzue n nu, na wɔ se ka,

“So ye Nyeme fá Babilɔn mie kpiri n

fa ji wuum a,

na i busu be bá ɲu má.

²² Be ti má deke be ɲga mie n nu kun,

i bieku kanfɔ o, i jue difɔ o, i tere kanfɔ o, ni awie kanfɔm.

Na jumayofɔ barasu be mmɔɔ gusu wo má mie n nu kun,

be ti má ɲgani san yabue be ɲga mie n nu kun.

²³ Na fitana haari kun n kpein

je má mie n nu cɛɛn be na be ɲu i.

Be ti má konya ni konyafan kuyigindi ɲga mie n nu kun,

dama watafɔm bo bu yo wo nyini mie n nu

yo ti nfaɲgafɔm wɔ durunya n kere nu,

na mie nufɔm yo boboyaya sam dadaka durunya n nufɔm kere.

²⁴ Nyeme acin mie n nufɔm sui a,

dama bere yo kuunri Nyeme minem, ni i noaniɛ kanfɔm n a,

ni minem kere bo ba kun bu durunya n nu ni, bere yiiri bu mbunja.”

19

¹ Nyini sin, na ma ti akonvi be ɲga aɲgoro, ka jama beberebe akonvi,
bu ɲa,

“*Haleluya*, ya kansi Nyeme,

ya Mi Nyeme n ama ya nya tiide a,

yiri ti kpiri ni yikofɔ a.

² I di jɔre ni i atin su, ni nahɔre wɔ.

Wɔ di bara sakara n jɔre,

yiri bo i maari durunya n nufɔm kere kpini nbaram

na bu kɔ somaya

na bu yo sa ɲgbɛɛnɲgbɛɛnm kere,

na wɔ cin i sui, dama yiri yo kuunri Nyeme akɔɔm n a.”

³ Na jama n bo bu wo aɲgoro n akaaki aye bu konvi su atien ase ka,

“*Haleluya*.

Sin n bo i sudi mie ni ɲmisini n suyasu suko aɲgoro

haari ni saɲga bo i la má awieeri.”

⁴ Na nkpienkpien aburanyɔ ni nnam, ni deke ɲgɔɔfɔ nnam sukutu
sukansi Nyeme bo i tana femeya bie n su ni, na bu se ka,

“Ami. *Haleluya*.”

Nyeme Bɔmbaa n konyaya jɔre ni

⁵ Na akonvi be afite femeya bie n nu, i ɲa,

“Ambere Nyeme akɔɔm kere,

tarakam ni nfaɲgafɔm,

bo am soro Nyeme ni,

am kere kansi i duma.”

⁶ Na ma ti akonvi be nanmie nga, i ti ka jama beberebe suyo nanmie wo, na i yo nanmie, kabo nzue songi na i yo nanmie ni, na i kaaki ti kabo nzue tientien na i yo nanmie ni, i nga,

“Haleluya,

Ya Mi Nyeme Feme Kpiri n
adi i femeya n kisa.

⁷ Am ma ya ahore jo na ya yo ya kunnu koroowa,
na ya wura i kpiri,

dama sangga n aju bo Bombaa ni ja i konya ni,
konya n gusu asese i nu su anminda i.

⁸ Nyeme ama i sutura casi fofoe papasi ka i fa kara.”

Sutura fofoe papasi n la Nyeme minem sakpa yoowam ni.

⁹ Na mereke n ase m ka m kere ka, “Terefie wo minem bo Bombaa n abaandi bu ka bu ba di konyaya diire n be i do.”

Na wo kaaki ase ka, “Ahin noanie ti nahore wo, i fite Nyeme do o.”

¹⁰ Na ma kutu i jaa bu asiengu ka m su i, na wo se m ka ma m yo so, ama, m kansi Nyeme ngumi. Na wo kaaki ase m ka, “M ti u bengu akoo, ni u ninbaam bo bu di Yesu daani kere mine n be wo.” Jore n kere bo Nyeme noanie kanfom kaanri i ni, bu diiri ahin Yesu n daani wo.

Sono n bo i fun kpongɔ fofoe n jore

¹¹ Na ma nu ka angoro ateke, kpenga na ma nu kpongɔ fofoe be, bu fere bo i tana su n duma ka, Bo i la Dabuɔ ni Nahorefɔ, i di minem jore kabo i ti ye ni ka i di bu nahore su wo, na i kun i lue ni nahore su.

¹² I nyumbaa kere je ka sin fofoe, na i butu femeya kere beberebe i tii su. Duma kerewa be mata i, be si ma nyini duma ni, ma ka yiri ngumi si a.

¹³ I wura sutura yorom barasu be bo ba fa i awura mbunja nu, na bu fere sono n duma ka Nyeme Noanie.

¹⁴ Na Nyeme sojam bo bu wo angoro n fun kpongɔ fofoe su i su, bu wura sutura casi fofoe papasi.

¹⁵ Takobe nana bo i fa kunma durunya n nufom wo i noo nu, na i bita bu kekereke kabo nanjasi fa bulaari koroma tu bo i naanim barasu ni, na i tientien bu su kabo bu fa baka suuwa go kunma nu na bu miemie yi i nzue ni, dama Micera Nyeme Kpiri n afa yaa agaya.

¹⁶ Ba kere i duma i sutura n su, ni i jaa soowa su ka, “Nfemem kere Feme ni mibiem kere Mibie.”

¹⁷ Na ma nu mereke be ka i jina wie n su, na wo ye i konvi su atien fanga su ase anumam kere bo bu tu angoro na bu di nie n ka, “Am bra na am ba tien am noo na am di ahin diire beberebe n bo Nyeme sufa ma am ni,

¹⁸ am ba di nfemem juniembaa, ni sojam nkpienm juniembaa, ni nfangafom juniembaa, ni kpongɔ nie, ni minem bo bu fun kpongɔm n juniembaa, ni adamande barasu kere juniembaa, bo bu ti akoom ni bo ba de bu tii, ni bo bu ti mine ngbingbirim, ni bo bu ti mine kan kanm ni.”

¹⁹ Na ma nu boro nengendore n ni durunya n nu nfemem, ni bu sojam, ka, ba tien bu noo acici na bu kun lue ni yiri n bo i tana kpongɔ fofoe n su ni, ni i jama nbaam.

²⁰ Na ba tara boro nengendore n ni korofɔ n bo i yo i nu ka i kan Nyeme noanie ni. Yiri yo yoori alekutura sam boro nengendore n nyunu, na wo dadaka minem bo bu deeri boro nengendore n anyaari seewa na ba su i amoe ni. Na ba fa boro nengendore n ni korofɔ n ni bu ngoo aji sin n nu, bo i je ka ferewita na i da ka tieku ni.

²¹ Minem bo bu kaari ni, na yiri n bo i tana kpogoo n su n afa takobe n bo i wo i noo nu n akun bu kere. Na anumam kere adi nie na bu kunnu ayi.

20

Kabo bu nyi Sitana afo akpii kun n jore

¹ Na ma nu merere be ka i fite angoro suba, i bita deke nbem i saa nu, kun la kadombaa bo i tu kunma ngongo bo i la ma awieeri ni, na kun gusu la joroko bambaka fangafobe.

²⁻³ Na wo tara woo tie ni, dada dee woo tie n bo i ti Sitana ni, na bu kaaki fere i ka Dadakafobe ni, na wo fa joroko n acici i, na wo fa i atu kunma ngongo n bo i la ma awieeri n nu, ka i wo do haari afo akpii, na wo tu kunma n ano ni, na wo ta akata su, na ma i koro fite na i dadaka durunya n nufom bekun, ama, i wo do haari afo akpii n ba ju. Nyini sin, na bu nyangi i ji kaan.

⁴ Na ma nu femeya biem, Nyeme ama bo bu tana sum n atin ka bu di minem jore. Na ma kaaki anu bere bo bu yo wuuri Yesu ti ni. Mine yo kpieri bu tii a, dama bu yo kaanri Nyeme jore na ba di Yesu daani n dee ti. Bere keteeri ka bu su ma boro nengendore n ni i amoe n a, bere la bo bu kaaki keteeri ka bu de ma i nyaari seewa bu numa wara bu saa su n a, ye ba tenge bu yiwee n nu anya ngoo, na bu ni Kristo Tiidefo n sanga di femeya afo akpii.

⁵ Ahin ti yiwee tenge ciciri su n a. Ama, minem bo ba wu na ba ka ni, bere tenge ma haari ko ju afo akpii n awieeri.

⁶ Bere n bo bu du mo tengeeri bu yiwee nu ni, na bu ti mine casim n ni, terefie wo bu do, bere nu ma yiwee nnyo su n kun, bere yo Nyeme ni Kristo Tiidefo sayoowa danguyofom a. Na bu ni yiri sanga di femeya n afo akpii.

Kabo Nyeme kunmaari Sitana ni

⁷ Afo akpii n nyaari ko juuri, na Nyeme ma bu yi Sitana n dansaraka soo n nu ji.

⁸ Na i ko dadaka adamande barasu barasu kere bo bu wo durunya n nu ni, Gogi ni Magogi asien n kere, na i tien bu kere noo na bu ko kun lue. Bu sunnu beberebe ka kunma nmiwo.

⁹ Na ba tereki abara aye durunya n deke kere, na ba bara aye mie n bo Nyeme koro i agaya ni, deke bo i minem wo ni, ama, na sin afite angoro aba ayara bu.

¹⁰ Na ba fa Sitana n bo i dadaka bu n aji cema sin n nu, bo i je ka ferewita na i da ka tieku ni, deke bo bu faari boro nengendore n ni korefo n bo i yo i nu ka i kan Nyeme noanie n jiiri nu ni. Do na bu di wahara, kongue ni wiesu sanga kere.

Kabo Nyeme di minem jore awieeri su ni

¹¹ Na ma nu femeya bie bambaka fofoe be, ni bo i tana su ni. Na angoro ni asienku kere amini i nyunu, bu wo ma bere kun.

¹² Na ma nu minem bo ba wu ni, nfangafom ni tarakam kere, ka bu jina femeya bie n nyunu. Na ma kaaki anu ka be suteke kadasim, na be gusu suteke kadasim bo i ti ngoo dee ni. Nyini kadasim ye bu fa diiri minem bo bu wuuri n jore a, bu sayoowa kere bo bu yo yoori wo nyini kadasim n nu.

¹³ Na tieku n awɔɔ minem bo ba wu n ama, na Yiwee, ni Yiweefɔm Woobiri n awɔɔ minem bo ba wu n ama, na Nyeme afa bu sayoowa bo bu yo yoori adi bu jɔɔ.

¹⁴ Na wɔ fa Yiwee, ni Yiweefɔm Woobiri n aji sin n nu, bo i je ka ferewita na i da ka tieku ni. Ahin sin ni ti yiwee nnyɔ su n a.

¹⁵ Na ba fa sɔɔ kere bo i duma awo má ngɔɔ kadasi n nu aji sin ni.

21

Angoro ni asien fɔfɔɔ n jɔɔ

¹ Na ma ɲu angoro fɔfɔɔ ni asien fɔfɔɔ, dama angoro dawa n ni asien dawa n kere wo má bere kun, na ma ɲu ka tieku nzue n gusu wo má bere kun.

² Na ma ɲu mie casi ni, Yerusalem fɔfɔɔ n ka i fite Nyeme dɔ angoro sujura ba asienɲu, wɔ sese i ɲu su ka konya bo i sukɔ ajaa.

³ Na ma ti akonvi bambaka be ɲga femeya bie n nu, i ɲa, “Am nie fen, Nyeme woobiri wo adamandem dɔ, na i wó bu dɔ.

Na i fá bu yo i minem.

Yiri ni i tii wó bu dɔ na i yó bu Nyeme a.

⁴ Yiri núnuka bu nyunvuin kere bu nyumbaa nu a, yiwee wo má bere kun, ahoresaaki wó má bere kun, minem sún má kun, na minem dí má yaari kun, dama deke dawam kere asin.”

⁵ Na bo i tana femeya bie n su n ase ka, “Nie fen, m suyo deke kere fɔfɔɔ.” Na wɔ kaaki ase m ka, “Kere ahin nɔaniɛ ni, dama i ti nahɔɔre wɔ, na i la dabuɲu.”

⁶ Na wɔ se m ka, “Wɔ yo awie, mini ti mɔfɔ a, na m kaaki ti kasinfɔ, mini ti deke kere bumboori ni i awieeri a. Sɔɔ kere bo nzuehɔɔe tiiri i, m má i nu nzue n bo i ma ngɔɔ ni, na i mi tó má kaari.

⁷ Sɔɔ kere bo i diiri nasara, m má i ahin aceerim ni, na m yó i Nyeme, na m fá i yo m wa.

⁸ Ama, serɛfɔm, ni minem bo ba yo má m yarada, ni dangba yofɔm, ni mine kunfɔm, ni nbara kpiniɛfɔm, ni somaya kɔfɔm, ni bo bu di ayiri ɲgbɛɲɲgbɛɲ, ni munzueyifɔm, ni amɔɔ sufɔm, ni kɔɔɔfɔm kere, bu woobiri la cɛɛma sin n bo i je ka ferewita na i da ka tieku ni. Nyini yiwee ni ti yiwee nnyɔ su n a.”

Yerusalem fɔfɔɔ n jɔɔ

⁹ Na merɛke kun aba m dɔ, i ti merɛke nsom bo bu bita awieeri su dɛɛ kekereke ayaba nsom nu kun wɔ, na wɔ ba ase m ka, “Bra, na m kere u Bombaa n konya ni.”

¹⁰ Na Awiewie Casi n dɛɛ yiko nu, na merɛke n afa m akɔ buka bambaka n bo i ti lenlenge n tii su, na wɔ kere m Yerusalem mie kpiri n bo i ti casi ni, i fite Nyeme dɔ angoro sujura ba.

¹¹ Na i je na i ta wein kabo Nyeme jirima woowa n ti ni, na i sujeje kɔkɔɔre ni sosofura nzue ka afere nyunyumi barasu be bo i da cain ka niɛɛnu.

¹² Ba ta kobe bambaka bo i wo angoro abara aye mie ni, na i la anɔ buru ni nnyɔ, anɔm kere su la merɛke kun kun bo bu jina ɲminda. Ba kere Yisareli anɔ barasu buru ni nnyɔ n duma agɔ anɔ n kun kun kere su.

¹³ Kobe n bue nna n kere la anɔ nsan nsan, nsan wo wie afiri, na nsan wo wie atɔɔri, na nsan nsan wo gbɛɲɲgbɛɲ bue nnyɔ n kere.

¹⁴ Miε n kobe n ajaari seewa yabue n ti buru ni nnyo ɔ, ye bu nya taari kobe n taka su. Ba kere Bombaa n jaramasa buru ni nnyom duma ago yabue n kun kun kere su.

¹⁵ Na mereke n bo i jɔjɔri m do n bita sika kara i saa nu, bo i fa sunsun nie kabo mie n ti bambaka barasu, ni kabo kobem n anom ti teterε barasu, na i kaaki sunsun nie kabo kobe n angoro ti barasu.

¹⁶ Miε n ataari n ti ka soo langba deε su wɔ, i tintiin, ni i teterε kere se wɔ. Na mereke n afa i sika kara sunsuunwa n asunsun mie ni, i tintiin su ti kilo akpii nnyo ni yaa nna wɔ, nyini ti, i tintiin, ni i teterε, ni i angoro kere se wɔ.

¹⁷ Na mereke n asunsun kobe n gusu, kabo adamande bo ajaari ni, na i angoro ako ayasu ka ajaari boowa kun kun ko ju yaa ni aburana ni nna.

¹⁸ Bu faari yabue nyunyumi barasu be bo bu fere i ka jasapa ni taari kobe n a, na ba fa sika bo i da cain ka niεnu, ata mie n ni i tii.

¹⁹ Yabue n bo bu fa seeri mie n kobe n ajaari n ti yabue barasu nyunyumi, na i kere busu wo i ngumi ngumi. I ti kabo Nyeme sayoowa donyuyofo kpien n sana i tanleε su na i wo i hoe su ni. Bu fere bu ka jasapa, ni safiri, ni agata, ni emeradi,

²⁰ ni oniki, ni caniliya, ni krisolite, ni berili, ni topasi, ni krisoparasi, ni jasinti, ni ametisiti.

²¹ Bu faari afere fofoe nyunyumi barasu be fa yoori ano buru ni nnyom n a. Bu faari sika fa yoori mie n atin natiwa kere a, na i da cain ka niεnu.

²² Ma nu ma Nyeme Sereebiri Awuru be mie n nu, dama ya Mi Nyeme Feme Kpiri n ni Bombaa n ade Nyeme Sereebiri Awuru n jinaabiri a.

²³ Miε n koro ma wie ni sara na bu ta wein ma i, dama Nyeme jirima woowa ni ti i wein a, na Bombaa n ti i fitana.

²⁴ Na durunya n nu adamande barasu kere sunati i wein nu wɔ, na durunya n nu nfemem fa bu ajεke kere ba wura nu.

²⁵ Miε n ano ni teke wɔ sanja kere, dama ka kongue wo ma do.

²⁶ Na adamande barasu kere bo bu wo durunya n nu ni fa bu nenge kpakpam ni bu jirima na bu fa wura nu.

²⁷ Ama, deke kere bo i ti ma casi wura ma mie n nu, ni minem bo bu su amem, ni minem bo bu bu korem ni. Ma ka minem bo bu duma wo Bombaa ni ngoo kadasi n nu ni ngumi wura nu a.

22

¹ Na mereke n akaaki akere m kunma nzue bo i ma ngoo, i da cain kabo niεnu ti n wɔ, i songi fite Nyeme ni Bombaa n femeya bie n nu wɔ,

² na i susongi mie n atin n afien ni. Kunma n bue nnyo n kere, baka n bo i ma ngoo n jinjina aheme. Na i susu suuwa barasu buru ni nnyo afo kere, sara kere ni i suuwa. Na bu sufa i nyawa n tuntun durunya n nu adamande kere torem.

³ Deke bo Nyeme ayo i noo ngbeen wo ma mie n nu. Ama, Nyeme ni Bombaa n femeya bie ni wo do, na i akoom n susu i.

⁴ Bu nu ni nyunuawa dika kabo i ti barasu, na i kere i duma go bu numasu.

⁵ Awosin wo ma do, be koro ma fitana do, na bu kaaki koro ma wie do, dama ya Mi Nyeme Feme ni i tii yo bu wein a. Na bu di femeya bo i la ma awieeri.

Kabo Yesu seeri ka i ce ma, i kaaki ba ni

⁶ Na mereke n akaaki ase m ka, "Ahin noniem n ti nahore wɔ, na i ti deke bo songo yo i yarada. Ya Mi Nyeme Feme bo i faari i Awiewie Casi n

wuraari i noanie kanfom nu ni, yiri asunma i mereke n ka i ba se i akoom fa ko sa bo i yo kisa bere n a.”

⁷ Ya Mibie Yesu na, “Am so am sui. I ce ma, m ba kisa. Terefie wo sono kere bo i deeri noanie n bo i wo ahin kadasi n nu na i jajo fa ko sa bo i ba yo n nu.”

⁸ Mini Yohane tiiri, ye m nuuri ahin deke n kere, m tiiri na m nuuri i so ni, na ma kutu mereke n bo i kereeri nyini dekem n jaa bu ka m su i.

⁹ Na wo se m ka, ma m yo so, ama, m kansu Nyeme ngumi. Na wo kaaki ase m ka, “M ti u bengu akoo, ni u ninbaam bo bu ti Nyeme noanie kanfom, ni bo bu de noanie n bo i wo ahin kadasi n nu n be wo.”

¹⁰ Na wo kaaki ase m ka, ma m se ka m fie noanie n bo i wo ahin kadasi n nu na i jajo fa ko sa bo i ba yo n su, dama i ce ma, i kere yo kisa.

¹¹ I na sono kere bo i yo satie, ma i ko su yo i satie, sono kere gusu bo i yo dangba sa ni, ma i ko su yo i dangba sa ni, na sono kere gusu bo i yo sakpa, ma i ko su yo i sakpa ni, na sono kere gusu bo i ti casi, ma i ko su wo i casi wo.

¹² Ya Mibie Yesu na, “Am so am sui. I ce ma, m ba kisa, na m ba to sono kere kaari kabo i jumayoowa ti barasu.

¹³ Mini ti mofa a, na m kaaki ti kasinfo, mini ti deke kere bumboori ni i awieeri n a.”

¹⁴ Terefie wo minem bo ba nmisi bu suturam ayo casi n do, adena bu koro nya atin di baka n bo i ma ngoo n dee suuwa ni, na bu fa mie n ano n wura mie n nu.

¹⁵ Ama, dangba yofom, ni bo bu di ayiri ngbeenngbeen, ni bara kpini-fom, ni somaya kofom, ni mine kunfom, ni amoe sufom, ni bo bu bu kore bu noanie jajoowa ni bu sa yoori nu n kere koro wura ma mie n nu.

¹⁶ “Mini Yesu asunma m mereke n ka i ba se am ahin jore n a, ambere bo am wo Kristo jamam n nu ni. Mini ti Feme Davidi anuma a, na m ti asaakojo bo i ta ni.”

¹⁷ Awiewie Casi n ni konya n na, “Bra.”

Sono kere bo i ti ahin, ma i mi gusu se ka, “Bra.”

Na sono kere bo nzuehoe ati i,

na i koro ngoo nzue ni,

i bra na i ba de nu ngbeen.

Awieeri su n jore

¹⁸ Mini Yohane subobo sono kere bo i ti ahin kadasi n nu jore fa ko sa n bo i ba yo n lee, ka sono kere bo i faari noanie be bukaari su, Nyeme fa kekereke n kere bo i wo ahin kadasi n nu n buka i mi su.

¹⁹ Na sono kere gusu bo i yiiri noanie n bo i wo ahin kadasi n nu n be, Nyeme yi i mi n aceeri na i nya ma baka n bo i ma ngoo n dee suuwa n be, na i ma i wura ma mie casi n nu, kabo ba kere bu jore ahin kadasi n nu.

²⁰ Yiri n bo i di ahin jorem kere daani n ase ka, “Nahore. I ce ma, m ba kisa.”

Ma i yo so. Ya Mibie Yesu, bra. Ami.

²¹ Ma ya Mibie Yesu buka Nyeme minem kere. Ami.